

Holy Bible

Aionian Edition®

हरियाणवी बाइबिल
Haryanvi Bible

AionianBible.org
The world's first Holy Bible untranslation
100% free to copy and print
also known as “ The Purple Bible ”

Holy Bible Aionian Edition ®

हरियाणवी बाइबिल
Haryanvi Bible

Creative Commons Attribution ShareAlike 4.0 International, 2018-2024

Source text: eBible.org

Source version: 8/25/2024

Source copyright: Creative Commons Attribution ShareAlike 4.0
The Love Fellowship, 2021

Formatted by Speedata Publisher 4.19.20 (Pro) on 8/31/2024

100% Free to Copy and Print

TOR Anonymously

<https://AionianBible.org>

Published by Nainoia Inc

<https://Nainoia-Inc.signedon.net>

We pray for a modern Creative Commons translation in every language
Translator resources at <https://AionianBible.org/Third-Party-Publisher-Resources>

Report content and format concerns to Nainoia Inc

Volunteer help is welcome and appreciated!

Celebrate Jesus Christ's victory of grace!

Preface

हरियाणवी at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org, with Android, and TOR network. Why purple? King Jesus' Word is royal... and purple is the color of royalty!

History

हरियाणवी at AionianBible.org/History

- 04/15/85 - Aionian Bible conceived as B. and J. pray.
- 12/18/13 - Aionian Bible announced as J. and J. pray.
- 06/21/15 - Aionian Bible birthed as G. and J. pray.
- 01/11/16 - AionianBible.org domain registered.
- 06/21/16 - 30 translations available in 12 languages.
- 12/07/16 - Nainoia Inc established as non-profit corporation.
- 01/01/17 - Creative Commons Attribution No Derivatives 4.0 license added.
- 01/16/17 - Aionian Bible Google Play Store App published.
- 07/01/17 - 'The Purple Bible' nickname begins.
- 07/30/17 - 42 translations now available in 22 languages.
- 02/01/18 - Holy Bible Aionian Edition® trademark registered.
- 03/06/18 - Aionian Bibles available in print at Amazon.com.
- 10/20/18 - 70 translations now available in 33 languages.
- 11/17/18 - 104 translations now available in 57 languages.
- 03/24/19 - 135 translations now available in 67 languages.
- 10/28/19 - Aionian Bible nursed as J. and J. pray.
- 10/31/19 - 174 translations now available in 74 languages.
- 02/22/20 - Aionian Bibles available in print at Lulu.com.
- 05/25/20 - Illustrations by Gustave Doré, La Grande Bible de Tours, Felix Just.
- 08/29/20 - Aionian Bibles now available in ePub format.
- 12/01/20 - Right to left and Hindic languages now available in PDF format.
- 03/31/21 - 214 translations now available in 99 languages.
- 11/17/21 - Aionian Bible Branded Leather Bible Covers now available.
- 12/20/21 - Social media presence on Facebook, Twitter, LinkedIn, YouTube, etc.
- 01/01/22 - 216 translations now available in 99 languages.
- 01/09/22 - StudyPack resources for Bible translation study.
- 02/14/22 - Strong's Concordance from Open Scriptures and STEP Bible.
- 02/14/23 - Aionian Bible published on the TOR Network.
- 12/04/23 - Eleēsē added to the Aionian Glossary.
- 02/04/24 - 352 translations now available in 142 languages.
- 05/01/24 - 370 translations now available in 164 languages.
- 08/05/24 - 377 translations now available in 166 languages.
- 08/18/24 - Creative Commons Attribution 4.0 International, if source allows.

Table of Contents

NEW TESTAMENT

मत्ती	11
मरकुस	36
लूका	52
यूहन्ना	78
प्रेरितों के काम	99
रोमियों	125
1 कुरिन्थियों	138
2 कुरिन्थियों	151
गलातियों	159
इफिसियों	164
फिलिप्पियों	169
कुलुरिसियों	172
1 थिस्सलुनीकियों	175
2 थिस्सलुनीकियों	178
1 तीमुथियुस	180
2 तीमुथियुस	184
तीतुस	187
फिलेमोन	189
इब्रानियों	190
याकूब	200
1 पतरस	203
2 पतरस	207
1 यूहन्ना	210
2 यूहन्ना	213
3 यूहन्ना	214
यहूदा	215
प्रकाशित वाक्य	217

APPENDIX

Reader's Guide


Glossary

Maps

Destiny

Illustrations, Doré

NEW TESTAMENT



फेर यीशु नै कह्या, “हे पिता इन्हने माफ कर, क्यूँके ये नही जाणदे के ये के करै सै।”
अर उनने पचीं गेर के उसके लत्ते बांड लिए।
लूका 23:34

मत्ती

1 ये यीशु मसीह के पूर्वजां के नाम सै। वो राजा दाऊद का वंशज था, अर राजा दाऊद अब्राहम का वंशज था। 2 अब्राहम का बेटा इसहाक था, अर इसहाक का बेटा याकूब था, फेर याकूब तै यहूदा अर उसके भाईयाँ का जन्म होया। 3 यहूदा के बेटे फिरिस अर जोरह थे। (फिरिस अर जोरह की माँ का नाम तामार था।) फिरिस का बेटा हिस्नोन था। हिस्नोन का बेटा एराम था, 4 एराम का बेटा अम्मीनादाब था। अम्मीनादाब तै नहशोन, अर नहशोन तै सलमोन का जन्म होया, 5 सलमोन का बेटा बोआज था। (बोआज की माँ का नाम राहाब था।) बोआज अर रुत तै ओबेद का जन्म होया, अर ओबेद का बेटा यिशै था। 6 अर यिशै का बेटा राजा दाऊद था। (राजा सुलैमान दाऊद का बेटा था।) जो उस बिरबानी तै जन्मा था जो पैहले उरिय्याह की घरआळी थी, 7 सुलैमान का बेटा रहबाम था। अर रहबाम का बेटा अबिय्याह था। अर अबिय्याह तै आसा का जन्म होया। 8 आसा का बेटा यहोशाफात था। फेर यहोशाफात तै योराम अर योराम तै उज्जियाह का जन्म होया। 9 उज्जियाह का बेटा योताम था अर योताम, आहाज का। फेर आहाज तै हिजकिय्याह का जन्म होया। 10 हिजकिय्याह तै मनशिशह का जन्म होया। मनशिशह का बेटा आमोन था, अर आमोन तै योशियाह का जन्म होया। 11 फेर इस्राएल के माणसां नै कैदी बणाकै बेबीलोन देश ले जाण के बखत योशियाह तै यकुन्याह, अर उसके भाईयाँ का जन्म होया। 12 बेबीलोन देश म्ह पोहचाये जाये पाच्यै यकुन्याह तै शालतियेल का जन्म होया, फेर शालतियेल तै जरुब्बाबिल का जन्म होया। 13 जरुब्बाबिल तै अबीहूद का जन्म होया, अबीहूद तै एलयाकीम का अर एलयाकीम तै अजोर का जन्म होया। 14 अजोर का बेटा सदोक था। सदोक तै अखीम अर अखीम तै इलीहूद का जन्म होया। 15 इलीहूद का बेटा इलियाजार था। अर इलियाजार मत्तान का। मत्तान का बेटा याकूब था। 16 अर याकूब तै यूसुफ का जन्म होया, जो मरियम का धणी था। अर मरियम तै यीशु जो मसीह कुहावै सै, पैदा होया। 17 इस तरियां अब्राहम तै दाऊद तक चौदहा पीढ़ी होई, अर दाऊद तै लेकै इस्राएलियाँ नै कैदी बणाकै बेबीलोन देश भेज्जे जाण तक चौदहा पीढ़ी, अर इस्राएलियाँ कैदी बणाकै बेबीलोन देश म्ह भेज्जे जाण कै बखत तै मसीह तक चौदहा पीढ़ी और होई। 18 यीशु मसीह का जन्म इस तरियां होया, कै जिब उसकी माँ मरियम की सगाई यूसुफ कै गैल होगयी, तो उनका ब्याह होण तै पैहल्याए बेरा पाट्या के वा पवित्र आत्मा की शक्ति तै गर्भवती सै। 19 पर उसका धणी यूसुफ जो एक धर्मी माणस था, उसनै बदनाम न्ही करणा चाहवै था, इस खात्तर उस ताहीं चुपके तै छोड़ण का विचार करया। 20 जिब वो इन बाततां नै सोच्यै ए था तो परमेसवर का सुर्गदूत उसनै सपनै म्ह आकै कहण लागया, “हे यूसुफ! दाऊद के वंशज, तू अपणी घरआळी मरियम नै अपणे उरै ल्याण तै ना डरै, क्यूँके जो उसकी कोख म्ह सै, वो पवित्र आत्मा की ओड़ तै सै।

21 वो बेटा जाम्यैगी अर तू उसका नाम यीशु धरिये, क्यूँके वो अपणे माणसां का उनके पापां तै उद्धार करैगा।” 22 वो सारा इस खात्तर होया के जो वचन प्रभु नै यशायाह नबी कै जरिये कह्या था, वो पूरा हो 23 देख्खो एक कुँवारी गर्भवती होगी अर एक छोरा जण्येगी, अर उसका नाम इम्मानुएल धरया जावैगा, जिसका मतलब सै “परमेसवर म्हारै गैल सै।” 24 फेर यूसुफ नींद तै जाग कै परमेसवर कै सुर्गदूत के हुकम कै मुताबिक मरियम नै अपणी घरआळी बणाकै अपणे याडै ले आया। 25 अर जिब ताहीं उसनै छोरा ना जणया जिब तक यूसुफ उसके धोरै न्ही गया अर उसनै बाळक का नाम यीशु धरया।

2 हेरोदेस राजा जिब यहूदिया परदेस पै राज करण लागरया था, तो उस परदेस के बैतलहम नगर म्ह यीशु का जन्म होया। तो थोड़े बखत बाद कई विद्वान जो तारां का ज्ञान राक्खे थे, पूरब तै यरुशलेम नगर म्ह आये। 2 वो आकै बुड़झण लागे, यहूदियाँ का राजा जिसका जन्म होया सै, वो कित्त सै? हमनै पूरब दिशा म्ह उसका तारा देख्या सै, जो उसके जन्म के बारें म्ह बतावै सै, इस करके हम उसकी आराधना करण आये सां। 3 वो सुणकै हेरोदेस राजा अर उसके गैल यरुशलेम नगर के सारे लोग चिन्ता करण लाग्गै। 4 फेर उसनै माणसां के सारे प्रधान याजकां अर शास्त्रियाँ ताहीं कठ्ठा करके उनतै बुड़झया, के पवित्र ग्रन्थ के कहवै सै? “मसीह का जन्म कित्त होणा चाहिये?” 5 उननै उस ताहीं कह्या, “यहूदिया परदेस के बैतलहम नगर म्ह,” क्यूँके नबियाँ कै जरिये योए पवित्र ग्रन्थ म्ह लिख्या गया सै: 6 “हे बैतलहम नगर, तू जो यहूदा कै परदेस म्ह सै, तू किसे भी ढाळ तै यहूदा कै अधिकारियां म्ह सारा तै छोटा कोन्या। क्यूँके तेरे म्ह तै एक राजा लिकडैगा, जो मेरी प्रजा इस्राएल की रुखाळी करैगा।” 7 हेरोदेस जाणणा चाहवै था के उस बाळक की उम्र कितनी सै, इस करके उसनै तारां का ज्ञान राक्खण आळा ताहीं लुक्क्या बुलाके उनतै बुड़झया के तारा ठीक किस बखत दिख्या था। 8 अर राजा नै यो कहकै उन ताहीं बैतलहम नगर भेज्जा, “जाओ, उस बाळक के बारें म्ह ठीक-ठाक बेरा पाड़ो, अर जिब वो मिल ज्या तो मन्नै खबर द्यो, ताके मै भी आणकै उसकी आराधना करूँ।” 9 वे राजा की बात सुणकै चले गए, अर जो तारा उननै पूरब दिशा म्ह देख्या था, वो उनके आगै-आगै चाल्या। अर जडै बाळक था, उस घर कै उप्पर जाकै रुक गया। 10 उस तारे नै देखकै वे घणे आनन्दित होए, जो उस घर के उप्पर रुक गया था। 11 उननै उस घर म्ह जाके उस बाळक ताहीं उसकी माँ मरियम कै गैल देख्या, अर झुकके बाळक की आराधना करी, अर अपणा-अपणा झोळा खोल कै उस ताहीं सोन्ना, लोबान, अर गन्धरस की भेट चढ़ाई। 12 फेर सपनै म्ह परमेसवर नै या चेतावनी दी के हेरोदेस राजा कै धोरै फेर ना जाड्यो, वे राजा ताहीं बिना बताये दुसरे राह तै अपणे देश म्ह चले गये। 13 विद्वानां कै चले जाणके बाद परमेसवर कै एक सुर्गदूत नै सपनै म्ह आकै यूसुफ तै कह्या, “उठ! उस बाळक नै अर उसकी माँ नै लेकै मिस्र देश म्ह भाग ज्या। अर जिब ताहीं मै तेरे तै ना कहूँ, जिब ताहीं ओड़ै रहिये। क्यूँके हेरोदेस राजा इस

बाळक नै टोहकै उस ताहीं उसनै मरवाणा चाहवै सै।” 14 फेर वो रात नै ए उठकै बाळक अर उसकी माँ नै लेकै मिस्र देश नै चाल पड्या। 15 अर हेरोदेस राजा कै मरण तक ओड़ैए रह्या। ताके वो वचन जो प्रभु नै होशे नबी कै जरिये कह्या था वो पूरा हो “मन्नै अपने बेट्टै ताहीं मिस्र देश तै बुलाया।” 16 जब हेरोदेस राजा नै यो देख्या, के विद्वानां नै उसके गैल धोकखा करया सै, फेर वो छो म्ह भरग्या। उसनै सैनिकां ताहीं भेजकै विद्वानां कै जरिये ठीक-ठाक बताये होइ बखत कै मुताबिक बैतलहम नगर अर उसके लोवै-धोवै की जगहांया के सारे छोरयां ताहीं जो दो साल के या उसतै छोट्टे थे, वे सब मरवा दिए। 17 फेर जो वचन यिर्मयाह नबी कै जरिये कह्या ग्या था, वो पूरा होया, 18 “रामाह नगर म्ह एक रोण की आवाज सुणाई देई, रोणा अर घणाए बिलाप। राहेल अपने बाळकां कै खात्तर रोवै थी, अर चुप न्ही होणा चाहवै थी, क्यूँके वे इब मरगे थे।” 19 हेरोदेस राजा कै मरण के पाछै, परमेसवर का सुगंदूत मिस्र देश म्ह यूसुफ तै सपनै म्ह बोल्या, 20 “उठ, बाळक अर उसकी माँ नै लेकै इस्राएल कै देश म्ह चल्या ज्या, क्यूँके हेरोदेस राजा अर उसके माणस जो बाळक नै मारणा चाहवै थे, वे मर लिये सै।” 21 यूसुफ नींद तै जाजा, अर बाळक अर उसकी माँ नै गेल्या लेकै इस्राएल देश म्ह बोहड़ आया। 22 पर या सुणकै के अरखिलाउस अपने पिता हेरोदेस राजा की जगहां यहूदिया परदेस पै राज करै सै, ओड़ै जाण तै डरग्या। फेर सपनै म्ह परमेसवर की ओड़ तै चेतावनी पाकै गलील परदेस म्ह चल्या गया। 23 अर नासरत नाम कै नगर म्ह जा बस्या, ताके वो वचन पूरा हो, जो नबियाँ कै जरिये यीशु के बारे कह्या गया था: “वो नासरी कुहावैगा।”

3 उन दिनां म्ह यूहन्ना बपतिस्मा देण आळा आकै यहूदिया परदेस के जंगल-बियाबान म्ह यो प्रचार करण लाग्या: 2 “पाप करणा छोड़ घो, क्यूँके सुर्ग का राज्य धोरे आ लिया सै।” 3 यो वोए सै, जिसका जिक्र यशयाह नबी कै जरिये करया गया: “जंगल-बियाबान म्ह तै ए कोए रुक्का देवै सै, के प्रभु का राह तैयार करो अर उसकी सड़क सीध्ठी करो।” 4 यूहन्ना ऊँट के रुप के लते पहरणीया अर अपनी कड़ म्ह चमड़े की पेट्टी-बाँधे रहवै था। उसका खाणपान टिड्डियाँ अर शहद था। 5 फेर यरुशलम नगर अर सारे यहूदिया परदेस अर यरदन नदी कै लोवै-धोवै की सारी जगहां के माणस उसके धोरे आ ग्ये। 6 उन सारया नै अपने-अपणे पापां नै मानके यरदन नदी म्ह उसतै बपतिस्मा लिया। 7 जब उसनै घणे सारे फरीसियाँ अर सदूकियाँ ताहीं अपने धोरे बपतिस्मा लेण खात्तर आन्दे देख्या, तो बोल्या, “हे साँप के सप्पोलो जिसे माणसाँ, थम नरक की सजा तै किस ढाळ बचोगे? (questioned) 8 इस खात्तर जै थमनै सच म्ह पाप करणा छोड़ दिया सै तो यो दिखण खात्तर भले काम तो करो। 9 अर अपने-अपणे मन म्ह न्यू मतना सोच्यो के म्हारा पिता अब्राहम सै। क्यूँके मै थमनै कहूँ सूं के परमेसवर इन पत्थरां तै अब्राहम के खात्तर ऊलाद पैदा कर सकै सै। 10 इब कुहाड़ा दरखतां की जड़ पै धरया सै, इस करके जो-जो दरखत बढ़िया फळ न्ही ल्यांदा, वो काट्या अर आग म्ह झोक्या जावैगा। इसका मतलब यो सै

परमेसवर उन सारया नै दण्ड देवैगा जो पाप करणा न्ही छोड़ते। 11 “मै तो थमनै पाणी तै, पापां ताहीं छोड़ण का बपतिस्मा देरू सूं, पर जो मेरे पाछै आवैगा, वो मेरे तै भी शक्तिशाली सै। मै उसकी जूती ठाण जोग्गा भी कोनी। वो थमनै पवित्र आत्मा अर आग तै बपतिस्मा देवैगा। 12 उसका छाज उसके हाथ म्ह सै, अर वो अपना खलिहाण आच्छी तरियां साफ करैगा, अर अपने नाज नै अपने कोठार (गोदाम) म्ह कठ्ठा करैगा, पर भुरळी ताहीं उस आग म्ह जळावैगा जो कदे बुझै कोनी।” 13 उस बखत यीशु गलील परदेस तै यरदन नदी कै कन्ठारे यूहन्ना के धोरे उसतै बपतिस्मा लेण आया। 14 पर या कहकै यूहन्ना उसनै रोक्कण लाग्या, “कै मन्नै तो तेरे हाथ तै बपतिस्मा लेण की जरूरत सै, अर तू मेरे धोरे आया सै?” 15 यीशु नै उसतै जवाब दिया, “कै इब तो योए होण दे, क्यूँ के हमनै इस्से तरियां तै सारी धार्मिकता पूरी करणा ठीक सै।” फेर उसनै उसकी बात मान ली। 16 अर यीशु बपतिस्मा लेकै जब पाणी तै उप्पर आया, अर अकास खुलग्या, अर उसनै परमेसवर की पवित्र आत्मा ताहीं कबूतर की तरियां उतरते अर अपने उप्पर आन्दे देख्या। 17 अर देखखो, परमेसवर सुर्ग म्ह तै बोल्या, “के यो मेरा प्यारा बेट्टा सै, जिसतै मै भोत घणा राज्जी सूं।”

4 बपतिस्मे के बाद पवित्र आत्मा यीशु नै जंगल-बियाबान म्ह लेग्या, ताके शैतान उस ताहीं परखै। 2 वो चाळीस दिन अर चाळीस रात, बिना खाए पिए रह्या, फेर उसनै भूख लागी। 3 फेर शैतान नै धोरे आणके उसतै कह्या, “जै तू परमेसवर का बेट्टा सै, तो कहकै साबित करदे, के ये पत्थर रोटी बण जावै, ताके तू इननै खा सकै।” 4 यीशु नै जवाब दिया: “पवित्र ग्रन्थ म्ह लिख्या सै, ‘माणस सिर्फ रोटी तै ए न्ही, पर परमेसवर के हरेक वचन तै जो उसनै मान्ने सै, जिन्दा रहैगा।’” 5 फेर शैतान उसनै पवित्र नगर यरुशलम म्ह लेग्या अर मन्दर की चोट्टी पै खड्या कर दिया। 6 अर उसतै बोल्या, “जै तू परमेसवर का बेट्टा सै, तो अपने-आपनै तळे गेर के साबित कर। क्यूँके पवित्र ग्रन्थ म्ह लिख्या सै: वो तेरे बाबत अपने सुगंदूतां नै हुकम देगा, अर वे तन्नै हाथो हाथ उठा लेवेंगे कदे इसा ना हो के तेरे पायां म्ह पत्थर तै ठेस लागे।” 7 यीशु नै उसतै कह्या, “यो भी पवित्र ग्रन्थ म्ह लिख्या सै, के ‘तू अपने प्रभु परमेसवर नै ना परखै।’” 8 फेर शैतान उसनै घणे ऊँच्चे पहाड़ पै लेग्या अर सारी दुनिया का राजपाट अर उसकी शानों-शोकत दिखकै, 9 उसतै बोल्या, “जै तू झुककै मेरी भगति करै, तो मै सारा किमे तन्नै दे दियूंगा।” 10 फेर यीशु उसतै बोल्या, “हे शैतान दूर हो ज्या, पवित्र ग्रन्थ म्ह लिख्या सै: तू प्रभु अपने परमेसवर की भगति कर, अर सिर्फ उस्से की सेवा करया कर।” 11 फेर शैतान उसके धोरे तै चल्या गया, अर देख्ये, सुगंदूत आणके उसकी सेवा करण लागे। 12 जब उसनै न्यू सुणया के यूहन्ना कैदी बणा लिया सै, तो वो यहूदिया परदेस तै निकड़कै गलील परदेस म्ह चल्या गया। 13 अर फेर वो गलील परदेस के नासरत नगर नै छोड़के कफरनहूम नगर म्ह, जो गलील समुन्दर कै किनारे था, कफरनहूम उस क्षेत्र म्ह गलील के समुन्दरी तट पै था, जड़ै जबूलून अर

नपताली के गोत्र के माणस रहवै थे। 14 ताके जो यशायाह नबी कै जरिये कह्ला गया था, वो पूरा हो 15 “जबूलन अर नपताली जाति कै परदेस, गलील समुन्दर कै किनारे यरदन नदी के पार, गलील परदेस म्ह रहण आळे गैर यहूदी माणस” 16 “जो माणस अन्धकार म्ह जीण लागरे थे, उननै तेज चान्दणा देख्या। वे उस जगहां म्ह जीण लागरे थे, जित हर घड़ी मौत का खतरा था, उनपै चान्दणा चमक्या।” 17 उस बखत तै यीशु नै प्रचार करणा अर कहणा शरू करया, “पाप करणा छोड़ दो, क्यूँके सुर्ग का राज्य धोरे आया सै।” 18 गलील परदेस म्ह गलील समुन्दर कै किनारे घूमदे होए उसनै दो भाईयाँ ताहीं शमौन जो पतरस कुहावै सै, अर उसके भाई अन्द्रियास ताहीं समुन्दर म्ह जाळ गरेते देख्या, क्यूँके वे मछवारे थे। 19 यीशु नै उनतै कह्ला, “मेरे पाच्छे आओ, मै थमनै माणसां ताहीं कठ्ठे करण आळे बणाऊंगा ताके वो मेरे चेल्लें बणे।” 20 वे जिब्बे जाळां नै छोड़के उसके चेल्लें बणण खात्तर उसके पाच्छे हो लिये। 21 ओड़ तै आगे चालकै, यीशु नै दो और भाईयाँ ताहीं यानी जब्दी के बेटे याकूब अर उसके भाई यूहन्ना ताहीं देख्या। वे अपने पिता जब्दी कै गैल किस्ती पै अपने जाळां ताहीं ठीक करै थे। यीशु नै उन ताहीं भी बुला लिया। 22 वे जिब्बे किस्ती अर अपने पिता नै छोड़के उसके चेल्लें बणण खात्तर उसके पाच्छे हो लिये। 23 यीशु सारे गलील परदेस म्ह फिरता होया उनकै आराधनालयॉ म्ह उपदेश सुणान्दा, अर राज्य का सुसमाचार सुणान्दा अर माणसां की हरेक ढाळ की बीमारी अर कमजोरियाँ नै दूर करदा रह्ला। 24 अर सारे सीरिया परदेस म्ह उसका यश फैलगया, अर माणस सारे बिमारां नै, जो कई ढाळ की बिमारियाँ अर दुखां तै जकड़े होए थे, जिन म्ह भुंडी आत्मा थी, अर मिर्घा आळे अर लकवे के रोगी नै उसके धोरे ल्याए उसनै उन ताहीं ठीक करया। 25 अर गलील परदेस, दिकापुलिस नगर, यरुशलम नगर, यहूदिया परदेस अर यरदन नदी कै पार तै भीड़ की भीड़ उसके पाच्छे हो ली

5 यीशु उस भीड़ नै देखके पहाड़ पै चला गया, अर जब बैठग्या तो उसके चेल्लें उसके धोरे आए। 2 अर वो अपनी ऊँची आवाज म्ह उननै या शिक्षा देण लाग्या: 3 “धन्य सै वे, जो या जाणे सै के उननै परमेसवर की जरूरत सै, क्यूँके सुर्ग का राज्य उननै का सै। 4 धन्य सै वे, जो शोक करै सै, क्यूँके वे परमेसवर तै शांति पावेंगे। 5 धन्य सै वे, जो नम्र सै, क्यूँके वे परमेसवर के जरिये धरती के हकदार होंगे। 6 धन्य सै वे, जो धार्मिकता का जीवन जीण खात्तर भूखे अर तिसाए सै, क्यूँके वे परमेसवर के जरिये छिकाए जावेंगे। 7 धन्य सै वे, जो दया करण आळे सै, क्यूँके परमेसवर भी उनपे दया करेगा। 8 धन्य सै वे, जिनके मन शुद्ध सै, क्यूँके वे परमेसवर नै देखेंगे। 9 धन्य सै वे, जो मेल करण आळे सै, क्यूँके वे परमेसवर के बेटा-बेटी कुहावेंगे। 10 धन्य सै वे, जो धार्मिकता के कारण सताए जावै सै, क्यूँके सुर्ग का राज्य उन्हे का सै।” 11 “धन्य सौं थम, जिब माणस मेरे कारण थारी बुराई करै सतावै अर झूठ बोल-बोलकै थारे बिरोध म्ह सारी तरियां की बुरी बात फैलावै,

क्यूँके थम मेरे चेल्लें सों। 12 फेर खुश अर मग्न होइयो, क्यूँके थारे खात्तर सुर्ग म्ह बड़ड़ा ईनाम सै। इस करके के उननै उन नबियाँ ताहीं भी इस्से ढाळ सताया था, जो थारे तै भी भोत पैहल्या थे।” 13 “थम धरती पै लोग्गां खात्तर नूण की तरियां सों, पर जै नूण का सुवाद जान्दा रहवै, तो वो किस चीज तै नमकीन करया जावेगा? फेर वो किसे काम का न्ही, सिर्फ इसके के बाहर फेक्या ज्या अर माणसां के पैरां तळे चिकल्या ज्या।” 14 “थम दुनिया के लोग्गां खात्तर चाँदणा की तरियां सों। जो नगर पहाड़ पै बस रह्ला सै वो लुत्क न्ही सकदा। 15 अर माणस दीवा जळा कै बरतन कै तळे न्ही पर टांडी पै थरै सै, फेर उसतै घर के सारे माणसां ताहीं चान्दणा ज्या सै। 16 उस्से तरियां थारा चान्दणा माणसां के स्याम्ही चमके के वे थारे भले काम्मां नै देखके थारे पिता की, जो सुर्ग म्ह सै बड़ड़ा करै।” 17 “या ना समझो, के मै मूसा के नियम-कायदा या नबियाँ के लेख नै मिटाण आया सूं, मिटाण न्ही, पर पूरा करण आया सूं। 18 क्यूँके मै थमनै सच कहूँ सूं, के जब ताहीं धरती अर अकास सै, जद ताहीं नियम-कायदा म्ह लिखी हरेक छोटी तै छोटी बात पूरी होए बिना न्ही रहवेगी। 19 इस करके जो कोए इन छोटे तै छोटे हुकम म्ह तै किसे एक नै भी न्ही मानता, अर दुसरे माणसां नै भी उसाए सिखावै, वो सुर्ग के राज्य म्ह सारा तै छोटा कुहावेगा, पर जो कोए उन सारे हुकमां पै चाल्लैगा अर उननै सिखावेगा, वोए सुर्ग राज्य म्ह महान् कुहावेगा। 20 क्यूँके मै थमनै कहूँ सूं, के जै थारा आत्मिक जीवन शास्त्रियाँ अर फरीसियाँ के आत्मिक जीवन तै बढ़के न्ही हो, तो थम सुर्ग के राज्य म्ह कदे बड़ न्ही पाओगे।” 21 “थमनै सुणया होगा, के थारे पूर्वजां तै कह्ला, गया था के ‘खून ना करियो’, अर ‘जो कोए खून करेगा वो कचेह्दी म्ह दण्ड के लायक होगा।’ 22 पर मै थमनै या कहूँ सूं, के जो कोए अपने भाई पै गुस्सा करेगा, वो कचेह्दी म्ह दण्ड के लायक होगा, अर जो कोए अपने भाई नै निकम्मा कहवेगा वो बड़ी सभा म्ह दण्ड के लायक होगा, अर जो कोए कहवै ‘अरे बेकूफ’ वो नरक की आग के दण्ड के लायक होगा।” (Geenna g1067) 23 “इस करके जै तू अपना चढ़ावा मन्दर म्ह वेदी पै चढ़ावै, अर ओड़ै तू याद करै, के तेरे भाई के मन म्ह तेरे खात्तर किमे बिरोध सै, 24 तो तू अपना चढ़ावा ओड़ै वेदी कै धोरे छोड़दे, अर ज्याके अपने भाई तै मेळ-मिलाप कर अर फेर आके अपना चढ़ावा चढ़ा।” 25 “जिब तक तू अपने बैरी के गेल्या राह म्ह सै, तो उसतै जिब्बे मेळ-मिलाप करले, कदे इसा ना हो के बैरी तन्नै न्यायाधीश के हवालै, अर न्यायाधीश तन्नै सिपाही के हवालै करदे, अर तू जेळ म्ह गेर दिया जावै। 26 मै तन्नै सच कहूँ सूं के जिब ताहीं तू पाई-पाई न्ही भरदे जद ताहीं जेळ तै छुटण न्ही पावेगा।” 27 “थमनै परमेसवर का हुकम सुणया होगा के कह्ला गया था, ‘जारी ना करियो।’ 28 पर मै थमनै न्यू कहूँ सूं, के जो कोए किसे बिरबान्नी पै भुंडी निगांह गेरै वो अपने मन म्ह उसतै जारी करया। 29 जै तेरी सोळी आँख तेरे तै पाप करवावै सै, तो उसनै लिकाड़ के फेंक दे, क्यूँके तेरे खात्तर योए ठीक सै के तेरे अंगा म्ह तै एक नाश हो ज्या अर तेरी सारी

देह नरक म्ह ना गेरी जावै। (Geenna g1067) 30 जै तेरा सोळा हाथ तेरे तै पाप करवावे सै, तो उसने काट के फेंक दे, क्यूँके तेरे खात्तर योए आच्छा सै के तेरे बाक्की अंगा म्ह तै एक नाश हो जावै अर तेरी सारी देह नरक म्ह नही गेरी जावै।” (Geenna g1067) 31 “यो भी कह्या गया था, ‘जो कोए अपनी घरआळी नै तलाक देणा चाहवै, तो उसने तलाकनामा दे।’ 32 पर मै थमनै यो कहुँ सूँ के जो कोए अपनी घरआळी नै जारी कै सिवा किसे और कारण तै तलाक दे, तो वो उसतै जारी करवावे सै। अर जो कोए उस छोड्डी होई तै ब्याह करै, वो जारी करै सै।” 33 “फेर थमने सुणया होगा के थारे पूर्वजां तै कह्या गया था, ‘झूठ्ठी कसम ना खाईयों, पर प्रभु के खात्तर अपनी कसम नै पूरी करियो।’ 34 पर मै थमनै या कहुँ सूँ के कदे कसम ना खाईयों, ना तो सुर्ग की, क्यूँके वो परमेसवर का सिंहासन सै। 35 ना धरती की, क्यूँके वा उसके पैरां की पिढ्ठी सै, ना यरुशलेम नगर की, क्यूँके वो महाराजा का नगर सै। 36 अपने सिर की भी कसम ना खाईयों क्यूँके तू एक बाळ नै भी ना तो धोळा, अर ना काळा कर सकै सै। 37 पर थारी बात “हाँ” की हाँ, या ‘ना’ की ना हो, क्यूँके जो किमे इसतै घणा होवै सै वो शैतान की ओड़ तै होवै सै।” 38 “थमनै नियम-कायदा म्ह सुणया होगा के कह्या था, आँख के बदले आँख, अर दाँत के बदले दाँत। 39 पर मै थमनै कहुँ सूँ के बुरे माणस तै झगड़ा मोल ना लियो, पर जो कोए तेरे सोळे गाल पै थपड़ मारै उस कान्ही दुसरा भी फेर दे। 40 जै कोए तेरे पै दाब देकै तेरा कुड़ता लेणा चाहवै, तो उसने अंगोच्छा भी दे दे। 41 जै कोए अधिकारी तन्नै एक कोस मुफ्त म्ह ले जावै, तो उसके गेल्या दो कोस चल्या ज्या। 42 जो कोए तेरे तै माँगै, उसनै दे, अर जो कोए तेरे तै उधार लेणा चाहवै, उसतै मुँह ना मोड़।” 43 “थमनै नियम-कायदा म्ह सुणया होगा के कह्या गया था, अपने पड़ोसी तै प्यार राखिये, अर अपने बैरी तै बैर। 44 पर मै थमनै कहुँ सूँ के अपने बैरियाँ तै प्यार राक्खों अर अपने सतावण आळे के खात्तर प्रार्थना करो, 45 जिसतै थम अपने सुर्गीय पिता की सिध्द उलाद मान्ने जाओगे। क्यूँके वो भले अर बुरे लोगां पै अपना सूरज उगाया करै सै, अर धर्मी अर अधर्मी लोगां पै मिह बरसावै सै। 46 क्यूँके जै थम अपने प्यार करण आळा तै ए प्यार करो सों, तो कौण सा बड़ा काम करो सों? के चुंगी लेण आळे भी इसाए न्ही करदे? 47 जै थम अपने भाईयाँ नै ए नमस्कार करो, तो कौणसा बड़का काम करो सों? के गैर यहूदी भी इसाए न्ही करदे? 48 इस करकै जरूरी सै के थम भी सिध्द बणो, जिंसा थारा सुर्गीय पिता सिध्द सै।”

6 “चौककस रहो! थम माणसां नै दिखाण कै खात्तर धर्म के काम ना करो, न्ही तो अपने सुर्गीय पिता तै कुछ भी ईनाम न्ही पाओगे।” 2 “इस करके जिब तू दान करै, तो अपने आग्रे ढिंडोरा ना पिटवाईये, जिंसा कपटी, आराधनालयाँ अर गळियाँ म्ह करै सै, ताके माणस उनकी बड़ाई करै। मै थारे ताहीं साच्ची कहुँ सूँ के उननै अपना ईनाम माणसां की बड़ाई के रूप म्ह पा लिया। 3 पर जिब तू दान करै, तो उसका किसे और नै बेरा न्ही पाटणा चाहिए। 4 ताके तेरा दान छिप्या रहवै, अर जिब

तेरा पिता जो गुप्त म्ह देखवै सै, तन्नै ईनाम देवैगा।” 5 “जिब तू प्रार्थना करै, तो कपटियाँ के तरियां ना हो, क्यूँके माणसां नै दिखाण खात्तर आराधनालयाँ म्ह अर सड़कां कै मोड़ां पै खड़े होके प्रार्थना करणा उननै आच्छा लाग्गै सै। मै थमनै साच्ची कहुँ सूँ के उननै अपना ईनाम माणसां की बड़ाई के रूप म्ह पा लिया। 6 पर जिब तू प्रार्थना करै, तो अपनी कोठड़ी म्ह जा, अर किवाड़ बन्द करके अपने पिता तै, जो गुप्त म्ह सै उसतै प्रार्थना कर। जद तेरा पिता, जो तेरे लुक्क कै करे होए काम्मां नै देखवै सै, तो तन्नै उनका ईनाम देवैगा। 7 प्रार्थना करदे बखत दुसरी जात्तां की तरियां बडबडाइये ना, क्यूँके वे समझै सै के उनकै एक बात के बार-बार बोल्लण तै उनकी सुणी जावैगी। 8 इस करके थम उनकी तरियां ना बणो, क्यूँके थारा पिता थारे माँगण तै पैहल्याए जाणै सै के थारी के-के जरूरत सै। 9 इस करके थम इस तरियां तै प्रार्थना करया करो ‘हे म्हारे पिता, तू जो सुर्ग म्ह सै, तेरा नाम पवित्र मान्या जावै।’ 10 ‘तेरा राज्य आवै। तेरी इच्छा जिंसी सुर्ग म्ह पूरी होवै सै, उसी धरती पै भी हो।’ 11 ‘म्हारे दिन भर की रोटी आज हमनै दे।’ 12 ‘अर जिस तरियां हमनै अपने कसूरवारां ताहीं माफ करया सै, उससे तरियां तू भी म्हारे कसूरां नै माफ करदे।’ 13 ‘अर म्हारे ताहीं परखै ना, पर बुराई तै बचा, (क्यूँके राज्य, वीरता अर महिमा सदा तेरे ए सै।) आमीन।’ 14 “इस करके जै थम माणसां के कसूर माफ करोगे, तो थारा सुर्गीय पिता भी थमनै माफ करैगा। 15 अर जै थम माणसां के कसूरां नै माफ न्ही करोगे, तो थारा पिता भी थारे कसूर माफ न्ही करैगा।” 16 “जिब थम ब्रत करो, तो कपटियाँ की तरियां थारे मुँह पै उदासी छाई ना रहवै, क्यूँके वे अपना मुँह बणाई राक्खै सै, ताके माणस उननै ब्रती जाणै। मै थमनै साच्ची कहुँ सूँ के वे अपना ईनाम माणसां की बड़ाई के रूप म्ह पा चुके। 17 पर जिब तू ब्रत करै तो अपने सिर पै तेल लगा अर मुँह धो, 18 ताके माणस न्ही पर तेरा पिता तन्नै ब्रती जाणै। तेरा पिता जो तेरे उस गुप्त म्ह करे होए ब्रत नै देखवै सै, तो तन्नै उनका ईनाम देगा।” 19 “अपणे खात्तर धरती पै धन कट्टा ना करो, जड़ै कीड़ा अर काई नाश करै सै, अर जड़ै चोर सेंध लगावै अर चोरै सै। 20 पर अपने खात्तर सुर्ग म्ह धन कट्टा करो, जड़ै ना तो कीड़ा अर ना काई नाश करै सै, अर जड़ै चोर ना सेंध लगावै अर ना चोरै सै। 21 क्यूँके जड़ै तेरा धन सै उड़ै तेरा मन भी लाग्या रहवैगा।” 22 “देह का दीवा आँख सै इस करके जै तेरी नजर सही सै तो तेरी सारी देह भी चाँदणे म्ह सै। 23 पर जै तेरी नजर खराब सै तो तेरी सारी देह भी अन्धेरे म्ह सै, इस कारण जो तू सोचवै सै के मै चाँदणे म्ह सूँ, पर वो अन्धेरा हो, तो सोचवै देख वो अन्धेरा कितना बड़का होगा।” 24 “कोए माणस दो मालिकां की सेवा एक बखत पै न्ही कर सकदा, क्यूँके वो एक तै बैर अर दुसरे तै प्यार राक्खैगा, या एक तै मिल्या रहवैगा अर दुसरे नै छोट्टा जाणैगा। थम परमेसवर अर धन दोनुआ की सेवा न्ही कर सकदे। 25 “इस करके मै थमनै कहुँ सूँ के अपने जीवन के खात्तर या चिंता ना करियो के हम के खावांगें अर के पीवांगें, अर ना अपनी देह के खात्तर के पैहरांगें। के जीवन खाणे तै, के

देह लत्यां तै बढकै कोन्या? 26 अकास के पंछियाँ नै देख्यो! वे ना बोवै सै, ना काटै सै, अर ना कुठले (गोदाम) म्ह कठ्ठा करै सै, फेर भी थारा सुर्गीय पिता उन ताहीं खुवावै सै। के थम पंछियाँ तै घणे कीमती कोनी? 27 थारे म्ह कौण सै, जो चिंता करकै अपनी उम्र म्ह एक पल भी बढ़ा सकै सै?” 28 “अर लत्यां के खात्तर क्यूँ चिंता करो सों? जंगळी फूल्लां पै ध्यान करो के वे किस तरियां बढै सै, वे ना तो मेहनत करै सै, ना लत्ते बणावै सै। 29 तोभी मै थारे तै कहूँ सूँ के राजा सुलैमान भी, अपने सारे शानों-शोकत म्ह उन म्ह तै किसे के समान लत्ते पैहरे होए कोनी था। 30 इस करकै जिब परमेसवर मैदान की घास नै इसी सुन्दरता देवै सै, जो आज सै अर काल बाड़ म्ह झोक्की जावैगी, तो हे बिश्वास म्ह कमजोर माणसों, वो थारी चिन्ता क्यूँ न्ही करैगा?” 31 “इस करकै थम चिंता करकै न्यू ना कहियो के हम के खावांगें, या के पीवांगें, या के पैहरांगें? 32 क्यूँके गैर यहूदी इन सारी चिज्जां की टोह म्ह रहवै सै, पर थारा सुर्गीय पिता जाणै सै के थमनै इन सारी चिज्जां की जरूरत सै, इस करकै चिन्ता ना करो। 33 इस करकै पैहल्या थम परमेसवर के राज्य की खोज करो अर पवित्र जीवन जिओ, तो ये सारी चीज भी थमनै अपने-आप मिल ज्यागीं। 34 इस करकै काल की चिंता ना करो, क्यूँके काल का दिन अपनी चिंता आप कर लेवैगा, आज के खात्तर आज का ए दुख भतेरा सै।”

7 “दुसरयां पै दोष ना लाओ न्ही तो लोग थारे पै भी दोष लगावेंगे। 2 क्यूँके जिस तरियां थम दुसरयां पै दोष लगाओ सों, उससे तरियां परमेसवर भी थारे पै दोष लगावैगा, जिस तरियां तै थम दुसरयां का न्याय करो सों, उससे तरियां थारा भी न्याय करया जावैगा।” 3 “तू क्यूँ अपने भाई की आँख के तिनकै जिसी छोटी सी बुराई नै देख्ये सै, अर अपनी आँख म्ह लठ जिसी बड़ी बुराई तन्नै कोनी दिखदी?” 4 जिब तेरी-ए आँख म्ह लठ सै, तो तू अपने भाई तै किस तरियां कहवै सै, “ल्या मै तेरी आँख तै तिन्का लिकाड़ बु।” 5 इस करकै हे कपटी, पैहल्या अपने जीवन की बड़ी बुराई नै दूर कर फेर तू अपने भाई नै आच्छी दाऊँ बुराई तै बचा सकैगा। 6 “उन माणसां ताहीं परमेसवर का वचन ना सुणाओ जो उस ताहीं सुणणा न्ही चाहन्दे। जै तू इसा करै सै तो पवित्र चीज कुत्याँ के आगै अर मोत्ती सूअरां के आगै फैक्कण की ढाळ होगा, इसा न्ही हो के वे उननै पैरां तळै चिकलै अर उल्टके थमनै पाड़ले।” 7 “परमेसवर तै माँगो, तो वो थमने देवैगा, टोक्हों तो थम पाओगे, खटखटाओ, तो थारे खात्तर खोल्या जावैगा। 8 क्यूँके जो कोए माँगै सै, उसनै मिले सै, अर जो टोहँ सै, वो पावै सै, अर जो खटखटावै सै, उसके खात्तर खोल्या जावैगा।” 9 “थारे म्ह तै इसा कौण माणस सै, के जै उसका बेटा रोटी माँगै, तो वो उसनै पत्थर देवै? 10 या मच्छी माँगै, तो उसनै साँप देवै? 11 इस करकै जिब थम बुरे होके, अपने बाळकां नै आच्छी चीज देणा जाणो सों, तो थारा सुर्गीय पिता अपने माँगण आळा नै आच्छी चीज क्यूँ न्ही देवैगा? 12 इस कारण जो किमे थम चाहो सों के माणस थारे गेल्या करै, थम भी उनके गेल्या उसाए

करो, क्यूँके नियम-कायदे अर नबियाँ की शिक्षा याए सै।” 13 “थम परमेसवर के राज्य म्ह भीड़ै फाटक तै ए दाखल हो सको सों, क्यूँके चौड़ा सै वो फाटक अर सीध्था सै वो रास्ता जो नाश नै पोहच्ये सै, अर घणेए सै जो उस म्ह दाखल होवै सै। 14 क्यूँके भीड़ा सै वो फाटक अर मुश्किल सै वो राह जो अनन्त जीवन की ओड़ पुह्यावै सै, अर भोत थोड़े सै वे लोग जो उसनै पावै सै।” 15 “झूठे नबियाँ तै चौक्कस रहो, जो भेड्डां के भेष म्ह थारे धारे आवै सै, पर भित्तर तै वे पाडण आळे भेड़िये सै। 16 उनके काम्मां तै ए थम उन ताहीं पिच्छाण ल्योगे। के माणस झाड़ियाँ तै अंगूर, या झाड़ बोझड़े तै अंजीर तोड़े सै? 17 इस तरियां हरेक आच्छा दरखत आच्छा फळ ल्यावै सै अर निकम्मा दरखत बुरा फळ ल्यावै सै। 18 आच्छा दरखत बुरा फळ न्ही ल्या सकदा, अर ना निकम्मा दरखत आच्छा फळ ल्या सकै सै। 19 जो-जो दरखत आच्छा फळ न्ही ल्यान्दा, वो काट्या अर आग म्ह गेरया ज्या सै, उससे तरियां झूठे नबियाँ के गैल भी इसाए होवैगा। 20 झूठे नबियाँ नै उनके काम्मां तै थम उन ताहीं पिच्छाण ल्योगे।” 21 “जो मेरे तै, ‘हे प्रभु! हे प्रभु!’ कहवै सै, उन म्ह तै हर एक सुर्ग के राज्य म्ह दाखल न्ही होगा, पर वोए दाखल होगा जो मेरे सुर्गीय पिता की मर्जी पै चाल्लै सै। 22 न्याय के दिन घणखरे-ए माणस मेरे तै कहवेंगे, ‘हे प्रभु, हे प्रभु, के हमनै तेरे नाम तै भविष्यवाणी न्ही करी, के हमनै तेरे नाम तै ओपरी आत्मायाँ ताहीं न्ही लिकाड्या, अर तेरे नाम तै घणेए अचम्भे के काम न्ही करे?’ 23 फेर मै उनतै खुलकै कह दियुँगा, मन्ने थारे ताहीं कदे न्ही अपनाया। हे भुन्दे काम करण आळो, मेरे धारे तै चले जाओ।” 24 “इस करकै जो कोए मेरी इन बात्तां नै सुणके उननै मान्ने सै, वो उस अकलमंद माणस की ढाळ होगा जिसनै अपने घर की नीम चट्टान पै धरी। 25 अर मिह बरसया, बाढ़ आयी, आँधी आई, अर उस घर तै टकराई, फेर भी वो कोनी गिरया, क्यूँके उसकी नीम चट्टान पै धरी गयी थी। 26 पर जो कोए मेरी ये बात सुणै सै अर उनपै न्ही चाल्ला, वो उस बेकूफ माणस की ढाळ सै, जिसनै अपने घर की नीम बाळूरेत पै धरी। 27 अर मिह बरसया, बाढ़ आयी, आँधी चाल्ली, अर उस घर तै टकराई अर पड़कै उसका सत्यानाश होगया।” 28 जिब यीशु नै ये बात कह ली, तो इसा होया के भीड़ उसके उपदेश तै हैरान होगी, 29 क्यूँके वो उन ताहीं शास्त्रियाँ की तरियां न्ही पर अधिकार के गैल उननै उपदेश देवै था।

8 जिब यीशु उस पहाड़ तै उतरा, तो एक बड़ी भीड़ उसके पाछै हो ली। 2 अर, एक कोढ़ी नै धारै आके उस ताहीं नमस्कार करया अर कह्या, “हे प्रभु, जै तू चाहवै, तो मन्ने ठीक कर सकै सै।” 3 यीशु नै हाथ बढ़ाके उस ताहीं छुआ, अर कह्या, “मै चाहूँ सूँ, के तू इस बीमारी तै ठीक हो ज्या।” अर वो जिब्बे कोढ़ तै ठीक होगया। 4 यीशु नै उसतै कह्या, “देख किसे तै ना कहिये, पर जाके अपने-आपनै याजक ताहीं दिखा अर अपने कोढ़ तै ठीक होण के बारे म्ह जो कुछ मूसा नबी नै जो पवित्र ग्रन्थ म्ह चढ़ावा बताया सै उसनै चढ़ा, के माणसां खात्तर या गवाही हो, के तू ठीक होगया सै।” 5 जिब यीशु कफरनहूम नगर म्ह आया तो एक

सूबेदार नै धोरे आके उसतै बिनती करी, 6 “हे प्रभु, मेरा नौक्कर लकवे के रोग तै घणा दुखी होरया सै।” 7 यीशु नै उस ताहीं कह्या, “मै आके उसनै ठीक करूंगा।” 8 सूबेदार नै जवाब दिया, “हे प्रभु, मै इस लायक कोनी के तू मेरे घरां आवै, पर सिर्फ मुँह तै कह दे तो मेरा नौक्कर ठीक हो ज्यागा। 9 क्यूँके मै जाणु सूँ के मै भी किसी के आदेशां का पालन करूँ सूँ, अर सिपाही मैरे आदेशां का पालन करै सै। जिन मै एक तै कहूँ सूँ जा, तो वो जावै सै, अर दुसरे तै कहूँ आ, तो वो आवै सै, अर अपने नौक्कर तै कहूँ सूँ यो कर, तो वो करै सै।” 10 यो सुणके यीशु के अचम्भा होया, अर जो लोग उसकै पाछे आवै थे उनतै कह्या, “मै थमनै साच्वी कहूँ सूँ के मन्नै इस्राएल देश म्ह भी इसा बिश्वास न्ही देख्या, जिसा इस सूबेदार का सै। 11 अर मै थमनै कहूँ सूँ के पूरब अर पच्छिम तै घणेए गैर यहूदी आवैगें अर भोज म्ह अब्राहम अर इसहाक अर याकूब के गेल्या सुर्ग के राज्य म्ह बैठैगें। 12 पर राज्य की ऊलाद (यहूदी लोग) बाहर अन्धेरे म्ह गेर दिये जावैगें उडै रोणा अर दाँत पिसणा होगा।” 13 जिन यीशु नै सूबेदार तै कह्या, “घर चला जा, जिसा तेरा बिश्वास सै, उसाए तेरे खातर होगा।” अर उसका नौक्कर उससे बखत ठीक होग्या। 14 यीशु जिन पतरस के घरां आया, तो उसनै उसकी सासू ताहीं बुखार म्ह पड्या देख्या। 15 उसनै उसका हाथ पकड्या अर उसका बुखार उतर ग्या, अर वा उठके उसकी सेवा-पाणी करण लागी। 16 जिन साँझ होई फेर माणस उसके धोरे घणेए माणसां नै ल्याए जिन म्ह ओपरी आत्मा थी अर यीशु नै उन आत्मायाँ ताहीं अपने वचन तै लिकाड़ दिया, अर सारे बिमारां ताहीं ठीक कर दिया। 17 ताके जो वचन यशायाह नबी के जरिये कह्या गया था वो पूरा हो “उसनै खुद ए म्हारी कमजोरी ले ली अर म्हारी बीमारी उठा ली।” 18 यीशु नै जिन अपने चौगरदू एक भीड़ देख्खी तो अपने चेल्यां ताहीं गलील समुन्दर के परली ओड़ जाण का हुकम दिया। 19 यीशु अर उसके चेल्लें किस्ती की ओड़ जाण लागरे थे, तो एक शास्त्री नै धोरे आके उसतै कह्या, “हे गुरु, जइँ किते तू जावैगा, मै तेरे पाछे हो लूँगा, क्यूँके मै तेरा चेल्ला बणणा चाहूँ सूँ।” 20 यीशु नै उसतै कह्या, “लोमडियां की घुरखाण अर अकास के पछियाँ के बसेरे हो सै, पर मुझ माणस के बेट्टे खातर सिर छिपाण की भी जगहां कोनी सै।” 21 एक और चेल्लै नै उसतै कह्या, “हे प्रभु, पैहले मन्नै घर जाणदे, मै अपने पिता के मरण के बाद उस ताहीं दफना के आऊँगा, फेर तेरा चेल्ला बणुगा।” 22 यीशु नै उसतै कह्या, “तू मैरे पाछे हो ले, अर मेरा चेल्ला बण जा अर जो आत्मिक रूप तै मर चुके सै, उननै मुदें दफणाण दे।” 23 जिन यीशु किस्ती पै चढ्या, तो उसके चेल्लें उसके पाछे हो लिए। 24 अर देख्खो, समुन्दर म्ह एक इसा बड़ड़ा अन्धोड़ उठ्या के किस्ती झाल्लां तै ढक्ण लागी, अर वो सोण लाग रह्या था। 25 फेर चेल्यां नै धोरे आके उस ताहीं जगाया अर कह्या, “हे प्रभु, हमनै बचा, हम डूबके मरण आळे सां।” 26 यीशु नै उनतै कह्या, “हे बिश्वास म्ह कमजोर माणसां, क्यूँ डरो सों?” फेर उसनै उठके आँधी अर पाणी ताहीं धमकाया, अर सब शान्त होग्या। 27 अर वे अचम्भा करके कहण

लागे, “यो किसा माणस सै के आँधी अर पाणी भी उसका हुकम मान्नै सै।” 28 जिन यीशु गलील समुन्दर के परली ओड़ गदरनियां के देश म्ह पुँह्या, तो दो माणस जिन म्ह ओपरी आत्मा थी कब्रिस्तान म्ह तै लिकड़के उसनै मिले। वे इतने डरावणे थे के कोए उस रास्ते तै जा न्ही सके था। 29 दोन्नु माणसां नै किल्की मारके कह्या, “हे परमेसवर के बेट्टे, म्हारा तेरे तै के काम? के तू बखत तै पैहल्या हमनै दुख देण आडै आया सै?” 30 उनतै थोड़ी सी दूर पै घणेए सूअरां का टोळ चरै था। 31 ओपरी आत्मायाँ नै उसतै या कहके बिनती करी के, “जै तू हमनै लिकाड़ै सै, तो सूअरां के टोळ म्ह भेजदे।” 32 उसनै उन ताहीं कह्या, “जाओ!” अर वे ज्या के सूअरां म्ह बैठगी अर देख्खो, सारा टोळ ढळान पै तै झपटके पाणी म्ह ज्या पड्या, अर डूब मरया। 33 उनके पाळी भाज्ये, अर नगर म्ह जाके ये सारी बात अर जिन म्ह ओपरी आत्मा थी उनका सारा हाल कह सुणाया। 34 फेर सारे नगर के माणस यीशु तै फेटण नै लिक्ड़ाए, अर उस ताहीं देख के बिनती करी के म्हारी सीमा तै बाहर चल्या ज्या।

9 फेर यीशु किस्ती म्ह चढके उस पार गया, अर बोहड़के अपने नगर म्ह आया। 2 अर देख्खो, कई माणस लकवे के एक मरीज नै खाट पै लिटा के उसके धोरे ल्याए। यीशु नै उनका बिश्वास देखके, उस लकवे के मरीज तै कह्या, “हे बेट्टे, धीर बाँध, मन्नै तेरे पाप माफ कर दिये।” 3 इसपै कई शास्त्रियाँ नै सोच्या, “यो तो परमेसवर की बुराई करै सै” 4 यीशु नै उनके मन की बात जाणके कह्या, “थम माणस अपने-अपणे मन म्ह बुरा विचार क्यूँ आण देओ सों? 5 आसान के सै? यो कहणा, ‘तेरे पाप माफ होए’, या यो कहणा, ‘उठ अर हॉड-फिर।’ 6 पर इस करके के थम जाण ल्यो के मुझ माणस के बेट्टे नै धरती पै पाप माफ करण का हक सै।” फेर उसनै लकवे के मरीज तै कह्या, “उठ, अपने बिस्तर ठाके, अपने घरां चल्या जा।” 7 वो उठके अपने घरां चल्या गया। 8 माणस यो देखके डरगे अर परमेसवर की बड़ाई करण लाग्ये जिसनै माणस ताहीं इसा हक दिया सै। 9 ओड़ै तै आगै बढ के यीशु नै मत्ती नाम के एक आदमी ताहीं चुंगी की चौकी पै बेठ्या देख्या, अर उसतै कह्या, “मेरा चेल्ला बणण खातर मैरे पाछे हो ले।” अर वो उठके उसके पाछे हो लिया। 10 जिन वो अर उसके चेल्लें मत्ती के घर म्ह खाणा खाण खातर बेट्टे तो भोत-से चुंगी लेण आळे अर जिननै लोग पापी कहवै सै वे आके उनके गेल्या खाणा खाण बेट्टे। 11 या देखके फरीसियाँ नै उसके चेल्यां ताहीं कह्या, “थारा गुरु चुंगी लेण आळे अर पापी माणसां गेल्या क्यूँ खावै-पीवै सै?” 12 या सुणके यीशु नै उनतै कह्या, “वैद आच्छे-बिच्छयां खातर कोनी पर बिमारां खातर जरूरी सै। 13 इस करके थम जाओ अर समझ ल्यो के पवित्र ग्रन्थ के इस वचन का मतलब के सै: ‘मै बलिदान न्ही पर दया चाहूँ सूँ।’ क्यूँके जो अपने-आपनै धर्मी कहवै मै उननै न्ही, पर जो अपने-आपनै पापी कहवै सै उननै बुलाण आया सूँ।” 14 फेर बपतिस्मा देण आळे यूहन्ना के चेल्यां नै धोरे आणके कह्या, “के कारण सै के हम अर फरीसी इतने ब्रत करा

सां, पर तैरे चेल्लें ब्रत न्ही करदे?” 15 यीशु नै उनतै कह्वा, “के बराती, जिब ताहीं बन्दड़ा उसके गेल्या सै, शोक मना सकै सै? पर वे दिन आवैगें जिब बन्दड़ा उनतै न्यारा करया जावैगा, उस बखत वे ब्रत करैगें।” 16 “नये लत्यां की थेगळी पुराणे लत्यां पै कोए न्ही लगान्दा, क्यूँके वा थेगळी लते तै और भी लत्ता खुस्का दे सै, अर वो और भी घणा पाट ज्या सै। 17 अर माणस नया अंगूर का रस पुराणी मशक म्ह न्ही भरदे, क्यूँके इसा करण तै मशक पाट ज्या सै, अर अंगूर का रस खिंड ज्या सै, अर मशक फूट ज्या सै, पर नया अंगूर का रस नई मशकां म्ह भरा जावै सै तब वे दोनु बचे रहवै सै।” 18 वो उनतै ये बात कहण ए लागरया था, के जिब्बे आराधनालयॉ के सरदारॉ म्ह तै एक यार्डर नाम के आदमी नै आकै उस ताहीं नमस्कार करया अर कह्वा, “मेरी बेटी इब्बे मरी सै, पर तू चाल के अपणा हाथ उसपै धरै, तो वा जिन्दा हो ज्यागी।” 19 यीशु उठके अपणे चेल्यां समेत उसके पाच्छे हो लिया। 20 अर देख्खो, एक बिरबान्नी नै जिसके बारहां साल तै लहू बहण की बीमारी थी, पाच्छे तै आकै उसके लते के कोणे ताहीं छू लिया। 21 क्यूँके वा अपणे मन म्ह कहवै थी, “जै मै उसके लते नै छू लूँगी तो ठीक हो जाऊँगी।” 22 यीशु नै घूमके उस ताहीं देख्खा अर कह्वा, “बेटी धीरज राख, तैरे बिश्वास नै तैरे ताहीं ठीक करया सै।” अर वा बिरबान्नी उससे बखत ठीक होगी। 23 जिब यीशु यार्डर कै घर म्ह पुँह्वा अर बाँसली बजाण आळे अर भीड़ नै रोळा मचादे देख्खा, 24 फेर कह्वा, “हट जाओ, छोरी मरी कोनी, पर सोवै सै।” इसपै वे उसका मजाक उड़ाण लाग्ये। 25 पर जिब भीड़ लिकाड़ दी, तो उसनै भित्तर ज्या के उस छोरी का हाथ पकड्या, अर वा जी उठी। 26 अर इस बात का जिक् सारे देश म्ह फैलग्या। 27 जिब यीशु ओड़े तै आगै बढ़ा, तो दो आन्धे उसके पाच्छे या कहन्दे होए चाल्ले, “हे दाऊद की ऊलाद, म्हारै पै दया कर!” 28 जिब वो घर म्ह पुँह्वा, तो वे आन्धे उसके धोरै आये, अर यीशु नै उनतै कह्वा, “के थमनै बिश्वास सै के मै थमनै चंगा कर सकूँ सूँ?” उननै उसतै कह्वा, “हाँ प्रभु!” 29 फेर उसनै उनकी आँखां के हाथ लगाकै कह्वा, “थारे बिश्वास के मुताबिक थम चंगे होजाओ।” 30 अर वे जिब्बे देख्खण लाग्ये। यीशु नै उनतै समझां के कह्वा, “सावधान, किसे ताहीं या बात ना बताइयो, के मननै थारे खात्तर के करया सै।” 31 पर उननै मिलके सारे देश म्ह उसका नाम फैला दिया। 32 जिब वे दोन्नु आन्धे बारणै जाण लागरे थे, तो देख्खो, कई माणस एक गूँगे नै उसके धोरै ल्याए जिसम्ह ओपरी आत्मा थी, जो उसनै बोल्लण कोनी देवै थी। 33 अर जिब यीशु नै ओपरी आत्मा लिकाड़ दी, तो गूँगा बोलण लाग्या। इसपै भीड़ नै अचम्भा करके कह्वा, “इसाएल म्ह इसा कदे न्ही देख्खा गया।” 34 पर फरीसियाँ नै कह्वा, “ओपरी आत्मायाँ के सरदार इस ताहीं शक्ति देवै सै, इस करके यो ओपरी आत्मायाँ नै लिकाड़ै सै।” 35 यीशु अर उसके चेल्लें सारे नगरॉ अर गाम्मां म्ह फिरता होया अर उनकै आराधनालयॉ म्ह उपदेश सुणान्दा, अर परमेसवर के राज्य का सुसमाचार सुणादा, अर हरेक ढाळ की बीमारी अर कमजोरियाँ नै दूर

करदा रह्वा। 36 जिब उसनै भीड़ देखी तो उसनै माणसां पै तरस आया, क्यूँके वे उन भेड्या की तरियां थे, जिनका कोए पाळी ना हो, वे बेचैन अर भटके होए से थे। 37 फेर उसनै अपणे चेल्यां तै कह्वा, “पके होए खेत्तां की तरियां लोग तो भोत सै जो परमेसवर के वचन नै सुणणा चाहवै सै, पर फसल काटण आळे की तरियां लोग कम सै जो जाकै परमेसवर का वचन सुणावै। 38 इस करके खेत के माल्लिक यानी परमेसवर तै बिनती करो, के वो और लोग्मां नै भेज्जै, ताके परमेसवर का वचन भोत सारे लोग्मां ताहीं सुणावै।”

10 फेर यीशु नै अपणे बारहां चेल्यां ताहीं धोरै बुलाकै, उन ताहीं ओपरी आत्मायाँ पै हक दिया के उननै लिकाड़ै अर सारी ढाळ की बिमारियाँ अर सारी ढाळ की कमजोरियाँ नै ठीक करै। 2 इन बारहां प्रेरितां के नाम ये सै: पैहल्या शमोन, जो पतरस कुह्वावै सै, अर उसका भाई अन्द्रियास, जब्दी का बेटा याकूब, अर उसका भाई यूहन्ना, 3 फिलिप्पुस, अर बरतुलमै, थोमा, अर चुंगी लेण आळा मती, हलफई का बेटा याकूब, अर तद्दै, 4 शमोन जेलोतेस, अर यहूदा इस्करीयोती जिसनै वो पकड़वा भी दिया। 5 इन बारहां चेल्यां ताहीं यीशु नै यो हुकम देकै भेज्या: “गैर यहूदी लोग्मां कान्ही ना ज्याइयो, अर सामरियाँ के किसे नगर म्ह दाखल ना होइये। 6 पर इस्राएल के कुणबे की ए खुई होड़ी भेड्वां के धोरै जाइये। 7 अर चालते-चालते यो प्रचार करो: सुर्ग का राज्य धोरै आ गया। 8 बिमारां नै ठीक करो, मरै होए नै जीवाओ, कोढियाँ नै शुद्ध करो, ओपरी आत्मायाँ नै लिकाड़ो। थमनै मुफ्त लिया सै मुफ्त द्यो।” 9 “अपणे अंगोच्छां म्ह ना तो सोन्ना, ना चाँदी, अर ना ताम्बे के सिक्के राखियो। 10 रास्ते खात्तर ना झोळी लियो, ना दो कुड़ते, ना जूते अर ना लाठी लियो, क्यूँके मजदूर नै उसका खाणा मिलणा चाहिए। 11 जिस किसे नगर या गाम म्ह जाओ, तो बेरा पाड़ो के कुण लायक सै। अर जिब ताहीं उड़े तै ना लिकड़ो, उससे के गेल्या रहों। 12 घर म्ह बढ़ते आणी उसनै आशीर्वाद दिए। 13 जै उस घर के माणस लायक होंगे तो थारा आशीर्वाद उनपै पुँहँगा, पर जै वे लायक ना हों तो थारा आशीर्वाद थारे धोरै उल्टा ए आ ज्यागा। 14 जो कोए थमनै न्ही अपणावै अर थारी बात ना सुणै, उस घर या उस नगर तै लिकड़दे आणी अपणे पैरां की धूळ झाड़ लियो। 15 मै थमनै सच्ची कहुँ सूँ के न्याय के दिन उस नगर की हालत तै सदोम अर अमोरा के नगर की हालत घणी सहण जोग्गी होवैगी।” 16 “देख्खो, मै थमनै भेड्वां की तरियां भेडियाँ के बिचाल्ये भेज्जू सूँ, इस करके साँपां की तरियां अकलमंद अर कबूतरां की तरियां भोळे बणो। 17 पर माणसां तै चौक्कस रहों, क्यूँके वे थमनै बड़े आराधनालयॉ म्ह सौपैगें, अर अपणी सभा म्ह थारे कोड़े मारैगें। 18 थम मेरै खात्तर राज्यपालों अर राजयां के स्याम्ही अर गैर यहूदी लोग्मां म्ह भेज्जे जाओगें। ताके थम मेरे बारें म्ह गवाही दे सको 19 जिब वे थमनै पकड़वावैगें तो या फिक्र ना करियो के हम किस तरियां तै या के कहवागें, क्यूँके जो किमे थारे ताहीं कहणा होगा, वो उससे बखत थारे ताहीं बता दिया जावैगा। 20 क्यूँके बोलण आळे थम न्ही सों, पर थारे

सुर्गीय पिता का आत्मा थारे म्ह बोल्लै सै। 21 भाई, भाई नै अर पिता बेट्टे नै, मारण खात्तर साँप देंगें, अर बाळक अपणे माँ बाप के बिरोध म्ह खड़े होके उन ताहीं मरवा देवैगें। 22 मेरै नाम के कारण सारे माणस थारे तै बैर करैगें, पर जो अन्त ताहीं धरिज धरैगा उससे का उद्धार होगा। 23 जिब वे थमनै नगर म्ह सतावे, तो दुसरे म्ह भाग ज्याइयो। मै थमनै सच कहूँ सूँ, थम इस्राएल के सारे नगरां म्ह न्ही घूम सकोगें के मै माणस का बेट्टा आ जाऊँगा।” 24 “चेल्ला अपणे गुरु तै बड्ड़ा न्ही होंदा, अर ना नौक्कर अपणे माल्लिक तै। 25 चेल्लै का गुरु के, अर नौक्कर का माल्लिक के बराबर होणा ए भोत सै। जिब उननै घर के माल्लिक तै शैतान कह्वा तो उसके घरआळां नै के कुछ न्ही कहवैगें।” 26 “इस करके माणसां तै ना डरो, क्यूँके कुछ ढकया कोनी, जो उजागर न्ही करया जावैगा, अर ना कुछ लुहक्या सै जिसका बेरा न्ही पटै। 27 जो मै थारे तै अन्धेरे म्ह कहूँ सूँ, उसनै थम चाँदणे म्ह कहो, अर जो कान्नी-कान सुणो सों, उसनै छातां पै चढ़ के प्रचार करो। 28 जो देह नै घात करै सै, पर आत्मा नै घात न्ही कर सकदे, उनतै ना डरियो, पर उस परमेसवर तै डरो जो आत्मा अर देह दोनुआ नै नरक म्ह गेरके नाश कर सके सै। (Geenna g1067) 29 छोट्टी चिड़ियाँ दो पिस्या की बिकै सै, जो ना के बराबर सै तोभी जै वो धरती पै पड़के मरे सै तो पिता परमेसवर नै उसका भी बेरा सै क्यूँके पिता परमेसवर सब कुछ जाणण आळा सै। 30 थारे सिर के बाळ भी सारे गिणे होड़े सै। 31 इस करके डरो मतना, थम घणी गौरैयाँ (एक छोट्टी चिड़ियाँ) तै बढके सो।” 32 “जो कोए माणसां के स्याम्ही मन्ने मान लेवैगा, उसनै मै भी अपणे सुर्गीय पिता के स्याम्ही मान ल्यूँगा। 33 पर जो माणसां के स्याम्ही मेरे बारे म्ह इन्कार करैगा, उसनै मै भी अपणे सुर्गीय पिता के स्याम्ही इन्कार करूँगा।” 34 “यो ना समझो के मै धरती पै माणसां का मिलाप करवाण आया सूँ, मै मिलाप करवाण न्ही, पर न्यारे करण आया सूँ। 35 मै तो आया सूँ, ताके माणस नै उसके पिता तै, अर बेट्टी नै उसकी माँ तै, अर बहू नै उसकी सास तै न्यारा कर घु।” 36 “माणस के बैरी उसके घर के ए लोग होंगे।” 37 “जो अपणे माँ-बाप नै मेरै तै घणा प्यारा मान्ने सै, वो मेरा चेल्ला बणण के लायक कोनी, अर जो बेट्टा या बेट्टी नै मेरै तै घणा प्यारा मान्ने सै, वो मेरै लायक कोनी। 38 अर जो अपणा दुखां का कूस लेके मेरे पाच्छे न्ही चाल्लै वो मेरै लायक कोनी। 39 जो अपणी जान बचावै सै, वो उसनै खोवैगा, अर जो मेरै कारण अपणी जान खोवैगा, वो उसनै पावैगा।” 40 “जो थमनै अपणावै सै, वो मन्ने अपणावै सै, अर जो मन्ने अपणावै सै, वो उस परमेसवर नै अपणावै सै, जिसनै मेरे ताहीं भेज्या सै। 41 जो नबियाँ नै नबी जाण के अपणावै, वो नबियाँ के जिसा फळ पावैगा, जिसा नबी नै मिलै सै, अर जो धर्मी नै धर्मी जाण के अपणावै, वो धर्मी के जिसा फळ पावैगा। 42 जो कोए मेरे इन चेल्यां म्ह तै एक नै भी मेरा चेल्यां जाण के सिर्फ एक कटोरा ठंडा पाणी पियावैगा, मै थमनै सच कहूँ सूँ, वो किसे तरियां भी अपणा फळ न्ही खोवैगा।”

11 अपणे बारहां चेल्यां ताहीं इस तरियां समझाण के बाद यीशु ओड़ै तै चाल पड्या, अर गलील परदेस के नगरां म्ह उपदेश अर प्रचार करदा घूमता रह्या। 2 यूहन्ना नै जेळ म्ह मसीह के काम्मां की खबर सुणी अर अपणे चेल्यां ताहीं यीशु तै न्यू बुड्झण भेज्या, 3 अर उसतै कह्वा, “के आण आळा वो मसीहा जिसका वादा परमेसवर नै करया था, तू ए सै, या हम किसे और की बात देख्कां?” 4 यीशु नै जवाब दिया, “जो कुछ थम सुणो सो अर देख्को सो, यो सारा जाके यूहन्ना ताहीं कह घो, 5 के आन्धे देख्खें सै अर लंगड़े चाल्लै-फिरै सै, कोढ़ी ठीक करे जावै सै अर बहरे सुणे सै, मुर्दे जिन्दे करे जावै सै, अर कंगालां ताहीं सुसमाचार सुणाया जावै सै। 6 अर धन्य सै वे, जो मेरे पै शक न्ही करते, अर बिश्वास करणा न्ही छोड़ते।” 7 जिब यूहन्ना के चेल्लें ओड़ै तै जाण लागरे थे तो यीशु भीड़ म्ह माणसां तै यूहन्ना के बारे म्ह कहण लागया, “थम जंगल-बियाबान म्ह के देखण गये थे? के हवा म्ह हाल्दे होए सरकंड्या नै? 8 तो फेर थम के देखण गये थे? के सुथरे लते पहेरे होड़ माणस ताहीं? देख्को, जो सुथरे लते पहरै सै, वे राजघरां म्ह रहवें सै। 9 तो फेर क्यांते गये थे? के किसे नबी नै देखण ताहीं? हॉ, मै थमनै कहूँ सूँ, बल्के नबी तै भी बड़े नै।” 10 यूहन्ना वोए सै जिसके बारे म्ह पवित्र ग्रन्थ म्ह लिख्वा सै: के “देख, मै अपणे दूत ताहीं तेरे आगै भेज्जु सूँ जो तेरे आगै तेरा रास्ता त्यार करैगा।” 11 मै थमनै कहूँ सूँ के जो बिरबानियाँ तै जणे सै, उन म्ह तै यूहन्ना बपतिस्मा देणआळे तै बड्ड़ा कोए न्ही होया, पर जो सुर्ग के राज्य म्ह छोट्टे तै भी छोट्टा सै वो उसतै बड्ड़ा सै। 12 यूहन्ना बपतिस्मा देण आळे के दिनां तै इब ताहीं सुर्ग का राज्य बलपूर्वक बढण लाग रहया सै, अर बिरोधी लोग उसनै रोकण की कोशिश करण लागरे सै। 13 यूहन्ना के आण तक सारे नबी अर मूसा के नियम-कायदा म्ह, सुर्ग के राज्य की भविष्यवाणी करी गई। 14 जै थम सच म्ह भविष्यवाणीयाँ पै बिश्वास करो सों, तो सुणो यूहन्ना ए वो एलियाह सै जो दोबारा आण आळा था। 15 जिसके कान हों, वो ध्यान तै सुण ले। 16 “मै आज की पीढ़ी के माणसां की बराबरी किसतै करूँ? वे उन बाळकां की ढाल सै, जो बजारां म्ह बेट्टे होए एक-दुसरे तै रुक्के मारके शिकायत करै सै:” 17 “हमनै थारे खात्तर बाँसली बजाई, अर थम कोनी नाच्चे, हमनै बिलाप करया, अर थमनै छात्ती कोनी पिट्टी।” 18 “इस्से तरियां यूहन्ना बपतिस्मा देण आळा ना रोटी खाया करदा अर ना अंगूर का रस पिया करदा, अर थम कहो सो, ‘उस म्ह ओपरी आत्मा सै।’ 19 मुझ माणस के बेट्टे का खाण-पान और माणसां की तरियां सादा ए सै, लखाओ, थमनै मेरे ताहीं पेट्टू अर पियक्कड़ माणस, चुंगी लेणिये का अर पापियाँ का साथी घोषित कर दिया! पर ज्ञान अपणे काम्मां म्ह सच्चा ठहराया गया सै।” 20 फेर यीशु उन नगरां ताहीं उल्हाणा देण लागया, जिन म्ह उसनै घणे सामर्थ के काम करे थे, क्यूँके उननै पाप करणा न्ही छोड्या अर ना ए परमेसवर के राह पै चाल्लै। 21 “धिक्कार सै थारे पै खुराजिन नगर के माणसाँ! धिक्कार सै थारे पै बैतसैदा नगर के माणसाँ! जो सामर्थ के काम थारे म्ह करे गये,

जै वे सूर अर सैदा नगरां म्ह करे जान्दे, तो टाट ओढ़ कै, अर राख म्ह बैठकै वे कदे के पाप करणा छोड़ देन्दे। 22 पर मै थमनै कहूँ सूँ के न्याय कै दिन थारी हालत तै सूर अर सैदा नगरां की हालत घणी सहण जोगगी होवैगी। 23 हे कफरनहूम नगर के माणसाँ, थम के सोच्छों सों, के थम सुर्ग ताहीं ऊँच्ये करे जाओगें? थम तो अधोलोक तक नीच्ये जाओगें, जो सामर्थ के काम थारे म्ह करे गये सै, जै सदोम नगर म्ह करे जान्दे, तो वो आज ताहीं बणया रहन्दा। (Hades g86) 24 पर मै थमनै कहूँ सूँ के न्याय के दिन तेरी हालत तै सदोम नगर की हालत घणी सहण जोगगी होवैगी।” 25 उससे बखत यीशु नै कह्वा, “हे पिता, सुर्ग अर धरती के प्रभु, मै तेरा शुक्रियादा करूँ सूँ के तन्ने इन बाततां ताहीं ज्ञानियाँ अर समझदार माणसां तै ल्कोए राख्या, अर बाळकां ताहीं दिखा दिया सै। 26 हाँ, हे पिता, क्यूँके तन्ने योए भाया।” 27 “मेरे पिता नै मेरै ताहीं सब कुछ सौप्या सै, अर कोए बेट्टे ताहीं कोनी जाण्दा, सिर्फ पिता के अलावा, अर कोए पिता ताहीं कोनी जाण्दा, सिर्फ बेट्टे के अलावा, अर हरेक वो माणस जो परम पिता नै जाणे सै, जिसके खात्तर बेट्टे नै उस ताहीं जाहिर करणा चाह्वा सै।” 28 “हे सारे मेहनत करण आळो अर बोझ तै दबे होड़े माणसाँ, मेरै धोरे आओ, मै थमनै सुख-चैन दियुँगा। 29 मेरा जूआ अपणे उप्पर ठा ल्यो, अर मेरै तै सीखो, क्यूँके मै नरम अर मन का दीन सूँ: अर थम अपणे मन म्ह सुख-चैन पाओगे। 30 क्यूँके मेरा जूआ सोखा अर मेरा बोझ हल्का सै”

12 तकरीबन उससे बखत आराम कै दिन यीशु चेल्यां कै गैल खेतां म्ह तै होकै जाण लागरया था, अर उसके चेल्यां नै भूख लागी तो वे गेहूँ की बालें तोड़-तोड़कै खाण लागे। 2 फरीसियाँ नै न्यू देखकै उसतै बोल्ले, “देख, तेरे चेल्लें वो काम करै सै, जो नियम-कायदा के मुताबिक आराम कै दिन करणा ठीक कोनी।” 3 यीशु नै उनतै कह्वा, “के थमनै पवित्र ग्रन्थ म्ह यो न्ही पढ़या, के दाऊद अर उसके साथियाँ नै जिब वे भूख्ये होए तो के करया था? 4 वो किस तरियां परमेसवर कै घर म्ह गया, अर भेंट की रोटी खाई, जिनका खाणा ना तो उस ताहीं अर ना उसके साथियाँ ताहीं पर सिर्फ याजकां ताहीं सही था? 5 यो थमनै नियम-कायदा म्ह न्ही पढ़या के आराम कै दिन मन्दर के याजक ए आराम कै दिन की विधि ताहीं तोड़ै सै फेर भी उन ताहीं कोए कुछ न्ही कहन्दा? 6 पर मै थमनै कहूँ सूँ के उरै वो सै जो मन्दर तै भी बड़ड़ा सै। 7 जै थम पवित्र ग्रन्थ म्ह जो लिच्छया सै, उसका मतलब जाणदे के, ‘मै बलिदान न्ही पर दया चाहूँ सूँ।’ तो थम बेकसूर ताहीं कसूरवार कोनी ठहरान्दे। 8 मै माणस का बेट्टा तो आराम कै दिन का भी प्रभु सूँ।” 9 ओड़ै तै चालकै वो उनके आराधनालय म्ह आया। 10 ओड़ै एक माणस था, जिसका हाथ सूखरया था। फरीसी लोगां नै यीशु पै दोष लाण खात्तर उसतै बुझ्झया, “मूसा के नियम-कायदा कै मुताबिक आराम कै दिन ठीक करणा सही सै?” 11 यीशु नै उनतै कह्वा, “थारे म्ह तै इसा कौण सै जिसकी एक ए भेड़ हो, अर वा आराम कै दिन खडहे म्ह पड़ जावै, तो वो उस ताहीं पकड़कै न्ही काड्डे? 12 फेर माणस तो भेड़

तै भोत घणे खास सै! ज्यांतै आराम कै दिन भलाई करणा ठीक सै, जिसा के माणसां नै चंगा करणा।” 13 फेर यीशु नै उस माणस तै कह्वा, “अपणा हाथ बढ़ा।” उसनै बढ़ाया, अर वो दुसरे हाथ की तरियां ठीक होगया। 14 फेर फरीसियाँ नै बाहरणै जाके उसके बिरोध म्ह सलाह करी के उसका नाश किस तरियां करया जावै। 15 न्यू जाणकै यीशु ओड़ै तै चल्या गया। अर घणे माणस उसके पाच्छे हो लिए, अर उसनै सारया ताहीं ठीक करया, 16 अर उन ताहीं चेतावनी दी, के मेरै बारे म्ह किसे तै ना कहियो के मै कौण सूँ। 17 ताके जो वचन यशायाह नबी कै जरिये कह्वा गया था, वो पूरा हो 18 “देखो, यो मेरा सेवक सै, जिस ताहीं मन्ने चुणया सै, मेरा प्यारा, जिसतै मेरा मन राज्जी सै, मै अपना आत्मा उसपै तारुगँ, अर योए दुसरी जानतां नै न्याय की खबर देवैगा। 19 “वो ना माणसां के गैल झगड़ा करैगा, अर ना किल्की मारैगा, ना बजारां म्ह उसका कोए शब्द सुणैगा। 20 “वो कुचले होए सरकण्डे की समान कमजोर माणसां ताहीं कोनी लताडैगा, अर बुझते होए दीवे के समान, माणस मरता हो तो वो उसनै न्ही मारैगा, वो जिब ताहीं डटया रहैगा जिब ताहीं न्याय ना दुवा दे। 21 “अर दुसरी जात उसके नाम पै आस राखैगी।” 22 फेर माणस एक आन्धे-गूंगे नै जिसम्ह ओपरी आत्मा थी, जो उसनै देखण अर बोल्लण कोनी देवे थी, उसके धोरे ल्याए, अर उसनै उस ताहीं ठीक करया, अर वो गूंगा बोलण अर देखण लागया। 23 इसपै सारे माणस अचम्भा करके कहण लागे, “यो के दाऊद की उल्लाद सै!” 24 पर फरीसियाँ नै न्यू सुणकै कह्वा, “यो तो ओपरी आत्मायाँ के सरदार शैतान की मदद तै ओपरी आत्मायाँ नै लिकाडै सै।” 25 उसनै उनके मन की बात जाणकै उनतै कह्वा, “जिस किसे राज म्ह फूट होवै सै, वो उजड़ जावै सै, अर कोए नगर या घराना जिसम्ह फूट होवै सै, बणया कोनी रहवैगा। 26 अर जै शैतान ए शैतान नै काड्डे, तो वो अपना ए बिरोधी बणग्या, फेर उसका राज किस तरियां बणया रहवैगा? 27 भला, जै मै शैतान की मदद तै ओपरी आत्मायाँ नै काड्डे सूँ, तो थारी पीढ़ी किसकी मदद तै काड्डे सै? इस करके वैए थारा न्याय करेगें। 28 पर जै मै परमेसवर के आत्मा की मदद तै ओपरी आत्मायाँ नै काड्डे सूँ, तो परमेसवर का राज्य थारे धोरे आण पोंहच्या सै।” 29 “या किस तरियां कोए माणस किसे ठाड्डे माणस कै घर म्ह बड़कै उसका माळ लूट सकै सै जिब ताहीं के पैहल्या उस ठाड्डे ताहीं ना जुड़ ले? जिब वो उसका घर लूट लैवैगा।” 30 “जो मेरै गेल्या न्ही वो मेरै बिरोध म्ह सै, अर जो मेरै गेल्या न्ही कठ्ठा करदा, वो खिंडावे सै। 31 ज्यांतै मै थारे तै कहूँ सूँ के माणस का सारे ढाळ का पाप अर बुराई माफ करी जावैगी, पर पवित्र आत्मा की बुराई माफ कोनी करी जावैगी। 32 जो कोए माणस के बेट्टे कै बिरोध म्ह कोए बात कहवैगा, उसका यो कसूर माफ करया जावैगा, पर जो कोए पवित्र आत्मा कै बिरोध म्ह कुछ कहवैगा, उसका कसूर ना तो इस लोक म्ह अर ना परलोक म्ह माफ करया जावैगा।” (aiōn g165) 33 “दरखत अपणे फळ तै ए पिच्छाणा जावै सै, जै दरखत नै बढ़िया कहो, तो उसकै फळ नै भी बढ़िया कहो, या दरखत नै निकम्मा कहो, तो

उसके फल नै भी निकम्मा कहो। 34 हे साँप के सपोलों जिसे माणसों, थम भुन्डे होके किस तरियां बढ़िया बात कह सको सो? क्यूँके जो मन म्ह भरया सै, वोए मुँह पै आवै सै। 35 भला माणस अपने मन के भले भण्डार तै भली बात लिकाड़े सै, अर बुरा माणस अपने मन के बुरे भण्डार तै बुराई की बात काढे सै। 36 अर मै थारे तै कहूँ सूँ के जो-जो निकम्मी बात माणस कहवैगें, न्याय के दिन वे हरेक उस बात का लेखा देवैगें। 37 क्यूँके तू अपनी बातों के कारण बेकसूर, अर अपनी बातों ए के कारण कसूरवार ठहराया जावैगा।” 38 इसपै कुछ शास्त्रियाँ अर फरीसियाँ नै उसतै कहा, “हे गुरु, हम तेरे तै एक चिन्ह-चमत्कार देखना चाहवां सा।” 39 उसनै उन ताहीं जवाब दिया, “इस युग के बुरे अर जार माणस निशान्नी टोहें सै, पर योना नबी की निशान्नी नै छोड़ कोए और निशान्नी उन ताहीं कोनी दी जावैगी। 40 जिस तरियां योना नबी तीन रात अर तीन दिन बड़ी मछली के पेट म्ह रहया, उससे तरियां ए मै माणस का बेटा तीन रात अर तीन दिन धरती के भीत्तर रहूँगा। 41 निनवे नगर के माणस न्याय के दिन इस युग के माणसां के गेल्या उठके उन ताहीं कसूरवार ठहरावैगें, क्यूँके उननै योना नबी का प्रचार सुणके अपने पापां ताहीं स्वीकार किया, अर देख्यो, उरै वो सै जो योना नबी तै भी बड़ड़ा सै। 42 दक्षिण देश की राणी न्याय के दिन इस युग के माणसां के गेल्या उठके उन ताहीं कसूरवार ठहरावैगी, क्यूँके वा राजा सुलैमान का ज्ञान सुणण के खात्तर धरती के दुसरे सिरे तै आई, अर देख्यो, उरै वो सै जो सुलैमान तै भी बड़ड़ा सै।” 43 “जिब ओपरी आत्मा माणस म्ह तै लिकड़के जावै सै, तो सूखी जगहां म्ह आराम टोह्न्दी फिरै सै, अर पांटी कोनी। 44 फेर कहवै सै, ‘मै उससे माणस म्ह जड़ै तै लिकड़ी थी बोहड़ जाऊँगी।’ अर आके उस माणस नै घर जिसा झाड़ा-बुहारा अर सजा-धज्या पावै सै। 45 फेर वा ओपरी आत्मा जाके अपने तै और भुंड़ी सात आत्मायाँ नै अपने गेल्या ले आवै सै, अर वे उस माणस म्ह बड़के ओड़े वास करै सै, अर उस माणस की पाच्छली हालत पैहलया तै भी भुंड़ी हो जावै सै। इस युग के बुरे माणसां की हालत भी इसीए होवैगी।” 46 जिब वो भीड़ तै बात करण ए लागरया था, तब उसकी माँ अर उसके भाई बाहरणै खड़े थे अर उसतै बात करणा चाहवै थे। 47 किसे नै उसतै कहा, “देख, तेरी माँ अर तेरे भाई बाहरणै खड़े सै, अर तेरे तै बात करणा चाहवै सै।” 48 या सुणके यीशु नै कहण आळे ताहीं जवाब दिया, “कौण सै मेरी माँ? अर कौण सै मेरे भाई?” 49 अर अपने चेल्यां कान्ही अपना हाथ बढ़ाके कहा, “देख्यो, मेरी माँ अर मेरे भाई ये सै। 50 क्यूँके जो कोए मेरे सुर्गीय पिता की इच्छा पै चाल्लै वोए मेरा भाई, मेरी बेब्बे अर मेरी माँ सै।”

13 उससे दिन यीशु घर तै लिकड़के गलील समुन्दर के किनारे जा बैठ्या। 2 अर उसके धोरे इसी भीड़ कठी होई के वो किस्ती पै चढ़या, अर सारी भीड़ किनारे पै खड़ी रही। 3 अर उसनै उनतै उदाहरणां म्ह घणीए बात कही “एक किसान बीज बोण लिकड़या। 4 बोंदे बखत कुछ बीज राही के किनारे पड़े अर पछियाँ नै आके उन ताहीं चुग लिया।

5 कुछ बीज पथरीली धरती पै पड़े, जड़ै उनताही घणी माट्टी ना मिली अर डून्धी माट्टी ना मिलण के कारण वे टोळाए जामगे। 6 पर सूरज लिकड़णै पै वे जळगे, अर जड़ ना पकड़ण के कारण सुखगे। 7 कुछ बीज झाड़ियाँ म्ह पड़े, अर झाड़ियाँ नै बढ़के उन ताहीं दाब लिया। 8 पर कुछ बीज आच्छी धरती पै पड़े, कोए सौ गुणा, कोए साठ गुणा, अर कोए तीस गुणा फल ल्याए। 9 जिसके कान हों, वो ध्यान तै सुण ले।” 10 चेल्यां नै धोरे आके उसतै कहा, “तू माणसां तै उदाहरणां म्ह क्यांतै बात करै सै?” 11 उसनै जवाब दिया, “थारे ताहीं सुर्ग के राज्य के भेद की समझ दे राखी सै, पर उन ताहीं न्ही। 12 क्यूँके जिसके धोरे सै, उसतै और दिया जावैगा, अर उसके धोरे घणा हो जावैगा, पर जिसके धोरे कुछ न्ही सै, उसतै जो कुछ उसके धोरे सै, वो भी ले लिया जावैगा। 13 मै उनतै उदाहरणां म्ह ज्यांतै बात करूँ सूँ, के वे देखदे होए कोनी देखदे अर सुणदे होए कोनी सुणदे, अर न्ही समझदे।” 14 “उनके बाबत यशायाह नबी की या भविष्यवाणी पूरी होवै सै: ‘थम सुणोगे, पर समझोगे कोनी, अर देख्योगे, पर थमनै कोनी सूझीगा।’” 15 “क्यूँके इन माणसां का मन मोट्टा होगया सै, अर वे कान्ना तै ऊँच्या सुणै सै, अर उननै अपनी आँख मूंद ली सै, कदे इसा ना हो के वे आँखां तै देख्ये, अर कान्ना तै सुणै अर मन तै समझै, अर पलट जावै, अर मै उननै ठीक करूँ।” 16 पर धन्य सै थारी आँख, क्यूँके वे देख्ये सै, अर थारे कान क्यूँके वे सुणै सै। 17 मै थमनै साच्ची कहूँ सूँ के घणखरे नबियाँ नै अर धर्मियाँ नै चाह्या के जो बात थम देख्यो सो, देख्ये, पर न्ही देख पाए, अर जो बात थम सुणो सो, सुणै, पर न्ही सुण पाए। 18 “इब थम बोण आळे के उदाहरण का मतलब सुणो 19 जो कोए राज्य का वचन सुणके कोनी समझदा, यो वोए सै जो राही के किनारे बोया गया था, उस ताहीं दुष्ट आके खोस ले जावै सै। 20 अर जो पथरीली धरती पै बोया गया सै, यो वो माणस सै, जो वचन सुणके जिब्बे खुशी के गेल्या मान लेवै सै। 21 पर अपने म्ह जड़ न्ही पकड़ण के कारण वो माड़े से दिन का सै, अर जिब वचन के कारण क्लेश या संकट आवै सै, तो जिब्बे ठोक्कर खावै सै। 22 जो झाड़ियाँ म्ह बोया गया, यो वो सै, जो वचन ताहीं सुणै सै, पर इस दुनिया की फिक्र अर धन का धोक्खा वचन नै दाबै सै, अर वो फल कोनी ल्यांदा। (aiōn g165) 23 जो आच्छी धरती पै बोया गया, यो वो सै, जो वचन ताहीं सुणके समझै सै, अर फल ल्यावै सै, कोए सौ गुणा, कोए साठ गुणा, अर कोए तीस गुणा।” 24 यीशु नै उन ताहीं एक और उदाहरण दिया: “सुर्ग का राज उस किसान जिसा सै जिसनै अपने खेत मै बढ़िया बीज बोया। 25 पर जिब माणस सोवै थे तो उसका बैरी आके गेहूँ के बिचाळे जंगली बीज बोके चल्या गया। 26 जिब अंकुर लिकड़े अर बाल लागी, तो जंगली दाण्या के पौधे भी दिखण लागे।” 27 “इसपै धरेलू नौकरां नै आके उसतै कहा, ‘हे मालिक, के तन्नै अपने खेत म्ह बढ़िया बीज कोनी बोया था? फेर जंगली दाण्या के पौधे उस म्ह किन्त तै आए?’” 28 “उसनै उनतै कहा, ‘यो किसे बैरी का काम सै।’ नौकरां नै कहा, ‘के तेरी मर्जी सै के हम जाके उन जंगली पौधां नै कठ्ठे करा?’”

29 “उसने कहा, ‘ना, इसा ना हो के जंगली दाण्या के पौधे कट्टे करदे हाण थम उनकै गेल्या गेहूँ नै भी पाड़ ल्यो। 30 लामणी तक दोनुआ नै एक सेती बधण घो, अर लामणी के बखत मै काटण आळा तै कहुँगा के पैहल्या जंगली दाण्या के पौधे कट्टे करके बाळण खात्तर उनके भरोट्टे जुड़ ल्यो, अर गेहूँ ताहीं मेरै खत्ते म्ह कट्टा करो।” 31 उसने उन ताहीं एक और उदाहरण दिया: “सुर्ग का राज राई के एक दाणे की ढाळ सै, जिस ताहीं किसे माणस नै लेकै अपने खेत म्ह बो दिया। 32 वो सारे बीज्जां तै छोटा तो होवै सै पर जब बध जावै सै फेर सारे साग-पात तै बड़डा होवै सै, अर इसा दरखत हो जावै सै के अकास के पंछी आकै उसकी डालियाँ पै बसेरा करै सै।” 33 उसने एक और उदाहरण उन ताहीं सुणाया “सुर्ग का राज खमीर की ढाळ सै, जिस ताहीं किसे बिरबानी नै लेकै तीन पसेरी (पन्द्रह किलो) चून म्ह रळायार अर होन्दे-होन्दे वो सारा चून खमीर बणग्या।” 34 ये सारी बात यीशु नै उदाहरणां म्ह माणसां तै सिखाई, अर इस तरियां की शिक्षा देण खात्तर वो उदाहरणां का ए इस्तमाल करया करदा। 35 के जो वचन नबी कै जरिये कहुया गया था, वो पूरा होवै: “मै उदाहरण कहण नै अपना मुँह खोल्लूँगा, मै उन बातां नै जो दुनिया की शरुआत तै लुकी होई सै, जाहिर करूँगा।” 36 फेर वो भीड़ नै छोड़के घरां आया, अर उसके चेल्यां नै उसके धोरे आकै कहुया, “खेत म्ह जंगली दाणे का उदाहरण म्हारै ताहीं समझा दे।” 37 यीशु नै उन ताहीं जवाब दिया, “बढ़िया बीज का बोण आळा, मै माणस का बेट्टा सूं। 38 खेत दुनिया के लोग सै, बढ़िया बीज राज्य की ऊलाद, अर जंगली बीज शैतान की ऊलाद सै। 39 जिस बैरी नै उन ताहीं बोया वो शैतान सै। लामणी दुनिया का खात्मा सै, अर काटण आळे सुर्गदूत सै।” (aiōn g165) 40 आखर म्ह जिस तरियां जंगली पौधे कट्टे करे जावै अर बाळे जा सै उससे तरियां दुनिया का खात्मा होवैगा। (aiōn g165) 41 मै माणस का बेट्टा अपने सुर्गदूतां नै भेज्जूँगा, अर वे उसके राज्य म्ह तै सारे जो खुद पाप करै सै अर दुसरयां नै पाप करण खात्तर उकसावै सै, अर भुन्दे काम करणीया नै कट्टे करैगें। 42 अर उननै आग कै कुण्ड म्ह गेरैगें, जड़े रोणा, अर दाँत पिसणा होवैगा। 43 उस बखत धर्मी लोग अपने पिता कै राज्य म्ह सूरज की ढाळ चमकैगें। जिसके कान हों, वो ध्यान तै सुण ले। 44 सुर्ग का राज्य खेत म्ह लुटके होइ धन की ढाळ सै, जिस ताहीं किसे माणस नै पाया अर लटको दिया, अर खुशी के मारे अपना सारा कुछ बेच दिया अर उस खेत ताहीं मोल ले लिया। 45 फेर सुर्ग का राज्य एक व्यापारी की तरियां सै जो आच्छे मोतियाँ की तोह म्ह था। 46 जब उसनै एक घणा महँगा मोत्ती मिल्या तो उसनै जाकै अपना सारा कुछ बेच दिया अर उस ताहीं मोल ले लिया। 47 फेर उसनै कहुया, सुर्ग का राज्य उस मछली के बड़े जाळ की ढाळ सै जो समुन्दर म्ह गेरया जावै, अर हरेक ढाळ की मछली ताहीं समेट ल्यावै। 48 अर जब जाळ भरग्या, तो मछुआरे उस ताहीं किनारे पै खींच ल्यावै, अर बैठके बढ़िया-बढ़िया मछली तो बासणा म्ह कट्टी करी अर बेकार बगा दी। 49 दुनिया के अन्त म्ह इस तरियां ए होवैगा। सुर्गदूत आकै दुष्ट लोगां नै धर्मियाँ तै

न्यारे करैगें, (aiōn g165) 50 अर सुर्गदूत, दुष्ट लोगां नै आग कै कुण्ड म्ह गेरैगें। जड़े रोणा, अर दाँत पिसणा होवैगा। 51 “के थमनै ये सारी बात समझी?” उननै उसतै कहुया, “हाँ।” 52 यीशु नै उनतै कहुया, “इस करके हरेक शास्त्री जो सुर्ग कै राज्य का चेल्ला बणया सै, उस घरवासे की तरियां सै जो अपने भण्डार तै नयी अर पुराणी चीज काड्डे सै।” 53 जब यीशु नै ये सारे उदाहरण कह लिये, तो ओड़ै तै चल्या गया। 54 अर अपने नगर नासरत म्ह आकै उनके आराधनालय म्ह उननै इसा उपदेश देण लागग्या के वे हैरान होके कहण लाग्ये, “इसनै यो ज्ञान अर सामर्थ के काम कित तै मिले? 55 के यो खात्ती का छोरा कोनी? अर के इसकी माँ का नाम मरियम अर इसके भाईयाँ का नाम याकूब, यूसुफ, शमौन अर यहूदा कोनी? 56 अर के इसकी सारी बेब्बे म्हारै बिचाळे कोनी रह्दी? फेर इसनै यो सारा कित तै मिल्या?” 57 इस तरियां उननै उसके कारण ठोक्कर खाई, पर यीशु नै उनतै कहुया, “नबी का अपने गाम अर घर नै छोड़ और किते निरादर कोनी होन्दा।” 58 अर उसनै ओड़ै उनके अबिश्वास कै कारण घणे चमत्कार के काम नही करै।

14 उस बखत चौथाई देश के गलील परदेस के राजा हेरोदेस नै यीशु का जिक्र सुणया, 2 अर उसनै अपने नौकरां तै कहुया, “यो यूहन्ना बपतिस्मा देण आळा सै! वो मरे होया म्ह तै जिन्दा उठ्या सै, इस्से करके उसतै ये सामर्थ के काम दिक्खे सै।” 3 यूहन्ना ताहीं पकड़के बाँधया अर जेळ म्ह गेर दिया था। क्यूँके हेरोदेस नै अपने भाई फिलिप्पुस के जिन्दा रहन्दे उसकी घरआळी हेरोदियास ताहीं अपने धोरे राखली थी, 4 क्यूँके यूहन्ना नै उसतै कहुया था के इस ताहीं राखणा मूसा के नियम-कायदा के मुताबिक तेरे खात्तर ठीक कोनी। 5 ज्यांतै वो उसनै मारणा चाहवै था, पर माणसां तै डरै था क्यूँके वे यूहन्ना नै नबी मान्ने थे। 6 पर जब हेरोदेस का जन्म दिन आया, तो हेरोदियास की बेट्टी नै त्यूहार म्ह नाच दिखाके हेरोदेस ताहीं राज्जी करया। 7 इसपै उसनै कसम खाके वचन भर लिया, “जो कुछ तू माँगैगी, मै तन्नै दियुँगा।” 8 वा अपनी माँ कै उकसाण तै बोल्ली, “यूहन्ना बपतिस्मा देण आळे का सिर थाळ म्ह उरै मन्ने मँगवा दे।” 9 राजा घणा दुखी होया, पर अपनी कसम, अर गेल्या बैठण आळा कै कारण, हुकम दिया के दे दिया जावै। 10 अर उसनै जेळ म्ह सैनिकां ताहीं भेजके यूहन्ना का सिर कटवा दिया। 11 अर उसका सिर थाळ म्ह ल्याया गया अर छोरी ताहीं दिया गया, जिस ताहीं वा अपनी माँ धोरे लेगी। 12 फेर यूहन्ना के चेल्लें आए अर उसकी लाश ताहीं ले जाके गाड़ दिया, अर जाके यीशु ताहीं खबर दी। 13 जब यीशु नै सुणया, तो वो किस्ती पै चढ़के ओड़ै तै किसे सुनसान जगहां ताहीं, एकान्त म्ह चल्या गया। माणस न्यू सुणके नगर-नगर तै पांए-पाँ उसके पाच्छे हो लिये। 14 यीशु किनारे पै पुहवा तो एक बड्डी भीड़ देखी अर उनपै तरस खया, अर उनके बिमारां ताहीं ठीक करया। 15 जब साँझ होई तो उसके चेल्यां नै उसके धोरे आकै कहुया, “या सुनसान जगहां सै, अर वार होरी सै, माणसां ताहीं बिदा करया जावै के वे बस्तियाँ म्ह जाके अपने खात्तर खाणा मोल लियावै।” 16 पर यीशु नै उनतै कहुया, “उनका जाणा

जरूरी कोनी! थमे इन्ने खाण नै घो।” 17 उननै यीशु तै कहा, “उरै म्हारै धोरै पाँच रोटी अर दो मच्छियाँ नै छोड़के और कुछ कोनी सै।” 18 यीशु बोल्या, “उन ताहीं उरै मेरै धोरै लियाओ।” 19 फेर यीशु नै माणसां ताहीं घास पै बैठण खातर कहा, अर उन पाँच रोटी अर दो मच्छियाँ ताहीं लिया; सुर्ग कान्ही लखाके खाणे खातर परमेसवर का धन्यवाद करया अर रोटी तोड़-तोड़के चेल्यां ताहीं दी, अर चेल्यां नै माणसां ताहीं। 20 जिन सारे खाके छिकगे, तो चेल्यां नै बचे होए टुकड्या तै भरी होई बारहां टोकरी ठाई। 21 अर खाण आळे लुगाईयाँ अर बाळकां नै छोड़के, पाँच हजार माणसां कै करीबन थे। 22 फेर उसनै जिब्बे अपणे चेल्यां ताहीं किस्ती पै चढ़ण कै खातर मजबूर करया के वे उसतै पैहल्या पार चले जावै, जिन ताहीं वो अपणे माणसां ताहीं बिदा करै। 23 वो माणसां ताहीं बिदा करके, प्रार्थना करण खातर उनतै अलग होके पहाड़ पै चल्या गया; अर साँझ ताहीं वो ओड़ै एक्ला था। 24 तब तक किस्ती समुन्दर कै किनारे तै भौत दूर जा ली थी अर झाल्लां तै थपेड़े खाके डगमगाण लागरी थी, क्यूँके हवा स्याम्ही की थी। 25 यीशु सबेरै तीन बजे के लोवै-धोवै यीशु समुन्दर पै चाल्दे होए उनकै धोरै आया। 26 चेल्लें उस ताहीं समुन्दर पै चाल्दे होए देखके घबरारगे। अर बोल्ले, “यो भूत सै!” अर भय के मारे किल्की मारण लागे। 27 फेर यीशु नै जिब्बे उनतै बात करी अर बोल्या, “होसला राक्खो! मै सूं, डरो मतना!” 28 पतरस नै उसतै जवाब दिया, “हे प्रभु, जै तू ए सै, तो मन्नै अपणे धोरै पाणी पै चालके आण का हुकम दे।” 29 यीशु बोल्या, “आ!” फेर पतरस किस्ती पै तै उतरके यीशु के धोरै जाण ताहीं पाणी पै चाल्लण लाग्या। 30 पर हवा नै देखके डरग्या, अर जिन डूब्लण लाग्या तो किल्की मारके बोल्या, “हे प्रभु, मन्नै बचा!” 31 यीशु नै जिब्बे हाथ बढ़ाके थाम लिया अर उसतै बोल्या, “हे अल्पबिश्वासी, तन्नै क्यातै शक करया?” 32 जिन वे किस्ती पै चढ़गे, तो हवा थमगी। 33 इस घटना नै देखके उसके चेल्यां नै जो किस्ती पै थे, उसकी बड़ाई करके कहा, “साच्चए, तू परमेसवर का बेटा सै।” 34 वे गलील समुन्दर पार करके गन्नेसरत परदेस म्ह पोहचे। 35 ओड़ै के माणसां नै उस ताहीं पिच्छण लिया अर लोवै-धोवै के सारे देश म्ह खबर भेज दी, अर सारे बिमारां नै उसकै धोरै ल्याए। 36 अर उसतै बिनती करण लागे के वे उननै अपणे लत्ते के पल्ले तै ए छू लेण दे अर जितन्या नै उस ताहीं छुआ वे ठीक होगे।

15 फेर यरुशलम नगर तै कुछ फरीसी अर शास्त्री यीशु के धोरै आके बोल्ले, 2 “तेरे चेल्लें बुजुर्ग के रीति-रिवाजां ताहीं क्यातै टाळे सै, क्यूँ बिना हाथ धोए रोटी खावै सै?” 3 उसनै उन ताहीं जवाब दिया, “थम भी अपणी रीति-रिवाज कै कारण क्यातै परमेसवर का हुकम टाळी सो? 4 क्यूँके परमेसवर नै कहा, ‘अपणे माँ-बाप की इज्जत कर, अर जो कोए माँ-बाप नै भुंडा बोल्लै, वो मार दिया जावै।’ 5 पर थम कहो सो के जै कोए अपणे माँ-बाप तै कहवै, ‘जो कुछ मन्नै थारे ताहीं अपणी सम्पत्ति म्ह तै देणा था, वो मन्नै परमेसवर ताहीं अर्पण ताहीं कर दिया,’ 6 तो वो पिता का आदर ना करै, इस तरियां थमनै

अपणी रीत-रिवाजां कै कारण परमेसवर का वचन टाळ दिया। 7 हे कपटियों, यशयाह नबी नै थारे बारे म्ह या भविष्यवाणी ठीक करी सै” 8 ये माणस होठां तै तो मेरा आदर करै सै, पर उनका मन मेरै तै दूर रहवै सै। 9 “अर वे खांम-खा मेरी भगति करै सै, क्यूँके माणसां के तरीक्यां नै धर्म उपदेश करके सिखावै सै।” 10 फेर उसनै माणसां ताहीं अपणे धोरै बुलाके उनतै कहा, “सुणो, अर समझो 11 जो मुँह म्ह जावै सै, वो माणस नै अशुद्ध कोनी करदा, पर जो मुँह तै लिंकड़ै सै, वोए माणस नै अशुद्ध करै सै।” 12 फेर चेल्यां नै आके उसतै कहा, “के तन्नै बेरा सै के फरीसियाँ नै यो वचन सुणके टोककर खाई?” 13 उसनै जवाब दिया, “हरेक पौधा जो मेरै सुर्गीय पिता नै न्ही लगाया, उखाड़ा जावैगा। 14 उन ताहीं जाण घो; वे आन्धे राह बताणीये सै अर आन्धा जै आन्धे नै राह दिखावै, तो दोन्नु ए खड्डे म्ह गिरेंगें।” 15 न्यू सुणके पतरस नै उसतै कहा, “यो उदाहरण म्हारै ताहीं समझा दे।” 16 यीशु नै उनतै कहा, “के थम भी इब ताहीं नासमझ सो? 17 के थमनै न्ही बेरा के जो कुछ मुँह म्ह जावै वो पेट म्ह पडै सै, अर संडास कै जरिये लिंकड़ जावै सै? 18 पर जो कुछ मुँह तै लिंकड़ै सै, वो मन तै लिंकड़ै सै, अर वोए माणस ताहीं अशुद्ध करै सै। 19 क्यूँके भुन्दे विचार, हत्या, जारी, बिगान्नी बिरबान्नी धोरै जाणा, चोरी, झूठी गवाही अर बुराई मन तै ए लिंकड़ै सै। 20 येए सै जो माणस नै अशुद्ध करै सै, पर हाथ बिना धोए रोटी खाणा माणस नै अशुद्ध कोनी करदा।” 21 यीशु ओड़ै तै लिंकड़के, सूर अर सैदा के परदेसां कान्ही चल्या गया। 22 उस परदेस तै एक कनानी बिरबान्नी लिंकड़ी, अर किल्की मारके कहण लागी, “हे प्रभु! दाऊद की ऊलाद, मेरै पै दया कर! मेरी बेट्टी ताहीं ओपरी आत्मा घणी सतावै सै।” 23 पर यीशु नै उसतै कुछ जवाब कोनी दिया। फेर उसके चेल्यां नै आके उसतै बिनती करी, “इस ताहीं बिदा करो, क्यूँके वा म्हारै पाच्छै रुक्के मारदी आवण लागरी सै।” 24 यीशु नै जवाब दिया, “इसाएल के कुण्बे की खोई होड़ भेड्डां नै छोड़ मै किसे के धोरै कोनी भेज्या गया।” 25 पर वा आई, अर यीशु ताहीं प्रणाम करके कहण लागी, “हे प्रभु, मेरी मदद कर।” 26 यीशु नै जवाब दिया, “छोरयां की रोटी लेके कुत्त्या कै आगरे गेरणा ठीक कोनी।” 27 उसनै कहा, “साच्ची सै प्रभु, पर कुत्ते भी तो मेज के तळे बाळकां की रोटी के टुकड़े खा लवें सै।” 28 इसपै यीशु नै उस ताहीं जवाब दिया, “हे नारी, तेरा बिश्वास पक्का सै। जिसा तू चाहवै सै, तेरे खातर उसाए हो।” अर उसकी बेट्टी उससे घड़ी तै चंगी होगी। 29 यीशु ओड़ै तै गलील समुन्दर कै धोरै आया, अर पहाड़ पै चढ़के बैठग्या। 30 फेर भीड़ की भीड़ उसके धोरै आई। वे अपणे गेल्या लंगड़ा नै, आन्धा नै, टुंडयाँ नै, गूग्या नै अर दुसरे घणेए माणसां नै उसके धोरै ल्याए, अर उन ताहीं उसके पायां म्ह गेर दिया, अर उसनै उन ताहीं ठीक करया। 31 जिन माणसां नै देख्या के गूँगे बोल्लै सै, अर टुंडे चंगे होवै सै, अर लंगड़े चाल्लै सै, अर आन्धे देखवै सै तो हेरान होके इसाएल के परमेसवर की बड़ाई करी। 32 यीशु नै अपणे चेल्यां ताहीं बुलाया अर कहा, “मन्नै इस भीड़ पै तरस आवै

सै, क्यूँके वे तीन दिनां तै मेरै गेल्या सै अर उनकै धोरै कुछ खाण नै भी कोनी। मै उननै भूख्वा बिदा करणा न्ही चाहन्दा, कदे इसा ना हो राह म्ह थक हार कै बेहोस हो जावै।” 33 चेल्यां नै उसतै कह्या, “हमनै इस बण म्ह कित्त तै इतनी रोटी मिलैगी के हम इतनी बड्डी भीड़ ताहीं छिकावा?” 34 यीशु नै उनतै बुझ्झया, “थारे धोरै कितनी रोटी सै?” उननै कह्या, “सात, अर माड़ी-सी छोटी मच्छी।” 35 फेर उसनै माणसां ताहीं धरती पै बैठण का हुकम दिया। 36 अर उन सात रोटी अर मच्छियाँ ताहीं लिया, परमेसवर का धन्यवाद करके तोड्या, अर अपणे चेल्यां ताहीं देन्दा गया, चेल्लें माणसां ताहीं। 37 इस तरियां सारे खाके छिकगे अर चेल्यां नै बचे होड़ टुकड्या तै सात टोकरे ठाए। 38 खाण आळे बिरबानियाँ अर बाळकां नै छोड़के चार हजार माणस थे। 39 जिब वो भीड़ नै बिदया करके किस्ती म्ह चढ़ग्या अर मगदन देश की सीमा म्ह आया।

16 फरीसियाँ अर सदूकियाँ नै धोरै आके उस ताहीं परखण कै खातर उसतै कह्या, “हमनै सुर्ग की कोए निशान्नी दिखा।” 2 उसनै उन ताहीं जवाब दिया, “साँझ नै थम कहो सो, ‘मौसम खुला रहवैगा, क्यांतैके अकास लाल सै’, 3 अर तड़कैए नै कहो सो, ‘आज आँधी आवैगी, क्यूँके अकास लाल अर धूळ-भरया सै।’ थम अकास के लछण देखके उसका भेद बता सको सो, पर आज कै बखत म्ह जो होण लाग रह्य सै उसनै देखके भेद क्यूँ न्ही बता सकदे? 4 इस युग के बुरे अर जार माणस चिन्ह-चमत्कार टोहैं सै, पर योना नबी के चिन्ह-चमत्कार नै छोड़ उन ताहीं और कोए चिन्ह-चमत्कार कोनी दिया जावैगा।” अर वो उननै छोड़के चल्या गया। 5 चेल्लें समुन्दर कै परली ओड़ पोहचे, पर वे रोटी लेणा भूलगे थे। 6 यीशु नै उनकी कपट रूपी शिक्षा के बारे म्ह उनतै कह्या, “देखबो, फरीसियाँ अर सदूकियाँ के खमीर तै चौकन्ने रहियो।” 7 वे आप्पस म्ह विचार करण लागे, “हम रोटी कोनी ल्याए ज्यांतै वो इस तरियां कहवै सै।” 8 न्यू जाणकै यीशु नै उनतै कह्या, “हे अल्प बिश्वासियाँ, थम क्यांतै विचार करो सो के म्हारै धोरै रोटी कोनी सै? 9 के थम इब ताहीं न्ही समझे? के थमनै उन पाँच हजार की पाँच रोटी याद कोनी, अर ना यो के थमनै कितनी टोकरियाँ ठाई थी? 10 अर उन चार हजार की सात रोटी, अर ना यो के थमनै कितने टोकरे ठाए थे? 11 थम क्यांतै न्ही समझे के मन्ने थारे तै रोटियाँ के बाबत न्ही कह्या, पर यो के फरीसियाँ अर सदूकियाँ के खमीर तै चौकन्ने रहियो।” 12 फेर उनकै समझ म्ह आया के उसनै रोटी कै खमीर तै न्ही, पर फरीसियाँ अर सदूकियाँ की शिक्षा तै चौकन्ने रहण नै कह्या था। 13 यीशु कैसरिया फिलिप्पी के परदेस म्ह आया, अर अपणे चेल्यां तै बुझ्झण लाग्या, “लोग मुझ्झ माणस कै बेटे नै के कहवै सै?” 14 वे बोल्ले, “कुछ तो यूहन्ना बपतिस्मा देण आळा कहवै सै, अर कुछ एलिय्याह, अर कुछ यिर्मयाह या नबियाँ म्ह तै कोए एक कहवै सै।” 15 उसनै उनतै कह्या, “पर थम मन्ने के कहो सो?” 16 शमौन पतरस नै जवाब दिया, “तू जिन्दे परमेसवर का बेटा मसीह सै।” 17 यीशु नै उस ताहीं जवाब दिया,

“हे शमौन, योना के बेटे, तू धन्य सै; क्यूँके माँस अर लहू नै न्ही, पर मेरै पिता नै जो सुर्ग म्ह सै, या बात तेरे पै जाहिर करी सै। 18 अर मै भी तेरे तै कहूँ सूँ के तू पतरस सै, अर मै इस पत्थर पै अपणी कलीसिया बणाऊँगा, अर अधोलोक के फाटक उसपै हावी कोनी होवैगें। (Hadēs 986) 19 मै तन्नै सुर्ग के राज्य की ताळी दियुँगा जो कुछ तू धरती पै बांधैगा, वो सुर्ग म्ह बंधैगा; अर जो तू धरती पै खोलैगा, वो सुर्ग म्ह खुलैगा।” 20 फेर उसनै चेल्यां ताहीं चिताया के किसे तै ना कहियो के मै मसीह सूँ। 21 उस बखत तै यीशु अपणे चेल्यां तै बताण लाग्या, “जरूरी सै के मै यरुशलम म्ह जाऊँ अर यहूदी अगुवें, प्रधान याजकां, शास्त्रियाँ के हाथ्यां तै घणा दुख ठाऊँ; अर मार दिया जाऊँ; अर तीसरे दिन जी उठूँ।” 22 इसपै पतरस उसनै न्यारा ले जाके झिड़कण लाग्या, “हे प्रभु, परमेसवर इसा ना करै! तेरे गेल्या इसा कदे ना होवैगा।” 23 उसनै पलटके पतरस तै कह्या, “हे शैतान, मेरै स्याम्ही तै दूर हो! तू मेरै खातर ठोक्कर का कारण सै; क्यांतैके तू परमेसवर की बात्तां पै न्ही, पर माणसां की बात्तां पै मन लगावै सै।” 24 फेर यीशु नै अपणे चेल्यां तै कह्या, “जो कोए मेरा चेल्ला बणणा चाहवै, वो अपणी ए इच्छा पूरी ना करै बल्के अपणे दुखां का क्रूस ठाके, मेरै पाछै हो लेवै। 25 क्यूँके जो अपणी जान बचाणा चाहवैगा, वो उसनै खोवैगा; अर जो कोए मेरै खातर जान खोवैगा, वो उसनै पावैगा। 26 जै माणस सारी दुनिया नै पा लेवै, अर अपणी जान का नुकसान ठावै, तो उसनै के फायदा होगा? या माणस अपणी जान कै बदले के देवैगा? 27 मै माणस का बेटा अपणे सुर्गदूतां के गेल्या अपणे पिता की महिमा म्ह आऊँगा, अर उस बखत ‘मै हरेक नै उसके काम्मां के मुताबिक प्रतिफळ देऊँगा।’ 28 ‘मै थारे तै साच्ची कहूँ सूँ जो आड़े खड़े सै उन म्ह तै कुछ इसे सै के जिब तक वे मुझ्झ माणस के बेटे नै उसके राज्य म्ह आन्दे होए ना देख लेगें तब ताहीं मौत उननै छू भी न्ही पावैगी।”

17 छः दिनां पाछै यीशु नै पतरस अर याकूब अर उसके भाई यूहन्ना ताहीं गेल्या लिया, अर उन ताहीं एक्ले म्ह किसे ऊँच्चे पहाड़ पै लेग्या। 2 ओड़े उनकै स्याम्ही उसका रूप म्ह बदलाव होया, अर उसका मुँह सूरज की ढाळ चमक्या अर उसके लत्ते चाँदणे की ढाळ धोळे होग्ये। 3 अर मूसा नबी अर एलिय्याह उसके गेल्या बात करदे होड़ दिक्खे। 4 इसपै पतरस नै यीशु तै कह्या, “हे प्रभु, म्हारा उरै रहणा ठीक सै। जै तेरी मर्जी हो तो मै उरै तीन मण्डप बणाऊँ, एक तेरे खातर, एक मूसा नबी खातर, एक एलिय्याह नबी खातर।” 5 वो बोल्लण लागरया था के एक चमकदा होया बादळ उनपै छाग्या, अर उस बादळ म्ह तै या वाणी लिकड़ी, “यो मेरा प्यारा बेटा सै, जिसतै मै राज्जी सूँ: इसकी सुणो।” 6 चेल्लें न्यू सुणकै मुँह कै बळ गिरगे अर घणे डरगे। 7 यीशु नै धोरै आके उन ताहीं छुया, अर बोल्या, “उठो, डरो मतना।” 8 फेर उननै अपणी निगांह करी अर यीशु नै छोड़ और किसे ताहीं कोनी देख्या। 9 जिब वे पहाड़ पै तै उतरण लागरे थे, तो यीशु नै उनतै यो हुकम दिया, “जिब ताहीं मै माणस का बेटा मरे होया म्ह तै जिन्दा न्ही हो जाऊँगा, तब

ताहीं जो कुछ थमनै देख्या सै किसे तै ना कहियो।” 10 इसपै उसके चेल्यां नै उसतै बुझ्या, “फेर शास्त्री कयांते कहवै सै के एलिय्याह का पैहल्या आणा जरूरी सै।” 11 उसनै जवाब दिया, “एलिय्याह जरूर आवैगा, अर सारा कुछ सुधरैगा। 12 पर मै थमनै कहूँ सूँ के एलिय्याह आ लिया, अर माणसां नै उस ताहीं न्ही पिच्छाणा, पर जिसा चाह्या उसाए उसके गेल्या करया। इस तरियां तै मै माणस का बेट्टा भी उनके हाथ्यां तै दुख ठाऊँगा।” 13 फेर चेल्यां नै समझया के उसनै म्हारै तै यूहन्ना बपतिस्मा देणीये के बाबत कहा सै। 14 जिब वो भीड़ के धोरै पोहचे, तो एक माणस उसके धोरै आया, अर गोठ्ठे टेक के कहण लाग्या, 15 “हे प्रभु, मेरे बेट्टे पै दया कर! क्यूँके उस ताहीं मिर्घी आवे सै, अर वो घणा दुख ठावै सै; अर बार-बार आग म्ह अर बार-बार पाणी म्ह पड़ ज्या सै। 16 अर मै उसनै तेरे चेल्यां धोरै ल्याया था, पर वे उसनै ठीक कोनी कर सके।” 17 यीशु नै जवाब दिया, “हे अबिश्वासी अर जिद्दी माणसां, मै कद ताहीं थारे गेल्या रहूँगा? कद ताहीं थारी सहूँगा? उसनै उरै मेरे धोरै ल्याओ।” 18 फेर यीशु नै ओपरी आत्मा ताहीं धमकाया, वा उस म्ह तै लिकड़ग्यी अर छोरा उससे बखत ठीक होग्या। 19 फेर चेल्यां नै एकले म्ह यीशु के धोरै आके कहा, “हम उसनै कयांते न्ही काढ सके?” 20 उसनै उनतै कहा, “अपणे बिश्वास की कमी के कारण, क्यूँके मै थमनै साच्ची कहूँ सूँ, जै थारा बिश्वास राई के दाणै के बराबर भी हो, तो इस पहाड़ तै कह सकोगे, ‘उरै तै सरकके ओड़े चल्या जा’, तो वो चल्या जावैगा, अर कोए बात थारे खात्तर मुश्किल कोनी होवैगी।” 21 (पर या जात बिना प्रार्थना अर ब्रत के कोनी लिकड़दी।) 22 जिब वे गलील परदेस म्ह थे, तो यीशु नै उनतै कहा, “मै माणस का बेट्टा माणसां के हाथ्यां म्ह पकड़वाया जाऊँगा। 23 वे मन्नै मार देवैगें, अर मै तीसरे दिन जिन्दा हो जाऊँगा।” इसपै वे घणे उदास होए। 24 जिब वे कफरनहूम पोहचे, तो मन्दर का कर लेण आळा नै पतरस के धोरै आणके बुझ्या, “के थारा गुरु, मन्दर का कर कोनी देंदा?” 25 उसनै कहा, “हाँ, देवे सै।” जिब वो घरां आया, तो यीशु नै उसके बुझण तै पैहल्याए उसतै कहा, “हे शमोन, तू के सोचवै सै? धरती के राजा चुंगी किन तै लेवै सै? अपणे बेट्ट्यां तै या बिगान्यां तै?” 26 पतरस नै उसतै कहा “बिगान्यां तै।” यीशु नै उसतै कहा “तो बेट्टे बचगे। 27 तोभी इस खात्तर के हम उननै ठोक्कर ना खुवावा, तू झील के किनारे जाके कांडा गेर, अर जो मच्छी पैहले लिकड़ै, उसनै ले, उसका मुँह खोल्लण पै तेरे ताहीं एक सिक्का (जिसकी किम्मत चार दिन की मजदूरी के बराबर हो सै) मिलैगा, उससे नै लेके मेरे अर अपणे बदले म्ह दे दिये।”

18 उस घड़ी चेल्लें यीशु के धोरै आके बुझण लागे, “सुर्ग के राज्य म्ह बड़ड़ा कौण सै?” 2 इसपै उसनै एक बाळक ताहीं धोरै बुलाके उनके बिचाळे खड्या करया, 3 अर कहा, “मै थमनै सच कहूँ सूँ के जिब ताहीं थम न्ही बदलो अर बाळकां की ढाल नम्र न्ही बणो, थम सुर्ग के राज्य म्ह बड़ न्ही सकदे। 4 जो कोए अपणे-आपनै इस बाळक की

ढाळ छोटा करैगा, वो सुर्ग के राज्य म्ह बड़ड़ा होवैगा। 5 अर जो कोए मेरे नाम तै एक इसे बाळक ताहीं अपणावै सै वो मन्नै अपणावै सै।” 6 पर जो कोए इन छोट्या बाळकां समान जो मेरे पै बिश्वास करै सै, किसे तै भी पाप करवावै, तो उसके खात्तर भला योए सै के एक बड्डी चाक्की का पाट उसके गळ म्ह लटकाया जावै, अर वो डूच्या समुन्दर म्ह डबोया जान्दा। 7 ठोकरां के कारण दुनिया पै हाय! ठोकरां का लागणा जरूरी सै; पर धिक्कार सै उस माणस पै जिसके जरिये ठोक्कर लागै सै। 8 जै तेरा हाथ या तेरा पैर तेरे तै पाप करवावै सै, तो उसनै काटके बगा दे, टुंडा या लंगड़ा होके जीवन म्ह दाखल होणा इसतै भला सै के दो हाथ या दो पैर रहंदे होए तू अनन्त आग म्ह गेरया जावै। (aiōnios g166) 9 जै तेरी आँख तेरे तै पाप करवावै सै, तो उस ताहीं लिकाड़के फैंक दे, काणा होके अनन्त जीवन म्ह बड़णा तेरे खात्तर भला सै, ना के दो आँख रहंदे होए तू नरक की आग म्ह गेरया जावै। (Geenna g1067) 10 देख्यो, थम इन छोट्या म्ह तै किसे नै तुच्छ ना जाणीयो, क्यूँके मै थमनै कहूँ सूँ के सुर्ग म्ह उनके सुर्गदूत मेरे सुर्गीय पिता की मौजूदगी म्ह सदा रहवै सै। 11 (क्यूँके मै माणस का बेट्टा खोये होया नै बचाण आया सूँ।) 12 थारा इसके बारे म्ह के विचार सै? जै किसे माणस की सौ भेड़ हों, अर उन म्ह तै एक भटक जावै, तो के वो निन्यानवे ताहीं छोड़के, अर पहाड़ां पै जाके, उस भटकी होई नै कोनी टोहवैगा? 13 अर जै इसा हो के उसनै पावै, तो मै थमनै साच्ची कहूँ सूँ, के वो उन निन्यानवे भेड़ां के खात्तर जो भटकी कोनी थी, इतणा आनन्द कोनी करैगा जितना के इस भेड़ के खात्तर करैगा। 14 इससे ढाळ थारे पिता की जो सुर्ग म्ह सै या मर्जी कोनी के इन छोट्यां म्ह तै एक भी नाश हो। 15 “जै तेरा बिश्वासी भाई तेरे खिलाफ कसूर करै, तो जा अर एकले म्ह बतळा के उसनै समझा, जै वो तेरी सुणके पछतावै तो तन्नै अपणे भाई ताहीं पा लिया। 16 जै वो तेरी न्ही सुणै, तो एक या दो जन नै अपणे गेल्या और ले जा, क्यूँके मूसा नबी के नियम-कायदा के मुताबिक ‘हरेक बात दो या तीन तै ज्यादा गवाह के स्याम्ही सच साबित हो जावै।’ 17 जै वो उनकी भी न्ही मान्ने, तो कलीसिया तै कह दे, पर जै वो कलीसिया की भी कोनी मान्ने तो तू यो समझ ले के वो गैर यहूदी अर चुंगी लेण आळे जिसा सै।” 18 “मै थमनै साच्ची कहूँ सूँ, जो कुछ थम धरती पै बांधोगे, वो सुर्ग म्ह बंधेगा अर जो कुछ थम धरती पै खोल्लोगे, वो सुर्ग म्ह खुल्लैगा।” 19 “फेर मै थमनै कहूँ सूँ, जै थारे म्ह तै दो जणे धरती पै किसे बात के खात्तर एक मन होके बिनती करै, तो वा मेरे पिता की ओड़ तै जो सुर्ग म्ह सै, उनके खात्तर हो जावैगी। 20 क्यूँके जड़ै दो या तीन मेरे नाम पै कठ्ठे होवै सै, ओड़ै मै उनके बिचाळे म्ह होऊँ सूँ।” 21 जिब पतरस नै धोरै आके उसतै कहा, “हे प्रभु, जै मेरा भाई कसूर करदा रहवै, तो मै कितनी बार उस ताहीं माफ करूँ? के सात बार?” 22 यीशु नै उसतै कहा, “मै तेरे तै यो न्ही कहन्दा के सात बार, बल्के सात बार के सत्तर गुणा तक माफ करियो।” 23 “इस करके सुर्ग के राज्य की तुलना इस उदाहरण तै करी जा सकै सै, किसे राजा नै अपणे नौकरां का लेक्खा

(ब्यौरा) लेणा चाह्या। 24 जिब वो लेक्खा लेण लाग्या, तो एक जणा उसके स्याम्ही ल्याया गया जो दस हजार तोड़े का कर्जवान था। 25 जिब के चुकता करण नै उसके धौरे कुछ कोनी था, तो उसके माल्लिक नै कह्या, 'यो अर इसकी घरआळी अर बाळ-बच्चे अर जो कुछ इसका सै सारा बेच्या जावै, अर कर्ज चुकता करया जावै।' 26 "इसपै उस नौक्कर नै उसके पायां म्ह पड़के उस ताहीं कह्या, 'हे राजा धीरज धर, मै सारा कुछ भर दियूंगा।' 27 इसपै राजा नै तरस खाके उस नौक्कर ताहीं छोड़ दिया, अर उसका कर्जा भी माफ कर दिया।" 28 "पर जिब वो नौक्कर बाहरणै लिक्ड्या, तो उसके साथ के नौकरां म्ह तै एक उसतै मिल्या जो उसके सौ दीनार (100 दिन की मजदूरी) का कर्जदार था; उसनै पकड़के उसका गळा घोट्या अर कह्या, 'जो कुछ मेरा तेरे पै कर्ज सै भर दे।' 29 "इसपै उसका साथ का नौक्कर पायां म्ह पड़के उसतै बिनती करण लाग्या, 'धीरज धर, मै सारा कुछ भर दियूंगा।" 30 वो न्ही मान्या, पर जाके उस ताहीं जेळ म्ह गेर दिया के जिब ताहीं कर्जा ना भर दे, तब तक ओड़ैए रहवै। 31 उसके गेल्या के नौक्कर यो जो होया था देखके घणो उदास होए, अर जाके अपणे राजा ताहीं पूरा हाल बता दिया। 32 "फेर राजा नै उस ताहीं बुलाके उसतै कह्या, 'हे दुष्ट नौक्कर, तन्नै जो मेरे तै बिनती करी, तो मन्नै तेरा वो सारा कर्जा माफ कर दिया। 33 ज्यांतै जिस ढाळ मन्नै तेरे पै दया करी, उससे तरियां के तन्नै भी अपणे साथ के नौक्कर पै दया न्ही करणी चाहिये थी?" 34 अर उसके माल्लिक नै छो म्ह आके उस ताहीं दण्ड देणआळे के हाथ्यां म्ह सौप दिया, के जिब ताहीं वो सारा कर्जा भर न्ही देवै, तब तक उनके हाथ्यां म्ह रहवै। 35 "इस्से ढाळ जै थारे म्ह तै अपणे भाई नै ना माफ करै तो मेरा पिता जो सुर्ग म्ह सै थारे तै उसाए करैगा।"

19 जिब यीशु नै ये बात कह ली, तो गलील परदेस तै चल्या गया; अर यरदन नदी के परली ओड़ यहूदिया परदेस म्ह आया। 2 फेर बड्डी भीड़ उसके पाच्छै हो ली, अर उसनै ओड़ै उन ताहीं चंगा करया। 3 फेर फरीसी उसनै परखण खात्तर धौरे आके बोल्ले, "के किसे भी कारण तै अपणी घरआळी ताहीं छोड़णा ठीक सै?" 4 उसनै जवाब दिया, "के थमनै न्ही पढ़्या के जिसनै उन ताहीं बणाया, उसनै शरुआत तै नर अर नारी बणाके कह्या, 5 इस कारण माणस अपणे माँ-बाप तै न्यारा होके अपणी घरआळी के गेल्या रहवैगा अर वे दोन्नु एकए तन होवैंगे? 6 इस करके इब वे दो न्ही, पर एक तन सै। इस करके जिन ताहीं परमेसवर नै जोड़या सै, उन ताहीं माणस न्यारा ना करै।" 7 उननै उसतै कह्या, "फेर मूसा नबी नै यो क्यातै ठहराया के तलाक देके उस ताहीं छोड़दे?" 8 उसनै उनतै कह्या, "मूसा नबी नै थारे मन की कठोरता के कारण थारे तै अपणी-अपणी घरआळी ताहीं छोड़ देण का हुकम दिया, पर शरुआत म्ह इसा कोनी था। 9 अर मै थमनै कहुँ सूँ के जो कोए जारी नै छोड़के और किसे कारण तै अपणी घरआळी नै छोड़के दुसरा ब्याह करै, वो जारी करै सै, जो उस छोड़ि होई तै ब्याह करै, वो भी

जारी करै सै।" 10 चेल्यां नै यीशु तै कह्या, "जै माणस का बिरबान्नी के गेल्या इसा सम्बन्ध सै, तो ब्याह करणा आच्छा कोनी।" 11 यीशु नै उनतै कह्या, "हरेक कोए इन उपदेशां पै चाल न्ही सकदे, सिर्फ वे जिन ताहीं या शक्ति देई गई सै। 12 क्यूँके कुछ नपुंसक इसे सै, जो माँ के पेट या गर्भ ए तै इसे जन्मे; अर कुछ नपुंसक इसे सै, जिन ताहीं माणस नै नपुंसक बणाया; अर कुछ नपुंसक इसे सै, जिन नै सुर्ग के राज्य के खात्तर खुद ताहीं नपुंसक बणाया सै। जो इस बात ताहीं समझ सकै सै, वे समझ ले।" 13 फेर माणस बाळकां नै उसके धौरे ल्याए, के वो उनके उपपर हाथ धरे अर प्रार्थना करै; पर चेल्यां नै उन ताहीं धमकाया। 14 यीशु नै कह्या, "बाळकां नै मेरे धौरे आण द्यो, अर उन ताहीं मना मतना करो, क्यूँके सुर्ग का राज्य इसाए का सै।" 15 अर वो उनपै हाथ धरके ओड़ै तै चल्या गया। 16 एक माणस यीशु के धौरे आया अर उसतै कह्या, "हे गुरु, मै कौण सा भला काम करुँ के अनन्त जीवन पाऊँ?" (aiōnios g166) 17 यीशु नै उसतै कह्या, "तू मेरे तै भलाई के बाबत क्यातै बुझ्झै सै? भला तो एकए सै, पर जै तू जीवन म्ह दाखल होणा चाहवै सै, तो हुकमां नै मान्या कर।" 18 उसनै यीशु तै कह्या, "कौण-से हुकम?" यीशु बोल्या, "खून ना करियो, जारी ना करियो, चोरी ना करियो, झूठी गवाही ना दियो, 19 अपणे माँ-बाप का आदर करियो, अर अपणे पडौसी तै अपणे जिसा प्यार राखियो।" 20 उस जवान नै उसतै कह्या, "इन सारया ताहीं तो मन्नै मान्या सै, इब मन्नै किस बात की कमी सै?" 21 यीशु नै उसतै कह्या, "जै तू सिध्द होणा चाहवै सै तो जा, अपणा सारा माळ बेचके कंगालां ताहीं दे, अर तन्नै सुर्ग म्ह धन मिलैगा; अर आके मेरा चेल्ला बणण खात्तर मेरे पाच्छै हो ले।" 22 पर वो जवान या बात सुणके उदास होके चल्या गया, क्यूँके वो घणा साहूकार था। 23 फेर यीशु नै अपणे चेल्यां तै कह्या, "मै थमनै साच्ची कहुँ सूँ के साहूकार का सुर्ग के राज्य म्ह बड़णा ओक्खा सै। 24 थारे ताहीं फेर कहुँ सूँ के जिस तरियां तै ऊँट का सूई के मोरे म्ह तै लिक्डणा आसान हो सकै सै। पर परमेसवर के राज्य म्ह साहूकार का बड़णा भोत मुश्किल सै।" 25 न्यू सुणके चेल्यां नै हैरान होके कह्या, "फेर किसका उद्धार हो सकै सै।" 26 यीशु नै उनकी ओड़ लखाके कह्या, "माणसां तै तो यो कोनी हो सकदा, पर परमेसवर तै सारा कुछ हो सकै सै।" 27 इसपै पतरस नै उसतै कह्या, "देख, हम तो सारा कुछ छोड़के तेरे पाच्छै हो लिए सा: तो हमनै के मिलैगा?" 28 यीशु नै उनतै कह्या, "मै थमनै साच्ची कहुँ सूँ के नयी सृष्टि म्ह जिब माणस का बेटा अपणी महिमा के सिंहासन पै बैठैगा, तो थम भी जो मेरे पाच्छै हो लिए सो, बारहां सिंहासनां पै बैठके इसाएल के बारहां गोत्रां का न्याय करोगे। 29 अर जिस किसे नै घर, या भाई-भाण, या माँ-बाप, या बाळ-बच्चे, या खेत्तां ताहीं मेरे नाम के खात्तर छोड़ दिया सै, उस ताहीं सौ गुणा मिलैगा, अर वो अनन्त जीवन का हुकदार होवैगा। (aiōnios g166) 30 पर भोत-से जो पैहले सै, पाच्छले होंगे; अर जो पाच्छले सै, पैहले होंगे।"

20 यीशु ने अपने चेल्यां ताहीं सिखाण खात्तर एक और उदाहरण दिया, “सुर्ग का राज्य किसे घर के माल्लिक की ढाळ सै, जो तड़कैए लिकड़या के अपने अंगूर के बाग म्ह मजदूरं नै लावै। 2 वो मजदूरं नै एक दीनार (एक दिन की मजदूरी) रोज की दिहाड़ी पै ल्याया अर उननै अपने अंगूर के बाग म्ह भेज्या।” 3 “फेर सबेरे के नौ बजे पाछै उसनै लिकड़कै और माणसां ताहीं बजार म्ह खड़े देख्या, 4 अर उसनै कह्या, ‘थम भी अंगूर के बाग म्ह जाओ, अर मै एक दिन की जो भी मजदूरी थारी बणै सै वा थमनै दियुंगा।’ अर वे भी काम पै चले गये। 5 फेर उसनै बारहां बजे अर तीन बजे के लोवै लिकड़कै उससे तरियां करया। 6 तकरीबन पाँच बजे फेर वो अपने घर तै गया अर उसनै फेर कई माणसां ताहीं ओड़ै खड़े देख्या, अर उसनै कह्या, ‘थम क्यांतै सारे दिन उरै बेकार खड़े रहों सों?’ उननै उसतै कह्या, ‘ज्यांतै के किसे नै म्हारै ताहीं मजदूरी पै कोनी लगाया।’” 7 “उसनै उनतै कह्या, ‘थम भी मेरे अंगूर के बाग म्ह काम करण खात्तर जाओ।’” 8 “साँझ नै अंगूर के बाग के माल्लिक नै अपने भण्डारी तै कह्या, ‘मजदूरं ताहीं बुलाके पाच्छल्यां तै लेके पैहल्यां ताहीं उननै मजदूरी दे-दे।’” 9 “जो पाँच बजे लगाये थे, उन ताहीं एक-एक दीनार (एक दिन की मजदूरी) मिल्या। 10 जो पैहल्यां आये उननै यो सोच्या के म्हारै ताहीं घणा मिलेगा, पर उननै भी एक-एक दीनार (एक दिन की मजदूरी) ए मिल्या। 11 मजदूरी तो उननै ले ली पर वे अंगूर के बाग के माल्लिक पै बिरड़ाकै कहण लागे, 12 ‘जो पाछै लागे थे, उननै बस एक घंटा काम करया, अर तन्नै म्हारै ताहीं भी उतनाए दिया जितना उन ताहीं, जिब के हमनै दिन-भर बोझ ठाया अर घाम सहया?’” 13 “बाग के माल्लिक नै उन म्ह तै एक ताहीं जवाब दिया, ‘हे दोस्त, मन्नै तेरे गैल कोए अन्याय कोनी करया। के तन्नै ए मेरे तै एक दीनार (एक दिन की मजदूरी) कोनी तय करया था? 14 जो तेरा सै, ठा ले अर चल्या जा; मेरी मर्जी, के जितना तन्नै दियुं उतनाए इस पाच्छले ताहीं भी दियुं। 15 के यो ठीक कोनी के मै अपने धन का जो चाहूँ वो करूँ? के मेरे भले होण के कारण तू कड़वी नजर तै देखखै सै?’” 16 “इस तरियां तै जो पाच्छले सै, वे पैहले होंगे, जो पैहले सै, पाच्छले होवेंगे।” 17 जब यीशु अपने बारहां चेल्यां गैल यरुशलेम नगर म्ह जाण लागरया था तो उन ताहीं एकान्त म्ह लेग्या, अर राह म्ह चालते-चालते उनतै बोल्या, 18 “देखो, हम यरुशलेम नगर म्ह जावां सा; अर मै माणस का बेट्टा प्रधान याजकां अर शास्त्रियाँ के हाथ्यां पकड़वाया जाऊंगा, वे मेरे खात्तर मौत की सजा तय करेगें। 19 अर मेरे ताहीं गैर यहूदियाँ के हाथ्यां म्ह सौपैगें, वे मेरा मजाक उड़ावेंगें, कोड़े मारेंगें, क्रूस पे चढ़ावेंगें, अर मै तीसरे दिन जिन्दा हो जाऊंगा।” 20 फेर जब्दी के बेट्याँ की माँ नै, अपने बेट्याँ के गेल्या यीशु के धारे आके प्रणाम करया, अर उसतै कुछ माँगण लागी। 21 यीशु नै उसतै कह्या, “तू के चाहवै सै?” वा यीशु तै बोल्ली, “मन्नै वचन दे, के मेरे ये दो बेट्टे तेरे राज्य म्ह एक तेरे सोळे अर दुसरा तेरे ओळै कान्ही बेट्टे।” 22 यीशु नै जवाब दिया, “थमनै न्ही बेरा के थम के माँगो सों। जो दुख का कटोरा

मै पीण पै सूं, के थम वो दुख का कटोरा पी सको सो?” उननै उस ताहीं कह्या, “पी सकां सा।” 23 उसनै उनतै कह्या, “थम मेरे दुख का कटोरा तो पी ल्योगे, पर अपने सोळे अर ओळै कान्ही किसे ताहीं बिठाणा मेरा काम कोनी, पर जिन्के खात्तर मेरे पिता की ओड़ तै तयार करया गया, उननै ए खात्तर सै।” 24 न्यू सुणके दसो चेल्ले उन दोन्नु भाईयाँ पै छो करण लागे। 25 यीशु नै उन ताहीं धारै बुलाके कह्या, “थम जाणो सो के गैर यहूदियाँ के हाकिम उनपै राज करै सै; अर जो बड़े सै, वे उनपै हक जमावै सै। 26 पर थारे म्ह इसा कोनी होवैगा; जो कोए थारे म्ह बड़ड़ा होणा चाहवै, वो थारा सेवक बणै, 27 अर जो थारे म्ह प्रधान होणा चाहवै, वो दास बणै, 28 जिसा के मै माणस का बेट्टा, ज्यांतै कोनी आया के मेरी सेवा-पाणी करी जावै, पर ज्यांतै आया के खुद सेवा-पाणी करूँ, अर घणखरयां के छुटकारै कै खात्तर अपनी जान देऊँ।” 29 जिब वे यरीहो नगर तै लिकड़ै थे, तो एक बट्टी भीड़ यीशु के पाछै हो ली। 30 अर दो आन्धे, जो सड़क के किनारे बेट्टे थे, न्यू सुणके के यीशु जाण लागरया सै, रुक्का मारके कहण लागे, “हे प्रभु, हे दाऊद की ऊलाद, म्हारै पै दया कर।” 31 माणसां नै उन ताहीं धमकाया के बोल-बाल्ले रहवै; पर वे और भी रुक्के मारके बोल्ते, “हे प्रभु, दाऊद की ऊलाद, म्हारै पै दया कर।” 32 फेर यीशु नै खड़े होके, उन ताहीं बुलाया अर कह्या, “थम के चाहवो सो के मै थारे खात्तर करूँ?” 33 उननै उसतै कह्या, “हे प्रभु, योए के हम देखण लाग जावां।” 34 यीशु नै तरस खाके उनकी आँखां पै हाथ लगाया, अर वे जिब्बे देखण लागे; अर उसकै पाछै हो लिये।

21 जिब वे यरुशलेम नगर के लोवै पोहचे अर जैतून पहाड़ पै बैतफगे गाम के धारे आये, तो यीशु नै दो चेल्यां ताहीं न्यू कहके भेज्या, 2 “स्याम्ही कै गाम म्ह जाओ। ओड़ै पोहोचदये एक गधी बंधी होई, अर उसके गेल्या बच्चा थमनै मिलेगा। उननै खोल के मेरे धारे ल्याओ। 3 जै थारे तै कोए कुछ कहवै, तो कहियो के प्रभु नै इसकी जरूरत सै, अर वो तोळा उसनै भेज देवैगा।” 4 यो ज्यांतै होया के जो वचन नबी के जरिये कह्या गया था, वो पूरा हो 5 “यरुशलेम के लोगां तै कहो, ‘देख, थारा राजा थारे धारे आवै सै; वो नम्र सै, अर गधे पै बैठचा सै; बल्के गधी के बच्चे पै।’” 6 चेल्यां नै जाके, जिसा यीशु नै उनतै कह्या था, उससे तरियां करया। 7 अर गधी अर बच्चे ताहीं ल्याके, उसपै अपने लत्ते गेरे, अर वो उसपै बैठग्या। 8 फेर घणखरे माणसां नै अपने लत्ते राह म्ह बिछाये, अर माणसां नै दरखतां तै डाळियाँ काटके राह म्ह बिछाई। 9 जो भीड़ आगै-आगै अर पाछै-पाछै चाल्ली आवै थी, रुक्के मार-मारके कहवै थी, “दाऊद की ऊलाद ताहीं होशाना, धन्य सै वो जो प्रभु के नाम तै आवै सै, अकास म्ह होशाना।” 10 जिब वो यरुशलेम म्ह बड़या, तो सारे नगर म्ह खलबल्ली माचगी, अर माणस कहण लागे, “यो कौण सै?” 11 माणसां नै कह्या, “यो गलील परदेस के नासरत नगर का नबी यीशु सै।” 12 यीशु नै परमेसवर के मन्दर म्ह जाके उन सारया ताहीं, जो मन्दर म्ह लेण-देण कररे थे, काढ दिया, अर सर्राफां (पर्ईसा का लेण

देण करण आळे) के पीढ़े अर कबूतर बेचणीयाँ की चौकियाँ उल्ट दी; 13 अर उनतै कह्या, “लिख्या सै, ‘मेरा घर प्रार्थना का घर कुह्लावैगा’; पर थम उसनै डाकुवां की गुफा बणाओ सो।” 14 फेर आन्धे अर लंगड़े, मन्दर म्ह उसकै धोरै आये, अर उसनै उन तार्हीं ठीक करया। 15 पर जिब प्रधान याजकां अर शास्त्रियाँ नै इन अनोक्खे काम्मां तार्हीं, जो उसनै करे, अर छोरयां तार्हीं मन्दर म्ह दाऊद की ऊलाद तार्हीं होशाना रुक्के मारदे देख्या, तो वे छो म्ह भरगे, 16 अर उसतै कहण लागगे, “के तू सुणै सै के ये के कहवै सै?” यीशु नै उनतै कह्या, “हाँ; के थमनै यो कदे कोनी पढ्या: ‘बाळकां अर दूध पीन्दे बच्चां के मुँह तै तन्नै घणी जै-जै कार कराई?’” 17 फेर वो उननै छोड़के नगर के बाहरणै आके बैतनिय्याह गाम म्ह गया अर ओड़ै रात बिताई। 18 तड़केए जिब वो नगर नै बोहड़ण लागरया था तो उसनै भूख लागी। 19 सड़क के किनारे अंजीर का एक दरखत देखके वो उसके धोरै गया, अर पत्त्या नै छोड़ उस म्ह और कुछ ना पाके उसतै कह्या, “इब तै तेरे म्ह फेर कदे फळ कोनी लाग्यै।” अर अंजीर का दरखत जिब्बे सूखग्या। (aion g165) 20 न्यू देखके चेल्यां नै हेरानी होई अर उननै कह्या, “यो अंजीर का दरखत जिब्बे किस तरियां सूखग्या?” 21 यीशु नै उन तार्हीं जवाब दिया, “मै थमनै साच्ची कहूँ सूँ, जै थम बिश्वास राक्खो अर शक ना करो, तो ना केवल यो करोगे जो इस अंजीर के दरखत गेल्या करया गया सै, पर जै इस पहाड़ नै कहोगे, ‘उखड़ जा, अर समुन्दर म्ह जा पड़’, तो यो भी हो जावैगा। 22 अर जो कुछ थम प्रार्थना म्ह बिश्वास तै माँगोगे वो सारा थमनै मिलैगा।” 23 वो मन्दर जाके उपदेश देवै था, तो प्रधान याजकां अर यहूदी अगुवां नै उसके धोरै आके बुझ्या, “तू ये काम किसके हक तै करै सै? अर तेरे तार्हीं यो हक किसनै दिया सै?” 24 यीशु नै उनतै जवाब दिया, “मै भी थारे तै एक बात बुझ्यु सूँ; जै वो मन्नै बताओगे, तो मै भी थमनै बताऊँगा के ये काम किस हक तै करूँ सूँ। 25 यूहन्ना का बपतिस्मा कित्त तै था? सुर्ग की ओड़ तै या माणसां की ओड़ तै?” फेर वे आप्पस म्ह बहस करण लागगे, “जै हम कहां ‘सुर्ग की ओड़ तै’ तो वो म्हारै तै कहवैगा, ‘फेर थमनै उसका बिश्वास क्यांतै न्ही करया?’ 26 अर जै कहां ‘माणसां की ओड़ तै’ तो हमनै भीड़ का डर सै, क्यूँके वे सारे यूहन्ना तार्हीं नबी मान्ने सै।” 27 फेर उननै यीशु तार्हीं जवाब दिया, “हमनै न्ही बेरा।” यीशु नै भी उनतै कह्या, “तो मै भी थमनै कोनी बतान्दा के ये काम किस हक तै करूँ सूँ।” 28 “आच्छा बताओ थम इस बारें म्ह के कहो सो? के किसे माणस के दो बेटे थे; उसनै पैहले के धोरै जाके कह्या, ‘हे बेटे, आज अंगूर के बाग म्ह काम कर।’” 29 “पर बेटे नै जवाब दिया, ‘मै कोनी जान्दा’, पर कुछ बखत के बाद अपणे दिए होए जवाब पै उसनै भोत पछतावा होया अर वो चल्या गया।” 30 “फेर पिता नै दुसरे के धोरै जाके न्यूए कह्या, उसनै जवाब दिया, ‘जो हीं जाऊँ सूँ’, पर कोनी गया।” 31 “इन दोनुवां म्ह तै किसनै पिता की मर्जी पूरी करी?” उननै कह्या, “पैहले नै।” यीशु नै उनतै कह्या, “मै थारे तै साच्ची कहूँ सूँ के चुंगी लेण आळे अर बेश्याएँ थारे तै पैहल्या परमेसवर के

राज्य म्ह दाखल हो जावैगे। 32 यो मै इस खात्तर कहूँ सूँ क्यूँके यूहन्ना बपतिस्मा देण आळा धर्म की राह दिखान्दे होए थारे धोरै आया, अर थमनै उसका बिश्वास कोनी करया; पर चुंगी लेण आळे अर बेश्यायाँ नै उसका बिश्वास करया अर थमनै न्यू देखके भी पाप करणा कोनी छोड्या अर ना ए उसका बिश्वास करया।” 33 एक और उदाहरण सुणो एक घर का माल्लिक था, जिसनै अंगूर का बाग लगाया, अर उसके चौगरदे नै बाड़ा बाँधया, अर रस का कुण्ड खोद्या, अर रुखाळ खात्तर एक मचान बणाया; अर किसानां तार्हीं उसका ठेक्का देके परदेस चल्या गया। 34 जिब फळ का बखत लोवै आया, तो उसनै अपणे नौकरां तार्हीं उसका फळां का हिस्सा लेण नै किसानां धोरै भेज्या। 35 पर किसानां नै उसके नौकरां तार्हीं पकड़के, किसे तार्हीं छेल्या, अर किसे तार्हीं मार दिया, अर किसे पै पत्थर बरसाए। 36 फेर उसनै पैहल्या तै घणे और नौकरां तार्हीं भेज्या, अर उननै भी उससे तरियां करया। 37 आखर म्ह उसनै अपणे बेटे तार्हीं उनके धोरै न्यू सोचके भेज्या के वे मेरै बेटे की इज्जत करैगे 38 “पर किसानां नै बेटे तार्हीं देखके आप्पस म्ह कह्या, ‘यो तो वारिस सै, आओ, इसनै मार देवा अर इसकी विरासत ले लेवां।’” 39 अर उननै उस तार्हीं पकड़्या अर अंगूर के बाग तै बाहरणै काढके मार दिया। 40 “इस करके जिब अंगूर के बाग का माल्लिक आवैगा, तो उन किसानां के गेल्या के करैगा?” 41 उननै उसतै कह्या, “वो उन भुन्डे माणसां का भुंडी ढाळ नाश करैगा; अर अंगूर के बाग का ठेका दुसरे किसानां तार्हीं देवैगा, जो बखत पै उस तार्हीं फळ दिया करैगे।” 42 यीशु नै उनतै कह्या, “के थमनै कदे भी पवित्र ग्रन्थ म्ह यो कोनी पढ्या: ‘जिस पत्थर तार्हीं राजमिस्त्रियाँ नै बेकार ठहराया था, वोए कुणे के सिरे का पत्थर होग्या? यो प्रभु की ओड़ तै होया, अर म्हारी निगांह म्ह अनोक्खा सै।’” 43 “ज्यांतै मै थमनै कहूँ सूँ के परमेसवर का राज्य थारे तै ले लिया जावैगा अर इसी जात तार्हीं दिया जावैगा, जो उसका आच्छा फळ ल्यावै सै। 44 जो इस पत्थर पै पड़ेगा, वो चकणाचूर हो जावैगा; अर जिसपै वो पड़ेगा, उसनै पिस देवैगा।” 45 प्रधान याजक अर फरीसी उसके उदाहरणां नै सुणके समझगे, के वो उनके बाबत कहवै सै। 46 अर उननै उस तार्हीं पकड़णा चाह्या, पर माणसां तै डरगे क्यूँके वे उसनै नबी मान्ने थे।

22 इसपै यीशु फेर उनतै उदाहरणां म्ह कहण लागया, 2 “सुर्ग का राज्य उस राजा की ढाळ सै, जिसनै अपणे बेटे का ब्याह करया। 3 अर उसनै अपणे नौकरां तार्हीं भेज्या, के न्योदे होड़ माणसां तार्हीं ब्याह के जिमणे म्ह बुलावै; पर उननै आणा न्ही चाह्या।” 4 “फेर उसनै और नौकरां तार्हीं न्यू कहके भेज्या, ‘न्योदे होड़ माणसां तार्हीं कहो देखखो, मन्ने भोज त्यार कर लिया सै, अर मेरे बळध अर पळे होड़ डानगर काट लिये सै: सारा कुछ त्यार सै; ब्याह के जिमणे म्ह आओ।’” 5 पर वे बेपरवाह होके चले गये, कोए अपणे खेतां म्ह, कोए अपणे धन्धे पै। 6 और कई माणसां नै तो राजा के नौकरां तार्हीं पकड़के उनकी बेजती करी अर उन तार्हीं मार दिया। 7 जिब राजा नै यो सुणया तो छो म्ह भरग्या,

अर अपणी पलटन भेजके उन हत्यारा का नाश करया, अर उनके नगर फूँक दिए। 8 फेर राजा नै अपणे नौकरां तै कह्या, ब्याह का भोज तो त्यार सै, पर के न्योदे होइ माणस इस जोगे कोनी ठहरे। 9 इस करके चौराहयाँ पै जाओ, अर जितने माणस थमने मिलै, सारया ताहीं ब्याह कै भोज म्ह बुला ल्याओ। 10 इस तरियां उसके नौकरां नै सड़कां पै जाके के भुन्दे, के आच्छे, जितने मिले सारया ताहीं कठ्ठा करया; ब्याह का घर मेहमानां तै भरग्या। 11 जिब राजा मेहमानां नै देखण भीत्तर आया, तो उसने ओढ़ै एक माणस ताहीं देख्या, जो ब्याह आळे लत्ते कोनी पहररया था। 12 उसनै उसतै बुझ्या, हे दोस्त, तू ब्याह म्ह पैहरे जाण आळे लत्ते पहरे बिना उरै क्याते आ ग्या। उसका मुँह बन्द होग्या। 13 फेर राजा नै नौकरां तै कह्या, इसके हाथ-पैर जुड़के उस ताहीं बाहरणै अन्धेरे म्ह गेर द्यो, ओढ़ै रोणा, अर दाँत पिसणा होवैगा। 14 “क्यूँके बुलाये होइ तो घणे सै पर चुणे होए कम सै।” 15 फेर फरीसियाँ नै आके आप्पस म्ह विचार करया, के उसनै किस ढाळ बात्तां म्ह फसावा। 16 इस तरियां उननै अपणे चेल्यां ताहीं हेरोदेस राजा के समर्थकां कै गेल्या उसके धौरे न्यू कहण नै भेज्या, “हे गुरु, हमनै बेरा सै, के तू साच्चा सै, अर परमेसवर की राह सच्चाई तै सिखावे सै; अर किसे की परवाह कोनी करदा, क्यूँके तू माणसां का मुँह देखके बात कोनी करदा। 17 इस करके हमनै बता तन्नै के समझ आवे सै? कैसर तै चुंगी देणा ठीक सै के नही।” 18 यीशु नै उनका कपट जाणके कह्या, “हे कपटियों, मन्नै क्यातै परखो सो? 19 कर का सिक्का मेरै ताहीं दिखाओ।” फेर उसके धौरे एक दीनार (एक दिन की मजदूरी) लियाये। 20 उसनै उनतै कह्या, “या छाप अर नाम किसका सै?” 21 उननै उसतै कह्या, “कैसर का।” फेर उसनै उनतै कह्या, “जो कैसर का सै, वो कैसर ताहीं; अर जो परमेसवर का सै, वो परमेसवर ताहीं द्यो।” 22 न्यू सुणके उननै हैरानी होई, उस ताहीं छोड़के चले गये। 23 उस्से दिन सदूकी जो कहवै सै के मरे होया का दुबारा जिन्दा उठणा सै ए कोनी, उसके धौरे आये अर उसतै बुझ्या, 24 “हे गुरु, मूसा नबी नै कह्या था के जै कोए माणस बेऊलादा मर जावै, तो उसका भाई उसकी घरआळी तै ब्याह करके अपणे भाई कै खात्तर पीढ़ी पैदा करै। 25 इब म्हारै उरै सात भाई थे; पैहलड़ा ब्याह करके मरग्या, अर ऊलाद ना होण के कारण अपणी घरआळी अपणे भाई कै खात्तर छोड़ ग्या। 26 इस्से तरियां दुसरे अर तीसरे नै भी करया, अर सातुवां तक योए होया। 27 सारया पाच्छै वा बिरबान्नी भी मरगी। 28 आखर म्ह जिन्दा होण पै वा सातुवां म्ह तै किसकी घरआळी होवैगी? क्यूँके वा सारया की घरआळी बण ली थी।” 29 यीशु नै उनतै जवाब दिया, “थारी गलती या सै के थम पवित्र ग्रन्थ अर परमेसवर की सामर्थ नै नही जाणते। 30 क्यूँके मरके जिन्दा हो जाणके बाद ब्याह शादी कोनी होन्दी, पर सुर्ग म्ह परमेसवर के सुर्गदूतां की ढाळ होवैगें। 31 पर मरके जिन्दा हो जाणके बाबत के थमनै यो वचन कोनी पढ़्या जो परमेसवर नै थारे तै कह्या 32 “मै अब्राहम का परमेसवर, अर इसहाक का परमेसवर, याकूब का परमेसवर सूँ? वो मरे होया का

नही, पर जिन्दा का परमेसवर सै।” 33 न्यू सुणके माणस उसके उपदेश तै हैरान होए। 34 जिब फरीसियाँ नै सुण्या के यीशु नै सदूकियाँ का मुँह बन्द कर दिया, तो वे कठ्ठे होए। 35 शास्त्री समाज के माणसां म्ह तै एक नै उस ताहीं परखण कै खात्तर उसतै बुझ्या, 36 “हे गुरु, नियम-कायदा म्ह कौण सा हुकम बड़ड़ा सै?” 37 यीशु नै उसतै कह्या, “तू परमेसवर अपणे प्रभु तै अपणे पूरे मन अर अपणे सारे प्राण अर अपणी सारी बुद्धि के साथ प्यार राख। 38 पैहला अर बड़ड़ा हुकम तो योए सै। 39 अर उस्से जिसा यो दुसरा भी सै के तू अपणे पड़ोसी तै अपणे जिसा प्यार राख। 40 ये दो हुकम सारे नियम-कायदे अर नबियाँ का निचोड़ (आधार) सै।” 41 जिब फरीसी कठ्ठे थे, तो यीशु नै उनतै बुझ्या, 42 “मसीह कै बारे म्ह थम के सोच्यो सो? वो किसका बेटा सै?” उननै यीशु तै कह्या, “दाऊद का।” 43 यीशु नै उनतै बुझ्या, “तो दाऊद आत्मा म्ह होके उसनै प्रभु क्यातै कहवै सै?” 44 “प्रभु नै, मेरै प्रभु तै कह्या, मेरै सोळे कान्ही बैठ, जिब ताहीं के मै तेरे बैरियाँ ताहीं तेरे पायां म्ह ना झुका दियुँ।” 45 “भला, जिब दाऊद उसनै प्रभु कहवै सै, तो वो उसका बेटा किस ढाळ होया?” 46 उसके जवाब म्ह कोए भी एक बात नही कह सक्या। पर उस दिन तै दुबारे उसतै कीमे और बुझण की हिम्मत कोनी करी।

23 फेर यीशु नै भीड़ तै अर अपणे चेल्यां ताहीं कह्या, 2 “शास्त्री अर फरीसी माणसां नै मूसा नबी के नियम-कायदे सिखाण का हक सै; 3 ज्यांतै वे थारे तै जो कुछ कहवै वो करियो अर मानिये, पर उन जिसे काम ना करियो; क्यूँके वे सिखावे तो सै पर खुद करदे कोनी। 4 वे थारे पै कई नियम लाग्गू करै सै जिसका पालन करणा ओक्खा सै, वे माणसां नै उनपे चाल्लण खात्तर मजबूर करै सै; पर वे खुद अपणे नियमां नै कोनी मानते।” 5 वे अपणे सारे काम माणसां ताहीं दिखाण के खात्तर करै सै: वे अपणे ताबिजां नै चौड़ा करै सै जिनपै वे पवित्र ग्रंथ के वचन लिखके शरीर पै बाँधले सै, अर अपणे लत्यां की झाल्लर बधावे सै, ताके लोग उननै धर्मी समझै। 6 भोज म्ह खास-खास जगहां, अर आराधनालयों के खास-खास जगहां बैठणा, 7 बजारां म्ह नमस्कार, अर माणसां म्ह गुरु कुहाणा उननै भावे सै। 8 पर थम गुरु ना कुहाणा, क्यूँके थारा एके गुरु सै, अर थम सारे भाई-भाण के समान सों। 9 धरती पै किसे नै अपणा पिता ना कहियो, क्यूँके थारा एके आत्मिक पिता सै, जो सुर्ग म्ह सै। 10 अर स्वामी भी ना कुहाणा, क्यूँके थारा एके माल्लिक सै, यानिके मसीह। 11 जो थारे म्ह बड़ड़ा हो, वो थारा सेवक या नौक्कर बणै। 12 जो कोए अपणे-आपनै बड़ड़ा बणावैगा, वो छोटा करया जावैगा; अर जो कोए अपणे-आपनै छोटा बणावैगा, वो बड़ड़ा करया जावैगा। 13 हे कपटी शास्त्रियो अर फरीसियों, थारे पै धिक्कार सै! थम माणसां के खात्तर सुर्ग राज्य का बारणा बन्द करो सो, ना तो थम खुद उस म्ह दाखल होवो सो अर ना उस म्ह दाखल होण आळा नै दाखल होण द्यो सो। 14 (हे कपटी शास्त्रियो अर फरीसियों, थारे पै

धिक्कार सै! थम बिधवा के घरां नै खा जाओ सो, अर अपणे-आपनै धर्मी दिखाण खात्तर घणी वार ताहीं प्रार्थना करदे रहो सो: ज्याते थारे ताहीं परमेसवर की ओड़ तै घणा दण्ड मिलैगा।) 15 हे कपटी शास्त्रियो अर फरीसियों, थारे पै धिक्कार सै! थम एक माणस ताहीं अपणे पंथ म्ह ल्याण कै खात्तर दूर-दूर ताहीं हान्डी सो, अर जिब वो पंथ म्ह आ जावै सै, तो खुद तो नरक म्ह जाओ सों पर दुसरयां नै अपणे तै दुगणा नरक जाण का भागी बना घो सो। (Geenna g1067) 16 हे आन्धे अगुवों, थारे पै धिक्कार सै! थम जो या शिक्षा घो सो, के जै कोए मन्दर की सूह खावै तो किमे न्ही, पर जै कोए मन्दर कै सोन्ने की सूह खावै तो उसतै बन्द जावैगा। 17 हे बेअक्लो अर आंध्यो, कौण बड़ड़ा सै; मन्दर का सोन्ना या वो मन्दर जिसनै उस सोन्ने ताहीं पवित्र बनाया सै? 18 थम यो भी सिखाओ सो के जै कोए वेदी की सूह खावै तो किमे न्ही, पर जो भेंट उसपै सै, जै कोए उसकी कसम खावै तो बन्द जावैगा। 19 हे आंध्यो, कौण बड़ड़ा सै; भेंट या वेदी जिसमह भेंट पवित्र होवै सै? 20 इस करके जो वेदी की कसम खावै सै, वो उसकी अर जो कुछ उसपै सै, उसकी भी कसम खावै सै। 21 जो मन्दर की कसम खावै सै, वो परमेसवर जो उस म्ह रहवै सै, उसकी भी कसम खावै सै। 22 जो सुर्ग की कसम खावै सै, वो परमेसवर कै सिंहासन की अर उसपै बैठण आळे की भी कसम खावै सै। 23 हे कपटी शास्त्रियो अर फरीसियों, थारे पै धिक्कार सै! थम पुदीने, सौंफ, जीरे का दसमां हिस्सा तो घो सो, पर थमनै नियम-कायदा की गहरी बात्तां ताहीं यानिके न्याय, दया, अर वफादारी का तिरस्कार करो सों; थमनै दसमां हिस्सा भी देणा चाहिये पर उन खास बात्तां नै भी नजरअंदाज ना करो। 24 हे आन्धे अगुवों, थम छोट्टे-छोट्टे नियमां का पालन करण का तो भोत ध्यान राक्खों सों, जिस तरियां पाणी म्ह तै माच्छर ताहीं तो छान ल्यो सो, पर परमेसवर के खास हुकम का पालन कोनी करते, जो ऊँट नै निगळ जाणकै समान सै। 25 हे कपटी शास्त्रियो अर फरीसियों, थारे पै धिक्कार सै! क्यूँके थम लालची अर स्वार्थी सों, पर थम अपणे-आपनै पवित्र राक्खण का ढोंग करो सों, इस खात्तर थम उन कटोरे अर थाळी के समान सों जो उप्पर तै तो साफ सै पर भित्तर तै वे गन्दे सै। 26 हे आन्धे फरीसियों, पैहल्या माणस नै लूटणा बन्द करो जिब्बे थम धर्म के काम का पालन कर पाओगे अर फेर थम उस कटोरे अर थाळी के समान होवेंगे जो भीत्तर बाहर तै भी साफ हों सै। 27 हे कपटी शास्त्रियो अर फरीसियों, थारे पै धिक्कार सै! थम चुन्ने फिरी होई कब्रों के जिसे सो जो उप्पर तै तो सुथरी दिक्खै सै, पर भीत्तर मुर्दा की हाड्डियाँ अर सारे ढाळ की गन्दगी तै ठुकी होई सै। 28 इससे तरियां तै थम भी उप्पर तै माणसां ताहीं धर्मी दिक्खो सो, पर भीत्तर अधर्म अर कपट तै भरे सो। 29 हे कपटी शास्त्रियो अर फरीसियों, थारे पै धिक्कार सै! थम उन नबियाँ की कब्र समारो सो अर धर्मियाँ की कब्र सजाओ सो, जिन ताहीं थारे पूर्वजां नै मारा था। 30 “अर कहो सो, ‘जै हम अपणे बाप-दाघां के दिनां म्ह होन्दे तो नबियाँ की हत्या म्ह उनके साइड़ी कोनी होन्दे।’ 31 इसतै तो थम अपणे आप ए या गवाही घो सो के थम नबियाँ

के हत्यारां के वंशज सो। 32 ठीक सै थम अपणे पूर्वजां कै पाप का घड़ा भरते जाओ।” 33 हे सौंफ के सप्पोलों जिसे माणसों, थम नरक की सजा तै किस ढाळ बचोगे? (Geenna g1067) 34 इस करके देखो, मै थारे धोरे नबियाँ अर समझदार अर शास्त्रियाँ ताहीं भेज्जू सूं, अर थम उन म्ह तै कुछां नै मार द्योगे अर क्रूस पै चढ़ावोगे, अर कुछां नै अपणे आराधनालयों म्ह कोड़े मारोगे अर एक नगर तै दुसरे नगर ताहीं भजादे फिरोगे। 35 जिसतै धर्मी हाबिल तै लेके बिरिक्याह के बेटे जकर्याह तक, जिस ताहीं थमनै मन्दर अर वेदी कै बिचाळे मार दिया था, जितने भी धर्मी माणसां ताहीं मारया सै, वो सारा दण्ड थारे सिर पै पड़ेगा। 36 मै थमनै सच कहूँ सूं, ये सब का दण्ड इस पीढ़ी के माणसां नै भुगतणा पड़ेगा। 37 “हे यरुशलेम नगर के लोगों, हे यरुशलेम नगर के लोगों! थम नबियाँ नै मार देओ सो, अर जो थारे धोरे भेज्जै गए, उनपै पत्थर बरसाओ सो। कितनी ए बर मन्ने चाह्या के जिस ढाळ मुर्गीं अपणे बच्चां ताहीं अपणे पाक्खां कै तळै छुपा ले सै, उससे तरियां ए मै भी थारे बाळकां नै कट्टा कर ल्यूँ, पर थमनै कोनी चाह्या। 38 देखो, थारा घर थारे खात्तर उजाड़ छोड्या जावै सै। 39 क्यूँके मै थमनै साच्ची कहूँ सूं के इब तै जिब ताहीं थम न्ही कहोगे, ‘थन्य सै वो, जो प्रभु के नाम तै आवै सै’ तब तक थम मन्ने फेर दुबारे कदे कोनी देखखोगे।”

24 जिब यीशु मन्दर तै लिकड़के जाण लागरया था, तो उसके चेल्लें उस ताहीं मन्दर की बणावट दिखाण कै खात्तर उसके धोरे आये। 2 यीशु नै उनतै कह्या, “के थम ये सारी इमारत न्ही देखते? मै थमनै साच्ची कहूँ सूं, उरै पत्थर पै पत्थर भी कोनी रहवैगा, जो गेरया ना जावैगा।” 3 जिब यीशु जेतून कै पहाड़ पै बेठ्या था, तो चेल्यां नै एकले म्ह उसके धोरे आके कह्या, “हमनै बता, ये बात कद होवैगी? तेरे आण का अर दुनिया के अन्त की के निशान्नी होवैगी?” (aiōn g165) 4 यीशु नै उन ताहीं जवाब दिया, “चौकन्ने रहियो! कोए थमनै भकाण न्ही पावै, 5 क्यूँके घणखरे इसे होवेंगे जो मेरे नाम तै आके कहवेंगे, मै मसीह सूं, अर घणाए ताहीं भकावेंगे। 6 थम रोळे अर लड़ाईया का जिक्र सुणोगे, तो घबराईयो ना क्यूँके इनका होणा जरूरी सै, पर उस बखत खात्ता कोनी होवैगा। 7 क्यूँके जात पै जात, अर राज्य पै राज्य चढ़ाई करेगा, अर जगहां-जगहां अकाळ पड़ेंगे, अर हाल्लण आवेंगे। 8 ये सारी बात दुखां की शरूआत होवैगी।” 9 फेर माणस क्लेश देण कै खात्तर थमनै पकड़वावेंगे, अर थमनै मार देवेंगे, अर मेरे नाम के कारण सारी जात्तां के माणस थारे तै बैर राक्खेंगे, क्यूँके थम मेरे पै विश्वास करो सों। 10 फेर घणखरे मेरे पै विश्वास करणा छोड़ देंगे, अर एक-दुसरे नै पकड़वावेंगे, अर एक-दुसरे तै बैर राक्खेंगे। 11 घणखरे झूठे नबी आवेंगे, अर घणाए ताहीं भकावेंगे। 12 अधर्म के बढ़ण तै वे एक-दुसरे तै प्यार करणा छोड़ देंगे, 13 पर जो अन्त ताहीं मेरे पै विश्वास राक्खेगा, उससे ताहीं बचाया जावैगा। 14 अर परमेसवर के राज्य का यो सुसमाचार सारी दुनिया म्ह प्रचार करया जावैगा, ताके सारी जात्तां नै इस ताहीं स्वीकार करण

का मौकका मिलै, ताके थम मेरे गवाह होओ, फेर दुनिया का अन्त आ जावैगा। 15 इस करके जिब थम उस उजाड़ण आळी घृणित चीज ताहीं जिसका जिक्र दानियेल नबी के जरिये होया था, पवित्र जगहां पै खड़े देख्खो (जो पढ़ै, वो समझै), 16 फेर जो यहूदिया परदेस म्ह हो, वे पहाड़ों पै भाज जावै। 17 जो छत पै हो, वो अपने घर म्ह तै समान लेण नै तळै न्ही उतरै, 18 अर जो खेत म्ह हो, वो अपना लत्ता लेण नै पाच्छे न्ही बोहड़ै। 19 उन दिनां म्ह जो गर्भवती अर दूध पिलान्दी बिरबान्नी होवैगीं, उनके खातर भागणा भी मुशिकल होगा! 20 प्रार्थना करया करो के थमने जाड्डे म्ह या आराम कै दिन भाजणा ना पड़े। 21 क्यूँके उस बखत इसा भारया क्लेश होवैगा, जिसा दुनिया की शरुआत तै ना इब ताहीं होया ना कदे होवैगा। 22 “अर जै वे दिन घटाए न्ही जान्दे तो कोए प्राणी कोनी बचदा, पर छोट होया कै कारण वे दिन घटाए जावैंगे। 23 उस बखत जै कोए थमनै कहवै, ‘देख्खो, मसीह उरै सै!’ या ‘ओड़ै सै!’ तो बिश्वास ना” करियो। 24 क्यूँके झुट्टे मसीह अर झुट्टे नबी उठ खड़े होवैंगे, अर बड़े-बड़े चमत्कार, अर अनोक्खे काम दिखावैंगे के जै हो सकया तो छोट होया ताहीं भी भका देवैंगे। 25 देख्खो, मननै पैहल्याए थारे तै यो सारा कुछ कह दिया सै। 26 “इस करके जै वे थारे तै कहवै, ‘देख्खो, वो बण म्ह सै’, तो बाहरणै ना लिकड़यो; या ‘देख्खो, वो कोठड़ी म्ह सै’, तो बिश्वास ना करियो। 27 क्यूँके जिस तरियां बिजली पूरब तै लिकड़के पश्चिम ताहीं चमके सै, उससे तरियां मुझ माणस के बेटे का भी आणा होवैगा। 28 जडै लाश हो, उड़ैए चील कट्टे होवैंगे।” 29 उन दिनां के क्लेश कै पाच्छे जिबे सूरज अन्धैरे म्ह हो जावैगा, चाँद का चाँदणा जान्दा रहवैगा, अर तारे अकास तै तळै पड़ैंगे, अर अकास की शक्तियाँ हलाई जावैंगी। 30 फेर माणस के बेटे का निशान अकास म्ह दिखैगा, अर फेर धरती के सारे खानदान्ना के माणस छात्ती पिटैंगे; अर माणस के बेटे ताहीं बड्डी सामर्थ अर महिमा कै गेल्या अकास के बादळां पै आन्दे देख्खोगे। 31 वो तुरही की तेज आवाज कै गेल्या अपने सुर्गदूतां नै खन्दावैगा, अर वे अकास के इस सिरे तै उस सिरे ताहीं, च्यारु दिशायां तै उसके चुणे होया नै कट्टे करैंगे। 32 अंजीर के दरखत तै यो उदाहरण सीक्खो: जिब उसकी डाळी कोमल हो जावै अर पत्ते लिकड़ण लाग ज्या सै, तो थम जाण ल्यो के गर्मी का बखत लोवै सै। 33 इस्से तरियां तै जिब थम इन सारी बातां नै देख्खो, तो जाण ल्यो के वो लोवै सै, बल्के दरबाजे पै सै। 34 मै थमनै साच्ची कहूँ सूँ के जिब ताहीं ये सारी बात पूरी ना हो लेवै, जद ताहीं इस पीढी का अन्त कोनी होवैगा। 35 धरती अर अकास टळ जावैंगे, पर मेरी बात कदे न्ही टळैगी। 36 “उस दिन अर उस बखत कै बारे म्ह कोए न्ही जाण्दा, ना सुर्गदूत अर ना बेटा, पर सिर्फ पिता। 37 जिसा पूर्वज नूह के दिनां होया था, उससे तरियां ए माणस के बेटे का आणा होगा। 38 क्यूँके जिस तरियां बाढ़ तै पैहले के दिनां म्ह, जिस दिन ताहीं नूह जहाज पै न्ही चढ़या, उस दिन ताहीं माणस खावै-पीवै थे, अर उन म्ह ब्याह होवै थे। 39 अर जिब ताहीं बाढ़ आकै उन सारया ताहीं बहा न्ही लेग्या, जद ताहीं उननै किमे बेरा न्ही पाट्या; इस्से तरियां ए मुझ

माणस के बेटे का आणा भी होगा। 40 उस बखत दो जणे खेत म्ह होंगे, एक ठाया जावैगा अर दुसरा छोड़ दिया जावैगा। 41 दो बिरबान्नी एक साथ चाक्की पीसदी होवैगी, एक ठा ली जावैगी अर दुसरी छोड़ दी जावैगी।” 42 इस करके जागदे रहो, क्यूँके थमनै न्ही बेरा के थारा प्रभु किस दिन आवैगा। 43 पर न्यू जाण ल्यो के जै घर का माल्लिक नै बेरा हो के चोर किस घड़ी आवैगा तो जागदा रहन्दा, अर अपने घर म्ह सेंध लागण न्ही देन्दा। 44 ज्यातै थम भी त्यार रहो, क्यूँके जिस घड़ी के बारे म्ह थम सोचदे भी कोनी, उससे घड़ी मै माणस का बेटा आ जाऊँगा। 45 “आखर म्ह वो बिश्वास जोगगा अर अकलमंद दास कौण सै, जिस ताहीं माल्लिक नै अपने नौक्कर-चाकरां पर सरदार ठहराया के बखत पै उननै खाणा देवै? 46 धन्य सै वो नौक्कर, जिस ताहीं उसका माल्लिक आकै इसाए करदा पावै। 47 मै थमनै साच्ची कहूँ सूँ, वो उसनै अपनी सारी धन-सम्पत्ति का माल्लिक बणावैगा। 48 पर जै वो दुष्ट दास सोच्यण लागै के मेरे माल्लिक कै आण म्ह वार सै, 49 अर अपने साथी नौकरां नै पिटण लागै, अर शराबियां के गेल्या खावै-पीवै। 50 तो उस नौक्कर का माल्लिक उस दिन बोहड़ैगा, जिब वो उसकी बाट ना देख्दा हो, अर इसे बखत म्ह आवैगा जिसका उसनै ना बेरा हो, 51 जिब वो उसनै भारी सजा देगा उसकी गिणती कपटियां के म्ह गिणी जावैगी: ओड़ै रोणा अर दाँत पिसणा होगा।”

25 यीशु नै अपने चेल्यां ताहीं एक और उदाहरण देकै कहा, “सुर्ग का राज्य उन दस कुँवारियाँ के जिसा होगा जो अपनी मशाल लेके बन्दे तै फेटण लिकड़ी। 2 उन म्ह पाँच बेअक्ल अर पाँच समझदार थी। 3 बेअक्ली कुँवारियाँ नै अपनी मशाल तो ली, पर अपने गेल्या फालतू तेल न्ही लिया; 4 पर समझदारां नै अपनी मशालां कै गेल्या अपनी कुपियाँ म्ह तेल भी भर लिया। 5 जिब बन्दे के आण म्ह वार होई, तो वे सारी ऊँघण लागी अर सोगी।” 6 “आध्धी रात नै धूम माच्ची: ‘देख्खो, बन्दड़ा आण लागरया सै! उसतै फेटण नै चाल्लो!’” 7 “फेर वे सारी कुँवारियाँ उठकै अपनी मशाल ठीक करण लागी। 8 अर बेअक्लियाँ नै समझदारां तै कहा, ‘अपणे तेल म्ह तै कुछ हमनै भी द्यो, क्यूँके म्हारी मशाल बुझण लागरी सै।’” 9 “पर समझदारां नै जवाब दिया, ‘कदे यो म्हारे अर थारे खातर पूरा ना पड़ै; भला तो योए सै के थम बेचणीयाँ के धोरे जाकै अपने खातर मोल लियाओ।’” 10 जिब वे मोल लेण नै जावै थी तो बन्दड़ा आण पोंहच्या, अर जो त्यार थी, वे उसकै गेल्या ब्याह के घर म्ह चली गई अर बारणा मूंद दिया गया। 11 “इसकै पाच्छे वे दुसरी कुँवारियाँ भी बोहड़के आई अर बन्दे तै कहण लागी, ‘हे माल्लिक, हे माल्लिक, म्हारे खातर किवाड़ खोल दे।’” 12 “उसनै जवाब दिया, ‘मै थारे ताहीं साच्ची कहूँ सूँ, मै थमनै कोनी जाण्दा।’” 13 इस करके चोक्कने रहो, क्यूँके मेरे आण के उस दिन नै थम कोनी जाणते, ना उस घड़ी नै जिस दिन म्ह आऊँगा। 14 सुर्ग का राज्य उस माणस के उदाहरण के समान भी सै, जिसनै परदेस जान्दे बखत अपने नौकरां ताहीं बुलाकै अपनी कुछ सम्पत्ति उन ताहीं सौप

दी, ताके वे व्यापर करके घणा धन जोड़ ले। 15 उसनै एक तै पाँच तोड़े (1 तोड़ा 15 साल की मजदूरी के बराबर सै), दुसरे ताहीं दो, अर तीसरे ताहीं एक; यानिके हरेक नै उसकी काबिलियत के मुताबिक दिया, अर फेर परदेस चल्या गया। 16 फेर, जिस ताहीं पाँच तोड़े मिले थे, उसनै जिब्बे जाके उनतै लेण-देण करया, अर पाँच तोड़े और कमाए। 17 इस्से तरियां तै जिस ताहीं दो मिले थे, उसनै भी दो और कमाए। 18 पर जिस ताहीं एक मिल्या था, उसनै जाके माट्टी खोदी, अर अपणे माल्लिक का धन लहको दिया। 19 घणे दिनां पाच्छे उन नौकरां का माल्लिक आया, अर उनतै हिसाब लेण लाग्या, के उननै उन पर्ईसा तै के कुछ करया। 20 जिसनै पाँच तोड़े मिले थे, उसनै पाँच तोड़े और ल्याके कह्या, हे माल्लिक, तन्नै मेरै ताहीं पाँच तोड़े सौपे थे, लखा, मन्नै ये पाँच तोड़े और कमाए सै। 21 उसके माल्लिक नै उसतै कह्या, शाबाश, हे भरोस्से के लायक आच्छे नौकर, तू थोड़े-से धन म्ह भी भरोसमंद लिकड़या, मै तन्नै घणी चिज्जां का अधिकारी बणाऊंगा। अपणे माल्लिक कै आनन्द म्ह साइझी हो। 22 फेर जिस ताहीं दो तोड़े मिले थे, उसनै भी आके कह्या, हे माल्लिक, तन्नै मेरै ताहीं दो तोड़े सौपे थे, देख, मन्नै दो तोड़े और कमाए सै। 23 उसके माल्लिक नै उसतै कह्या, शाबाश, हे भरोस्से के लायक आच्छे नौकर, तू थोड़े म्ह भी भरोसमंद लिकड़या; मै तन्नै घणी चिज्जां का अधिकारी बणाऊंगा। अपणे माल्लिक कै आनन्द म्ह साइझी हो। 24 फेर जिस ताहीं एक तोड़ा मिल्या था, उसनै आके कह्या, हे माल्लिक, मै तन्नै जाणु था, के तू इसा माणस सै: जित्त किते तू बीज न्ही बोन्दा ओड़ै फसल काट्टै सै, अर जित्त न्ही खिंडान्दा ओड़ै तै कठ्ठा करे सै। 25 जै मै तेरा तोड़ा खो देता तो तू मन्नै दण्ड देता, ज्यातै मै डरग्या अर जाके तेरा तोड़ा माट्टी म्ह दबा दिया। देख, जो तेरा सै, वो यो सै। 26 उसके माल्लिक नै उस ताहीं जवाब दिया, हे दुष्ट अर आलसी नौकर, जिब तन्नै न्यू बेरा था के जित्त मन्नै बीज न्ही बोया ओड़ै तै फसल काट्टू सू, अर जित्त मन्नै न्ही खिंडाया ओड़ै तै कठ्ठा करूँ सू; 27 जै तन्नै बेरा था के मै इसा सू, तो तू मेरा धन सर्राफां नै ए दे देँदा, फेर मै आके अपना धन ब्याज सुथां ले लेन्दा। 28 माल्लिक नै अपणे नौकरां तै कह्या, ज्यातै वो तोड़ा उसतै ले ल्यो, अर जिसके धोरे दस तोड़े सै उसनै दे घो। 29 क्यूँके जिस किसे धोरे सै, उस ताहीं और दिया जावैगा; अर उसके धोरे घणा हो जावैगा: पर जिसके धोरे न्ही सै, उसतै वो भी जो उसके धोरे सै, ले लिया जावैगा। 30 इस निकम्मे नौकर नै बाहर अन्धेरे म्ह गेर घो, जित्त रोणा अर दाँत पिसणा होगा। 31 जिब मै माणस का बेट्टा अपना महिमा म्ह आऊंगा अर सारे सुर्गदूत मेरे गेल्या आवैगें, तो मै अपना महिमा कै सिंहासन पै बैठुंगा। 32 अर सारी जात मेरे स्याम्ही कठी करी जावैगी; अर जिस ढाल पाळी भेड्डां नै बकरियाँ तै न्यारी कर देवै सै, उससे तरियां मै उननै एक-दुसरे तै न्यारा करूंगा। 33 मै भेड्डां नै अपना सोळी ओड़ अर बकरियाँ नै ओळी ओड़ खड्या करूंगा। 34 “फेर मै राजा अपना सोळी ओड़ आळा नै करूंगा, हे मेरे पिता के धन्य माणसों, आओ, उस राज्य के हकदार हो जाओ, जो दुनिया की शरुआत

तै थारे खात्तर त्यार करया गया सै। 35 क्यूँके जिब मै भूक्खा था, तो थमनै मेरै ताहीं खाण नै दिया; मै तिसाया था, तो थमनै मेरै ताहीं पाणी पिलाया; मै परदेशी था, तो थमनै मेरै ताहीं अपणे घरां ठहराया; 36 मै उघाड़ा था, तो थमनै मेरै ताहीं लत्ते पिहराए; मै बीमार था, तो थमनै मेरा बेरा लिया, मै जेळ म्ह था, तो थमनै तै मिलण आये।” 37 “फेर धर्मी उस ताहीं जवाब देवैगें, ‘हे प्रभु, हमनै कद तेरे ताहीं भूक्खा देख्या अर खुवाया? या कद तिसाया देख्या अर पाणी पिलाया? 38 हमनै कद तेरे ताहीं परदेशी देख्या अर अपणे घरां ठहराया? या उघाड़ा देख्या अर लत्ते पिहराये? 39 हमनै कद तेरे ताहीं बीमार या जेळ म्ह देख्या अर तेरा बेरा लेण आये?’” 40 “फेर मै राजा उननै जवाब देऊंगा, ‘मै थमनै साच्ची कहुँ सू के थमनै जो मेरे इन छोट्या तै छोट्टे बिश्वासी भाईयाँ म्ह तै किसे एक कै गेल्या करया, वो मेरे ए गेल्या करया।” 41 “फेर मै ओळे कान्ही आळा ताहीं कहुँगा, ‘हे श्रापित माणसों, मेरे स्याम्ही तै उस अनन्त आग म्ह चले जाओ, जो परमेस्वर नै शैतान अर उसके दूतां खात्तर त्यार करी सै। (aiōnios g166) 42 क्यूँके मै जिब भूक्खा था, तो थमनै मेरै ताहीं खाण नै कोनी दिया; मै तिसाया था, तो थमनै मेरै ताहीं पाणी कोनी पियाया; मै जिब परदेशी था, तो थमनै मेरै ताहीं अपणे घरां कोनी ठहराया; 43 मै नंगा था, तो थमनै मेरै ताहीं लत्ते कोनी पिहराए; मै जिब बीमार था, तो थमनै मेरा बेरा कोनी लिया, मै जेळ म्ह था, तो थमनै तै मिलण कोनी आये।” 44 “फेर वे जवाब देवैगें, ‘हे प्रभु, हमनै तेरे ताहीं कद भूक्खा, या तिसाया, या परदेशी, या उघाड़ा, या बीमार, या जेळ म्ह देख्या, अर तेरी सेवा-पाणी न्ही करी?’” 45 “फेर मै उननै जवाब देऊंगा, ‘मै थमनै साच्ची कहुँ सू के थमनै जो मेरे इन छोट्या तै छोट्ट्या म्ह तै किसे एक कै गेल्या न्ही करया, वो मेरे गेल्या भी न्ही करया।” 46 “अर अधर्मी जन अनन्त दण्ड भोगेगें पर धर्मी जन अनन्त जीवन म्ह दाखल होंगे।” (aiōnios g166)

26 जिब यीशु नै ये सारी बात कह ली तो अपणे चेल्यां तै कहण लाग्या, 2 “थमनै बेरा सै के दो दिनां पाच्छे फसह का त्यौहार सै, अर मै माणस का बेट्टा क्रूस पै चढ़ाण के खात्तर पकड़वाया जाऊंगा।” 3 फेर प्रधान याजक अर प्रजा के यहूदी अगुवें, काइफा नामक महायाजक के आँगण म्ह कठ्ठे होए, 4 अर आप्पस म्ह विचार करण लागे के यीशु ताहीं धोखे तै पकड़के मार देवा। 5 पर वे कहवै थे, “त्यौहार के बखत न्ही, कदे इसा ना हो के माणसां म्ह रोळा माच ज्या।” 6 जिब यीशु बैतनिय्याह गाम म्ह शमौन कोदी कै घरां था, 7 तो एक बिरबान्नी संगमरमर कै बरतन म्ह महंगा खसबूदार तेल लेके उसके धोरे आई, अर जिब वो खाणा खाण नै बेठ्या था तो उसके सिर पै उडेल दिया। 8 न्यू देखके उसके चेल्लें खीजके अर कहण लागे, “इसका क्यातै नाश करया गया? 9 इस ताहीं तो बढ़िया दाम्मां पै बेचके कंगालां म्ह बांडया जा सकै था।” 10 न्यू जाणके यीशु नै उनतै कह्या, “बिरबान्नी नै क्यातै सताओ सो? उननै मेरै गेल्या भलाई करी सै। 11 कंगाल तो थारे गेल्या सारी हाण रहवै सै, पर मै थारे गेल्या सारी हाण कोनी रहुँगा। 12 उसनै

मेरी देह पै जो यो महंगा खसबूदार तेल उंडेला सै, वो मेरे गाड़े जाणकै खात्तर करया सै। 13 मै थमनै साचची कहुँ सूँ के सारे दुनिया म्ह जित्त किते भी यो सुसमाचार प्रचार करया जावैगा, ओड़ै उसके इस काम का जिक्र भी उसकी याद म्ह करया जावैगा।” 14 फेर यहूदा इस्करियोती नै, जो बारहां चेल्यां म्ह तै एक था, प्रधान याजकां के धोरे जाके कह्या, 15 “जै मै यीशु नै थारे हाथ्यां म्ह पकड़वा दिवूँ, तो मन्नै के घोगे?” उनै तीस चाँदी के सिक्के तौलकै दे दिये। 16 अर वो उससे बखत तै यीशु नै पकड़वाण का मौक्का टोहू लाग्या। 17 अखमीरी रोटी के त्यूहार के पैहलड़े दिन, चेल्लें यीशु के धोरे आकै बुझ्झण लागे, “तू कित्त चाहवै सै के हम तेरे खात्तर फसह खाण की त्यारी करा?” 18 यीशु बोल्या, “नगर म्ह फलाणा माणस नै जाके उसतै कहो, ‘गुरु कहवै सै के मेरा बखत लोवै सै। मै अपने चेल्यां के गेल्या तेरे उरै फसह का त्यूहार बणाऊँगा।” 19 आखर चेल्यां नै यीशु का हुकम मान्या अर फसह का भोज त्यार करया। 20 जिव साँझ होई तो यीशु बारहां चेल्यां के गेल्या खाणा खाण के खात्तर बैठ्या। 21 जिव वे खाण लागरे थे तो यीशु नै कह्या, “मै थमनै साचची कहुँ सूँ के थारे म्ह तै एक मन्नै धोक्खा देकै पकड़वावैगा।” 22 इसपै चेल्लें घणे उदास होए, अर हरेक उसतै बुझ्झण लाग्या, “हे गुरु, के वो मै सूँ?” 23 यीशु नै जवाब दिया, “जिसनै मेरे गेल्या थाळी म्ह हाथ घाल्या सै, वोए मन्नै पकड़वावैगा। 24 मै माणस का बेट्टा तो जिसा मेरे बारे म्ह लिख्या सै, अर जावै ए सै; पर उस माणस पै धिक्कार सै जिसके जरिये मै माणस का बेट्टा पकड़वाया जाऊँगा: जै उस माणस का जन्म ए नही होंदा, तो उसके खात्तर भला होंदा।” 25 फेर यीशु के पकड़वाण आळे यहूदा नै कह्या, “हे गुरु, के वो मै सूँ?” यीशु उसतै बोल्या, “तन्नै कह लिया।” 26 जिव वे फसह खाण लागरे थे, तो यीशु नै रोटी ली, अर आशीष माँकै तोड़ी, अर चेल्यां ताहीं देकै कह्या, “ल्यो, खाओ; या मेरी देह सै।” 27 फेर यीशु नै अपना कटोरा लेकै परमेसवर का धन्यवाद करया, अर उन ताहीं देकै कह्या, “थम सारे इस म्ह तै पियो, 28 क्यूँके यो करार का मेरा वो लहू सै, जो घणखरयां के खात्तर पापां की माफी के खात्तर बहाया जावै सै। 29 मै थमनै साचची कहुँ सूँ के अंगूर का यो रस उस दिन ताहीं कदे नही पिऊँगा, जिव थारे गेल्या अपने पिता के राज्य म्ह नया नही पीऊँ।” 30 फेर वे भजन गाकै जैतून के पहाड़ पै गए। 31 फेर यीशु नै उनतै कह्या, “थम आज ए रात नै मेरे बाबत टोक्कर खाओगे, क्यूँके लिख्या सै: ‘मै पाळी नै मारूँगा, अर टोळ की भेड़ तित्तर-बितर हो जावैगी।” 32 “पर मै अपने जिन्दा उठण के बाद थारे तै पैहल्या गलील परदेस म्ह मिलूँगा।” 33 इसपै पतरस नै उसतै कह्या, “जै सारे छोड़े तो छोड़े, पर मै तेरा साथ कदे नही छोड़ूँगा।” 34 यीशु नै उसतै कह्या, “मै तेरे तै सच कहुँ सूँ के आज ए रात नै मुर्गे के बाँग देण तै पैहल्या, तू तीन बर मेरे बारे म्ह मुकरैगा।” 35 पतरस नै उसतै कह्या, “जै मन्नै तेरे गेल्या मरणा भी पड़े, तोभी मै तेरा इन्कार कदे कोनी करूँगा।” इस्से तरियां और सारे चेल्यां नै भी न्यूप कह्या। 36 फेर यीशु अपने चेल्यां के गेल्या गतसमनी नामक एक जगहां म्ह आया

अर अपने चेल्यां तै कहण लाग्या, “उरैए बेट्टे रहियो, जिव ताहीं मै ओड़ै प्रार्थना करूँ।” 37 वो पतरस अर जब्दी के दोन्नु बेट्टा नै गेल्या लेग्या, अर उदास अर कांल होण लाग्या। 38 फेर उसनै उनतै कह्या, “मेरा मन घणा उदास सै, उरै ताहीं के मेरा जी लिकड़ण नै होरया सै। थम उरै ठहरो अर जागदे रहो।” 39 फेर वो माड़ा और आगै सरक के मुँह के बळ गिरया, अर या प्रार्थना करण लाग्या, “हे मेरे पिता, जै हो सकै तो यो दुख का कटोरा मेरे तै टळ जावै, तोभी जिसा मै चाहूँ सूँ इसा नही, पर जिसा तू चाहवै सै उससे तरियां ए होवै।” 40 फेर उसनै चेल्यां के धोरे आकै उन ताहीं सोन्दे पाया अर पतरस तै कह्या, “के थम मेरे गेल्या एक घड़ी भी कोनी जाग सके? 41 जागदे रहो, अर प्रार्थना करदे रहो के थम परखे ना जाओ, आत्मा तो त्यार सै पर देह कमजोर सै।” 42 फेर उसनै दुसरी बार जाके या प्रार्थना करी, “हे मेरे पिता, जै यो मेरे पिए बिना नही हट सकदा, तो तेरी मर्जी पूरी हो।” 43 फेर उसनै आकै उन ताहीं फेर सोन्दे पाया, क्यूँके उनकी आँखां म्ह नींद भरी थी। 44 उननै छोड़के वो फेर चलया गया, अर उन्हे शब्दां म्ह फेर तीसरी बार प्रार्थना करी। 45 फेर उसनै चेल्यां के धोरे आकै उनतै कह्या, “इब सोन्दे रहो, अर आराम करो: देक्खो, बखत आण पोंहच्या सै, अर मै माणस का बेट्टा पापियाँ के हाथ्यां पकड़वाया जाऊँगा। 46 उठो, चाल्लां; देक्खो, मेरा पकड़ाण आळा धोरे आण पोंहच्या सै।” 47 वो न्यूप कहण ए लागरया था के यहूदा जो बारहां चेल्यां म्ह तै एक था आया, अर उसके गेल्या प्रधान याजकां अर यहूदी अगुवां की ओड़ तै बट्टी भीड़, तलवार अर लाठी लिये होए, आई। 48 यीशु के पकड़वाण आळे यहूदा नै उन ताहीं यो इशारा दिया था: “जिस ताहीं मै चूम ल्यूँ वोए सै; उस ताहीं पकड़ लियो।” 49 अर जिब्बे यीशु के धोरे आकै कह्या, “हे गुरु, नमस्कार!” अर उस ताहीं घणा चुम्या। 50 यीशु नै उसतै कह्या, “हे दोस्त, जिस काम के खात्तर तू आया सै, उसनै करलो।” फेर उननै धोरे आकै यीशु पै हाथ गेरया अर उस ताहीं पकड़ लिया। 51 यीशु के साथियाँ म्ह तै एक नै हाथ बढ़ाके अपनी तलवार खींच ली अर महायाजक के नौक्कर पै चलाके उसका कान उड़ा दिया। 52 फेर यीशु नै उसतै कह्या, “अपणी तलवार म्यान म्ह धर ले क्यूँके जो तलवार चलावै सै वे सारे तलवार तै नाश करे जावेंगे। 53 के तन्नै नही बेरा के मै अपने पिता तै बिनती कर सकूँ सूँ, अर वो सुरादूतां की बारहां पलटन तै घणे मेरे धोरे इब्बे हाजर कर देवेगा? 54 पर पवित्र ग्रन्थ की ये बात के इसाए होणा जरूरी सै, किस ढाळ पूरी होवेगी?” 55 उस बखत यीशु नै भीड़ तै कह्या, “के थम तलवार अर लाठी लेकै मन्नै डाकू की ढाळ पकड़ण के खात्तर लिकड़े सो? मै हरेक दिन मन्दर म्ह बैठके उपदेश दिया करूँ था, अर थमनै मेरे ताहीं कोनी पकड़्या। 56 पर यो सारा ज्याते होया सै के नबियाँ के वचन पूरे होवै।” फेर सारे चेल्लें उसनै छोड़के भाजगे। 57 फेर यीशु के पकड़ण आळे उस ताहीं काइफा नामक महायाजक के धोरे लेगे, जित्त शास्त्री अर यहूदी अगुवें कठ्ठे होए थे। 58 पतरस दूर ए दूर उसके पाच्छे-पाच्छे महायाजक के आँगण ताहीं गया, अर भीत्तर जाके अन्त देखण नै सिपाहियाँ के

गेल्या बैठग्या। 59 सारे प्रधान याजक अर यहूदी अगुवां की सभा यीशु नै मारण कै खात्तर उसके बिरोध म्ह झूठी गवाही की टोह म्ह थे, 60 पर घणखरे झूठे गवाह के आण पै भी कोनी पाई। आखर म्ह दो जणो आये, 61 अर बोल्ले, “इसनै कह्या सै के मै परमेसवर के मन्दर नै गेर सकूँ सूँ अर उस ताहीं तीन दिन म्ह बणा सकूँ सूँ।” 62 फेर महायाजक नै खड़े होके यीशु तै कह्या, “के तू कोए जवाब न्ही देंदा? ये माणस तेरे बिरोध म्ह के गवाही देवै सै?” 63 पर यीशु बोल-बाल्ला रहया। फेर महायाजक नै उसतै कह्या, “मै तन्नै जिन्दे परमेसवर की कसम दियुँ सूँ के जै तू परमेसवर का बेट्टा मसीह सै, तो म्हारै ताहीं कह दे।” 64 यीशु नै उसतै कह्या, “तन्नै आप ए कह दिया; बल्के मे तेरे तै यो भी कहूँ सूँ के इब तै थम मुझ् माणस के बेट्टे नै सब तै सर्वशक्तिमान की सोळी ओड़ बेट्टे, अर अकास के बादळां पै आन्दे देखोगे।” 65 फेर महायाजक नै अपने लत्ते पाड़के कह्या, “इसनै परमेसवर की बुराई करी सै, इब हमने गवाह की के जरूरत? देखो, थमनै इब्बे या बुराई सुणी सै! 66 थम के सोचो सो?” उननै जवाब दिया, “यो मारण जोगगा सै।” 67 फेर उननै उसके मुँह पै थुक्या अर उसके घुस्से मारे, दुसरयां नै थप्पड़ मारके कह्या, 68 “हे मसीह, म्हारै तै भविष्यवाणी करके कह के किसनै तेरे ताहीं मारया?” 69 पतरस बाहरणै आँगण म्ह बेट्या था के एक नौकराणी उसके धोरे आई अर बोल्ली, “तू भी तो गलीलवासी यीशु के गेल्या था।” 70 उसनै सारया के स्याम्ही यो कहके नाट्या, “मन्नै न्ही बेरा तू के कहवै सै।” 71 जिब वो बाहरणै देहळियाँ म्ह गया, तो दुसरी नौकराणी उसनै देखके उनतै जो ओड़े थे कह्या, “यो भी तो यीशु नासरी के गेल्या था।” 72 वो कसम खाके फेर नाट्या: “मै उस माणस नै कोनी जाण्दा।” 73 माड़ी बार पाछै माणसां नै जो ओड़े खड़े थे, पतरस के धोरे आके उसतै कह्या, “साच्चए तू भी उन म्ह तै एक सै, क्यूँके तेरी बोल्ली तेरा भेद खोल्लै सै।” 74 फेर वो धिक्कारण अर कसम खाण लाग्या: “मै उस माणस नै कोनी जाण्दा।” जिब्बे मुर्गे नै बाँग देई। 75 जिब पतरस नै यीशु की कही होई बात याद आई “मुर्गे के बाँग देण तै पैहल्या तीन बर तू मेरा इन्कार करेगा।” अर वो बारणै ज्याके फूट-फूटके रोण लाग्या।

27 तड़के ए तड़के सारे प्रधान याजकां अर यहूदी अगुवां नै यीशु ताहीं मारण की सलाह करी। 2 उननै यीशु ताहीं बाँधया अर ले जाके पिलातुस राज्यपाल के हाथ्यां म्ह सौप दिया। 3 जिब उसके पकड़वाण आळे यहूदा नै अहसास होया के यीशु ताहीं मौत की सजा सुणाई गई सै तो वो पसताया अर वे तीस चाँदी के सिक्के प्रधान याजकां अर यहूदी अगुवां ताहीं बोहड़ाया 4 अर कह्या, “मन्नै बेकसूर माणस ताहीं मारण के खात्तर पकड़वाके पाप करया सै।” उननै कह्या, “हमनै के मतलब? तू ए जाणै।” 5 फेर वो उन सिक्का नै मन्दर के आँगण म्ह बगाके बाहरणै चल्या गया, अर जाके अपने-आप ताहीं फाँसी लगा ली। 6 प्रधान याजकां नै उन सिक्का ताहीं लेके कह्या, “म्हारै नियम-कायदे इस बात की इजाजत कोनी देंदा के हम इन सिक्कयां नै मन्दर के खजान्ने म्ह

धरा, क्यूँके इसका इस्तमाल किसे ताहीं मारवाण खात्तर करया गया सै, या लहू की किम्मत सै।” 7 आखर म्ह उननै सलाह करके उन सिक्कयां तै परदेशियाँ के गाढे जाणके खात्तर कुम्हार का खेत मोल ले लिया। 8 इस कारण वो खेत आज ताहीं लहू का खेत कुहवाँ सै। 9 ताके जो वचन यिर्मयाह नबी के जरिये कह्या गया था वो पूरा होया: “उननै वे तीस सिक्के यानिके उस ठहराए होए मोल ताहीं (जिस ताहीं इस्राएल की उलाद म्ह तै कितन्याँ नै ठहराया था) ले लिया, 10 अर जिस तरियां प्रभु नै मेरे ताहीं हुकम दिया था, उससे तरियां ए उननै कुम्हार के खेत नै खरीदण खात्तर उसका इस्तमाल करया।” 11 जिब यीशु राज्यपाल के स्याम्ही खड्या था तो राज्यपाल नै उसतै बुझया, “के तू यहूदियाँ का राजा सै?” यीशु नै उसतै कह्या, “तू आप ए कहण लागरया सै।” 12 जिब प्रधान याजक अर यहूदी अगुवें उसपै इल्जाम लावै थे, तो उसनै कुछ जवाब कोनी दिया। 13 इसपै पिलातुस नै उसतै कह्या, “के तू न्ही सुणदा के ये तेरे बिरोध म्ह कितनी गवाही देवै सै?” 14 पर उसनै उस ताहीं एक बात का भी जवाब कोनी दिया, उरै ताहीं के राज्यपाल ताहीं घणी हैरानी होई। 15 राज्यपाल का यो रिवाज था के उस त्यौहार म्ह माणसां के खात्तर किसे एक कैदी नै जिसनै वे चाहवै थे, रिहा कर देवै था। 16 उस बखत उनके उरै बरअब्बा नाम का एक मान्या होड़ कैदी था। 17 आखर जिब वो कट्टे होए, तो पिलातुस नै उनतै कह्या, “थम किसनै चाहो सो के मै थारे खात्तर रिहा करूँ? बरअब्बा ताहीं, या यीशु ताहीं जो मसीह कुहवाँ सै।” 18 क्यूँके उसनै बेरा था के उननै उस ताहीं जळण तै पकड़वाया था। 19 जिब वो न्याय की गद्दी पै बेट्या होया था तो उसकी घरआळी नै उस ताहीं कुहवां भेज्या, “तू उस धर्मी के मामलै म्ह हाथ ना गेरिये, क्यूँके मन्नै आज सपनै म्ह उसके कारण घणा दुख ठाया सै।” 20 प्रधान याजकां अर यहूदी अगुवां नै माणसां ताहीं उकसाया के वे बरअब्बा नै माँग ले, अर यीशु का नाश करावै। 21 राज्यपाल नै उसतै बुझया, “इन दोनुआ म्ह तै किसनै चाहो सो के मै थारे खात्तर छोड़ दियुँ?” उननै कह्या, “बरअब्बा ताहीं।” 22 पिलातुस नै उनतै कह्या, “फेर यीशु ताहीं, जो मसीह कुहवाँ सै, के करूँ?” सारया नै उसतै कह्या, “यीशु कूस पै चढ़ाया जावै।” 23 हाकिम नै कह्या, “क्यातै, उसनै के बुरा करया सै?” पर वे और भी रुक्के मारण लागे, “वो कूस पै चढ़ाया जावै।” 24 जिब पिलातुस नै देख्या के किमे न्ही बण पडरया पर उल्टा दंगा बढ़दा जावै सै, तो उसनै पाणी लैके भीड़ के स्याम्ही अपने हाथ धोए अर कह्या, “मै इस धर्मी के लहू तै बेकसूर सूँ: थमे जाणो।” 25 सारे माणसां नै जवाब दिया, “इसकी मौत के जिम्मेदार हम अर म्हारी उलाद होवांगे।” 26 इसपै उसनै बरअब्बा ताहीं उनके खात्तर रिहा कर दिया, अर यीशु के कोड़े लगवाके सौप दिया, के कूस पै चढ़ाया जावै। 27 फेर राज्यपाल के सिपाहियाँ नै यीशु ताहीं किले म्ह ले जाके सारी पलटन उसके चौगरदे नै कट्टी करी, 28 अर उसके लत्ते तारके उस ताहीं लाल रंग का चोगा पहिराया, 29 अर काण्डयाँ का ताज गुन्दके उसके सिर पै धरया, अर उसके सोळे हाथ्यां म्ह सरकण्डा दिया अर उसके आगे गोड़े

टेक के उसका मखौल उड़ाण लाग्गे अर कहा, “हे यहूदिया परदेस के राजा, नमस्कार!” 30 अर उसपै थुक्का; अर वोए सरकण्डा लेकै उसके सिर पै मारण लाग्गे। 31 जिब उननै उसका मखौल कर लिया, तो वो चोग्गा उसपै तै तारके फेर उरसे के लत्ते उस ताहीं पिहराए, अर क्रूस पै चढ़ाण के खात्तर ले चाल्ले। 32 बाहरणै जान्दे होए, उन ताहीं शमौन नाम का एक कुरेनी माणस मिल्या। उननै उस ताहीं बेकार म्ह पकड्या के उसका क्रूस ठाकै ले चाल्लै। 33 उस जगहां पै पोहवे जो “खोपड़ी” यानी इब्रानी भाषा म्ह “गुलगुता” कुहावै सै। 34 उननै सिरका मिल्या होइ अंगूर का रस उस ताहीं पीण नै दिया, पर उसनै चाखकै पीणा न्ही चाह्या। 35 फेर उननै उस ताहीं क्रूस पै चढ़ाया, अर पर्ची गेर के उसके लत्ते बांड लिये, 36 अर ओड़ै बैठकै उसका पैहरा देण लाग्गे। 37 अर उसका दोषपत्र लिखकै उसके सिर पै लगाया, के, “यो यहूदियाँ का राजा यीशु सै।” 38 फेर उसके गेल्या दो डाकू एक सोळी ओड़ अर एक ओळी ओड़, क्रूस पै चढ़ाए गए। 39 राह म्ह आण-जाण आळे सिर हला-हलाकै उसकी बेजती करै थे, 40 अर वे कहवै थे, “हे मन्दर नै ढाण आळे अर तीन दिनं म्ह बणाण आळे, अपणे-आपनै तो बचा! जै तू परमेसवर का बेट्टा सै, तो क्रूस पै तै उतर आ।” 41 इस्से तरियां तै प्रधान याजक भी शास्त्रियाँ अर यहूदी अगुवां सुधा मजाक करकै कहवै थे, 42 “इसनै औरां ताहीं बचाया, अर अपणे-आपनै न्ही बचा सकदा। यो तो ‘इसाएल का राजा’ सै। इब क्रूस पै तै उतर आवै तो हम उसपै बिश्वास करां। 43 उसनै परमेसवर पै भरोस्सा राख्या सै; जै वो इसनै चाहवै सै, तो इब इसनै छुड़ा लेवै, क्यूँके इसनै कहा था, ‘मै परमेसवर का बेट्टा सूँ।’” 44 इस्से ढाळ डाकू भी जो उसके गेल्या क्रूस पै चढ़ाए गए थे, उसकी बेजती करै थे। 45 दोफारी तै लेकै तीन बजे ताहीं उस सारे देश म्ह अँधेरा छाया रहया। 46 तीसरे पहर के लोवै यीशु नै जोर तै बोल्या, “एली, एली, लमा शबक्तनी?” यानिके “हे मेरे परमेसवर, हे मेरे परमेसवर, तन्नै मेरे ताहीं क्यांतै छोड़ दिया?” 47 जो उड़ै खड़े थे, कितन्याँ नै न्यू सुणकै कहा, “वो तो एलिय्याह ताहीं बुलावै सै।” 48 उन म्ह तै एक जिब्बे भाज्या, अर स्पंज (फोम) लेकै सिरके म्ह डबोया, अर सरकण्डे पै थरकै उस ताहीं चुसाया। 49 औरां नै कहा, “रहज्या, देख्खो एलिय्याह उसनै बचाण आवै सै के न्ही।” 50 फेर यीशु नै जोर तै किल्की मारकै जी दे दिया। 51 अर देख्खो, मन्दर का पड़्डा उप्पर तै तळै ताहीं पाटकै दो टुकड़े होग्या अर धरती काम्बगी चट्टान तड़कगी, 52 अर कब्रें खुलगी, अर मेरे होइ भोत-से पवित्र माणस जो पैहले मुर्दे थे वे जिन्दा होग्ये, 53 अर उसके जिन्दा होण के पाछे वे कब्रं म्ह तै लिकड़कै पवित्र नगर म्ह गए अर घणाए ताहीं दिक्खे। 54 फेर सूबेदार अर जो उसके गेल्या पैहरा दे रे थे, हाल्लण अर जो कुछ होया था उस ताहीं देखकै घणे डरगे अर कहा, “साच्चए यो परमेसवर का बेट्टा था।” 55 ओड़ै घणखरी बिरबानी जो गलील परदेस तै यीशु की सेवा कर दी होई उसके गेल्या आई थी, दूर तै देखवै थी। 56 उन म्ह मरियम मगदलीनी, अर याकूब अर योसेस की माँ मरियम, अर जब्दी के बेट्याँ की माँ थी। 57 जिब साँझ होई तो

यूसुफ नामका अरिमतिया गाम का एक साहूकार माणस, जो खुदे यीशु का चेल्ला था। 58 उसनै पिलातुस धरै जाकै यीशु की लाश माँगी। इस करकै पिलातुस नै यीशु की लाश देण का हुकम दिया। 59 यूसुफ नै यीशु की लाश ली, उस ताहीं धोळी चादर म्ह लपेट्या, 60 अर उस ताहीं अपणी नई कब्र म्ह धरया, जो उसनै चट्टान म्ह खुदवाई थी, अर कब्र के बारणै पै एक बड़ड़ा पत्थर गिरड़ा कै चल्या गया। 61 मरियम मगदलीनी अर दुसरी मरियम ओड़ैए कब्र कै स्याम्ही बेट्टी थी। 62 आगला दिन आराम का दिन था, उस दिन प्रधान याजकां अर फरीसियाँ नै पिलातुस के धरै कठ्ठे होकै कहा, 63 “हे महाराज, म्हारै ताहीं याद सै के उस धोक्खेबाज नै जिब वो जिन्दा था, तो उसनै न्यू कहा था, ‘मै मरण के तीन दिन पाछे जिन्दा हो जाऊँगा।’” 64 इस करकै हुकम दे के तीसरे दिन ताहीं कब्र की रुखाळी सावधानी तै करी जावै, इसा ना हो के उसके चेल्लें आकै उसकी लाश नै चुरा ले जावै, अर माणसां तै कहण लाग्गे, ‘वो मेरे होया म्ह तै जिन्दा होग्या सै।’ फेर पाछल्ला धोक्खा पैहल्ले तै भी बड़ड़ा होगा।” (पैहला धोक्खा के वो खुद नै परमेसवर का बेट्टा बतावै सै, दुसरा यो के इब वो तीसरे दिन मेरे होया मै तै जी उठ्ठुंगा) 65 “पिलातुस नै उनतै कहा, ‘थारे धरै पहरेदार तो सै जाओ, अपणी समझकै मुताबिक कब्र की रुखाळी करो।’ 66 आखर वे पैहरेदारां नै गैल लेकै ग्ये, अर कब्र के पत्थर पै मोंहर लगाकै कब्र की रुखाळी करी।”

28 आराम के दुसरे दिन पाछे, हफ्तै के पैहल्ले दिन, तड़कै ए तड़कै मगदला कस्बे की मरियम अर दुसरी मरियम कब्र नै देखण आई। 2 अर देख्खो, एक बड़ड़ा हाल्लण आया, क्यूँके प्रभु का सुर्गदूत सुर्ग तै उतरया अर धरै आकै उसनै पत्थर ताहीं गिरड़या दिया, अर उसपै बैठग्या। 3 उसका रूप बिजळी बरगा था अर उसके लत्ते पाळे की ढाळ धोळे थे। 4 उसके डर तै पहरेदार काम्बगें, अर मुर्दे की ढाळ होग्ये। 5 सुर्गदूत नै बिरबानियाँ ताहीं कहा, “मतना डरो, मन्नै बेरा सै के थम यीशु नै जो क्रूस पै चढ़ाया गया था, तोहो सो। 6 वो उरै न्ही सै, पर अपणे वचन के मुताबिक जिन्दा होग्या सै। आओ, या जगहां देख्खो, जित्त प्रभु राख्या गया था, 7 अर तावळे जाकै उसके चेल्यां ताहीं कहो के वो मेरे होया म्ह तै जिन्दा होग्या सै, अर वो थारे तै पैहल्ल्या गलील परदेस म्ह जावै सै, उड़ै उसका दर्शन पाओगे! देख्खो, मन्नै थारे तै कह दिया।” 8 वे भय अर घणी खुशी कै गेल्या कब्र तै तावळी बोहड़कै उसके चेल्यां ताहीं खबर देण नै भाज्जी गई। 9 फेर यीशु उन ताहीं मिल्या। अर कहा, “सुखी रहो।” उननै धरै आकै अर उसके पाँ पकड़कै उस ताहीं प्रणाण करया। 10 फेर यीशु नै उनतै कहा, “मतना डरो; मेरे चेल्यां तै जाकै कहो के गलील परदेस म्ह चले जावै, उड़ै वो मन्नै देख्खेंगे।” 11 जिब वे चेल्यां ताहीं या खबर देण जाण लागरी थी। तो पैहरेदारां म्ह तै, जो कब्र की रुखाळी करै थे, उन म्ह तै कईयाँ नै नगर म्ह आकै सारा हाल प्रधान याजकां तै कह सुणाया। 12 फेर उननै यहूदी अगुवां कै गेल्या कठ्ठे होकै सलाह करी अर सिपाहियाँ ताहीं घणाए धन देकै हुकम दिया, 13 “के माणसां तै न्यू कहियो के जिब हम रात नै

सोण लागरे थे, तो उसके चेल्लें आकै उसकी लाश नै चुरा लेगे। 14 जै थारे सोण की खबर राज्यपाल कै कान्नां ताहीं पोहोचैगी, तो हम उसनै समझा लेवैगें अर थमनै जोखिम तै बचा लेवांगें।” 15 आखर उननै रपिये लेकै जिसे सिखाए गये थे, उस्से तरियां ए करया। या बात आज ताहीं यहूदी माणसां म्ह मान्नी जावै सै। 16 ग्यारहां चेल्लें गलील परदेस म्ह उस पहाड़ पै गये, जिस ताहीं यीशु नै उन ताहीं बताया था। 17 उननै उसका दर्शन पाकै उस ताहीं प्रणाम करया, पर कईयाँ नै शक होया के यीशु जिन्दा होग्या सै। 18 यीशु नै उनके धोरै आकै कह्या, “सुर्ग अर धरती का सारा हक मेरै ताहीं दिया गया सै। 19 इस करकै थम जाओ, सारी जात्तां के माणसां ताहीं चेल्ला बणाओ; अर उननै पिता, पुत्र अर पवित्र आत्मा कै नाम तै बपतिस्मा द्यो, 20 अर उननै सारी बात जो मन्नै थारे ताहीं हुकम दिया सै, मानना सिखाओ: अर देखो मै दुनिया कै अंत तक सदा थारे गैल रहूँगा।” (aiōn g165)

मरकुस

1 यो सुसमाचार यीशु मसीह के बारे में है। जो परमेसवर का बेटा है।
अर इसकी शुरुआत इस तरियाँ होई 2 जिसा के यशायाह नबी की किताब में परमेसवर नै अपने बेटे ताहीं कहा सै: “देख, मैं अपने दूत नै तेरे आगै भेजूं सूँ, जो तेरे खात्तर लोगां नै तैयार करैगा। 3 जंगल-बियाबान में एक रुक्का मारणीये का बोल सुणाई देवै सै के प्रभु के आण खात्तर अपने-आपने तैयार करो।” 4 वो दूत यूहन्ना था, जो जंगल-बियाबान में कहवै था, “पाप करणा छोड़ दो अर बपतिस्मा ल्यो परमेसवर थारे पाप माफ कर देगा।” 5 सारे यहूदिया परदेस के, अर यरुशलेम नगर के सारे बासिन्दे लिक्ड़के उसके धोरे गए, अर अपने पापां नै मानके यरदन नदी में उसतै बपतिस्मा लिया। 6 यूहन्ना ऊँट के रूप के लते पहरे, अर अपनी कड़ में चमड़े की पेट्री बाँधे रहवै था, अर टिट्टियाँ अर शहद खाया करै था। 7 अर न्यू प्रचार करै था, “मेरे पाछे वो आण आळा सै, जो मेरे तै शक्तिशाली सै, मैं इस लायक कोनी के झुकके उसके जूयाँ के फिते खोल्लुं। 8 मन्ने तो थारे ताहीं पाणी तै बपतिस्मा दिया सै पर वो थमने पवित्र आत्मा तै बपतिस्मा देवैगा।” 9 उन दिनां में यीशु नै गलील परदेस के नासरत नगर तै होके, यरदन नदी में यूहन्ना तै बपतिस्मा लिया। 10 अर जब वो पाणी में तै लिक्ड़के उप्पर आया, तो जिब्बे उसनै अकास ताहीं खुन्दे अर पवित्र आत्मा ताहीं कबूतर की तरियाँ अपने उप्पर आन्दे देख्या। 11 अर परमेसवर सुराँ में तै बोल्या, “तू मेरा प्यारा बेटा सै, तेरे तै मैं राज्जी सूँ।” 12 फेर पवित्र आत्मा नै जिब्बे उस ताहीं जंगल-बियाबान कान्ही भेज्या। 13 जंगल-बियाबान में चाळीस दिन ताहीं शैतान उस ताहीं परखता रह्या, अर वो जंगल-बियाबान में पशुआं के गेल्या रह्या, अर सुराँदूत उसकी सेवा करदे रहे। 14 यूहन्ना के पकड़े जाणके कुछ बखत पाछे, यीशु नै गलील परदेस में आके परमेसवर के राज्य का सुसमाचार प्रचार कर्या, 15 अर कहा, “बखत पूरा होया सै, अर परमेसवर का राज्य धोरे आरया सै; पाप करणा छोड़ दो, अर परमेसवर के सुसमाचार पै बिश्वास करो।” 16 गलील परदेस में गलील समुन्दर के किनारे जान्दे होड़, उसनै शमौन अर उसके भाई अन्द्रियास ताहीं समुन्दर में जाळ गेर दे देख्या; क्यूँके वे मछवारे थे। 17 यीशु नै उनतै कहा, “मेरे पाछे आओ, मैं थमने माणसां ताहीं कट्टे करण आळे बणाऊँगा ताके वो मेरे चेल्लें बणे।” 18 वे जिब्बे जाळां नै छोड़के उसके चेल्लें बणण खात्तर उसके पाछे हो लिये। 19 थोड़ा आगै चालके, उसनै जब्दी के बेटे याकूब अर उसके भाई यूहन्ना ताहीं, किस्ती पै जाळां ताहीं ठीक करदे देख्या। 20 उसनै जिब्बे उन ताहीं बुलाया; अर वे अपने पिता जब्दी ताहीं मजदूरां के गेल्या किस्ती पै छोड़के, उसके चेल्लें बणण खात्तर उसके पाछे हो लिये। 21 जब यीशु अर उसके चेल्लें कफरनहूम नगर में आए, अर वो जिब्बे आराम के दिन आराधनालय में जाके उपदेश देण लाग्या। 22 अर माणस उसके उपदेश तै हैरान होगे; क्यूँके वो उननै शास्त्रियाँ की ढाळ न्ही, पर

अधिकार तै उपदेश देवै था। 23 उससे बखत, उनके आराधनालय में एक माणस था, जिसमें ओपरी आत्मा थी। 24 उसनै रुक्का मारके कहा, “हे नासरत के यीशु, हमनै तेरे तै के काम? के तू म्हाारा नाश करण नै आया सै? मै तन्नै जाणु सूँ, तू कौण सै? तू परमेसवर की ओड़ तै भेज्या होया पवित्र मसीह सै!” 25 यीशु नै उसतै धमकाके कहा, “चुपचाप रहे, अर इस माणस में तै लिक्ड़ जा।” 26 फेर ओपरी आत्मा ऊँची आवाज में लिक्की मारके उस में तै लिक्ड़गी। 27 इस बात पै सारे माणस अचम्भा करदे होए आप्पस में बहस करण लागे, “या के बात सै? यो तो कोए नया-ए उपदेश सै! वो हक के गेल्या ओपरी आत्मायाँ नै भी हुकम देवै सै, अर वे उसका हुकम मान्ने सै।” 28 अर उसका नाम जिब्बे गलील के पूरे परदेस में हरेक जगहां फैलग्या। 29 यीशु अर उसके सारे चेल्लें जिब्बे आराधनालय में तै लिक्ड़के, याकूब अर यूहन्ना के गेल्या शमौन अर अन्द्रियास के घरां आये। 30 शमौन की सास्सू के बुखार चढ़रया था, अर उसके चेल्यां नै जिब्बे उसके बाबत यीशु ताहीं बताया। 31 फेर यीशु नै धोरे जाके उसका हाथ पकड़के उस ताहीं ठाया, अर उसका बुखार उतर ग्या, अर वा उनकी सेवा-पाणी करण लागी। 32 साँझ के बखत जब सूरज डूबग्या तो माणस सारे बिमारां ताहीं अर उननै, जिनमें ओपरी आत्मा थी, यीशु के धोरे ल्याए। 33 अर साब्ला नगर दरबाजे पै कट्टा होया। 34 उसनै घणखरयां ताहीं जो कई ढाळ की बिमारियाँ तै दुखी थे, ठीक करया, घणखरी ओपरी आत्मायाँ ताहीं काढ्या, अर ओपरी आत्मायाँ ताहीं बोल्लण कोनी दिया, क्यूँके वे उसनै पिच्छाणै थी, के यीशु परमेसवर की ओड़ तै भेज्या होया मसीह सै। 35 तड़के ए दिन लिक्ड़ण तै पैहल्या, यीशु शमौन के घर तै उठके लिक्ड़या, अर एक बियाबान जगहां में गया अर उड़े प्रार्थना करण लागग्या। 36 फेर शमौन अर उसके साथी उसकी टोह में गए। 37 जब वो मिल्या, तो उस ताहीं कहा, “सारे नगर के माणस तन्नै टोहवै सै।” 38 उसनै उनतै कहा, “आओ; हम और किते लोवै-धोवै की बस्तियां में जावो, के मैं उड़े भी प्रचार करूँ, क्यूँके मैं इसे खात्तर आया सूँ।” 39 अर वो सारे गलील परदेस में उनके आराधनालयाँ में जा-जाके उन ताहीं उपदेश सुणान्दा अर ओपरी आत्मायाँ ताहीं लिक्ड़दा रह्या। 40 एक कोढ़ी उसके धोरे आया, उसतै बिनती करी, अर उसके आगै गोठे टेकके उस ताहीं कहा, “जै तू चाहवै तो मन्ने ठीक कर सकै सै।” 41 उसनै उसपै तरस खाके हाथ बढ़ाके, अर उस ताहीं छू के कहा, “मै चाहूँ सूँ, के तू इस बीमारी तै ठीक हो ज्या।” 42 अर जिब्बे उसका कोढ़ जान्दा रह्या, अर वो ठीक होग्या। 43 फेर उसनै उस ताहीं चेतावनी देके जिब्बे बिदा करया, 44 अर उसतै कहा, “लखा, किसे तै कुछ मतना कहिये, पर जाके अपने-आपने याजक ताहीं दिखा, अर अपने कोढ़ तै ठीक होण के बारे में जो कुछ मूसा नबी नै जो पवित्र ग्रन्थ में चढ़ावा बताया सै उसनै चढ़ा, के माणसां खात्तर या गवाही हो, के तू ठीक होग्या सै।” 45 पर वो बाहरणै जाके इस बात का घणा प्रचार करण अर याड़े ताहीं फैलाण लागग्या के यीशु दुबारे सरेआम नगर में

कोनी जा सक्या, पर बाहरणै सुनसान स्थानां म्ह रह्या, अर चौगरदे तै माणस उसके धोरे आन्दे रहे।

2 थोडे दिनां पाच्छे यीशु फेर कफरनहूम नगर म्ह आया, अर माणसां नै सुण्या के वो घर म्ह सै। 2 फेर इतने माणस कठ्ठे होए के दरबाजे धोरे भी जगहां कोनी थी, अर वो उननै परमेसवर के वचन सुणाण लागरया था। 3 अर चार माणस एक लकवे कै मरीज ताहीं बिस्तर पै लिटाकै उसके धोरे ल्याए। 4 पर जिब वे भीड़ कै कारण उसके धोरे कोनी पोहच सके, तो उननै उस छात ताहीं जिसकै तळै यीशु था, खोल दिया; तो उस बिस्तर समेत जिसपै वो लकवे का मरीज लेट्या था, नीच्वे उतार दिया। 5 यीशु नै उनका बिश्वास देखकै उस लकवे के मरीज ताहीं कह्या, “हे बेट्टे, मन्नै तेरे पाप माफ कर दिये।” 6 फेर घणे शास्त्री जो उडै बेट्टे थे, अपणे-अपणे मन म्ह सोच्यण लाग्गे, 7 “यो माणस न्यू क्यातै कहवै सै? यो तो परमेसवर की बुराई करै सै! परमेसवर नै छोड़कै और कौण पाप माफ कर सकै सै?” 8 यीशु नै जिब्बे अपणे मन म्ह जाण लिया के वे अपणे-अपणे मन म्ह इसा विचार क्यातै करण लागरे सै? अर उनतै कह्या, “थम अपणे-अपणे मन म्ह यो विचार क्यूँ करण लागरे सो? 9 आसान के सै? के लकवे कै मरीज ताहीं यो कहणा के तेरे पाप माफ होए, या फेर यो कहणा के उठ अपणा बिस्तर ठाकै हाँड-फिर? 10 पर जिसतै थम जाण ल्यो के मुझ माणस के बेट्टे नै धरती पै पाप माफ करण का भी हक सै।” उसनै उस लकवे कै मरीज ताहीं कह्या, 11 “मै तेरे तै कहुँ सूँ, उठ, अपणे बिस्तर ठाकै अपणे घरां चल्या जा।” 12 वो उठ्या अर जिब्बे बिस्तर ठाकै उसके स्याम्ही तै लिङ्ग्या; इसपै सारे हैरान होगे, अर परमेसवर की बड़ाई करके कहण लाग्गे, “हमनै इसा पैहल्या कदे कोनी देख्या।” 13 यीशु दुबारा लिङ्गकै गलील समुन्दर कै किनारे गया, अर सारी भीड़ उसके धोरे आई, अर वो उननै उपदेश देण लाग्या। 14 जान्दे होए उसनै हलफई के बेट्टे लेवी जिसका नाम मत्ती था, चुंगी की चौकी पै बेट्टे देख्या, अर उसतै कह्या, “मेरा चेल्ला बणण खात्तर मैरे पाच्छे हो ले।” अर वो उठकै उसके पाच्छे हो लिया। 15 जिब वो मत्ती के घर म्ह खाणा खाण बैठ्या, तो घणेए चुंगी लेण आळे अर जिननै लोग पापी कहवै थे, यीशु अर उसके चेल्यां गेल्या खाणा खाण बेट्टे; क्यूँके वे घणे सारे थे, अर उसके साथ हो लिए थे। 16 शास्त्रियाँ अर फरीसियाँ नै न्यू देखकै के वो तो पापी अर चुंगी लेण आळा गेल्या खाणा खावै सै, उसके चेल्यां ताहीं कह्या, “वो तो चुंगी लेण आळे अर जिननै लोग पापी कहवै सै, उनकै गेल्या खावै-पीवै सै।” 17 यीशु नै या सुणकै उनतै कह्या, “आच्छे-बिच्छ्यां नै वैद की जरूरत कोनी, पर बिमारां नै सै: जो अपणे-आपने धर्मा कहवै सै, मै उननै न्ही, पर जो अपणे-आपने पापी कहवै सै उननै बुलाण आया सूँ।” 18 यूहन्ना के चेल्लें, अर फरीसी ब्रत करया करै थे, तो उननै आकै उसतै कह्या, “यूहन्ना के चेल्लें अर फरीसियाँ के चेल्लें ब्रत क्यातै करै सै, पर तेरे चेल्लें ब्रत न्ही राखदे?” 19 यीशु नै उनतै कह्या, “जिब ताहीं बन्दड़ा बरातियाँ कै गेल्या सै, के वे ब्रत राख सकै सै? आखर जिब ताहीं बन्दड़ा उनकै गेल्या सै, जद ताहीं

वे ब्रत कोनी कर सकदे। 20 पर वे दिन भी आवैगें जिब बन्दड़ा उनतै न्यारा करया जावैगा; उस बखत वे ब्रत करैगें। 21 “नये लत्यां की थेग्ळी पुराणे लत्यां पै कोए न्ही लगान्दा, न्ही तो वा थेग्ळी उस म्ह तै खुस्का लेवैगी, यानिके नया, पुराणे तै, अर वो पैहल्या तै घणा पाट जावैगा। 22 नये अंगूर के रस ताहीं पुराणी मशकां म्ह कोए कोनी राखदा, न्ही तो अंगूर का रस मशकां नै पाड़ देवैगा, अर अंगूर का रस अर मशक दोनुआ का नाश हो जावैगा, पर नया अंगूर का रस नई मशकां म्ह भरया जावै सै।” 23 न्यू होया के आराम कै दिन यीशु चेल्यां कै गैल खेतां म्ह तै होकै जाण लागरया था, अर उसके चेल्लें चाल्दे होए गेहूँ की बाल तोड़ण लाग्गे। 24 तो फरीसियाँ नै उस ताहीं कह्या, “देख, ये आराम कै दिन वो काम क्यातै करै सै? जो नियम-कायदा के खिलाफ सै।” 25 यीशु नै उनतै कह्या, “के थमनै पवित्र ग्रन्थ म्ह यो न्ही पढ़्या के जिब म्हारे पूर्वज दाऊद नै जरूरत होई, अर जिब वो अर उसके साथी भूक्खे होए, फेर उसनै के करया था? 26 उसनै किस ढाळ अबियातार महायाजक कै बखत, परमेसवर कै घर म्ह जाकै भेंट की रोटी खाई, जिनका खाणा याजकां नै छोड़ और किसे कै खात्तर खाणा ठीक कोनी, अर अपणे साथियाँ ताहीं भी दी?” 27 फेर उसनै उन ताहीं कह्या, “आराम का दिन माणस खात्तर बणाया गया सै, ना के माणस आराम कै दिन के खात्तर। 28 इस करके मै माणस का बेट्टा आराम कै दिन का भी माल्लिक सूँ।”

3 यीशु फेर आराम कै दिन आराधनालय म्ह गया; उडै एक माणस था जिसका हाथ सूखरया था, 2 अर फरीसी यीशु पै दोष लाण खात्तर उसकी टाह म्ह थे के देख्वै, वो आराम कै दिन उसनै ठीक करै सै के न्ही। 3 उसनै सूखे हाथ आळे माणस तै कह्या, “बीच म्ह खड्या होज्या” 4 अर उनतै कह्या, “के मूसा के नियम-कायदा कै मुताबिक आराम कै दिन भला करणा ठीक सै या बुरा करणा, जान बचाणा या मारणा?” पर वे बोल-बाल्ले रहे। 5 फेर उसनै उनकै मन की कठोरता तै काल होकै, उन ताहीं छो तै चोगरदेनै देख्या, अर उस माणस ताहीं कह्या, “अपणा हाथ बढ़ा।” उसनै बढ़ाया, अर उसका हाथ ठीक हो गया। 6 फेर फरीसी बाहरणै जाकै जिब्बे हेरोदेस राजा के समर्थकां कै गेल्या उसके बिरोध म्ह सलाह करण लाग्गे के उसका नाश किस तरियां करया जावै। 7 यीशु अपणे चेल्यां गेल्या गलील समुन्दर कान्ही चल्या गया: अर गलील तै एक बड्डी भीड़ उसके पाच्छे हो ली; 8 अर यहूदिया नगर, अर यरुशलैम नगर, अर इद्रूमिया परदेस, अर यरदन नदी के परली ओड़, अर सूर अर सैदा नगर के लोवै-धोवै तै एक बड्डी भीड़ न्यू सुणकै के वो किसे अचम्भे आळे काम करै सै, उसनै देख्यण आई। 9 यीशु नै अपणे चेल्यां तै कह्या, “भीड़ की बजह तै एक छोटी किस्ती मैरे खात्तर त्यार राखियाँ ताके वे मन्नै दाब न्ही सकै।” 10 क्यूँके उसनै घणखरयां ताहीं ठीक करया था, इस करके जितने माणस बीमार थे, उस ताहीं छूण खात्तर उसपै पड़ण लागरे थे। 11 जिन म्ह ओपरी आत्मा भी जिब उस ताहीं देख्वै थी, तो उसके स्याम्ही गिर ज्या थी, अर किल्की मारकै कहवै थी, तू परमेसवर का बेट्टा सै। 12 अर उसनै ओपरी आत्मायाँ

ताहीं चेतवनी दैकै कह्या के मेरै बारै म्ह किसे तै ना कहियो के मै कौण सूं। 13 फेर यीशु पहाड़ पै चढ़ग्या, अर जिन नै वो चाहवै था उन ताहीं अपणे धोरै बुलाया; अर वे उसके धोरै आए। 14 फेर उसनै उन म्ह तै बारहा चेल्यां ताहीं नियुक्त करया के वे उसके गेल्या-गेल्या रहवै, अर वो उननै भेज्जै के वे प्रचार करै, 15 अर ओपरी आत्मा ताहीं काढ़ण का हक राखै। 16 वे बारहा चेल्लें ये सै: “शमौन जिसका नाम उसनै पतरस धरया, 17 अर जब्दी का बेट्टा याकूब अर याकूब का भाई यूहन्ना, जिसका नाम उसनै बुअनरगिस यानिके ‘गरजण का बेट्टा’ धरया।” 18 अर अन्द्रियास, अर फिलिप्पुस, अर बरतुल्लै, अर मत्ती, अर थोमा, अर हलफई का बेट्टा याकूब, अर तदै, अर शमौन कनानी, 19 अर यहूदा इस्करियोती जिसनै उस ताहीं पकड़वा भी दिया था। 20 फेर यीशु घरां आया; अर इसी भीड़ कठ्ठी होई, के यीशु अर उसके चेल्यां पै रोटी भी कोनी खाई गई। 21 जिन उसके कुण्बा आळा न्यू सुणया, तो वे उस ताहीं घरां ले जाण खात्तर लिक्के; क्यूँके वे कहवै थे, “के उसका दिमाग ठिकाणै कोनी सै?” 22 शास्त्री भी जो यरुशलेम नगर तै आये थे, वे कहवै थे, “उस म्ह शैतान सै,” अर न्यू भी के “वो ओपरी आत्मायाँ के सरदार शैतान की मदद तै ओपरी आत्मायाँ नै लिक्काइ सै।” 23 ज्यातै यीशु उननै धोरै बुलाके उदाहरणां म्ह कहण लागया, “शैतान क्यूँकर ओपरी आत्मायाँ नै काढ सकै सै?” 24 जै किसे राज्य म्ह फूट पड़े, तो वो राज्य किस तरियां टिक्या रह सकै सै? 25 अर जै किसे घर म्ह फूट पड़े, तो वो घर क्यूँकर डटया रह सकैगा? 26 इस करके जै शैतान खुद का ए बिरोधी होके अपणे म्ह फूट गेरै, तो वो किस तरियां बणया रहै सकै सै? उसका तो नाश हो जावै सै। 27 “पर कोए माणस किसे ठाड़े माणस के घर म्ह बड़के उसका माळ कोनी लूट सकदा, जिन तक के पैहलया उस ठाड़े माणस ताहीं ना जुड़ ले; जिन वो उसके घर नै लूट लेवैगा। 28 मै थमनै साच्ची-साच कहुँ सूँ के माणसां के सारे पाप अर बुराई जो वे करै सै, माफ करे जावेंगे, 29 पर जो कोए पवित्र आत्मा के बिरोध म्ह बुराई करै सै, वो कदे माफ कोनी करया जावैगा: बल्के वो अनन्त पाप का कसूरवार बण ज्यागा।” (aiōn g165, aiōnios g166) 30 क्यूँके वे न्यू कहवै थे के उस म्ह ओपरी आत्मा सै। 31 फेर यीशु की माँ अर उसके भाई आए, अर बाहरणै खड़े होके उस ताहीं बुलावा भेज्या। 32 भीड़ उसके लोवै-धोवै बेट्ठी थी, अर उननै उसतै कह्या, “देख, तेरी माँ अर तेरे भाई बाहरणै तन्नै टोहवै सै।” 33 यीशु नै उनतै जवाब दिया, “मेरी माँ अर मेरे भाई कौण सै?” 34 अर जो उसके लोवै-धोवै बेट्ठे थे, उनपै निगांह करके कह्या, “देख्खों, मेरी माँ अर मेरे भाई ये सै। 35 क्यूँके जो कोए परमेसवर की इच्छा पै चाल्लै, वोए मेरा भाई, मेरी बेब्ब, अर मेरी माँ सै।”

4 यीशु फेर गलील समुन्दर के किनारे उपदेश देण लागग्या: अर इसी बड्डी भीड़ उसके धोरै कठ्ठी होगी के वो समुन्दर म्ह एक किस्ती पै चढ़के बैठग्या, अर सारी भीड़ जमीन पै समुन्दर के किनारे खड़ी रही। 2 अर वो उननै उदाहरणां म्ह घणीए बात सिखाण लागया, अर

अपणे उपदेश म्ह उन ताहीं कह्या, 3 “सुणो! एक किसान बीज बोण लिक्कया। 4 बोंदे बखत कुछ राही के किनारे पड़े, अर पछियाँ नै आके उन ताहीं चुग लिया। 5 कुछ पथरीली धरती पै पड़े जड़ै उसनै घणी माट्टी ना मिली, अर ढुंधी माट्टी ना मिलण के कारण तोळाए उग्या, 6 अर जिन सूरज लिक्कया तो जळगे, अर जड़ ना पकड़ण के कारण सुखगे। 7 कुछ झाड़ियाँ म्ह पड़े, अर झाड़ियाँ नै आगै बढके उन ताहीं दाब दिया, अर वो फळ कोनी ल्याये। 8 पर कुछ आच्छी धरती पै पड़े, अर वो उग्या अर बढके फळ ल्याये; अर कोए तीस गुणा, कोए साठ गुणा अर कोए सौ गुणा फळ ल्याया।” 9 फेर उसनै कह्या, “जिसके कान हों, वो ध्यान तै सुण ले।” 10 जिन यीशु एकला रहया, तो उसके साथियाँ नै उन बारहां चेल्यां सुधा उसतै इन उदाहरणां के बारे म्ह बुझया। 11 उसनै उनतै कह्या, “थारे ताहीं तो परमेसवर के राज्य के भेद की समझ दे राख्खी सै, पर बाहर आळा खात्तर सारी बात उदाहरणां म्ह होवै सै।” 12 इस करके के “वे देखे होए देखै पर उननै दिखाई ना देवै अर सुणदे होए सुणै भी पर ना समझै; इसा ना हो के वे पाप करणा छोड़दे, अर वे माफ करे जावै।” 13 फेर यीशु नै उनतै कह्या, “के थम यो उदाहरण कोनी समझै? तो फेर और सारे उदाहरणां नै किस तरियां समझोगे? 14 किसान जो बीज बोण आळा सै वो वचन बोण आळे के समान सै। 15 राही के किनारे गिरे बीज उन माणसां की तरियां सै जो वचन सुणै सै, तो शैतान जिब्बे आके वचन नै जो उन म्ह बोया गया था, ठा ले जावै सै। 16 उससे तरियां-ए जो पथरीली धरती पै बीज गिरे सै, ये वे सै जो वचन सुणके जिब्बे खुश होके अपना लेवें सै। 17 पर उनके भीत्तर जड़ न्ही पकड़ण के कारण थोड़े-से दिनां के खात्तर रहै सै; इसके बाद जिन वचन के कारण उनपै क्लेश या संकट आवै सै, तो वे जिब्बे ठोक्कर खा जावै सै। 18 जो झाड़ियाँ म्ह बीज गिरे ये वे सै जिन नै वचन सुणया, 19 अर दुनिया की फिक्र, अर धन का धोक्खा, अर दुसरी चिज्जां का लालच म्ह पड़के वचन नै दाब देवै सै अर वो फळदा कोनी। (aiōn g165) 20 अर जो आच्छी धरती पै बीज गिरे, ये वे सै जो वचन सुणके अपना लेवें सै अर फळ ल्यावै सै, कोए तीस गुणा, कोए साठ गुणा अर कोए सौ गुणा।” 21 यीशु नै उनतै एक और उदाहरण दिया, “के दीवै नै इस खात्तर कोनी जळान्दे, के उसनै बरतन या खाट के तळै धर देवां? पर इस खात्तर के टांडी पै धरया जावै? 22 इसा कुछ भी न्ही जो लुक्या हो, अर खोल्या न्ही जावैगा अर ना कुछ गुप्त सै, जिसके बारे म्ह बेरा ना लागै। 23 जै किसे के कान हों, तो ध्यान तै सुण ले।” 24 फेर उसनै उनतै कह्या, “चौक्कस रहियो की के सुणो सो। जिस नाप तै थम नाप्यो सों उससे नाप तै थारे खात्तर भी नाप्या जावैगा। अर थारे ताहीं घणा दिया जावैगा। 25 क्यूँके जिसके धोरै सै, उस ताहीं दिया जावैगा, अर जिसके धोरै न्ही सै, उसतै वो भी जो उसके धोरै सै, ले लिया जावैगा।” 26 फेर यीशु नै उन ताहीं एक और उदाहरण दिया, “परमेसवर का राज्य इसा सै, जिसा कोए माणस धरती पै बीज छिडके सै, 27 अर रात नै सोग्या अर सबैरे जाग गया, अर वो बीज इसा उगै अर बधै सै के उसनै बेराए कोनी

लाग्या। 28 धरती खुद-बै-खुद फळ लावै सै, पैहल्या अंकुर, फेर बाल, अर फेर बाल म्ह त्यार दाणा। 29 पर जिब दाणा पक जावै सै, फेर वो जिब्वे दांती लावै सै, क्यूँके लामणी का बखत आण पोहचा सै।” 30 फेर यीशु नै उन ताहीं एक और उदाहरण दिया, “हम परमेसवर के राज्य की बराबरी किसतै करां अर किस उदाहरण तै उसका खुलास्सा करां? 31 वो राई के दाणे की ढाल सै: जिब धरती म्ह बोया जावै सै तो धरती के सारे बीज्जां तै छोटा होवै सै, 32 पर जिब बोया गया, तो जामके सारे सागपात तै बड़्हा हो जावै सै, अर उसकी इतनी बड्डी डाळी लिकड़ै सै के अकास के पंछी उसकी छाया तळै बसेरा कर सकै सै।” 33 यीशु उन ताहीं इस तरियां के घणे उदाहरण दे-देके उनकी समझके मुताबिक वचन सुणावै था, 34 अर इस तरियां की शिक्षा देण खातर वो उदाहरणां का ए इस्तमाल करया करदा; पर एकले म्ह वो अपने चेल्यां ताहीं सारी बात्तां का मतलब बतावै था। 35 उससे दिन जिब साँझ होई, तो यीशु नै चेल्यां तै कहा, “आओ, हम समुन्दर के परली ओड़ चाल्लां।” 36 अर वे भीड़ नै छोड़के जिसा वो था, उसाए उस ताहीं किस्ती पै गेल्या ले चाल्ले; अर उसके गेल्या और भी किस्ती थी। 37 फेर बड़ीए आँधी आई, अर पाणी की झाल किस्ती के उरै ताहीं लागगी के वा पाणी तै भरण नै होगी। 38 पर यीशु पाच्छले हिस्से म्ह गद्दी लगाई सोण लाग रह्या था। फेर उननै उस ताहीं जगाके उसतै कहा, “हे गुरु, के तन्नै चिन्ता कोनी के हम डूबके मरण आळे सां?” 39 फेर उसनै उठके आँधी ताहीं धमकाया, अर पाणी की झाल तै कहा, “शांत रहै, थम ज्या।” अर आँधी थमगी अर पूरी तरियां शान्ति छागी। 40 उसनै उनतै कहा, “थम क्यूँ डरो सों? के थमनै इब ताहीं बिश्वास कोनी?” 41 वे घणे डरगे, अर आप्पस म्ह बोल्ले, “यो कौण सै के आँधी अर पाणी की झाल भी उसका हुकम मान्नै सै?”

5 यीशु अर उसके चेल्लें गलील समुन्दर के परली ओड़ गिरासेनियों के परदेस म्ह पोहचे, 2 जिब यीशु किस्ती पै तै उतरया तो जिब्वे एक माणस जिसम्ह ओपरी आत्मा थी, कब्रिस्तान म्ह तै लिकड़के उसतै मिल्या। 3 वो कब्रिस्तान म्ह रह्या करै था अर कोए उस ताहीं बेल्लां तै भी कोनी जुड़ सकै था, 4 क्यूँके वो घणीए बर बेड़ियाँ अर बेल्लां तै जुड्यां गया था, पर उसनै बेल्लां ताहीं तोड़ दिया था अर बेड़ियाँ के टुकड़े-टुकड़े कर दिवै थे, अर कोए उस ताहीं बस म्ह कोनी कर सकै था। 5 वो सारीहाण रात-दिन कब्रिस्तानां अर पहाड़ां म्ह किल्की मारदा अर खुद नै पत्थरां तै जख्मी करै था। 6 वो यीशु नै दूर तै ए देखके भाजके आया, उसके पायां म्ह पड़के घुटने टेक दिए, 7 अर जोर तै किल्की मारके कहा, “हे यीशु, परमप्रधान परमेसवर के बेटे, मन्नै तेरे तै के काम? मै तन्नै परमेसवर की कसम दियुँ सूँ के मन्नै काल ना करै।” 8 क्यूँके उसनै उसतै कहा था, “हे ओपरी आत्मा, इस माणस म्ह तै लिकड़ आ।” 9 यीशु नै उसतै बुड़झया, “तेरा के नाम सै?” उसनै उस ताहीं कहा, “मेरा नाम सेना सै, क्यूँके हम घणे सां।” 10 अर उसनै यीशु तै घणी बिनती करी, “के हमनै इस परदेस तै बाहरणै ना खन्दावै।”

11 उड़ै पहाड़ पै सूअरां का एक बड़्हा टोळ चरै था। 12 ओपरी आत्मायाँ नै यीशु तै बिनती करके कहा, “हमनै उन सूअरां म्ह भेजदे के हम उनके भीत्तर समा जावां।” 13 यीशु नै उन ताहीं हुकम दिया अर ओपरी आत्मा लिकड़के सूअरां के भीत्तर समागी अर टोळ, जो कोए दो हजार का था, ढळान पै तै झपटके गलील समुन्दर म्ह पड़के डूब मरया। 14 उनके पाळीयाँ नै जो डरे होए थे, भाजके कस्बे अर गाम्मां म्ह खबर सुणाई, अर जो होया था, माणस उस ताहीं देखखण आए। 15 अर यीशु के धोरै आके वे उस ताहीं जिसम्ह ओपरी आत्मा थी, यानिके जिस म्ह सेना बड़री थी, लत्ते पहरै अर सोध्दी म्ह बेट्टे देख्या। 16 अर देखखण आळा नै उसका, जिसम्ह ओपरी आत्मा थी, अर सूअरां का पूरा किस्सा उन ताहीं कह सुणाया। 17 फेर वे उसतै बिनती करके कहण लागगे के म्हारी सीमा तै लिकड़ज्या। 18 जिब यीशु किस्ती पै चढ़ण लाग्या, तो वो जिस म्ह पैहल्या ओपरी आत्मा थी, उसतै बिनती करण लाग्या, के “मन्नै अपने गेल्या रहण दे।” 19 पर यीशु नै उस ताहीं मंजूरी कोनी देई, अर उसतै बोल्या, “अपणे घरां जाके अपणे माणसां नै बता, के तेरे पै दया करके प्रभु नै तेरे खातर किसे बड़े-बड़े काम करे सै।” 20 वो जाके दिकापुलिस नगर म्ह इस बात का प्रचार करण लाग्या, के यीशु नै मैरे खातर किस ढाल के बड़े काम करे; अर जिसनै भी यो सुणया वे सारे अचम्भा करण लागगे। 21 जिब यीशु किस्ती तै दुसरे किनारे पै गया, तो एक बड्डी भीड़ उसके धोरै कठी होगी; वो गलील समुन्दर का किनारा था। 22 आराधनालयों के सरदारां म्ह तै एक याईर नाम का आदमी आया, अर उसनै देखके उसके पायां के म्ह पड़ग्या, 23 अर न्यू कहके उस ताहीं बिनती करी, “मेरी छोटी छोरी मरण नै होरी सै: तू आके उसपै हाथ धरदे, तो वा ठीक होके जिन्दा हो जावै।” 24 फेर वो उसके गेल्या चाल्या; अर बड्डी भीड़ उसके पाच्छे हो ली, याड़े ताहीं के माणस उसपै पड़ण लागरे थे। 25 एक बिरबान्नी थी, जिसके बारहा साल तै लहू बहण की बीमारी थी। 26 उसनै घणे डाक्टरां तै ईलाज करवा के भी बड़ा दुख ठाया, अर उसनै अपना सारा रपियाँ खर्च के भी कोए फायदा कोनी होया, पर उसकी बीमारी और भी घणी बढ़गी थी। 27 वा बिरबान्नी यो सुणके, यीशु माणसां नै ठीक करै सै भीड़ म्ह उसके पाच्छे तै आई अर उसके लत्ते ताहीं छू लिया, 28 अर वा भी कहवै थी, “जै मै उसके लत्ते नै छू ल्युँगी, तो ठीक हो जाऊँगी।” 29 अर जिब्वे उसका लहू बहणा बन्द हो गया, अर उसनै अपने देह म्ह बेरा लागग्या के मै उस बीमारी तै चंगी होगी सूँ। 30 यीशु नै जिब्वे खुद तै बेरा पाटग्या के मैरे म्ह तै सामर्थ लिकड़ी सै, अर भीड़ के पाच्छे फिरके बुड़झया, “मेरे लत्ते किसनै छुए?” 31 उसके चेल्यां नै उसतै कहा, “तू देख्वे सै के भीड़ तेरपै गिरण-पड़ण लागरी सै, अर तू पूच्छे सै के किसनै मैरे ताहीं छुया?” 32 फेर उसनै उस ताहीं देखखण खातर जिसनै यो काम करया था, चोगरदेनै निगांभ घुमाई। 33 फेर वा बिरबान्नी न्यू जाणके के मेरी किसी भलाई होई सै, डरगी अर काम्बदी होई आई, अर उसके पायां म्ह पड़के उस ताहीं सारा हाल सच-सच कह दिया। 34 यीशु नै उसतै कहा, “बेटी, तेरे

बिश्वास नै तेरे ताहीं ठीक करया सै, खुशी-खुशी जा, अर अपणी इस बीमारी तै ठीक रह।” 35 यीशु न्यु कहवै था के आराधनालय के सरदार याईर के घर तै माणसां नै आकै कह्या, “तेरी छोरी तो मर ली सै, इब गुरु नै क्यांतै काल करै सै?” 36 जो बात वे कहरे थे, उस ताहीं यीशु नै बेगौरी करकै, आराधनालय के सरदार तै कह्या, “मतना डरै, सिर्फ बिश्वास राखा।” 37 अर उसनै पतरस अर याकूब अर उसके भाई यूहन्ना नै छोड़, किसे दुसरे ताहीं अपणे गेल्या आण ना दिया। 38 आराधनालय के सरदार के घर म्ह पोहचकै, उसनै माणसां ताहीं घणे रोन्दे अर किल्की मारदे देख्या। 39 फेर उसनै भीत्तर जाकै उनतै कह्या, “थम क्यांतै रोळा मचाओ अर रोओ सो, छोरी मरी कोनी, पर सोवै सै।” 40 वे उसका मजाक उड़ाण लाग्गे, पर उसनै सारया ताहीं बाहर लिकाड़कै छोरी के माँ-बाप अर अपणे चेल्यां कैं गेल्या भीत्तर गया, जित्त छोरी पड़ी थी। 41 अर छोरी का हाथ पकड़कै उसतै कह्या, “तलिता कूमी!” जिसका मतलब सै, “हे छोरी, मै तेरे तै कहूँ सूँ, उठ।” 42 अर वा छोरी जो बारहा साल की थी, जिब्बे उठकै चाल्लण-फिरण लाग्गी; अर इसपै माणस घणे हैरान होगे। 43 फेर उसनै उन ताहीं चेतावनी देकै हुकम दिया के इस बात का किसे नै भी बेरा ना पाटण दियो अर कह्या, “इसनै कुछ खाण नै द्यो।”

6 कफरनहूम नगर तै लिकड़कै यीशु अपणे नासरत नगर म्ह आया, अर उसके चेल्लें भी उसके पाच्छै गए। 2 आराम के दिन वो आराधनालय म्ह उपदेश देण लाग्गया, अर घणखरे माणसां नै सुणकै अचम्भा करया अर कहण लाग्गे, “इसनै इतनी बात कड़े तै आगी?” यो कौण सा ज्ञान सै जो उस ताहीं दिया होया सै? किस ढाळ के सामर्थ के काम उसके हाथ्यां तै दिक्खै सै? 3 के यो वोए खात्ती कोनी, जो मरियम का छोरा, अर याकूब, योसेस, यहूदा, अर शमौन का भाई सै? के उसकी सारी बेब्बे याड़े म्हारै बिचाळै कोनी रहन्दी? इस करकै उननै उसका बिश्वास कोनी करा। 4 यीशु नै उनतै कह्या, “नबी का अपणे गाम, अपणे कुणबे, अर अपणे घर नै छोड़कै और किते भी निरादर कोनी होन्दा।” 5 वो उड़ै कोए चमत्कार के काम नही कर सक्या, सिर्फ थोड़े-से बिमारां पै हाथ धरकै उन ताहीं ठीक करया। 6 अर यीशु नै उनकै अबिश्वास पै हैरानी होई अर चौगरदे के गाम्मां म्ह उपदेश सुणान्दा हांडया। 7 यीशु नै बारहां चेल्यां ताहीं अपणे धोरै बुलाया अर उननै ओपरी आत्मायाँ पै हक दिया अर उननै दो-दो करकै भेजण लाग्गया; । 8 उसनै चेल्यां ताहीं हुकम दिया, “रास्ते खात्तर लाठी नै छोड़ और कुछ ना लियो, ना तो रोटी, ना झोळी, ना बटुए म्ह पईसे, 9 जूत्ते तो पैहरियो पर पैहरण खात्तर दो कुड़ते ना लियो।” 10 अर यीशु नै चेल्यां ताहीं कह्या, “जित्त किते थम जिस घर म्ह जाओ, तो जिब ताहीं उड़ै तै बिदा ना होइयो तब तक उस्से घर म्ह ठहरे रहो। 11 जिस जगहां के माणस थमनै नही अपणावै अर थारी नही सुणै, उड़ै तै चाल्दे-ए अपणे ताल्वां की धूळ झाड़ दियो के या उनकै बिरुद्ध गवाही होवै।” 12 फेर चेल्यां नै जाके प्रचार करया के पाप

करण छोड़ द्यो, 13 अर घणीए ओपरी आत्मा ताहीं काढ्या, अर घणे बिमारां पै तेल मळ के उन ताहीं ठीक करया। 14 राजा हेरोदेस नै भी यीशु का जिक्र सुणया, क्यूँके उसका नाम फैलया था, अर उसनै कह्या, के “यूहन्ना बपतिस्मा देण आळा मरया होया म्ह तै जिन्दा होया सै, इस्से करकै उसतै ये सामर्थ के काम होवै सै।” 15 दुसरे माणसां नै कह्या, “यो एलिव्याह सै।” पर कुछ दुसरयां नै कह्या, “वो एक नबी सै पुराणे नबियाँ म्ह तै किसे कैं बरगा।” 16 हेरोदेस नै न्यु सुणकै कह्या, “जिस यूहन्ना का सिर मन्ने कटवाया था, वोए जिन्दा होया सै।” 17 हेरोदेस नै अपणे भाई फिलिप्पुस की घरआळी हेरोदियास के कारण, जिसतै उसनै ब्याह कर लिया था, माणसां ताहीं भेजकै यूहन्ना ताहीं पकड़वाकै जेळ म्ह गेर दिया था। 18 क्यूँके यूहन्ना नै हेरोदेस तै कह्या था, “अपणे भाई की घरआळी ताहीं राखणा मूसा के नियम-कायदा के मुताबिक तेरे खात्तर ठीक कोनी।” 19 इस करकै हेरोदियास यूहन्ना तै बैर राख्या करै थी अर वा चाहवै थी के उसनै मरवा देवै, पर इसा हो नही सक्या, 20 क्यूँके हेरोदेस यूहन्ना नै धर्मी अर पवित्र माणस जाणकै उसतै डरै था, अर उसका बचाव करै था, अर उसकी बात सुणकै घणा घबरावै था, फेर भी उसकी बात्तां नै आनन्द तै सुणै था। 21 आखिरकार एक इसा मौक्का आया, जिब हेरोदेस नै अपणे जन्म दिन पै अपणे प्रधानां, सेनापतियाँ, अर गलील कैं बड़े माणसां कैं खात्तर जीमणा करया। 22 तो हेरोदियास की बेटी भीत्तर आई, अर नाचकै हेरोदेस ताहीं अर उसके गेल्या बैठण आळा ताहीं राज्जी करया। फेर राजा नै छोरी तै कह्या, “तू जो चाहवै मेरै तै माँग ले, मै तन्नै वोए दिऊंगा।” 23 हेरोदेस नै कसम खाई, “मै अपणा आध्धा राज्य तक जो कुछ तू मेरै तै माँगी मै तन्नै दिऊंगा।” 24 उसनै बाहरणै जाकै अपणी माँ तै बुझया, “मै के माँगू?” वा बोल्ली, “यूहन्ना बपतिस्मा देण आळे का सिर।” 25 वा जिब्बे राजा धोरै भीत्तर आई अर उसतै बिनती करी, “मै चाहूँ सूँ के तू इब्बे यूहन्ना बपतिस्मा देण आळे का सिर एक थाळ म्ह मन्ने मँगवा दे।” 26 फेर राजा घणा दुखी होया, पर अपणी कसम के कारण अर गेल्या बैठण आळा के कारण उस ताहीं टाळणा कोनी चाह्या। 27 आखर म्ह राजा नै जिब्बे एक सिपाही ताहीं हुकम देकै भेज्या के उसका सिर काट ल्यावै। 28 उसनै जेळखान्ने म्ह जाकै उसका सिर काट्या, अर एक थाळ म्ह धरकै ल्याया अर छोरी ताहीं दिया, अर छोरी नै अपणी माँ तै दिया। 29 न्यु सुणकै यूहन्ना के चेल्लें आए, अर उसकी लाश नै लेगे अर कब्र म्ह धर दी। 30 चेल्लें बोहड़कै यीशु के धोरै आये, जो कुछ उननै करया अर सिखाया था, सब कुछ उस ताहीं बता दिया। 31 यीशु नै चेल्यां तै कह्या, “आओ हम किसे एकान्त जगहां म्ह चालकै माड़ा आराम करां।” क्यूँके घणे माणस आवै-जावै थे, अर उननै खाण का मौक्का भी कोनी मिलै था। 32 ज्यांतै वे किस्ती पै चढ़कै सुनसान जगहां म्ह न्यारे चले गए। 33 घणा नै यीशु अर उसके चेल्यां ताहीं जान्दे देखकै पिछाण लिया, अर सारे नगरां तै कट्टे होकै उड़ै पांए-पाँ भाज लिए अर उनतै पैहल्या जा पोहचे। 34 उसनै उतरकै बड़ी भीड़ देख्खी, अर उनपै तरस

खाया, क्योंकि वे उन भेड्या की तरियां थे, जिनका कोए रुखाळा ना हो; अर वो उननै घणीए बात सिखाण लागग्या। 35 ज़िब दिन घणा ढळग्या, तो उसके चेल्लें उसके धोरै आके कहण लागगे, “या सुनसान जगहां सै, अर दिन घणा ढळग्या सै। 36 उननै बिदा करके चौगरदेकै गाम्मां अर बस्तियाँ म्ह जाके, अपणे खाण खात्तर कुछ मोल लियावै।” 37 यीशु नै जवाब दिया, “थमे उननै खाण नै द्यो।” चेल्यां नै उस ताहीं कह्या, “के हम दो सौ दीनार (200 दिन की मजदूरी) की रोटी मोल ल्यावां, अर उननै खुआवां?” 38 यीशु नै उन ताहीं कह्या, “जाके देखो थारे धोरै कितनी रोटी सै?” उननै कह्या, “पाँच रोटी अर दो मच्छी भी।” 39 फेर यीशु नै उन ताहीं हुकम दिया के सारया नै हरी घास पे टोळ म्ह बिठा द्यो। 40 वे सौ-सौ अर पचास-पचास करके टोळ म्ह बैठगें। 41 यीशु नै उन पाँच रोटी अर दो मच्छियाँ ताहीं लिया, अर सुर्ग कै कान्ही लखाकै परमेसवर का धन्यवाद करया, अर रोटी तोड़-तोड़कै चेल्यां ताहीं देन्दा गया के वे माणसां ताहीं बाँडे, अर वे दो मच्छियाँ भी उन सारया म्ह बांड दी। 42 सारे खाकै धापगे, 43 अर उननै टुकड्या अर मच्छियाँ तै भरी होई बारहा टोकरियाँ ठाई। 44 जिन नै रोटी खाई, वे पाँच हजार आदमी थे। 45 फेर यीशु नै जिब्बे अपणे चेल्यां ताहीं किस्ती पै चढ़ण कै खात्तर मजबूर करया, ताके वे उसतै पैहल्या उस पार बैतसैदा नगर म्ह चले जावै, ज़िब तक के वो माणसां ताहीं बिदा करै। 46 चेल्यां नै बिदा करके यीशु पहाड़ पै प्रार्थना करण खात्तर गया। 47 ज़िब साँझ होई, तो किस्ती समुन्दर कै बिचाळै थी, अर यीशु एकला किनारे पै था। 48 ज़िब उसनै देख्या के वे किस्ती चलाणा म्ह घणी मेहनत करण लागरे सै, क्योंकि हवा उनके स्याम्ही की थी, तो सबेरै तीन बजे कै लोवे-धोवै यीशु समुन्दर पै चाल्दे होए उनके धोरै आया; अर उनतै आगै लिकड़ जाणा चाहवै था। 49 पर चेल्यां नै उस ताहीं समुन्दर पै चाल्दे देखके समझया के भूत सै, अर किल्की मारण लागगे; 50 क्योंकि सारे उसनै देखके घबरामे थे। पर उसनै जिब्बे उनतै बात करी अर कह्या, “होसला राकखो, मै सूं; डरो मतना!” 51 फेर वो उनके धोरै किस्ती पै आया, अर हवा थमगी: अर वे घणा अचम्भा करण लागगे। 52 चेल्लें उस रोटी की घटना के बारे म्ह कोनी समझै थे, क्योंकि उनके दिल कठोर होरे थे। 53 वे गलील समुन्दर पार करके गन्नेसरत परदेस म्ह पोहचे, अर किस्ती घाट पै लाई। 54 ज़िब यीशु किस्ती पै तै उतरया तो माणसां नै उस ताहीं पिच्छाण लिया, 55 लोवै-धोवै कै सारे नगर म्ह भाज्जे-भाज्जे, अर बिमारां नै खाट्ठां पै लादकै, जित्त-जित्त खबर मिली के यीशु ओढ़ै सै, उड़ै-उड़ै लिए हान्डे। 56 अर जित्त किते भी वो गाम्मां, नगरां, या बस्तियाँ म्ह जावै था, माणस बिमारां नै बजारां म्ह धरके उसतै बिनती करे थे के वो उननै अपणे लत्ते कै पल्ले तै ए छू लेण दे: अर जितने उसनै छुवै थे, सारे ठीक हो जावै थे।

7 एक दिन कुछ फरीसी अर शास्त्री जो यरुशलेम नगर तै आए थे, यीशु कै धोरै कठ्ठे होए, 2 अर उननै उसके कुछ चेल्यां ताहीं बिना सुच्चे होए यानिके बिना हाथ धोए रोटी खांदे देख्या। 3 क्योंकि फरीसी अर सारे यहूदी, बड़े बुजुर्गा के रीति-रिवाजां पै चाल्लै सै अर ज़िब ताहीं

ठीक ढाळ हाथ न्ही धो लेंदे जद ताहीं कोनी खान्दे। 4 अर बजार तै आकै, ज़िब तक के अपणे हाथ न्ही धो लेते, जद ताहीं रोटी कोनी खान्दे; और घणीए बात सै, जो उनके रीति-रिवाजां का हिस्सा सै, जिस तरियां कटोरे, अर लोट्टे, अर ताम्बे के बरतनां ताहीं धोणा मान्जणा। 5 इस करके उन फरीसियाँ अर शास्त्रियाँ नै यीशु तै बुझ्झया, “तेरे चेल्लें क्यातै बड़े बुजुर्गा के रीति-रिवाजां पै कोनी चाल्दे, अर बिना हाथ धोए रोटी खावै सै?” 6 यीशु नै फरीसियाँ अर शास्त्रियाँ ताहीं कह्या, “यशायाह नबी नै थम कपटियाँ के बारे म्ह घणी ठीक भविष्यवाणी करी; जिसा लिख्या सै: ‘ये माणस होठ्ठां तै तो मेरा आदर करै सै पर उनका मन मेरै तै दूर रहवै सै। 7 वे खामखां मेरी पूजा करै सै, क्योंकि माणसां के हुकमां नै धर्म का उपदेश करके सिखावै सै।’” 8 “क्योंके थम परमेसवर कै हुकम नै टाळके माणसां के रिवाजां ताहीं मान्ने सो।” 9 उसनै उन ताहीं कह्या, “थम अपणे रिवाजां नै मानण कै खात्तर परमेसवर का हुकम कितनी बढ़िया ढाळ टाळ द्यो सो। 10 क्योंकि मूसा नबी नै कह्या सै, ‘अपणे माँ-बाप की इज्जत कर’ अर ‘जो कोए अपणे माँ-बाप नै भुंडा बोल्लै, वो जरूर मारया जावै।’ 11 पर थम कहो सो के जै कोए अपणे माँ-बाप तै कहवै, ‘जो कुछ मननै थारे ताहीं अपणी सम्पत्ति म्ह तै देणा था, वो मननै परमेसवर ताहीं अर्पण कर दिया।’ 12 तो थम उननै उसके माँ बाप की कुछ भी सेवा करण न्ही देन्दे। 13 इस तरियां थम अपणी रीत-रिवाजां तै, जिन ताहीं थमनै ठहराया सै, परमेसवर का वचन टाळ द्यो सो; अर इसे-इसे घणखरे काम करो सो।” 14 फेर यीशु नै माणसां ताहीं अपणे धोरै बुलाके कह्या, “थम सारे मेरी सुणो, अर समझो। 15 इसी कोए चीज कोनी जो माणस म्ह बाहर तै बड़के उस ताहीं अशुद्ध करै; पर जो चीज माणस कै भीत्तर तै लिकड़ै सै, वैए उस ताहीं अशुद्ध करै सै। 16 (जै किसे के कान हो तो वो ध्यान तै सुण ले।)” 17 ज़िब यीशु भीड़ नै छोड़के घरां आया, तो उसके चेल्यां नै इस उदाहरण कै बारे म्ह उसतै बुझ्झया। 18 यीशु नै उनतै कह्या, “के थम भी इसे नासमझ सो? के थमनै न्ही बेरा के जो चीज बाहर तै माणस कै भीत्तर जावै सै वा उसनै अशुद्ध कोनी कर सकदी? 19 क्योंकि वा उसके मन म्ह न्ही, पर पेट म्ह जावै सै, अर संडास म्ह लिकड़ जावै सै?” न्यू कहके उसनै सारी खाणे की चिज्जां ताहीं शुद्ध ठहराया। 20 फेर उसनै कह्या, “जो माणस म्ह तै लिकड़ै सै, वोए माणस नै अशुद्ध करै सै। 21 क्योंकि भीत्तर तै, यानिके माणस के मन तै, भुन्डे-भुन्डे ख्याल, जारी, चोरी, हत्या, बिगान्नी बिरबान्नी कै धोरै जाणा, 22 लोभ, दुष्टता, छळ, लुचपण, जलन, बुराई, घमण्ड, अर बेअक्ली लिकड़ै सै। 23 ये सारी भुंडी बात भीत्तर तै ए लिकड़ै सै अर माणस नै अशुद्ध करै सै।” 24 फेर यीशु ओढ़ै तै उठके सूर अर सैदा के परदेस म्ह आया; जित्त एक घर म्ह गया अर वो चाहवै था ताके किसे नै उनके बारे म्ह बेरा न्ही लाग्गै, पर वो लुत्क न्ही सक्या। 25 अर जिब्बे एक बिरबान्नी जिसकी छोटी छोरी म्ह ओपरी आत्मा थी, उसका जिक्र सुणके आई, अर उसके पायां म्ह पड़गी। 26 वा सुरुफिनिकी परदेस के यूनानी जात की थी। बिरबान्नी नै उसतै बिनती

करी के मेरी छोरी म्ह तै ओपरी आत्मा लिकाड दे। 27 उसनै उसतै कह्या, “पैहल्या मेरे बच्चें जो यहूदी सै उननै खा लेण दे, क्यूँके बाळकां की रोटी लेके कुत्तों के आगै गेरणा ठीक कोनी।” (यहूदी दुसरी जात के माणसां नै कुत्तों के समान समझै थे) 28 उसनै उस ताहीं जवाब दिया, “साच्ची सै प्रभु; पर कुत्ते भी तो मेज के तळे बाळकां की रोटी के टुकड़े खा लेवें सै।” 29 यीशु नै उसतै कह्या, “तेरी बात सुणके तेरे बिश्वास का बेरा पाट्टे सै इस कारण चली जा; ओपरी आत्मा तेरी छोरी म्ह तै लिकड़ग्यी सै।” 30 उसनै अपने घरां आके देख्या के छोरी खाट पै पड़ी सै, अर ओपरी आत्मा लिकड़ग्यी सै। 31 फेर यीशु सूर अर सैदा के परदेसां तै लिकड़के दिकापुलिस नगर तै होंदा होइ गलील समुन्दर पै पोंहच्या। 32 तो आदमियाँ नै एक बैहरे ताहीं जो हाकळा भी था, उसके धोरे आके उसतै बिनती करी के अपणा हाथ उसपै धरै। 33 फेर यीशु उसनै भीड़ तै न्यारा लेग्या, अपणी आन्हाळी उसके कान्ना म्ह घाल्ली, अर अपणी आन्हाळी पै थूकके उसकी जीभ ताहीं छुया; 34 अर सुर्ग कान्ही देखके आह भरी, अर उसतै कह्या, “इप्फतह!” यानिके “खुल ज्या!” 35 वो सही तरियां सुणण, अर वो सुथरी-ढाळ बोल्लण लाग्या। 36 फेर उसनै उन ताहीं चिताया कह्या के किसे तै ना कहियो; पर जितना यीशु नै उन ताहीं बताया उतनाए वे और प्रचार करण लागगे। 37 वे घणे हैरान होके कहण लागगे, “उसनै जो कुछ करया सारा ठीक करया सै; वो बैहरया नै सुणण की, गूँगा नै बोल्लण की ताकत देवै सै।”

8 एक दिन जिब भीड़ कठी होई, अर उनकै धोरे इब कुछ खाण नै कोनी बचा था, तो यीशु नै अपने चेल्यां ताहीं धोरे बुलाके उनतै कह्या, 2 “मन्नै इस भीड़ पै तरस आवे सै, क्यूँके ये तीन दिनां तै बराबर मेरे गेल्या सै, अर इब उनके धोरे कुछ खाण नै भी कोनी बचा। 3 जै मै उननै भूख्खा घरां भेज द्यु, तो राह म्ह थक हाक के बेहोस हो ज्यांगें; क्यूँके इन म्ह तै कई लोग दूर तै आरे सै।” 4 उसके चेल्यां नै जवाब दिया, “उरै जंगल-बियाबान म्ह इतनी रोटी कोए कित तै ल्यावै के वे छिक्क ज्या?” 5 यीशु नै उनतै बुझ्झया, “थारे धोरे कितनी रोटी सै?” उननै कह्या, “सात।” 6 फेर उसनै माणसां ताहीं धरती पै बैठण का हुकम दिया, अर वे सात रोटी ली अर परमेसवर का धन्यवाद करके तोड़ी, अर अपने चेल्यां नै देन्दा गया, अर उननै वे रोटी माणसां के आगै परोस दी। 7 उनके धोरे माडी-सी छोटी मच्छियाँ भी थी; उसनै परमेसवर का धन्यवाद करके उन ताहीं माणसां के आगै धरण का हुकम दिया। 8 वे खाके छिक्के अर चेल्यां नै बचे होइ टुकड्या के सात टोकरे भरके ठाप। 9 अर सारे लोग चार हजार के करीबन थे; फेर यीशु नै उन ताहीं भेज दिया, 10 अर वो जिब्बे अपने चेल्यां के गेल्या किस्ती म्ह चढ़के दलमनूता परदेस नै चल्या गया। 11 जब फरीसियाँ नै देख्या के यीशु दलमनूता परदेस म्ह आ गया तो वे उसतै बहस करण लागगे, अर यो परखण खात्तर के परमेसवर नै यीशु ताहीं भेज्या सै, उसतै कोए सुर्गीय चिन्ह-चमत्कार की माँग करी। 12 यीशु नै अपणी आत्मा म्ह आह भरके कह्या, “इस बखत के माणस क्यातै चिन्ह-चमत्कार तोहँ सै? मै थमनै साच्ची-साच कहुँ सँ,

के इस बखत के माणसां नै कोए चिन्ह-चमत्कार कोनी दिया जावेगा।” 13 अर वो उननै छोड़के फेर किस्ती पै चढ़ग्या अर गलील समुन्दर के परली ओइ चल्या गया। 14 चेल्लें रोटी लेणा भूलगे थे, पर किस्ती म्ह उनके धोरे सिर्फ एक-ए रोटी थी। 15 यीशु नै उनकी कपट रूपी शिक्षा के बारे म्ह चिताया, “लखाओ, फरीसियाँ अर हेरोदेस के खमीर तै चौकन्ने रहो।” 16 वे आप्पस म्ह विचार करके कहण लागगे, “म्हारै धोरे तो रोटी सै कोनी।” 17 न्यू जाणके यीशु नै उनतै कह्या, “थम क्यातै आप्पस म्ह यो विचार कररे सो के म्हारै धोरे रोटी कोनी? के इब ताहीं थम न्ही जाणे अर न्ही समझै? के थारा मन कठोर होग्या सै? 18 के आँख होते होए भी कोनी देखदे, अर कान होते होए भी कोनी सुणदे? के थारे याद कोनी। 19 के जिब मन्नै पाँच हजार माणसां के खात्तर पाँच रोटी तोड़ी थी तो थमनै बचे होइ टुकड्या के कितने टोकरे भरके ठाप थे, उननै उसतै कह्या, बारहा टोकरे।” 20 “अर जिब चार हजार माणसां के खात्तर सात रोटी थी तो थमनै बचे होइ टुकड्या के कितने टोकरे भरके ठाप थे?” उननै उसतै कह्या, “सात टोकरे।” 21 उसनै उनतै कह्या, “के थम इब ताहीं न्ही समझदे?” 22 यीशु अर उसके चेल्लें बैतसैदा कस्बे म्ह आए; अर आदमी एक आन्धे नै उसके धोरे लियाये अर उसतै बिनती करी के उसनै छुवै। 23 वो उस आन्धे का हाथ पकड़के गाम तै बाहरणै लेग्या, अर अपणी आंगळी पै थूकके उसकी आँखां पै हाथ धरते होए उसतै बुझ्झया, “के तू कुछ देखखै सै?” 24 उसनै निगाह ठाके कह्या, “मै माणसां नै देखखूँ सँ; वे मन्नै चाल्दे होए दरखां की ढाळ दिखखै सै।” 25 फेर उसनै दुबारा उसकी आँखां पै हाथ धरे, अर आन्धे नै ध्यान तै देख्या। वो ठीक होग्या, अर सारा कुछ सुथरी-ढाळ देखखण लाग्या। 26 उसनै उस ताहीं न्यू कहके घरां भेज्या, “इस गाम म्ह भी ना जाईये।” 27 यीशु अर उसके चेल्लें कैसरिया फिलिप्पी परदेस के गाम्मां म्ह चले गये। राह म्ह उसनै अपने चेल्यां तै बुझ्झया, “माणस मन्नै के कहवै सै?” 28 उननै जवाब दिया, “यूहन्ना बपतिस्मा देण आळा, पर कोए एलियाह अर कोए-कोए तो उसनै पुराणे नबियाँ म्ह तै एक सै भी कहवै सै।” 29 उसनै उनतै बुझ्झया, “पर थम मन्नै के कहो सो?” पतरस नै जवाब दिया, “तू मसीह सै।” 30 फेर उसनै उन ताहीं समझाके कह्या के मेरे बारे म्ह यो किसे तै ना कहियो। 31 फेर यीशु चेल्यां नै सिखाण लाग्या के माणस के बेट्टे (उसनै अपने बारे म्ह कह्या था) खात्तर जरूरी सै के वो घणा दुख ठावै, यहूदी अगुवें, प्रधान याजकां, अर शास्त्री उसनै तुच्छ समझके मार देवें, अर वो तीसरे दिन म्ह जिन्दा हो जावेगा। 32 उसनै या बात उनतै साफ-साफ कह दी। इसपै पतरस उसनै न्यारा ले जाके झिड़कण लाग्या, क्यूँके उसनै सोच्या के मसीह मर न्ही सकदा। 33 पर यीशु नै पलटके अपने चेल्यां कान्ही देख्या, अर पतरस तै झिड़कके कह्या, “हे शैतान, मेरे स्याम्ही तै दूर हो; क्यूँके तू परमेसवर की बात्तां पै न्ही, पर माणसां की बात्तां पै मन लगावै सै।” 34 यीशु नै भीड़ ताहीं अपने चेल्यां सुधा बुलाके कह्या, “जो कोए मेरा चेल्ला बणणा चाहवै, वो अपणी ए इच्छा पूरी ना करै बल्के अपने दुखां का

कूस ठाकै, मेरै पाछे हो लेवै। 35 क्यूँके जो कोए अपणी जान बचाणा चाहवै वो अनन्त काल खात्तर गवावैगा, पर जो कोए मेरै अर सुसमाचार खात्तर अपणी जान गवावैगा, वो उसनै अनन्त काल खात्तर बचावैगा। 36 जै माणस सारी दुनिया की चिज्जां नै पा लेवै अर फेर भी अनन्त जीवन नै न्ही पा सकै, तो उसतै के फैयदा होगा? 37 कोए भी माणस अनन्त जीवन की तुलना दुनिया की किसी भी चीज तै न्ही कर सकता? 38 जो कोए इस जार अर पापी युग के बिचाळै मेरै तै अर मेरे वचन तै इन्कार करैगा, तो मै माणस का बेट्टा भी जिब पवित्र सुगंदूतां के गेल्या अपणे पिता की महिमा सुधा आऊँगा, तो मै भी उसतै इन्कार करूँगा।”

9 यीशु नै उनतै कह्या, “मै थारे तै साच्ची कहूँ सूँ के जो उरै खड़े सै, उन म्ह तै कइँ इसे माणस सै, के जिब ताहीं परमेसवर के राज्य नै सामर्थ सुधा आन्दा होया न्ही देख लेवैंगे, जद तक न्ही मरैंगे।” 2 छः दिनां पाछे यीशु नै पतरस अर याकूब अर यूहन्ना ताहीं गेल्या लिया, अर एकान्त म्ह किसे ऊँचे पहाड़ पै लेग्या। ओड़ै उनके स्याम्ही उसका रूप बदल ग्या, 3 अर उसके लत्ते इसे चमकण लाग्गे उरै ताहीं जमा धोळाधप होया, के धरती पै कोए धोब्बी भी उसा धोळा न्ही लिकाड़ सकदा। 4 अर उननै मूसा नबी के गेल्या एलिय्याह नबी दिख्या, वे यीशु के गेल्या बात करै थै। 5 इसपै पतरस नै यीशु तै कह्या, “हे गुरु, म्हारा उरै रहणा ठीक सै: इस करके हम तीन मण्डप बनावा; एक तेरे खात्तर, एक मूसा नबी खात्तर, एक एलिय्याह नबी खात्तर।” 6 क्यूँके उसनै कोनी बेरा था, के वो के जवाब देवै, ज्यांतै के वे घणे डरगे थै। 7 फेर एक बादळ उनपै छाग्या, अर उस बादळ म्ह तै परमेसवर नै कह्या, “यो मेरा प्यारा बेट्टा सै, इसकी सुणो।” 8 फेर उनने चाणचक चौगरदेके निगांह घुमाई, अर यीशु नै छोड़ अपणे गेल्या और किसे ताहीं कोनी देख्या। 9 पहाड़ तै उतरदी आणी यीशु नै उन ताहीं हुकम दिया के जिब ताहीं मै माणस का बेट्टा मेरे होया म्ह तै जिन्दा न्ही हो जाऊँगा, तब तक जो कुछ थमनै देख्या सै वो किसे तै ना कहियो। 10 चेल्यां नै या बात अपणे मन म्ह ए राक्खी, अर आप्पस म्ह बहस करण लाग्गे, के “मरे होया म्ह तै जी उठण का के मतलब हो सकै सै?” 11 अर उननै उसतै बुड़झ्या, “शास्त्री क्यांतै कहवै सै के एलिय्याह नबी का पैहल्या आणा जरूरी सै?” 12 यीशु नै उन ताहीं जवाब दिया, “यो सच सै एलिय्याह नबी पैहल्या आके सारा कुछ सुधारैगा, पर मेरे बारें म्ह पवित्र ग्रन्थ म्ह यो क्यांतै लिख्या सै के वो घणा दुख ठावैगा, अर तुच्छ गिण्या जावैगा? 13 पर मै थमनै कहूँ सूँ के एलिय्याह नबी तो (जो यूहन्ना सै) आ लिया, अर जिसा के उसके बारें म्ह पवित्र ग्रन्थ म्ह लिख्या सै, उननै जो कुछ चाह्या उसके गेल्या करया।” 14 यीशु अर उसके तीन चेल्लें दुसरयां चेल्यां के धोरै आये, तो देख्या के उनकै चौगरदे नै घणी भीड़ लागरी सै अर शास्त्री उनकै गेल्या बहस कररे सै। 15 यीशु ताहीं देखदे ए सारे घणे हैरान होण लाग्गे, अर उननै यीशु कान्ही भाजके उसतै नमस्कार करया। 16 यीशु नै उनतै बुड़झ्या, “थम इनतै के बहस कररे सो?” 17 भीड़ म्ह तै एक नै उसतै जवाब दिया, “हे गुरु, मै अपणे बेट्टे ताहीं जिसम्ह ओपरी आत्मा सै, जो

उसनै बोल्लण कोनी देती। मै उस ताहीं तेरे धोरै ल्याया था। 18 जित्त किते ओपरी आत्मा उसने पकड़े सै, उडैए पटक देवै सै: अर वो मुँह म्ह तै झाग भर लावै सै, अर दाँत पिसदा, अर सुखदा जावै सै। मननै तेरे चेल्यां तै कह्या के वे ओपरी आत्मा नै काढ देवै, पर वे काढ न्ही सके।” 19 न्यू सुणके यीशु नै उनतै जवाब देके कह्या, “हे अबिश्वासी माणसों, मै कद ताहीं थारे गेल्या रहूँगा? अर कद ताहीं थारी सहूँगा? बाळक नै मेरै धोरै ल्याओ।” 20 फेर वे बाळक नै यीशु के धोरै लियाये: अर जिब ओपरी आत्मा नै यीशु ताहीं देख्या, तो उस ओपरी आत्मा नै जिब्बे उस ताहीं मरोड्या, अर वो धरती पै पड़ग्या, अर मुँह तै झाग बगान्दे होए लोटण लाग्या। 21 यीशु नै उसके पिता तै बुड़झ्या, “इसकी या हालत कद तै सै?” उसनै कह्या, “बाळकपण तै। 22 उसनै इस ताहीं नाश करण खात्तर कदे आग अर कदे पाणी म्ह गेरया, पर जै तू कुछ कर सके, तो म्हारै पै तरस खाके म्हारा भला कर।” 23 यीशु नै उसतै कह्या, “या के बात होई! जै तू कर सकै सै? बिश्वास करण आळा खात्तर सारा कुछ हो सकै सै।” 24 बाळक के पिता नै जिब्बे जोर तै कह्या, “हे प्रभु, मै बिश्वास करूँ सूँ, मेरै अबिश्वास का उपाय कर।” 25 जिब यीशु नै देख्या के माणस भाजके भीड़ लावै सै, तो उस ओपरी आत्मा ताहीं न्यू कहके धमकाया, “हे गूंगी अर बेहरी करण आळी ओपरी आत्मा, मै तन्नै हुकम दियुँ सूँ, उस म्ह तै लिकड़ आ, अर उस म्ह फेर कदे ना बड़ीये।” 26 फेर वा किल्की मारके अर उस ताहीं घणा मरोड़के, लिकड़ आई; अर बाळक मरया होया-सा होग्या, उरै ताहीं के घणे आदमी कहण लाग्गे के वो मरग्या। 27 पर यीशु नै उसका हाथ पकड़के उस ताहीं ठाया, अर वो खड्या होग्या। 28 जिब वो घरां आया, तो उसके चेल्यां नै एकले म्ह उसतै बुड़झ्या, “हम उस ताहीं क्यांतै न्ही काढ सके?” 29 उसनै उनतै कह्या, “या जात, बिना प्रार्थना किसे और उपाय तै कोनी लिकड़ सकदी।” 30 फेर यीशु अर उसके चेल्यां नै ओड़ै तै लिकड़के, गलील परदेस का राह लिया। यीशु न्ही चाहवै था के कोए उननै जाणै, क्यूँके वो अपणे चेल्यां ताहीं सिखाणा चाहवै था 31 यीशु उपदेश देन्दा अर अपणे बारै म्ह चेल्यां तै कहवै था, मै “माणस का बेट्टा माणसां के हाथ्यां म्ह पकड़वाया जाऊँगा, अर वे मननै मार देवैंगे, अर मै मरण कै तीसरे दिन जिन्दा हो जाऊँगा।” 32 पर या बात उनकी समझ म्ह कोनी आई, अर वे उसतै बुड़झण तै डरै थै। 33 यीशु अर उसके चेल्लें कफरनहूम कस्बे म्ह आये; अर घर म्ह आके उसनै चेल्यां तै बुड़झ्या, “राह म्ह थम किस बात पै बहस कररे थै?” 34 वे बोल-बाल्ले रहे, क्यूँकि राह म्ह उननै आप्पस म्ह या बहस करी थी के म्हारै म्ह तै बड़ड़ा कौण सै। 35 फेर यीशु नै बैठके बारहा चेल्यां ताहीं बुलाया अर उनतै कह्या, “जै कोए बड़ड़ा होणा चाहवै, तो सारया तै छोटा अर सारया का सेवक बणै।” 36 अर उसनै एक बाळक लेके उनकै बिचाळै खड्या करया अर उस ताहीं गोद्दी म्ह लेके उन ताहीं कह्या, 37 “जो कोए मेरे नाम तै इसे बाळकां म्ह तै किसे एक नै भी अपणावै सै, वो मननै अपणावै सै; अर जो कोए मननै अपणावै सै, वो मननै न्ही, बल्के मेरै भेजण आळे नै अपणावै सै।” 38 यूहन्ना नै

यीशु तार्हीं कह्या, “हे गुरु, हमनै एक माणस तार्हीं तेरे नाम तै ओपरी आत्मा नै लिकाइदे देख्या अर हम उसनै मना करण लागे, क्यूँके वो म्हारी तरियां तेरा चेल्ला न्ही था।” 39 उसनै कह्या, “उस तार्हीं मना मत करो; क्यूँके इसा कोए न्ही जो मेरे नाम तै अदभुत काम करै, अर दुसरे पल मेरी बुराई करै 40 क्यूँके जो म्हारै बिरोध म्ह न्ही, वो म्हारै कान्ही सै। 41 जै कोए एक कटोरा पाणी भी थमनै ज्यांतै प्यावै के थम मसीह के सो तो मै थमनै सच कहुँ सूँ के वो अपना ईनाम किसे तरियां भी न्ही खोवैगा।” 42 पर जो कोए इन छोट्टे बाळकां के समान जो मेरै पै बिश्वास करै सै, किसे तै भी पाप करवावै तो उसकै खात्तर भला योए सै के एक बड्डी चाक्की का पाट उसके गळ म्ह लटकाया जावै अर वो समुंदर म्ह गेरया जावै। 43 जै तेरा हाथ तेरे तै पाप करवावै तो उसनै काट दे। टुंडा होकै अनन्त जीवन म्ह बड़णा तेरे खात्तर भला सै इसके बजाये के दो हाथ रहंदे होए नरक की आग म्ह गेरया जावै जो कदे न्ही बुझै। (Geenna g1067) 44 (जड़ै उनका कीड़ा कोनी मरदा अर आग कोनी बुझदी।) 45 जै तेरा पैर तेरे तै पाप करवावै तो उसनै काट दे। लंगड़ा होकै अनन्त जीवन म्ह बड़णा तेरे खात्तर भला सै इसके बजाये के दो पैर रहंदे होए नरक की आग म्ह गेरया जावै। (Geenna g1067) 46 (जड़ै उनका कीड़ा कोनी मरदा अर आग कोनी बुझदी।) 47 जै तेरी आँख तेरे तै पाप करवावै तो उसनै लिकाइ दे। काणा होकै परमेसवर के राज्य म्ह बड़णा तेरे खात्तर भला सै के दो आँख रहंदे होए तू नरक म्ह गेरया जावै। (Geenna g1067) 48 “जड़ै उनका कीड़ा कोनी मरदा अर आग कोनी बुझदी।” 49 हरेक माणस आग तै शुद्ध करया जावैगा, जिस तरियां बलिदान नूण तै शुद्ध करया जावैगा। 50 “नूण एक जरूरत की चीज सै, पर जै नूण का सुवाद जान्दा रहवै तो उसनै किस तरियां नमकीन करोगे? अपने म्ह नूण जिसा गुण राख्खो, अर आप्स म्ह मेळ-मिलाप तै रहो।”

10 यीशु ओड़ै तै उठकै यहूदिया नगर की सीमा नै पार करकै, यरदन नदी के परली ओड़ आया। भीड़ उसके धोरै कठी होगी, अर अपनी रीत के मुताबिक उननै दुबारै उपदेश देण लागया। 2 फेर फरीसियाँ नै यीशु के धोरै आके उस तार्हीं परखण खात्तर उसतै बुझ्झया, “के यो ठीक सै के माणस अपनी घरआळी नै छोड़ै?” 3 यीशु नै उनतै पूछ्या, “मूसा नबी नै थारे तार्हीं के हुकम दिया सै?” 4 उननै कह्या, “मूसा नबी नै तो तलाकनामा देकै अर छोड़ण का हुकम दिया सै।” 5 यीशु नै उनतै कह्या, “थारे मन की कठोरता के कारण उसनै थारे खात्तर यो हुकम लिख्या।” 6 “पर सृष्टि की शरूआत तै परमेसवर नै नर अर नारी करकै उन तार्हीं बणाया सै। 7 इस कारण माणस अपने माँ-बाप तै न्यारा होकै अपनी घरआळी गेल्या रहवैगा, 8 अर वे दोन्नु कठ्ठे रहवैगे; ज्यांतै के वे इब दो न्ही पर एक तन सै। 9 इस करकै जिस तार्हीं परमेसवर नै जोड़या सै उस तार्हीं माणस न्यारा ना करै।” 10 जब वे दोबारा घरां आये, तो चेल्यां नै तलाक के बारे म्ह उसतै फेर बुझ्झया। 11 यीशु नै उनतै कह्या, “जो कोए अपनी घरआळी नै छोड़के दुसरी तै ब्याह

करै तो वो उस पैहल्डी के बिरोध म्ह जारी करै सै; 12 अर जै घरआळी अपने धणी नै छोड़के दुसरे तै ब्याह करै तो वा जारी करै सै।” 13 फेर माणस अपने बाळकां नै उसके धोरै ल्याण लागे के वो उनपै हाथ धरै, पर चेल्यां नै उन तार्हीं धमकाया। 14 यीशु नै न्यू देख छो म्ह होकै कह्या, “बाळकां नै मेरै धोरै आण द्यो अर उननै मना मतना करो, क्यूँके परमेसवर का राज्य बाळकां के समान सै। 15 मै थमनै सच कहुँ सूँ के जो कोए परमेसवर के राज्य नै बाळक की तरियां न्ही अपनावै, वो उस म्ह कदे न्ही बड़ण पावैगा।” 16 अर उसनै उन तार्हीं गोदी म्ह लिया, अर उनपै हाथ धरकै उन तार्हीं आशीर्वाद दिया। 17 जब यीशु अर उसके चेल्लें यरुशलेम की ओड़ जाण लागरे थे, तो एक माणस उसके धोरै भाज्दा होया आया, अर उसके आगै घुटने टेक के उसतै बुझ्झया, “हे उत्तम गुरु, अनन्त जीवन का हकदार होण खात्तर मै के करुँ?” (aiōnios g166) 18 यीशु नै उसतै कह्या, “तू मनने उत्तम क्यांतै कहवै सै? परमेसवर नै छोड़के कोए उत्तम कोनी। 19 तन्नै हुकमां का तो बेराए सै: ‘खून न्ही करणा, जारी न्ही करणा, चोरी न्ही करणा, झूठी गवाही न्ही देणा, छळ न्ही करणा, अपने माँ-बाप का आदर करणा।” 20 उसनै यीशु तै कह्या, “हे गुरु, इन सारया नै मै बाळकपण तै मानता आऊँ सूँ।” 21 यीशु नै उसपै निगांह करके उसतै प्यार करया, अर उसतै कह्या, “तेरे म्ह एक बात की कमी सै। जा, जो कुछ तेरा सै उसनै बेचके कंगालां तार्हीं दे, अर तन्नै सुर्ग म्ह धन मिलैगा, अर आकै मेरा चेल्ला बणण खात्तर मेरै पाच्छे हो ले।” 22 इस बात तै उसके मुँह पै उदासी छग्यी, अर वो दुखी होंदा होया चल्या गया, क्यूँके वो घणा साहूकार था। 23 यीशु नै चौगरदेकै देखके अपने चेल्यां तै कह्या, “साहूकारां का परमेसवर के राज्य म्ह दाखल होणा कितना ओक्खा सै।” 24 चेल्लें उसकी बात तै हैरान होए। इसपै यीशु नै उनतै दुबारै कह्या, “हे बाळकों, जो धन पै भरोस्सा राख्खे सै, उनके खात्तर परमेसवर के राज्य म्ह बड़णा कितना ओक्खा सै! 25 ऊँट का सूई के छेद म्ह तै लिंकडणा आसान हो सके सै। पर परमेसवर के राज्य म्ह साहूकार का बड़णा भोत मुश्किल सै।” 26 वे घणेए हैरान होके आप्स म्ह कहण लागे, “तो फेर किसका उद्धार हो सके सै?” 27 यीशु नै उनकी ओड़ देखके कह्या, “माणसां तै तो यो न्ही हो सकदा, पर परमेसवर तै हो सके सै; क्यूँके परमेसवर खात्तर कुछ भी मुश्किल कोनी।” 28 पतरस उसतै कहण लागया, “देख, हम तो सब कुछ छोड़के तेरे चेल्लें बणगे सा।” 29 यीशु नै कह्या, “मै थमनै साच्ची-साच कहुँ सूँ के इसा कोए कोनी, जिसनै मेरै अर मेरै सुसमाचार के खात्तर घर, भाण-भाई, माँ-बाप, बाळ-बच्चे या जमीन-जायदाद तार्हीं छोड़ दिया हो, 30 अर इब इस युग म्ह सताव के बदले म्ह घर, भाण-भाई, माँ-बाप या बाळ-बच्चे अर जमीन-जायदाद का सौ गुणा पर आण आळे बखत म्ह अनन्त जीवन पावैगा। (aiōn g165, aiōnios g166) 31 पर घणखरे जो पैहले सै, पाच्छले होंगे; अर जो पाच्छले सै, वे पैहले होंगे।” 32 वे यरुशलेम नगर म्ह जान्दे होए राह म्ह थे, अर यीशु उनकै आगै-आगै जाण लाग रहया था: चेल्लें हैरान थे अर जो चेल्यां

कै गैल-गैल चाल्लै थे, वे डरते थे। फेर वो उन बारहां चेल्यां नै न्यारा ले ज्याकै उनते ये बात कह्ल लाग्या, जो उसके गेल्या होण आळा था, 33 “देखो, हम यरुशलेम नगर म्ह जावां सा, अर मै माणस का बेटा प्रधान याजकां अर शास्त्रियाँ के हाथ्यां पकड़वाया जाऊंगा, अर वे मन्ने मारण खात्तर गैर यहूदियाँ के हाथ्यां म्ह सौपेगें। 34 वे मेरा मजाक उड़ावेगें, मेरे पै थूकेंगें, मेरे कोरड़े मारेंगें अर मन्ने मार देवेंगें, अर तीसरे दिन मै जिन्दा हो जाऊंगा।” 35 कुछ दिनां बाद जब्दी के दोन्नु बेटे याकूब अर यूहन्ना नै यीशु के धोरे आके कह्या, “हे गुरु, हम चाहवां सां के जो कुछ हम तेरे तै माँगा, वो तू म्हारै खात्तर करै।” 36 यीशु नै उनतै कह्या, “थम के चाहो सो के थारे खात्तर करँ?” 37 उननै यीशु तै कह्या, “हमनै यो हक दे, के तेरी महिमा म्ह म्हारै म्ह तै एक तेरे सोळ्हे अर दुसरा तेरे ओळ्हे कान्ही बेट्टै।” 38 यीशु नै उनतै कह्या, “थम न्ही जाणदे के थम के माँगो सो? अर जो दुख का कटोरा मै पीण पै सूं, के थम पी सको सो? अर जो मौत का बपतिस्मा मै लेण पै सूं, के थम ले सको सो?” 39 उननै यीशु तै कह्या, “हम कर सका सां।” यीशु नै उनतै कह्या, “जो दुख का कटोरा मै पीण पै सूं, थम पी ल्योगे; अर जो बपतिस्मा मै लेण पै सूं, उसनै ले भी ल्योगे। 40 पर जिन खात्तर वा जगहां त्यार करी गई सै, उन ताहीं छोड़ और किसे नै अपणी सोळी अर अपणी ओळी ओड़ बिठाणा मेरा काम कोनी।” 41 न्यू सुणके बाकी दस चेल्लें याकूब अर यूहन्ना तै चिड़गे। 42 तो यीशु नै उन ताहीं धोरे बुलाकै उनतै कह्या, “थमनै बेरा सै के जो गैर यहूदियाँ के हाकिम समझे जावै सै, वे उनपै राज करै सै; अर उन म्ह जो बड़े सै, उनपै हक जमावें सै। 43 पर थारे म्ह इसा न्ही होणा चाहिये, बल्के जो कोए थारे म्ह बड़ड़ा होणा चाहवें वो थारा सेवक बणै; 44 अर जो थारे म्ह प्रधान होणा चाहवें, वो सारया का दास बणै। 45 क्यूँके मै माणस का बेटा ज्यांतै कोनी आया के अपणी सेवा-पाणी करवाऊं, पर ज्यांतै आया के खुद सेवा-पाणी करँ, अर घणखरयां के छुटकारै कै खात्तर अपणी जान देऊं।” 46 यीशु अर उसके चेल्लें यरुशलेम नगर जाते बखत यरीहो नगर म्ह आये, अर जिब वो अर उसके चेल्लें, अर एक बट्टी भीड़ यरीहो नगर तै लिकड़े जाण लागरी थी, तो सड़क कै किनारे एक आन्था भिखारी बेठ्या था, जो तिमाई का बेट्टा बरतिमाई था, 47 उसनै न्यू सुणके के नासरत का यीशु उरै सै, रुक्के मार-मारके कहण लाग्या, “हे दाऊद की ऊलाद, यीशु मेरे पै दया कर!” 48 घणाए नै उस ताहीं धमकाया के बोल-बाल्ला रह, पर वो और भी रुक्के मारण लाग्या, “हे दाऊद की ऊलाद, मेरे पै दया कर!” 49 फेर यीशु नै ठहरकै कह्या, “उस ताहीं बुलाओ।” अर आदमियाँ नै उस आन्थे ताहीं बुलाकै उसतै कह्या, “धीरज धर! उठ! यीशु तन्नै बुलावै सै।” 50 वो अपणा चोगा बगाकै तोळा उठ्या, अर यीशु के धोरे आया। 51 इसपै यीशु नै उसतै कह्या, “तू के चाहवै सै के मै तेरे खात्तर करँ?” आन्थे नै उसतै कह्या, “हे गुरु, योए के मै देखण लाग्गू।” 52 यीशु नै उसतै कह्या, “चल्या जा, तेरे बिश्वास नै तेरे ताहीं ठीक करया सै।” वो जिब्बे देखण लाग्या, अर राह म्ह उसके पाच्छै हो लिया।

11 जिब यीशु अर उसके चेल्लें यरुशलेम नगर कै लोवै, जैतून पहाड़ पै बैतफगे अर बैतनिय्याह गाम कै धोरे आये तो उसने अपणे चेल्यां म्ह तै दोगां ताहीं न्यू कहके भेज्या, 2 “स्याम्ही के गाम म्ह जाओ, अर उस म्ह पोहचदे एक गधी का बच्चा, बन्ध्या होया थमनै मिलैगा। जिसकी सवारी किसे नै इब ताहीं न्ही करी सै, उसनै खोल ल्याओ। 3 जै थारे तै कोए बुड़झै, यो के करो सो? तो कहियो, ‘प्रभु नै इसकी जरूरत सै, अर वो तोळा उसनै भेज देवैगा।’” 4 चेल्यां नै जाके उस गधी के बच्चे ताहीं बाहरणै दरबाजे के धोरे आँगण म्ह बन्ध्या होया पाया, अर खोल्लण लागगे। 5 उन म्ह तै जो ओड़ै खड़े थे, कई कहण लागगे, “यो के करो सो, गधी के बच्चे नै क्याते खोल्लो सो?” 6 जिसा यीशु नै कह्या था, उससे तरियां उननै कह दिया; फेर माणसां नै उन ताहीं जाण दिया। 7 चेल्यां नै गधी के बच्चे ताहीं यीशु के धोरे ल्याके उसपै अपणे लत्ते बिछाये अर वो उसपै बैठग्या। 8 फेर घणखरे माणसां नै अपणे लत्ते राह म्ह बिछाये अर औरां नै खेत्तां म्ह तै डालियाँ काटकै फैला दी। 9 जो उसके आगै-आगै अर पाच्छै-पाच्छै चाल्लै थे, रुक्के मार-मारके कहन्दे जावै थे, “होशाना!” “धन्य सै वो जो प्रभु के नाम तै आवै सै!” 10 म्हारै पिता दाऊद का राज्य जो आवै सै; “धन्य सै! अकास म्ह होशाना!” 11 यीशु यरुशलेम नगर पोहचके मन्दर म्ह आया, अर चौगरदे की सारी चिज्जां नै देखके बारहां चेल्यां कै गेल्या बैतनिय्याह गाम म्ह गया, क्यूँके साँझ होगी थी। 12 अगले दिन सबेरे जिब यीशु अर उसके चेल्लें बैतनिय्याह गाम तै लिकड़े तो यीशु नै भूख लाग्गी। 13 यीशु दूर तै अंजीर का हरा दरखत देखके उसके धोरे गया के, के बेरा उस म्ह कुछ पा ज्या: पर पत्त्या नै छोड़के उस म्ह कुछ न्ही पाया; क्यूँके फळ लाग्गण का बखत कोनी था। 14 यीशु नै उस दरखत ताहीं देखके उस ताहीं कह्या, “आज कै पाच्छै कोए तेरा फळ न्ही खावैगा!” अर उसके चेल्लें सुणण लागरे थे। (aiōn g165) 15 फेर यीशु अर उसके चेल्लें यरुशलेम म्ह आये, अर वो मन्दर म्ह गया; अर ओड़ै जो व्यापार करै थे उननै बाहरणै लिकाड़ण लाग्या, सर्राफां (पईसा का लेण देण करण आळे) के पीठे अर कबूतर बेचणीयाँ की चौकियाँ उल्ट दी, 16 अर मन्दर म्ह किसे ताहीं भी व्यापार करण खात्तर आण-जाण कोनी दिया। 17 अर उपदेश देके उनतै कह्या, “के पवित्र ग्रन्थ म्ह यो न्ही लिख्या सै, के मेरा घर सारी जात्तां कै खात्तर प्रार्थना का घर कुहलवैगा? पर थमनै इस ताहीं डाकुआं की गुफा बणा दी सै।” 18 या घटना सुणके सारे प्रधान याजक अर शास्त्री लोग उसनै मारण का मौक्का तोह्ल लागगे; पर वे भीड़ तै डरै थे, क्यूँके सारे माणस उसके उपदेश तै भोत परभाबित होवै थे। 19 अर उस दिन साँझ होन्दे यीशु अर उसके चेल्लें रात काटृण खात्तर यरुशलेम नगर तै बाहरणै चले गये। 20 फेर तड़केए नै जिब यीशु अर उसके चेल्लें ओड़ै कै जावै थे तो उननै उस अंजीर कै दरखत ताहीं जड़ तै ए सूख्या होया देख्या। 21 पतरस नै वा बात याद आई, अर उसनै उसतै कह्या, “हे गुरु, देख! यो अंजीर का दरखत जिस ताहीं तन्नै श्राप दिया था, वो सूख गया सै।” 22 यीशु नै उस ताहीं जवाब दिया, “परमेसवर पै

बिश्वास राकखो। 23 मै थमनै सात्ची कहुँ सूँ के जो कोए इस पहाड़ नै कहवै, 'तू उखड़ जा, अर समुन्दर म्ह जा पड़,' अर अपणे मन म्ह शक ना करै, बल्के बिश्वास करै के जो कहुँ सूँ वो हो जावैगा, तो उसके खात्तर वोए होवैगा। 24 ज्यांतै मै थमनै कहुँ सूँ के जो कुछ थम प्रार्थना करके माँगो, तो बिश्वास कर ल्यो के थमनै मिलग्या, अर थारे खात्तर हो जावैगा। 25 अर जिब कदे थम प्रार्थना खात्तर खड़े होओ, तो जै थारे मन म्ह किसै के बिरोध म्ह कुछ हो, तो उसनै माफ करो: ज्यांतै के थारा सुर्गीय पिता भी थारे अपराध माफ करै। 26 अर जै थम माफ ना करो तो थारा पिता भी जो सुर्ग म्ह सै, थारा कसूर माफ कोनी करैगा।" 27 यीशु अर उसके चेल्लें फेर यरुशलेम म्ह आये, अर जिब वो मन्दर म्ह टहलरया था तो सारे प्रधान याजक अर शास्त्री अर यहूदी अगुवें उसके धोरै आकै बुड़झण लागे, 28 "तू ये काम किस हक तै करै सै? अर यो हक तेरे ताहीं किसनै दिया सै के तू ये काम करै?" 29 यीशु नै उनतै कह्या, "मै भी थारे तै एक बात बुड़झु सूँ; मन्नै जवाब दियो तो मै थमनै बताऊँगा के ये काम किस हक तै करूँ सूँ। 30 यूहन्ना ताहीं बपतिस्मा देण का हक परमेसवर की ओड़ तै था या माणसां की ओड़ तै था? मन्नै जवाब द्यो।" 31 फेर वे आप्पस म्ह बहस करण लागे के जै हम कहां, परमेसवर की ओड़ तै, तो वो कहवैगा, फेर थमनै बिश्वास क्यांतै न्ही करया? 32 अर जै हम कहां, माणसां की ओड़ तै, तो माणसां की भीड़ का डर सै, क्यूँके सारे जाणे सै के यूहन्ना साच्चीये नबी था। 33 उननै यीशु ताहीं जवाब दिया, "हमनै न्ही बेरा।" यीशु नै उनतै कह्या, "मै भी थारे तै कोनी बतान्दा के ये काम किस हक तै करूँ सूँ।"

12 यीशु उदाहरणां म्ह उनतै बात करण लाग्या: "किसे माणस नै अंगूर का बाग लगाया, अर उसके चौगरदे नै बाड़ा बाँधया, अर रस का कुण्ड खोद्या, अर रुखाळ खात्तर एक मचान बणया; अर किसानां ताहीं उसका ठेक्का देके परदेस चल्या गया। 2 फेर फळ तोड़ण का बखत लोवै आया, तो बाग के माल्लिक नै अपणे नौक्कर ताहीं उसका फळ लेण नै किसानां धोरै भेज्या के किसानां तै अंगूर के बाग के फळां का हिस्सा लेवै। 3 पर किसानां नै उस नौक्कर ताहीं पकड़के छेत्या अर खाल्ली हाथ भेज दिया। 4 फेर उसनै एक और नौक्कर ताहीं उनके धोरै भेज्या; उननै उसकी बेजती करी उसका सिर फोड़ दिया अर। 5 फेर उस माल्लिक नै एक और ताहीं भेज्या; उननै उस नौक्कर ताहीं भी मार दिया। फेर उसनै और घणाए ताहीं भेज्या; उन म्ह तै उननै कुछ तो छेत्ते अर कुछ मार दिये।" 6 "इब माल्लिक के धोरै एकैए आदमी रहग्या जो उसका प्यारा बेटा था; आखर म्ह उसनै अपणे बेटे ताहीं भी उनके धोरै न्यू सोचके भेज्या के वे मेरे बेटे की इज्जत तो जरूर करैगें।" 7 पर उन किसानां नै आप्पस म्ह कह्या, "योए तो वारिस सै; आओ, हम इसनै मार द्या, फेर यो अंगूर का बाग म्हारा हो जावैगा।" 8 अर उननै उस ताहीं पकड़के मार दिया, अर अंगूर के बाग तै बाहरणे बगा दिया। 9 इस करके अंगूर के बाग का माल्लिक के करैगा? वो आकै उन किसानां का नाश करैगा, अर अंगूर के बाग का ठेक्का दुसरे किसानां नै दे देवैगा।

10 के थमनै पवित्र ग्रन्थ म्ह यो वचन कोनी पढ्या: जिस पत्थर ताहीं राजमिस्त्रियाँ नै बेकार बताया था, वोए कोणे का खास पत्थर होग्या; 11 यो प्रभु की ओड़ तै होया, अर यो म्हारे खात्तर अनोक्खा सै! 12 फेर यहूदियाँ के प्रधान नै उस ताहीं पकड़णा चाह्या; क्यूँके वे समझगे थे, के उसनै म्हारे बिरोध म्ह यो उदाहरण कह्या सै: पर वे माणसां तै डरगे, अर उसनै छोड़के चले गये। 13 फेर यहूदियाँ के प्रधान नै यीशु ताहीं बात्तां म्ह उलझाण खात्तर कुछ फरीसियाँ अर हेरोदेस राजा के समर्थकां ताहीं उसके धोरै भेज्या। 14 उननै आकै यीशु तै कह्या, "हे गुरु, हमनै बेरा सै, के तू साच्चा सै, अर किसे की परवाह न्ही करदा, क्यूँके तू माणसां का मुँह देखके बात कोनी करदा, पर परमेसवर की बातें सच्चाई तै सिखावै सै। तो के कैसर ताहीं कर देणा ठीक सै या कोनी? 15 हम देवां, या न्ही देवां?" उसनै उनका कपट जाणकै उनतै कह्या, "मन्नै क्यांतै परखो सो? एक दीनार (एक दिन की मजदूरी) मेरै धोरै ल्याओ, के मै उसनै देखूँ।" 16 वे लियाए, अर उसनै उनतै कह्या, "या छाप अर नाम किसका सै?" उननै कह्या, "कैसर का।" 17 यीशु नै उनतै कह्या, "जो कैसर का सै वो कैसर ताहीं, अर जो परमेसवर का सै परमेसवर ताहीं द्यो।" फेर वे उसपै घणे हैरान होण लागे। 18 फेर सडूकी लोग भी, जो कहवै सै के मेरे होए जिन्दा होए न्ही सकदे; उसके धोरै आकै उसतै बुड़झया, 19 "हे गुरु, मूसा नबी नै म्हारे खात्तर पवित्र ग्रन्थ म्ह लिख्या सै के जै किसे का भाई बेऊलादा मर जावै अर उसकी घरआळी रह जावै, तो उसका भाई उसकी घरआळी तै ब्याह कर लेवै अर अपणे भाई खात्तर पीढ़ी पैदा करै। 20 उदाहरण के तौर पै सात भाई थे। पैहलड़ा भाई ब्याह करके बेऊलादा मरग्या। 21 फेर दुसरे भाई नै उसकी बिरबान्नी तै ब्याह कर लिया अर वो भी बेऊलादा मरग्या; अर उससे तरियां तीसरे नै भी करया। 22 अर सातुवां कै ऊलाद कोनी होई। सारया पाच्छे वा बिरबान्नी भी मरगी। 23 आखर म्ह जिन्दा होण पै वा उन म्ह तै किसकी घरआळी होवैगी? क्यूँके वा सातुवां की घरआळी हो ली थी।" 24 यीशु नै उनतै कह्या, "थारी गलती या सै के थम पवित्र ग्रन्थ अर परमेसवर की सामर्थ नै न्ही जाणते। 25 क्यूँके जी उठण के बाद ब्याह शादी कोनी होन्दी, पर सुर्ग म्ह वो परमेसवर के सुर्गदूतां की ढाळ होवैगें। 26 मरे होया कै जिन्दा होण कै बारें म्ह के थमनै मूसा नबी की किताब म्ह जळती होई झाड़ी की कथा म्ह कोनी पढ्या के परमेसवर नै उसतै कह्या, 'मै अब्राहम का परमेसवर, अर इसहाक का परमेसवर, अर याकूब का परमेसवर सूँ?' 27 परमेसवर मरे होया का न्ही बल्के जिन्द्यां का परमेसवर सै; थम बट्टी भूल म्ह पड़े सो।" 28 शास्त्री समाज के माणसां म्ह तै एक नै आकै उन ताहीं बहस करदे सुणया, अर न्यू जाणके उसनै उन ताहीं ठीक ढाळ तै जवाब दिया, अर उसतै बुड़झया, "सारया तै खास हुकम कौण सा सै?" 29 यीशु नै उस ताहीं जवाब दिया, "सारे हुकमां म्ह तै यो खास सै: 'हे इस्राएल के माणसां सुणो! प्रभु म्हारा परमेसवर सिर्फ एक ही प्रभु सै, 30 अर तू प्रभु अपणे परमेसवर तै अपणे सारे मन तै, अर अपणे सारे प्राण तै, अर अपणी सारी समझ तै, अर अपणी सारी शक्ति तै प्यार

राखणा।' 31 अर दुसरा यो सै, 'तू अपने पड़ोसी तै अपने जिसे प्यार राखणा।' इस्तै बड़ड़ा और कोए हुकम कोनी।" 32 शास्त्री नै उसतै कह्या, "हे गुरु, जमा ठीक! तन्नै साच्ची कही के परमेसवर एक-ए सै, अर उस ताहीं छोड़के और कोए कोनी। 33 अर उसतै सारे मन तै, अर सारे प्राण तै, अर सारी समझ तै, अर सारी शक्ति तै प्यार राखणा; अर पड़ोसी तै अपने जिसे प्यार राखणा, ये दोन्नु हुकम होमबलियाँ अर बलिदानां तै बाध सै।" 34 जिब यीशु नै देख्या के उसनै समझदारी तै जवाब दिया, तो उसतै कह्या, "तू परमेसवर के राज्य तै दूर कोनी।" अर किसे नै फेर उसतै बुझणा की हिम्मत कोनी होई। 35 फेर यीशु नै मन्दर म्ह उपदेश देन्दे होए न्यू कह्या, "शास्त्री क्यूँ कहवै सै के मसीह दाऊद का बेटा सै? 36 क्यूँके दाऊद नै खुद ए पवित्र आत्मा म्ह होके कह्या सै, 'परमेसवर यहोवा नै मेरै प्रभु तै कह्या, 'मेरै सोळी ओड़ बैठ, जिब ताहीं के मे तैरै बैरियाँ नै हरा के, तेरे पायां की चौककी नही बना दिव्यु।"' 37 "दाऊद तो खुद ए उसनै प्रभु कहवै सै, फेर वो उसका बेटा किस ढाळ होया?" अर भीड़ के माणस उसकी राज्जी होके सुणे थे। 38 यीशु नै अपने उपदेश म्ह उनतै कह्या, "शास्त्रियाँ तै चौकन्ने रहियो, जो लाम्बे-लाम्बे चोगे पहरे होड़ हॉडे अर बजारां म्ह नमस्कार चाहवै सै, 39 अर आराधनालयों म्ह खास-खास जगहां बैठणा, जिम्मण म्ह खास-खास जगहां भी चाहवै सै। 40 वे बिधवार्याँ के घर खा जावै सै अर दिखाण खात्तर घणी वार ताहीं प्रार्थना करदे रहवै सै। ये घणा दण्ड पावैगें।" 41 यीशु मन्दर के भण्डार के स्याम्ही बैठके देखे था के आदमी मन्दर के दानपात्र म्ह किस तरियां पईसे घालें सै; अर घणखरे साहूकारां नै घणाए कुछ घाल्या। 42 इतनै म्ह एक कंगाल बिधवा नै आके दो दमड़ी घाल्लीं। (जो एक धेले के बराबर होवै सै) 43 फेर उसनै अपने चेल्यां ताहीं धीरे बुलाके कह्या, "मै थमनै सच कहूँ सूँ के मन्दर के दानपात्र म्ह घाल्लण आळा म्ह तै इस कंगाल बिधवा नै सारया तै बाध घाल्या सै; 44 क्यूँके सारया नै अपने धन की बढ़दी म्ह तै घाल्या सै, पर इसनै अपनी घटदी म्ह तै जो उसके धीरे जीवन चलाण खात्तर था, वो सारा घाल दिया।"

13 जिब यीशु मन्दर तै लिकड़े था, तो उसके चेल्यां म्ह तै एक नै उसतै कह्या, "हे गुरु, लखा, किसे बड़े-बड़े पत्थरां तै बनाये होए किसे सुथरे भवन सै!" 2 यीशु नै उनतै कह्या, "के थम ये बड़े-बड़े पत्थरां के भवन देखो सो: पर उरै एक पत्थर भी कोनी बचैगा जो गेरया नही जावैगा।" 3 जिब यीशु मन्दर के स्याम्ही जैतून के पहाड़ पै बैठ्या था, तो पतरस, याकूब, यूहन्ना अर अन्द्रियास नै न्यारे जाके उसतै बुझिया, 4 "हमनै बता के ये बात कद होवैगी? अर जिब ये सारी बात पूरी होण पै होवैगी उस बखत की के निशानी होवैगी?" 5 यीशु उनतै कहण लाग्या, "चौकन्ने रहियो के कोए थमनै भकावै नही। 6 क्यूँके घणखरे मेरै नाम तै आके कहवैगें, 'मै मसीह सूँ!' अर घणाए नै भकावैगें। 7 जिब थम रोळे, अर लड़ाईया का जिक्क सुणो, तो घबराईयो ना; क्यूँके इनका होणा जरूरी सै, पर उस बखत खात्मा कोनी होवैगा। 8 क्यूँके जात पै जात, राज्य पै राज्य चढ़ाई करैगा। भोत सारी जगहां पै हाल्लण आवैगें, अर

अकाळ पड़ैगें, ये तो दुखां की शरुआत ए होवैगी।" 9 "पर थम अपने बारे म्ह चौकन्ने रहो; क्यूँके माणस थारे ताहीं बड़ी सभा म्ह सौपैगें अर थम आराधनालयों म्ह छितोगे, अर मेरै कारण हाकिमां अर राजां के आगै खड़े करे जाओगे, ताके थम मेरे बारे म्ह गवाही दे सको। 10 पर जरूरी सै के पैहल्या सुसमाचार सारी जात्तां म्ह प्रचार करया जावै। 11 जिब वे थमनै ले जाके सौपैगें, तो पैहल्या तै फिक्र ना करियो इब हम के कहवागें; पर जो कुछ थमनै उस बखत बताया जावै वोए कहियो; क्यूँके बोल्लण आळे थम कोनी सो, पर पवित्र आत्मा सै।" 12 "भाई नै भाई, पिता नै बेटा मारण खात्तर सौंप देंगें, अर बाळक माँ-बाप के बिरोध म्ह खड़े होके उन ताहीं मरवा देवैगें। 13 अर मेरै नाम के कारण सारे माणस थारे तै बैर करैगें; पर जो आखर ताहीं धीरज धरैगा, उससे का उद्धार होवैगा।" 14 (पढ़ण आळा इस बात नै समझ लेवै) "जिस दिन थम मन्दर म्ह उस उजाड़ण आळी घृणित चीज नै खड़े देखो, जिस ताहीं मन्दर म्ह नही होणा चाहिये, तब जो यहूदिया परदेस म्ह हो वे पहाड़ां पै भाज जावै; 15 जो छत पै हो, वो घर म्ह कुछ लेण खात्तर भीत्तर ना जावै, 16 अर जो खेत म्ह हो, वो अपने लत्तें लेण खात्तर घर नै ना बोहड़ै। 17 उन दिनां म्ह जो गर्भवती अर दूध पिलान्दी बिरबान्नी होवैगी, उनके खात्तर भागणा भी मुशिकल होगा! 18 अर प्रार्थना करया करो के यो जाड्यां न्ह नही हो। 19 क्यूँके वे दिन इसे क्लेश के होवैगें के सृष्टि की शरुआत तै, जो परमेसवर नै रचाई सै, इब ताहीं ना तो होए अर ना फेर कदे होवैगें।" 20 अर जै प्रभु उन दिनां नै नही घटान्दा, तो कोए जीव भी कोनी बचदा; पर उन छॉट होया के कारण जिन ताहीं उसनै छाट्या सै, उन दिनां ताहीं घटाया। 21 उस बखत जै कोए थमनै कहवै, देखो, मसीह उरै सै, या देखो, ओड़े सै, तो बिश्वास ना करियो; 22 क्यूँके झूठे मसीह अर झूठे नबी उठ खड़े होवैगें, अर बड़े-बड़े चमत्कार अर अनोखे काम दिखावैगें के जै हो सक्या तो छॉट होया ताहीं भी भका देवैगें। 23 पर थम चौकन्ने रहियो; देखो, मन्ने थारे तै सारी बात बखत तै पैहल्याए बता दी सै। 24 उन दिनां म्ह, उस क्लेश के पाछे सूरज अन्धेरा हो जावैगा, अर चाँद चाँदणा कोनी देवैगा; 25 अर अकास के तारे पड़ण लागैगें; अर अकास की शक्तियाँ हलाई जावैगी। 26 फेर मुझ माणस के बेटे नै बड़ी सामर्थ अर महिमा के गेल्या सब लोग बाददां पै आन्दे देखैगें। 27 उस बखत मै अपने सुर्गदूतां नै भेजके, धरती के इस सिरे तै अकास के उस सिरे ताहीं, च्यारु दिशायां तै अपने चुणे होए माणसां नै कट्टा करूँगा। 28 अंजीर के दरखत तै यो उदाहरण सीखो: जिब उसकी डाळी कोमल हो जावै, अर पत्ते लिकड़ण लागै सै; तो थम जाण ल्यो सो के गर्मी का बखत लोवे सै। 29 इस्से तरियां जिब थम इन बात्तां नै होन्दे देखो, तो जाण ल्यो के वो भोत तावळा आण आळा सै। 30 मै थमनै साच्ची कहूँ सूँ के जिब ताहीं ये बात नही हो लेन्दी, जद ताहीं ये पीढ़ी खतम नही होवैगी। 31 धरती अर अकास टळ जावैगें, पर मेरी बात कदे नही टळैगी। 32 "उस दिन या उस बखत के बारे म्ह कोए नही जाणदा, ना सुर्गदूत अर ना बेटा; पर सिर्फ पिता जाणै सै। 33 लखाओ, जागदे अर

प्रार्थना करदे रहो; क्योंकि थमनै नही बेरा के वो बखत कद आवैगा। 34 मेरे आण का बखत उस माणस के समान सै, जो परदेस जान्दे बखत अपना घर छोड़ जावै, अर अपने नौकरां ताहीं हक देवै, अर हरेक नै उसका काम बता देवै, अर परदेस ताहीं जागदे रहण का हुकम देवै। 35 “इस करके जागदे रहो, क्योंकि थमनै नही बेरा के घर का मालिक कद आवैगा, साँझ नै या आध्धी रात नै, या मुर्गे के बाँग देण के बखत या तड़कै ए तड़कै नै। 36 इसा ना हो के वो चाणचक आके थमनै सोंदे पावै। 37 अर जो मै थमनै कहूँ सूँ, वोए सारया नै कहूँ सूँ: जागदे रहो!”

14 दो दिनां पाच्छे फसह अर अखमीरी रोटी का त्यौहार होण आळा था। प्रधान याजक अर शास्त्री इस बात की टाह म्ह थे के यीशु ताहीं किस ढाळ कपट तै पकड़कै मार देवै; 2 पर वे कहवै थे, “त्यौहार के दिन नही, कदे इसा ना हो के माणसां म्ह रोळा माच्वै।” 3 जिव यीशु बैतनिय्याह नगर म्ह आया, ओड़ै यीशु शमौन नाम के माणस जो कोढ़ तै ठीक होया था, उसके घरां खाणा खाण बेठ्या, तो एक बिरबान्नी संगमरमर के बरतन म्ह जटामांसी का शुद्ध महंगा खसबूदार तेल लेकै आई, अर बरतन तोड़कै महंगा खसबूदार तेल उसके सिर पै उंडेल दिया। 4 पर उन म्ह तै कई माणस अपने मन म्ह बड़बड़ाने लागे, “इस महंगा खसबूदार तेल का क्यातै सत्यानाश कर दिया? 5 क्योंकि यो महंगा खसबूदार तेल तो तीन सौ दीनार (तीन सौ दिन की मजदूरी) तै भी घणी किम्मत पै बेचके कंगालां म्ह बांडया जा सके था।” अर उस बिरबान्नी ताहीं झिड़कण लागे। 6 यीशु नै कह्या, “उस ताहीं छोड़ घो; उसनै क्यातै सताओ सो? उसनै मेरे गेल्या भलाई करी सै। 7 कंगाल थारे गेल्या सारी हाण रहवै सै, अर थम जिव चाहो जद उनतै भलाई कर सको सो; पर मै थारे गेल्या सारी हाण कोनी रहूँगा। 8 जो कुछ वा कर सकी, उसने करया; उसनै मेरे गाड़े जाण की त्यारी म्ह पैहला ए महंगा खसबूदार तेल मेरी देह पै उंडेला सै। 9 मै थमनै साचवी कहूँ सूँ के सारे दुनिया म्ह जित्त किते भी सुसमाचार प्रचार करया जावैगा, जो उसनै करया वो सदा याद करया जावैगा।” 10 फेर यहूदा इस्करियोती जो बारहा चेल्यां म्ह तै एक था, प्रधान याजकां के धारे गया के यीशु ताहीं उनके हाथ पकड़वा देवै। 11 वे न्यू सुणकै राज्जी होगे, अर उस ताहीं रपिये देण खातर मानगे; अर वो मौक्का तोह लाग्या के उस ताहीं किसे ढाळ पकड़वाया जावै। 12 अखमीरी रोटी के त्यौहार के पैहल्ले दिन, जिसम्ह वे फसह खातर मेम्ने का बलिदान करै थे, उसके चेल्यां नै उसतै बुझ्या, “तू कित्त जाणा चाहवै सै के हम जाके तेरे खातर फसह भोज की त्यारी करा?” 13 उसनै अपने चेल्यां म्ह तै दो ताहीं न्यू कहकै भेज्या, “यरुशलेम नगर म्ह जाओ, अर एक माणस पाणी का पेंढा ठाए होए थमनै मिलेगा, उसके पाच्छे हो लियो; 14 अर वो जिस घर म्ह जावै, उस घर के मालिक ताहीं कहियो, ‘गुरु कहवै सै के बैठक कित्त सै? जिसम्ह मै अपने चेल्यां गेल्या फसह भोज खाऊँ।’ 15 वो थमनै एक सजी-सजाई, अर त्यार करी होड़ बड़ी अटारी दिखा देवैगा, ओड़ै म्हारे खातर त्यारी करो।” 16 चेल्लें लिकड़के नगर म्ह आये, अर जिसा यीशु

नै उनतै कह्या था, उससे तरियां पाया; अर फसह का भोज त्यार करया। 17 जिव साँझ होई, तो यीशु बारहा चेल्यां कै गेल्या आया। 18 जिव वे बेट्टे खाणा खावै थे, तो यीशु नै कह्या, “मै थमनै साचवी कहूँ सूँ के थारे म्ह तै एक, जो मेरे गेल्या खाणा खाण लागरया सै, वो मन्नै धोक्खा देकै पकड़वावैगा।” 19 उनपै उदासी छाग्यी अर वे एक-एक करके उसतै कहण लागे, “के वो मै सूँ?” 20 उसनै उनतै कह्या, “वो बारहां चेल्यां म्ह तै एक सै, जो मेरे गेल्या थाळी म्ह हाथ घालै सै। 21 क्योंकि मै माणस का बेट्टा तो, जिसा मेरे बारे म्ह पवित्र ग्रन्थ म्ह लिख्या सै; मेरा मर जाणा तो पक्का सै, पर उस माणस पै धिक्कार सै जिसकै जरिये मै माणस का बेट्टा पकड़वाया जाऊँगा! जै उस माणस का जन्म ए नही होँदा, तो उसकै खातर भला होँदा।” 22 जिव वे खाण ए लागरे थे, उसनै रोटी लेके परमेसवर का धन्यवाद करया, अर आशीष माँगकै तोड़ी, अर उन ताहीं दी, अर कह्या, “ल्यो, या मेरी देह सै।” 23 फेर यीशु नै अंगूर के रस का कटोरा लेके परमेसवर का धन्यवाद करया, अर उन ताहीं दिया; अर उन सारया नै उस म्ह तै पिया। 24 अर उसनै उनतै कह्या, “यो अंगूर का रस मेरे लहू नै दर्शावै सै, जिसका करार परमेसवर नै लोगां तै करया जो घणाए खातर बहाया जावै सै।” 25 “थमनै साचवी कहूँ सूँ, के अंगूर के रस नै मै इब तै इसने उस दिन तक नही पीऊँगा, जिव ताहीं परमेसवर के राज्य म्ह थारे गेल्या नया रस नही पीऊँ।” 26 फेर वे भजन गाके बाहरणै जैतून के पहाड़ पै गए। 27 जिव यीशु अर उसके चेल्लें राह म्ह थे, तो उसनै उनतै कह्या, “थम सारे मेरा साथ छोड़के चले जाओगे,” “क्योंके पवित्र ग्रन्थ म्ह लिख्या सै:” मै रुखाळे नै मारूँगा, अर झुण्ड की सारी भेड़ तित्तर-बितर हो जावैगी। 28 पर मै अपने जी उठण के बाद थारे तै पैहल्या गलील परदेस म्ह मिलूँगा। 29 पतरस नै उसतै कह्या, “जै सारे छोड़ै तो छोड़ै, पर मै तेरा साथ कदे नही छोड़ूँगा।” 30 यीशु नै उसतै कह्या, “मै तेरे तै सच कहूँ सूँ आज ए इस्से रात नै मुर्गे के दो बर बाँग देण तै पैहल्या, तू तीन बर मेरे बारे म्ह मुकरेगा।” 31 पर उसनै और भी पक्के विश्वास तै कह्या, “जै मन्नै तेरे गेल्या मरणा भी पड़े, तोभी मै तेरा इन्कार कदे कोनी करूँगा।” इस्से तरियां और सारया चेल्यां नै भी कह्या। 32 फेर यीशु अर उसके चेल्लें गतसमनी नामक बाग म्ह एक जगहां म्ह आए, अर उसनै अपने चेल्यां तै कह्या, “उरै बेट्टे रहो, जिव ताहीं मै प्रार्थना करूँ।” 33 अर वो पतरस, याकूब अर यूहन्ना ताहीं अपने गेल्या लेग्या; अर घणाए काल अर दुखी होण लाग्या, 34 अर उनतै कह्या, “मेरा मन घणा उदास सै, उरै ताहीं के मै मरण पै सूँ: थम उरै ठहरो, अर जागदे रहो।” 35 फेर वो माड़ा आगै सरक्या अर धरती पै पड़के प्रार्थना करण लाग्या के जै हो सकै तो या मुसीबत की घड़ी मेरे पै तै टळ जावै, 36 अर कह्या, “हे अब्बा, हे पिता, तू सारा कुछ कर सकै सै; इस दुख का कटोरे ताहीं मेरे धारे तै हटा ले: तोभी जिसा मै चाहूँ सूँ उसा नही, पर जो तू चाहवै सै वोए हो।” 37 फेर यीशु आया अर चेल्यां ताहीं सोन्दे पाके पतरस तै कह्या, “हे शमौन, तू सोवै सै? के तू एक घड़ी भी कोनी जाग सक्या? 38 जागदे रहो अर प्रार्थना करदे

रहो के थम इम्तिहान म्ह ना पड़ो। इस म्ह कोए शक कोनी के आत्मा तो त्यार सै, पर देह कमजोर सै।” 39 अर यीशु फेर चल्या गया अर दोबारा भी वाए प्रार्थना करी। 40 फेर आके उन ताहीं सोन्दे पाया, क्यूँके चेल्यां की आँख नींद तै भरी थी; अर न्ही जाणै थे, के उसने के जवाब देवै। 41 फेर तीसरी बर आके उनतै कह्या, “थम इब भी सोण लागरे सोण सों? बखत आ लिया; देख्खो, मै माणस का बेट्टा पापियाँ के हाथ्यां पकड़वाया जाऊँ सूँ। 42 उठो, चाल्ला! लखाओ, मेरा पकड़वाण आळा लोवै आण पोंहच्या सै।” 43 यीशु न्यु कहण ए लागरया था के यहूदा जो बारहा चेल्यां म्ह तै एक था, अपने गेल्या प्रधान याजकां अर शास्त्रियाँ अर यहूदी अगुवां की ओड़ तै एक बड़्ही भीड़ लेके जिब्बे आण पोंहच्या, जो तलवार अर लाठी लेरे थे। 44 यीशु कै पकड़वाण आळे नै उन ताहीं यो इशारा दिया था के जिस ताहीं मै चुमूँ वोए यीशु होगा, उस ताहीं पकड़कै सावधानी तै ले जाईयो। 45 वो आया, अर जिब्बे उसकै धोरै जाकै बोल्या, “हे गुरु!” अर उस ताहीं चुम्या। 46 फेर उननै उसपै हाथ गेर कै उस ताहीं पकड़ लिया। 47 उन बारहा चेल्यां म्ह जो धोरै खड़े थे, एक नै तलवार खिंचके महायाजक के नौकर पै चलाई, अर उसका कान उड़ा दिया। 48 यीशु नै उनतै कह्या, “के थम डाकू जाणकै मन्ने पकड़ण के खात्तर तलवार अर लाठी लेके लिक्ड़े सो? 49 मै तो हरेक दिन मन्दर म्ह थारे गेल्या रहकै उपदेश दिया करूँ था, अर जब थमनै मेरे ताहीं कोनी पकड़्या: पर न्यु ज्यातै होया सै के पवित्र ग्रन्थ म्ह लिखी बात पूरी होवै।” 50 यो सब देखके सारे चेल्लें उसनै छोड़के भाजगे। 51 एक जवान अपणी उघाड़ी देह पै चादर ओढ़े होड़ उसकै पाच्छे हो लिया, अर माणसां नै उस ताहीं पकड़्या। 52 पर वो चादर छोड़के उघाड़ा भाजग्या। 53 फेर वे यीशु ताहीं महायाजक के धोरै लेगे, अर सारे प्रधान याजक, यहूदी अगुवें अर शास्त्री उसकै ओढ़े कट्टे होगे। 54 पतरस दूर ए दूर उसकै पाच्छे-पाच्छे महायाजक कै आँगण के भीत्तर ताहीं गया, अर सिपाहियाँ कै गेल्या बैठके आग पै सीकण लाग्या। 55 प्रधान याजक अर यहूदी अगुवां की सभा यीशु ताहीं मारण कै खात्तर उसकै बिरोध म्ह गवाही की टोह म्ह थे, पर कोन्या मिली। 56 क्यूँके घणखरे उसकै बिरोध म्ह झूठी गवाही देवै थे, पर उनकी गवाही एक सी कोनी थी। 57 फेर कुछ माणसां नै उठकै यीशु कै बिरोध म्ह या झूठी गवाही दी, 58 “हमनै इस ताहीं कहन्दे सुणया सै, मै इस हाथ कै बणाए होड़ मन्दर नै गेर दियुँगा, अर तीन दिन म्ह दुसरा बणाऊँगा, जो हाथ्यां तै न्ही बणया हो।” 59 इस बात म्ह भी उनकी गवाही एक सी कोनी लिक्ड़ी। 60 फेर महायाजक नै बिचाळै खड़े होकै यीशु तै बुझ्या, “तू कोए जवाब न्ही देंदा? ये माणस तेरे बिरोध म्ह के गवाही देवें सै?” 61 पर वो बोल-बाल्ला रहया, अर कुछ जवाब न्ही दिया। महायाजक नै उसतै दुबारा बुझ्या, “के तू ए परम धन्य परमेसवर का बेट्टा मसीह सै?” 62 यीशु नै कह्या, “हाँ मै ए सूँ: अर थम मुझ माणस के बेट्टे ताहीं सर्वशक्तिमान परमेसवर की सोळी ओड़ बेट्टे, अर अकास के बादळां कै गेल्या आन्दे देख्खोगे।” 63 फेर महायाजक नै अपने लत्ते पाड़के कह्या,

“इब हमनै गवाह की और के जरूरत सै?” 64 थमनै या बुराई सुणी। थारी के राय सै? उन सारया नै कह्या के यो मारण कै जोग्या सै। 65 फेर कई तो उसपै थूकते, अर कई उसका मुँह ढकते होए, कई उसके घुस्से मारते होए उसतै कहण लाग्गे, जै तू नबी सै, “तो भविष्यवाणी कर!” के तेरे कौण मारे सै, अर सिपाहियाँ नै उस ताहीं पकड़के थप्पड़ मारे। 66 जब पतरस तळै आँगण म्ह था, तो महायाजक की नौकराणियाँ म्ह तै एक उड़ै आई, 67 अर पतरस ताहीं आग सिक्दे देखके उस ताहीं गौर तै देख्या अर कहण लाग्गी, “तू भी तो उस नासरत के यीशु कै गेल्या था।” 68 पतरस मुकरग्या, अर बोल्या, “मै ना ए जाण्दा अर ना ए समझू सूँ के तू के कहवै सै।” फेर वो बाहरणै देहळीया म्ह गया; अर मुर्गे नै बाँग दी। 69 वा नौकराणी उसनै ओढ़ै देखके उनतै जो धोरै खड़े थे, दुबारा कहण लाग्गी, “यो उन म्ह तै एक सै।” 70 पर वो फेर मुकरग्या। माड़ी बार पाच्छे उननै जो धोरै खड़े थे फेर पतरस ताहीं कह्या, “पक्का तू उन म्ह तै एक सै, क्यूँके तू गलीली भी सै।” 71 फेर वो धिक्कारण अर कसम खाण लाग्या, “मै उस माणस नै, जिसका थम जिक्क करो सो, कोनी जाण्दा।” 72 फेर जिब्बे दुसरी बार मुर्गे नै बाँग देई। पतरस ताहीं वाए बात जो यीशु नै उसतै कही थी याद आई “मुर्गे के दो बर बाँग देण तै पैहल्या तू तीन बार मेरा इन्कार करैगा।” अर वो इस बात नै सोचके फूट-फूटके रोण लाग्या।

15 सबेरा होन्दे जिब्बे सारे प्रधान याजकां, यहूदी अगुवां अर शास्त्रियाँ नै बल्के यहूदी अगुवां की सभा नै सलाह करके यीशु ताहीं बंधवाया, अर उस ताहीं ले जाकै यहूदिया परदेस के हाकिम पिलातुस कै हाथ्यां म्ह सौप दिया। 2 पिलातुस नै यीशु तै बुझ्या, “के तू यहूदियाँ का राजा सै?” उसनै उस ताहीं जवाब दिया, “तू आप ए कहण लागरया सै।” 3 प्रधान याजक यीशु पै घणी बातां के इल्जाम लावै थे। 4 पिलातुस नै उसतै फेर बुझ्या, “के तू कुछ जवाब कोनी देंदा, लखा, ये तेरे पै कितनी बातां के इल्जाम लावै सै?” 5 यीशु नै फेर कुछ जवाब कोनी दिया; उरै ताहीं के पिलातुस नै घणी हैरानी होई। 6 पिलातुस उस त्यौहार म्ह किसे एक कैदी नै जिसनै वे चाहवै थे, उन माणसां खात्तर छोड़ दिया करै था। 7 बरअब्बा नाम का एक माणस उन रोळे करणीया गेल्या कैदी था, जिन नै रोळे म्ह खून करया था। 8 अर भीड़ पिलातुस के धोरै जाकै उसतै बिनती करण लाग्गी, के जिसा तू म्हारे खात्तर करदा आया सै उससे तरियां कर। 9 पिलातुस नै उन ताहीं जवाब दिया, “थम के चाहो, के मै थारे खात्तर यहूदियाँ के राजा नै छोड़ दियुँ?” 10 क्यूँके पिलातुस जाणै था के प्रधान याजकां नै यीशु ताहीं चाल तै पकड़वाया था। 11 पर प्रधान याजकां नै माणसां ताहीं उकसाया के वो यीशु की जगहां बरअब्बा नै छोड़ दे। 12 न्यु सुण पिलातुस नै उनतै फेर बुझ्या, “तो जिसनै थम यहूदियाँ का राजा कही सो, उसका मै के करूँ?” 13 वे फेर रुक्के मारण लाग्गे, “उसनै क्रूस पै चढ़ा घो!” 14 पिलातुस नै उनतै फेर कह्या, “क्यातै उसनै के बुरा करया सै?” पर वे और भी रुक्के मारण लाग्गे, “उसनै क्रूस पै चढ़ा घो!” 15 फेर पिलातुस नै भीड़ ताहीं

राज्जी करण की चाहना है, बरअब्बा तारीं उनके खातर छोड़ दिया, अर यीशु के कोरडे लगवाके सिपाहियाँ के हाथ म्ह सौप दिया के क्रूस पै चढ़ाया जावै। 16 यीशु तारीं सिपाही किले कै भीत्तर कै आँगण म्ह ले गये जो प्रिटोरियुम कुहावै सै, अर सारी पलटन तारीं बुला ल्याए। 17 फेर सिपाहियाँ नै उसका मजाक उड़ाण खातर उस तारीं बैजनी लत्ते पिहराए अर काण्डयाँ का मुकुट गूँथके उसके सिर पै धरया, 18 अर न्यू कहकै उस तारीं नमस्कार करण लाग्गे, “हे यहूदियों के राजा, नमस्कार!” 19 वे उसके सिर पै सरकण्डे मारदे, अर उसपै थूकदे, अर गोठ्टे टुक के उसनै प्रणाम करदे रहे। 20 जिब उननै उसका मजाक उड़ा लिया, तो उसपै ते बैजनी लत्ते उतारके उससे के लत्ते पिहराए; अर फेर उस तारीं क्रूस पै चढ़ाण के खातर बाहरणै ले गये। 21 सिकन्दर अर रूफुस का पिता शमौन, जो कुरेन परदेस का बसिन्दा था, वो यरुशलेम की ओड़ आण लागरया था; उननै उस तारीं बेकार म्ह पकड्या ताके यीशु का क्रूस ठाके ले चाल्लै। 22 वे यीशु तारीं गुलगुता नामक जगहां पै लियाए, जिसका मतलब खोपड़ी की जगहां सै। 23 ओड़ै उस तारीं सिरका मिल्या होड़ अंगूर का रस देण लाग्गे, पर उसनै कोनी लिया। 24 फेर उननै उस तारीं क्रूस पै चढ़ाया अर उसके लत्यां पै पर्ची गरे के, के किसनै के मिलै, उननै बांड लिये। 25 अर सबैरे के नौ बजे थे, जिब उननै यीशु तारीं क्रूस पै चढ़ाया। 26 अर उसका दोषपत्र लिखके क्रूस के उप्पर लगा दिया के “यहूदियों का राजा।” 27 उननै उसके गेल्या दो डाकू, एक उसकी सोळी अर एक उसकी ओळी ओड़ क्रूस पै चढ़ा दिये। 28 (तब पवित्र ग्रन्थ का वो वचन के वो अपराधियाँ गेल्या गिणया गया, पूरा होया।) 29 अर राह म्ह जाण आळे सिर हला-हल्लाके अर न्यू कहकै उसकी बेजती करै थे, “वाह! मन्दर के गरेण आळे, अर तीन दिन म्ह बणाण आळे! 30 क्रूस पै तै उतरके अपणे-आपनै बचाले।” 31 इससे तरियां तै प्रधान याजक भी, शास्त्रियाँ सुधा, आप्पस म्ह मजाक करके कहवै थे, “इसनै औरां तारीं बचाया, पर अपणे-आपनै नही बचा सकदा। 32 इस्राएल का राजा, मसीह, इब क्रूस पै तै उतर आ, के हम देखके बिश्वास करया।” अर जो डाकू उसके गेल्या क्रूस पै चढ़ाए गए थे, वे भी उसकी बेजती करै थे। 33 दोफारी होण पै सारे देश म्ह अँधेरा छाग्या, अर तीन बजे तारीं रहया। 34 तीन बजे यीशु नै बड़े जोर तै रुक्के मारके कह्या, “इलोई, इलोई, लमा शबक्तनी?” जिसका मतलब यो सै, “हे मेरे परमेसवर, हे मेरे परमेसवर, तन्नै मेरै तारीं क्यातै छोड़ दिया?” 35 जो धोरे खड़े थे, उन म्ह तै कितन्याँ नै न्यू सुणके कह्या, “लखाओ, वो एलिय्याह तारीं बुलावै सै।” 36 अर एक नै भाजके फोम तारीं सिरके म्ह इबोया, अर सरकण्डे पै धरके उस तारीं चुसाया अर कह्या, “ठैहर जाओ, देख्खां, एलिय्याह उस तारीं उतारण खातर आवै सै के नही।” 37 फेर यीशु नै बड़े जोर तै किल्की मारके जी दे दिया। 38 अर मन्दर का पड़दा उप्पर तै तळै तारीं पाटके दो टुकड़े होग्या। 39 जो सूबेदार उसके स्याम्ही खड्या था, जिब उस तारीं इस ढाळ किल्की मारके जी देन्दे देख्या, तो उसनै कह्या, “साच्चए यो माणस, परमेसवर का बेट्टा

था!” 40 कई बिरबान्नी भी दूर तै देख्खै थी: उन म्ह मरियम मगदलीनी, छोटे याकूब अर योसेस की माँ मरियम, अर सलोमी थी। 41 जिब यीशु गलील परदेस म्ह था, तो ये जनानियाँ जो यीशु की चेल्ली थी, वो उसकी सेवा-पाणी करया करै थी; अर घणखरी बिरबान्नी भी थी, जो उसके गेल्या यरुशलेम नगर तै आई थी। 42 यो आराम के दिन का एक दिन पैहले की तैयारी का दिन था, अर इब साँझ हो गयी थी। 43 अरिमतिया गाम का बासिन्दा यूसुफ आया, जो बड्डी सभा का खास माणस था अर खुद भी परमेसवर के राज्य की बाट देख्खै था। वो हिम्मत करके पिलातुस के धोरे गया अर यीशु की लाश माँगी। 44 पिलातुस नै हैरानी होई के वो इतनी तावळी मरया, उसनै सूबेदार तारीं बुलाके बुझ्या, “के उस तारीं मरे होए वार होई सै?” 45 जिब उसनै सूबेदार के जरिये हालत जाण ली, तो लाश यूसुफ तारीं दुवा दी। 46 फेर उसनै मलमल की एक चादर मोल ली, अर लाश तारीं उतारके उस चादर म्ह लपेटा, अर एक कन्न म्ह जो चट्टान म्ह खोद राक्खी थी धरया, अर कन्न के बारणै पै एक पत्थर गिरड़ा दिया। 47 मरियम मगदलीनी अर योसेस की माँ मरियम देख्खै थी के वो कित्त धरया गया सै।

16 जिब आराम का दिन बीतग्या, तो मरियम मगदलीनी, अर याकूब की माँ मरियम, अर सलोमी नै खसबूदार चीज मोल ली, ताके आके यीशु की लाश पै मळै। 2 हफते के पैहल्ले दिन तड़के ए तड़के सूरज लिकड़ाए था, वे कन्न पै आई, 3 अर आप्पस म्ह कहवै थी, “म्हारै खातर कन्न के दरबाजे पै तै पत्थर कौण गिरड़ावैगा?” 4 जिब उननै कन्न की ओड़ निगांह करी, तो देख्या के पत्थर गिरड़या होया सै! यो घणाए बड़ड़ा था। 5 कन्न के भीत्तर जाके उननै एक जवान तारीं धोळे लत्ते पहरे होड़ सोळी ओड़ बेट्टे देख्या, अर उननै घणी हैरान होई। 6 उसनै उनतै कह्या, “हैरान मतना होवो, थम यीशु नासरी नै टोहो सो, जो क्रूस पै चढ़ाया गया था, वो जिन्दा होग्या सै, अर उरै कोनी; लखाओ, याए वा जगहां सै, जित्त उननै यीशु की लाश तारीं धरया था। 7 पर थम जाओ, अर उसके चेल्यां अर पतरस तारीं कहो के वो थारे तै पैहल्या गलील परदेस म्ह जावैगा। जिसा के उसनै थारे तै कह्या था, थम ओड़ैए उसनै देख्खोगे।” 8 अर वे लिकड़के कन्न तै बाहर भाजग्यी; क्यूँके वे काम्बगी अर उनके घबराट होगी थी; अर उननै किसे तै कुछ नही कह्या, क्यूँके वे डरै थी। 9 (note: The most reliable and earliest manuscripts do not include Mark 16:9-20.) हफते के पैहल्ले दिन सबेर होन्दे यीशु जिन्दा होके पैहलम-पैहल्या मरियम मगदलीनी तारीं जिसम्ह तै उसनै सात ओपरी आत्मा काट्टी थी, दिख्या। 10 उसनै जाके यीशु के साथियाँ तारीं खबर दी, जो दुख म्ह डूबरे थे, अर रोवै थे। 11 उननै न्यू सुणके के वो जिन्दा सै, अर मरियम मगदलीनी नै उस तारीं देख्या सै, उसकी बात का बिश्वास कोनी करा। 12 इसके बाद यीशु दुसरे रूप म्ह उन म्ह तै दो चेल्यां तारीं दिख्या, जिब वे गाम कान्ही जावै थे। 13 उननै भी यरुशलेम नगर तै बोहड़के दुसरयां तारीं इस बारें म्ह खबर दी, पर उननै उनका भी बिश्वास कोनी करया। 14 पाचै यीशु उन ग्यारहां चेल्यां तारीं भी

दिखया, जिब वे खाणा खाण बेठे थे, अर उनकै अबिश्वास अर मन की कठोरता पै उल्हाणा दिया, क्यूँके जिन नै उसकै जिन्दा होण कै पाच्छै उस ताहीं देख्या था, चेल्यां नै उनका भी बिश्वास कोनी करया था। 15 अर यीशु नै उनतै कह्या, “थम सारी दुनिया म्ह जाकै सारी सृष्टि के माणसां ताहीं सुसमाचार प्रचार करो। 16 जो बिश्वास करै अर बपतिस्मा लेवै उस्से का उद्धार होवैगा, पर जो बिश्वास कोनी करैगा वो कसूरवार ठहराया जावैगा; 17 बिश्वास करण आळा म्ह या निशान्नी होवैगी के वे मेरे नाम तै ओपरी आत्मायाँ नै काडुँगें, नई-नई भाषा बोल्लैगें, 18 साँप नै हाथ्यां म्ह ठा लेवैगें, अर जै वे गलती तै जहर भी पी जावै तोभी उनका कुछ न्ही बिगडैगा; वे बिमारां पै हाथ धरैगें, अर वे चंगे हो जावैगें।” 19 फेर प्रभु यीशु उनतै बात करण कै पाच्छै सुर्ग पै ठा लिया गया, अर परमेसवर कै सोळी ओड़ बैठग्या। 20 अर उननै लिकड़कै हरेक जगहां प्रचार करया, अर प्रभु उनकै गेल्या काम करदा रहया, अर उन निशान्नी कै जरिये जो गैल-गैल होवै थे, अर साबित करदा रहया के वचन सच्चा सै। आमीन।

लूका

1 हे जनाब थियुफिलुस, घणखरयां माणसां नै म्हारे बिचाळै घटी बातां का ब्यौरा लिखण की कोशिश करी सै। 2 शुरुआत तै ए जो यीशु मसीह की सेवकाई म्ह साथ थे अर वे बाद म्ह वचन के सेवक बणगे, उननै ए आँखां देक्खी बात म्हारे ताहीं बताई। 3 इस करके हे जनाब थियुफिलुस, मन्ने भी यो ठीक लाग्या के उन सारी बातां का सारा हाल शुरु तै आच्छी दाहूँ परख के, उननै तेरे खात्तर क्रमानुसार लिखूँ 4 के तू या जाण ले के वो बात जिनकी तन्ने शिक्षा पाई सै, वो सच्ची सै। 5 यहूदिया परदेस के राजा हेरोदेस के बखत म्ह अबियाह के टोळ म्ह जकरयाह नाम का एक याजक था, अर उसकी घरआळी का नाम एलीशिबा था, अर दोन्नु हारुन की पीढी के थे। 6 वे दोन्नु परमेसवर के स्याम्ही धर्मी थे, अर प्रभु के सारे हुकम अर नियमां पै बेखोट चालण आळे थे। 7 पर उनके कोए भी ऊलाद कोनी थी, क्यूँके एलीशिबा बाँझ थी, अर वे दोन्नु ए बूढ़े थे। 8 एक दिन मन्दर म्ह जिब याजक के काम की बारी जकरयाह के टोळ की आई, तो वो परमेसवर के स्याम्ही पूजा करण खात्तर ओड़ै मौजूद था, 9 तो याजकां की रीत के मुताबिक उसके नाम की चिट्ठी लिक्की के प्रभु के मन्दर म्ह जाके धूप जळावै। 10 धूप जळाण के बखत माणसां की भीड़ बाहरणै आँगण म्ह प्रार्थना करै थी। 11 उस बखत प्रभु का एक सुर्गदूत धूप की वेदी के सोळी ओड़ खड्या दिख्या। 12 जकरयाह देखके घबराया अर घणा डरग्या। 13 पर सुर्गदूत उसतै बोल्या, “हे जकरयाह, डरै ना, क्यूँके परमेसवर नै तेरी प्रार्थना सुणली सै, अर तेरी घरआळी एलीशिबा तेरे खात्तर एक बेटा जाम्मैगी, अर तू उसका नाम यूहन्ना धरिये। 14 वो तेरे ताहीं तो आनन्द अर खुशी देवैगा, साथ म्ह भोत-से माणस भी उसके जन्म तै राज्जी होवैगें। 15 क्यूँके वो प्रभु के स्याम्ही घणा महान् होगा, अर उस ताहीं कदे भी मदिरा, नशीली चीज न्ही पीणी सै, अर अपणी माँ की कोख तै ए पवित्र आत्मा तै भर ज्यागा। 16 अर इस्राएल के भोत-से माणसां के मन प्रभु परमेसवर की ओड़ मोड़ देवैगा। 17 यूहन्ना एलियाह नबी की आत्मा अर सामर्थ्य म्ह भरा होगा, अर वो परमेसवर के राह नै तैयार करैगा, वो माँ-बाप का मन बाळकां की ओड़ मोड़ देवैगा। हुकम ना मानण आळे अधर्मियाँ की सोच नै धर्मियाँ की सोच म्ह बदल देवैगा।” 18 जकरयाह नै सुर्गदूत तै बुझया, “इस बात का मै किस तरियां बिश्वास करूँ? के यो म्हारे गैल होवैगा, क्यूँके मै तो बूढ़ा सूं, अर मेरी घरआळी भी बूढ़ी होरी सै।” 19 सुर्गदूत नै उसतै जवाब दिया, “मै जिब्राईल सूं, जो परमेसवर के आगै खड्या रहूँ सूं, अर मै तेरे तै बात करण अर सुसमाचार देण खात्तर भेज्या सूं। 20 अर देख जिब ताहीं ये बात पूरी ना हो लेंगी, तू गूँगा रहवैगा अर बोल न्ही पावैगा क्यूँके तन्ने मेरी बातां का बिश्वास न्ही करया, जो अपणे बखत पै पूरी होंगी।” 21 बाहर जकरयाह की बात देखण आळे माणस अचम्भे म्ह पड़गे, के उसनै मन्दर म्ह इतनी वार क्यूँ लागगी। 22 जिब वो बाहर आया, तो उन ताहीं बोल न्ही पाया आखर वो जाणगे के

उसनै मन्दर म्ह कोए दर्शन पाया सै, अर वो उन ताहीं इशारे करदा रह्या, अर गूँगा होग्या। 23 जिब उसकी याजकीय सेवा के दिन पूरे होए, तो वो यरुशलेम नगर नै छोड़ अपणे घरां चल्या गया। 24 कई दिनां पाच्छे उसकी घरआळी एलीशिबा गर्भवती होग्यी, अर पाँच महिन्ने तैई अपणे-आप ताहीं ल्हकोए राख्या, 25 उसनै अपणे-आप तै कह्या, प्रभु नै इन दिनां म्ह दया की मेहर करके मेरे खात्तर इसा करया सै, “के माणसां के बीच म्ह मेरा अपमान दूर हो।” 26 एलीशिबा के छठा महिन्ना चढ़ रह्या था, परमेसवर की ओड़ तै जिब्राईल सुर्गदूत, गलील परदेस के नासरत नगर म्ह, 27 एक कुँवारी के धोरे भेज्या जिसकी सगाई यूसुफ नाम के दाऊद के घराने के एक माणस तै होई थी, उस कुँवारी का नाम मरियम था। 28 जिब्राईल सुर्गदूत नै उसके धोरे आके कह्या, “आनन्द अर जयजयकार तेरी हो तेरे पै ईश्वर का अनुग्रह होया सै! प्रभु तेरे गेल्या सै।” 29 मरियम या बात सुणके भोत घबरा ग्यी, अर सोच म्ह पड़गी के इन बातां का के मतलब हो सके सै? 30 सुर्गदूत नै उसतै कह्या, “हे मरियम, डरै ना, क्यूँके परमेसवर का अनुग्रह तेरे पै होया सै। 31 अर देख, तू गर्भवती होगी, अर तेरे एक छोरा पैदा होगा, तू उसका नाम यीशु धरिये। 32 वो महान् होगा अर परमप्रधान का बेटा कुहावैगा, अर प्रभु परमेसवर उसके पूर्वज दाऊद का सिंहासन उसनै देवैगा, 33 अर वो इस्राएल के घराने पै सदा राज करैगा, अर उसके राज्य का अंत न्ही होगा।” (aiōn g165) 34 मरियम नै सुर्गदूत तै कह्या, “यो किस तरियां होगा। मै तो कुँवारी सूं।” 35 सुर्गदूत नै उस ताहीं जवाब दिया, “पवित्र आत्मा तेरे पै आवैगा अर परमप्रधान की सामर्थ्य तेरे पै छाया करैगी, इस खात्तर वो जो बाळक पैदा होण आळा सै, पवित्र अर परमेसवर का बेटा कुहावैगा। 36 अर सुण, तेरी रिस्तेदार जो एलीशिबा सै उसके भी बुढ़ापे म्ह बेटा होण आळा सै, जो बाँझ कुहावै थी यो उसका, छठा महिन्ना सै। 37 क्यूँके परमेसवर खात्तर कुछ भी मुश्किल कोनी सै।” 38 मरियम नै कह्या, “देख, मै प्रभु की दास्सी सूं, मेरै तै तेरे कहैए वचन के मुताबिक हो।” फेर सुर्गदूत उसके धोरे तै चल्या गया। 39 कई दिनां बाद मरियम तावली तैयार होके पहाड़ी परदेस के यहूदा नगर म्ह ग्यी, 40 अर जकरयाह के घर म्ह जाके एलीशिबा ताहीं नमस्कार करया। 41 ज्योए एलीशिबा नै मरियम का नमस्कार सुण्या, त्योंए बाळक उसके पेट म्ह उछळ्या, अर एलीशिबा पवित्र आत्मा तै भरगी। 42 अर उसनै ऊँच्ची आवाज म्ह बोलके कह्या, “तू बिरबानियाँ म्ह धन्य सै, अर तेरी कोख का फळ धन्य सै। 43 मै खुशानसीब सूं जो प्रभु की माँ मेरै धोरे मिलण खात्तर आई? 44 देख, ज्योए तेरे नमस्कार का बोल मेरै कान्ना म्ह पड्या, त्योंए बाळक मेरै पेट म्ह खुशी तै उछळ पड्या। 45 धन्य सै तू क्यूँके तन्ने बिश्वास करया के जो बात प्रभु नै तेरे ताहीं कही, वे पूरी होई!” 46 फेर मरियम नै कह्या, “मेरा जी प्रभु की बड़ाई करै सै 47 अर मेरी आत्मा मेरै उद्धार करण आळे परमेसवर तै खुश होई,” 48 “क्यूँके उसनै अपणी दास्सी की लाचारी पै निगांहा करी सै, इस खात्तर देखखो, इब तै सारे युग-युग के माणस मन्ने धन्य कहवैगें,” 49 “क्यूँके उस

शक्तिशाली नै मेरै खात्तर बड़े-बड़े काम करै सै। उसका नाम पवित्र सै,” 50 “अर उसकी दया उनपै, जो उसतै डरै सै, पीढ़ी तै पीढ़ी बणी रहवै सै।” 51 “उसनै अपणी शक्ति तै बड़े-बड़े काम करै सै, अर जो अपणे-आप म्ह घमण्ड करै थे, उन ताहीं तित्तर-बितर कर दिया।” 52 “उसनै शासकां ताहीं उनके सिंहासनां पै तै गिरा दिया, अर नम्र लोगां ताहीं ऊँच्चा उठा दिया।” 53 “उसनै भूख्या ताहीं बढ़िया चिज्जां तै छिकाया सै, अर साहूकारां ताहीं खाल्ली हाथ भेज दिया।” 54 “उसनै अपणे सेवक इस्राएल ताहीं सम्भाल लिया, ताके अपणी उस दया नै याद करै,” 55 “जो उसनै अब्राहम अर उसकी पीढ़ी पै सदा खात्तर दया करण का वादा करया सै।” (aiōn g165) 56 मरियम करीब तीन महिन्ने उसकै गेल्या रहकै उल्टी अपणे घरां चली गयी। 57 फेर एलीशिबा कै दिन पूरे होए अर उसनै बेट्टा जाम्या। 58 उसके पड़ोसी अर रिश्तेदारां नै या सुणके के प्रभु नै उसपै बड़ी दया करी सै, उसकै गेल्या खुशी मनाई, 59 आठवे दिन वे बाळक का खतना करण ताहीं आये, अर उसका नाम उसकै पिता के नाम पै जकरयाह धरणा चाहवै थे। 60 इस पर उसकी माँ एलीशिबा नै जवाब दिया, “ना, इसका नाम यूहन्ना धरो।” 61 उननै उस ताहीं कह्या, “तेरे रिश्तेदारा म्ह किसे का यो नाम न्ही सै।” 62 फेर उसकै पिता तै इशारा करके पूछ्या के तू उसका नाम के धरणा चाहवै सै? 63 उसनै लिखण की पट्टी पै लिख दिया, “उसका नाम यूहन्ना सै,” अर सारा नै अचम्भा होया। 64 फेर उसकी आवाज बोहड़ आई, अर वो बोल्लण अर परमेसवर का धन्यवाद करण लाग्या। 65 उसके लोवै-धोरै कै सब रहण आळे डरगे, अर उन सारी बात्तां की चर्चा यूहूदिया परदेस कै सारे पहाड़ी देश म्ह फैलगी, 66 अर सब सुणण आळा नै अपणे-अपणे मन म्ह विचार करके कह्या, “यो बाळक किसा होगा?” क्यूँके प्रभु की शक्ति उसकै साथ सै। 67 उसका पिता जकरयाह पवित्र आत्मा तै भरग्या, अर भविष्यवाणी करण लाग्या: 68 “प्रभु इस्राएल का परमेसवर धन्य सै, क्यूँके उसनै अपणे माणसां पै निगांह करी अर उनका उद्धार करया सै, 69 अर अपणे दास दाऊद के घराने म्ह म्हारै खात्तर एक शक्तिशाली उद्धारकर्ता ताहीं भेज्या सै, 70 (भोत पैहले प्रभु नै अपणे पवित्र नबियाँ कै जरिये यो कह्या था) (aiōn g165) 71 के वो हमनै दुश्मनां तै बचावैगा अर मेरे तै नफरत करण आळे की ताकत तै भी हमनै बचावैगा। 72 उसनै कह्या, के वो म्हारै पूर्वजां पै दया करैगा अर अपणे पवित्र करार नै याद राखवैगा, 73 अर वो करार जो उसनै म्हारै पूर्वज अब्राहम तै करया था, 74 उसनै वादा करया सै, के वो म्हारे दुश्मनां कै हाथ तै हमनै छुड़वैगा, 75 ताके जिन्दगी भर उसकै आगै पवित्रता अर धार्मिकता तै बिना डरें उसकी सेवा कर सकां। 76 हे मेरे बेट्टे, तू परमप्रधान का नबी कुहावैगा, क्यूँके तू प्रभु का रास्ता त्यार करण कै खात्तर आगै-आगै चाल्लैगा, 77 तू उसकै माणसां नै उद्धार का ज्ञान देगा, जो पापां की माफी तै मिले सै। 78 यो म्हारे परमेसवर की उस बड़ी दया तै होगा। जिस तरियां सूरज चमके सै, उसी तरियां मसीहा भी सुर्ग तै म्हारे धोरै आवैगा 79 ताके अन्धेरै अर मौत की छाया म्ह बैठण आळा

नै रोशनी दे, वा रोशनी सही राह पै चाल्लण म्ह म्हारी मदद करैगी।” 80 अर बाळक यूहन्ना देह अर आत्मा म्ह मजबूत होन्दा गया, अर इस्राएल के माणसां पै जाहिर होण तै पैहले वो जंगल-बियाबान म्ह रह्या।

2 उन दिनां म्ह औगुस्तुस कैसर की कान्ही तै हुकम लिक्ड़या के, सारे रोमी साम्राज्य के माणसां की जनगणना करके उनके नाम लिक्खे जावै। 2 (या पैहली नाम लिखाई उस बखत होई, जिब क्विरिनियुस सीरिया परदेस कै इलाके का राज्यपाल था)। 3 सारे माणस नाम लिखाण के खात्तर अपणे-अपणे पुश्तैनी नगर म्ह गए। 4 आखर यूसुफ भी इस करके के वो भी दाऊद के कुण्बे अर पीढ़ी का था, गलील परदेस के नासरत नगर तै गया, यूहूदिया परदेस म्ह दाऊद के बैतलहम नगर म्ह आया, 5 ताके अपणी मंगेर मरियम कै गेल्या जो गर्भवती थी, उस जनगणना म्ह नाम लिखवावै। 6 उनकै बैतलहम नगर रहन्दे होए उसके जाम्मण के दिन पूरे होए, 7 अर मरियम नै अपना जेट्टा छोरा जाम्या अर उस ताहीं लत्ते म्ह लपेटके खोर म्ह धरया, क्यूँके उनके खात्तर सराये म्ह जगहां कोनी थी। 8 अर उस देश म्ह कई पाळी थे, जो रात नै मदानां म्ह रहकै अपणी भेङ्गां के टोळ की रुखाळ करै थे। 9 अर उससे रात नै प्रभु का एक सुर्गदूत उनकै धोरै आण खड्या होया, अर प्रभु का प्रताप उसकै उप्पर चमक्या, अर वे घणे डरगे। 10 सुर्गदूत नै उनतै कह्या, “मतना डरो, क्यूँके देखखों, मै थमनै घणी खुशी की खबर सुणाऊँ सूँ, जो सारे माणसां खात्तर होगी, 11 आज दाऊद कै नगर बैतलहम म्ह थारे खात्तर एक उद्धारकर्ता जाम्या सै, अर योए मसीह प्रभु सै। 12 अर उसकी थारे खात्तर या निशान्नी होगी के थम एक बाळक नै लत्ते म्ह लिपट्या होइ अर खोर म्ह लेट्या होइ पाओगे।” 13 फेर चाणचक उस सुर्गदूत गेल्या सुर्गदूतां का एक टोळ परमेसवर की भगति करदे होए अर न्यू कहन्दे दिख्या, 14 “अकास म्ह परमेसवर की महिमा अर धरती पै उन माणसां म्ह जिनतै वो राज्जी सै, शान्ति हो।” 15 जिब सुर्गदूत उसके धोरै तै सुर्ग म्ह चले गए, तो पाळीयाँ नै आप्पस म्ह कह्या, “आओ, हम बैतलहम नगर जाके या बात जो होई सै, अर जो प्रभु नै म्हारै ताहीं बताई सै, देखखों।” 16 अर उननै जिब्बे जाके मरियम अर यूसुफ ताहीं अर खोर म्ह उस बाळक ताहीं लेट्या देख्या। 17 जिब पाळीयाँ नै बाळक ताहीं देख्या तो उननै वे सारी बात जो सुर्गदूत नै इस बाळक कै बाबत उनतै कही थी, यूसुफ अर मरियम ताहीं बताई। 18 अर पाळीयाँ की ये बात सुणके सारे सुणण आळा नै अचम्भा करया। 19 पर मरियम ये बात अपणे मन म्ह धरके सोचदी रई। 20 अर जिसा पाळीयाँ ताहीं सुर्गदूतां नै कह्या था, सब कुछ उसाए सुणके अर देखके, वे परमेसवर की महिमा अर जय-जयकार करदे होए बोहड़गे। 21 जिब आठ दिन पूरे होए अर उसकै खतने का बखत आया, तो उसका नाम यीशु धरया गया, अर यो नाम सुर्गदूत के जरिये, मरियम के गर्भ म्ह आण तै पैहल्या बताया गया था। 22 जिब मूसा नबी कै नियम-कायदा कै मुताबिक मरियम अर यूसुफ कै सूँच्चे होण के दिन पूरे होए, तो वे दोन्नु यीशु नै यरुशलेम नगर के मन्दर म्ह लेगे के प्रभु कै स्याम्ही ल्याए, 23 (जिसा के प्रभु के नियम-कायदा

मह लिख्या होइ सै: हरेक जेठ्ठा बेट्टा प्रभु कै खात्तर पवित्र ठहरैगा।) 24 अर प्रभु कै नियम-कायदा कै वचन कै मुताबिक “एक कबूतर या मोड्डी कै दो बच्चे ल्याकै बलि करै।” 25 उस बखत यरुशलेम नगर मह शमौन नाम का एक माणस था। वो धर्मी अर परमेसवर का भगत था, अर वो मसीह की बाट देखण लागरया था, ताके इस्राएल के माणसां नै शान्ति मिलै अर पवित्र आत्मा उसपै था। 26 अर पवित्र आत्मा के जरिये उसपै जाहिर होया था के जिन तक वो प्रभु के मसीह नै देख न्ही लेगा, जद ताहीं मौत नै कोनी देखखैगा। 27 शमौन आत्मा की अगुवाई तै मन्दर मह आया, अर जिन माँ-बाप उस बाळक यीशु ताहीं भीत्तर ल्याए, ताके उसके खात्तर नियम-कायदा के रिवाज कै मुताबिक करै, 28 फेर उसनै बाळक यीशु ताहीं अपणी गोद्वी मह लिया अर परमेसवर का धन्यवाद करकै कह्या 29 “हे प्रभु माल्लिक, इब तू अपने दास नै अपने वचन कै मुताबिक शान्ति तै इब मर जाणदे, 30 क्यूँके मेरी आँखां नै उद्धारकर्ता ताहीं देख लिया सै, 31 जिस ताहीं तन्नै सारे देशां के माणसां कै स्याम्ही भेज्या सै, 32 ताके वो गैर यहूदियाँ ताहीं चाँदणा देण कै खात्तर उजाळा, अर तेरे अपने माणस इस्राएल की महिमा हो।” 33 यीशु के माँ-बाप इन बात्तां तै, जो शमौन नै यीशु के बारे मह कही थी, सुणकै अचम्भा करै थे। 34 फेर शमौन नै उन ताहीं आशीर्वाद देकै, उसकी माँ मरियम तै कह्या, “देख, यो बाळक इस्राएल मह भोत-से माणसां के पतन अर उत्थान का कारण बनैगा, अर या निशान्ती के रूप मह परमेसवर की ओड़ तै भेज्या होया सै, अर भोत सारे लोग उसके बिरुध बोल्लैगें। 35 इसका नतिज्जा यो होगा के भोत सारे मनां के विचार जाहिर हो जावेंगे, अर एक भोत बड़ा दुख तेरे पै आवैगा।” 36 अशेर के गोत मह तै हन्नाह नामक फनूएल की बेट्टी एक नबी थी। वा घणी बूढ़ी थी, अर ब्याह होण कै सात साल पाच्छै उसका धणी गुजर गया। 37 वा चौरासी साल तै बिधवा थी: अर मन्दर मह जाणा कोनी छोड्या करै थी, पर ब्रत अर प्रार्थना कर-करकै रात-दिन भगति करया करै थी। 38 जिन यूसुफ, मरियम अर बाळक यीशु, मन्दर मह थे, तो हन्नाह उनके धारे आई अर परमेसवर का धन्यवाद करण लागी, अर उसनै उन सारया ताहीं इस बाळक यीशु के बारे मह बताया, जो यरुशलेम कै छुटकारै की बाट देखखै थे। 39 यहूदी नियम-कायदा नै पूरा करण कै बाद यूसुफ अर मरियम गलील परदेस के नासरत नगर मह अपने घरां बोहड़ आये। 40 अर बाळक यीशु बढ़ा, अर मजबूत होन्दा, अर बुद्धि तै भरपूर होंदा गया, अर परमेसवर का अनुग्रह उसपै था। 41 यीशु के माँ-बाप हरेक साल फसह कै त्यौहार मह यरुशलेम जाया करै थे। 42 जिन यीशु बारहां साल का होया, तो वे त्यौहार की रीति कै मुताबिक यरुशलेम नगर मह गए। 43 जिन यीशु के माँ-बाप त्यौहार मनाकै अपने घरां बोहड़ण लागरे थे, तो बाळक यीशु यरुशलेम मह रहग्या, अर इसका उसके माँ-बाप नै कोनी बेरा था। 44 वे न्यू समझकै के वो दुसरे मुसाफिरां कै गेल्या होगा, एक दिन का सफर पार करगे: अर उस ताहीं अपने कुणबे आळा मह अर जाण-पिच्छाण आळा मह टोहू लाग्गे। 45 पर जिन कोनी मिल्या, टोन्दे-

टोन्दे यरुशलेम मह दुबारे बोहड़गे, 46 अर तीन दिन कै पाच्छै उननै वो मन्दर के आँगण मह उपदेशकां कै बिचाळै बेट्टे, उनकी सुणदे अर उनतै सवाल बुझते पाया। 47 जितने उसकी सुणै थे, वे सारे उसकी समझ अर उसके जवाब तै हैरान थे। 48 फेर उसके माँ-बाप उस ताहीं देखकै हैरान होए अर उसकी माँ नै उसतै कह्या, “हे बेट्टे, तन्नै म्हारे गेल्या इसा बरताव क्यातै करया? देख, तेरा बाप अर मै तन्नै ढूँढ़-ढूँढ़के परेशान होरे थे?” 49 उसनै उनतै कह्या, “थम मन्नै क्यातै टोहो सो? के बेरा कोनी मन्नै मेरे पिता के घरां होणा जरूरी सै?” 50 पर जो बात उसनै उनतै कही, उननै कोनी समझया। 51 फेर वो उनकै गेल्या गया, अर नासरत मह आया, अर उनकै बस मह रह्या, अर उसकी माँ नै ये सारी बात अपने मन मह राक्खी। 52 अर यीशु समझ अर कद-काट्टी मह, अर परमेसवर अर माणसां कै अनुग्रह मह बढ़ा गया।

3 जिन रोम साम्राज्य मह तिबिरियुस कैसर राजा बण्या तो उसके पंद्रहवें साल मह जिन चौथाई देश मह पुन्तियुस पिलातुस यहूदिया परदेस का राज्यपाल था, अर हेरोदेस गलील परदेस मह इत्रैया अर त्रखोनितिस परदेस मह उसका भाई फिलिप्पुस राज करै था, अर अबिलेने परदेस मह लिसानियास राज करै था 2 अर जिन हन्ना अर कैफा महायाजक थे, उस बखत परमेसवर का वचन जंगल-बियाबान मह जकरयाह के बेट्टे यूहन्ना के धारे पोंहच्या। 3 यूहन्ना यरदन नदी कै लोवै-धोवै के साब्ले परदेस मह जाकै, पापां की माफी का प्रचार करण लागग्या, के पाप करणा छोड़ दो अर बपतिस्मा ल्यो। 4 जिसा यशायाह नबी के कहे होए वचनां की किताब मह लिख्या सै: “जंगल-बियाबान मह एक रुक्के मारणीये का वचन होरया सै के, प्रभु की राही त्यार करो, उसकी सड़क सीध्दी बनाओ। 5 हरेक घाटी भर दी जावैगी, अर हरेक पहाड़ अर टिल्ला तळै करया जावैगा, अर जो टेढ़ा सै सीध्दा, अर जो ऊँच्चा नीच्चा सै वो बरोब्बर राह बनैगा। 6 अर हरेक माणस परमेसवर के उद्धार नै देखखैगा।” 7 जो भीड़ की भीड़ उसतै बपतिस्मा लेण नै लिकड़ के आवै थी, उनतै यूहन्ना कहवै था, “हे साँप के सप्पोलों जिसे माणसों, थारे तै कौण बताग्या के परमेसवर के आण आळे छो तै भाग्यो। 8 इस खात्तर जै थमनै सच मह पाप करणा छोड़ दिया सै तो यो दिखाण खात्तर भले काम तो करो, अर अपने-अपणे मन मह न्यू मतना सोच्यो के हम अब्राहम के वंश तै सां, क्यूँके मै थमनै कहूँ सूँ के परमेसवर इन पत्थरां तै भी अब्राहम के खात्तर ऊलाद पैदा कर सकै सै। 9 इब कुहाड़ा दरखतां की जड़ पै धरया सै, इस करकै जो-जो दरखत बढ़िया फळ न्ही ल्यांदा, वो काट्या अर आग मह झोक्या जावैगा।” इसका मतलब यो सै परमेसवर उन सारया नै दण्ड देवैगा जो पाप करणा न्ही छोड़ते। 10 फेर माणसां नै उसतै बुझया, “तो हम परमेसवर के दण्ड तै बचण खात्तर के करा?” 11 उसनै जवाब दिया, “जिसके धारे दो कुड़ते हों, वो उसके गेल्या जिसके धारे न्ही सै उसके गैल बांड ल्यो अर जिसके धारे खाणा हो, वो भी न्यूए करै।” 12 चुंगी लेण आळे भी बपतिस्मा लेण

आए, अर उसतै बुझया, “हे गुरु, हम के करा?” 13 उसनै उनतै कह्या, “ईमानदार रहों अर जितना रोमी सरकार नै कर तय करया सै, उसतै ज्यादा ना लियो।” 14 कुछ सिपाहियों नै भी उसतै बुझया, “हम के करा?” उसनै उनतै कह्या, “किसे पै जुल्म करके पईसे ना लियो, अर ना झूठा इल्जाम लाइयो, अर अपनी तन्खा पै संतोष करियो।” 15 जिव माणस मसीहा की आस लगाये होए थे, अर सारे अपणे-अपणे मन म्ह यूहन्ना के बाबत विचार कररे थे, के योए मसीह तो न्ही सै। 16 तो यूहन्ना नै उन सारया तै कह्या, “मै तो धमनै पाणी तै बपतिस्मा दियुं सूं, पर वो आण आळा सै, जो मैरै तै घणा शक्तिशाली सै, मै तो इस लायक भी कोनी के उसके जूयूँ के फिते खोल सकूँ, वो धमनै पवित्र आत्मा अर आग तै बपतिस्मा देवैगा। 17 उसका छाज, उसके हाथ म्ह सै, अर वो अपना खलिहाण आच्छी तरियां साफ करैगा, अर नाज नै अपणे कोठार (गोदाम) म्ह कट्टा करैगा, पर भुरळी ताहीं उस आग म्ह जळावैगा जो कदे बुझै कोनी।” 18 आखर वो घणीए शिक्षा दे-देकै माणसां तै सुसमाचार सुणान्दा रह्या। 19 पर जिव उसनै चौथाई देश म्ह गलील परदेस के राजा हेरोदेस तै उसके भाई फिलिप्पुस की घरआळी हेरोदियास के बाबत अर सारे बुरे काम्मां के बाबत जो उसनै करे थे, उल्हाणा दिया, 20 तो हेरोदेस नै उन सारया तै बढ़कै यो बुरा काम भी करया के यूहन्ना ताहीं जेळ म्ह गेर दिया। 21 जिव सारे माणसां नै बपतिस्मा लिया अर यीशु भी बपतिस्मा लेकै प्रार्थना कर रह्या था, तो अकास खुलग्या, 22 अर पवित्र आत्मा शारीरिक रूप म्ह कबूतर की तरियां उसपै उतरया, अर परमेसवर सुर्ग म्ह तै बोल्या “तू मेरा प्यारा बेटा सै, मै तेरतै राज्जी सूं।” 23 जिव यीशु खुद उपदेश देण लागग्या, तो करीबन तीस साल की उम्र का था अर (जिसा समझा जावै सै) यीशु यूसुफ का बेटा था, अर यूसुफ एली का बेटा था, 24 अर एली मत्तात का बेटा था, अर मत्तात लेवी का बेटा था, अर लेवी मलकी का बेटा था, अर मलकी यन्ना का बेटा था, अर यन्ना यूसुफ का बेटा था, 25 अर यूसुफ मत्तित्याह का बेटा था, अर मत्तित्याह आमोस का बेटा था, अर आमोस नहूम का बेटा था, अर नहूम असल्याह का बेटा था, अर असल्याह नोगह का बेटा था, 26 अर नोगह मात का बेटा था, अर मात मत्तित्याह का बेटा था, अर मत्तित्याह शिमी का बेटा था, अर शिमी योसेख का बेटा था, अर योसेख योदाह का बेटा था, 27 अर योदाह यूहन्ना का बेटा था, अर यूहन्ना रेसा का बेटा था, अर रेसा जरुब्बाबिल का बेटा था, अर जरुब्बाबिल शालतियेल का बेटा था, अर शालतियेल नेरी का बेटा था, 28 अर नेरी मलकी का बेटा था, अर मलकी अदी का बेटा था, अर अदी कोसाम का बेटा था, अर कोसाम इलमोदाम का बेटा था, अर इलमोदाम एर का बेटा था, 29 अर एर येशू का बेटा था, अर येशू इलाजार का बेटा था, अर इलाजार योरीम का बेटा था, अर योरीम मत्तात का बेटा था, अर मत्तात लेवी का बेटा था, 30 अर लेवी शमौन का बेटा था, अर शमौन यहूदा का बेटा था, अर यहूदा यूसुफ का बेटा था, अर यूसुफ योनान का बेटा था, अर योनान इलयाकीम का बेटा था, 31 अर इलयाकीम

मलेआह का बेटा था, अर मलेआह मिन्नाह का बेटा था, अर मिन्नाह मत्तात का बेटा था, अर मत्तात नातान का बेटा था, अर नातान दाऊद का बेटा था, 32 अर दाऊद यिशै का बेटा था, अर यिशै ओबेद का बेटा था, अर ओबेद बोआज का बेटा था, अर बोआज सलमोन का बेटा था, अर सलमोन नहशोन का बेटा था, 33 अर नहशोन अम्मीनादाब का बेटा था, अर अम्मीनादाब अरनी का बेटा था, अर अरनी हिंसोन का बेटा था, अर हिंसोन फिरिस का बेटा था, अर फिरिस यहूदा का बेटा था, 34 अर यहूदा याकूब का बेटा था, अर याकूब इसहाक का बेटा था, अर इसहाक अब्राहम का बेटा था, अर अब्राहम तिरह का बेटा था, अर तिरह नाहोर का बेटा था, 35 अर नाहोर सरुग का बेटा था, अर सरुग रऊ का बेटा था, अर रऊ फिलिग का बेटा था, अर फिलिग एबिर का बेटा था, अर एबिर शिलह का बेटा था, 36 अर शिलह केनान का बेटा था, अर केनान अरफक्षद का बेटा था, अर अरफक्षद शेम का बेटा था, अर शेम नूह का बेटा था, अर नूह लिमिक का बेटा था, 37 अर लिमिक मथूशिलह का बेटा था, अर मथूशिलह हनोक का बेटा था, अर हनोक यिरिद का बेटा था, अर यिरिद महललेल का बेटा था, अर महललेल केनान का बेटा था, 38 अर केनान एनोश का बेटा था, अर एनोश शेत का बेटा था, अर शेत आदम का बेटा था, अर आदम परमेसवर का बेटा था।

4 फेर यीशु पवित्र आत्मा तै भरया होया, यरदन नदी तै बोहड़या, अर चाळीस दिन ताहीं पवित्र आत्मा कै सिखाण तै जंगल-बियाबान म्ह हाण्डदा रहया, 2 उन चाळीस दिनां म्ह शैतान उस ताहीं परखता रहया। उन दिनां म्ह उसनै कुछ न्ही खाया, अर जिव वे दिन पूरे होए, तो उसनै भूख लाग्गी। 3 फेर शैतान नै उसतै कह्या, “जै तू परमेसवर का बेटा सै, तो साबित करदे, अर इस पत्थर तै कह, के रोटी बण जावै, ताके तू इननै खा सकै।” 4 यीशु नै उस ताहीं जवाब दिया, “पवित्र ग्रन्थ म्ह लिख्या सै: ‘माणस सिर्फ रोटी तै जिन्दा कोनी रहन्दा।’” 5 फेर शैतान उसनै घणे ऊँच्चे पहाड़ पै लेग्या अर उस ताहीं माड़ी वार म्ह दुनिया के राज्य दिखाए, 6 अर उसतै बोल्या, “मै यो सारा हक, अर उसकी शानों-शोकत तन्नै दियुंगा, क्यूँके वो मैरैतै सौंप्या गया सै: अर जिसनै चाहूँ उसनै दे दियुं सूं। 7 इस करके जै तू मेरी भगति करै, तो यो सब कुछ तेरा हो ज्यागा।” 8 यीशु नै उस ताहीं जवाब दिया, “लिख्या सै: ‘तू प्रभु अपणे परमेसवर की भगति कर, अर सिर्फ उरसे की भगति कर।’” 9 फेर उसनै उस ताहीं पवित्र नगर यरुशलेम म्ह ले जाके मन्दर की चौटी पै खड्या करया अर उसतै बोल्या, “जै तू परमेसवर का बेटा सै, तो अपणे-आपनै उरै तै तळे गेर दे अर अपणे-आपनै साबित करदे।” 10 “क्यूँके पवित्र ग्रन्थ म्ह लिख्या सै: ‘वो तेरे बाबत अपणे सुर्गदूतां नै हुकम देवैगा, के वे तेरी रुखाळी करै,’” 11 “अर वे तन्नै हाथों-हाथ उठा लेवैगें, इसा ना हो के तेरे पायां म्ह पत्थर तै ठेस लागौ।” 12 यीशु नै उस ताहीं जवाब दिया, “पवित्र ग्रन्थ म्ह यो भी लिख्या सै: ‘तू प्रभु अपणे परमेसवर नै ना परखै।’” 13 जिव शैतान उस ताहीं परख कै हार लिया,

तो कुछ बखत खात्तर उसके धोरे तै चल्या गया। 14 फेर यीशु पवित्र आत्मा की सामर्थ तै भरया होइ गलील परदेस बोहड़या, अर उसकी चर्चा लोवै-धोवै के सारे देशां म्ह फैलगी। 15 वो उनके आराधनालयों म्ह उपदेश सुणान्दा रह्या, अर सारे उसकी बड़ाई करै थे। 16 फेर यीशु नासरत नगर म्ह आया, जइ पाळा-पोस्या गया था, अर अपनी रीति कै मुताबिक आराम कै दिन आराधनालय म्ह जाकै पवित्रग्रन्थ पढ़ण कै खात्तर खड्या होया। 17 यशायाह नबी की किताब उस ताहीं दी गई, अर उसनै किताब खोल कै, वा जगहां लिकाड़ी जइ लिख्या था: 18 “प्रभु का आत्मा मेरे पै सै, इस करके के उसनै कंगालां ताहीं सुसमाचार सुणाण कै खात्तर मेरा अभिषेक करया सै, अर मेरे ताहीं इस करके भेज्या सै के कैदियाँ नै छुड़ाण का अर आंध्याँ नै देखण जोगगा बणाण की खुशी की खबर का प्रचार करूँ अर कुचले होया नै छुड़ाऊँ, 19 अर प्रभु कै राज्जी रहण कै साल का प्रचार करूँ।” 20 फेर यीशु नै किताब बन्द करके सेवक कै हाथ्यां म्ह दे दी अर बैठग्या, अर आराधनालय के सारे माणसां की निगांह उसपै थी। 21 फेर वो उनतै कहण लागग्या, “आज ए यो पवित्र ग्रन्थ म्ह लिख्या होइ वचन थारे स्याम्ही पूरा होया।” 22 सारया नै उस ताहीं सराहया, अर जो अनुग्रह की बात उसके मुँह तै लिकड़ै थी, उनतै हैरान होए, अर कहण लाग्गे, “के यो यूसुफ का छोरा कोनी?” 23 उसनै उनतै कह्या, “थम मेरे पै या कहावत जरूर कहोगे के हे वैद्य, खुद नै ठीक कर! जो कुछ हमनै सुणया के कफरनहूम नगर म्ह करया गया सै, उसनै उरै खुद कै नगर म्ह भी कर।” 24 अर उसनै कह्या, “मै थमनै सच-सच कहूँ सूँ कोए नबी अपने गाम म्ह आदर-मान कोनी पान्दा। 25 मेरी सुणो, के एलियाह नबी कै दिनां म्ह जबि साढ़े तीन साल ताहीं अकास तै बारिस न्ही होई, उरै ताहीं के सारे देश म्ह बड़्या अकाळ पड्या, तो इस्राएल देश म्ह घणीए बिधवा थी। 26 पर एलियाह उन म्ह तै किसे कै धोरे कोनी भेज्या गया, सिर्फ सैदा परदेस कै सारफत नगर म्ह एक बिधवा कै धोरे। 27 अर एलीशा नबी कै बखत इस्राएल देश म्ह घणे कोढ़ी थे, पर सीरिया परदेस का सेनापति नामान नामक कोढ़ी नै छोड़के उन म्ह तै कोए शुद्ध कोनी करया गया।” 28 ये बात सुणद-ए जितने आराधनालय म्ह थे, सारया कै छो उठग्या, 29 अर उठके उस ताहीं नगर तै बाहरणै लिकाड़या, अर जिस पहाड़ पै उनका नगर बसरया था, उसकी चोटी पै ले चाल्ले, ताके उसनै उड़ै तै तळै गेरैके मार दें। 30 पर यीशु उनके बिचाळै तै लिकड़के चल्या गया। 31 फेर वो गलील परदेस कै कफरनहूम नगर म्ह गया, अर आराम कै दिन माणसां ताहीं उपदेश देवै था। 32 वे उसके उपदेश तै हैरान होगे क्यूँके उसका वचन हक सुधां था। 33 आराधनालय म्ह एक माणस था, जिस म्ह ओपरी आत्मा थी, उसनै जोर तै किल्की मारी, 34 “हे नासरत के यीशु, हमनै तेरे तै के काम? के तू म्हारा नाश करण नै आया सै? मै तन्नै जाणु सूँ, तू कोण सै? तू परमेसवर की ओड़ तै भेज्या होया पवित्र मसीह सै!” 35 यीशु नै उसतै धमकाके कह्या, “चुपचाप रहै, अर इस माणस म्ह तै लिकड़ जा!” फेर ओपरी आत्मा उसनै बिचाळै पटकके बिना नुकसान

करे उस म्ह तै लिकड़गी 36 इसपै सारे हैरान होए, अर वे आप्पस म्ह बतळाण लाग्गे, “यो किसा वचन सै? क्यूँके वो हक अर सामर्थ कै गेल्या ओपरी आत्मायाँ नै हुकम देवै सै, अर वे लिकड़ जावै सै।” 37 इस करके चौगरदे नै हरेक जगहां उसका जिक्र होण लाग्या। 38 यीशु आराधनालय म्ह तै उठके शमौन कै घरां गया। शमौन की सास्सू कै बुखार चढ़रया था, अर उननै उस खात्तर उसतै बिनती करी। 39 उसनै उसके धोरे खड्या होकै बुखार ताहीं धमकाया अर बुखार उतर गया, अर वो जिब्बे उठके उनकी सेवा-पाणी करण लागगी। 40 सूरज डूबदे बखत, जिन-जिनके उरै माणस कई ढाळ की बिमारियाँ म्ह पड़े होए थे, वे सारे उननै उसके धोरे ल्याए, अर उसनै एक-एक पै हाथ धरके उन ताहीं ठीक करया। 41 अर ओपरी आत्मा भी किल्की मारदी अर न्यू कहन्दी होई के, “तू परमेसवर का बेटा सै” घणखरया म्ह तै लिकड़गी। पर वो उननै धमकांदा अर बोल्लण न्ही देवै था, क्यूँके वे जाणे थी के यीशु ए परमेसवर की ओड़ तै भेज्या होया मसीह सै। 42 जबि सबेरे होई तो यीशु लिकड़के एक बियाबान जगहां म्ह गया, अर भीड़ की भीड़ उसनै टोह्न्दी होई उसके धोरे आई, अर उसनै रोकण लागगी के वो उनके धोरे तै न्ही जावै। 43 पर उसनै उनतै कह्या, “मन्नै दुसरे नगरां म्ह भी परमेसवर कै राज्य का सुसमाचार सुणाणा जरूरी सै, क्यूँके मै इसे खात्तर भेज्या गया सूँ।” 44 अर वो गलील परदेस के आराधनालयों म्ह उपदेश सुणान्दा रह्या।

5 जबि यीशु गन्नेसरत की झील कै किनारे पै खड्या था, तो भीड़ परमेसवर का वचन सुणण कै खात्तर उस ताहीं घेरे खड़ी थी, तो इसा होया 2 के उसनै झील कै किनारे दो किस्ती लागगी होइ देकखी, अर मछुआरे उनपै तै उतरके मच्छियाँ के जाळ नै धोवै थे। 3 उन किस्तियाँ म्ह तै एक पै, जो शमौन की थी, चढ़के यीशु नै उसतै बिनती करी के किनारे तै माड़ा सा डिगा ले चाल्ले। फेर वो किस्ती पै बैठके माणसां नै उपदेश देण लागग्या। 4 जबि यीशु नै माणसां तै ये बात कर ली, तो शमौन तै बोल्या, “हुँघ्ये म्ह ले चाल, अर मच्छी पकड़ण खात्तर अपना जाळ गेर।” 5 शमौन नै उसतै जवाब दिया, “हे गुरु, हमनै सारी रात मेहनत करी अर कुछ न्ही मिल्या, फेरभी तेरे कहण तै जाळ गेरूँगा।” 6 जबि पतरस अर उसके साथियाँ नै इसा करया, तो घणी मच्छी घेर ल्याए, अर उनके जाळ पाटण नै होण लाग्गे। 7 इस करके उननै दुसरी किस्ती म्ह बेट्टे अपने साथियाँ ताहीं भी इशारा करके मदद खात्तर बुलाया, वे आ ग्ये अर उननै आके दोन्नु किस्ती उरै ताहीं भर ली के डूबण लागगी। 8 न्यू देखके शमौन पतरस यीशु कै पायां म्ह पड़ग्या, अर बोल्या, “हे प्रभु, मेरे धोरे तै जा, क्यूँके मै पापी माणस सूँ।” 9 क्यूँके इतनी मच्छियाँ कै पकड़े जाण तै उसनै अर उसके साथियाँ नै घणा अचम्भा होया, 10 अर उससे तरियां जब्दी के बेट्टे याकूब अर यूहन्ना नै भी, जो शमौन के दुसरे साथी थे, अचम्भा होया। फेर यीशु नै शमौन तै कह्या, “मतना डरो, इब तै मै थमनै माणसां ताहीं कट्टे करण आळे बणाऊँगा ताके वो मेरे चेल्लें बणे।” 11 अर वे किस्तियाँ नै किनारे पै

लियाए अर वे जिब्बे सब कुछ छोड़के उसके चेल्लें बणण खात्तर उसके पाच्छे हो लिये। 12 जिब वो किसे नगर म्ह था, तो उड़े कोढ़ तै भरया होया एक माणस आया, अर उसने यीशु तार्हीं देखके अर मोध्या पड़के बिनती करी, “हे प्रभु, जै तू चाहवै तो मन्ने ठीक कर सकै सै।” 13 उसनै हाथ बढ़ाके उस तार्हीं छुया अर बोल्या, “मै चाहूँ सूँ, तू इस बीमारी तै ठीक हो ज्या।” अर उसका कोढ़ जिब्बे जान्दा रह्या। 14 फेर उसनै उस तार्हीं समझाके कह्या, “किसे तै ना कहिए, पर जाके अपणे-आपनै याजक तार्हीं दिखा, अर अपणे कोढ़ तै ठीक होण कै बारै म्ह जो कुछ मूसा नबी नै जो पवित्र ग्रन्थ म्ह चढ़ावा बताया सै उसनै चढ़ा, के माणसां खात्तर या गवाही हो, के तू ठीक होग्या सै।” 15 पर यीशु का जिक्र हरेक जगहां फैल्दा गया, अर भीड़ की भीड़ उसकी सुणण कै खात्तर अर अपणी बिमारियाँ तै ठीक होण कै खात्तर कट्टी होई। 16 पर वो सुनसान जगहां म्ह न्यारा जाके प्रार्थना करया करै था। 17 एक दिन इसा होया के यीशु उपदेश देण लागरया था अर ठीक करण खात्तर प्रभु की सामर्थ उसके गेल्या थी, अर फरीसी अर शास्त्री उड़ैए बेट्टे थे, जो गलील अर यहूदिया परदेस के हरेक गाम अर यरुशलैम नगर तै आए थे। 18 उस बखत कई माणस एक माणस नै जो लकवे का बीमार था, खाट पै ल्याए, अर वे उसनै भीत्तर ले जाण अर यीशु कै स्याम्ही धरण का जुगाड़ तोह लागरे थे। 19 पर जिब भीड़ कै कारण उसनै भीत्तर कोनी ले जा सके तो उननै छात पै चढ़के अर टाट्टी हटाके, उस तार्हीं बिस्तर समेत बिचाळे यीशु कै स्याम्ही उतार दिया। 20 उसनै उनका बिश्वास देखके उसतै बोल्या, “हे भाई, मन्ने तेरे पाप माफ कर दिये।” 21 फेर शास्त्री अर फरीसी बहस करण लागे, “यो कौण सै जो परमेसवर की बुराई करै सै? परमेसवर नै छोड़ और कौण पाप माफ कर सकै सै?” 22 यीशु नै उनकै मन की बात जाणके, उनतै कह्या, “थम अपणे मन म्ह क्यूँ विवाद करण लागरे सो की मै परमेसवर की बुराई करूँ सूँ? 23 आसान के सै? के यो कहणा के ‘तेरे पाप माफ होए’, या यो कहणा के ‘उठ अर हॉड-फिर’? 24 पर इस करके के थम जाणो, के मुझ माणस के बेट्टे नै धरती पै पाप माफ करण का भी हक सै।” उसनै उस लकवे के मरीज तै कह्या, “मै तेरे तै कहूँ सूँ के अपणे बिस्तर ठाके अपणे घरां चल्या जा।” 25 वो जिब्बे उनकै स्याम्ही उठ्या, अर जिस खाट पै पड्या था उसनै ठाके, परमेसवर की बड़ाई करदा होया अपणे घरां चल्या गया। 26 फेर सारे हैरान होए अर परमेसवर की बड़ाई करण लागे अर घणे डरके बोल्ले, “आज हमनै अनोक्खी बात देखी सै।” 27 इसके बाद यीशु बाहरणै गया अर लेवी नाम के एक चुंगी लेण आळे तार्हीं चौकी पै बेट्टे देख्या, अर उसतै बोल्या, “मेरा चेल्ला बणण खात्तर मेरै पाच्छे हो ले।” 28 फेर वो सारा कुछ छोड़के उसके पाच्छे हो लिया। 29 फेर लेवी नै अपणे घरां उसके खात्तर बड़ड़ा जिम्मण का न्यौदा दिया, अर चुंगी लेण आळे अर दुसरे माणसां की जो उसके गेल्या खाणा खाण नै बेट्टे थे, एक बड्डी भीड़ थी। 30 इसपै फरीसी अर उनके शास्त्री उसके चेल्यां तै न्यू कहके बिरड़ाण लागे, “थम चुंगी लेण आळे अर जिननै लोग

पापी कहवै सै, उनकै गेल्या खाओ-पीओ सो?” 31 यीशु नै उनतै जवाब दिया, “वैद आच्छे-बिच्छयां खात्तर कोनी, पर बिमारां खात्तर जरूरी सै। 32 मै धर्मियाँ नै न्ही, पर पापियाँ नै मन पलटन कै खात्तर बुलाण आया सूँ।” 33 उननै उसतै कह्या, “यूहन्ना के चेल्लें तो बराबर ब्रत अर प्रार्थना करया करै सै अर उससे तरियां फरीसियाँ के चेल्लें भी, पर तेरे चेल्लें तो खवै-पिवै सै।” 34 यीशु नै उनतै कह्या, “के थम बरातियाँ तै, जिब्बतार्हीं बन्दड़ा उनकै गेल्या रहवै, ब्रत करा सको सो?” 35 “पर वे दिन भी आवैगें, जिब बन्दड़ा न्यारा करया जावैगा, फेर वे उन दिनां म्ह ब्रत करैगें।” 36 यीशु नै एक और उदाहरण दिया, “कोए माणस नये लत्यां म्ह तै पाड़के पुराणे लत्यां पै थेगळी न्ही लगान्दा, न्ही तो नया पाट ज्यागा अर वा थेगळी पुराणे पै मेळ भी न्ही खवैगी। 37 अर कोए नया अंगूर का रस पुराणी मशक म्ह न्ही भरदा, न्ही तो नया अंगूर का रस पुराणी मशकां नै पाड़के बह ज्यागा, अर मशक फूट ज्या सै। 38 पर नया अंगूर का रस नई मशकां म्ह भरणा चाहिए। 39 कोए माणस पुराणा अंगूर का रस पीके नया अंगूर का रस कोनी चाहन्दा क्यूँके वो कहवै सै, के पुराणा-ए बढिया सै।”

6 फेर आराम कै दिन यीशु चेल्यां कै गैल खेतां म्ह तै होके जाण लागरया था, अर उसके चेल्लें गेहूँ की बालें तोड़-तोड़के अर हाथ्यां तै मसळ-मसळ कै खाण लागरे थे। 2 फेर फरीसियाँ म्ह तै कुछ कहण लागे, “थम यो काम क्यताँ करो सो जो आराम कै दिन करणा ठीक कोनी?” 3 यीशु नै उनतै जवाब दिया, “के थमनै पवित्र ग्रन्थ म्ह यो न्ही पढ्या के दाऊद नै, जिब वो अर उसके साथी भूक्खे थे तो के करया? 4 वो किस तरियां परमेसवर कै घर म्ह गया, अर भेंट की रोटी खाई, जिनका खाणा याजकां नै छोड़ और किसे खात्तर ठीक कोनी, अर अपणे साथियाँ तार्हीं भी दी?” 5 अर उसनै उनतै कह्या, “मै माणस का बेट्टा आराम कै दिन का भी प्रभु सूँ।” 6 इसा होया के किसे और आराम कै दिन वो आराधनालय म्ह जाके उपदेश देण लाग्या, अर उड़े एक माणस था जिसका सोळा हाथ सूखरया था। 7 शास्त्री अर फरीसी यीशु पै दोष लाण के मौक्के की टाह म्ह थे के देखे वो आराम कै दिन ठीक करै सै के न्ही। 8 पर वो उनकी सोच जाणै था, इस करके उसनै सूखे हाथ आळे माणस कह्या, “उठ, बिचाळे खड्या होज्या।” वो उठ खड्या होया। 9 यीशु नै उनतै कह्या, “मै थारे तै बुड़्यु सूँ के मूसा के नियम-कायदा कै मुताबिक आराम कै दिन के ठीक सै, भला करणा या बुरा करणा, जान बचाणा या नाश करणा?” 10 फेर उसनै चोगरदेने उन सारया कान्ही देखके उस सूखे हाथ आळे माणस तै बोल्या, “अपणा हाथ बढ़ा।” उसनै न्यूए करया, अर उसका हाथ दुबारा ठीक होग्या। 11 पर वे फरीसी अर शास्त्री आप्पे तै बाहर होके आप्पस म्ह बहस करण लागे के हम यीशु कै गैल के करा? 12 उन दिनां म्ह यीशु पहाड़ पै प्रार्थना करण लागग्या, अर परमेसवर तै प्रार्थना करण म्ह सारी रात बिताई। 13 जिब दिन लिकड़या तो उसनै अपणे चेल्यां तार्हीं बुलाके उन म्ह तै बारहां छाँट लिए, अर उन तार्हीं प्रेरित कह्या, 14 अर वे ये सै: शमीन जिसका नाम

उसने पतरस भी धरया, अर उसका भाई अन्द्रियास, अर याकूब, अर यूहन्ना, अर फिलिप्पुस, अर बरतुलमै, 15 अर मत्ती, अर थोमा, अर हलफर्ड का बेटा याकूब, अर शमौन जो जेलोतेस कुहावै सै, 16 अर याकूब का बेटा यहूदा, अर यहूदा इस्करियोती जो उसका पकड़वाण आळा बणया। 17 फेर यीशु उनके गेल्या उतरके चौरस जगहां म्ह खड्या होया, अर उसके चेल्यां की बड्डी भीड़, अर सारे यहूदिया परदेस अर यरुशलम नगर, सूर अर सैदा नगर के समुन्दर के किनारे तै घणे माणस, 18 जो उसकी सुणण अर अपणी बिमारियाँ तै चंगे होण खात्तर उसके धोरै आए थे, उडै थे, अर ओपरी आत्मा तै सताए होए भी ठीक करे जावै थे। 19 सारे उसने छूणा चाहवै थे, क्यूँके उस म्ह तै सामर्थ लिकड़के सारया नै ठीक करै थी। 20 फेर यीशु नै अपणे चेल्यां कान्ही देखके कह्या, “धन्य सो थम जो दीन सो, क्यूँके परमेसवर का राज्य थारा सै।” 21 धन्य सो थम जो इब भूक्खे सो, क्यूँके थम परमेसवर के जरिये छिकाए जाओगे। धन्य सो थम जो इब रोओ सो, क्यूँके हांसोगे। 22 धन्य सो थम जिब मुझ माणस के बेटे के बाबत माणस थारे तै बैर करैगें, अर थमने लिकाड़ देवैगें, अर थारी बुराई करैगें, अर थारा नाम बुरा जाणके काट देवैगें। 23 उस दिन आनन्द तै उछळियो, क्यूँके लखाओ, थारे खात्तर सुर्ग म्ह बड़ड़ा ईनाम सै, उनके पूर्वजां नै भी नबियाँ के गेल्या भी इसाए करया करै थे। 24 पर धिक्कार सै थारे पै! जो साहूकार सो, क्यूँके थमने अपणे सारे सुख भोग चुके सों। 25 धिक्कार सै थारे पै! जो छिकरे सो, क्यूँके भूक्खे होओगे। धिक्कार सै थारे पै! जो इब हॉस्सो सो, क्यूँके थम बिलख-बिलख के रोओगे। 26 “धिक्कार सै थारे पै! जिब सारे माणस थारे ताहीं आच्छा कहवै, क्यूँके थारे पूर्वज भी झूठे नबियाँ के गेल्या भी इसाए करै थे।” 27 “पर मै थम सुणण आळा तै कहूँ सूँ, के अपणे बैरियाँ तै प्यार राक्खो, जो थारे तै बैर करै, उनका भला करो। 28 जो थमने श्राप देवै, उननै आशीष दो, जो थारी बेजती करै, उनके खात्तर प्रार्थना करो। 29 जो तेरे एक गाल पै थप्पड़ मारै उसकी ओड़ दुसरा भी फेर दे, अर जो तेरी धोती खोस ले, उसने कुड़ता लेण तै भी मना मत करो। 30 जो कोए तेरे तै माँगै, उसनै दे, अर जो तेरी चीज खोस ले, उसतै माँगै ना। 31 जिसा थम चाहो सो के माणस थारे गेल्या करै, थम भी उनके गेल्या उसाए करो।” 32 “जै थम अपणे प्यार करण आळा तै ए प्यार करो, तो उसका के फायदा? क्यूँके पापी भी अपणे प्यार करण आळा के गेल्या प्यार करै सै। 33 जै थम अपणे भलाई करण आळा ए गेल्या भलाई करो सों, तो थारी के बड़ाई? क्यूँके पापी भी इसाए करै सै। 34 जै थम उननै ए उधार द्यो सो जिनतै थमने दुबारे मिल जाण की आस हो सै, तो कौण सी बड़ी बात सै? क्यूँके पापी, पापियाँ नै उधार देवै सै, के उतनाए दुबारे पावै। 35 बल्के अपणे बैरी तै प्यार करो, अर भलाई करो, अर दुबारे मिलण की उम्मीद राखके उधार ना द्यो, तो थारे खात्तर बड़ड़ा ईनाम होवैगा, अर थम परमप्रधान की ऊलाद मान्ने जाओगे, क्यूँके परमेसवर का धन्यवाद ना करण आळा अर बुरे माणस पै भी दया करै सै। 36 जिसा थारा पिता दयालु सै, उससे

ए ढाळ थम भी दयालु बणो।” 37 “दोष ना लाओ, तो थारे पै भी दोष न्ही लगाया जावैगा। कसूरवार ना ठहराओ, तो थमने भी कोए कसूरवार कोनी ठहरावैगा। माफ कर द्यो, तो थम भी माफ करे जाओगे। 38 दिया करो तो थारे ताहीं भी दिया जावैगा। माणस पूरा नाप दबा दबाके अर हला-हलाके अर उभरदा होया थारी गोद्दी म्ह घाल्लैगें, क्यूँके जिस नाप तै थम नाप्पो सों, उससे नाप तै थारे खात्तर भी नाप्या जावैगा।” 39 फेर उसने उनतै एक उदाहरण कह्या, “के आन्था, आन्थे नै राह बता सकै सै? के दोन्नु खड्डे म्ह कोनी गिरैगें?” 40 चेल्ला अपणे गुरु तै बड़ड़ा न्ही, पर जो कोए आच्छा सीखा होगा, वो अपणे गुरु के ढाळ होगा। 41 “तू क्यूँ अपणे भाई की आँख के तिन्के जिसी छोटी सी बुराई नै देखे सै, अर अपणी आँख म्ह लठ जिसी बड़ी बुराई तन्ने कोनी दिखदी?” 42 जिब तू अपणी ए आँख का लठ कोनी देख्दा, तो अपणे भाई तै किस तरियां कह सकै सै, “हे भाई, आ मै तेरी आँख म्ह तै तिन्का लिकाड़ द्यु?” हे कपटी, पैहल्या अपणी जीवन की बुराई दूर कर फेर तू अपणे भाई नै आच्छी दाऊँ बुराई तै बचा सकैगा। 43 “कोए आच्छा दरखत कोनी जो बेकार फळ ल्यावै, अर ना तो कोए बेकार दरखत सै जो आच्छा फळ ल्यावै। 44 हरेक दरखत अपणे फळ तै पिच्छाणा जावै सै, क्यूँके माणस झाड़ियाँ तै अंजोर कोनी तोड़दे अर ना बड़बेरी तै अंगूर। 45 भला माणस अपणे मन के भले भण्डार तै भली बात लिकाड़ै सै, अर बुरा माणस अपणे मन के बुरे भण्डार तै बुराई की बात लिकाड़ै सै, क्यूँके जो मन म्ह भरया सै वोए उसकी जुबाण पै आवै सै।” 46 “जिब थम मेरा कहणा न्ही मान्दे तो क्यातै मन्ने ‘हे प्रभु, हे प्रभु’ कहो सो? 47 जो कोए मेरै धोरै आवै सै अर मेरी बातां नै सुणके उनने मान्ने सै, मै थमने बताऊँ सूँ के वो किसकी तरियां सै: 48 वो उस माणस की ढाळ सै, जिसनै घर बणादें बखत धरती डून्धी खोदके चट्टान पर नीम बणाई, अर जिब बाढ़ आई तो धारा उस घर पै लाग्गी पर उसने हला न्ही सकी, क्यूँके वो पक्का बणरया था। 49 पर जो सुणके कोनी मान्दा वो उस माणस की ढाळ सै, जिसनै माट्टी पै बिना नीम घर बणाया, जिब उसपै धारा लाग्गी तो वो जिब्बे पड़ग्या अर पड़के उसका सत्यानाश होग्या।”

7 जिब उसने माणसां तै ये सारी बात कह दी, तो कफरनहूम नगर म्ह आया। 2 उडै किसे सूबेदार का एक नौक्कर जो उसका प्यारा था, बीमारी तै मरण पै था। 3 उसने यीशु का जिक्क सुणके यहूदिया परदेस के कई यहूदी अगुवां ताहीं उसतै या बिनती करण नै उसके धोरै भेज्या के आके मेरै नौक्कर नै ठीक करै। 4 वे यीशु के धोरै आए, अर उसतै घणी बिनती करके कहण लागे, “वो इस जोग्गा सै के तू उसके खात्तर न्यू करै, 5 क्यूँके वो म्हारी जात तै प्यार राक्खै सै, अर उससे नै म्हारे आराधनालय ताहीं बणवाया सै।” 6 यीशु उनके गेल्या गया, पर जिब वो घर तै माड़ी-सी दूर था, तो सूबेदार नै उसके धोरै कई साथियाँ तै न्यू कहवां भेज्या, “हे प्रभु, कांल ना होवै, क्यूँके मै इस लायक कोनी के तू मेरी छात के तळै आवै। 7 इसे करके मन्ने खुद ताहीं इस लायक भी

कोनी समझा के तेरे धौरे आऊँ, पर सिर्फ मुँह तै कह दे तो मेरा नौक्कर ठीक हो ज्यागा। 8 क्यूँकै मै जाणुं सूँ, के मै भी किसी के आदेशां का पालन करूँ सूँ, अर सिपाही मेरे आदेशां का पालन करै सै। ज़िब मै एक तै कहुँ सूँ, जा, तो वो जावै सै, अर दुसरे तै, आ, तो वो आवै सै, अर अपणे नौक्कर तै कहुँ सूँ, यो कर, तो वो करै सै।” 9 यो सुणकै यीशु के अचम्भा होया अर उसनै मुँह फेरकै उस भीड़ तै जो उसके गेल्या आवै थी, कह्या, “मै थमनै कहुँ सूँ के मनै इस्पाएल म्ह भी इसा बिश्वास न्ही देख्या।” 10 फेर भेज्जे होए वे माणस ज़िब घरां बोहड़े तो उननै उस नौक्कर ताहीं निरोग्गी पाया। 11 थोड़े दिनां पाछै यीशु नाईन नाम के एक नगर म्ह गया, अर उसके चेल्लें अर बड्डी भीड़ उसके गेल्या जाण लागरी थी। 12 ज़िब वो नगर के फाटक के धौरै पोंहच्या, तो लखाओ, माणस एक मुरदे नै बाहरणै लेके जावै थे, जो अपणी माँ का एकला बेट्टा था, अर वा बिधवा थी, अर नगर के घणखरे माणस उसके गेल्या थे। 13 बिधवा ताहीं देखकै प्रभु नै उसपै तरस आया, अर उसतै कह्या, “मतना रोवै।” 14 फेर यीशु नै धौरै आके अर्थी ताहीं छुया, अर अर्थी ठाण आळे ठैहरगे। फेर यीशु नै कह्या, “हे जवान, मै तन्नै कहुँ सूँ, उठ!” 15 फेर वो मुर्दा उठ बेठ्या, बोल्लण लाग्या। उसनै उस ताहीं उसकी माँ तै सौंप दिया। 16 इस घटना तै सारे डरगे, अर वे परमेसवर की बड़ाई करके कहण लागे, “म्हारे बिचाळे एक बड़ड़ा नबी आया सै, अर परमेसवर नै अपणे माणसां पै दया की निगांह करी सै।” 17 अर उसके बारे म्ह या बात सारे यहूदिया परदेस अर लोवै-धोवै के सारे परदेसां म्ह फैलगी। 18 यूहन्ना ताहीं उसके चेल्यां नै इन बातों की खबर दी। 19 फेर यूहन्ना नै अपणे चेल्यां म्ह तै दौयां ताहीं बुलाके प्रभु के धौरै न्यू बुड़झण खात्तर भेज्या, “के आण आळा तूए सै, या हम किसे और की बाट देख्कां?” 20 उननै उसके धौरै आके कह्या, “यूहन्ना बपतिस्मा देणआळे नै म्हारे ताहीं तेरे धौरै न्यू बुड़झण नै भेज्या सै, के आण आळा वो मसीहा जिसका वादा परमेसवर नै करया था, तू ए सै, या हम किसे और की बाट देख्कां?” 21 उससे बखत उसनै घणाए ताहीं बिमारियाँ, अर कांल्ली, अर ओपरी आत्मायाँ तै छुटाया, अर घणाए की आँख खोल दी, 22 अर उसनै उनतै कह्या, “जो कुछ थमनै देख्या अर सुण्या सै, जाके यूहन्ना ताहीं कह घो, के आन्धे देख्खें सै, लंगड़े चाल्लै-फिरै सै, कोढ़ी शुद्ध करे जावै सै, बहरे सुणै सै, मुर्दे जिन्दे करे जावै सै, अर कंगालां ताहीं सुसमाचार सुणाया जावै सै। 23 धन्य सै वे जो मेरे पै शक न्ही करते, अर बिश्वास करणा न्ही छोड़दे।” 24 ज़िब यूहन्ना के भेज्जे होइ माणस चले गये तो यीशु यूहन्ना के बारे म्ह माणसां तै कहण लाग्या, “थम जंगल-बियाबान म्ह के देखण गये थे? के हवा म्ह हाल्दे होए सरकंडे नै?” 25 तो फेर थम बण म्ह के देखण गये थे? के कोमल लत्ते पहरे होए माणस नै? लखाओ, जो चमकदे लत्ते पहरे अर असो-आराम म्ह रहवें सै, वे राजघरां म्ह रहवें सै। 26 तो फेर थम बण म्ह के देखण गये थे? के किसे नबी नै? हाँ, मै थमनै कहुँ सूँ, बल्के नबी तै भी बड़े नै। 27 यो वोए सै, जिसके बारे म्ह लिख्या सै: लखा, “मै अपणे दूत

नै तेरे आगै-आगै भेज्जू सूँ, जो तेरे आगै तेरी राही सीध्दी करेगा।” 28 “मै थमनै कहुँ सूँ के जो बिरबानियाँ तै जणे सै, उन म्ह तै यूहन्ना बपतिस्मा देणआळे तै बड़ड़ा कोए न्ही पर जो परमेसवर के राज्य म्ह छोट्टे तै छोट्टा सै, वो उसतै भी बड़ड़ा सै।” 29 फेर हरेक किसे नै, उरै ताहीं के चुंगी लेण आळे माणसां नै भी यूहन्ना की बात सुणकै उसतै बपतिस्मा लेकै यो मान लिया के परमेसवर ए धर्मी सै। 30 पर फरीसियाँ अर शास्त्रियाँ नै यूहन्ना तै बपतिस्मा कोनी लेकै परमेसवर के मनसां ताहीं अपणे बारे म्ह टाळ दिया। 31 “पर मै इस युग के माणसां की बराबरी किसतै करूँ के वे किसकी ढाळ सै?” 32 वे उन बाळकां की ढाळ सै जो बजारां म्ह बेट्टे होए एक-दुसरे तै रुक्के मारके शिकायत करै सै, हमनै थारे खात्तर बाँसली बजाई, अर थम कोनी नाच्चे, हमनै बिलाप करया, अर थम कोनी रोए! 33 क्यूँकै यूहन्ना बपतिस्मा देण आळा ना रोटी खाया होया करदा अर ना अंगूर का रस पिया होया करदा, अर थम कहो सो, उस म्ह ओपरी आत्मा सै। 34 मुझ माणस के बेट्टे का खाण-पान और माणसां की तरियां साद्दा ए सै, लखाओ, थमनै मेरे ताहीं पेट्टे अर पियक्कड़ माणस, चुंगी लेणिये का अर पापियाँ का साथी घोषित कर दिया। 35 पर ज्ञान अपणे काम्मां म्ह सच्चा ठहराया गया सै। 36 फेर किसे फरीसी नै उसतै बिनती करी के वो उसके गेल्या खाणा खावै, आखर वो उस फरीसी के घरां जाके खाणा खाण बेठ्या। 37 उस नगर की एक पापण बिरबान्नी न्यू जाणकै के यीशु फरीसी के घर म्ह खाणा खाण बेठ्या सै, संगमरमर के बरतन म्ह महंगा खसबूदार तेल ल्याई, 38 अर उसके पायां के धौरै, पाछै खड़ी होकै, रोंदी होई उसके पायां नै आसूआं तै भेण लागी अर अपणे सिर के बाळां तै पूंझण लागी, अर उसके पायां नै बार-बार चूमके उनपै महंगा खसबूदार तेल मळ्या। 39 न्यू देखकै शमौन फरीसी जिसनै यीशु ताहीं बुलाया था, अपणे मन म्ह सोच्यण लाग्या, “जै यो नबी होन्दा तो जाण जान्दा के या जो उसनै छूण लागरी सै, वा कौण अर किसी बिरबान्नी सै, क्यूँकै वा तो पापण सै।” 40 यीशु नै उसके मन के विचार जाणकै उस ताहीं उदाहरण म्ह कह्या, “हे शमौन, मनै तेरे तै कुछ कहणा सै।” वो बोल्या, “हे गुरु, कह।” 41 यीशु नै एक और उदाहरण दिया, “किसे साहूकार के दो देणदार थे, एक पाँच सौ अर दुसरा पचास दीनार (50 दिन की मजदूरी) का देणदार था। 42 ज़िब उनके धौरै चुकाण नै कुछ न्ही रह्या तो उसनै दोनुआ का कर्ज माफ कर दिया। इस करके उन दोनु माणसां म्ह तै कौण उसतै घणा प्यार राक्खेगा?” 43 शमौन नै जवाब दिया, “मेरी समझ म्ह वो माणस, जिसका घणा कर्जा माफ होया।” यीशु नै उसतै कह्या, “तन्नै ठीक कह्या सै।” 44 अर उस बिरबान्नी कान्ही पलटके उसनै शमौन तै कह्या, “तन्नै देख्या सै के इस बिरबान्नी नै के करया सै? मै तेरे घरां आया पर तन्नै मेरे पैर धोण नै पाणी भी कोनी दिया, पर इसनै मेरे पैर आँसुआँ तै भेये अर अपणे बाळां तै पूंजे। 45 तन्नै मेरे ताहीं चुम्या न्ही, पर ज़िब तै मै आया सूँ जिब्बे तै इसनै मेरे पायां ताहीं चुमना न्ही छोड्या। 46 तन्नै मेरे सिर पै तेल कोनी मळ्या, पर इसनै मेरे पायां

पै इत्र मळ्या सै। 47 इस करकै मै तन्नै कहुँ सूँ के इसनै कई पाप करे थे, जो माफ होंगे, क्यूँके इसनै मेरे ते घणा प्यार करया सै, पर जिसका पाप कम माफ होया सै, वो कम प्यार करै था।” 48 अर उसनै बिरबान्नी तै कह्या, “तेरे पाप माफ होए।” 49 फेर जो माणस उसके गेल्या खाणा खाण नै बेट्टे थे, वे अपणे-अपणे मन म्ह सोचवण लाग्गे, “यो के परमेसवर सै, जो पापां नै भी माफ कर सकै सै?” 50 पर उसनै उस बिरबान्नी ताहीं कह्या, “परमेसवर नै तेरे ताहीं बचाया सै, क्यूँके तन्नै मेरे पै बिश्वास करया सै, खुश होकै चली जा।”

8 इसकै बाद यीशु नगर-नगर अर गाम-गाम्मां म्ह प्रचार करदा होया, अर परमेसवर के राज्य का सुसमाचार सुणादा होया हांडण लाग्या, अर वे बारहां चेल्लें उसके गेल्या थे, 2 अर कुछ बिरबान्नी भी थी जो ओपरी आत्मायाँ तै अर बिमारियाँ तै छुटाई गई थी, अर वे ये सै: मरियम जो मगदलीनी कुहावे थी, जिसम्ह तै सात ओपरी आत्मा लिकड़ी थी, 3 अर हेरोदेस राजा के भण्डारी खुजा की घरआळी योअन्ना, अर सूंसन्नाह, अर घणखरी दुसरी बिरबान्नी। ये अपणे धन तै यीशु अर उसके चेल्यां की सेवा-पाणी करै थी। 4 जिब बड्डी भीड़ कठ्ठी होई अर नगर-नगर के माणस उसके धोरे चालकै आवे थे, तो उसनै उदाहरण म्ह कह्या 5 “एक किसान बीज बोण लिकड़या। बोदे होए कुछ बीज राही कै किनारे पड़े, अर रोंद्या गया, अर अकास के पंछियाँ नै उस ताहीं चुग लिया। 6 कुछ बीज चट्टान पै पड्या, अर जामग्या, पर नमी ना मिलण के कारण सूख गया। 7 कुछ झाड़ियाँ कै बिचाळै पड्या, अर झाड़ियाँ नै गेलै-गेलै बढ़कै उस ताहीं दबा लिया। 8 कुछ आच्छी धरती पै पड्या, अर उगकै सौ गुणा फळ ल्याया।” न्यू कहकै वो जोर तै बोल्या, “जिसके कान हो वो ध्यान तै सुण ले।” 9 उसके चेल्यां नै उसतै बुड्झया के इस उदाहरण का के मतलब सै? 10 उसनै कह्या, “थारे ताहीं परमेसवर के राज्य के भेद की समझ दे राख्की सै, पर औरां नै उदाहरणां म्ह सुणाया जावै सै, इस करकै के ‘वे देखदे होए भी कोनी देखखै, अर सुणदे होए भी कोनी समझै।” 11 उदाहरण का मतलब यो सै: बीज परमेसवर का वचन सै 12 राही कै किनारे के वे सै, जिन नै सुणया, फेर शैतान आकै उनके मन म्ह तै वचन ठा ले जावै सै के कदे इसा ना हो के वे बिश्वास करकै उद्धार पावै। 13 चट्टान पै के वे सै, के जिब सुणै सै, तो खुश होकै वचन नै अपणावै सै, पर जड़ कोनी पकड़दे वे माड़ी वार ताहीं बिश्वास राख्खें सै अर मुसीबत कै बखत बहक जावै सै। 14 जो झाड़ियाँ म्ह पड्या, यो वे सै जो सुणै सै, पर आगै जाकै फिक्र, अर धन, अर जिन्दगी के ऐसो-आराम म्ह फँस जावै सै अर उनका फळ कोनी पकदा। 15 पर आच्छी धरती के वे सै, जो वचन सुणकै भले अर आच्छे मन तै साम्ये राख्खें सै, अर धीरज तै फळ ल्यावै सै। 16 “कोए दीवा जळा कै बरतन तै कोनी ढकदा, अर ना खाट तळै धरै सै, पर टांडी पै धरै सै ताके भीत्तर आण आळे नै चाँदणा मिलै। 17 कुछ लुहक्या कोनी जो दिखाया कोनी जावै, अर ना किमे लुहक्या सै जिसका बेरा न्ही पटै। 18 ज्यांतै चौक्कस रहो के थम किस तरियां सुणो सो? क्यूँके जिसकै धोरे सै उसतै दिया

जावैगा, अर जिसकै धोरे न्ही सै उसतै वो भी ले लिया जावैगा, जिसनै वो अपणा समझै सै।” 19 यीशु की माँ अर उसके भाई उसके धोरे आए, पर भीड़ के कारण उसतै मिल न्ही सके 20 उसतै कह्या गया, “तेरी माँ अर तेरे भाई बाहरणै खड़े होए, तेरे तै मिलणा चाहवें सै।” 21 यीशु नै इसकै जवाब म्ह उनतै कह्या, “मेरी माँ अर मेरे भाई येए सै, जो परमेसवर का वचन सुणै अर मान्नै सै।” 22 फेर एक दिन वो अर उसके चेल्लें किस्ती पै चढ़े, अर उसनै उनतै कह्या, “आओ, समुन्दर के परली ओड़ चाल्लां।” आखर उननै किस्ती खोल दी। 23 पर जिब किस्ती चालरी थी, तो वो सोग्या अर समुन्दर पै आँधी आगी, अर किस्ती पाणी तै भरण लाग्गी अर वे खतरे म्ह थे। 24 फेर उननै धोरे आकै उस ताहीं जगाया, अर कह्या, “हे माल्लिक! हे माल्लिक! हम डूबके मरण आळे सां।” फेर उसनै उठके आँधी ताहीं अर पाणी की झाल्लां ताहीं धमकाया अर वे थमगे अर शान्ति होई। 25 फेर उसनै उनतै कह्या, “थारा बिश्वास किन्त था?” पर वे डरगे अर हैरान होके आप्पस म्ह कहण लाग्गे, “यो कौण सै जो आँधी अर पाणी नै भी हुकम देवै सै, अर वे उसकी मान्नै सै?” 26 फेर वे गिरासेनियों के देश म्ह पोहचे, जो उस पार गलील समुन्दर कै स्याम्ही सै। 27 जिब वो किनारे पै उतरया तो उस नगर का एक माणस उसतै मिल्या जिसम्ह ओपरी आत्मा थी। वो घणे दिनां तै उघाड़ा था अर ना घरां रहवें था बल्के कब्रिस्तान म्ह रह्या करै था। 28 वो यीशु नै देखके जोर तै किल्ली मारकै उसके स्याम्ही पड़कै जोर तै बोल्या, “हे परमप्रधान परमेसवर के बेट्टे यीशु! मननै तेरे तै के काम? मै तेरे तै बिनती करुँ सूँ, मननै काल ना करै।” 29 क्यूँके वो उस ओपरी आत्मा ताहीं उस माणस म्ह तै लिकड़ण का हुकम देवै था, इस करके के वो उसपै बार-बार हावी होवै थी। उतो माणस उसनै साँकळां अर बेलां तै जुड़ै थे फेर भी वो बन्धनां नै तोड़ देवै था, अर ओपरी आत्मा उसनै बण म्ह भजाए फिरै थी। 30 यीशु नै उसतै बुड्झया, “तेरा के नाम सै?” उसनै कह्या, “सेना,” क्यूँके घणीए ओपरी आत्मा उस म्ह रहवें थी। 31 उननै यीशु बिनती करी के हमनै अथाह कुण्ड म्ह जाण का हुकम ना देवै। (Abyssos g12) 32 उड़ै पहाड़ पै सूअरां का एक बड़ड़ा टोळ चरै था, इस करके उननै उसतै बिनती करी के हमनै उन म्ह बैठणे दे। उसनै उन ताहीं जाण दिया। 33 फेर ओपरी आत्मा उस माणस म्ह तै लिकड़कै सूअरां म्ह जा पड़ी अर वो टोळ ढळान पै तै झपटके गलील समुन्दर म्ह जा पड्या अर डूब मरया। 34 पाळी यो जो होया था देखकै भाज्ये, अर नगर म्ह अर गाम्मां म्ह जाके उसकी खबर दी। 35 माणस जो होया था उसनै देखण नै लिकड़े, अर यीशु कै धोरे आकै जिस माणस तै ओपरी आत्मा लिकड़ी थी, उसनै यीशु के पायां के धोरे लत्ते पहरे अर सोध्दी म्ह बेट्टे देखके डरगे, 36 अर देखण आळा नै उन ताहीं बताया के वो ओपरी आत्मायाँ का काल करया होड़ माणस किस तरियां ठीक होया। 37 फेर गिरासेनियों के लोवे-धोवै के सारे माणसां नै यीशु तै बिनती करी के म्हारै उरै तै चल्या जा, क्यूँके वे घणे डरगे थे। आखर म्ह वो किस्ती पै चढ़कै बोहड़ आया। 38 जिस माणस म्ह ओपरी आत्मा लिकड़ी थी वो उसतै

बिनती करण लाग्या के मन्ने अपने गेल्या रहण दे, पर यीशु नै उस ताहीं बिदा करके कह्या, 39 “अपणे घरां बोहड़ जा अर माणसां तै बता के परमेसवर नै तेरे खात्तर किसे बड़े-बड़े काम करे सै।” वो जाके सारे नगर म्ह प्रचार करण लाग्या के यीशु नै मेरे खात्तर किसे बड़े-बड़े काम करे। 40 जिव यीशु बोहड़या तो माणस उसतै राज्जी होकै मिले, क्यूँके वे सारे उसकी बाट देखखे थे। 41 इतनै म्ह याईर नाम का एक माणस आया, जो आराधनालय का सरदार था, अर यीशु के पायां म्ह पड़के उसतै बिनती करण लाग्या के मेरे घरां चाल, 42 क्यूँके उसकी बारहां साल की एकलौती बेटी थी, अर वा मरण नै होरी थी। जिव वो जाण लागरया था, जद माणस उसपै पड़ण लागरे थे। 43 एक बिरबान्नी नै जिसके बारहां साल तै लहू बहण की बीमारी थी, अर जो अपणी सारी कमाई डाक्टरां के पाछे बतरगी थी, फेरभी किसे के हाथ तै चंगी कोनी हो सकी थी, 44 पाछे तै आके उसके लते ताहीं छुया, अर जिब्बे उसका लहू बहणा बन्द होगा। 45 इसपै यीशु नै कह्या, “मेरेताहीं किसने छुया?” जिव सारे नाटण लागे, तो पतरस अर उसके साथियाँ नै कह्या, “हे माल्लिक, तन्ने तो भीड़ दबाण लागरी सै अर तेरे पै पड़ण लागरी सै।” 46 पर यीशु नै कह्या, “किसे नै मेरे ताहीं छुआ सै, क्यूँके मन्ने बेरा पाटम्या के मेरे म्ह तै सामर्थ लिक्की सै।” 47 जिव बिरबान्नी नै देख्या के मै लुहक कोनी सकदी, फेर काम्बदी होई आई अर उसके पायां पै पड़के सारे माणसां के स्याम्ही बताया के उसने किस कारण उस ताहीं छुया, अर किस तरियां जिब्बे चंगी होई। 48 उसने उसतै कह्या, “बेटी, तेरे बिश्वास नै तेरे ताहीं ठीक करया सै, खुशी-खुशी चली जा।” 49 वो न्यू कहवै था के किसे नै आराधनालय के सरदार याईर के उरै तै आके कह्या, “तेरी छोरी मर ली सै: गुरु नै काल ना करै।” 50 यीशु नै न्यू सुणके उसतै जवाब दिया, “मतना डरै, सिर्फ बिश्वास राख, तो वा बच जावैगी।” 51 घर म्ह आके उसने पतरस, यूहन्ना, याकूब, अर छोरी के माँ-बाप नै छोड़ दुसरे किसे नै अपने गेल्या भीत्तर कोनी आण दिया। 52 सारे उसके बाबत रोण-पिटण लागरे थे, पर उसने कह्या, “रोओ मतना, वा मरी कोनी पर सौवै सै।” 53 वे न्यू जाणके के वा मरगी सै उसका मजाक उड़ाण लागये। 54 पर उसने उसका हाथ पकड्या, अर रुक्का मारके कह्या, “हे छोरी, उठ!” 55 फेर उसका जी बोहड़ आया अर वा जिब्बे उठ बेठी। फेर उसने हुकम दिया के उसने कुछ खाण नै द्यो। 56 उसके माँ-बाप हेरान होए, पर उसने उन ताहीं चिताया के यो जो होया सै किसे तै ना कहियो।

9 फेर उसने अपने बारहां चेल्यां ताहीं बुलाके उननै सारी ओपरी आत्मायाँ अर बिमारियाँ ताहीं दूर करण की सामर्थ अर हक दिया, 2 अर उननै परमेसवर के राज्य का प्रचार करण अर बिमारां ताहीं आच्छा करण खात्तर भेज्या। 3 उसने उनतै कह्या, “राह खात्तर कुछ ना लियो, ना तो लाठी, ना झोळी, ना रोटी, ना रपिये अर ना दो-दो कुड़ते। 4 जिस किसे घर म्ह उतरो, उडैए रहो, अर उडैए तै बिदा होइयो। 5 जो कोए थमनै न्ही अपणावै, उस नगर तै जान्दे होए अपने पायां की धूळ झाड़ दियो के उनपै गवाही होवै।” 6 आखर म्ह वे लिक्कके गाम-

गाम सुसमाचार सुणान्दे, अर हरेक माणसां नै ठीक करदे होए हांडे रहे। 7 चौथाई देश के गलील परदेस का राजा हेरोदेस यो सारा सुणके घबराग्या, क्यूँके कईयाँ नै कह्या, के यूहन्ना मरे होया म्ह तै जिन्दा होया सै, 8 अर कईयाँ नै न्यू कह्या के एलिय्याह दिख्या सै, अर औरां नै न्यू के पुराणे नबियाँ म्ह तै कोए जिन्दा होया सै। 9 पर हेरोदेस नै कह्या, “यूहन्ना का तो मन्ने सिर कटवाया, इब यो कौण सै जिसके बाबत इसी बात सुणु सूं?” अर उसने उस ताहीं देखण की चाहन्ना करी। 10 फेर प्रेरितां नै बोहड़के जो कुछ उननै करया था, उस ताहीं बता दिया, अर वो उननै न्यारे करके बैतसैदा नामक नगर म्ह लेग्या। 11 न्यू जाणके भीड़ उसके पाछे हो ली, अर वो राज्जी होके उनतै मिल्या, अर उनतै परमेसवर के राज्य की बात करण लाग्या, अर जो चंगे होणा चाहवै थे उन ताहीं ठीक करया। 12 जिव दिन छिणण लाग्या तो बारहां नै आके उसतै कह्या, “भीड़ नै जाणदे के चौगरदे के गाम्मां अर बस्तिवाँ म्ह जाके ठहरै अर खाणे का जुगाड़ करै, क्यूँके हम उरै बियाबान जगहां म्ह सां।” 13 यीशु नै उनतै कह्या, “थमे उननै खाण नै द्यो।” उननै कह्या, “म्हारै थोरै पाँच रोटी अर दो मच्छियाँ नै छोड़के और कुछ कोनी, पर हाँ, जै हम जाके इन सारया खात्तर खाणा मोल ल्यावां, फेर हो सकै सै।” वे माणस तो पाँच हजार माणसां के करीबन थे। 14 फेर उसने अपने चेल्यां तै कह्या, “उननै पचास-पचास करके लैणपतार म्ह बिठा द्यो।” 15 उननै न्यूए करया, अर सारया ताहीं बिठा दिया। 16 फेर यीशु नै वे पाँच रोटी अर दो मच्छियाँ ली, सुर्ग कान्ही लखाके परमेसवर का धन्यवाद करया, अर रोटी तोड़-तोड़के चेल्यां ताहीं देदा गया के माणसां ताहीं बाँडे। 17 फेर सारे खाके छिकगे, अर चेल्यां नै बचे होड़ टुकड्या तै भरी होई बारहां टोकरी ठाई। 18 जिव वो एकले म्ह प्रार्थना करै था अर चेल्ले उसके गेल्या थे, तो उसने उनतै बुझइया, “माणस मन्ने के कहवै सै?” 19 उननै जवाब दिया, “यूहन्ना बपतिस्मा देण आळा, अर कोए एलिय्याह, अर कोए यो के पुराणे नबियाँ म्ह तै कोए जिन्दा होया सै।” 20 उसने उनतै बुझइया, “पर थम मन्ने के कहो सो?” पतरस नै जवाब दिया, “परमेसवर का मसीह।” 21 फेर उसने उनतै चिताके कह्या के यो किसे तै ना कहियो। 22 फेर उसने कह्या, “मुझ माणस के बेटे खात्तर जरूरी सै के मै घणा दुख ठाऊँ, अर यहूदी अगुवें, प्रधान याजक अर शास्त्री मन्ने तुच्छ समझके मार देवै, अर मै तीसरे दिन जिन्दा हो जाऊँगा।” 23 उसने सारया तै कह्या, “जो कोए मेरे मेरा चेल्ला बणणा चाहवै, वो अपणी ए इच्छा पूरी ना करै बल्के हरेक दिन अपने दुखां का क्रूस ठाके, मेरे पाछे हो लेवै। 24 क्यूँके जो कोए अपणी जान बचाणा चाहवैगा वो उसने खोवैगा, पर जो कोए मेरी खात्तर अपणी जान खोवैगा वो उसने बचावैगा। 25 जै माणस सारी दुनिया नै पा लेवै अर अपणी जान खो दे या उसका नुकसान ठावै, तो उसने के फायदा? 26 जो कोए मेरे तै अर मेरी बात्तां तै सरमावैगा, मै माणस का बेटा भी, जिव अपणी अर अपने पिता की अर पवित्र सुर्गदूतां की महिमा सुधां आऊँगा, तो उसतै सरमावैगा। 27 “मै थमनै साच्ची कहूँ सूं, के जो याइ खड़े सै, उन

मह तै कुछ इसे सै के जिब ताहीं परमेसवर का राज्य ना देख लेवें, जद ताहीं मौत उननै कदे छू भी न्ही पावैगी।” 28 इन बाततां कै कोए आठ दिनां पाच्छै वो पतरस, यूहन्ना अर याकूब नै गेल्या लेकै प्रार्थना करण खात्तर पहाड़ पै गया। 29 जिब वो प्रार्थना करै था, तो उसके मुँह का रूप बदल गया, अर उसके लत्ते धोळे होकै चमकण लागगे। 30 अर लखाओ, मूसा नबी अर एलियाह नबी ये दो माणस उसके गेल्या बतळावै थे। 31 ये महिमा सुधां दिक्खे अर यीशु के मरण का जिक्र करै थे, जो यरुशलेम मह होण आळा था। 32 पतरस अर उसके साथी नींद मह होरे थे, अर जिब ठीक तरियां सोध्दी मह आए, तो उसकी महिमा अर उन दो माणसां नै, जो उसके गेल्या खडे थे, देख्या। 33 जिब वे उसके धोरे तै जाण लागगे, तो पतरस नै यीशु तै कह्या, “हे माल्लिक, महारा उरै रहणा भला सै: आखर मह हम तीन मण्डप बणावा, एक तेरे खात्तर, एक मूसा नबी खात्तर, एक एलियाह नबी के खात्तर।” उसनै बेरा कोनी था के कह के रह्या सै। 34 वो न्यू कहवैए था के एक बादळ आकै उनपै छाग्या, अर जिब वे उस बादळ तै घिरण लागगे तो वे डरगे। 35 फेर उस बादळ मह तै या वाणी लिकडी, “यो मेरा बेट्टा अर मेरा चुण्या होया सै, इसकी सुणो।” 36 या आवाज होन्दे यीशु एकला होग्या, अर वे बोल-बाल्ले रहे, अर जो कुछ देख्या था उसकी कोए बात उन दिनां मह किसे तै न्ही कही। 37 दुसरे दिन जिब वो पहाड़ तै उतरया तो एक बड्डी भीड़ उसतै आ मिली। 38 अर लखाओ, भीड़ मह तै एक माणस नै किल्की मारकै कह्या, “हे गुरु, मै तेरे तै बिनती करूँ सूँ के मेरे बेट्टे पै दया की निगांह फेर दे, क्यूँके वो मेरा एकला बेट्टा सै। 39 अर दे, एक भुंडी ओपरी आत्मा उसनै पकड़ै थी, अर वो चाणचक किल्की मारै था, अर वा उसनै इसा मरोड़ै थी के वो मुँह मह तै झाग भर लावै सै, उसनै रोंदकै घणी मुश्किल तै छोड़ै थी। 40 मन्ने तेरे चेल्यां तै बिनती करी के उसनै लिकाड़ै, पर वे कोनी काढ सके।” 41 यीशु नै जवाब दिया, “हे अबिश्वासी अर जिद्दी माणसां, मै कद ताहीं थारे गेल्या रूँगा अर थारी सहुँगा? अपने बेट्टे नै उरै लिया।” 42 जिब वो आवै था तो ओपरी आत्मा नै उस ताहीं पटककै मरोड्या, पर यीशु नै उस ओपरी आत्मा ताहीं धमकाया अर छोरे ताहीं ठीक करकै पिता तै थमा दिया। 43 फेर सारे माणस परमेसवर के घणे सामर्थ तै हैरान होए। पर जिब सारे माणस उन सारे काम्मां तै जो वो करै था, हक्के-बक्के थे, तो उसनै अपने चेल्यां तै कह्या, 44 “थम इन बाततां पै गौर करो, क्यूँके मै माणस का बेट्टा माणसां कै हाथ्यां मह पकड़वाया जाण पै सूँ।” 45 पर वे इस बात नै कोनी समझै थे, अर या बात उनतै लुक्की रही के उननै उसका बेरा न्ही पाट्टै, अर वे इस बात कै बारे मह उसतै बुद्धिण तै डरै थे। 46 फेर उन मह या बहस होण लागगी के महारै तै बड्ड़ा कौण सै। 47 पर यीशु नै उनकै मन के विचारां ताहीं पढ़ लिया, अर एक बाळक नै लेकै अपने धोरे खड्या करया, 48 अर उनतै कह्या, “जो कोए मेरे नाम तै इस बाळक नै अपणावै सै, वो मन्ने अपणावै सै, अर जो कोए मन्ने अपणावै सै, वो मेरे भेजण आळे नै भी अपणावै सै, क्यूँके जो थारे मह सारया मह छोटे तै छोटा सै, वोए बड्ड़ा सै।” 49 फेर

यूहन्ना नै कह्या, “हे स्वामी, हमनै एक माणस ताहीं तेरे नाम तै ओपरी आत्मा लिकाड़ै देख्या, अर हमनै उसतै मना करया, क्यूँके वो महारी तरियां तेरा चेल्ला न्ही था।” 50 यीशु नै उसतै कह्या, “उसनै नाट्टो ना, क्यूँके जो थारे बिरोध मह न्ही, वो थारे कान्ही सै।” 51 जिब उसके उप्पर ठाए जाण के दिन पूरे होण पै थे, तो उसनै यरुशलेम जाण का विचार पक्का करया। 52 उसनै अपने आगै दूत भेज्जै। वे सामरियां कै एक गाम मह गए ताके उसके खात्तर जगहां त्यार करै। 53 पर उन माणसां नै उस ताहीं उतरण कोनी दिया, क्यूँके वो यरुशलेम जावै था। 54 न्यू देखकै उसके चेल्लें याकूब अर यूहन्ना नै कह्या, “हे प्रभु, तू के चाहवै सै के हम हुकम देवां, के अकास तै आग गिरके उननै भस्म करदे?” 55 पर उसनै बोहड़के उन ताहीं धमकाया (अर कह्या, “थम न्ही जाणदे के थम किसी आत्मा के सो। क्यूँके माणस का बेट्टा लोग्मां नै जान तै मारण कोनी आया, बल्के उननै बचाण आया सै।”) 56 अर वे किसे दुसरे गाम मह चले गये। 57 जिब वे राह मह जावै थे, तो किसे नै उसतै कह्या, “जित्त-जित्त तू जावैगा, मै तेरे पाच्छै हो ल्यूँगा।” 58 यीशु नै उसतै कह्या, “लोमडियां की घुरखाण अर अकास के पछियां के बसरे हो सै, पर माणस के बेट्टे खात्तर सिर छिपाण की भी जगहां कोनी।” 59 उसनै दुसरे तै कह्या, “मेरे पाच्छै हो लो।” उसनै कह्या, “हे प्रभु, पैहले मन्ने घर जाणदे, मै अपने पिता के मरण कै बाद उस ताहीं दफना के आऊँगा, फेर तेरा चेल्ला बणुगाँ।” 60 उसनै उसतै कह्या, “जो आत्मिक रूप तै मर चुके सै, उननै मुदें दफणाण दे। पर तू जाके परमेसवर कै राज्य की कथा सुणा।” 61 एक और नै भी कह्या, “हे प्रभु, मै तेरे पाच्छै हो लूँगा, पर पैहल्या मन्ने जाणदे के अपने घर के माणसां तै बिदा ले आऊँ।” 62 यीशु नै उसतै कह्या, “जो कोए अपना हाथ हळ पै धरकै पाच्छै देख्खै सै, वो परमेसवर के राज्य कै जोग्मा कोनी।”

10 इन बाततां कै बाद प्रभु यीशु नै सत्तर और चेल्लें तैयार करे, अर जिस-जिस गाम अर जगहां पै वो खुद जाण आळा था, उडै उननै दो-दो करकै अपने आगै भेज्या। 2 उसनै अपने चेल्यां तै कह्या, “पके होए खेत्तां की तरियां लोग तो भोत सै जो परमेसवर के वचन नै सुणणा अर समझणा चाहवै सै। पर फसल काट्टण आळे थोडे लोग सै, जो उन ताहीं जाके परमेसवर का वचन सुणा अर समझा सके। इस करकै खेत के माल्लिक यानी परमेसवर तै बिनती करो, के वो और लोग्मां नै भेज्जै, ताके परमेसवर का वचन सारे लोग्मां तक पोहच सके सै।” 3 जाओ, देख्खों, मै थमनै भेड्गां की तरियां भेडियां के बिचाल्ये भेज्जु सूँ। 4 इस करकै ना बटुआ, ना झोळी, ना जूते ल्यो, अर ना राह मह किसे तै नमस्कार करो। 5 जिस किसे घर मह जाओ, पैहले कहो, इस घर का कल्याण हो। 6 जै उडै कोए कल्याण कै जोग्मा होगा, तो थारा कल्याण उसपै थमैगा, न्ही तो थारे धोरे उल्टा ए आ ज्यागा। 7 उससे घर मह रहो, अर जो कुछ उनतै मिलै, वोए खाओ-पीओ, क्यूँके मजदूर नै अपनी मजदूरी मिलणी चाहिए, घर-घर न्ही हांडणा। 8 जिस नगर मै जाओ, अर उडै के माणस थमनै उतारै, तो जो कुछ थारे स्याम्ही थरया जावै वोए

खाओ। 9 उड़ै के बिमारां नै ठीक करो अर उनतै कहो, परमेसवर का राज्य थारे धोरे आण पोंहच्या सै। 10 पर जिस नगर म्ह जाओ, अर उड़ै के माणस थमने न्ही अपणावे, तो उनके बजारां म्ह जाके कहो, 11 थारे नगर की धूळ भी, जो म्हारे पायां म्ह लागी सै, हम थारे स्याम्ही झाड़ देवां सां, फेरभी न्यू जाण ल्यों के परमेसवर का राज्य थारे धोरे आण पोंहच्या सै। 12 मै थमने कहूँ सूँ, “के उस दिन उस नगर की हालत तै सदोम नगर की हालत घणी सहण जोगी होवैगी।” 13 “धिक्कार सै थारे पै खुराजिन नगर के माणसाँ! धिक्कार सै थारे पै बैतसैदा नगर के माणसाँ! जो सामर्थ के काम थारे म्ह करे गये, जै वे सूर अर सैदा नगर म्ह करे जान्दे, तो टाट ओढ़ के, अर राख म्ह बैठके वे कदे के पाप करणा छोड़ देन्दे। 14 पर न्याय कै दिन थारी हालत तै सूर अर सैदा नगर की हालत घणी सहण जोगी होवैगी। 15 अर हे कफरनहूम नगर, तू के सोच्यै सै, के तू सुर्ग ताहीं ऊँच्या करया जावैगा? तू तो अधोलोक तक नीच्यै जावैगा। (Hadēs g86) 16 “जो थारी सुणै सै, वो मेरी सुणै सै, अर जो थमनै तुच्छ समझै सै, वो मन्ने तुच्छ समझै सै, अर जो मन्ने तुच्छ समझै सै, वो मेरे भेजण आळे ताहीं तुच्छ समझै सै।” 17 वे सत्तर चेल्लें राज्जी होन्दे होए बोहड़े अर बोल्ले, “हे प्रभु, तेरे नाम तै ओपरी आत्मा भी म्हारा कहणा मान्ने थी।” 18 यीशु नै उनतै कह्या, “जिब थम ओपरी आत्मायाँ नै लिकाड़ो थे तो मन्ने शैतान ताहीं सुर्ग तै बिजळी की तरियां पड़ता होया देख्या। 19 लखाओ, मन्ने थारे ताहीं साँपां अर बिच्छुआं ताहीं पायां तळै रोंदण का, अर बैरी की सारी सामर्थ पै हक दिया सै, अर किसे चीज तै थमने कुछ नुकसान कोनी होवैगा। 20 फेरभी इतने राज्जी मतना होवो के आत्मा थारा कहणा मान्ने सै, पर इसते राज्जी होवो थारे नाम सुर्ग पै लिक्खे सै।” 21 उससे बखत यीशु पवित्र आत्मा म्ह होके खुशी तै भरग्या, अर कह्या, “हे पिता, सुर्ग अर धरती के प्रभु, मै तेरा शुक्रियादा करूँ सूँ, के तन्ने इन बात्तां ताहीं ज्ञानियाँ अर समझदारां तै ल्कोए राख्या, अर बाळकां ताहीं दिखा दिया सै।” हाँ, हे पिता, क्यूँके तन्ने योए भाया। 22 मेरे पिता नै मेरे ताहीं सब कुछ सौप दिया सै, अर किसे नै न्ही बेरा के बेट्टा कौण सै, सिवा पिता के, अर पिता कौण सै न्यू भी किसे नै कोनी बेरा सिवाए बेट्टे के, अर वो जिसपै बेट्टा उस ताहीं जाहिर करणा चाहवै। 23 फेर चेल्यां की ओड़ बोहड़के एकले म्ह बोल्या, “थन्य सै वे आँख, जो ये बात जो थम देख्खो सो। 24 क्यूँके मै थमने कहूँ सूँ के घणखरे नबियाँ अर राजयां नै चाह्या के जो बात थम देख्खो सो, देख्खै, पर न्ही देख्खी, अर जो बात थम सुणो सो, सुणै पर न्ही सुणी।” 25 एक दिन यीशु माणसां नै उपदेश देण लागरया था, तो एक शास्त्री उठ्या अर न्यू कहके उस ताहीं परखण लाग्या, “हे गुरु, अनन्त जीवन का वारिस होण खात्तर मै के करूँ?” (aiōnios g166) 26 यीशु नै उसतै कह्या, “नियम-कायदा म्ह के लिख्या सै? अर तू उसनै किस तरियां समझै सै?” 27 उसनै जवाब दिया, “तू प्रभु, अपणे परमेसवर तै अपणे सारे मन, अपणे पूरे प्राण अर अपणे सारी शक्ति अर अपनी सारी बुद्धि कै गेल्या प्यार राख, अर अपणे पड़ोसी तै अपणे जिसा प्यार

राख।” 28 यीशु नै उसतै कह्या, “तन्ने ठीक कह्या, न्यूए करिये जिब्बे तू अनन्त जीवन पावैगा।” 29 पर उसनै खुद ताहीं धर्मा जाहिर करण की इच्छा तै यीशु तै बुड़झ्या, “तो मेरा पड़ोसी कौण सै?” 30 यीशु नै एक कहाँनी बताके जवाब दिया, “एक माणस यरुशलेम नगर तै यरीहो नगर म्ह जावे था, के डाकुआं नै घेर कै, उसका सब कुछ खोस कै, उस ताहीं गंगा कर दिया, अर पिट-छेतके उस ताहीं अधमरा छोड़के चले गये। 31 अर इसा होया के उससे राही तै एक यहूदी याजक जावे था, पर उसनै उस ताहीं देखके उसकी मदद कोनी करी अर चल्या गया। 32 इससे ढाळ एक लेवी उस जगहां पै आया, उसनै भी उसकी मदद कोनी करी, अर वो चल्या गया। 33 फेर सामरी गाम का एक राहगीर ओड़ै तै लिक्किया, अर उस माणस ताहीं देखके उसपै तरस खाया। 34 उसनै उसके धोरे आके उसके घायाँ पै तेल अर अंगूर का रस गेर कै पट्टी बाँधी, अर अपणे गधे पै चढ़ाके सराय म्ह लेग्या, अर उसकी सेवा-पाणी करी। 35 दुसरे दिन उसनै दो दीनार (दो दिन की मजदूरी) काढ के सराय कै माल्लिक तै दिये, अर कह्या, इसकी सेवा-पाणी करिये, अर जो कुछ तेरा और लागैगा, वो मै बोहड़दा होया भर द्युगां।” 36 यीशु नै उस ताहीं कह्या, “इब यो बता तेरी समझ तै जिस माणस ताहीं डाकुआं नै घायल करा था, उन तीनां म्ह तै उस माणस का सच्चा पड़ोसी कौण था?” 37 उसनै कह्या, “वोए जिसनै उसपै दया करी।” यीशु नै उसतै कह्या, “जा, तू भी न्यूए करया कर।” 38 जिब यीशु अर उसके चेल्लें जावे थे तो वो एक गाम म्ह गया, अर मार्था नाम की एक बिरबान्नी नै बड़ी उदारता तै उसका आदर-सत्कार करया। 39 मरियम नाम की उसकी एक बेब्बे थी। वा प्रभु के पायां म्ह बैठके उसका वचन सुणै थी। 40 पर मार्था सेवा-पाणी करदे-करदे परेशान होगी, अर उसके धोरे आके कहण लागी, “हे प्रभु, के तन्ने कुछ भी फिक्र कोनी के मेरी बेब्बे नै सारा काम का बोझ मेरे पै गेर दिया सै? इस करके उसतै कह के मेरी मदद करै।” 41 प्रभु यीशु मसीह नै मार्था तै जवाब दिया, “मार्था, हे मार्था, तू घणी बात्तां खात्तर फिक्र करै, अर परेशान हो ज्या सै। 42 पर एक बात जरूर सै, अर उस बढ़िया हिस्से ताहीं मरियम नै छॉट लिया सै जो उसतै खोस्या कोनी जावैगा।”

11 यीशु किसे जगहां प्रार्थना करण लागरया था। जिब उसनै प्रार्थना कर ली, तो उसके चेल्यां म्ह तै एक नै उसतै कह्या, “हे प्रभु, जिस तरियां यूहन्ना नै अपणे चेल्यां ताहीं प्रार्थना करणी सिखाई उससे तरियां ए तू भी हमनै सीखा दे।” 2 उसनै उनतै कह्या, “जिब थम प्रार्थना करो, तो कहो, ‘हे पिता, तेरा नाम पवित्र मान्या जावै, तेरा राज्य आवै, 3 म्हारी दिन भर की रोटी हरेक दिन हमनै दिया कर, 4 अर म्हारे पापां नै माफ कर, क्यूँके हम भी अपणे हरेक कसूरवार ताहीं माफ करां सां, अर म्हारे ताहीं परखै ना।” 5 फेर यीशु नै चेल्यां तै कह्या, “मान ल्यों थारा एक दोस्त सै, अर थम आध्धी रात नै उसकै धोरे ज्याके उसतै बिनती करो, ‘हे दोस्त, मन्ने तीन रोटी दे। 6 क्यूँके मेरा एक दोस्त सफर करके मेरे धोरे आया सै, अर उस ताहीं खुआण खात्तर मेरे धोरे कुछ भी

कोनी।’ 7 अर वो भीत्तर तै थमनै जवाब देवे सै, मनै दुखी ना करै, इब तो मनै कुवाड़ मूंद राख्खे सै अर मेरे बाळक मेरे धारे बिछाणा पै सै, इस करके मै उठके तनै कुछ भी न्ही दे सकदा? 8 मै थमनै कहुँ सूँ, हालाकि वो माणस उस तारीं रोटी ना भी देणा चाहवै, तोभी दोस्त होण के नाते वो जरूर उठेगा, अर दोस्त के बार-बार बिनती करण पै, उसकी जरूरत के मुताबिक उस तारीं जरूर देवेगा।” 9 अर मै थारैतै कहुँ सूँ, के माँगो तो थमनै दिया जावेगा, टोक्हों, तो थम पाओगे, खटखटाओ, तो थारे खात्तर खोल्या जावेगा। 10 क्यूँके जो कोए माँगै सै, उसनै मिले सै, अर जो टोहें सै, वो पावै सै, अर खटखटावै सै, उसके खात्तर खोल्या जावेगा। 11 थारे म्ह तै इसा कौण पिता होगा, के जिब उसका बेटा रोटी माँगै, तो उसनै पत्थर देवे, या मच्छी माँगै, तो बदले म्ह उसनै साँप देवै? 12 या अंडा माँगै तो उसनै बिच्छु दे? 13 इस करके जिब थम बुरे होकै, अपणे बाळकां नै आच्छी चीज देणा जाणो सों, तो थारा सुगीय पिता अपणे माँगण आळा नै पवित्र आत्मा क्यूँ न्ही देवेगा। 14 फेर यीशु नै एक गूँगा माणस म्ह तै ओपरी आत्मा तारीं लिकाड़या। जिब ओपरी आत्मा लिकड़गी तो गूँगा बोलण लागग्या, अर माणसां के अचम्भा होया। 15 पर उन म्ह तै कुछ नै कह्या, “यो तो ओपरी आत्मायाँ के प्रधान शैतान की मदद तै ओपरी आत्मायाँ नै लिकाड़े सै।” 16 औरां नै उस तारीं परखण कै खात्तर उसतै आकास की एक निशानी माँगी। 17 पर उसनै उनकै मन की बात जाणकै, उनतै कह्या, “जिस-जिस राज्य म्ह फूट आवै सै, वो राज्य उजड़ जावै सै, अर जिस घर म्ह फूट होवै सै, वो नाश हो जावै सै।” 18 जै शैतान खुद का बिरोधी हो जावै, तो उसका राज्य किस तरियां बणया रहवेगा? क्यूँके थम मेरे बाबत कहो सो के यो शैतान की मदद तै ओपरी आत्मायाँ नै काड्डे सै। 19 भला जै मै शैतान की मदद तै ओपरी आत्मायाँ नै काड्डे सूँ, तो थारी ऊलाद किसकी मदद तै काड्डे सै? इस करके वैए थारा न्याय करेगें। 20 पर जै मै परमेसवर के सामर्थ तै ओपरी आत्मायाँ नै काड्डे सूँ, तो परमेसवर का राज्य थारे धारे आण पोंहच्या सै। 21 जिब ठाड्डा माणस हथियार लिये होए अपणे घर की रुखाळी करै सै, तो उसका धन बचा रहवेगा। 22 पर जिब उसतै बाध कोए और ठाड्डा धावा बोलकै उसनै जीत लेवै सै, तो उसके वे राछ जिनपै उसका बिश्वास था, खोस लेवै सै अर उसका धन लूटके बांड देवे सै। 23 जो मेरै गेल्या न्ही वो मेरै बिरोध म्ह सै, अर जो मेरै गेल्या न्ही कठ्ठा करदा, वो खिंडावै सै। 24 “जिब ओपरी आत्मा माणस म्ह तै लिकड़के जावै सै, तो सूक्खी जगहां म्ह आराम टोहन्दी फिरे सै, अर वा पांटी कोनी। फेर वा कहवै सै, ‘मै उससे माणस म्ह जड़ै तै लिकड़ि थी बोहड़ जाऊँगी।’ अर आकै उस माणस नै घर जिसा झाड़ा-बुहारा अर सजा-धज्या पावै सै। 25 अर आकै उसनै झाड़ा-बुहारा अर सजा-धज्या पावै सै। 26 फेर वा ओपरी आत्मा जाकै अपणे तै भुंडी सात और आत्मायाँ नै अपणे गेल्या ले आवै सै, अर वे उस म्ह बड़के वास करै सै, अर उस माणस की पाच्छली हालत पैहल्या तै भी भुंडी हो जावै सै।” 27 जिब यीशु ये बात कहवै था तो भीड़ म्ह तै किसे बिरबान्नी नै जोर तै

बोलके कह्या, “धन्य सै वो बिरबान्नी जिस तू जन्मा अर उसका तनै दूध पिया।” 28 उसनै कह्या, “हाँ, पर धन्य वे सै, जो परमेसवर का वचन सुणी अर मानै सै।” 29 जिब बड़ी भीड़ कठी होंदी जावै थी तो वो कहण लाग्या, “इस युग के माणस बुरे सै, वे चिन्ह-चमत्कार टोहें सै, पर योना नबी के चिन्ह-चमत्कार नै छोड़के उन तारीं कोए और चिन्ह-चमत्कार कोनी दिया जावेगा। 30 जिसा योना नबी निनवे के आदमियाँ खात्तर निशानी ठहरी, उससे तरियां मै माणस का बेटा भी इस युग के आदमियाँ के खात्तर ठहरेगा। 31 दक्षिण देश की राणी न्याय के दिन इस बखत के माणसां के गेल्या उठके उन तारीं कसूरवार ठहरावेगी, क्यूँके वा राजा सुलेमान का ज्ञान सुणण खात्तर धरती के सिरे तै आई, अर देखों, उरै वो सै जो राजा सुलेमान तै भी बड़ड़ा सै। 32 निनवे नगर के माणस न्याय के दिन इस युग के माणसां के गेल्या उठके, उन तारीं कसूरवार ठहरावें, क्यूँके उननै योना नबी का प्रचार सुणके अपणे पापां तारीं स्वीकार करया, अर देखो, उरै वो सै जो योना नबी तै भी बड़ड़ा सै। 33 “कोए माणस दीवा जळा कै बरतन के तळे न्ही धरदा, पर टांडी पै धरे सै के भीत्तर आण आळा नै चाँदणा मिलै। 34 देह का दीवा आँख सै, इस करके जिब तेरी निगाँह आच्छी सै तो तेरी सारी देह भी उजाळा होगा। पर जिब तेरी आँख ठीक कोनी सै तो तेरी सारी देह भी अँधरे म्ह सै। 35 इस करके चौकन्ने रहो के जो चाँदणा थारे म्ह सै वो अँधेरा ना हो जावै। 36 इस करके जै तेरी देह म्ह चाँदणा हो अर उसका कोए हिस्सा अन्धरे म्ह ना रहवें तो सारा का सारा इसा चाँदणा होगा, जिसा उस बखत होवै सै जिब दीवा अपणी चमक तै थारे तारीं चाँदणा देवे सै।” 37 जिब वो बात करै था तो किसे फरीसी नै उसतै बिनती करी के मेरै उरै आके खाणा खाईयों। वो भीत्तर जाके खाणा खाण नै बेठ्या। 38 फरीसी नै न्यू देखके हैरानी होई के उसनै खाणा खाण तै पैहल्या हाथ कोनी धोए। 39 प्रभु नै उसके मन के विचारां तारीं पढ़के उसतै कह्या, “हे फरीसियों, थम कटोरे अर थाळी नै उप्पर-उप्पर तै तो माँजो सो, पर थारे भीत्तर अन्धेर अर बुराई भरी सै। 40 हे बेअकलो! जिसनै बाहरणै का हिस्सा बणाया, के उसनै भीत्तर का हिस्सा कोनी बणाया? 41 पर हाँ, भीत्तर आळी चिज्जां नै दान कर द्यो, तो देखो, सारा कुछ थारे खात्तर पवित्र हो जावेगा।” 42 पर हे फरीसियों, थारे पै धिक्कार सै! थम पुदीने अर सुदाब का अर कई तरियां के साग-पात का दसमां हिस्सा द्यो सो, पर न्याय तारीं अर परमेसवर कै प्यार तारीं टाळ द्यो सो, आच्छा तो था के इन्नै भी करदे रहन्दे अर उननै भी कोनी छोड़दे। 43 हे फरीसियों, थारे पै धिक्कार सै! थम आराधनालयों म्ह खास-खास आसन नै चाहो सो अर बजारां म्ह नमस्कार चाहो सो। 44 “धिक्कार सै थारे पै! क्यूँके थम उन लुक्की होई कब्रां की तरियां सो, जिनपै माणस चाल्लै सै पर कोनी जाणदे।” 45 फेर एक शास्त्री नै उसतै जवाब दिया, “हे गुरु, इन बातं नै कहके तू म्हारी बुराई करै सै।” 46 पर यीशु नै जवाब दिया, “हे शास्त्रियो थारे पै धिक्कार सै! थम नियम-कायदा का इसा बोझ जिनका ठाणा ओक्खा सै, माणसां पै लादो सो, पर थम खुद उनकी मदद खात्तर

उस बोझ नै अपनी आनगळी तै भी कोनी छुन्दे।” 47 “धक्कार सै थारे पै! थम उन नबियाँ की कब्र बणाओ सो, जिन ताहीं थारे पूर्वजां नै मार दिया था।” 48 आखर म्ह थम गवाह सो, अर अपने पूर्वजां के काम्मां तै रजामंद सो, क्यूँके उननै उन ताहीं मार दिया अर थम उनकी कब्र बणाओ सो। 49 इस करके परमेसवर की समझ नै भी कह्या सै, “के मे उनके धोरे नबियाँ अर प्रेरितां नै भेज्जूंगी, अर वे उन म्ह तै कईयाँ नै मार देंगे, अर कईयाँ नै दुखी करैंगे।” 50 ताके जित नबियाँ का लहू दुनिया की शरुआत तै बहाया गया सै, सारया का ब्यौरा इस युग के माणसां तै लिया जावै, 51 हाबिल की हत्या तै लैके जकर्याह की हत्या ताहीं, जो वेदी अर मन्दर के बिचाळे मारया गया। मै थारे तै सच कहूँ सूँ, इन सारया का ब्यौरा इस्से बखत के माणसां तै लिया जावैगा। 52 “धक्कार सै थम शास्त्रियाँ पै! थमनै ज्ञान की ताळी तो ले ली, पर थम खुद कोनी दाखल होए, अर दाखल होण आळे ताहीं भी रोक घो सो।” 53 जिव वो उड़ै तै लिक्ड़या, तो शास्त्री अर फरीसी भुण्डी तरियां उसके पाच्छे पड़गे अर छेड़ण लागे के वो घणखरी बात्तां का जिक्र करै, 54 अर ताक म्ह लागे रहे के उसके मुँह तै कही होई कोए बात पकड़ै।

12 इतनै म्ह जिव हजारों की भीड़ लागी, उरै ताहीं के वे एक-दुसरे पै पड़ण लागे थे, तो यीशु नै सारया तै पैहल्या अपने चेल्यां तै यो कह्या, “फरीसियाँ के कपट रूपी खमीर तै चौकन्ने रहो। 2 कुछ ढकया कोनी, जो उघाड़या न्ही जावैगा, ना कुछ लुहकया सै, जिसका बेरा न्ही पटै। 3 इस करके जो कुछ थमनै अन्धेरे म्ह कह्या सै, वो उजाळे म्ह सुणया जावैगा, अर जो थमनै कोठड़ियाँ म्ह चुपके-चुपके कह्या सै, वो छात पै तै प्रचार करया जावैगा। 4 “मै थारे तै जो मेरे साथी सो कहूँ सूँ, के जो देह नै घात करै सै पर उसतै ज्यादा और कुछ न्ही कर सकदे, उनतै ना डरियो। 5 मै थमनै समझाऊँ सूँ के थमनै किसतै डरणा चाहिये, घात करण के बाद, जिस ताहीं नरक म्ह गेरण का हक सै, उससे तै डरियो। हाँ, मै थारे तै कहूँ सूँ उससे तै डरियो। (Geenna 9:1067) 6 के दो पिस्या की पाँच गौरैयाँ (एक छोटी चिड़ियाँ) न्ही बिकदी? फेरभी परमेसवर उन म्ह तै एक नै भी कोनी भुल्दा। 7 थारे सिर के एक-एक बाळ भी गिणे होड़े सै, इस करके डरो मतना, थम घणी गौरैयाँ तै बढ़के सो।” 8 “मै थारे तै कहूँ सूँ जो कोए माणसां कै स्याम्ही मन्ने मान लेवैगा, उसनै मै माणस का बेटा भी परमेसवर के सुगंदूतां कै स्याम्ही मान लेऊँगा। 9 पर जो माणसां कै स्याम्ही मेरा इन्कार करैगा, उसका भी परमेसवर के सुगंदूतां कै स्याम्ही इन्कार करया जावैगा।” 10 जो कोए मुझ माणस के बेटे के बिरोध म्ह कोए बात कहवै, उसका वो कसूर माफ कर दिया जावैगा, पर जो पवित्र आत्मा की बुराई करै, उसका वो कसूर माफ कोनी करया जावैगा। 11 जिव माणस थमनै आराधनालयों अर हाकिमां अर अधिकारियां के स्याम्ही ल्यावै, तो फिर्र ना करियो के हम किस तरियां तै, या के जवाब देवां, या के कहवागों। 12 क्यूँके पवित्र आत्मा उससे बखत थमनै सीखा देगा के, के कहणा चाहिये। 13 फेर भीड़ म्ह तै एक नै यीशु तै कह्या, “हे गुरु, मेरे भाई तै कह के बाप कै

जमीन-जायदाद नै मेरे गेल्या बांड लेवै।” 14 उसनै उसतै कह्या, “हे भले माणस, किसनै मेरे ताहीं थारा जमीन-जायदाद बटवारा करण आळा न्यायी बणा दिया सै?” 15 अर यीशु नै उनतै कह्या, “चौकन्ने रहो, अर सारी तरियां कै लोभ-लालच तै खुद नै बचाके राक्खो, क्यूँके किसे का जीवन उसके घणी जमीन-जायदाद तै कोनी होंदा।” 16 यीशु नै उनतै एक उदाहरण देके कह्या, “किसे साहूकार की धरती म्ह घणी पैदावार होई।” 17 फेर वो अपने मन म्ह विचार करण लाग्या, मै के कहेँ? क्यूँके मेरे धोरे जगहां कोनी जित्त अपनी उपज वेगारा धरें। 18 अर उसनै कह्या, मै न्यू कहूँगा मै अपने नाज के गोदाम नै तोड़के, उनतै नाज के और बड़े गोदाम बणाऊँगा, अर उड़ै अपना सारा नाज अर धन धरेंगा, 19 अर अपने-आप तै कहूँगा, के तेरे धोरे घणे साल खात्तर घणा धन धरया सै, चैन कर, खा, पी, मौज कर। 20 पर परमेसवर नै उसतै कह्या, हे बेकूप, तू इस्से रात मर जावैगा, फेर जो कुछ तन्ने कठ्ठा करया सै, वो किसका होगा? 21 “इस्से तरियां वो माणस भी सै, जो अपने खात्तर धन कठ्ठा करै सै, पर परमेसवर की निगांह म्ह साहूकार कोनी।” 22 फेर यीशु नै अपने चेल्यां तै कह्या, “इस करके मै थमनै कहूँ सूँ, अपने जीवन के खात्तर या चिंता ना करो के हम के खावांगें, ना अपनी देह की के, के पैहरागों। 23 क्यूँके जीवन खाणे तै बढ़के सै, अर देह लत्यां तै बढ़के सै। 24 कागगां पै ध्यान घो, वे ना बोवै सै, ना काटै सै, अर ना उनके भण्डार अर गोदाम होवै सै, फेरभी परमेसवर उननै पाळे सै। थारी किम्मत पछियाँ तै बाध सै।” 25 थारे म्ह तै इसा कौण सै, जो चिंता करण तै अपनी उम्र का एक पल भी बढ़ा सकै सै? 26 इस करके जै थम अपनी जिन्दगी म्ह छोटे-छोटे काम भी न्ही कर सकदे, तो जिन्दगी की बड़ी-बड़ी बात्तां खात्तर क्यातै फिर्र करो सो? 27 “जंगळी फूल्लां पै ध्यान करो, के वे किस तरियां बढ़ै सै, वे मेहनत करके अपने खात्तर लत्तें कोनी बणाते। तोभी मै थारे तै कहूँ सूँ, के राजा सुलैमान भी, अपने सारे शानों-शोकत म्ह, उन म्ह तै, किसे के समान लत्ते पैहरे होए कोनी था। 28 इस करके जै परमेसवर मैदान की घास नै, जो आज सै अर काल बाड़ म्ह झोक्की जावैगी, इसे लत्तें पहरावै सै, तो हे बिश्वास म्ह कमजोर माणसों, वो थारी चिन्ता क्यूँ न्ही करैगा? 29 अर थम इस बात की तोह म्ह ना रहो के, के खावांगें अर के पीवांगें, अर शक ना करो। 30 क्यूँके परमेसवर ताहीं ना जाणण आळे लोग, इन सारी चिज्जां की तोह म्ह रहवै सै: पर थारा सुर्गियां पिता जाणै सै, के थमनै इन चिज्जां की जरूरत सै। 31 पर परमेसवर के राज्य की खोज करो तो ये चीज भी थमनै मिल ज्यागी।” 32 “हे छोटे टोळ, मतना डरै, क्यूँके थारे सुर्गियां पिता नै न्यू भाया सै, के थमनै अपना राज्य देवै। 33 अपना धन बेचके दान कर घो, अर अपने खात्तर इसे बटुए बणाओ, जो पुराणे कोनी होन्दे, यानिके परमेसवर नै खुश करण आळे भले काम करके सुर्ग म्ह इसा धन कठ्ठा करो जो खतम कोनी होन्दा, अर जिसके धोरे चोर कोनी जान्दा, अर कीड़ा कोनी बिगाड़दा। 34 क्यूँके जड़ै थारा धन सै, उड़ै थारा मन भी लाग्या रहवैगा।” 35 “हमेशा परमेसवर के काम्मां खात्तर

तैयार रहों, अर थम प्रभु के आण खात्तर, दीवे जळा कै तैयार रहों, 36 अर थम उन माणसां के बरगे बणो, जो अपने माल्लिक की बाट देखते रहवै सै, के वो ब्याह तै कद बोहड़ैगा, ताके जिब आके दरबाजा खटखटावै, तो जिबे उसके खात्तर खोल द्यो। 37 धन्य सै वे नौक्कर जो माल्लिक के बोहड़ण की बाट देखते होए तैयार रहवै सै, मै थमनै साच्ची कहुँ सूँ, के माल्लिक भी खुद एक नौक्कर की तरियां उन ताहीं खाणा खुआण खात्तर बिठावैगा, अर खुद उनकी सेवा-पाणी करैगा। 38 जै वो आध्ठी रात नै या उसके बाद आके उन ताहीं तैयार पावै, तो वे नौक्कर धन्य सै। 39 पर न्यू जाण ल्यो, के जै घर का माल्लिक नै बेरा हो, के चोर ठीक किस घड़ी आवैगा तो वो तैयार रहन्दा, अर अपने घर म्ह चोरी न्ही होण देन्दा। 40 थम भी मेरे बोहड़ के आण खात्तर तैयार रहो, क्यूँके जिस घड़ी के बारे म्ह थम सोचदे भी कोनी, उससे घड़ी मै माणस का बेट्टा सुर्ग तै आ जाऊँगा।” 41 फेर पतरस बोल्यो, “हे प्रभु, के यो उदाहरण तन्नै म्हारे खात्तर दिया से या सारया खात्तर दिया सै।” 42 प्रभु नै जवाब दिया, “वो बिश्वास जोग्गा अर अकलमंद भण्डारी कौण सै, जिसका माल्लिक उस ताहीं नौक्कर-चाकरां पै सरदार ठैहरावै, के उननै बखत पै खाणा देवै।” 43 धन्य सै वो नौक्कर, जिस ताहीं उसका माल्लिक आके इसाए करदा पावै। 44 मै थमनै साच्ची कहुँ सूँ, वो उस ताहीं अपनी सारी धन-सम्पत्ति का माल्लिक बणावैगा। 45 पर जै वो नौक्कर सोच्यण लाग्गै के मेरा माल्लिक आण म्ह वार कर रह्या सै, उसके साथ के नौक्कर नौकराणियाँ ताहीं मारण लागज्या अर खाण-पीण अर दारूबाज होण लाग्गे। 46 तो उस नौक्कर का माल्लिक इसे दिन आवैगा, जिब वो उसकी बाट देख्दा ना हो, अर इसे बखत म्ह आवैगा जिसका उसनै ना बेरा हो, अर उसनै भारी सजा देके उसकी गिणती बिश्वास लायक माणसां म्ह कोनी करी जावैगी। 47 वो नौक्कर घणा छितैगा, जो अपने माल्लिक की मर्जी जाणै था, अर तैयार न्ही रह्या अर ना उसकी मर्जी कै मुताबिक चाल्या। 48 पर हरेक वो नौक्कर जो अपने माल्लिक की मर्जी नै कोनी जाणै, फेर इसा काम करै सै जो मार खाण के लायक सै, वो कम छितैगा। इस करके जिस ताहीं घणा दिया गया सै, उसतै घणा माँग्या जावैगा, अर जिस ताहीं घणा सौप्या सै, उसतै घणा लिया जावैगा। 49 “मै धरती पै आग लाण नै आया सूँ, अर कितना आच्छा होन्दा, के या इससे बखत सुलग जान्दी! 50 मननै तो एक बड़ी भारी बिपदा का बपतिस्मा लेणा सै, अर जिब ताहीं वो ना हो ले जद ताहीं मै इससे बिपदा म्ह रहूँगा! 51 के थम समझो सो के मै धरती पै मिलाप करवाण आया सूँ? मै थमनै कहुँ सूँ, ना, बल्के न्यारे करण आया सूँ। 52 क्यूँके इब तै एक घर म्ह पाँच माणस आप्पस म्ह बिरोध राक्खेंगे, तीन जन जो मेरे पै बिश्वास न्ही करते, वो उन दो जन का बिरोध करैंगे जो मेरे पै बिश्वास राक्खै सै। 53 पिता बेट्टे तै, अर बेट्टा बाप तै बिरोध राक्खैगा, माँ बेट्टी तै, अर बेट्टी माँ तै, सास्सू बहू तै, अर बहू सास्सू तै बिरोध राक्खैगी।” 54 यीशु नै भीड़ तै कह्या, “जिब थम बाइळ नै पश्चिम तै उठदे देख्खो सो, तो जिबे कहो सो के मिह आवैगा, अर

न्यूए होवै सै, 55 अर जिब दक्षिणी हवा चाल्दी देख्खो सो, तो कहो सो के बड़ी गर्मी पड़ैगी, अर न्यूए हो सै। 56 हे कपटियों! थम धरती अर अकास कै रूप-रंग म्ह भेद जाण सको सो, पर परमेसवर जो इस युग म्ह करण लागरया सै उसका भेद क्यातै न्ही जाणदे? 57 “थम खुद फैसला क्यातै कोनी कर लेंदे के ठीक सै?” 58 जिब तू अपने बैरी के गेल्या हाकिम कै धोरे जावै सै, तो राही म्ह उसतै छुटण की कोशिश करले, इसा ना हो के वो तन्नै न्यायाधीश कै धोरे घसीट कै ले जावै, अर न्यायाधीश तन्नै सिपाही के हवाले करदे अर सिपाही तन्नै जेळ म्ह गेर दे। 59 मै तेरे तै कहुँ सूँ के जिब ताहीं तू पाई-पाई न्ही भर देवैगा, तब तक जेळ तै छुटण न्ही पावैगा।

13 उस बखत कुछ माणस आण पोहचे, अर यीशु तै उन गलीली माणसां का जिक्र करण लाग्गे, जिन ताहीं पिलातुस नै मन्दर म्ह बलिदान करते बखत मार दिया था, अर उनका ए लहू बलिदान की भेट तै मिला दिया था। 2 न्यू सुणके उसनै उनतै जवाब म्ह कह्या, “के थम समझो सो के ये गलीली माणस और बाकी सारे गलीलवासियाँ तै घणे पापी थे के उनपै इसी बिपदा आण पड़ी? 3 मै थमनै कहुँ सूँ के ना, पर जै थम पाप करणा न्ही छोड़ोगे तो थम भी इससे तरियां नाश होओगे। 4 अर थम के सोच्यों सों, के उन अठारह माणसां के बारें म्ह जिनपै शीलोह का गुम्मत पड्या, अर वे दब कै मरगे: यरुशलेम के दुसरे सारे बासिन्द्यां तै घणे अपराधी थे? 5 मै थमनै कहुँ सूँ, के जै थम पाप करणा न्ही छोड़ोगे तो थम भी इससे तरियां नाश होओगे।” 6 फेर यीशु नै यो उदाहरण भी देके कह्या, “किसे अंगूर के बाग म्ह अंजीर का दरखत लागरया था। वो उस म्ह फळ टोह आया, पर कोनी मिल्या। 7 फेर उसनै बाग कै रुखाळे तै कह्या, लखा, तीन साल तै म्ह इस अंजीर कै दरखत पै फळ टोह आऊँ सूँ, पर कोनी पान्दा। इसनै काट बगा के यो धरती नै भी क्यूँ रुंधै।” 8 उसनै उसतै जवाब दिया, “हे माल्लिक, इस साल और रहण दे के मै इसके चौगरदेके माट्टी खोदके खाद गरू। 9 जै आगले साल इसके फळ आ गया तो ठीक, न्ही तो इसनै कटवा दियो।” 10 आराम कै दिन यीशु एक आराधनालय म्ह उपदेश देवै था। 11 उड़े एक बिरबान्नी थी जिसम्ह अठारह साल तै एक कमजोर करण आळी ओपरी आत्मा थी, अर वा कुबड़ी होगी थी अर किसे तरियां भी सीध्ठी कोनी हो सके थी। 12 यीशु नै उस ताहीं देखके बुलाया अर कह्या, “हे नारी, तू अपने इस रोग तै मुक्त होगी सै।” 13 फेर उसनै उसपै हाथ धरया, अर वा जिबे सीध्ठी होगी अर परमेसवर की बड़ाई करण लाग्गी। 14 इस करके के यीशु नै आराम कै दिन उस ताहीं ठीक करया था, आराधनालय का सरदार चिड़ कै माणसां तै कहण लाग्या, “काम करण के छ: दिन सै, उन ए दिनां म्ह आके अपने रोग ठीक कराओ, पर आराम कै दिन न्ही।” 15 न्यू सुणके प्रभु यीशु नै जवाब दिया, “हे कपटियों, के आराम कै दिन थारे म्ह तै हरेक अपने बळध या गधे नै थान म्ह तै खोल के पाणी पियाण कोनी ले जान्दा? 16 तो के या बिरबान्नी जो अब्राहम की पीढ़ी सै, जिस ताहीं शैतान नै अठारह साल तै जुड़ राख्या था, के इस ताहीं

आराम के दिन इसके बन्धन तै मुक्त करणा न्ही चाहिये था?” 17 जब यीशु नै ये बात कही, तो उसके सारे बिरोधी शर्मिन्दा होगे, अर साबती भीड़ उन महान् काम्मां तै जो वो करै था, राज्जी होई। 18 फेर यीशु नै कह्या, “परमेसवर का राज्य किस जिसा सै? अर मै उसका उदाहरण किसतै यु? 19 वो राई के दाणै की ढाळ सै, जिस ताहीं किसे माणस नै लेकै अपणे बाग म्ह बोया: अर वो बढ़कै दरखत बणग्या, अर अकास के पंछियाँ नै उसकी डाळियाँ पै बसेरा करया।” 20 यीशु नै दुबारे कह्या, “मै परमेसवर के राज्य का उदाहरण किसतै यु? 21 वो खमीर की ढाळ सै, जिस ताहीं किसे बिरबान्नी नै लेकै तीन पसेरी (पन्द्रह किलो) चून म्ह रखाया, अर होन्दे-होन्दे सारा चून खमीर बणग्या।” 22 यीशु अर उसके चेल्ले नगर-नगर, अर गाम-गाम होकै उपदेश देन्दे होए यरुशलेम नगर की ओड़ जावै थे, 23 तो किसे नै उसतै बुझ्या, “हे प्रभु, के थोड़े ए माणसां का उद्धार होगा?” यीशु नै उनतै कह्या, 24 “भीड़े दरबाजे तै बड़ण की कोशिश करो, क्यूँके मै थमनै कहुँ सूँ के घणखरे उस म्ह बड़णा चाहवैगें, अर कोनी बड़ सकैगें। 25 क्यूँके परमेसवर जो घर का माल्लिक सै उठकै दरबाजा भेड़ देगा, अर थम बाहरणै खड़े होए खटखटाके कहण लागो, हे प्रभु, म्हारे खात्तर दरबाजा खोल दे, अर वो जवाब देवै, मै थमनै कोनी जाण्दा, थम कित्त के सो?” 26 फेर थम कहण लागोगे, हमनै तेरे स्याम्ही खाया-पिया अर तन्नै म्हारे बजारां म्ह उपदेश दिया। 27 पर वो कहवैगा, मै थमनै कहुँ चुक्या सूँ, मै कोनी जाण्दा, थम कित्त के सो। हे भुन्दे काम करण आळो, थम सारे मेरै तै दूर रहो। 28 जब अब्राहम अर इसहाक अर याकूब अर सारे नबियाँ ताहीं परमेसवर राज्य म्ह बेठे, अर खुद नै बाहरणै लिकाड़े होए देक्खोगे, “उड़े रोणा अर दाँत पिसणा होगा। 29 पूरी दुनिया के माणस आकै परमेसवर के राज्य के भोज म्ह शामिल होवैगें। 30 अर सच्चाई या सै के जो पाच्छले सै वे पैहले होंगे, अर जो पैहले सै वे पाच्छले होंगे।” 31 उससे बखत कुछ फरीसियाँ नै आकै यीशु तै कह्या, “उरै तै लिकड़्या, क्यूँके हेरोदेस तन्नै मार देणा चाहवै सै।” 32 यीशु नै उनतै कह्या, “जाकै उस लोमड़ी तै कह द्यो के लखा, मै आज अर काल ओपरी आत्मायाँ नै काढूँ सूँ अर बिमारां नै ठीक करूँ सूँ, अर तीसरे दिन अपना काम पूरा करूँगा। 33 फेर भी यो जरूरी सै के मै आज, काल अर परसो सफर करूँ, क्यूँके हो न्ही सकदा के कोए नबी यरुशलेम नगर के बाहरणै मारया जावै। 34 “हे यरुशलेम के माणसों! हे यरुशलेम के माणसों! तन्नै भोत-से नबियाँ ताहीं मारया सै, जो भोत पैहले रहवै थे, अर उन माणसां ताहीं भी पत्थरां तै मार दिया जिन ताहीं थारे धोरे भेज्जे थे। कितनी ए बर मन्नै न्यू चाह्या के जिस ढाळ मुर्गी अपणे बच्चां नै अपणे पाक्खां तळे कट्टे करै सै, उससे तरियां ए मै भी तेरे बाळकां नै कट्टा करूँ, पर थमनै न्यू न्ही चाह्या। 35 देक्खो, थारा घर थारे खात्तर उजाड़ छोड्या जावै सै, मै थमनै कहुँ सूँ: जब ताहीं थम न्ही कहोगे, ‘धन्य सै वो, जो प्रभु के नाम तै आवै सै,’ ‘जद ताहीं थम मन्नै दुबारे कदे न्ही देक्खोगे।”

14 एक खास मौकके पै जब मसीह आराम के दिन फरीसियाँ के सरदारां म्ह तै किसे कै घरां रोटी खाण नै गया, अर वे सारे उननै घणी उत्सुकता तै देखण लागरे थे। 2 उड़े एक माणस था, जिसम्ह जलोदर की बीमारी थी। 3 इसपै यीशु नै शास्त्रियाँ अर फरीसियाँ तै कह्या, “के नियम-कायदा के मुताबिक आराम के दिन आच्छा करणा ठीक सै या न्ही?” 4 पर वे बोल-बाल्ले रहे। फेर यीशु नै उस रोगी पै हाथ धरकै उस ताहीं ठीक करकै, उस ताहीं बिदा कर दिया। 5 अर उनतै कह्या, “थारे म्ह तै इसा कौण सै, के जै थारा बेट्टा या बळध कुएँ म्ह आराम के दिन पड़ज्या अर वो उसनै जिब्बे बाहरणै कोनी लिकड़े?” 6 वे इन बातां का कुछ जवाब कोनी दे पाए। 7 जब यीशु नै देख्या के न्योदे होए माणस किस तरियां खास-खास जगहां छॉट लेवें सै तो एक उदाहरण देकै कह्या, 8 “जब कोए तन्नै ब्याह म्ह बुलावै, तो खास माणसां की जगहां पै न्ही बैठणा, कदे इसा ना हो के उसनै तेरे तै भी बड़े ताहीं न्योद राख्या हो, 9 अर जिसनै तेरे ताहीं अर उस ताहीं दोनुआ ताहीं न्योदा दिया सै, आके कहवै, ‘इसनै जगहां दे,’ अर फेर तन्नै शर्मिन्दा होके सारया तै पाच्छे बैठणा पड़े। 10 पर जब तू न्योदा जावै तो सारया तै पाच्छली जगहां बैठ के जब वो, जिसनै तेरे ताहीं न्योदा सै आवै, तन्नै कहवै, ‘हे दोस्त, आग्वे बढ़कै बैठ,’ फेर तेरे गेल्या बैठण आळा कै स्याम्ही तेरी बड़ाई होवैगी। 11 क्यूँके जो कोए अपणे-आपनै बड़ड़ा बणावैगा, वो छोट्टा करया जावैगा, अर जो कोए अपणे-आपनै छोट्टा बणावैगा, वो बड़ड़ा करया जावैगा।” 12 फेर यीशु नै फिरीसी तै जिसनै उसका न्योदा दिया था उसतै कह्या, “जब तू दिन का या रात का भोज करै, तो अपणे साथियाँ या भाईयाँ या कुणबे या साहूकार पड़ोसियाँ नै ना न्योद, कदे इसा ना हो के वे भी तन्नै न्योदा देवै, अर तेरा बदला हो जावै। 13 पर जब तू भोज करै तो कंगाल, टुंडे, लंगड़े अर आंध्याँ नै न्योद। 14 तब तू धन्य होवैगा, क्यूँके उन माणसां कै धोरे बदले म्ह देण खात्तर कुछ कोनी, परमेसवर तन्नै उस काम का बदला धर्मियाँ कै जिन्दा होण के बाद देवैगा।” 15 यीशु कै गेल्या खाणा खाण आळा म्ह तै एक नै ये बात सुणकै उसतै कह्या, “धन्य सै वो जो परमेसवर के राज्य म्ह भोज खावैगा।” 16 यीशु नै उसतै कह्या, “किसे माणस नै बड़ड़ा भोज करया अर घणा ताहीं न्योदा। 17 जब खाणा त्यार होग्या तो उसनै अपणे नौक्कर के हाथ न्योदे होए माणसां ताहीं कहवां भेज्या, ‘आओ, इब खाणा त्यार सै।’” 18 “पर वे सारे के सारे माफी माँगण लागो। पैहल्ले नै उसतै कह्या, ‘मन्नै खेत मोल लिया सै, अर जरूरी सै के उसनै देक्खूँ, मै तेरे तै बिनती करूँ सूँ मन्नै माफ करदे।’” 19 दुसरे नै कह्या, “मन्नै पाँच जोड़े बळध मोल लिए सै, उननै परखण जाऊँ सूँ, मै तेरे तै बिनती करूँ सूँ, मन्नै माफ करदे।” 20 एक और नै कह्या, “मन्नै ब्याह करया सै, इस करके मै न्ही आ सकदा।” 21 उस नौक्कर नै आकै अपणे माल्लिक ताहीं ये बात कह सुणाई। फेर घर के माल्लिक नै खुन्दक म्ह आकै, अपणे नौक्कर तै कह्या, “नगर के बजारां अर गळियाँ म्ह इब्बे जाके कन्गालाँ नै, टुंड्यां नै, लंगड्यां नै, अर आंध्याँ नै उरै लेकै

आओ।” 22 नौक्कर नै दुबारै कहा, “हे माल्लिक, जिस ढाळ तन्नै कहा था, उससे तरियां अ करया गया सै, अर फेर भी जगहां सै।” 23 माल्लिक नै नौक्कर तै कहा, “सडकां पै अर बाडया की कान्ही जा अर माणसां नै मजबूर करके लिया ताके मेरा घर भरज्या। 24 क्यूँके मै थमनै कहूँ सूँ के उन पैहले बुलाए होइ माणसां म्ह तै कोए मेरे खाणे नै कोनी चाखैगा।” 25 जिब बड्डी भीड़ यीशु कै गेल्या जावै थी, तो उसनै बोहड़के उनतै कहा, 26 जै कोए मेरा चेल्ला बणणा चाहवै सै, अर अपने माँ-बाप अर घरआळी अर बाळकां नै अर भाईयाँ नै अर भाणां नै बल्के अपने जीवन नै भी मेरे तै ज्यादा प्यार करै सै, तो वो मेरा चेल्ला न्ही हो सकदा। 27 अर जो कोए अपने दुखां का क्रूस ना ठावै, अर मेरे पाच्छे न्ही आवै, वो भी मेरा चेल्ला कोनी हो सकदा। 28 उदाहरण के तौर पै “थारे म्ह तै कौण सै जो घर बणणा चाह्दा हो, अर पैहल्या बैठके खर्चा न्ही फैलावै के पूरा करण की गुंजास मेरे धोरै सै के न्ही? 29 जै वो आस ना होया करदा हो, तो जिब वो नीम धर ले पर काम पूरा ना कर पावै, तो सारे देखण आळे न्यू कहकै उसका मखौल उड़ावैगे, 30 ‘के यो माणस बणणा तो लाग्या पर पूरा कोनी कर पाया?’” 31 या कौण इसा राजा सै जो दुसरे राजा तै युध्द करण जान्दा हो, अर जो विचार करले के जो बीस हजार सैनिक लेके मेरे पै चढ़या आवै सै, के मै दस हजार सैनिक लेके उसका सामना कर सकूँ सूँ के न्ही? 32 न्ही तो उसके दूर रहन्दे होए वो दूतां नै भेजकै उसतै मिलाप करणा चाहवैगा। 33 इससे ढाळ थारे म्ह तै कोए अपना सारा कुछ त्याग न्ही देवै, वो मेरा चेल्ला कोनी हो सकदा। 34 “नूण तो बढ़िया सै, पर जै नूण का सुवाद जान्दा रहवै, तो वो किस चीज तै नमकीन करया जावैगा। 35 वो ना तो धरती के अर ना खाद के खात्तर काम म्ह आवै सै: उसनै तो माणस बाहरणै बगा देवै सै। जिसके कान हों वो ध्यान तै सुण ले।”

15 सारे चुंगी लेण आळे अर पापी माणस, यीशु के धोरै आया करै थे ताके उसकी सुणै। 2 पर फरीसी अर शास्त्री बरड़ाके कहण लागे, “यो तो पापियाँ तै मिलै सै अर उनके गेल्या खावै भी सै।” 3 फेर उसनै उनतै यो उदाहरण कहा 4 “थारे म्ह तै कौण सै जिसकी सौँ भेड़ हों, अर उन म्ह तै एक खुज्या, तो निन्यानमै नै बण म्ह छोड़के, उस खुई होइ नै जिब ताहीं पा न्ही लेन्दी टोह्न्दा ना रहवै? 5 अर जिब पा ज्या सै, फेर वो घणा राज्जी होके उस ताहीं कंधे पै ठा लेवै सै, 6 अर अपने घरां आके साथियाँ अर पड़ोसियाँ नै कठ्ठा करके कहवै सै, ‘मेरे गेल्या खुशी मनाओ, क्यूँके मेरी खुई होइ भेड़ पागी सै।’ 7 मै थमनै कहूँ सूँ के इससे तरियां तै पापां नै छोड़ण आळे एक पापी खात्तर उन निन्यानबे धर्मियाँ की तुलना म्ह सुर्ग म्ह इसतै भी घणा आनन्द मनाया जावै सै, जिनने पापां की माफी माँण की जरूरत कोनी।” 8 यीशु नै एक और उदाहरण दिया “के कौण इसी बिरबान्नी होगी जिसके धोरै दस सिक्के हों, अर उन म्ह तै एक खुज्या, तो वा दीवा बाळ के अर घर झाड़-बुहारके, जिब ताहीं पा न्ही जावै जी लाके टोह्न्दी ना रहवै? 9 अर जिब पा ज्या सै, तो वा अपनी सहेलियाँ अर पड़ोसणां नै कठ्ठा करके कहवै सै, ‘मेरे गेल्या

खुशी मनाओ, क्यूँके मेरा खुया होया सिक्का पाग्या सै।’ 10 मै थमनै कहूँ सूँ के इससे ढाळ जिब कोए माणस अपने पापां नै छोड़के परमेसवर की राह पै चाल्लणा शरु करै सै तो उसके खात्तर भी, परमेसवर के सुर्गदूतां के स्याम्ही उतणा ए आनन्द मनाया जावै सै।” 11 फेर यीशु नै एक और उदाहरण देकै कहा, “किसे माणस के दो बेटे थे। 12 उन म्ह तै छोटाँ नै पिता तै कहा, हे पिता, सम्पत्ति म्ह तै जो मेरा बाँडे आवै सै वो मन्ने इब्बे दे द्यो। इस करके पिता नै उन ताहीं अपनी सम्पत्ति का बंडवारा कर दिया। 13 घणे दिन कोनी बीते थे के छोटा बेटा सारा कुछ कठ्ठा करके दूर देश म्ह चल्या गया, अर उड़े बुरे काम्मां म्ह अपना धन उड़ा दिया। 14 जिब वो सारा कुछ खर्च कर गया, तो उस देश म्ह भारया अकाळ पड्या, अर वो कंगाल होग्या, अर उसके धोरै खाण नै कुछ भी न्ही रह्या। 15 इस करके वो उस देश के बाशिंधां म्ह तै एक कै धोरै काम करण खात्तर, अर उसनै उस ताहीं अपने खेतां म्ह सूअर चरण खात्तर भेज्या। 16 वो भोत भूक्खा था अर वो चाहवै था के उन फळियाँ म्ह तै जिन नै सूअर खावै थे, अपना पेट भरै, अर उस ताहीं कोए कुछ कोनी देवै था। 17 जिब छोटे बेटे के होश ठिकाणै आये अर अपने-आप तै कहण लाग्या, मेरे पिता के धोरै इसे भोत मजदूर सै जिनके खाणा खाण के बाद भी घणाए बच जावै सै, पर मै उरै भूक्खा मरण लाग रह्या सूँ। 18 इस करके मै इब उठके अपने पिता धोरै जाऊँगा अर उसतै कहूँगा के पिता जी, मन्ने परमेसवर जो सुर्ग म्ह सै, उसके अर तेरे बिरोध म्ह पाप करया सै। 19 इब इस जोगगा कोनी रह्या के तेरा बेटा कुहाऊँ, मन्ने अपने एक मजदूर की ढाळ राख ले।” 20 “पर वो उस देश नै छोड़ के अपने बाप के घर की ओड़ चाल्या, वो इब्बे कुछ ए दूर था के उसके बाप नै उस ताहीं देख्या उसपै तरस आया, अर भाजके अपने बेटे ताहीं छात्ती कै लगाके, उस ताहीं चुम्ता रह्या। 21 बेटे नै उसतै कहा, पिता जी, मन्ने परमेसवर जो सुर्ग म्ह सै, उसके अर तेरे बिरोध म्ह पाप करया सै, अर इब इस जोगगा कोनी रह्या के तेरा बेटा कुहाऊँ। 22 पर बाप नै अपने नौकरां तै कहा, ‘ताळ करके सुथरे-सुथरे लत्ते लिकाड़के उसनै पिहराओ, अर उसके हाथ्थां म्ह गुठ्ठी, अर पायां म्ह जूती पहाराओ, 23 अर बढ़िया भोज तैयार करो ताके हम खावां अर खुशी मनावां। 24 क्यूँके मेरा यो बेटा मरग्या था, दुबारै जीग्या सै: खुग्या था अर इब पाग्या सै।’ अर वे खुशी मनाण लागे। 25 पर उसका जेठ्ठा बेटा खेत म्ह काम करण लागरया था। जिब वो आन्दे होए घर के धोरै पोंहच्या, तो उसनै गाण-बजाण अर नाचण का बोल सुण्या। 26 आखर म्ह उसनै एक नौक्कर बुलाके बुझ्या, यो के होण लाग रह्या सै? 27 उसनै उस ताहीं कहा, तेरा भाई बोहड़ आया सै, अर तेरे बाप नै बढ़िया भोज तैयार करवाया सै, इस करके के वो ठीक-ठाक घरा आ ग्या सै। 28 न्यू सुणके वो छो तै भरग्या अर भीत्तर जाणा कोनी चाहा, पर उसका बाप बाहरणै आके उसनै मनाण लाग्या। 29 उसनै बाप तै कहा, ‘देख, मै इतने साल तै तेरी सेवा-पाणी कर रह्या सूँ, अर कदे भी तेरा हुकम कोनी टाळ्या, फेरभी तन्नै मेरे ताहीं कदे भी कोए बढ़िया चीज

कोनी दी, ताके मै अपने साथियाँ गेल्या आनन्द कर सकूँ। 30 पर जिब तेरा यो बेट्टा आया, जिसनै तेरी सम्पत्ति अयाशियाँ म्ह उड़ा दी सै, तो उसके खातर तन्नै बढ़िया भोज तैयार करया।” 31 उसके बाप नै उसतै क्हा, मेरे बेट्टे, तू सारी हाण मेरे गेल्या सै, अर जो कुछ मेरा सै वो सारा तेराए सै। 32 पर इब आनन्द अर मगन होणा चाहिये क्यूँके यो तेरा भाई जो मेरे होए माणसां की तरियां था दुबारा जी गया सै, खुग्या था, इब पाग्या सै।”

16 फेर यीशु नै चेल्यां ताहीं एक और उदाहरण देकै क्हा, “किसे साहूकार का एक भण्डारी था, अर लोगां नै उसके स्याम्ही उसपै यो इल्जाम लाया के वो तेरा सारा धन उड़ा देवै सै। 2 आखर म्ह उसनै अपने भण्डारी ताहीं बुलाकै क्हा, ‘यो के सै मै तेरे बाबत के सुणू सू?’ अपने भण्डारीपण का हिसाब दे, क्यूँके तू आगै तै भण्डारी कोनी रह सकदा।” 3 फेर भण्डारी सोचण लाग्या, इब मै के करूँ? क्यूँके मेरा मालिक इब भण्डारी का काम मेरे तै खोस्सै सै। माट्टी खोदण का काम मेरे तै होवै कोनी, अर भीख माँगदे होए मन्नै शर्म आवेगी। 4 मै जाण गया के मै के करूँ, ताके मै जिब भण्डारी कै काम तै हटया जाऊँ तो माणस मन्नै अपने घरां म्ह ले लेवै। 5 फेर उसनै अपने मालिक के देणदारां ताहीं एक-एक करके बुलाया अर पैहल्या तै बुझ्या, “तेरे उप्पर मेरे मालिक का कितना कर्जा सै?” 6 उसनै क्हा, “सौ मण तेल,” फेर उसनै उसतै क्हा, “अपणा खात्ता अर बही ले अर बैठकै तावळा पचास लिख दे।” 7 फेर उसनै दुसरे तै बुझ्या, “तेरे पै कितना कर्जा सै?” दुसरे नै क्हा, सौ मण गेहूँ, फेर उसनै उसतै क्हा, “अपणा खात्ता अर बही लेकै अर बैठकै अस्सी लिख दे।” 8 मालिक नै उस अधर्मी भण्डारी ताहीं सराहया के उसनै कितनी चतुराई तै काम करया सै। क्यूँके इस दुनिया के माणस अपने बखत के माणसां के गेल्या व्यवहार म्ह चाँदणे के माणसां तै घणे चलाक सै। (aiōn g165) 9 अर मै थमनै कहूँ सू के दुनिया की धन-दौलत तै भले काम करके अपने खात्तर साथी बना ल्यो, ताके जिब वो धन दौलत न्ही रहवै तो अनन्त काल के घर म्ह थारे स्वागत हो। (aiōnios g166) 10 वे लोग जो थोड़े-तै भी थोड़े म्ह भी बिश्वास जोगे सै, वे घणे म्ह भी बिश्वास जोगे होंगे, जो थोड़े-तै भी थोड़े म्ह बेईमान सै, वो घणा म्ह भी बेईमान होंगे। 11 इस करके जिब थम संसारिक धन म्ह बिश्वास जोगा न्ही ठहरे, तो साच्चा धन थमनै कौण देवेगा? 12 अर जै थम संसारिक धन-दौलत न इस्तमाल करण म्ह भरोस्सेमंद न्ही ठहरे, तो परमेसवर थमनै सुर्गीय धन क्यूँ देवेगा? 13 “कोए नौक्कर दो मालिकां की सेवा एक बखत पै न्ही कर सकदा, क्यूँके वो एक तै बैर अर दुसरे तै प्यार राक्खेगा, या एक तै मिल्या रहवेगा अर दुसरे नै छोटा जाणैगा। थम परमेसवर अर धन दोनुआ की सेवा न्ही कर सकदे।” 14 फरीसी जो लोभ्भी थे, ये सारी बात सुणके, मखौल करण लागे। 15 यीशु नै उनतै क्हा, “थम तो माणसां कै स्याम्ही खुद नै धर्मी ठहराओ सो, पर परमेसवर थारे

मन नै जाणै सै, क्यूँके जो चीज माणसां की निगांह म्ह महान् सै, वा परमेसवर के लोवै घृणित सै।” 16 जब तक यूहन्ना आया, जिब ताहीं मूसा के नियम-कायदे अर नबी का प्रभाव माणसां पै रह्या। उस बखत तै परमेसवर के राज्य का सुसमाचार सुणाया जाण लागरया सै, अर हरेक उस म्ह तेज्जी तै इसकी ओड़ खिचे आण लागरे सै। 17 अकास अर धरती का टळ जाणा आसान सै, पर नियम-कायदा की हर छोट्टी बात भी पूरी होकै रहवेगी। 18 उदाहरण के तौर पै “जो कोए अपनी घरआळी नै छोड़के दुसरी तै ब्याह करै सै, वो जारी करै सै, अर जो कोए इसी छोट्टी होई बिरबानी तै ब्याह करै सै, वो भी जारी करै सै।” 19 फेर यीशु नै क्हा, “एक साहूकार माणस था जो बैजनी अर मलमल के महंगे लत्ते पहरदा अर हरेक दिन ऐसो-आराम तै अर मौज तै रहवै था। 20 लाजर नाम का एक कंगाल जिसके घा: होरे थे उसकी देहळी पै छोड़ दिया जावै था। 21 अर वो चाहवै था, के साहूकार के मेज की जूठण तै अपना पेट भरै, उरै ताहीं के कुत्ते भी आके उसके घा: नै चाट्या करै थे।” 22 इसा होया के वो कंगाल मरग्या, अर सुर्गदूतां नै उस ताहीं लेकै अब्राहम की गोद म्ह पोंहच्या। वो साहूकार भी मारया अर गाड्या गया, 23 साहूकार नरक म्ह गेरया गया, अर नरक की ताड़ना तै दर्द म्ह पड़े होए अपनी निगांह ठाई, दूर तै ए अब्राहम के साथ लाजर ताहीं देख्या। (Hades g86) 24 फेर उसनै रुक्का मारकै क्हा, हे पिता अब्राहम, मेरे पै दया करके लाजर नै भेजदे, ताके वो अपनी आनळी का कुणा पाणी म्ह डबोके मेरी जीभ नै शीळी करै, क्यूँके मै इस आग तै तड़फू सू। 25 “पर अब्राहम बोल्यो, ‘हे बेट्टे, याद कर, के तन्नै अपनी जिन्दगी म्ह बढ़िया तै बढ़िया चीज ले ली सै’, अर उससे तरियां लाजर नै तुच्छ चीज, पर इब वो उरै सुख अर शान्ति पा रह्या सै, अर तू तड़फ रह्या सै। 26 इन सबके अलावा म्हारे अर तेरे बिचाळ एक बड़ी खाई ठहराई गई सै, के जो उरै तै तेरी ओड़ आणा चाहवै, वे ना जा सकै, अर ना कोए उड़ै इस पाससै म्हारे धोरे आ सकै।” 27 साहूकार बोल्यो, तो हे पिता, मै तेरे तै बिनती करूँ सू, के उस ताहीं मेरे बाप कै घरां भेज, 28 क्यूँके मेरे पाँच भाई सै, वो उनके स्याम्ही इन बात्तां की गवाही दे, इसा ना हो के वे भी दुख की जगहां म्ह आवै। 29 अब्राहम नै उसतै क्हा, उनके धोरे तो मूसा के नियम-कायदे, नबी अर नबियाँ की किताब सै, वे उनकी सुणै। 30 साहूकार बोल्यो, “न्ही, पिता अब्राहम, पर जै कोए मेरे होया म्ह तै उनके धोरे जावै, तो वे पाप करणा छोड़ देंगे।” 31 अब्राहम नै उसतै क्हा, “जिब वे मूसा नबी अर नबियाँ की न्ही सुणदे, तो जै मेरे होया म्ह तै कोए जी भी जा, तोभी उसकी कोनी मान्नेंगे।”

17 फेर यीशु नै अपने चेल्यां तै क्हा, “हो न्ही सकदा के ठोक्कर ना लागै, पर धिक्कार सै, उस माणस पै जिसके बाबत ठोक्कर लागै सै। 2 पर जो कोए इन छोट्या बाळकां समान जो मेरे पै बिश्वास करै सै, किसे तै भी पाप करवावै तो उसके खात्तर भला योए सै के एक बड़ी चाक्की का पाट उसके गळ म्ह लटकाया जावै अर वो समुंदर म्ह

गेरया जावै।” 3 सावधान रहों, “जै तेरा बिश्वासी भाई पाप करै तो उसनै समझा, अर जै पछतावै तो उसनै माफ करदे। 4 जै हरेक दिन वो तेरे बिरुद्ध म्ह सात बार भी पाप करै, अर सातु बार तेरे धौरे आकै कहवै, मै पछताऊँ सूँ, तो उसनै माफ करदे।” 5 फेर प्रेरितां नै प्रभु यीशु तै बिनती करी, “के म्हारे बिश्वास नै बढ़ा।” 6 प्रभु बोल्या, “जै थमनै राई के दाणै बराबर भी बिश्वास होन्दा, तो थम इस शहतूत के दरखत नै कहन्दे के जड़ तै उखड़के समुन्दर म्ह जा लाग, तो वो थारी मान लेन्दा।” 7 फेर यीशु नै कह्या, “मान ल्यो थारे म्ह तै किसे के धौरे एक नौक्कर सै जो नौक्कर हळ चलान्दा या भेड़ चरान्दा हो, अर जिब वो खेत तै बोहड़ आवै, तो के थम उसतै कहोंगे, ‘आकै मेरे गैल खाणा खाण बैठ ज्या?’ 8 पर इसके बजाये के वो अपणे नौक्कर न्यू कोनी कहवैगा, ‘मेरे खात्तर खाणा त्यार कर, अर मेरे ताहीं खाणा परोसण खात्तर तैयार हो ज्या, जिब ताहीं मै खाऊँ पीऊँ तब ताहीं मेरी सेवा-पाणी कर, इसकै पाच्छे तू भी खा-पी लिये?’ 9 के वो उस नौक्कर का श्यान मान्नेगा के उसनै वैए काम करे जिसका हुकम दिया सै? 10 इस्से तरियां तै थम भी जिब उन सारे काम्मां नै कर ल्यो जिसका हुकम थारे ताहीं दिया गया सै, तो उस ताहीं कर लेण के बाद थमनै कहणा चाहिये, ‘हम नौक्कर सां, हम किसे बड़ाई के हकदार कोनी हमनै तो बस अपना फर्ज निभाया सै।’ 11 फेर जिब यीशु यरुशलम जाण लागरया था तो सामरिया अर गलील परदेस कै बिचाळै की सीमा तै होन्दा होया लिकड्या। 12 तो गाम म्ह बड़दे बखत उसनै दस कोढ़ी मिले वे दूर खड़े थे। 13 वे जोर तै रुक्का मारके बोल्ते, “हे यीशु, हे माल्लिक, म्हारे पै दया कर!” 14 यीशु नै उन कान्ही लखाके कह्या, “यरुशलम के मन्दर म्ह जाओ, अर खुद नै याजकां ताहीं दिखाओ, ताके वो भी देखखै के थम ठीक होए सों के न्ही।” अर जान्दे ए जान्दे वे कोढ़ तै मुक्त होग्ये। 15 फेर उन म्ह तै एक न्यू देखके के मै ठीक होग्या सूँ, जोर-जोर तै परमेसवर की बड़ाई करदा होया यीशु कै धौरे बोहड़या, 16 अर यीशु कै पायां पै मुँह के बळ पड़के उसका धन्यवाद करण लाग्या, अर वो सामरी था। 17 इसपै यीशु नै कह्या, “के दस कोढ़ी चंगे न्ही होए, तो फेर नौ कित्त सै? 18 के गैर यहूदी नै छोड़ कोए और न्ही लिकड्या जो परमेसवर की बड़ाई करदा?” 19 फेर उसनै उस ताहीं कह्या, “उठके चल्या जा, तन्नै बिश्वास करया इस खात्तर तू ठीक होग्या सै।” 20 फेर फरीसियाँ नै यीशु तै बुड़झया के परमेसवर का राज्य कद आवैगा, तो उसनै उनतै जवाब दिया, “परमेसवर का राज्य इस ढाळ आवैगा के थम उसनै अपनी आँखां तै न्ही देख सकदे। 21 अर ना ए माणस इसके बारे म्ह न्यू कह सकैगे, देखखों यो सै परमेसवर का राज्य। क्यूँके परमेसवर का राज्य थारे बिचाळै सै।” 22 फेर यीशु नै चेल्यां तै कह्या, “वो दिन आवैगा, जिब थम उस दिन नै देखणा चाहोंगे जिब मै माणस का बेट्टा बोहड़ के आऊँगा पर थम उस दिन नै देख न्ही पाओगे।” 23 माणस थारे तै कहवेंगे, लखाओ, “मसीहा उड़े सै!” या लखाओ, “वो आड़े सै!” पर थम यो सुणके चले ना जाइयो, अर ना उनकै पाच्छे लागियो। 24 क्यूँके जिस तरियां बिजळी अकास कै एक छोर तै कोंध कै

अकास कै दुसरे छोर ताहीं चमकै सै, उस्से तरियां मै माणस का बेट्टा भी अपणे दिनां म्ह जाहिर होऊँगा। 25 पर पैहल्या जरूरी सै के मै घणा दुख ठावै, अर इस युग कै माणस मेरे ताहीं नकार देंगे। 26 जिसा पूर्वज नूह के दिनां म्ह होया था, उस्से तरियां मुझ माणस के बेट्टे के दिनां म्ह भी होवेगा। 27 जिस दिन तक नूह जहाज म्ह न्ही चढ़या, उस दिन तक माणस खावै-पीवै थे, अर उन म्ह ब्याह होवै थे। फेर बाढ़ नै उन सारया का नाश करया। 28 ठीक याए हालात लूत कै दिनां म्ह होई थी, जिब वो सदोम नगर म्ह रहवै था। माणस खावै-पीवै, लेणा-देणा करदे, दरखत लगान्दे अर घर चिणें थे, 29 पर जिस दिन लूत सदोम तै लिकड्या, उस दिन आग अर गन्धक अकास तै बरसी सारे नगर के माणसां ताहीं नाश कर दिया। 30 यो उस दिन की तरियां होगा जिब मै माणस का बेट्टा बिना बताये जा आऊँगा। 31 “उस दिन जो छात पै हो, अर उसका समान घर म्ह हो, अर वो उसनै लेण खात्तर तळै न्ही उतरें, अर उस्से तरियां जो खेतान् म्ह हो, वो पाच्छे न्ही बोहड़ें। 32 याद राखियों लूत की घरआळी कै गैल के होया था! 33 जो कोए अपनी जान बचाणा चाहवै, वो उसनै खोवेगा, अर जो कोए उसनै खोवै वो उसनै जिन्दा राक्खेगा। 34 मै थमनै कहुँ सूँ, उस रात नै दो माणस एक खात पै होंगे, एक ठाया जावैगा अर दुसरा छोड़ दिया जावैगा। 35 दो बिरबान्नी एक साथ चाक्की पीसदी होवैगी, एक ठा ली जावैगी अर दुसरी छोड़ दी जावैगी। 36 (दो जणे खेत म्ह होंगे, एक ठाया जावैगा अर दुसरा छोड्या जावैगा।)” 37 न्यू सुण उननै उसतै बुड़झया, “हे प्रभु, यो कित्त होवैगा?” यीशु नै उनतै कह्या, “जड़ै लाश हो सै, उड़ेए चील कठ्ठे होवै सै, उस्से तरियां यो हरेक कोए जाण लेवेगा के यो कित्त होगा।”

18 फेर यीशु नै अपणे चेल्यां तै इसके बाबत कह्या, के रोज प्रार्थना करणी चाहिये अर हिम्मत न्ही हारनी चाहिये, उनतै यो उदाहरण दिया, 2 “किसे नगर म्ह एक न्यायाधीश रहवें था, जो ना परमेसवर तै डरै था अर ना किसे माणस की परवाह करया करै था। 3 उस्से नगर म्ह एक बिधवा भी रहवें थी, जो उसके धौरे आ-आके कह्या करै थी, मेरा न्याय चुकाके मन्ने बैरी तै बचा।” 4 कुछ बखत ताहीं तो वो कोनी मान्या पर आखर म्ह मन म्ह सोचके बोल्या, “ऊंतो मै परमेसवर तै कोनी डरदा, अर ना माणसां की कुछ परवाह करूँ सूँ, 5 फेरभी या बिधवा मन्ने काल राक्खै सै, इस करके मै उसका न्याय चूकाऊँगा, कदे इसा ना हो के घड़ी-घड़ी आके आखर म्ह मेरी नास्सा म्ह दम करदे।” 6 प्रभु यीशु नै कह्या, “सुणो, इस अधर्मी न्यायाधीश नै देख के सीखों। 7 के परमेसवर अपणे चुणे होया का न्याय कोनी करैगा, जो दिन-रात उसके नाम की दुहाई देंदे रहवें सै? के वो उनकी मदद करण म्ह वार लगावेगा? 8 मै थमनै कहुँ सूँ, वो जिब्बे उनका न्याय करैगा। फेर भी मै माणस का बेट्टा जिब आऊँगा, तो के मै धरती पै मेरे पै बिश्वास करणीया नै पाऊँगा?” 9 यीशु नै उन माणसां तै यो उदाहरण दिया, जो अपणे बारें म्ह यो सोचवै थे, के हम धर्मी सां, अर दुसरयां नै नकारै थे। 10 “दो माणस मन्दर म्ह प्रार्थना करण नै गए, एक फरीसी था अर दुसरा चुंगी

लेण आळा, 11 फरीसी खड्या होकै अपने मन म्ह न्यू प्रार्थना करण लाग्या, हे परमेसवर, मै तेरा धन्यवाद करूँ सूँ के मै और माणसां की तरियां अन्धेर करण आळा, जुल्मी, अर जार कोनी, अर ना इस चुंगी लेण आळे की तरियां सूँ। 12 मै हफतै म्ह दो बर ब्रत राक्खूँ सूँ, मै अपनी सारी आमदणी का दसमां हिस्सा भी तेरे ताहीं देऊँ गु सूँ।” 13 पर चुंगी लेण आळे नै दूर खडे होकै, सुर्ग के कान्ही निगांह ठाणा भी कोनी चाह्या, बल्के दुखी होकै अपनी छात्ती पीट-पीटके कह्या, “हे परमेसवर, मुझ पापी पै दया कर!” 14 “बिश्वास करो वास्तव म्ह योए चुंगी लेण आळा माणस (परमेसवर की ओड़ तै) धर्मी ठहराया जाके घरां गया, ना के वो फरीसी माणस। क्यूँके जो कोए अपने-आपने बड़ड़ा बणावैगा, वो छोटा करया जावैगा, अर जो कोए अपने-आपने छोटा बणावैगा, वो बड़ड़ा करया जावैगा।” 15 फेर माणस अपने बाळकां नै भी उसके धोरे ल्याण लागे के वो उनपै हाथ धरे, पर चेल्यां नै देख उन ताहीं धमकाया। 16 यीशु नै बाळकां ताहीं धोरे बुलाके कह्या, “बाळकां नै मेरे धोरे आण द्यो अर उननै रोक्को मतना: क्यूँके परमेसवर का राज्य इसाए का सै। 17 मै थमनै सच कहूँ सूँ के जो कोए परमेसवर के राज्य नै बाळक की तरियां कोनी अपनावै वो उस म्ह कदे नही बड़ सकदा।” 18 किसे सरदार नै उसतै बुझ्या, “हे उत्तम गुरु, अनन्त जीवन का हकदार होण खात्तर मै के कहेँ?” (aiōnios g166) 19 यीशु नै उसतै कह्या, “तू मन्नै उत्तम क्यांतै कहवै सै? कोए उत्तम कोनी, सिर्फ एक, यानिके परमेसवर। 20 तन्नै हुकमां का तो बेराए सै: ‘जारी ना करिये, खून ना करिये, अर चोरी ना करिये, अर झूठी गवाही ना दियो, अपने माँ-बाप का आदर करियो।’” 21 उसने कह्या, “मै तो इन सारया नै बाळकपण तै ए मान्दा आऊँ सूँ।” 22 न्यू सुणके यीशु नै उसतै कह्या, “तेरे म्ह इब भी एक बात की कमी सै, अपना सब कुछ बेचके कंगालां ताहीं बांड दे, अर तन्नै सुर्ग म्ह धन मिलैगा, अर आके मेरा चेल्ला बणण खात्तर मेरे पाछे हो ले।” 23 वो न्यू सुणके घणा उदास होया, क्यूँके वो घणा साहूकार था। 24 यीशु नै उस ताहीं देखके कह्या, “साहूकारां का परमेसवर के राज्य म्ह बड़णा कितना ओक्खा सै। 25 जिस तरियां तै ऊँट का सूई के मोरे म्ह तै लिक्ड़णा मुशिकल सै। उससे तरियां परमेसवर के राज्य साहूकार का बड़णा भी मुशिकल सै।” 26 इसपै सुणण आळा नै कह्या, “तो फेर किसका उद्धार हो सके सै?” 27 उसने कह्या, “जो माणसां तै नही हो सकदा वो परमेसवर तै हो सके सै।” 28 पतरस नै कह्या, “लखा, हम तो घर-बार छोड़के तेरे पाछे हो लिये सां।” 29 उसने उनतै कह्या, “मै थमनै साच्ची-साच कहूँ सूँ के इसा कोए कोनी जिसनै परमेसवर के राज्य के खात्तर घर, या घरआळी, भाई, या माँ-बाप, या बाळ-बच्चे ताहीं छोड़ दिया हो, 30 अर इस बखत कई गुणा घणा नही पावै अर परलोक म्ह अनन्त जीवन।” (aiōn g165, aiōnios g166) 31 फेर उसनै बारहां चेल्यां ताहीं गैल लेके उनतै कह्या, “देखो, हम यरुशलम नगर म्ह जावां सां, अर जितनी बात मुझ माणस के बेटे खात्तर नबियाँ नै लिक्खी होई सै, वे सारी पूरी होवैगी। 32 क्यूँके मै गैर यहूदियाँ के हाथ्यां

म्ह सौप्या जाऊँगा, अर मेरा मजाक उड़ावैगें, मेरी बेजती करैगें, अर मेरे पै थूकैगें, 33 अर मेरे कोड़े मारैगें, अर मन्नै छेतैगें अर मार देवैगें, अर मै तीसरे दिन जिन्दा हो जाऊँगा।” 34 पर उननै इन बातां म्ह तै कोए बात नही समझी, अर या बात उनतै लुक्की रही, अर जो कह्या गया था वो उनकी समझ कोनी आया। 35 जब वो यरीहो नगर के लोवे पोंहच्या, तो एक आन्धा सड़क के किनारे बैठ्या होया भीख माँगण लागरया था। 36 वो भीड़ के चाल्लण की आवाज सुणके बुझण लाग्या, “यो के होरया सै?” 37 उननै उसतै बताया, “यीशु नासरी जाण लागरया सै।” 38 फेर उसनै रुक्का मारके कह्या, “हे यीशु, दाऊद की ऊलाद, मेरे पै दया कर!” 39 जो आगै-आगै जाण लागरे थे, वे उसनै धमकाण लाग्ये के बोल-बाल्ला रहे, पर वो और भी रुक्का मारण लाग्या, “हे दाऊद की ऊलाद, मेरे पै दया कर!” 40 फेर यीशु नै खडे होके हुकम दिया के उसनै मेरे धोरे ल्याओ, अर जब वो धोरे आया तो उसनै उसतै बुझ्या, 41 “तू के चाहवै सै के मै तेरे खात्तर कहेँ?” उसने कह्या, “हे प्रभु, योए के मै देखण लागू।” 42 यीशु नै उसतै कह्या, “देखण लाग, तेरे बिश्वास नै तेरे ताहीं ठीक करया सै।” 43 फेर वो जिब्बे देखण लाग्या अर परमेसवर की बड़ाई करदा होया उसके पाछे हो लिया, अर सारे आदमियाँ नै देखके परमेसवर की जै-जै कार करी।

19 यीशु यरीहो नगर म्ह बड़ण लागरया था। 2 ओड़ै जक्कई नाम का एक माणस था जो चुंगी लेण आळा का सरदार, अर साहूकार था। 3 वो यीशु नै देखणा चाहवै था के वो कौण सै। पर भीड़ के कारण देख नही सके था, क्यूँके वो बोन्ना था। 4 फेर उस ताहीं देखण खात्तर वो आगै भाजके गुलर के दरखत पै चढ़ग्या, क्यूँके यीशु नासरी उससे राह तै जाण आळा था। 5 जब यीशु नासरी उसके धोरे आया, तो उप्पर लखाके उसनै कह्या, “हे जक्कई, तोळा उतरया, क्यूँके आज मन्नै तेरे घरां जरूर रहणा सै।” 6 वो दरखत तै उतरके राज्जी होके यीशु नै अपने घरां लेग्या। 7 न्यू देखके सारे माणस बरड़ण लागे, “वो तो एक पापी माणस के घरां रुकरया सै।” 8 जब यीशु जक्कई के घर खाणा खाण लागरया था तो जक्कई नै खडे होके प्रभु तै कह्या, “हे प्रभु यीशु, देख, मै अपनी आध्धी सम्पत्ति कंगालां नै द्यु सूँ, अर किसे का कुछ भी जुल्म करके ले लिया सै तो उस ताहीं चौगुणा बोहड़ा द्यु सूँ।” 9 फेर यीशु नै उसतै कह्या, “आज इस घर के माणसां पै उद्धार आया सै, इस करके के यो भी अब्राहम के वंश तै सै। 10 मै माणस का बेटा खोए होया नै टोह्ल अर उनका उद्धार करण आया सूँ।” 11 जब वे ये बात सुणै थे, तो यीशु नै एक उदाहरण देके कह्या, इस करके के वो यरुशलम के धोरे था, अर वे समझे थे के परमेसवर का राज्य इब्बे जाहिर होण आळा सै। 12 आखर उसनै कह्या, “एक साहूकार माणस दूर देश तै चल्या के राजपद पाके बोहड़े।” 13 उसने अपने नौकरां म्ह तै दस ताहीं बुलाके उन ताहीं दस मोहर दी अर उनतै कह्या, “मेरे बोहड़ण ताहीं लेण-देण करियो।” 14 पर उसके नगर के बासिन्दे उसतै बैर राक्खे थे, अर उसके पाछे

दूतां तै कुह्वा भेज्या, “हम न्ही चाहन्दे के यो म्हारे पै राज करै।” 15 “जिब माल्लिक राजपद पाके बोहड़या, तो इसा होया के उसनै अपणे नौकरां ताहीं जिन ताहीं रपिये दिये थे, अपणे धोरै बुलाया ताके बेरा करै के उननै लेण-देण म्ह के-के कमाया।” 16 फेर पैहल्ले नै आकै कह्या, “हे माल्लिक, तेरी मोंहर तै दस और मोंहर कमाई सै।” 17 उसनै उसतै कह्या, “शाबाश, हे आच्छे नौक्कर! तू घणेण थोड़े म्ह भरोसमंद लिकड़या इब दस नगरां का हक राख।” 18 दुसरे नौक्कर नै आकै कह्या, “हे माल्लिक, तेरी मोंहर तै पाँच और मोंहर कमाई सै।” 19 माल्लिक नै उसतै कह्या, “तू भी पाँच नगरां पै हाकिम होज्या।” 20 तीसरे नौक्कर नै आकै कह्या, “हे माल्लिक, देख, तेरी मोंहर या सै: जिस ताहीं मनै अंगोच्छे म्ह जुड़ राक्खी थी। 21 क्यूँके मै तेरे तै डरँ था, इस करके के तू कठोर माणस सै: जो तन्नै न्ही धरया उसनै ठा ले सै, अर जो तन्नै न्ही बोया, उस ताहीं काट्टै सै।” 22 माल्लिक नै उसतै कह्या, “हे दुष्ट नौक्कर, मै तेरे मुँह तै तन्नै कसूरवार ठहराऊँ सूँ। जिब तन्नै मेरा बेरा सै के करड़ा माणस सूँ, जो मनै न्ही धरया उसनै ठा ल्यु सूँ, अर जो मनै न्ही बोया, उस ताहीं काट्टू सूँ, 23 तो तन्नै मेरे रपिये सर्राफां के धोरै क्यातै कोनी धरे के मै आकै ब्याज सुधां ले लेन्दा?” 24 अर जो माणस धोरै खड़े थे, उसनै उनतै कह्या, “वा मोंहर उसतै ले ल्यो, अर जिसके धोरै दस मोंहर सै उसनै दे द्यो।” 25 उननै उसतै कह्या, “हे माल्लिक, उसके धोरै दस मोंहर तो सै।” 26 “मै थमनै कहूँ सूँ के जिसके धोरै सै, उस ताहीं दिया जावेगा, अर जिसके धोरै न्ही सै, उसतै वो भी जो उसके धोरै सै ले लिया जावेगा। 27 पर मेरे उन बैरियाँ ताहीं जो न्ही चाहवें थे के मै उनपै राज करँ, उन ताहीं उरै ल्याके मेरे स्याम्ही घात करो।” 28 ये बात कहके यीशु यरुशलेम नगर कै कान्ही चेल्यां कै आगमै-आगमै चाल्या। 29 जिब वो जैतून नामक पहाड़ पै बैतफगे अर बैतनिय्याह गाम कै धोरै पोंहच्या, तो उसनै अपणे चेल्यां म्ह तै दोयां ताहीं न्यू कहके भेज्या, 30 “स्याम्ही के गाम म्ह जाओ, अर उस म्ह पोहोचदये एक गधी का बच्चा जिसपै कोए कदे न्ही बेठ्या हो, बन्धया होड़ थमनै मिलेगा, उसनै खोल कै लियाओ। 31 जै थारे तै कोए बुड़्झी के क्यातै खोल्लो सो, तो कहियो के प्रभु नै इसकी जरूरत सै।” 32 जो भेज्जै गए थे, उननै जाके जिसा यीशु नै कह्या था, उससे तरियां पाया। 33 जिब वे गधी कै बच्चे नै खोल्ले रहै थे, तो उसके मालिकां नै उनतै बुड़्झया, “इस बच्चे नै क्यातै खोल्लो सो?” 34 चेल्यां नै कह्या, “प्रभु नै इस ताहीं काम म्ह ल्याणा सै।” 35 वे उसनै यीशु कै धोरै लियाए, अर अपणे लत्ते उस गधी के बच्चे पै गरेकै यीशु ताहीं उसपै बिठा दिया। 36 जिब वो जाण लागरया था, तो वे अपणे लत्ते राह म्ह बिछान्दे जावै थे। 37 यरुशलेम नगर कै धोरै आन्दे होए जिब यीशु जैतून पहाड़ की ढलाण पै पोंहच्या, तो चेल्यां का सारा टोळ उन सारे सामर्थ के काम्मां कै कारण जो उननै देखे थे, राज्जी होके जोर तै परमेसवर की जय-जयकार करण लागे 38 “धन्य सै वो राजा, जो प्रभु के नाम तै आवै सै! सुर्ग म्ह शान्ति अर अकास मण्डप म्ह महिमा हो!” 39 फेर भीड़ म्ह तै

कुछ फरीसी यीशु तै कहण लागे, “हे गुरु, इस बात के कारण अपणे चेल्यां नै धमका।” 40 उसनै जवाब दिया, “मै थमनै कहूँ सूँ, जै ये बोल-बाल्ले रहे तो स्तुति इन पत्थरां तै लिकड़ण लागेगी।” 41 जिब यीशु यरुशलेम नगर कै धोरै आया तो नगर नै देखके माणसां खात्तर रोया 42 अर बोल्या, “कितना भला होन्दा के तू, हाँ, तू ए आज इतणाए समझ लेन्दा की परमेसवर के साथ शान्ति का के मतलब सै, पर यो तेरे तै लहको के राख्या गया सै। 43 क्यूँके वे दिन तेरे म्ह आवैगें के तेरे बैरी मोचां बाँधके तन्नै घेर लेवेगें, अर चौगरदे तै तन्नै दबावैगें ताके थारा राह बन्द होज्या, 44 अर तेरा बैरी तन्नै अर तेरे बाळकां ताहीं जो तेरे म्ह सै, माट्टी म्ह मिलावैगें, अर तेरे म्ह पत्थर पै पत्थर भी कोनी रहवेगा, जो गोरया ना जावेगा, क्यूँके तन्नै उस मौक्के ताहीं जिब तेरे पै दया की निगांह होई थी तो तन्नै कोनी पिच्छाणा।” 45 फेर वो मन्दर म्ह जाके समान बेघण आळा ताहीं बाहरणै लिकाड़ण लाग्या, 46 अर उनतै कह्या, “पवित्र शास्त्र म्ह लिख्या सै, ‘मेरा घर प्रार्थना का घर होगा,’ पर थमनै इस ताहीं डाकुआं की गुफा बणा दिया।” 47 वो हरेक दिन मन्दर म्ह उपदेश दिया करै था, अर प्रधान याजक अर शास्त्री अर माणसां के मुखिया उसका नाश करण का मौक्का टोहँ थे। 48 पर कोए जुगाड़ कोनी काढ सकै थे, के यो किस तरियां करा, क्यूँके सारे माणस घणे चाह तै उसकी सुणै थे।

20 एक दिन इसा होया के जिब यीशु मसीह मन्दर म्ह माणसां नै उपदेश देवै था अर सुसमाचार सुणावै था, तो प्रधान याजक अर शास्त्री, यहूदी अगुवां कै गेल्या धोरै आकै खड़े होए, 2 अर कहण लागे, “म्हारे ताहीं बता, तू इन काम्मां नै किसके हक तै करै सै, अर वो कौण सै जिसनै तेरे ताहीं यो हक दिया सै?” 3 उसनै उनतै कह्या, “मै भी थारे तै एक बात बुड़्झू सूँ, मनै बताओ। 4 यूहन्ना का बपतिस्मा सुर्ग की ओड़ था या माणसां की ओड़ तै था?” 5 फेर वे आप्पस म्ह कहण लागे, “जै हम कहां, ‘सुर्ग की ओड़,’ तो वो कहवेगा, ‘फेर थमनै उसका बिश्वास क्यातै न्ही करया?’ 6 अर जै हम कहां, ‘माणसां की ओड़,’ तो सारे माणस म्हारे पै पत्थर बरसावैगें, क्यूँके सारे जाणै सै के यूहन्ना साच्चीये नबी था।” 7 आखर उननै जवाब दिया, “हमनै न्ही बेरा के वो किस ओड़ तै था।” 8 यीशु नै उनतै कह्या, “तो मै भी कोनी बतान्दा के मै ये काम किस हक तै करँ सूँ।” 9 फेर वो माणसां तै यो उदाहरण कहण लाग्या: “किसे माणस नै अंगूर का बाग लगाया, अर किसानां तै उसनै ठेक्का दे दिया अर घणे दिनां खात्तर परदेस चल्या गया। 10 जिब बखत आया तो उसनै किसानां के धोरै एक नौक्कर ताहीं भेज्या के वे अंगूर के बाग के कुछ फळां का हिस्सा उसनै देवै, पर किसानां नै उस ताहीं छेतके रिस्ते हाथ्थां बोहड़ा दिया। 11 फेर उसनै एक और नौक्कर ताहीं भेज्या, अर उननै उस ताहीं भी छेतके अर उसकी बेजती करके रिस्ते हाथ्थां बोहड़ा दिया। 12 फेर उसनै तीसरा भेज्या, उननै उस ताहीं भी घायल करके लिकाड़ दिया।” 13 फेर अंगूर के बाग कै माल्लिक नै कह्या, “मै के करँ? मै अपणे प्यारे बेटे नै भेज्जुंगा, हो सकै सै वे उसकी इज्जत करै।”

14 जिब किसानां नै उस ताहीं देख्या तो आप्पस म्ह विचार करण लाग्गे, “यो तो वारिस सै, आओ, हम इसने मार दया के विरासत म्हारी हो जावै।” 15 अर उननै उस ताहीं अंगूर के बाग तै बाहरणै लिकाड़के मार दिया। इस करके अंगूर के बाग का माल्लिक उनके गेल्या के करैगा? 16 वो आके उन किसानां का नाश करैगा, अंगूर के बाग औरां नै सोपैगा। न्यू सुणके उननै कह्या, “परमेसवर करै इसा ना हो।” 17 उसनै उनकी ओड़ देखके कह्या, फेर यो के लिख्या सै: “जिस पत्थर नै राजमिस्त्रियाँ नै निकम्मा ठहराया था, वोए कोणे का सिरा होग्या। 18 “जो कोए उस पत्थर पै पड़ैगा वो चकणाचूर हो ज्यागा, अर जिसपै वो पड़ैगा, उसनै पिस देवैगा।” 19 उससे बखत शास्त्रियाँ अर प्रधान याजकां नै उस ताहीं पकड़णा चाह्या, क्यूँके वे समझगे थे के उसनै म्हारै पै यो उदाहरण कह्या, पर वे माणसां तै डरगे। 20 अर वे उसकी टाह म्ह लाग्गे अर भेदिए भेज्जै के धर्म का भेष धरके उसकी कोए ना कोए बात पकड़ै, ताके उस ताहीं राज्यपाल के हाथ अर अधिकार म्ह सौंप दें। 21 उननै उसतै न्यू बुझ्याया, “हे गुरु, हमनै बेरा सै के तू ठीक कहवै अर सिखावै भी सै, अर किसे की मेरे कोनी लेन्दा, बल्के परमेसवर की राह सच्चाई तै बतावै सै। 22 के म्हारा कैसर तै चुंगी देणा ठीक सै या कोनी?” 23 उसनै उनकी श्याणपत ताहीं ताड़के उनतै कह्या, 24 “एक दीनार (एक दिन की मजदूरी) मन्ने दिखाओ। इसपै किसकी छाप अर नाम सै?” उननै कह्या, “कैसर का।” 25 उसनै उन ताहीं कह्या, “तो जो कैसर का सै, वो कैसर नै द्यो, अर जो परमेसवर का सै, वो परमेसवर नै द्यो।” 26 वे माणसां के स्याम्ही इस बात म्ह उसनै पकड़ कोनी सके, बल्के उसके जवाब तै हैरान होके बोल-बाल्ले रहगे। 27 फेर सदूकी जो कहवै सै के मेरे होया का जिन्दा होणा सै ए कोनी उन म्ह तै कुछ नै उसके धोरै आके बुझ्याया, 28 “हे गुरु, मूसा नबी नै म्हारै खात्तर यो लिख्या सै: जै किसे का भाई अपणी घरआळी के रहन्दे बेऊलादा मर जावै, तो उसका भाई उसकी घरआळी तै ब्याह करले, अर अपणे भाई के खात्तर पीढ़ी पैदा करै। 29 सात भाई थै, पैहल्डा भाई ब्याह करके बेऊलादा मरग्या। 30 फेर दुसरे 31 अर तीसरे नै भी उस बिरबान्नी तै ब्याह कर लिया। इस तरियां तै सात्तु बेऊलादे मरगे। 32 आखर म्ह वा बिरबान्नी भी मरगी। 33 आखर म्ह जिन्दा होण पै वा उन म्ह तै किसकी घरआळी होवैगी, क्यूँके वा सातुवां की घरआळी हो ली थी।” 34 यीशु नै उनतै कह्या, “इस युग की ऊलादां म्ह ब्याह होवै सै, (aiōn g165) 35 पर जो माणस इस जोगे ठहरैगे के उस युग नै अर मेरे होया म्ह तै जिन्दा उठुणके पद नै पा लेवै, उन म्ह ब्याह शादी कोनी होन्दी। (aiōn g165) 36 वे दुबारै मरण के भी कोनी, क्यूँके वे सुर्गदूतां की ढाळ होवैगें, अर पुनरुत्थान की ऊलाद होणे तै परमेसवर की भी ऊलाद होवैगें। 37 पर इस बात ताहीं के मेरे होए जिन्दा होवै सै, मूसा नबी नै भी झाड़ी की कहाँनी म्ह दिखाया सै के वो प्रभु ताहीं ‘अब्राहम का परमेसवर, अर इसहाक का परमेसवर अर याकूब का परमेसवर कहवै सै।’ 38 परमेसवर तो मुर्दा का कोनी पर जिन्दा का परमेसवर सै: क्यूँके उसके लोवै सारे जिन्दे सै।” 39 फेर न्यू

सुणके शास्त्रियाँ म्ह तै कुछ नै न्यू कह्या, “हे गुरु, तन्नै ठीक कह्या।” 40 अर उननै दुबारै उसतै कुछ और बुझ्याया की हिम्मत कोनी करी। 41 फेर उसनै उनतै बुझ्याया, “मसीह नै दाऊद की ऊलाद किस तरियां कहवै सै?” 42 दाऊद खुदे भजन संहिता की किताब म्ह कहवै सै: 43 प्रभु नै मेरे प्रभु तै कह्या, “मेरे सोळे कान्ही बैठ, जिब ताहीं के मै तेरे बैरियाँ तेरे पायां म्ह न्ही झुका दियुँ।” 44 दाऊद तो उसनै प्रभु कहवै सै, “तो फेर वो उसकी ऊलाद किस ढाळ होया?” 45 जिब सारे सुणे थे, तो उसनै अपणे चेल्यां तै कह्या, 46 “शास्त्रियाँ तै चौकन्ने रहियो, जिनताहीं लाम्बे-लाम्बे चोगे पहरके हांडणा आच्छा लाग्गे सै, अर जिन नै बजारां म्ह नमस्कार, अर आराधनालयों म्ह खास बैठणा अर जिम्मण म्ह खास जगहां प्यारी लाग्गे सै। 47 वे बिधवायाँ के घर खा जावै सै, अर दिखाण खात्तर घणी वार ताहीं प्रार्थना करदे रहवै सै: ये घणा दण्ड पावैगें।”

21 फेर उसनै निगांह ठाके सहूकारां ताहीं अपणा-अपणा दान भण्डार म्ह घालदे देख्या। 2 उसनै एक कंगाल बिधवा ताहीं भी उस म्ह दो दमड़ी (जो एक थेले के बराबर होवै सै) घालदे देख्या। 3 फेर उसनै कह्या, “मै थमनै सच कहुँ सूं के इस कंगाल बिधवा नै सारया तै बाध घाल्या सै। 4 क्यूँके उन सारया नै अपणी-अपणी बढ़दी म्ह तै दान म्ह कुछ घाल्या सै, पर इसनै अपणी घटी म्ह तै अपणी सारी कमाई घाल्ली सै।” 5 जिब घणखरे माणस मन्दर के बाबत कहरे थे के वो किसे सुथरे पत्थरां अर भेटां की चिज्जां तै समारया गया सै, तो उसनै कह्या, 6 “वे दिन आवैगें, जिन म्ह यो सारा जिन नै थम देख्खो सो, उन म्ह तै उरै किसे पत्थर पै पत्थर भी कोनी रहवैगा, जो गेरया न्ही जावैगा।” 7 उननै उसतै बुझ्याया, “हे गुरु, यो सारा कद होवैगा? अर ये बात जिब पूरी होण पै होवैगी, तो उस बखत की के निशान्नी होवैगी?” 8 उसनै कह्या, “चौकन्ने रहियो के भकाए ना जाओ, क्यूँके घणखरे मेरे नाम तै आके कहवैगें, ‘मै वोए सूं, अर न्यू भी के, ‘बखत लोवै आण पोंहच्या सै।’ थम उनके पाच्छे ना चले जाइयो। 9 जिब थम रोळे अर झगड़े का जिक्र सुणो तो घबराईयो ना, क्यूँके इनका पैहल्या होणा जरूरी सै, पर उस बखत जिब्बे खात्मा कोनी होवैगा।” 10 फेर उसनै उनतै कह्या, “जात पै जात अर राज्य पै राज्य चढ़ाई करैगा, 11 अर बड़े-बड़े हाल्लण आवैगें, अर जगहां-जगहां अकाळ अर महामारियाँ पड़ैगी, अर अकास म्ह खतरनाक बात अर बड़े-बड़े निशान जाहिर होवैगें।” 12 पर इन सारी बाततां तै पैहल्या मेरे नाम के बाबत थमनै पकड़ैगें, अर कॉल करैगें, अर आराधनालयों म्ह सौपैगें, अर जेळ म्ह गिरवावैगें, राज्यपालों अर राजयां के स्याम्ही ले जावैगें। 13 पर यो थारे खात्तर गवाही देण का मौक्का हो जावैगा। 14 इस करके अपणे-अपणे मन म्ह ठान ल्यो के हम पैहल्या तै जवाब देण की फिक्र कोनी करगें। 15 क्यूँके मै थारे ताहीं इसा बोल अर समझ दियुँगा के थारे सारे बिरोधी सामना या खण्डन कोनी कर सकेगें। 16 थारे माँ-बाप, अर भाई अर कुणबा, अर साथी भी थमनै पकड़वावैगें, उरै ताहीं के थारे म्ह तै कईयाँ नै मरवा देवैगें। 17 मेरे नाम के कारण सारे

माणस थारे तै बैर राक्खेंगे। 18 पर थारे सिर का एक बाळ भी बाँका कोनी होवैगा। 19 अपने धीरज तै थम अपनी जान नै बचाए राक्खोगे। 20 “जिब थम यरुशलेम की पलटन तै घिरया होया देख्खो, तो जाण लियो के उसका उजड़ जाणा लोवै सै। 21 फेर जो यहूदिया परदेस म्ह हों पहाड़ां पै भाज जावै, अर जो यरुशलेम नगर कै भीत्तर हों वे बाहरणै लिक्कड़ जावै, अर जो गाम्मां म्ह हों वे उस म्ह नही जावै। 22 क्यूँके ये बदला लेण के इसे दिन होंगे, जिन म्ह लिक्खी होई सारी बात पूरी हो जावैगी। 23 उन दिनां म्ह जो गर्भवती अर दूध पिलान्दी बिरबान्नी होवैगीं, उनकै खातर भागणा भी मुश्किल होगा! क्यूँके देश म्ह बड़ड़ा क्लेश अर इन माणसां पै बड़ड़ा प्रकोप होवैगा। 24 वे तलवार की कौर हो जावेंगे, अर सारे देश कै माणसां म्ह कैदी होकै पोहुचाये जावेंगे, अर जिब ताहीं गैर यहूदी का बखत पूरा कोनी होवै, जद ताहीं यरुशलेम गेरजातां तै रोंघा जावैगा। 25 “सूरज, चाँद, अर तारां म्ह निशान्नी दिखैगी, अर धरती पै देश-देश के आदमियाँ पै संकट होगा, क्यूँके वे समुन्दर कै गरजण अर लहरां के रोळें तै घबरां जावेंगे। 26 भय कै कारण अर दुनिया पै आण आळी घटनायां की बात देखदे-देखदे माणसां कै जी म्ह जी कोनी रहवैगा, क्यूँके अकास की शक्तियाँ हलाई जावैगी। 27 फेर वे माणस के बेट्टे नै सामर्थ अर बड़्डी महिमा कै गेल्या बादळां पै आन्दे देखेंगे। 28 जिब ये बात होण लागै, तो सीध्धे होकै अपने सिर उप्पर ठाईयो, क्यूँके थारा छुटकारा लोवै होगा।” 29 यीशु नै उनतै एक उदाहरण देकै कह्या, “अंजीर के दरखत अर सारे दरखतां नै देख्खो। 30 ज्योए उन म्ह कौपले लिक्कड़ै सै, तो थम खुद जाण ल्यो सो, के गर्मी का बखत लोवै सै। 31 इस तरियां तै जिब थम ये बात होन्दे देख्खो, तो जाण ल्यो के परमेसवर का राज्य लोवै सै।” 32 मै थमनै साच्ची कहूँ सूं के जिब ताहीं ये सारी बात नही हो ले, जद तक इस पीढ़ी का कदे भी अन्त कोनी होवैगा। 33 धरती अर अकास टळ जावेंगे, पर मेरी बात कदे नही टळैगी। 34 “इस करकै चौकन्ने रहियो, इसा ना हो के थारा मन खुमार, अर मतवालेपण, अर इस जिन्दगी की फिक्र तै सुस्त हो जावै, अर वो दिन थारे पै फन्दे की ढाळ चाणचक आण पड़े। 35 क्यूँके वो सारी धरती के सारे बासिन्दा पै इस तरियां आण पड़ेगा। 36 इस करकै जागदे रहो अर हर बखत प्रार्थना करदे रहो के थम इन सारी आण आळी घटनायां तै बचण अर माणस के बेट्टे कै स्याम्ही खड़े होण कै जोगे बण सको।” 37 वो दिन म्ह मन्दर म्ह उपदेश देवै था, अर रात नै बाहरणै जाकै जैतून नामक पहाड़ पै रह्या करै था, 38 अर सबेरै नै तड़कै सारे माणस उसकी सुणण की खातर मन्दर म्ह उसकै धोरै आया करै थे।

22 अखमीरी रोटी का त्यौहार जो फसह कुहावै सै, धोरै था, 2 अर प्रधान याजक अर शास्त्री इस बात की टोह म्ह थे। के यीशु नै किस तरियां मारै, पर वे माणसां तै डरै थे। 3 फेर शैतान यहूदा म्ह बडग्या, जो इस्करियोती कुहावै अर बारहां चेल्यां म्ह गिण्या जावै था। 4 उसनै जाकै प्रधान याजकां अर पहरेदार के सरदारां के गेल्या बातचीत

करी के किस तरियां यीशु नै उनके हाथ पकड़वांवां। 5 वे राज्जी होए, अर उस ताहीं रुपिये देण का वादा किया। 6 वो मान गया अर मौक्का टोह लाग्या के जिब भीड़ नही हो तो उसनै उनके हाथ पकड़वा दे। 7 फेर अखमीरी रोटी के त्यौहार का दिन आया, जिसम्ह फसह का मेम्ना बलि करणा जरूरी था। 8 यीशु नै पतरस अर यूहन्ना ताहीं यो कहकै भेज्या, “जाकै म्हारै खाण खातर फसह त्यार करो।” 9 उननै यीशु तै बुझ्या, “तू किन्त चाहवै सै के हम उसनै त्यार करा?” 10 यीशु नै चेल्यां ताहीं कह्या, देख्खो, नगर म्ह बड़तेए एक आदमी पाणी का पैंढा ठाए होए थमनै मिलैगा, जिस घर म्ह वो जावै थम उसके पाच्छै चले जाइयो, 11 अर उसके घर के माल्लिक तै कहियो, “गुरु तेरे तै बुझ्झै सै के वा बैठक किन्त सै जिस म्ह मै अपने चेल्यां के गेल्या फसह खाऊँ?” 12 वो थमनै एक सजी-सजाई बड़ी अटारी दिखा देवैगा, ओड़ेए त्यारी करियो। 13 उननै जाकै, जिसा उसनै उनतै कह्या था, उससे तरियां पाया अर फसह का भोज त्यार करया। 14 जद वा घड़ी आगी, के यीशु प्रेरितां गेल्या खाणा खाण बेठ्या। 15 अर उसनै उन ताहीं कह्या “मन्नै बड़ी लालसा थी के मरण तै पैहल्या यो फसह भोज थारे गेल्या खाऊँ। 16 क्यूँके मै थमनै सच कहूँ सूं के मै इसनै जिब तक नही खाऊँगा जब तक यो परमेसवर के राज्य म्ह पूरा नही हो।” 17 फेर उसनै अंगूरां के रस का कटोरा लेकै परमेसवर का धन्यवाद करया अर कह्या, “इसनै ल्यो अर आप्स म्ह बाँट ल्यो। 18 क्यूँके मै थमनै कहूँ सूं के जिब ताहीं परमेसवर का राज्य नही आवै तब तक मै अंगूर का रस इब तै कदे नही पिऊँगा।” 19 फेर यीशु नै रोटी ली अर परमेसवर का धन्यवाद करके तोड़ी, अर चेल्यां ताहीं या कहकै दी, “या मेरी देह सै जो थारे खातर दी जा सै: मेरी याद म्ह न्यूप करया करो।” 20 इसे तरियां तै उसनै खाणे के पाच्छै कटोरा भी यो कहन्दे होए दिया, “यो कटोरा मेरै उस लहू म्ह जो थारे खातर बहाया जा सै नया करार सै। 21 पर देख्खो, जो मन्नै पकड़वावैगा वो म्हारे गेल्या इस भोज म्ह शामिल सै। 22 क्यूँके मै माणस का बेट्टा तो जिसा मेरे खातर तय करया गया सै, ठीक उससे तरियां होण लागरया सै, पर धिक्कार सै उस माणस पै जिसकै जरिये मै पकड़वाया जाऊँ सूँ।” 23 फेर वे आप्स म्ह पूछताछ करण लागये के म्हारै म्ह तै कौण सै, जो यो काम करैगा। 24 उन म्ह या बहस भी होगी के म्हारै मै तै कौण बड़ड़ा समझा जावै सै। 25 यीशु नै उन ताहीं कह्या, “और गैर यहूदियां के राजा उनपै राज करै सै, अर जो उनपै हक जमावें सै वे भले कुहावै सै। 26 पर थम इसे ना होइयो, बल्के जो थारे म्ह बड़ड़ा सै वो छोट्टे कै बरोब्बर अर जो प्रधान सै, वो सेवक कै बरोब्बर बणै। 27 क्यूँके बड़ड़ा कौण सै, वो जो खाणे पै बेठ्या सै, या वो जो सेवा करै सै? के वो नही जो ज़िम्मण बेठ्या सै? पर मै थारे बिचाळै सेवक बरोब्बर सूँ। 28 थम वो सों, जो मेरी मुसीबतां म्ह लगातार मेरै गेल्या रहे, 29 अर जिस तरियां मेरै पिता नै मेरे खातर एक राज्य ठहराया सै, उससे तरियां मै भी थारे खातर ठहराऊँ सूँ, 30 तकै थम मेरै राज्य म्ह मेरी मेज पै खाओ-पीओ बल्के सिंहासनां पै बैठकै इस्राएल के बारहां गोत्रां का

न्याय करो।” 31 “शमौन, हे शमौन! देख शैतान नै परमेसवर तै हुकम ले लिया सै, के थारे ताहीं परखै जिस तरियां किसान गहूँ नै भूसी तै न्यारा करै सै। 32 पर मन्ने तेरे खात्तर बिनती करी ताके थम मेरे पै बिश्वास करणा ना छोड़ दे, अर जिब थम पाप करणा छोड़ दे, तो अपने भाईयों नै भी इसाए करण खात्तर कहियो।” 33 उसनै उसतै कह्या, “हे प्रभु मै, तेरे गेल्या जेठ जाण, बल्के मरण नै भी त्यार सूं।” 34 उसनै कह्या, “हे पतरस, मै तन्नै सच कहूँ सूँ, के आज मुर्गा बाँग नही दैवगा जब ताहीं तू तीन बर मेरे बारे म्ह मुकरैगा जावेगा, के मै तन्नै नही जाणदा।” 35 फेर यीशु नै चेल्यां ताहीं कह्या, “जिब मन्ने थारे ताहीं वचन सुणाण खात्तर बटुए, अर झोळी, अर जूयों के बिना भेज्या था, तो के थमने किसे चीज की कमी होई थी?” उननै कह्या, “किसे चीज की नही।” 36 उसनै चेल्यां तै कह्या, “पर इब जिसके धोरे बटुआ ना हो वो उसनै ले अर उरसे तरियां जिसके धोरे तलवार नही हो तो वो अपने लत्ते बेचके एक मोल लेवै। 37 क्यूँके मै थमने कहूँ सूँ, यो जो पवित्र ग्रन्थ म्ह लिख्या सै, ‘वो गुन्हेगार गेल्या गिण्या गया,’ उसका मेरे म्ह पूरा होणा जरूरी सै, क्यूँके मेरे बारे म्ह लिखी सारी बातों का होणा जरूरी सै।” 38 चेल्यां नै कह्या, “हे प्रभु याइ दो तलवार सै।” यीशु नै उन ताहीं कह्या, “भतेरी सै।” 39 फेर यीशु बारणै लिकड़के अपनी रीत के मुताबिक जैतून के पहाड़ पै गया, अर चेल्लें उसके पाछे हो लिये। 40 उस जगहां पोहुच के उसनै चेल्यां तै कह्या, “प्रार्थना करो के थम परखे ना जाओ।” 41 अर आप उनतै न्यारा एक डळा फेकण के बराबर जितनी दूर गया, अर गोठे टेक के प्रार्थना करण लाग्या, 42 “हे पिता जै तू चाहवै तो इस दुख के कटोरे नै मेरे धोरे तै हटा ले, तोभी मेरी नही पर तेरी मर्जी पूरी हो।” 43 फेर सुर्ग तै एक सुर्गदूत उसनै दिख्या जो उसनै सामर्थ दिया करै था। 44 वो और घणे संकट म्ह काल होकै और भी मन तै प्रार्थना करण लाग्या, अर उसका पसीन्ना मान्नो लहू की बड़ी-बड़ी बूँदों के जू धरती पै गिरै था। 45 फेर वो प्रार्थना तै उठ्या अर अपने चेल्यां के धोरे आके उन ताहीं उदासी के मारे सोन्दे पाया। 46 अर उनतै कह्या, “क्यूँ सोवों सों? उठो, प्रार्थना करो के थम परखे ना जाओ।” 47 यीशु न्यू कहण ए लागरया था, के एक भीड़ आई, अर उन बारहां चेल्यां म्ह तै एक जिसका नाम यहूदा था उसके आगै-आगै आण लाग रहा था। वो यीशु के धोरे आया के उसनै चूम ले। 48 यीशु नै उसतै कह्या, “हे यहूदा, के तू चुम्मा लेके माणस के बेटा नै पकड़वावै सै?” 49 उसके साथियाँ नै जद देखा के, के होण आळा सै, तो कह्या “हे प्रभु, के हम तलवार चलावां?” 50 अर उन म्ह तै एक नै महायाजक के नौक्कर पै तलवार चलाके उसका सोळा कान उड़ा दिया। 51 इसपै यीशु नै कह्या, “इब बस करो।” अर उसका कान छू के उस ताहीं ठीक करया। 52 फेर यीशु नै प्रधान याजकां अर मन्दर के पैहरेदारां के सरदारां अर यहूदी अगुवां तै, जो उसपै चढ़ गये थे, कह्या, “के थम मन्ने डाकू जाणके तलवार अर लाठी लेके लिकड़े सो? 53 जद मै मन्दर म्ह हरेक दिन थारे गेल्या था, तो थमनै मेरे हाथ भी कोनी लाया, पर यो थारा बखत सै, अर अन्धकार का हक सै।” 54 फेर

वे यीशु नै पकड़के ले चाल्ले, अर महायाजक के घर म्ह लाये, पतरस दूरे ए दूर उसके पाछे-पाछे चाल्ले था। 55 अर जद वे आँगण म्ह आग सुलगाके कठे बेटे, तो पतरस भी उसके बिचाळे बैठग्या। 56 फेर एक नौकराणी उस ताहीं आग के चाँदणे म्ह बेट्या देखके अर उस कान्ही देखके कहण लागी, “यो भी तो उसके गेल्या था।” 57 पर पतरस नै यो कहके मना कर दिया, के “हे, जनानी मै उसनै कोनी जाणदा।” 58 थोड़ी हाण पाछे किसे और नै पतरस ताहीं देखके कह्या, “तू भी तो उन म्ह तै ए सै।” उसनै कह्या, “हे भाई, मै वो कोनी।” 59 कोए एक घंटे के पाछे एक और माणस पक्के बिश्वास तै कहण लाग्या, “सही म्ह यो भी तो उसके गेल्या था, क्यूँके यो गलीलवासी सै।” 60 पतरस नै कह्या, “हे भाई, मै नही जाणदा के तू के कहवै सै।” वो या कहवैए था के मुर्गे नै बाँग देई 61 फेर घूमके प्रभु नै पतरस की ओड़ देखा अर पतरस नै प्रभु की बात याद आई जो उसनै कही थी: “आज मुर्गे के बाँग देण तै पैहल्या, तू तीन बर इन्कार करैगा।” 62 अर वो बारणै लिकड़के नै फूट-फूटके रोण लाग्या। 63 जो माणस यीशु नै पकड़े होए थे, वे उसका मजाक बणाके पीटण लागे, 64 अर उसकी आँख ढँक के उसतै बुझ्या, “भविष्यवाणी करके बता के तेरे किसनै मारया!” 65 अर उननै घणीए बुराई की बात उसके बिरोध म्ह कही। 66 जिब दिन लिकड़्या तो यहूदी अगुवें, प्रधान याजक अर शास्त्री कठे होए, अर उस ताहीं अपनी बड़ी सभा म्ह ल्याके बुझ्या, 67 “जै तू मसीह सै, तो म्हारे ताहीं कह दे।” उसनै उनतै कह्या, “जै मै थारे तै कहूँ, तो बिश्वास कोनी करोगे, 68 अर जै बुझ्यु, तो जवाब नही दोगे। 69 पर इब तै मै माणस का बेटा सर्वशक्तिमान परमेसवर के सोळी ओड़ बेट्या रहूँगा।” 70 इसपै सब नै कह्या, “तो के तू परमेसवर का बेटा सै?” यीशु नै उन ताहीं कह्या, “थम अपने-आपे कहो सों, क्यूँके मै सूँ।” 71 फेर उननै कह्या, “इब हमनै गवाह की के जरूरत सै, क्यूँके हमनै आपे उसके मुँह तै सुण लिया सै।”

23 फेर सारी मंडळी उठके यीशु नै राज्यपाल पिलातुस के धोरे लेग्यी। 2 वो ये कहके उसपै इल्जाम लगाण लागे, “हमनै इस ताहीं माणसां नै भकांदि, अर केसर नै चुंगी देण तै मना करदे, अर खुद नै मसीह, राजा कहन्दे होए सुणया सै।” 3 पिलातुस नै उसतै बुझ्या, “के तू यहूदियाँ का राजा सै?” उसनै उस ताहीं जवाब दिया, “तू आप ए कहण लागरया सै।” 4 फेर पिलातुस नै प्रधान याजकां तै अर माणसां तै कह्या, “मन्ने इस आदमी म्ह कोए खोट नही पाया।” 5 पर वे और भी बिश्वास के गेल्या कहण लागे, “यो गलील परदेस तै लेके याइ ताहीं, सारे यहूदिया परदेस के माणसां नै उपदेश देके दंगा करवावै सै।” 6 या सुणके पिलातुस नै बुझ्या, “के यो आदमी गलीलवासी सै?” 7 अर या जाणके के वो हेरोदेस की रियासत का सै, उस ताहीं हेरोदेस के धोरे भेज दिया, क्यूँके उस बखत वो भी यरुशलेम म्ह था। 8 हेरोदेस यीशु नै देखके घणा राज्जी होया, क्यूँके वो घणे दिनां तै उसनै देखणा चाहवै था, इस खात्तर के उसके बारे म्ह सुणया था, अर उसतै किमे चमत्कार देखण की आस राखै था। 9 वो उसतै भोत-सी बात बुझता रहा, पर उसनै

उस तारीं कोए भी जवाब न्ही दिया। 10 प्रधान याजक अर शास्त्री खड़े होए तन मन तै उसपै इल्जाम लगान्दे रहे। 11 फेर हेरोदेस नै अपणे सिपाहियाँ के गेल्या उसकी बेजती करके मजाक उड़ाया, अर भड़कीले लत्ते पिराह के उस तारीं पिलातुस के धोरे भेज दिया। 12 उससे दिन पिलातुस अर हेरोदेस साथी बणगे, इसतै पैहल्या वे एक-दुसरे के दुश्मन थे। 13 पिलातुस नै प्रधान याजकां, सरदारां अर माणसां नै बुलाकै उन तारीं कह्या, 14 “थम इस आदमी नै माणसां का भकाण आळा बताकै मेरे धोरे ल्याए सों, अर देख्खो, मन्ने थारे स्याम्ही उसकी जाँच करी, पर जिन बात्तां का थम उसपै इल्जाम लगाओ सों उन बात्तां के बारे म्ह मन्ने इस म्ह कोए भी खोट कोनी पाया, 15 ना हेरोदेस नै दोषी पाया, क्यूँके उसनै इस तारीं म्हारै धोरे भेज दिया सै: अर देख्खो, उसतै इसा कुछ कोनी होया के वो मौत की सजा के काबिल ठहराया जावै। 16 इस खात्तर मै इसनै छित्वा कै छोड़ द्यु सूं।” 17 (पिलातुस त्योहार के बखत उनकै खात्तर एक कैदी नै छोड़ण पै मजबूर था।) 18 फेर सारे मिलकै चिल्ला उठे, “इसका काम तमाम करदे, अर म्हारै खात्तर बरअब्बा नै छोड़दे!” 19 वो किसे बलवे के कारण जो नगर म्ह होया था, अर हत्या के कारण जेळ म्ह गेरया गया था 20 पर पिलातुस नै यीशु तारीं छोड़ण की इच्छा तै माणसां तारीं फेर समझाया, 21 आखर उननै रुक्के मारकै कह्या, “उसनै क्रूस पै चढ़ा, क्रूस पै।” 22 उसनै तीसरी बर उन तारीं कह्या, “क्यांतै उसनै के बुरा करया सै? मन्ने उस म्ह मौत की सजा के काबिल कोए बात कोनी पाई। इस तरियां मै इसनै छित्वा कै छोड़ देऊ सूं।” 23 पर वे रुक्के मार-मारकै पाच्छै पड़ ग्ये के वो क्रूस पै चढ़ाया जावै, अर उनका रुक्के मारणा तेज होग्या। 24 आखर पिलातुस नै हुकम दिया के उनकी बिनती के मुताबिक करया जावै। 25 उसनै उस आदमी के जो बलवे अर हत्या के कारण जेळ म्ह गेरया गया था, अर जिसनै वो माँग्ये थे, छोड़ दिया, अर यीशु नै उनकी इच्छा के मुताबिक सौप दिया। 26 जिव वो यीशु नै लेकै जावै थे, तो उननै एक माणस जिसका नाम शमौन कुरेनी था, जो गाम म्ह तै आवै था, पकड़कै उसपै क्रूस लाद दिया के उससे यीशु के पाच्छै-पाच्छै ले चाल्लै। 27 माणसां की भीड़ उसकै पाच्छै-पाच्छै हो ली उन म्ह घणीए बिरबान्नी भी थी जो उसकै खात्तर छात्ती पीट्टै अर रोवै धोवे थी। 28 यीशु नै उनकै कान्ही मुड़के कह्या, “हे यरुशलेम की बेटियाँ, मेरै खात्तर ना रोओ, पर अपणे अर अपणे बाळकां के खात्तर रोओ 29 क्यूँके देख्खो, वे दिन आवै सै, जिन म्ह माणस कहवेंगे, ‘धन्य सै वे जो बिरबान्नी जो बाँझ सै अर वे गर्भ जिननै ऊलाद न्ही पैदा करी, अर वे स्तन जिन नै दूध न्ही पियाया।’ 30 उस बखत ‘माणस पहाड़ां अर टीलां तै कहण लाग्ये के म्हारै पै आण पड़ो, अर हमनै ढँक ल्यो।’” 31 क्यूँके वे जिव हरे रुखां गेल्या इसा करै सै, तो सूख्या कै गेल्या के किमे न्ही करया ज्यागा? 32 वे और दो माणसां नै भी जो बुरे काम करण आळे थे यीशु कै गेल्या मारण नै ले चाल्ले। 33 जद वे उस जगहां पै पोहचे जो “खोपड़ी” यानी इब्रानी भाषा म्ह “गुलगुता” कुह्वावै सै, तो उननै ओड़ै यीशु तारीं अर बुरे काम करण

आळे तारीं भी, एक नै सोळी अर दुसरे नै ओळी ओड़ क्रूस पै चढ़ाए। 34 फेर यीशु नै कह्या, “हे पिता इन्हने माफ कर, क्यूँके ये न्ही जाणदे के ये के करै सै।” अर उननै पर्ची गेर कै उसके लत्ते बांड लिए। 35 माणस खड़े-खड़े देख्खे थे, अर सरदार भी मजाक करके कहवै थे “इसनै औरां तारीं बचाया, जै यो परमेसवर का मसीह सै, अर उसका छाट्या होए सै, तो अपणे-आपनै बचाले।” 36 सिपाही भी धोरे आके अर सिरका देकै उसका मजाक बणा के कहवै थे, 37 “जै तू यहूदियाँ का राजा सै, तो अपणे-आपनै बचाले!” 38 अर उसके उप्पर एक दोषपत्र भी लगा दिया: “यो यहूदियाँ का राजा सै।” 39 जो बुरे काम करणीये ओड़ै लटकाए गए थे, उन म्ह तै एक नै उसकी बेजती करके कह्या, “के तू मसीह कोनी? फेर अपणे-आपनै अर हमनै बचा।” 40 इसपै दुसरे नै उस तारीं धमका के कह्या, “के तू परमेसवर तै भी कोनी डरदा? तू भी तो वाए सजा पा रया सै, 41 हम तो न्याय के मुताबिक सजा पारे सां, क्यूँके हम अपणे काम्मां की ठीक सजा पारे सां, पर उसनै कोए गलत काम न्ही करया।” 42 फेर उसनै कह्या, “हे यीशु, जद तू अपणे राज्य म्ह आवै, तो मेरी खियास करिये।” 43 उसनै उस तारीं कह्या, “मै तन्नै सच कहुँ सूं के आजै तू मेरै गेल्या सुर्गलोक म्ह होगा।” 44 करीबन दोफ्फारै तै तीन बजे तारीं सारे देश म्ह अन्धेरा होया रह्या, 45 अर सूरज का चाँदणा जान्दा रह्या, अर मन्दर का पड़दा बिचाळै तै पाटग्या, 46 अर यीशु नै जोर तै किल्की मारकै कह्या, “हे पिता, मै अपणी आत्मा तेरे हाथ्यां म्ह सौंपू सूं।” अर या कह के जी दे दिया। 47 सूबेदार नै जो कुछ होया था देखकै परमेसवर की बड़ाई करी, अर कह्या, “पक्का यो माणस धर्मी था।” 48 अर भीड़ जो यो देखखण नै कठी होई थी, इस घटना नै देखकै दुख के मारे छात्ती पीटती होई बोहङ्गी। 49 पर उसकै सब जाण-पिच्छाण, अर जो बिरबान्नी गलील परदेस तै उसके गेल्या आई थी, दूर खड़ी यो सब देख्खे थी। 50 ओड़ै यूसुफ नाम का यहूदी अगुवां की सभा का एक सदस्य था जो आच्छा अर धर्मी आदमी था 51 वो सभा के फैसले अर इस काम तै राज्जी कोनी था। वो यहूदिया परदेस के नगर अरिमतिया गाम का रहण आळा अर परमेसवर के राज्य की बाट देखखण आळा था। 52 उसनै पिलातुस के धोरे जाकै यीशु की लाश माँग्यी, 53 अर उस तारीं उतार के मलमल की चाद्दर म्ह लपेट्या, अर एक कन्न म्ह धरया, जो पत्थरां म्ह खुदी होए थी, अर उस म्ह कोए कदे न्ही राख्या गया था। 54 वो त्यारी का दिन था, अर आराम का दिन शरु होण आळा था। 55 उन बिरबानियाँ नै जो उसके गेल्या गलील परदेस तै आई थी, पाच्छै-पाच्छै जाके उस कन्न तारीं देख्या, अर यो भी के उसकी लाश किस रीति तै राक्खी गयी सै। 56 फेर उननै घर बोहङ के खुशबुदार चीज अर इत्र त्यार करया, अर आराम के दिन उननै हुकम के मुताबिक आराम करया।

24 पर हफ्तै कै पैहलड़े दिन तड़कै-तड़कै नै वे उन खुशबुदार चिज्जां नै जो उननै बणाई थी, लेकै यीशु की कन्न पै आई। 2 उननै पत्थर कन्न पै तै गिरड़या होया पाया, 3 पर भीत्तर जाके प्रभु यीशु की लाश कोनी पाई। 4 जब वे इस बात तै हैरान होरी थी तो देख्खो दो माणस

चमकदे होए लते पहरी होए उनकै धोरे आण खड़े होए। 5 जिब वे डरगी अर धरती की ओड़ मुँह झुकाए रही तो उननै उन ताहीं कह्या, “थम जान्दे नै मरे होया म्ह क्यूँ टोहो सो? 6 वो उरे कोनी, पर जिन्दा होगया सै। याद करो के उसनै गलील परदेस म्ह रहंदे होए थारे तै के कह्या था, 7 जरूरी सै के मै माणस का बेटा पापियाँ के हाथ्यां म्ह पकड़वाया जाऊँ, अर क्रूस पै चढ़ाया जाऊँ, अर तीसरे दिन जी उठु।” 8 फेर उसकी बात उनके याद आई, 9 अर कब्र तै उल्टे आकै उननै उन ग्यारहां नै अर, सारया ताहीं ये सब बात कह दी। 10 जिन नै प्रेरितां तै ये बात कही वे मरियम मगदलीनी अर योअन्ना अर याकूब की माँ मरियम अर उसके साथ की और भी बिरबान्नी थी। 11 पर उनकी बात उन ताहीं कहाँनी-सी लागी, अर उननै उसका बिश्वास कोनी करया। 12 फेर पतरस कब्र पै भाज्या गया, अर झुकके लत्यां की पट्टियाँ का ढेर पड़े देख्खे, अर जो होया था उसतै अचम्भा होया करदा होया अपने घरां चल्या गया। 13 उस्से दिन उन म्ह तै दो चेल्लें इम्माऊस नाम के गाम म्ह जाण लागरे थे, जो यरुशलेम तै कोए सात कोंस की दूरी पै था। 14 वे इन सब बातां पै जो होई थी, आप्पस म्ह बातचीत करदे जाण लागरे थे, 15 अर जद वे आप्पस म्ह बातचीत अर पूछताछ करै थे तो यीशु खुद धोरे आकै उनके गेल्या चाल्लण लागया। 16 पर परमेसवर नै उनकी आँख न्यू बन्द कर दी थी के यीशु ताहीं पिच्छाण ना सकै। 17 यीशु नै उनतै बुझया, “ये के बात सै, जो थम चाल्दे-चाल्दे आप्पस म्ह करो सों?” वे खड़े होगे अर उनका मुँह भोत उदास था। 18 या सुणके चेल्यां म्ह तै क्लियुपास नाम के एक चेल्लें नै कह्या, “इसा लागै सै के तू यरुशलेम म्ह एकला परदेशी सै, जो न्ही जाण्दा के इन दिनां म्ह इस नगर म्ह के-के होया सै?” 19 यीशु नै उनतै बुझया, “कौण सी बात? उननै उस ताहीं कह्या, यीशु नासरी जो नबी था उसकी बात, जो परमेसवर अर सारे माणसां के स्याम्ही काम अर वचन म्ह सामर्थी था। 20 अर प्रधान याजकां अर म्हारै सरदारां नै उस ताहीं पकड़वा दिया ताके उसतै मौत का हुकम दिया जावै, अर उस ताहीं क्रूस पै चढ़वाया। 21 पर हमनै उम्मीद थी के योए इस्राएल नै रोमी साम्राज्य तै छुटकारा देवैगा। इन सारी बातां के सिवा इस घटना नै होए आज तीसरा दिन सै, 22 अर म्हारै म्ह तै कई बिरबानियाँ नै भी म्हारै ताहीं उळझन म्ह गेर दिया, जो आज सबेरे कब्र पै गयी थी, 23 अर जिब उसकी लाश कोनी पाई तो वा या कहन्दी आई के हमनै सुर्गदूतां के दर्शन पाये, जिन नै कह्या के यीशु जिन्दा सै। 24 फेर म्हारै साथियाँ म्ह तै कई कब्र पै गये, अर जिसा बिरबानियाँ नै कह्या था उसाए पाया, पर वो कोनी देख्या।” 25 फेर यीशु नै उन दो चेल्यां तै कह्या, “हे सब बेकुफों अर नबियाँ की सारी बातां पै बिश्वास करण म्ह नासमझों! 26 के जरूरी कोनी था के मसीह ये दुख उठाके अपनी महिमा म्ह दाखल हो?” 27 फेर उसनै मूसा नबी तै अर सारे नबियाँ तै शरु करके सारे पवित्र ग्रन्थां म्ह तै अपने बारे म्ह लिक्खी बातां का मतलब, उन ताहीं समझा दिया। 28 इतनै म्ह वो उस गाम के धोरे पोहचे जित्त वे जावै थे, अर उसके ढंग तै इसा लाग्या के वो आगै जाणा चाहवै

सै। 29 पर उननै यो कहके उस ताहीं रोक्या, “म्हारै गेल्या रह, क्यूँके साँझ होली सै अर दिन इब घणा ढळग्या सै।” फेर वो उनके गेल्या रहण के खातर भीत्तर गया। 30 जद वो उनके गेल्या खाणा खाण बेट्या, तो उसनै रोटी लेके धन्यवाद करया अर उस ताहीं तोड़के उननै देण लाग्या। 31 फेर उनकी आँख खुलगी, अर उननै उस ताहीं पिच्छाण लिया, अर वो उनकी आँखां तै ओन्झळ होगया। 32 उननै आप्पस म्ह कह्या, “जद वो म्हारै तै रास्ते म्ह बात करै था अर पवित्र ग्रन्थ का मतलब हमनै समझावै था, तो के म्हारै मन म्ह जोश न्ही आया?” 33 वो उस्से बखत जिब्बे उठके यरुशलेम नगर म्ह चले गये, अर उन ग्यारहां चेल्यां अर उनके साथियाँ ताहीं उननै कठ्ठे मिलगे। 34 वो कहवै थे, “प्रभु साच्चेए जी उठ्या, अर शमोन नै दिख्या।” 35 फेर उन दो चेल्यां नै भी राह म्ह होई घटना के बारे ब्यौरा सुणया अर किस तरियां खाणा खान्दे बखत उननै मसीह यीशु ताहीं पिच्छाण लिया था। 36 वे ये बात करै ए थे के वो खुद ए उनके बिचाळै आण खड्या होया, अर उन ताहीं कह्या, “थमनै शान्ति मिलै।” 37 पर वे घबरागे अर डरगे, अर समझे के हम किसे भूत नै देख्खां सां। 38 यीशु नै उनतै कह्या के, “क्यूँ घबराओ सों? अर थारे मन म्ह क्यूँ बैहम हो सै? 39 मेरै हाथ-पायां नै देख्खो के मै वोए सूं। मननै छू के देख्खो, क्यूँके आत्मा के हाड-माँस कोनी होन्दे जिसा मेरै म्ह देख्खो सों।” 40 न्यू कहके उसनै उन ताहीं अपने हाथ पैर के घा दिखाए। 41 जद खुशी के मारै उननै बिश्वास कोनी होया, अर वो अचम्भा मान्नै थे, तो यीशु नै उन ताहीं बुझया, “के याड़े थारे धोरे किमे खाण नै सै?” 42 चेल्यां नै उस ताहीं भुनी होई मच्छी का टुकड़ा दिया। 43 उसनै वो मच्छी का टुकड़ा लेके उनके आगै खाया। 44 फेर उसनै उन ताहीं कह्या, “ये मेरी वे बात सै, जो मननै थारे गेल्या रहंदे होए थारे तै कही थी के जरूरी सै जितनी बात मूसा नबी की नियम-कायदा अर नबियाँ अर भजनां की किताबां म्ह मेरै बारे म्ह लिक्खी सै, सारी पूरी हों।” 45 फेर उसनै पवित्र ग्रन्थ बुझण के खातर उनकी बुद्धि खोल दी, 46 अर उनतै कह्या, “यो पवित्र ग्रन्थ म्ह लिख्या सै के मसीह दुख ठावैगा, अर तीसरे दिन मरे होया म्ह तै जी उठेगा, 47 अर यरुशलेम तै लेके सारी जात्तां म्ह पापां नै छोड़ण का अर पापां की माफी का प्रचार, उसके-ए नाम तै करया जावैगा। 48 थम इन सारी बातां के गवाह सों। 49 अर देख्खो, मै थारे पै पवित्र आत्मा भेज्जूंगा जिसा मेरे पिता नै कह्या सै, जिब तैई पवित्र आत्मा थारे पै न्ही आवै, अर थम सुर्ग तै सामर्थ ना पाओ, जब ताहीं इसे नगर म्ह रुके रहो।” 50 फेर यीशु उननै बैतनिय्याह गाम ताहीं बाहर लेग्या, अर अपने हाथ ठाके उन ताहीं आशीवाद दिया, 51 अर उननै आशीष देंदे होए वो उनतै न्यारा होग्या अर सुर्ग पै उठा लिया। 52 फेर वो उसनै नमस्कार करके बड़ी खुशी तै यरुशलेम चले गए, 53 अर वे लगातार मन्दर म्ह हाजर होके परमेसवर की भगति करया करै थे।

यूहन्ना

1 दुनिया बणण तै पैहल्या वचन था, अर वचन परमेसवर कै गेल्या था, अर वचन परमेसवर था। 2 यो वचन ए शरुआत तै परमेसवर कै गेल्या था। 3 दुनिया की हरेक चीज उससे कै जरिये बणी सै, अर उसके बिना किसे भी चीज की रचना नही होई। 4 वो जीवन का जरिया था, अर वो जीवन मानव जाति कै खात्तर चाँदणा था। 5 चाँदणा अन्धेरै म्ह चमकै सै, अर अन्धेरा उस ताहीं बुझा नही सक्या। 6 परमेसवर कै ओड़ तै भेज्जा होया एक माणस आया, जिसका नाम यूहन्ना था। 7 वो गवाही देण खात्तर आया के माणसां नै चाँदणे की गवाही देवै, के सारे माणस उसके जरिये चाँदणे पै विश्वास करै। 8 वो खुद तै वो चाँदणा कोनी था, पर माणसां नै उससे चाँदणे की गवाही देण खात्तर आया था। 9 जो साच्चा चाँदणा था, हरेक माणस नै ज्ञान का चाँदणा देवै सै, वो धरती पै आण आळा था। 10 वो दुनिया म्ह था, अर दुनिया उसके जरिये बणी, अर दुनिया के माणसां नै उस ताहीं नही पिच्छाणया। 11 वो अपने यहूदी माणसां कै धोरे आया अर उसके अपने लोग्गां नै उस ताहीं कोन्या अपणाया। 12 पर जितन्या नै उस ताहीं अपणाया, उसनै उन ताहीं परमेसवर के ऊलाद होण कि हक दिया। 13 वे कुदरती तौर पै ना तो पूर्वजां तै, ना देह की मर्जी तै, ना माणसां की मर्जी तै, पर परमेसवर की मर्जी तै पैदा होए सै। 14 अर वचन देह धारण करकै आया, अर अनुग्रह अर सच्चाई तै भरकै म्हारै बिचाळै रहण लाग्या, अर हमने उसकी इसी महिमा देखी, जिसे पिता कै इकलौते बेटे की महिमा। 15 यूहन्ना नै उसके बारे म्ह गवाही दी, अर रुक्का मारकै बोल्या, “यो वोए सै, जिसका मन्ने जिक्क करया के जो मेरै पाच्छे आण लागरया सै, वो मेरते घणा महान् सै क्यूँके वो मेरते पैहल्या था।” 16 क्यूँके उसकी करुणा अर सच्चाई की भरपूरी म्ह तै हम सारया नै आशीष पै आशीष पाई। 17 इस खात्तर के नियम-कायदे तो मूसा नबी तै मिले, पर अनुग्रह अर सच्चाई यीशु मसीह कै जरिये पोहची। 18 परमेसवर ताहीं किसे नै कदे कोन्या देख्या, पर परमेसवर के इकलौते बेटे नै, जो सदा परमपिता कै गैल सै, उससे नै म्हारे ताहीं दिखया। 19 यूहन्ना की गवाही या सै, के जब यहूदी अगुवां नै यरुशलैम तै याजकां अर लेवियां नै उसतै यो बुझ्झण नै भेज्या, के “तू कौण सै?” 20 फेर उसनै नाट्या कोनी, पर मान लिया के “मै मसीह कोनी।” 21 फेर उननै यूहन्ना तै बुझ्झया, “तो फेर तू कौण सै? के तू एलिय्याह नबी सै?” उसनै साफ-साफ कह दिया के, “मै मसीह कोनी।” “तो के तू वो नबी सै?” उसनै जवाब दिया, “ना।” 22 फेर उननै यूहन्ना तै बुझ्झया, “फेर तू सै कौण? ताके हम अपने भेजण आळा ताहीं जवाब देवां। तू अपने बारे म्ह के कहवै सै?” 23 वो बोल्या, “जिसा यशायाह नबी नै बोल्या सै: ‘मै जंगल-बियाबान म्ह एक रुक्का देवण आळे का वचन सूँ, के थम प्रभु का रास्ता सीध्था करो।’” 24 वे फरीसियों के कान्ही तै भेज्जै होड़ थे। 25 उननै उसतै यो सवाल बुझ्झया, “जै तू ना मसीह सै, अर ना एलिय्याह, अर ना वो नबी

सै, तै फेर बपतिस्मा क्यांतै देवै सै?” 26 यूहन्ना नै उन ताहीं जवाब दिया, “मै तो थमने पाणी तै बपतिस्मा देऊँ सूँ, पर थारे बीच म्ह एक माणस खड्या सै जिसनै थम कोनी जाणदे। 27 यानी मेरै पाच्छे आण आळा सै, जिसके जूयाँ के फिते भी मै खोल्लण जोग्गा कोनी।” 28 ये बात यरदन नदी तै परली ओड़ बैतनिय्याह गाम म्ह होई, जडै यूहन्ना माणसां ताहीं बपतिस्मा दिया करदा। 29 दुसरे दिन यूहन्ना नै यीशु ताहीं अपनी ओड़ आन्दे देखकै बोल्या, “देक्खो, यो परमेसवर का मेम्ना सै जो दुनिया का पाप ठावै सै। 30 यो वोए सै जिसके बारे म्ह मन्ने कह्या था, एक माणस मेरै बाद आवै सै जो मेरते महान् सै, ज्यातै वो मेरते पैहल्या था। 31 मै खुद तो उसनै कोनी पिच्छाणु था, पर इस्से खात्तर मै पाणी तै बपतिस्मा देन्दा होया आया, ताके इस्राएल के माणस उसनै जान ले।” 32 अर यूहन्ना नै या गवाही दी: “मन्ने सुर्ग तै पवित्र आत्मा ताहीं कबूतर की तरियां अकास तै उतरदे अर उस ताहीं मसीह यीशु पै ठहरते देख्या सै।” 33 मै तो उसनै पिच्छाणु कोनी था, पर जिसनै मेरै ताहीं पाणी तै बपतिस्मा देण कै खात्तर भेज्या, उससे नै मेरै ताहीं कह्या, “जिसपै तू आत्मा नै उतरदे अर ठहरदे देख्खै, वोए पवित्र आत्मा तै बपतिस्मा देणिया सै।” 34 “अर मन्ने देख्या, अर गवाही दी सै, के योए परमेसवर का बेटा सै।” 35 आगले दिन यूहन्ना अपने दो चेल्यां कै गैल फेर ओड़ै खडे थे, 36 अर उसनै यीशु ताहीं जो उसके धोरे तै जाण लागरया था, उसकी ओड़ लखाकै बोल्या, “देक्खो, यो परमेसवर का मेम्ना सै।” 37 जिब्बे वे दोन्नु चेल्लें उसकी या बात सुणके यीशु कै गैल हो लिए। 38 यीशु नै मुड़के उन ताहीं गैल आन्दे देख्या अर उनतै बोल्या, “थम के चाहो सो?” वे उसतै बोल्ले, “हे गुरु, तू किन्त रहवै सै?” 39 यीशु उनतै बोल्या, “चाल्लों, तो देख लियो।” फेर उननै उसके रहण की जगहां देख्खी, अर उस दिन उसके गेल्या रहे। क्यूँके साँझ के करीब चार बजगे थे। 40 उन दोनुआ म्ह तै, जो यूहन्ना की बात सुणके यीशु कै गेल्या हो लिए थे, एक तो शमौन पतरस का भाई अन्द्रियास था। 41 उसनै पैहल्या अपने सगे भाई शमौन तै मिलकै उसतै बोल्या, “हमनै ख्रिस्त यानी मसीह (परमेसवर का अभिषिक्त) मिलग्या।” 42 फेर अन्द्रियास शमौन नै यीशु कै धोरे ल्याया। यीशु नै उसकी ओड़ लखाकै कह्या, “तू यूहन्ना का बेटा शमौन सै: तू कैफा यानिके पतरस कुआवैगा।” 43 आगले दिन यीशु नै गलील परदेस जाण का इरादा करया। वो फिलिप्पुस तै मिल्या अर बोल्या, “मेरै पाच्छे हो ले।” 44 फिलिप्पुस, अन्द्रियास अर पतरस के नगर बैतसैदा का रहणीया था। 45 फिलिप्पुस नतनएल तै मिल्या अर उसतै बोल्या, “जिसका जिक्क मूसा नबी नै नियम-कायदा म्ह अर नबियां नै करया सै, वो हमनै मिलग्या सै! वो यूसुफ का बेटा, यीशु नासरी सै।” 46 नतनएल नै उसतै बुझ्झया, “के कोए उत्तम चीज भी नासरत तै लिक्क सकै सै?” फिलिप्पुस उसतै बोल्या, “चालके देख ले।” 47 यीशु नै नतनएल ताहीं अपनी ओड़ आन्दे देखकै उसके बारे म्ह कह्या, “देक्खो, यो साच्चए इस्राएली सै: इस म्ह कपट कोनी।” 48 नतनएल नै उसतै बुझ्झया, “तू मन्ने किस

तरियां जाणै सै?" यीशु नै उस ताहीं जवाब दिया, "इसतै पैहल्या के फिलिप्पुस नै तेरे ताहीं बुलाया, तो मन्ने तेरे ताहीं देख्या था जिब तू अंजीर के दरखत तळै था।" 49 नतनएल नै उस ताहीं जवाब दिया, "हे गुरु, तू परमेसवर का बेटा सै, तू इस्राएल का राजा सै।" 50 यीशु नै उस ताहीं जवाब दिया, "मन्ने जो तेरे तै कह्या के मन्ने तेरे ताहीं अंजीर के दरखत तळै देख्या, के तू इससे बात पै बिश्वास करै सै? तू इसतै भी बड़े-बड़े काम देखखेगा।" 51 फेर उसनै कह्या, "मै तेरे तै सच-सच कहूँ सूँ, के थम सुर्ग नै खुल्या होइ अर परमेसवर के सुर्गदूतां ताहीं मुझ माणस के बेटे के खात्तर नीचै उतरदे अर उप्पर जान्दे होए देखखेगे।"

2 फेर तीसरे दिन गलील परदेस के काना नगर म्ह किसे का ब्याह था, अर यीशु की माँ भी ओइए थी। 2 यीशु अर उसके चेल्लें भी उस ब्याह म्ह न्योद राखे थे। 3 जिब अंगूर का रस खतम होग्या, फेर यीशु की माँ उसतै बोल्ली, "उनके धोरै अंगूर का रस कोनी रह्या।" 4 यीशु नै उसतै कह्या, "हे नारी, या बात तू मेरे तै क्यूँ कहवै सै? इब्बे मेरा बखत कोनी आया।" 5 पर उसकी माँ नै नौकरां तै कह्या, "जो कुछ यो थारे ताहीं कहवै, न्यूए करियो।" 6 यहूदी परम्परा के मुताबिक शुद्ध करण के खात्तर ओइ छे: पत्थर के पैण्डे धरे थे, जिन म्ह दो-दो, तीन-तीन मण पाणी आवै था। 7 यीशु नै उनतै कह्या, "पैँढा म्ह पाणी भर घो।" अर उननै वे मुँह तक भर दिए। 8 फेर यीशु नै नौकरां ताहीं कह्या, "इब काढके भोज के प्रधान धोरै ले जाओ।" अर वे लेगे। 9 जिब भोज के प्रधान नै वो पाणी चाख्या, जो अंगूर का रस बणग्या था अर वे न्ही जाणै था के वो कड़ै तै आया सै पर जिन नौकरां नै पाणी काढ्या था वे जाणै थे फेर भोज के प्रधान नै बन्दे ताहीं बुलाके उसतै कह्या, 10 "हरेक माणस पैहल्या बढिया अंगूर का रस देवै सै, अर जिब माणस पीके छिक्क जावै सै, फेर हल्का देवै सै, पर तन्नै बढिया अंगूर का रस इब ताहीं राख राख्या सै।" 11 यीशु नै गलील परदेस के काना नगर म्ह अपना यो पैहला चिन्ह-चमत्कार दिखके अपना महिमा जाहिर कर दी अर जिसकी बजह तै उसके चेल्यां नै उसपै बिश्वास करया। 12 इसके बाद वो अर उसकी माँ अर उसके भाई अर उसके चेल्लें कफरनहम नगर म्ह गए अर ओइ कुछ दिन रहे। 13 यहूदियाँ का फसह का त्यौहार लोवै था, अर यीशु यरुशलेम नगर म्ह गया। 14 उसनै मन्दर म्ह बळध, भेड़ अर कबूतर बेचण आळे अर सर्राफां (पर्ईसा का लेण देण करण आळे) ताहीं बेठे होए पाया। 15 फेर उसनै जेवड़ियां का कोरड़ा बणाके, सारी भेड़ों अर बळथां ताहीं मन्दर तै काढ दिया, अर सर्राफां के पर्ईसे खिन्डा दिए अर उनके पीढ़े पलट दिए, 16 अर कबूतर बेचण आळा ताहीं बोल्या, "इन्हनै उरै तै ले जाओ। मेरै पिता के घर नै व्यापर का घर ना बणाओ।" 17 फेर उसके चेल्यां नै याद आया के पवित्र ग्रन्थ म्ह लिख्या होइ सै, "तेरे घर की धुन मन्ने खा ज्यागी।" 18 इसपै यहूदी अगुवां नै यीशु तै कह्या, "तू म्हारे ताहीं कौण सा अदभुत निशान दिखा सके सै?" जो इस तरियां के काम तू करै सै, यो साबित हो सके, के तू उसका हक राखवै सै। 19 यीशु नै उन ताहीं जवाब दिया, "इस मन्दर नै ढा दो, मै

इसनै तीन दिन म्ह बणा दिखुंगा।" 20 यहूदी अगुवां नै कह्या, "इस मन्दर के बणाण म्ह छियालिस साल लागे सै, अर के तू इसनै तीन दिन म्ह बणा देवैगा?" 21 पर यीशु नै उनतै अपना देह रूपी मन्दर के बारे म्ह कह्या था। 22 आखर म्ह जिब वो मरे होया म्ह तै जिन्दा होया, जिब उसके चेल्यां नै याद आई, के उसनै यो कह्या था, अर उननै पवित्र ग्रन्थ के वचन जो यीशु के जिन्दा होण के बारे म्ह बतावै सै, अर उननै यीशु के जरिये कहे होए वचनां पै बिश्वास करया। 23 फसह के त्यौहार के दिनां म्ह जिब यीशु यरुशलेम नगर म्ह था, तो उसके जरिये करे गये चिन्ह-चमत्कार के काम्मां नै देखके घणे माणसां नै उसपै बिश्वास करया। 24 पर यीशु नै अपने-आप ताहीं उनके भरोसे पै कोनी छोड्या, ज्याते वो सारया नै जाणै था, 25 अर उसनै इस बात की जरूरत कोनी थी के कोए आके उसनै माणसां के बारे म्ह बतावै, क्यूँके वो खुदे जाणै था के माणस के मन म्ह के सै?

3 फरीसियाँ म्ह तै नीकुदेमुस नाम का एक माणस था, जो यहूदियाँ का प्रधान था। 2 उसनै रात नै यीशु के धोरै आके उस ताहीं कह्या, "हे गुरु, हमनै बेरा सै के तू परमेसवर की ओइ तै म्हारे ताहीं सिखाण खात्तर आया सै, ज्याते कोए इन चिन्ह-चमत्कारां नै जिननै तू दिखावै सै, जै परमेसवर उसके गेल्या ना हो, तो दिखा कोन्या सकदा।" 3 यीशु नै उस ताहीं जवाब दिया, "मै थारे ताहीं सच कहूँ सूँ, जै कोए नए सिरे तै ना जन्म ले तो परमेसवर का राज्य देख न्ही सकदा।" 4 नीकुदेमुस नै उस ताहीं कह्या, "माणस जिब बूढा होज्या, तो किस ढाळ जन्म ले सके सै? के वो अपना माँ के गर्भ म्ह दुसरी बर भीत्तर बड़के जन्म ले सके सै।" 5 यीशु नै जवाब दिया, "मै तेरे तै सच कहूँ सूँ, जिब ताहीं कोए माणस पाणी अर आत्मा तै ना जन्मे तो वो परमेसवर के राज्य म्ह बड़ न्ही सकदा। 6 क्यूँके मानव देह म्ह जन्म सिर्फ देह का जन्म सै, जिब के आत्मा तै जन्म नया जन्म सै। 7 हैरान ना होवै, के मन्ने तेरे तै कह्या, के थारे ताहीं नए सिरे तै जन्म लेणा जरूरी सै। 8 हवा जितोड़ चाहवै सै उतोड़ चाल्लै सै, अर तू उसकी आवाज सुणै सै, पर जाण्दा कोनी, के वा कड़ै तै आवै सै अर कितोड़ नै जावै सै? जो कोए पवित्र आत्मा तै जन्मा सै वो इसाए सै।" 9 नीकुदेमुस नै उस ताहीं जवाब दिया, के या बात किस ढाळ हो सके सै? 10 या सुणके यीशु नै उस ताहीं जवाब दिया, "तू इस्राएलियाँ का गुरु होके भी के इन बातों नै कोनी समझदा?" 11 मै तेरे तै साच्ची-साच कहूँ सूँ के हम जो जाणां सां, वो कहां सां, अर जिस ताहीं हमनै देख्या सै उसकी गवाही देवां सां, अर जो हम कहां सां, उसका थम बिश्वास कोनी करदे। 12 जिब मन्ने थारैतै दुनिया की बात कही, अर थम बिश्वास न्ही करदे, तो जै मै थमनै सुर्ग की बात कहूँ, तो फेर किस ढाळ बिश्वास करोगे? 13 अर कोए सुर्ग पै कोनी चढा, सिर्फ वोए एक सै जो सुर्ग तै उतरा यानिके मै माणस का बेटा। 14 अर जिस ढाळ तै मूसा नबी नै जंगल-बियाबान म्ह कांस्सी का साँप बणाके उस ताहीं ऊँचे पै चढाया, उससे ढाळ तै जरूरी सै के मै माणस का बेटा भी ऊँचे पै चढाया जाऊँ। 15 ताके जो कोए मेरे पै बिश्वास करै वो अनन्त

जीवन पावै। (aiōnios g166) 16 क्यूँके परमेसवर नै दुनिया के माणसां तै इसा प्यार राख्या के उसनै अपना इकलौता बेटा दे दिया, ताके जो कोए उसपै बिश्वास करै, वो नाश कोनी होवै, पर अनन्त जीवन पावै। (aiōnios g166) 17 क्यूँके परमेसवर नै अपना बेटा दुनिया म्ह इस खातर न्ही भेज्या, के दुनिया पै दण्ड का हुकम देवै, पर इस खातर भेज्या के दुनिया उसके जरिये उद्धार पावै। 18 जो परमेसवर के बेटे पै बिश्वास करै सै, उसपै दण्ड का हुकम कोन्या होन्दा, पर जो उसपै बिश्वास न्ही करता, वो कसूरवार बणैगा, ज्यातै के उसनै परमेसवर के इकलौते बेटे के नाम पै बिश्वास कोनी करया। 19 अर दण्ड कै हुकम का कारण यो सै के चान्दणा दुनिया म्ह आया सै, अर माणसां नै अन्धैरै ताहीं चाँदणे तै घणा प्यारा जाणया क्यूँके उनके काम बुरे थे। 20 क्यूँके जो कोए पाप करै सै, वो चाँदणे तै बैरा राखै सै, अर चाँदणे धोरै कोनी आन्दा, क्यूँके उसके पाप उजागर हो जावेंगे। 21 पर जो सच्चाई पै चाल्लै सै वो चाँदणे धोरै आवै सै, ताके यो साबित हो जावै के उसके काम परमेसवर की ओड़ तै कराये गये सै। 22 फेर यीशु अर उसके चेल्लें यहूदिया परदेस म्ह पोहचे, अर वो ओड़ै उनके गेल्या रहके माणसां ताहीं बपतिस्मा देण लाग्या। 23 यूहन्ना भी शालेम नगर के धोरै ऐनोन नामक गाम म्ह बपतिस्मा देवै था, क्यूँके ओड़ै घणाए पाणी था, अर माणस आके बपतिस्मा लेवै थे। 24 यूहन्ना उस बखत ताहीं जेठखान्ने म्ह कैद न्ही करया था। 25 ओड़ै यूहन्ना के कुछ चेल्यां का किसे यहूदी गेल्या पाणी तै शुद्धिकरण कै बारै म्ह बहस होगी। 26 अर यूहन्ना कै चेल्यां नै आके उस ताहीं कह्या, “हे गुरु, जो माणस यरदन नदी कै परली ओड़ तेरी गेल्या था, अर जिसके बारें म्ह तन्नै कह्या सै, देख, वो यीशु बपतिस्मा देवै सै, अर सारे उसके धोरै आवै सै।” 27 यूहन्ना नै जवाब दिया, “माणस नै तब तक कुछ न्ही मिल सकता, जिब तक वो सुर्ग तै ना दिया जावै।” 28 थारे ताहीं तो पैहले मन्नै बताया था के “मै मसीह कोनी, पर उसतै पैहले भेज्या गया सूं।” 29 बन्दड़ा बन्दड़ी तै ब्याह करै सै, पर बन्दड़े का साथी जो खड्या होया उसकी आवाज सुणै सै, बन्दड़े के वचन तै घणा खुश होवै सै, अर मै भी खुश सूं। 30 जरूरी सै के वो बधै अर मै घटूँ। 31 जो सुर्ग तै आवै सै, वो सारया म्ह सबतै महान् सै, जो धरती कान्ही तै आवै सै वो धरती का सै, अर धरतीए की बात कहवै सै: जो सुर्ग कान्ही तै आवै सै, वो सारया तै उप्पर सै। 32 उसनै जो कुछ देख्या अर सुणया सै, वो उससे की बात करै सै, पर उसकी गवाही कोए न्ही मानता। 33 जिसनै उसकी गवाही अपनाई उसनै इस बात पै छाप लगा दी के परमेसवर साच्या सै। 34 क्यूँके जिस ताहीं परमेसवर नै भेज्या सै, वो परमेसवर की बात कहवै सै, क्यूँके परमेसवर उननै बिना किसे माप के पवित्र आत्मा देवै सै। 35 पिता अपणे बेटे तै प्यार करै सै, अर उसनै सारी चीज उसके हाथ्यां म्ह दे दी सै। 36 जो बेटे पै बिश्वास करै सै, अनन्त जीवन उससे का सै, पर जो बेटे की बात कोनी मान्दा, उसनै वो अनन्त जीवन कोनी मिलै, इसकी बजाये उसपै परमेसवर का छो बणया रहवैगा। (aiōnios g166)

4 फेर जिब यीशु नै बेरा पाट्या के फरीसियाँ नै सुणया सै के यीशु यूहन्ना तै घणे चेल्लें बणावै सै अर उननै बपतिस्मा देवै सै। 2 (ऊतो यीशु खुद न्ही बल्कि उसके चेल्लें बपतिस्मा देवै थे) 3 फेर वो यहूदिया परदेस नै छोड़के दुबारे गलील परदेस म्ह चल्या गया, 4 इस बार उसनै सामरिया परदेस होके जाणा पड्या था। 5 इस करके वो सामरिया परदेस के सूखार नामक एक नगर म्ह आया, यो नगर उस जगहां कै धोरै था जो याकूब नै अपणे बेटे यूसुफ ताहीं दिया था। 6 अर याकूब का कुआँ भी ओड़ै था। यीशु सफर का थक्या होड़ उस कुएँ पै न्यूए बैठग्या। दोपहर का बखत होरया था। 7 इतनै म्ह एक सामरी बिरबान्नी पाणी भरण आई। यीशु नै उस ताहीं कह्या, “मन्नै पाणी पिया।” 8 क्यूँके उसके चेल्लें नगर म्ह खाणा मोल लेण जारे थे। 9 उस सामरी बिरबान्नी नै उस ताहीं कह्या, “तू यहूदी होके मेरे तै सामरी बिरबान्नी तै पाणी क्यातै माँग सै?” (क्यूँके यहूदी सामरियाँ तै नफरत करै थे।) 10 यीशु नै जवाब दिया, “जै तू जाणदी के परमेसवर तन्नै के देणा चाहवै सै, अर वो कौण सै, जो तेरे तै कहवै सै, ‘मन्नै पाणी पिया,’ फेर तू उसतै माँगदी, अर वो तन्नै जीवन का पाणी देन्दा।” 11 बिरबान्नी नै उस ताहीं कह्या, “हे प्रभु, तेरे धोरै पाणी भरण नै तो किमे सै भी कोनी, अर कुआँ डून्धा सै, तो फेर वो जीवन का पाणी तेरे धोरै कड़ै तै आया? 12 के तू म्हारै पूर्वज याकूब तै बड़डा सै, जिसनै म्हारै ताहीं यो कुआँ दिया, अर खुद भी अपणे ऊलादां, अर अपणे डान्नां सुधा इस म्ह तै पिया?” 13 यीशु नै उस ताहीं जवाब दिया, “जो कोए यो पाणी पीवैगा वो फेर तिसाया होगा, 14 पर जो कोए उस पाणी म्ह तै पीवैगा जो मै उस ताहीं दियुँगा वो फेर अनन्त काल ताहीं तिसाया कोनी होवैगा, बल्के जो पाणी मै उस ताहीं दियुँगा वो उस म्ह तै एक चोवा बण ज्यागा जो अनन्त जीवन खातर उमड़दा रहवैगा।” (aiōn g165, aiōnios g166) 15 बिरबान्नी नै उस ताहीं कह्या, “हे प्रभु, वो पाणी मन्नै दे ताके मै तिसाई ना होऊँ अर ना पाणी भरण नै इतनी दूर आऊँ।” 16 यीशु नै उस ताहीं कह्या, “जा अपणे धणी नै याड़े बुला ल्या।” 17 बिरबान्नी नै जवाब दिया, “मै बिना धणी की सूं।” यीशु नै उस ताहीं कह्या, “तू ठीक कहवै सै, ‘मै बिना धणी की सूं।’ 18 क्यूँके तन्नै पाँच धणी कर लिए सै, अर जिस माणस कै गेल्या तू इब सै वो भी तेरा धणी कोनी। या तन्नै साच्ची-ए कही सै।” 19 बिरबान्नी नै उस ताहीं कह्या, “हे प्रभु, मन्नै लागी सै तू नबी सै। 20 म्हारै सामरी पूर्वजां नै इस्से पहाड़ पै भगति करी, अर यहूदी लोग कहवै सै, के वा जगहां जड़ै भगति करणी चाहिए यरुशलेम नगर म्ह सै।” 21 यीशु नै उस ताहीं कह्या, “हे नारी,” मेरी बात का भरोस्सा कर, के वो बखत आवै सै, के थम ना तो इस पहाड़ पै पिता की भगति करोगे, ना यरुशलेम म्ह। 22 थम जिसनै कोनी जाणदे, उसकी भगति करो सो, अर हम यहूदी लोग जिसनै जाणा सा उसकी भगति करा सां, क्यूँके उद्धार यहूदियाँ म्ह तै सै। 23 पर वो बखत आवै सै, बल्कि इब भी सै, जिसम्ह सच्चे भगत पिता की भगति आत्मा अर सच्चाई तै करैगें, क्यूँके पिता अपणे खातर इसेए भगतां नै टोहवै सै।

24 परमेसवर आत्मा सै अर जरूरी सै के उसकी भगति करण आळे आत्मा अर सच्चाई तै उसकी भगति करै। 25 बिरबान्नी नै उस ताहीं कह्या, “मै जाणुं सूं के मसीह” जो ख्रिस्त कुहावै सै, “आण आळा सै, जिब वो आवैगा, फेर म्हारे ताहीं सारी बात बता देवैगा।” 26 यीशु नै उस ताहीं कह्या, “मै जो तेरे तै बोल्लण लागरया सूं, मै वोए सूं।” 27 इतनै म्ह उसके चेल्लें आण पोहचे, अर हैरान होण लागगे के वो बिरबान्नी तै बतळावै था, फेर भी किसे नै कोनी बुझ्झया, “तू के चाहवै सै? या क्यातै उसतै बतळावै सै?” 28 फेर बिरबान्नी अपना पैँदा छोड़के नगर म्ह चली गई, अर माणसां तै कहण लागगी, 29 “आओ एक माणस नै देखो, जिसनै सारा किमे जो मन्ने करया मेरै तै बता दिया। कदे योए तो मसीह न्ही सै?” 30 तब वे नगर के बासिन्दे गाम तै लिकड़के यीशु के धोरै आण लागगे। 31 इस बिचाळे उसके चेल्यां नै यीशु तै या बिनती करी, “हे गुरु, किमे खा ले।” 32 पर उसनै उन ताहीं कह्या, “मेरै धोरै खाण खातर इसा खाणा सै जिसनै थम कोनी जाणदे।” 33 फेर चेल्यां नै आप्पस म्ह कह्या, “के कोए उसके खातर खाणा लैके आया सै?” 34 यीशु नै उनतै कह्या, “मेरा खाणा यो सै के अपणे भेजण आळे की मर्जी के मुताबिक चाल्लुं अर उसके काम नै पूरा करुं जो उसनै कह्या सै। 35 के थम कोनी कहन्दे, ‘लामणीयां के इब्बे चार महिन्ने रहरे सै?’ अपणी आँखां तै देख्यो जितने माणस आण लागरे सै, वो उस खेत की तरियां सै जो काट्टण खातर तैयार सै। 36 पैहले तै मजदूर काम करण लागरया सै अर अपणी मजदूरी पाण लागरया सै, इसका मतलब यो सै के वो माणसां नै कट्टा करण लागरया सै जो अनन्त जीवन पागे। (aiōnios g166) 37 क्यूँके याइ या कहावत ठीक बेठे सै: बोणआळा और सै, अर काट्टण आळा और। 38 मन्ने थारे ताहीं वो खेत काट्टण खातर भेज्या जिसम्ह थमनै मेहनत कोन्या करी दुसरयां नै मेहनत करी अर थम उनकी मेहनत कै फळ म्ह हिस्सेदार होए।” 39 उस नगर के घणखरे सामरियां नै उस बिरबान्नी के कहण तै यीशु पै बिश्वास करया, क्यूँके उसनै कह्या था, के “उसनै सारा किमे जो मन्ने करया सै, मेरै तै बता दिया।” 40 ज्यांतै जिब सामरी उसके धोरै आए, तो उसतै बिनती करण लागगे के म्हारे याइ रह। आखर म्ह वो ओड़ै दो दिन ताहीं रहया। 41 उसके वचन कै कारण और भी घणखरे माणसां नै बिश्वास करया 42 अर उस बिरबान्नी तै कह्या, “इब हम तेरे कहण तैए बिश्वास कोनी करदे, क्यूँके हमनै खुदे सुण लिया, अर जाणगे सा के योए साच्चए म्ह दुनिया का उद्धार करणीया सै।” 43 फेर दो दिनां कै पाच्छे वो ओड़ै तै लिकड़के गलील परदेस म्ह गया। 44 क्यूँके यीशु नै खुदे गवाही दी के नबी अपणे गाम म्ह आदर मान कोनी पान्दा। 45 जिब वो गलील परदेस म्ह आया, तो गलील परदेस के माणस राज्जी होके उसतै मिले, क्यूँके जितने काम उसनै यरुशलम म्ह त्यौहार कै बखत करे थे, उननै उन सारया ताहीं देख्या था, क्यूँके वे भी त्यौहार म्ह जारे थे। 46 फेर वो दुबारे गलील परदेस कै काना नगर म्ह आया, जडै उसनै पाणी ताहीं अंगूर का रस बणाया था। ओड़ै राजा का एक कर्मचारी था जिसका बेटा

कफरनहूम नगर म्ह बीमार था। 47 वो या सुणकै के यीशु यहूदिया परदेस तै गलील परदेस म्ह आ रहया सै, उसके धोरै गया अर उसतै बिनती करण लागग्या के चालकै मेरै बेठे नै ठीक कर दे: क्यूँके वो मरण आळा था। 48 यीशु नै उस ताहीं कह्या, “जिब ताहीं थम चमत्कार अर अचम्भे के काम कोनी देखदे जद ताहीं कदे भी बिश्वास कोनी करोगे।” 49 राजा के कर्मचारी नै उसतै कह्या, “हे प्रभु, मेरै बाळक की मौत होण तै पैहल्या चाल।” 50 यीशु नै उस ताहीं कह्या, “जा, तेरा बेटा जिन्दा सै।” उस माणस नै यीशु की कही होई बात का बिश्वास करया अर चल्या गया। 51 वो रास्ते म्ह था के उसके नौक्कर उसतै आ मिले अर कहण लागगे, “तेरा छोरा जिन्दा सै।” 52 उसनै उसतै बुझ्झया, “किस बखत वो ठीक होण लागग्या?” उननै उस ताहीं कह्या, “काल दोफहरे एक बजे उसका बुखार उतर गया।” 53 फेर बाप जाण गया के यो उससे बखत होया जिस बखत यीशु नै उस ताहीं कह्या, “तेरा बेटा जिन्दा रहवैगा,” अर उसनै अर उसके सारे कुणबे नै बिश्वास करया। 54 यो दुसरा अचम्भे का काम था जो यीशु नै यहूदिया परदेस तै गलील परदेस म्ह आके दिखाया।

5 इन बातां कै पाच्छे यहूदियां का एक त्यौहार आया, अर यीशु यरुशलम नगर म्ह गया। 2 यरुशलम म्ह भेड़-फाटक के धोरै एक कुण्ड सै जो इब्रानी भाषा म्ह बैतहसदा कुहावै सै, उसके पाँच घाट सै। 3 इन म्ह घणखरे बीमार, आन्धे, लंगड़े अर सूखे अंगआळे (पाणी कै हाल्लण कै आस म्ह) पड़े रहवै थे। 4 (क्यूँके खास बखत पै परमेसवर के सुर्गदूत कुण्ड म्ह उतरके पाणी नै हलाया करै थे। पाणी हाल्दे जो कोए पैहल्या उतरदा वोए ठीक हो जान्दा चाहे उसके कोए बीमारी क्यूँ ना हो।) 5 उडे एक माणस था, जो अड़तीस साल तै बीमारी म्ह पड्या था। 6 यीशु नै उस ताहीं पड्या होया देखके अर न्यू जाणकै के वो घणे दिनां तै इसी हाल्लत म्ह पड्या सै, उसतै बुझ्झया, “के तू ठीक होणा चाहवै सै?” 7 उस बीमार नै उस ताहीं जवाब दिया, “हे प्रभु, मेरै धोरै कोए माणस कोनी के जिब पाणी हलाया जावै, तो मन्ने कुण्ड म्ह उतारै, पर मेरे पोंहोचदे-पोंहोचदे दुसरा मेरतै पैहल्या पाणी म्ह उतर जावै सै।” 8 यीशु नै उस ताहीं कह्या, “उठ, अपणे बिस्तर ठाकै, हॉड-फिर।” 9 वो माणस जिब्बे ठीक होग्या, अर अपणे बिस्तर ठाकै हॉडण-फिरण लागग्या। 10 वो आराम का दिन था। ज्यांतै यहूदी उस ताहीं जो ठीक होया था, कहण लागगे, “आज तो आराम का दिन सै, तेरा बिस्तर ठाणा नियम-कायदा के मुताबिक ठीक कोनी।” 11 उसनै उन ताहीं जवाब दिया, “जिसनै मेरै ताहीं ठीक करया, उससे नै मेरै ताहीं कह्या, ‘अपणा बिस्तर ठा अर हॉड-फिर।’” 12 उननै उसतै बुझ्झया, “वो कौण माणस सै जिसनै तेरे तै कह्या, ‘बिस्तर ठा, अर हॉड-फिर?’” 13 पर जो ठीक होया था वो कोनी जाणै था के वो कौण सै, क्यूँके उस जगहां पै भीड़ होण के कारण यीशु ओड़ै तै चला गया था। 14 इन बातां कै पाच्छे वो यीशु नै मन्दर म्ह मिल्या। यीशु नै उस ताहीं कह्या, “देख, तू ठीक होग्या सै: दुबारा पाप ना करिये, इसा ना हो के इसतै कोए भारी संकट तेरे पै

आण पडै।” 15 उस माणस नै जाके यहूदियाँ तै कह दिया के जिसनै मेरे ताहीं ठीक करया वो यीशु सै। 16 इस कारण यहूदी अगुवें यीशु नै तंग करण लागे, क्यूँके वो इसे काम आराम कै दिन करया करदा। 17 इसपै यीशु नै उन ताहीं कहा, “मेरा पिता सारी हाण काम करै सै, अर मेरे ताहीं भी करते रहणा सै।” 18 यीशु की बात के कारण यहूदी अगुवें और भी घणे उस ताहीं मारण खात्तर कोशिश करण लागे, क्यूँके वो ना सिर्फ आराम कै दिन का नियम तोड्या करदा, पर परमेसवर नै अपना पिता कहके खुद ताहीं परमेसवर के बरोबर भी ठहरावे था। 19 इसपै यीशु नै उस ताहीं कहा, “मै थारैताहीं साच्ची-साच कहूँ सूँ, बेट्टा खुद तै किमे न्ही कर सकदा, सिर्फ वो जो पिता नै करदे देखे सै, क्यूँके जिन-जिन काम्मां नै वो करै सै उननै बेट्टा भी इस्से ढाल करै सै। 20 क्यूँके पिता बेट्टे तै प्यार करै सै अर जो-जो काम वो खुद करै सै, वो सारे उसतै दिखावे सै: अर वो इसते भी बड़े काम उस ताहीं दिखावेगा, ताके थम हैरान होओ। 21 जिसा पिता मेरे होया नै ठावे अर जिवाँवे सै उस्से ढाल बेट्टा भी जिननै चाहवे सै उननै जिवाँवे सै। 22 पिता किसे का न्याय कोनी करदा, पर न्याय करण का सारा काम बेट्टे ताहीं सौंप राख्या सै, 23 ताके सारे माणस जिस ढाल पिता की इज्जत करै सै उस्से ढाल बेट्टे की भी इज्जत करै। जो बेट्टे की इज्जत कोनी करदा, वो पिता की भी इज्जत कोनी करदा, जिसनै उस ताहीं भेज्या सै।” 24 मै थारैतै साच्ची-साच कहूँ सूँ, जो मेरा वचन सुणके उसपै बिश्वास करै सै, जिसनै मेरे ताहीं भेज्या सै, वो अनन्त जीवन पावे सै, अर उसपै दण्ड का हुकम कोनी होन्दा, पर वो मौत नै पार करके जीवन म्ह दाखल हो लिया सै। (aiōnios g166) 25 “मै थारैतै साच्ची-साच कहूँ सूँ, वो बखत आवे सै, अर इब सै, जिसम्ह मेरे होइ परमेसवर के बेट्टे का वचन सुणैगें, अर जो सुणैगें वे जिवैगें। 26 क्यूँके जिस ढाल तै पिता खुद म्ह जीवन राखे सै, उस्से ढाल तै उसनै बेट्टे ताहीं भी यो अधिकार दिया सै के खुद जीवन राखे। 27 बल्के मेरे ताहीं माणसां के न्याय करण का भी अधिकार दिया सै, ज्यांतै के मै माणस का बेट्टा सूँ।” 28 इसतै हैरान मतना होओ: क्यूँके वो बखत आवे सै के जितने मेरे होए लोग कब्रां म्ह सै वे मेरा वचन सुणके लिक्ड़ आवैगें। 29 जिन नै भले काम करे सै वे जीवन कै पुनरुत्थान खात्तर जी जावैगें अर जिन नै बुरे काम करे सै वे दण्ड के पुनरुत्थान खात्तर जी जावैगें। 30 “मै खुद तो कुछ कोनी कर सकदा, जिसा सुणु सूँ, उस्से तरियां न्याय करूँ सूँ, अर मेरा न्याय साच्चा सै, क्यूँके मै अपनी मर्जी कोनी पर अपने भेजण आळे की मर्जी चाहूँ सूँ।” 31 जै मै खुदे अपनी गवाही हूँ, तो मेरी गवाही साच्ची कोनी। 32 एक और सै जो मेरा पिता सै, वो मेरी गवाही देवे सै, अर मै जाणु सूँ, के मेरी जो गवाही वो देवे सै, वा साच्ची सै। 33 थमनै यहून्ना तै बुझवाया अर उसनै सच्चाई की गवाही दी सै। 34 पर मै अपने बारे म्ह माणसां की गवाही कोनी चाहन्दा, फेर भी मै ये बात ज्यांतै कहूँ सूँ के थारा उद्धार हो। 35 यहून्ना तो बळदे अर चमकदे होए दीवै कै समान था, अर थमनै किमे वार ताहीं उसके चाँदणे म्ह मगन होणा भाया। 36 पर मेरे धारे जो

गवाही सै वा यहून्ना की गवाही तै बड्डी सै, क्यूँके जो काम पिता नै मेरे ताहीं निपटाण नै सौप्या सै यानिके योए काम जो मै करूँ सूँ, वे मेरे गवाह सै के पिता नै मेरे ताहीं भेज्या सै। 37 अर पिता जिसनै मेरे ताहीं भेज्या सै, उस्से नै मेरी गवाही दी सै। थमनै ना कदे उसका वचन सुणया, अर ना उसकी शकल देखी सै, 38 अर उसके वचन ताहीं मन म्ह बणाए कोनी राखदे, क्यूँके जिस ताहीं उसनै भेज्या थम उसका बिश्वास कोनी करदे। 39 थम पवित्र ग्रन्थ म्ह टोव्हो सो, क्यूँके समझौं सो के उस म्ह अनन्त जीवन थारे ताहीं मिले सै, अर यो वोए सै जो मेरी गवाही देवे सै, (aiōnios g166) 40 फेर भी थम अनन्त जीवन पाण खात्तर मेरे धारे आणा कोनी चाहन्दा। 41 मै माणसां तै आदर कोनी चाहन्दा। 42 पर मै थमनै जाणु सूँ, के थारे म्ह परमेसवर खात्तर प्यार कोनी। 43 थम मेरे ताहीं पसन्द न्ही करते जिब के मै अपने पिता के नाम तै आया सूँ, जै दुसरा कोए खुद के नाम तै आवे, तो उसनै थम अपना लोगे। 44 थम मेरे पै किस तरियां बिश्वास कर सको सो? क्यूँके थम तो आप्पस म्ह एक-दुसरे तै तारीफ सुणणा चाहो सो, अर उस तारीफ की ओइ देखते भी कोनी जो एकमात्र परमेसवर तै आवे सै। 45 न्यू ना समझियौं के मै पिता के स्याम्ही थारे म्ह खोट काढूँ सूँ, थारे म्ह खोट काढणिया तो मूसा नबी सै, जिसपै थमनै भरोस्सा करया सै। 46 क्यूँके जै थम मूसा नबी पै बिश्वास करदे, तो मेरा भी बिश्वास करदे, ज्यांतै के उसनै मेरे बारे म्ह लिख्या सै। 47 पर जै थम उसके पवित्र ग्रन्थ म्ह लिक्खी होई बातां पै बिश्वास कोनी करदे, तो मेरी बातां पै किस तरियां बिश्वास करोगे?

6 इन बातां कै पाच्छे यीशु गलील समुन्दर यानिके तिबेरियास की झील कै धारे गया। 2 अर एक बड्डी भीड़ उसके गेल्या हो ली क्यूँके जो अचम्भे के काम वो बिमारां पै दिखावे था वे उननै देख्या करै थे। 3 फेर यीशु पहाड़ पै चढ़के अपने चेल्यां कै गेल्या बैठग्या। 4 यहूदियाँ के फसह का त्यौहार लोवे था। 5 जिब यीशु नै अपनी आँख ठाके एक बड्डी भीड़ ताहीं अपने कान्ही आन्दे देख्या, फेर फिलिप्पुस ताहीं कहा, “हम इनके खाणे कै खात्तर कड़े तै रोटी मोल ल्यावां?” 6 उसनै या बात उस ताहीं आजमाण ताहीं बोल्ली, क्यूँके वो खुदे जाणै था के वो के करेगा। 7 फिलिप्पुस नै उस ताहीं जवाब दिया, “दो सौ दीनार (200 दिन की मजदूरी) की रोटी भी उन खात्तर पूरी कोनी पडै के उन म्ह तै हरेक नै माड़ी-माड़ी मिल जा।” 8 उसके चेल्यां म्ह तै शमौन पतरस का भाई अन्द्रियास नै उस ताहीं कहा, 9 “याड़े एक छोरा सै जिसके धारे जौ की पाँच रोटी अर दो मच्छी सै, पर इतने माणसां खात्तर वे के सै?” 10 यीशु बोल्या, “माणसां नै बिठा द्यो।” उस जगहां घणी घास थी: फेर माणस जिन म्ह आदमियाँ की गिणती करीबन पाँच हजार की थी, बैठगे। 11 फेर यीशु नै रोटी ली अर परमेसवर का धन्यवाद करके बैठण आळा ताहीं बांड दी: अर उस्से ढाल मच्छियां म्ह तै जितनी वे चाहवे थे, बांड दी। 12 जिब वे खाके छिकगे फेर वो चेल्यां तै बोल्या, “बचे होइ टुकड़े कट्टे कर ल्यो के किमे बगायां न्ही जावै।” 13 आखर म्ह उननै कट्टा करया, अर जौ की पाँच रोतियाँ के टुकड्या तै जो खाण आळा तै बची

होड़ थी, बारहा टोकरी भरी। 14 फेर जो अचम्भे के काम उसनै कर दिखाये उसनै वे माणस देखके कहण लागगे, “वो नबी जो दुनिया म्ह आण आळा था, पक्का योए सै।” 15 यीशु न्यू जाणके के वे मन्ने राजा बणाण खात्तर पकड़णा चाहवै सै, फेर पहाड़ पै एकला चल्या गया। 16 जिब साँझ होई, तो उसके चेल्लें झील के किनारे गए, 17 अर किस्ती पै चढ़के झील के परली ओड़ कफरनहूम नगर म्ह जाण लागगे। उस बखत अन्धेरा होग्या था, अर यीशु इब ताहीं उनके धोरै कोनी आया था। 18 अर आँधी के कारण समुन्दर म्ह झाल उठण लागगी। 19 जिब वे खेते-खेते तीन-चार कोस के करीबन लिकड़गे, फेर उननै यीशु ताहीं समुन्दर पै चाल्दे अर किस्ती के धोरै आन्दे देख्या, अर डरगे। 20 पर उसनै उनतै कहा, “मै सूं, डरो मतना।” 21 आखर म्ह वे उसनै किस्ती पै चढ़ाण नै राज्जी होए अर जिब्बे वा किस्ती उस जगहं पै जा पोहची जड़ै वे जाण लागरे थे। 22 जो लोग गलील समुन्दर के उस पार रहगे थे, उननै दुसरे दिन देख्या के याड़ै सिर्फ एक ए किस्ती थी, अर यीशु अपने चेल्यां गेल्या उस किस्ती पै कोनी चढ़या था, पर सिर्फ उसके चेल्लें एकले ए चले गए थे। 23 तितिरियास नगर की कुछ किस्ती उस जगहं के धोरै आके रुकी, जड़ै प्रभु नै परमेसवर का धन्यवाद करके भीड़ ताहीं रोटी खुआई थी। 24 जिब भीड़ नै देख्या के याड़ै ना यीशु सै अर ना उसके चेल्लें, फेर वे भी छोटी-छोटी किस्तियाँ पै चढ़के यीशु नै टोन्दे होए कफरनहूम नगर पोहचे। 25 गलील समुन्दर के परली ओड़ जिब वे उसतै मिले तो बोल्ले, “हे गुरु, तू याड़ै कद आया?” 26 यीशु नै उन ताहीं जवाब दिया, “मै थारेताहीं साच्ची-साच कहूँ सूं, थम मन्ने ज्यातै कोनी टोव्हो सो के थमनै अचम्भे के काम देखके, पर ज्यातै के थमनै पेट भरके रोटी खाई थी।” 27 उस खाणे खात्तर मेहनत ना करो जो सड़ जावै सै, पर उस खाणे खात्तर जतन करो जो कदे खराब नही होंदा अर अनन्त जीवन देवै सै, मै माणस का बेटा यो खाणा थारे ताहीं देऊंगा, क्यूँके पिता परमेसवर नै मेरे ताहीं इसा करण का हक दिया सै। (aiōnios g166) 28 वे उसतै बोल्ले, “परमेसवर के काम करण खात्तर हम के करा?” 29 यीशु नै उन ताहीं जवाब दिया, “परमेसवर चाहवै सै, के थम उसपै बिश्वास करो, जिस ताहीं उसनै भेज्या सै।” 30 फेर वे उसतै बोल्ले, “फेर तू कौण सा निशान दिखावै सै के हम उसनै देखके तेरा बिश्वास करा? तू कौण सा काम दिखावै सै? 31 म्हारै पूर्वजां नै जंगल-बियाबान म्ह मन्ना खाया, जिसा पवित्र शास्त्र म्ह लिख्या सै, परमेसवर नै उन ताहीं खाण खात्तर सुर्ग तै रोटी देई।” 32 यीशु नै उनतै कहा, “मै थारे ताहीं साच्ची-साच कहूँ सूं, के मूसा नबी नै थारे ताहीं वा रोटी सुर्ग तै कोनी दी, पर मेरा पिता थमनै सुर्ग तै असली रोटी देवै सै। 33 क्यूँके परमेसवर की रोटी वाए सै, जो सुर्ग तै उतरके दुनिया के माणसां ताहीं जिन्दगी देवै सै।” 34 फेर यो सुणके यीशु तै बिनती करी, “के हे प्रभु, वा रोटी हमनै सदा दिया कर।” 35 यीशु नै उनतै कहा, “जीवन की रोटी मै सूं: जो मेरै धोरै आवेगा, वो कदे भूख्खा कोनी रहवेगा, अर जो कोए मेरै पै बिश्वास करेगा, वो कदे तिसाया कोनी होवेगा। 36 पर मन्ने थारे ताहीं

पैहले तै कहा था, के थमनै मेरैताहीं देख भी लिया सै, फेर भी बिश्वास कोनी करदे। 37 वे सारे जो पिता नै मेरे ताहीं दिये सै, वे मेरे धोरै आवेंगे, अर हर एक जो कोए मेरै धोरै आवेगा उसनै मै कदे भी कोनी छोड़ुंगा। 38 पर मै अपना मर्जी कोनी पर अपने भेजण आळे पिता की मर्जी पूरी करण खात्तर सुर्ग तै उतरया सूं। 39 अर मेरै भेजण आळे की मर्जी या सै के जो किमे उसनै मेरै ताहीं दिया सै, उस म्ह तै मै किसे नै ना खोऊँ, पर उसनै आखर के दिनां म्ह दुबारे जिन्दा कर दूँ। 40 क्यूँके मेरै पिता की मर्जी या सै के जो कोए बेटै नै अपना के उसपै बिश्वास करे, वो अनन्त जीवन पावे, अर मै उसनै आखरी के दिनां म्ह दुबारे जिन्दा करूँगा।” (aiōnios g166) 41 इसपै यहूदी उसपै बिरड़ाण लागगे, क्यूँके उसनै कहा था, “जो रोटी सुर्ग तै उतरी, वा मै सूं।” 42 अर वे बोल्ले, “के यो यीशु सै, यूसुफ का बेटा, जिसके माँ-बाप नै हम जाणां सां? फेर वो किस ढाळ कह सके सै के मै सुर्ग तै उतरया सूं?” 43 यीशु नै उन ताहीं जवाब दिया, “आप्पस म्ह मतना बिरडाओ।” 44 कोए मेरै धोरै कोनी आ सकदा जिब ताहीं पिता, जिसनै मेरैताहीं भेज्या सै, उसनै खींच नही लेवे, अर मै उसनै आखर के दिनां म्ह फेर जिन्दा करूँगा। 45 नबियाँ के लेखां म्ह यो लिख्या सै: “वे सारे परमेसवर की ओड़ तै सिखाए होए होवेंगे।” जिस किसे नै पिता तै सुणया अर सिख्या सै, वो मेरै धोरै आवै सै। 46 किसे नै पिता ताहीं कोनी देख्या, सिवाए उसके, जो परमेसवर की ओड़ै तै सै, सिर्फ उससे नै पिता ताहीं देख्या सै। 47 मै थारेताहीं साच्ची-साच कहूँ सूं, के जो कोए बिश्वास करै सै, अनन्त जीवन उससे का सै। (aiōnios g166) 48 जीवन की रोटी मै सूं। 49 थारे पूर्वजां नै जंगल-बियाबान म्ह मन्ना खाया अर मरगे। 50 या वा रोटी सै जो सुर्ग तै उतरी सै, ताके माणस उस म्ह तै खावै अर ना मरै। 51 जीवन की रोटी जो सुर्ग तै उतरी सै, मै सूं। जै कोए इस रोटी म्ह तै खावै, तो सारी हाण जिन्दा रहवेगा, अर जो रोटी मै दुनिया के जीवन खात्तर दियुँगा, वो मेरा माँस सै। (aiōn g165) 52 इसपै यहूदी न्यू कहके आप्पस म्ह बहस करण लागगे, “यो माणस किस ढाळ हमनै अपना माँस खाण नै दे सके सै?” 53 यीशु नै उन ताहीं कहा, “मै थारेताहीं साच्ची-साच कहूँ सूं, के जिब ताहीं थम मुझ माणस के बेटे का माँस ना खाओ, अर मेरा लहू ना पियो, थारे म्ह जीवन कोनी। 54 जो मेरा माँस खावै अर मेरा लहू पीवै सै, अनन्त जीवन उससे का सै, अर आखरी के दिनां म्ह मै उसनै दुबारे जिन्दा कर दियुँगा। (aiōnios g166) 55 क्यूँके मेरा माँस सच म्ह खाण की चीज सै, अर मेरा लहू सच म्ह पीण की चीज सै। 56 जो मेरा माँस खावै अर मेरा लहू पीवै सै वो मेरै म्ह डटया रहवै सै, अर मै उस म्ह। 57 जिसा जिन्दे पिता नै मेरैताहीं भेज्या सै, अर मै पिता के कारण जिन्दा सूं, उससे ढाळ वो भी जो मन्ने खावेगा मेरै कारण जिन्दा रहवेगा। 58 जो रोटी सुर्ग तै उतरी सै याए सै, उस रोटी बरगी कोनी जो पूर्वजां नै खाई अर मरगे, जो कोए या रोटी खावेगा, वो सदा ताहीं जिन्दा रहवेगा।” (aiōn g165) 59 ये बात उसनै कफरनहूम नगर के एक आराधनालय म्ह उपदेश देन्दे बखत कही। 60 उसके चेल्यां म्ह तै घणखरा नै या सुणके

कह्या, “या सख्त शिक्षा सै, इसनै कौण सुण सकै सै?” 61 यीशु नै अपणे मन म्ह न्यू जाणके के मेरे चेल्लें आप्पस म्ह इस बात पै बिरड़ावै सै, उन ताहीं बुझ्झया, “के इस बात तै थारे ताहीं ठेस लाग्गै सै?” 62 जै थम मुझ्झ माणस के बेट्टे नै जड़ै मै पैहलया था, ओड़ैए उप्पर जान्दे देख्खोगे, तो के होगा? 63 आत्मा ए सै जो देह नै जीवन देवै सै, देह का कोए महत्व कोनी, जो वचन मन्नै थारैतै कह्ये सै, वे आत्मा सै, अर जीवन भी। 64 पर थारे म्ह तै किमे इसे सै जो बिश्वास कोनी करदे। क्यूँके यीशु पैहलया तै ए जाणै था के जो बिश्वास न्ही करदे, वे कौण सै, अर कौण मैरे ताहीं पकड़वावैगा। 65 अर वो बोल्या, “ज्यांतै मन्नै थारे ताहीं कह्या था के जिब ताहीं किसे नै पिता की ओड़ तै यो वरदान ना मिलै तब ताहीं वो मेरे धोरे कोनी आ सकदा।” 66 इसपै उसके चेल्यां म्ह तै घणखरे उल्टे हट्यो अर उसके बाद उसके गेल्या कोनी चाल्ले। 67 फेर यीशु नै उन बारहां चेल्यां तै कह्या, “के थम भी चले जाणां चाहो सो?” 68 शमौन पतरस नै उस ताहीं जवाब दिया, “हे प्रभु, हम किसके धोरे जावां? अनन्त जीवन की बात तो तेरेए धोरे सै, (aiōnios g166) 69 अर हमनै बिश्वास करया अर जाणगे सै के परमेसवर का पवित्र जन तूप सै।” 70 यीशु नै उन ताहीं जवाब दिया, “के मन्नै थम बारहां चेल्यां ताहीं कोन्या छट्या? फेरभी थारे म्ह तै एक जन शैतान सै।” 71 यो उसनै शमौन इस्करियोती के बेट्टे यहूदा के बारे म्ह कह्या था, क्यूँके वोए जो बारहां चेल्यां म्ह तै एक था, उस ताहीं पकड़वाण म्ह था।

7 इन बातं के हो लेण के पाच्छे यीशु गलील परदेस म्ह सफर करण लाग्या, वो यहूदिया परदेस म्ह जाणा कोनी चाहवै था, क्यूँके यहूदी लोग उस ताहीं मारण की ताक म्ह थे। 2 यहूदियाँ का झोपड़ियाँ का त्योंहार लोवै था। 3 ज्यांतै उसके भाईयाँ नै उस ताहीं कह्या, “याडै तै यहूदिया परदेस नै जा, ताके जो काम तू करै सै उननै तेरे चेल्लें ओड़ै भी देखवै। 4 क्यूँके इसा कोए न्ही होगा जो मशहूर होणा चाहवै, अर लुक्क के काम करै। जै तू यो काम करै सै, तो खुद नै दुनिया म्ह साबित कर।” 5 क्यूँके उसके भाई भी उसपै बिश्वास कोनी करे थे। 6 फेर यीशु नै उनतै कह्या, “मेरे खात्तर इब्बे सही बखत कोनी आया, पर थारे खात्तर सारा बखत सही सै। 7 दुनिया थारे तै बैर कोनी कर सकदी, पर वा मेरे तै बैर करै सै क्यूँके मै उसके बिरोध म्ह या गवाही दिवूं के उसके काम भुन्डे सै। 8 थम त्योंहार म्ह जाओ, मै इब्बे इस त्योंहार म्ह कोनी जान्दा, क्यूँके इब्बे मेरा सही बखत कोनी आया।” 9 वो उनतै ये बात कहकै गलील परदेस म्ह रहग्या। 10 पर जिब उसके भाई त्योंहार म्ह जा लिए तो वो खुद भी, जाहिर म्ह न्ही पर मान्णो गुप्ती तै गया। 11 त्योंहार म्ह कुछ यहूदी लोग यीशु ताहीं टोह्न्दे होए पूछताछ करण लागरे थे, “के वो कड़ै सै?” 12 फेर भी यीशु के बारे म्ह बड़ी बहस होण लागरी थी, कई माणस कहवै थे, “के वो भला माणस सै।” अर कईयाँ का कहणा था, “के ना, वो माणसां नै बहकावै सै।” 13 फेर भी यहूदियाँ के डरकै मारे कोए भी माणस यीशु के बारे म्ह खुलकै कोनी बोल्ले था। 14 जिब त्योंहार के आधे दिन बीतगे, फेर यीशु मन्दर म्ह जाकै उपदेश देण

लागग्या। 15 फेर यहूदियाँ नै हैरान होकै कह्या, “इसनै बिना पढ़े ज्ञान किस तरियां आ ग्या?” 16 यीशु नै उन ताहीं जवाब दिया, “जो उपदेश मै देखूं सूं, मेरा अपणा कोनी, पर उसतै आवै सै जिसनै मेरे ताहीं भेज्या सै। 17 जै कोए माणस उसकी मर्जी पै चाल्लण का प्रण करै, तो उस ताहीं यो बेरा लाग ज्यागा, के यो उपदेश परमेसवर की ओड़ तै सै, या मै अपणी ओड़ तै देखूं सूं। 18 जो अपणी ओड़ तै कुछ कहवै सै, वो खुद की बड़ाई चाहवै सै, पर जो अपणे भेजण आळे की बड़ाई चाहवै सै वोए साच्चा सै, अर उस म्ह अधर्म कोनी। 19 के मूसा नबी नै थारैताहीं नियम-कायदे कोनी दिये? फेरभी थारैम्ह तै कोए नियम-कायदा पै कोनी चाल्दा। थम मन्नै क्यातै मारणा चाहो सो?” 20 माणसां नै जवाब दिया, “तेरे म्ह ओपरी आत्मा सै! कौण तन्नै मारणा चाहवै सै?” 21 यीशु नै उन ताहीं जवाब दिया, “मन्नै आराम के दिन एक चमत्कार करया, अर थम सारे छो म्ह होगे। 22 इससे खात्तर मूसा नबी नै थारैताहीं खतने का नियम दिया था (यो नियम मूसा नबी का न्ही था बल्के या थारे पूर्वजां तै ए लाग लागरी सै) अर थम आराम के दिन माणस का खतना करो सो। 23 जिब आराम के दिन माणस का खतना करया जावै सै ताके मूसा नबी के नियम-कायदा का हुकम न्ही टळै। फेर थम मैरे पै क्यातै छो करो सो के मन्नै आराम के दिन एक माणस ताहीं पूरी तरियां ठीक करया। 24 मुँह देख्या न्याय मतना करो, पर सही-सही न्याय करो।” 25 फेर यरुशलम म्ह रहण आळे माणसां म्ह तै कईयाँ नै कह्या, “के यो वोए कोनी जिस ताहीं यहूदी अगुवें मार देणा चाहवै सै?” 26 पर लखाओ, “वो तो सरेआम बात करै सै अर कोए उसतै किमे कोनी कहन्दा। के यो न्ही हो सकता के यहूदी अगुवां नै साच्चा बेरा पाटग्या सै, के योए मसीह सै? 27 इसके बारे म्ह हमनै बेरा सै यो कितका सै, पर मसीह जिब आवैगा तो कोए कोनी जाणै के वो कितका सै।” 28 फेर यीशु नै मन्दर म्ह उपदेश देन्दे होए रुक्का मारकै कह्या, “थम मन्नै जाणो सो, अर न्यू भी जाणो सो के मै कित्त तै आया सूं। मै तो खुद कोनी आया, पर मेरा भेजण आळा साच्चा सै, उसनै थम कोनी जाणदे। 29 पर मै उसनै जाणु सूं, क्यूँके मै उसके कान्ही तै आया सूं, अर उरसे नै मेरे ताहीं भेज्या सै।” 30 यो सुणकै यहूदी अगुवां नै यीशु ताहीं पकड़णा चाह्या, फेरभी किसे नै उसके हाथ कोनी लाया, क्यूँके उसके मरण का सही बखत इब्बे कोनी आया था। 31 फेर भी भीड़ म्ह तै घणखरे माणसां नै उसपै बिश्वास करया, अर बोल्ले, “मसीह जिब आवैगा तो के इसतै घणे अचम्भे के काम दिखावैगा जो इसनै दिखाए?” 32 फरीसियाँ नै भीड़ म्ह माणस ताहीं यीशु के बारे म्ह चुपके-चुपके बात करते सुणया, तो प्रधान याजक अर फरीसियाँ नै यीशु ताहीं पकड़ण खात्तर मन्दर के सिपाहियाँ ताहीं भेज्या। 33 मसीह यीशु बोल्या, “मै थोड़ी बार ताहीं थारे गेल्या सूं, फेर अपणे भेजण आळे धोरे उल्टा चल्या जाऊंगा। 34 थम मन्नै टोहओगे, पर कोनी पाओगे, अर जड़ै मै सूं, ओड़ै थम कोनी आ सकदे।” 35 इसपै यहूदी अगुवां नै आप्पस म्ह कह्या, “यो कित्त जावैगा, के हम इसनै कोनी टोह सकदे? के यो जो यूनानी परदेशियाँ म्ह तो बसणा

न्ही चाहन्दा, ताके यूनानियाँ ताहीं भी उपदेश दे? 36 इसकी इस बात का के मतलब सै? जो उसनै बोल्ली सै, के थम मन्ने टोहओगे, पर कोनी पाओगे, अर जड़ै मै सूँ, ओड़ै थम न्ही आ सकदे।” 37 त्यौहार के आखरी दिन, जो खास दिन सै, यीशु खड्या होया अर रुक्का मारकै कह्या, “जै कोए तिसाया हो तो मेरै धोरै आवै अर पीवै। 38 जो कोए मेरै पै बिश्वास करैगा, जिसा पवित्र ग्रन्थ म्ह लिख्या सै, ‘उसकी अंतरआत्मा म्ह तै जीवन कै जल की नदियाँ बह लिकडैंगी, जो अनन्त जिन्दगी देवै सै।’” 39 यीशु नै यो वचन पवित्र आत्मा के बारे म्ह कह्या, जो बिश्वास करण आळा नै मिलण आळी थी, क्यूँके इब ताहीं पवित्र आत्मा कोनी उतरया था, क्यूँके यीशु इब ताहीं अपनी महिमा म्ह कोनी पोंहच्या था। 40 फेर भीड़ म्ह तै कईयॉँ नै या बात सुणकै कह्या, “साच्ये योए वो नबी सै, जिसके आण की हम आस देख्कां थे।” 41 अर कईयॉँ नै कह्या, “यो मसीह सै” पर कई बोल्ले, “मसीह गलील परदेस तै तो न्ही आवैगा?” 42 पवित्र ग्रन्थ यो कहवै सै, के मसीह दाऊद की पीढ़ी तै अर बैतलहम नगर तै आवैगा, जड़ै दाऊद रहवै था? 43 आखर म्ह उसकै कारण माणसां म्ह फूट पड़ी। 44 उन म्ह तै कई उस ताहीं पकड़णा चाहवै थे, पर किसे नै उसके हाथ कोनी लाया। 45 फेर सिपाही, प्रधान याजकां अर फरीसियाँ के धोरै बोहड़ आए, उननै उन ताहीं कह्या, “थम उसनै क्यातै न्ही ल्याए?” 46 सिपाहियाँ नै जवाब दिया, “इसी बात बताण आळा माणस हमनै आज ताहीं कदे भी कोनी मिल्या।” 47 फरीसियाँ नै उन ताहीं जवाब दिया, “के थम भी भळोई म्ह आगै? 48 के सरदारां या फरीसियाँ म्ह तै किसे नै भी उसपै बिश्वास करया सै? 49 पर ये माणस जो मूसा नबी के नियम-कायदे कोनी जाणदे, परमेसवर की ओड़ तै सरापित सै।” 50 नीकुदेमुस जो उन म्ह तै एक था, वो मसीह यीशु तै पैहल्या मिल चुका था, उन ताहीं बोल्या, 51 “के म्हारे नियम-कायदे किसे माणस नै, जिब ताहीं पैहल्या उसकी सुणकै जाण ना लवै, के वो के करै सै, कसूरवार मान्ने सै?” 52 उननै नीकुदेमुस ताहीं जवाब दिया, “तू भी गलील परदेस का सै? पवित्र ग्रन्थ म्ह दूँड अर देख के गलील परदेस तै कोए नबी कोनी आवै।” 53 फेर सारे अपने-अपणे घरां चले गए।

8 यीशु अपने चेल्यां के गैल जैतून के पहाड़ पे गया। 2 तड़कैए आगले दिन यीशु फेर मन्दर म्ह आया। भोत सारे माणस उसके धोरै आए अर वो बैठके उननै उपदेश देण लाग्या। 3 जिब वो बोलण लागरया था, तो जिब्बे शास्त्री अर फरीसी एक बिरबान्नी नै ल्याए, जो जारी करते होए रंगे हाथ पकड़ी गयी थी, अर उस ताहीं माणसां के स्याम्ही खड्या कर दिया, अर यीशु ताहीं कह्या, 4 “हे गुरु, या बिरबान्नी जारी कर दी रंगे हाथ पकड़ी गयी सै। 5 मूसा नबी के नियम-कायदा म्ह उसनै म्हारे ताहीं हुकम दिया सै, के इसी बिरबान्नी नै पत्थर बरसा के मार यो। पर तू इस बिरबान्नी के बारे म्ह के कहवै सै?” 6 उननै यीशु ताहीं परखण खात्तर या बात कही, ताके उस म्ह खोत लिकाड़ण का कोए सुराग मिलै जावै। पर यीशु कोड्डा होके आनाळी तै धरती पै लिखण लाग्या। 7

जिब वे बार-बार उसतै सवाल करते रहे, तो फेर उसनै सीध्या होके उन ताहीं कह्या, “थारे म्ह जिसनै भी कोए पाप न्ही करया हो, वोए उसकै सबतै पैहला पत्थर मारे।” 8 फेर यीशु कोड्डा होके आनाळी तै धरती पै लिखण लाग्या। 9 जिब माणसां नै यो सुणया तो सबतै पैहले बूढ़े माणस अर फेर एक-एक करके ओड़ै तै खिसकण लाग्गे, क्यूँके वे सब जाणै थे, के हम सब पापी सां, अर सिर्फ यीशु अर वा बिरबान्नी ओड़ै रहगे। 10 यीशु खड्या होया अर उस बिरबान्नी ताहीं कह्या, “हे नारी, वे कित्त गए? के किस्से नै तेरे ताहीं दण्ड न्ही दिया?” 11 वा बोल्ली, “हे प्रभु, किसे नै न्ही।” यीशु बोल्या, “मै भी तेरे ताहीं दण्ड न्ही देऊंगा, जा, अर दुबारा कदे पाप ना करिए।” 12 मन्दर म्ह अपने उपदेश नै दुबारे शरु करदे होए यीशु नै माणसां तै कह्या, “दुनिया का चाँदणा मै सूँ, जो कोए मेरै पाछै चालैगा, वो अन्धेरै म्ह कदे कोनी चालैगा, पर वो चाँदणा पावैगा जो अनन्त जीवन देवै सै।” 13 फरीसियाँ नै उस ताहीं कह्या, “तू अपनी गवाही खुद देवै सै, इस खात्तर तेरी गवाही साचची कोनी।” 14 यीशु नै उन ताहीं जवाब दिया, “भलाए मै अपनी गवाही खुद देऊँ सूँ, फेर भी मेरी गवाही मान्नी जावैगी, क्यूँके मै जाणु सूँ, के मै कित्त तै आया सूँ, अर कितोड़ जाऊँ सूँ? पर थम कोनी जाणदे के मै कित्त तै आऊँ सूँ, या कितोड़ जाऊँ सूँ। 15 थम मानवीय सोच तै, न्याय करो सो, मै किसे का न्याय कोनी करदा। 16 जै मै न्याय कर्हू भी तो वो सही ए होगा, क्यूँके मै एकला कोनी, पर परम पिता, जिसनै मेरै ताहीं भेज्या सै, वो अर मै दोन्नु मिलके न्याय करा सां। 17 थारे मूसा नबी के नियम-कायदा म्ह भी लिख्या सै, के दो जणयां की गवाही सच के रूप म्ह मान्नी जा सके सै। 18 एक तो मै खुद अपनी गवाही दियुँ सूँ, अर दुसरा मेरा पिता मेरी गवाही देवै सै, जिसनै मेरैताहीं भेज्या।” 19 उननै उस ताहीं कह्या, “तेरा पिता कित्त सै?” यीशु नै जवाब दिया, “ना थम मन्ने जाणो सो, ना मेरै पिता नै, जै मन्ने जाणदे तै मेरै पिता नै भी जाणदे।” 20 यीशु नै ये वचन मन्दर म्ह उपदेश देन्दे होए भण्डार घर म्ह बोल्ली, अर किसे नै उस ताहीं कोनी पकड्या, क्यूँके उसके दुख ठाण का अर मरण का बखत इब ताहीं कोनी आया था। 21 यीशु नै फेर उन ताहीं कह्या, “मै जाऊँ सूँ, अर थम मन्ने टोहओगे, अर अपने पाप म्ह मरोगे। जड़ै मै जाऊँ सूँ, ओड़ै थम न्ही आ सकदे।” 22 इसपै यहूदी अगुवां नै कह्या, “के वो खुद नै मार देवैगा, जो कहवै सै, ‘जड़ै मै जाऊँ सूँ, ओड़ै थम न्ही आ सकदे?’” 23 यीशु नै उन ताहीं कह्या, “थम इस दुनिया म्ह पैदा होए सों, अर मै सुर्ग तै आया सूँ। थम इस दुनिया के सो, मै इस दुनिया का कोनी। 24 ज्यांतै मन्ने थारे ताहीं कह्या के थम अपने पापां म्ह मरोगे, जै थारा मेरे म्ह बिश्वास कोनी के मै कौण सूँ, तो थम मरोगे, अर थारे पाप माफ कोनी होंगे।” 25 यहूदी अगुवां नै यीशु ताहीं कह्या, “के तू कौण सै?” वो उनतै बोल्या, जिब तै मन्ने प्रचार करणा शरु करया सै, तब तै मै थमनै कहन्दा आया सूँ, “के मै कौण सूँ?” 26 “थारे बारे म्ह कहण खात्तर अर फैसला करण खात्तर मेरे धोरै भोत कुछ सै, पर सच्चाई याए सै के जिसनै मेरे ताहीं भेज्या सै, मै वोए कर्हू सूँ, जो

मन्ने उसतै सुण्या सै, वोए दुनिया के माणसां तै कहूँ सू।” 27 वे न्यून्ही समझै के म्हारे तै, पिता कै बारे म्ह कहवै सै। 28 फेर यीशु बोल्या, “जिब थम मुझ माणस के बेट्टे नै ऊँचे पै चढ़ाओगे, जिब जाणोगे के मै वोए सू। मै खुद तै किमे कोनी करदा, पर जिस तरियां मेरे पिता नै, मेरे ताहीं सिखाया सै, उस्से ढाळ ये बात कहूँ सू। 29 मेरा भेजण आळा मेरे गेल्या सै, उसनै मेरेताहीं एकला कोनी छोड्या क्यूँके मै सारी हाण वैए काम करूँ सू, जिसतै वो राज्जी होवै सै।” 30 वो ये बात कहणे लागरया था, के घणखरयां नै उसपै बिश्वास करया। 31 फेर यीशु नै उन यहूदियाँ तै जिन नै उसपै बिश्वास करया था, बोल्या, “जै थम मेरे वचन म्ह बणे रहोगे, तो साच-ए मेरे चेल्लें ठहरोगे।” 32 थम सच नै जाणोगे अर सच थमनै आजाद करेगा। 33 उननै उस ताहीं जवाब दिया, “हम तो अब्राहम के वंशज सा, कदे किसे के गुलाम कोनी बणे। फेर तू किस तरियां कहवै सै, के थम आजाद हो जाओगे?” 34 यीशु नै उन ताहीं जवाब दिया, “मै थारैतै साच्ची-साच कहूँ सू, के जो कोए पाप करै सै, वो पाप का गुलाम सै। 35 गुलाम सारी हाण घर म्ह कोनी रहन्दा, बेट्टा सारी हाण घरां रहवै सै। (aiōn g165) 36 ज्यांतै जै बेट्टा थमनै आजाद करेगा, तो साच्ये थम आजाद हो जाओगे। 37 मै जाणु सू, के थम अब्राहम के वंश के सो, फेर भी थम मेरे वचनां नै कोनी मानते, ज्यांतै थम मन्ने मारणा चाहो सो। 38 मै वोए कहूँ सू, जो मेरे पिता नै मेरे ताहीं दिखाया सै, अर थम वोए करो सो, जो थमनै अपणे पिता तै सुण्या सै।” 39 उननै उस ताहीं जवाब दिया, “म्हारा पूर्वज तो अब्राहम सै।” यीशु उनतै बोल्या, “जै थम अब्राहम के वंशज होन्दे, तो अब्राहम जिसे काम करदे। 40 पर इब थम मेरे ताहीं मारणा चाहो सो, जिसनै थारे ताहीं वो साच्चा वचन बताया जो परमेसवर तै सुण्या, इस तरियां तो अब्राहम नै कोनी करया था। 41 थम अपणे पिता कै जिसे काम करो सो।” उननै यीशु ताहीं कह्या, “हम जारी तै कोनी जणे, म्हारा एक ए पिता सै यानिके परमेसवर।” 42 यीशु उनतै बोल्या, “जै परमेसवर थारा पिता होन्दा, तो थम मेरे तै प्यार करदे, क्यूँके मै परमेसवर की ओड़ तै आया सू। मै खुद कोनी आया, पर उस्से नै मेरे ताहीं भेज्या। 43 थम मेरी बात क्यांतै न्ही समझदे? ज्यांतै के थम मेरे वचनां नै अपणादे कोनी। 44 थम अपणे पिता शैतान की ओड़ तै सो, अर अपणे पिता की मर्जी पूरी करणा चाहो सो। वो तो शरु तै ए खुन्नी सै, अर सच पै टिक्या ए कोनी रहया, क्यूँके सच उस म्ह सै ए कोनी। जिब वो झूठ बोल्लै सै, तो अपणे सुभाव तै ए बोल्लै सै, क्यूँके वो झूठा सै बल्के झूठ का बाप सै। 45 पर मै जो सच बोल्लू सू, इस्से करके थम मेरा बिश्वास कोनी करदे। 46 थारे म्ह तै कौण मन्ने पापी ठेहरावै सै? जै मै सच बोल्लू सू, तो थम मेरा बिश्वास क्यांतै न्ही करदे? 47 जो परमेसवर कान्ही तै होवै सै, वो परमेसवर की बात सुणै सै, अर थम ज्यांतै कोनी सुणदे के परमेसवर की ओड़ तै कोनी सो।” 48 न्यू सुण यहूदियाँ नै उस ताहीं कह्या, “के हम ठीक कोनी कहन्दे के तू सामरी सै, अर तेरे म्ह भुन्डी ओपरी आत्मा सै?” 49 यीशु नै जवाब दिया, “मेरे म्ह भुन्डी ओपरी आत्मा कोनी,” पर मै अपणे बाप की

इज्जत करूँ सू, अर थम मेरी बेजती करो सो। 50 पर मै अपणा मान-सम्मान कोनी चाहन्दा, हॉ, एक सै जो चाहवै सै, अर न्याय करण आळा सै। 51 मै थमनै साच्ची-साच कहूँ सू, “के जै कोए माणस मेरे वचनां नै मान्नेगा, तो वो अनन्त काल ताहीं कोनी मरे।” (aiōn g165) 52 यहूदियाँ नै उस ताहीं कह्या, “इब हम जाणगे के तेरे म्ह भुन्डी ओपरी आत्मा सै। अब्राहम मरग्या अर नबी भी मरगये सै, अर तू कहवै सै, ‘जै कोए मेरे वचनां नै मान्नेगा, तो वो अनन्त काल ताहीं कोनी मरे।’ (aiōn g165) 53 म्हारा पूर्वज अब्राहम तो मरग्या। के तू उसतै भी बड़्ठा सै? अर नबी भी मरगये। तू अपणे-आपने के मान्ने सै?” 54 यीशु नै जवाब दिया, “जै मै खुद अपणी महिमा करूँ, तो मेरी महिमा किमे कोनी। पर मेरी महिमा करण आळा मेरा पिता सै, जिसनै थम कहो सो के वो थारा परमेसवर सै। 55 थमनै तो उस ताहीं कोनी जाण्या, पर मै उस ताहीं जाणु सू। जै मै कहूँ के मै उस ताहीं कोनी जाण्दा, तो मै थारी ढाळ झूठा ठहलंगा, पर मै उस ताहीं जाणु अर उसके वचनां नै मान्नु सू। 56 थारा पूर्वज अब्राहम मेरा दिन देखण की आस म्ह घणा मगन था, अर उसनै देख्या अर आनन्द करया।” 57 यहूदियाँ नै उस ताहीं कह्या, “इब ताहीं तू पचास साल का कोनी, फेरभी तन्ने अब्राहम ताहीं देख्या सै?” 58 यीशु उनतै बोल्या, “मै थमनै साच्ची-साच कहूँ सू, के पैहल्या इसके के अब्राहम पैदा होया, मै सू।” 59 या बात सुणके माणसां नै यीशु ताहीं मारण खात्तर पत्थर ठाए, पर यीशु लुत्कके मन्दर तै लिकड़ ग्या।

9 ओड़ तै जान्दे होए राह म्ह एक यीशु ताहीं जन्म तै आन्धा एक माणस मिला। 2 उसके चेल्यां नै उसतै बुझ्झया, “हे गुरु, किसनै पाप करया था के यो आन्धा पैदा होया, इस माणस नै या इसके माँ-बाप नै?” 3 यीशु नै जवाब दिया, “ना तो इसनै पाप करया था, ना इसके माँ-बाप नै पाप करया, पर यो ज्यांतै आन्धा पैदा होया ताके परमेसवर की शक्ति दिखाई जा सके। 4 जिसनै मेरे ताहीं भेज्या सै, हमनै उसके काम दिन-ए-दिन म्ह करणा जरूरी सै। वा रात आण आळी सै, जिस म्ह कोए माणस काम न्ही कर पावेगा। 5 जिब ताहीं मै दुनिया म्ह सू, जद ताहीं दुनिया का चान्दणा सू।” 6 न्यू कहके यीशु नै धरती पै थुक्या, अर उस थूक तै माट्टी का लेप बणाया, अर उस लेप ताहीं आंथे की आँखां पै लगाके। 7 उसतै बोल्या, “जा,” “शीलोह के कुण्ड म्ह” (शीलोह का मतलब भेज्या होया सै)। उसनै जाके अपणा मुँह धोया, अर जिब वो बोहड़ा तो उसनै दिक्खण लाग्या। 8 फेर भिखारी के पड़ोसी अर उन माणसां नै जिननै उस ताहीं पैहल्या भीख माँगे देख्या था, एक-दुसरे तै कहण लागे, “के यो वोए न्ही सै, जो बेठ्या भीख माँग्या करै था?” 9 कई माणस बोल्ले, “यो वोए सै,” दुसरे बोल्ले, “कोनी, पर उसके जिसा सै।” उसनै कह्या, “मै वोए सू।” 10 फेर वे उसतै बुझ्झण लागे, “तेरी आँखां की रोशनी किस तरियां आगी?” 11 उसनै जवाब दिया, “यीशु नामक एक माणस नै माट्टी का लेप बणाया, अर मेरी आँखां पै लाके मेरे ताहीं बोल्या, ‘जा, शीलोह म्ह जाके अपणा मुँह धो ले,’ बस फेर के था मै गया अर अपणा मुँह धोया अर देखण लाग्या।” 12 उननै उसतै

बुझझया, “वो माणस किक्त सै?” वो बोल्या, “मै कोनी जाण्दा।” 13 माणस उसने जो आन्धा था फरीसियाँ कै धारे ले आए। 14 जिस दिन यीशु ने माट्टी लगाके उसकी आँख खोल्ली थी, वो आराम का दिन था। 15 फेर फरीसियाँ नै भी उनतै बुझझया के उसकी आँखां की रोशनी किस ढाळ मिली। उसने उन ताहीं कह्या, “उसने मेरी आँखां पै माट्टी लाई, फेर मन्ने अपना मुँह धो लिया, अर इब देखूँ सू।” 16 इसपै कई फरीसी कहण लाग्गे, “यो माणस परमेसवर की ओड़ तै कोनी, क्यूँके वो आराम के दिन नै कोनी मान्दा।” दुसरे बोल्ले, “पापी माणस इसे अचम्भे के काम किस ढाळ दिखा सकै सै?” आखर म्ह उन म्ह फूट पड़गी। 17 उनने उस आंधे तै फेर कह्या, “जिस माणस ने तेरे ताहीं आँखां की रोशनी दी सै। तू उसके बारे म्ह के कहणा चाहवै सै?” उसने कह्या, “वो नबी सै।” 18 पर यहूदी अगुवां नै बिश्वास कोनी होया, के वो आन्धा था, अर इब वो देखवै सै, इस खात्तर उनने उसके माँ-बाप ताहीं बुलाया। 19 अर उनतै बुझझया, “के यो थारा बेटा सै, जिसके बारे मैं थम कहों सों, के वो जन्म तै आन्धा था? फेर इब वो किस तरियां देखवै सै?” 20 उसके माँ-बाप नै जवाब दिया, “हाँ, या तो जाणा सा के यो म्हारा बेटा सै, अर या भी के यो आन्धा जन्मा था, 21 पर न्यू कोनी जाणदे, के इब यो किस तरियां देखखण लाग्या, अर ना न्यू जाणदे के किसने इसकी आँखां की रोशनी दी सै। वो बाळक कोनी सै, उससे तै बुझल्यो, वो अपणे बारे म्ह खुद ए बतावैगा।” 22 ये बात उसके माँ-बाप नै ज्यातै कही क्यूँके वे यहूदी अगुवां तै डरे थे, क्यूँके यहूदी अगुवां नै एक्का कर लिया था, के जै कोए कहवै के वो मसीह सै, तो उस ताहीं आराधनालय म्ह तै लिकाड़ दिया जावैगा। 23 इससे कारण उसके माँ-बाप नै कह्या, “वो बाळक कोनी, उससे तै बुझल्यो।” 24 फेर यहूदी अगुवां नै उस माणस ताहीं जो आन्धा था, दुसरी बर बुलाके उसतै कह्या, “सच बता अर जो तू ठीक होया सै, तो तू सच बोलके परमेसवर की महिमा कर, हम जाणां सां के वो माणस पापी सै।” 25 उसने जवाब दिया, “मै नही जाण्दा, के वो पापी सै के नही, मै एक बात जाणु सू, के मै आन्धा था अर इब देखूँ सू।” 26 उनने उस ताहीं फेर दुबारे कह्या, “उसने तेरे गेल्या के करया? अर किस ढाळ तेरी आँखां की रोशनी आगी?” 27 उसने उन ताहीं कह्या, “मन्ने तो थारे ताहीं पैहले भी बता दिया, पर थम उस बात नै सुणते कोनी, इब दुसरी बर क्यातै सुणणा चाहवो सो? के थम भी उसके चेल्लें बणाणा चाहवो सो?” 28 फेर वे उसतै आच्छा-भुन्डा कहके बोल्ले, “तूए उसका चेल्ला सै, हम तो मूसा नबी के चेल्लें सां। 29 हम जाणा सां, के परमेसवर नै मूसा नबी तै बात करी, पर इस माणस नै कोनी जाणदे के कड़ै तै आया सै।” 30 उसने उन ताहीं जवाब दिया, “या तो अचम्भे की बात सै, के थम नही जाणदे के वो किक्त का सै, फेर भी उसने मेरी आँखां की रोशनी दे दी। 31 हम जाणां सां, के परमेसवर पापियाँ की कोनी सुणदा, पर जै कोए परमेसवर का भगत हो अर उसकी मर्जी पै चाल्दा हो, तो वो उसकी जरूर सुणै सै। 32 दुनिया कै शरुआत तै यो कदे सुणने म्ह कोनी आया, के किसे नै जन्म तै आन्धै

की आँखां की रोशनी दी हो। (aiōn g165) 33 जै यो माणस परमेसवर कै कान्ही तै नही होन्दा, तो किमे भी कोनी कर सकदा।” 34 उनने उस ताहीं जवाब दिया, “तू तो जमाए पापां म्ह जन्मा सै, तू हमने के सिखावै सै?” अर उनने उस ताहीं आराधनालय तै बाहरणै लिकाड़ दिया। 35 यीशु नै सुणया के उनने उस ताहीं बाहरणै लिकाड़ दिया सै, अर जिब उसतै मिल्या तो बोल्या, “के तू परमेसवर कै बेट्टै पै बिश्वास करै सै?” 36 उसने जवाब दिया, “हे जनाब, परमेसवर का बेट्टा कौण सै, के मै उसपै बिश्वास करूँ?” 37 यीशु नै उस ताहीं कह्या, “तन्ने उस ताहीं देख्या भी सै, अर जो तेरे गेल्या बात करण लाग रह्या सै, वो मै ए सू।” 38 उसने कह्या, “हे प्रभु, मै तेरे पै बिश्वास करूँ सू।” अर उस ताहीं मौध्या पड़के प्रणाम करया। 39 फेर यीशु बोल्या, “मै इस दुनिया म्ह न्याय खात्तर आया सू, ताके जो आन्धे सै, वे देखवै, अर जो देखवै सै, वे आन्धे हो जावै।” 40 जो फरीसी उसकै गेल्या थे, उनने या बात सुणके उस ताहीं कह्या, “के हम भी आन्धे सां?” 41 यीशु नै उन ताहीं कह्या, “जै थम आन्धे होन्दे तो पापी कोनी होते, पर इब जिसा के थम कहो सो, के थम देखवों सों, तो सच म्ह थारा पाप माफ नही हो सकदा।”

10 यीशु नै कह्या, “मै थारे ताहीं साच्ची-साच कहूँ सू, के जो कोए भेड्या के बाड़े म्ह दरबाजे तै नही आन्दा, बल्के बाड़ा कूदके बड़ै सै, वो चोर अर डाकू सै। 2 पर जो दरबाजे तै भीत्तर बड़ै सै वो भेड्यां का पाळी सै। 3 उस खात्तर द्वारपाल दरबाजा खोल देवै सै, अर भेड़ उसका बोल सुणै सै, अर वो अपणी उन भेड्यां नै नाम ले-लेके बुलावै सै, अर बाड़ै तै बाहरणै ले जावै सै। 4 जिब वो अपणी सारी भेड्यां नै बाहरणै काढ लेवै सै, तो उनके आगै-आगै चाल्लै सै, अर भेड़ उसके गैल-गैल हो ले सै, क्यूँके वे उसका बोल पिच्छाणै सै। 5 पर भेड़ बिगान्ने कै गेल्या कोनी चाल्लै, पर उसतै भाज्जैगी, क्यूँके वे बिगान्ने का बोल कोनी पिच्छाणदी।” 6 यीशु नै उन ताहीं यो उदाहरण देके कह्या, पर वे कोनी समझे के वो उनतै के समझणा चाहवै। 7 फेर यीशु नै उन ताहीं दुबारे कह्या, “मै थारैताहीं साच्ची-साच कहूँ सू, भेड्यां का दरबाजा मै सू। 8 जितने मेरे तै पैहल्या आए वे सारे चोर अर डाकू सै, पर मेरी भेड्यां नै उनकी एक नही सुणी। 9 दरबाजा मै सू, जै कोए मेरे जरिये भीत्तर बड़ै सै, तो वो उद्धार पावैगा, अर भीत्तर बाहर आण-जाण लाग ज्यागा अर खाण खात्तर खाणा पावैगा।” 10 चोर किसे और काम खात्तर कोनी पर सिर्फ चोरी करण अर घात करण अर नुकसान करण नै आवै सै, मै ज्यातै आया के वे जिन्दगी पावे अर भोत-ए घणी पावे। 11 आच्छा पाळी मै सू, आच्छा पाळी भेड्यां कै खात्तर अपणी मर्जी तै जान देवै सै। 12 मजदूर जो ना पाळी सै अर ना भेड्यां का माल्लिक सै, भेडिये नै आन्दे देखके भेड्यां नै छोड़के भाज जावै सै, अर भेडिया उनने पकड़ै सै, अर उनपै हमला करै देवै सै। 13 वो ज्यातै भाज जावै सै क्यूँके वो मजदूर सै, उसने भेड्यां की फिक्क कोनी। 14 “कामल चरवाहा मै सू, मै अपणी भेड्यां नै जाणु सू, अर मेरी भेड़ मन्ने जाणै सै। 15 जिस ढाळ पिता मन्ने जाणै सै, अर मै पिता नै जाणु सू, अर मै अपणी भेड्यां खात्तर अपणी जान दिवूँ

सू। 16 मेरी और भी भेड़ सै, जो इस बाड़े की कोनी। मन्ने उन ताहीं भी ल्याणा जरूरी सै। वे मेरा बोल पिच्छाणैगी, फेर एकैए रेवड़ अर एकैए पाळी होगा। 17 पिता ज्यांतै मेरै तै प्यार करै सै, क्यूँकै मै अपणी जान अपणी मर्जी तै दियुँ सू, के उसनै दुबारे ले लूँ। 18 कोए मेरी जान मेरै तै खोसदा कोनी, बल्के मै उसनै खुदे उसनै अपणी मर्जी तै दियुँ सू। मन्ने उसके देण का भी हक सै, अर उस ताहीं दुबारा लेण का भी हक सै, यो हुकम मेरै पिता नै मेरै ताहीं दिया सै।” 19 इन बाततां कै कारण यहूदियाँ म्ह दुबारे फूट पड़ी। 20 उन म्ह तै घणखरे माणस कहण लागगे, “उस म्ह ओपरी आत्मा सै, अर वो बावळा सै, उसकी क्यांतै सुणो सो?” 21 दुसरे माणसां नै कह्या, “ये वचन इसे माणस की न्ही हो सकदे, जिसम्ह ओपरी आत्मा हो। के ओपरी आत्मा आन्ध्यां नै आँखां की रोशनी दे सके सै?” 22 यरुशलम नगर म्ह स्थापन का त्यौहार मनाया जाण्या था, अर जाड्यां का मौसम था। 23 यीशु मन्दर म्ह सुलैमान कै बराम्दा म्ह हान्डण लागरया था। 24 फेर यहूदियाँ नै उस ताहीं आ घेरया अर बुझया, “तू म्हारे मन नै कद ताहीं दुबिध्या म्ह गेरे राक्खैगा? जै तू मसीह सै, तो म्हारे तै साफ-साफ बता दे।” 25 यीशु नै उन ताहीं जवाब दिया, “मन्ने थारैतै कह दिया पर थम बिश्वास करदेए कोनी। जो काम मै अपणे पिता कै नाम तै करूँ सू, वैए मेरे गवाह सै, 26 पर थम ज्यांतै बिश्वास कोनी करदे क्यूँकै थम मेरी भेड्यां म्ह तै कोनी सो। 27 मेरी भेड़ मेरा बोल पिच्छाणै सै, मै उननै जाणु सू, अर वे मेरै पाच्छै-पाच्छै चाल्लै सै 28 अर मै उन ताहीं अनन्त जीवन दियुँ सू। वे कदे नाश कोनी होवैगीं, अर कोए उननै मेरै हाथ तै खोस न्ही सकदा। (aiōn g165, aiōnios g166) 29 मेरा पिता, जिसनै उन ताहीं मेरै तै दिया सै, सारया तै बड़ड़ा सै, अर कोए उननै पिता कै हाथ्यां तै खोस कोनी सकदा। 30 मै अर पिता एक सां।” 31 यहूदियाँ नै यीशु पै मारण खात्तर दुबारा पत्थर ठा लिये। 32 इसपै यीशु नै उन ताहीं कह्या, “मन्ने थारे तै अपणे पिता की ओड़ तै घणे भले काम दिखाए सै, उन म्ह तै कौण सै काम खात्तर थम मेरै पै पत्थर मारणा चाहो सो?” 33 यहूदियाँ नै उस ताहीं जवाब दिया, “भले काम खात्तर हम तेरे पै पत्थर कोनी मारदे, पर परमेसवर की बुराई करण कै कारण, अर ज्यांतै के तू माणस होकै खुद नै परमेसवर कहवै सै।” 34 यीशु नै उन ताहीं जवाब दिया, “के थारे मूसा नबी के नियम-कायदा म्ह कोनी लिख्या सै, ‘मन्ने कह्या, थम ईश्वर सो?’ 35 जै उसनै उन ताहीं ईश्वर कह्या, जिनकै धोरे परमेसवर का वचन पोंहच्या (अर पवित्र ग्रन्थ की बात झूठ न्ही हो सकदी), 36 तो जिस ताहीं पिता नै पवित्र ठहराकै दुनिया म्ह भेज्या सै, थम मेरे ताहीं कहो सो, ‘तू बुराई करै सै, ज्यांतै के मन्ने यो कह्या,’ ‘मै परमेसवर का बेट्टा सू?’ 37 जै मै अपणे पिता के काम कोनी करदा, तो मेरा बिश्वास ना करो। 38 पर जै मै करूँ सू, तो चाहे मेरा बिश्वास ना भी करो, पर उन काम्मां का तो बिश्वास करो, ताके थम जाणो अर समझो के पिता मेरै म्ह सै अर मै पिता म्ह सू।” 39 फेर यहूदियाँ नै दुबारे उस ताहीं पकड़ण की कोशिश करी पर वो उनके हाथ्यां तै लिंकड़ गया। 40 यीशु दुबारे यरदन नदी कै परली ओड़ै उस

जगहां पै चल्या गया, जडै यूहन्ना पैहल्या बपतिस्मा दिया करै था, अर वो ओड़ैए रहया। 41 घणखरे माणस उसके धोरे आके कहवै थे, “यूहन्ना नै तो कोए चमत्कार कोनी दिखाया, पर जो किमे यूहन्ना नै इसके बारे म्ह कह्या था, वो सारा कुछ साच्ची था।” 42 अर ओड़ै भोत-से माणसां नै यीशु पै बिश्वास करया।

11 लाजर नामका एक माणस बीमार था, जो बैतनिय्याह गाम का था, अर उसकी दो भाण थी मरियम अर मार्था। 2 या वाए मरियम थी जिसनै बाद म्ह प्रभु पै खसबूदार तेल गेर कै उसके पायां ताहीं बाळां तै पुन्जयां था, लाजर इस्से का भाई था जो बीमार था। 3 इस करकै उसकी भाणां नै यीशु ताहीं कुहवां भेज्या, “हे प्रभु, लखा, जिसतै तू प्यार करै सै, वो बीमार सै।” 4 न्यू सुणके यीशु न्यू बोल्या, “या बीमारी मरण का कारण कोनी, पर परमेसवर की महिमा खात्तर सै, ताके उसके जरिये परमेसवर कै बेट्टे की महिमा होवै।” 5 मार्था उसकी बेब्बे अर लाजर तै यीशु प्यार करै था। 6 पर जिन उसनै सुणया के लाजर बीमार सै, तो जिस जगहां पै वो था, ओड़ै दो दिन और रुक गया। 7 दो दिन बाद फेर उसनै चेल्यां ताहीं कह्या, “आओ, हम फेर यहूदिया परदेस म्ह चाल्लां।” 8 चेल्यां नै उस ताहीं कह्या, “हे गुरु, कुछ दिन पैहल्या तो यहूदी तेरे पै पत्थर बरसा कै तन्नै मारणा चाहवै थे, अर के तू फेर भी उड़ैए जाणा चाहवै सै?” 9 यीशु नै जवाब दिया, “के दिन के बारहा घन्टे कोनी होन्दे? जै कोए दिन म्ह चाल्लै तो ठोक्कर कोनी खान्दा, क्यूँके वे इस दुनिया के उजाळै नै देखवै सै। 10 पर जै कोए रात म्ह चाल्लै तो ठोक्कर खावै सै, क्यूँके उस म्ह उजाळा कोनी।” 11 उसनै ये बात कही, अर इसके बाद उन ताहीं कहण लाग्या, “के म्हारा साथी लाजर सो गया सै, पर मै उसनै जगाण जाऊँ सू।” 12 फेर चेल्यां नै उस ताहीं कह्या, “हे प्रभु, जै वो सो गया सै तो वो ठीक हो ज्यागा।” 13 यीशु नै तो उसकी मौत के बाबत कह्या था, पर उननै सोच्या के उसनै नींद तै सोण कै बाबत कह्या सै। 14 फेर यीशु नै उन ताहीं साफ-साफ कह दिया, “लाजर मर लिया सै, 15 यो थारे ए हित म्ह सै, के मै उड़ै कोनी था, क्यूँके इब थम मेरे पै बिश्वास कर सकोगे, आओ, हम उसके धोरे चाल्लां।” 16 फेर थोमा नै जो दिदुमुस कुहवावै सै, अपणे गेल्या के चेल्यां ताहीं कह्या, “आओ, हम भी प्रभु कै गेल्या मरण नै चाल्लां।” 17 बैतनिय्याह गाम पोहचे पाच्छै यीशु नै न्यू बेरया पाट्या के लाजर नै कन्न म्ह धरे चार दिन हो लिए सै। 18 बैतनिय्याह गाम यरुशलम कै धोरे कोए दो कोस की दूरी पै था, 19 घणखरे यहूदी माणस मार्था अर मरियम कै धोरे उसके भाई की मौत कै बाबत दीलास्सा देण नै आरे थे। 20 जिन मार्था नै यीशु कै आण की खबर सुणी, तो मार्था उसतै मिलण खात्तर गई, पर मरियम घरा ए बेठी रही। 21 मार्था नै यीशु ताहीं कह्या, “हे प्रभु, जै तू आड़े होंदा, तो मेरा भाई कदे न्ही मरदा। 22 अर इब भी मन्ने बेरा सै, जो कुछ तू परमेसवर तै माँगगा, परमेसवर तन्नै देवैगा।” 23 यीशु नै उस ताहीं कह्या, “तेरा भाई जी ज्यागा।” 24 मार्था नै उस ताहीं कह्या, “मन्ने बेरा सै, के आखर के दिन म्ह पुनरुत्थान के बखत वो जी

ज्यागा।” 25 यीशु ने मार्था तै कहा, “पुनरुत्थान अर जीवन मै ए सू, जो कोए मेरे पै बिश्वास करैगा, वो जै मर भी जावै फेर भी जिवैगा, 26 अर जो कोए जीवै सै, अर वो मेरे पै बिश्वास करै सै, वो अनन्त काल ताहीं कोनी मरैगा। के तू इस बात पै बिश्वास करै सै।” (aiōn g165) 27 मार्था नै यीशु तै कहा, “हाँ, हे प्रभु, मै बिश्वास करूँ सू, के परमेसवर का बेट्टा मसीह जो दुनिया म्ह आण आळा था, वो तूए सै।” 28 न्यू कहकै मार्था चली गयी, अर अपणी बेब्बे मरियम ताहीं एक्ले म्ह बुलाकै चुपके तै कहा, “गुरु याडैए सै अर तन्ने बुलावै सै।” 29 न्यू सुण तिए मरियम जिब्बे उठकै उसकै धोरै आई। 30 यीशु इब्बे गाम तै बाहरे था, पर उस्से जगहां था जडै मार्था उसतै मिली थी। 31 फेर जो यहूदी माणस उसकै गेल्या घर म्ह थे अर उस ताहीं दीलास्सा देवै थे, न्यू देखकै के मरियम जिब्बे उठकै बारणै चली गयी सै, न्यू समझे के वा कन्न पै रोण नै जावै सै, तो उसकै पाच्छे हो लिये। 32 जिब मरियम उडै गई जडै यीशु था, तो उसनै देखदे उसकै पायां म्ह पडकै कहा, “हे प्रभु, जै तू आडै होन्दा फेर मेरा भाई कोनी मरदा।” 33 जिब यीशु नै जो यहूदी माणस उसकै गेल्या आये थे, रोन्दे होए देख्या, तो आत्मा म्ह घणाए दुखी अर उदास होग्या, 34 अर कहा, “थमनै उसकी लाश कित्त धर राक्खी सै?” उननै उस ताहीं कहा, “हे प्रभु, चालकै देख ले।” 35 यीशु रोण लाग्या। 36 फेर यहूदी माणस कहण लाग्गे, “लखआओ, वो लाजर तै कितना प्यार करै था।” 37 पर उन म्ह तै कईयाँ नै कहा, “के यो जिसनै आंध्याँ ताहीं रोशनी दे दी, के यो लाजर ताहीं मरण तै न्ही बचा सकै था?” 38 यीशु मन म्हए फेर घणाए दुखी होकै कन्न पै आया। वा एक गुफा थी अर एक पत्थर उसपै धरया था। 39 यीशु नै कहा, “पत्थर हटादो।” लाजर की बेब्बे मार्था उसतै कहण लाग्गी, “हे प्रभु, उस म्ह तै इब तो बदबू आवै सै, क्यूँके उसनै मरे चार दिन हो लिए सै।” 40 यीशु नै उन ताहीं कहा, “के मन्नै तेरे तै कोनी कहा था के जै तू बिश्वास करैगी, तो परमेसवर की महिमा नै देक्खैगी।” 41 फेर उननै पत्थर ताहीं हटायो। यीशु नै सुर्ग कान्ही निगाह ठाकै कहा, “हे पिता, मै तेरा धन्यवाद करूँ सू, के तन्ने मेरी सुण ली सै। 42 अर मन्नै बेरा था के तू सारी हाण मेरी सुणै सै, पर जो भीड़ आसै-पासै खड़ी सै, उनकै बाबत मन्नै कहा, ताके वे बिश्वास करै, के तन्ने मेरेताहीं भेज्या सै।” 43 न्यू कहकै ठाडू आवाज म्ह रुक्का मारया, “हे लाजर, लिकड़ आ।” 44 जो मर लिया था उसके हाथ पैर पट्टियाँ तै बंधे हुए थे, अर उसकै मुँह पै अंगोच्छा लिपटरया था। यीशु नै उन ताहीं कहा, “उसनै खोलदो अर जाण द्यो।” 45 फेर जो यहूदी मरियम धोरै मिलण आरे थे, अर उसका यो चमत्कार देख्या था, उन म्ह तै घणखरयाँ नै उसपै बिश्वास करया। 46 पर उन म्ह तै कईयाँ नै फरीसियाँ धोरै जाके यीशु के काम्मां की खबर दी। 47 ज्यांतै प्रधान याजकां अर फरीसियाँ नै यहूदी अगुवां की सभा करी, अर कहा, “हमनै के करणा चाहिये? यो माणस तो घणे चमत्कार दिखावै सै। 48 जै हम उसनै न्यूए करण द्या, तो फेर सारे उसपै बिश्वास करैगें, अर रोमी सैनिक आकै म्हारे देश अर मन्दर दोनुवां पै कब्जा कर लैवेंगें।” 49 फेर उन म्ह

तै काइफा नामका एक माणस नै जो उस साल का महायाजक था, उन ताहीं कहा, “थम किमे न्ही जाणदे! 50 अर ना ए थमनै इस बात की समझ सै, के इस्से म्ह थारा फायदा सै, के बजाये इसके के सारे माणस ए नाश हो जावै, सब खात्तर एक आदमी नै मरणा होगा।” 51 पर या बात उसनै अपणी ओड़ तै कोन्या कही, पर उस साल का महायाजक होण के नाते या भविष्यवाणी करी, के यीशु उस जात खात्तर मरैगा। 52 अर ना सिर्फ यहूदी जात खात्तर बल्के ज्यांतै के परमेसवर की खिंड-मिंड ऊलादां नै एक करदे। 53 इस तरियां उस्से दिन तै यहूदी अगुवें उस ताहीं मारण खात्तर साजिस रचाण लाग्गे। 54 ज्यांतै यीशु उस बखत तै यहूदी लोग्गां म्ह घाट दिक्खण लाग्ग्या, अर यरुशलेम नगर नै छोड़कै वो जंगल-बियाबान कै धोरै इफ्राईम नामक एक नगर कान्ही चल्या गया, अर अपणे चेल्यां गैल उडैए रहण लाग्या। 55 यहूदियाँ का फसह का त्यौहार लोवै था, अर घणेए माणस फसह तै पैहल्या अपणे गाम्मां म्ह तै यरुशलेम नगर म्ह गए, के खुद नै पवित्र करै। 56 वे यीशु नै टोह लाग्गे अर मन्दर म्ह खडै होके आप्स म्ह बतलाण लाग्गे, “थम के सोच्यो सो? के वो त्यौहार म्ह कोनी आवैगा?” 57 अर प्रधान याजकां अर फरीसियाँ नै हुकम दे राख्या था, के जै कोए न्यू जाणै सै, के यीशु कित्त सै तो बतावै, ताके वे उसनै पकड़ ले।

12 फेर यीशु फसह का त्यौहार तै छः दिन पैहल्या बैतनिय्याह गाम म्ह आया जित्त लाजर था, जिस ताहीं यीशु नै मरया होड़ म्ह तै जिन्दा करया था। 2 उडै उननै यीशु के खात्तर भोज तैयार करया, अर मार्था सेवा करण लागरी थी, अर लाजर भी उन म्ह तै एक था जो उसकै गेल्या खाणा खाण बेठ्ठे थे। 3 फेर मरियम नै जटामांसी फूल का आध्था सेर घणा महँगा खसबूदार तेल लैकै यीशु के पायां पै गेरया, अर अपणे बाळां तै उसके पैर पुन्झै, अर खसबूदार तेल की खसबू तै घर खसबूदार होग्या। 4 पर उसके चेल्यां म्ह तै यहूदा इस्क्रियोती नामका एक चेल्ला जो उस ताहीं पकड़वाणा चाहवै था, कहण लाग्या, 5 “यो महँगा खसबूदार तेल तीन सौ दीनार (तीन सौ दिन की मजदूरी) म्ह बेचकै कंगालां ताहीं क्यातै कोनी दिया गया?” 6 उसनै या बात ज्यातै कोनी कही के उसनै कंगालां की फिक्र थी बल्के ज्यांतै के वो चोर था, अर उसके धोरै पिय्या की थैल्ली रह्या करै थी अर उस म्ह जो कुछ गेरया जान्दा, वो काढ लैवै था। 7 यीशु नै कहा, “उस ताहीं यो करण द्यो, यो मेरे गाड्डे जाण की तैयारी कै खात्तर सै। 8 क्यूँके कंगाल तो थारे गेल्या सारी हाण रहवेंगे, पर मै थारे गेल्या सारी हाण कोनी रहूँगा।” 9 फसह का त्यौहार म्ह आई यहूदियाँ की एक बडीए भीड़ नै जिब बेरा लाग्ग्या के वो बैतनिय्याह गाम म्ह सै, तो वे ना सिर्फ यीशु कै बाबत आये पर ज्यांतै भी के लाजर नै देखवै, जिस ताहीं यीशु मसीह नै मरया होड़ म्ह तै जिन्दा करया था। 10 फेर प्रधान याजकां नै लाजर ताहीं भी मारण की सलाह करी। 11 क्यूँके उसके बाबत घणखरे यहूदी चले गये अर यीशु पै बिश्वास करया। 12 दुसरे दिन घणखरे माणसां नै जो फसह के त्यौहार

म्ह आरे थे न्यू सुणया, के यीशु यरुशलेम नगर म्ह आरया सै। 13 ज्यांतै उननै खजूर की डाळी ली, अर उसतै फेट्टण नै लिकड़े, अर रुक्के मारण लाग्गे, “होशाना! (मलतल जै-जै कार हो) धन्य इस्राएल का राजा, जो प्रभु के नाम तै आवै सै।” 14 जिव यीशु यरुशलेम नगर के धारे आया, तो उसनै एक गधे का बच्चा मिल्या, फेर वो उसपै बैठग्या, 15 जिसा पवित्र शास्त्र म्ह लिख्या सै, “हे सिम्योन की बेट्टी, मतना डरै, लखा, तेरा राजा गधी के बच्चे पै चढ़ा होइ चाल्या आवै सै।” 16 यीशु के चेल्लें ये बात पैहल्या कोनी समझे थे, पर जिव यीशु की महिमा दिक्खी फेर उनकै याद आया के ये बात उसकै बाबत लिक्खी होइ थी, अर माणसां नै उसके गेल्या न्यूपे बरताव करया था। 17 फेर उसके गेल जो भीड़ थी उननै या गवाही दी, जो उस बखत उसके गेल्या थे, जिव उसनै लाजर ताहीं कन्न म्ह तै बुलाके मरया होया म्ह तै जिन्दा करया था। 18 ज्यांतै माणस यीशु तै फेट्टण नै आरे थे क्यँके उननै सुणया था के उसनै यो अचम्भे का काम करया था। 19 फेर फरीसियाँ नै आप्पस म्ह कह्या, “सोचके तो देख्खो, के थारे तै कुछ भी कोनी बणदा। लखाओ, दुनिया उसके गेल हो ली सै।” 20 जो माणस उस फसह के त्यौहार म्ह भगति करण नै आये थे उन म्ह तै कुछ यूनानी थे। 21 उननै गलील परदेस के बैतसैदा नगर के बासिन्दे फिलिप्पुस के धारे आके उसतै बिनती करी, “श्रीमान, हम यीशु तै फेट्टणा चाहवां सां।” 22 फिलिप्पुस नै आके अन्द्रियास तै कह्या, फेर अन्द्रियास अर फिलिप्पुस नै जाके यीशु ताहीं कह्या। 23 इसपै यीशु नै उन ताहीं कह्या, “वो बखत आ ग्या सै के मुझ माणस के बेट्टे की महिमा हो। 24 मै थारे तै साच्ची-साच कहुँ सूँ, के जिव ताहीं गहुँ का दाणा धरती म्ह पड़के मर न्ही जान्दा, वो एक्ला रहवै सै, पर जिव मर जावै सै, तो वो अनगणित दाणया नै जन्म देवै सै। 25 जो अपणे जीवन नै प्यारा जाणै सै, वो उसनै खो देवै सै, अर जो इस दुनिया म्ह अपणे जीवन नै प्यारा कोनी जाण्दा, वो अनन्त जीवन के खात्तर उसकी रुखाळी करैगा। (aiōnios g166) 26 जै कोए मेरी सेवा करै, तो वो मेरा चेल्ला बण जावै, अर जिव जड़ै मै सूँ, उडै मेरा सेवक भी होवैगा। जै कोए मेरी सेवा करै, तो पिता उसका आदर करैगा। 27 “इब मेरा जी भोत दुखी सै। ज्यांतै इब मै के कहुँ? ‘हे पिता, मन्ने इस दुख की घड़ी तै बचा?’ पर मै इस्से खात्तर इस दुनिया म्ह आया सूँ, ताके मै दुख सहू। 28 हे पिता अपणे नाम की महिमा करा।” फेर या अकास वाणी होई, “मन्ने इसकी महिमा करी सै, अर फेर भी करैगा।” 29 फेर जो माणस खड़े होए सुणरे थे, उननै कह्या के बाहळ गरजा। दुसरयां नै कह्या, “कोए सुरादूत उसतै बोल्या।” 30 इसपै यीशु नै कह्या, “या आवाज मेरै खात्तर न्ही, पर थारे खात्तर आई सै। 31 इब इस दुनिया का न्याय होवै सै, इब इस दुनिया का अधिकारी काढ्या जावैगा। 32 अर मै जै धरती पै तै ऊँच्चे पै चढ़या जाऊँगा, तो सारया नै अपणे कान्ही खिच्चुगाँ।” 33 न्यू कहके उसने यो बता दिया के वो किस ढाळ की मौत तै मरैगा। 34 इसपै माणसां नै यीशु ताहीं कह्या, “हमनै मूसा नबी के नियम-कायदा की या बात सुणी सै के मसीह सदा जिन्दा

रहवैगा, फेर तू क्यातै कहवै सै के माणस का बेट्टा ऊँच्चे पै चढ़या जाणा जरूरी सै? यो माणस का बेट्टा कौण सै?” (aiōn g165) 35 यीशु नै उन ताहीं कह्या, “चाँदणा (यीशु नै अपणे-आप तै कह्या सै) इब थोड़ी देर ताहीं थारे बिचाळै सै। जिव ताहीं चाँदणा थारे गेल्या सै जद ताहीं चाल्दे रहो, इसा ना हो के अँधेरा थारे ताहीं घेर लेवै, जो अँधेरे म्ह चाल्ले सै वो कोनी जाण्दा के कड़े जावै सै। 36 जिव ताहीं चाँदणा थारे गेल्या सै, चाँदणे पै बिश्वास राक्खो ताके थम चाँदणे की ऊलाद बणो।” ये बात कहके यीशु चल्या गया अर उनतै दूर रह्या। 37 यीशु मसीह नै उनके स्याम्ही इतने चमत्कार दिखाए, फेर भी उननै उसपै बिश्वास कोनी करया, 38 ताके यशायाह नबी का वचन पूरा हो जो उसनै कह्या “हे प्रभु, म्हारै संदेश का किसनै बिश्वास करया सै? अर प्रभु की शक्ति किसपै जाहिर होई सै?” 39 इस बाबत वे बिश्वास कोनी कर सके, क्यँके यशायाह नै न्यू भी कह्या सै: 40 “उसनै उनकी आँख आँधी, अर उनके मन कठोर कर दिए सै, कदे इसा ना हो के वे आँखां तै देखवै, अर मन तै समझे, अर पलटै, अर मै उननै ठीक करँ।” 41 यशायाह नै ये बात ज्यांतै कही, के उसनै यीशु मसीह की महिमा देख्खी, अर उसनै उसके बारे म्ह बताया। 42 फेरभी यहूदी सरदारों म्ह तै घणाए नै उसपै बिश्वास करया, पर फरीसियाँ के कारण खुलके कोनी मान्ने थे, क्यँके उननै डर था कदे वे आराधनालय म्ह तै लिकाड़े ना जावै 43 क्यँके माणसां की ओड़ तै करी जाण आळी बड़ाई उननै परमेसवर की ओड़ तै बड़ाई की बराबरी म्ह घणी प्यारी लाग्गे थी। 44 यीशु नै रुक्का मारके कह्या, “जो मेरे पै बिश्वास करै सै, वो मेरे पै न्ही बल्के मेरै खन्दानआळे पै बिश्वास करै सै। 45 अर जो मन्ने देखवै सै, वो मेरे खन्दानआळे नै देखवै सै। 46 मै दुनिया म्ह चाँदणा बणके आया सूँ, ताके जो कोए मेरे पै बिश्वास करै वो अँधेरे म्ह कोनी रहवै।” 47 “जै कोए मेरे वचन सुणके भी उननै न्ही मानता, तोभी मै उसनै कसूरवार कोनी ठहरान्दा, क्यँके मै दुनिया के माणसां ताहीं कसूरवार ठहराण खात्तर कोनी, पर दुनिया के माणसां का उद्धार करण खात्तर आया सूँ। 48 जो कोए मन्ने नकारै सै, अर मेरे सुसमाचार नै कोनी अपणावै, उस ताहीं कसूरवार ठहराण आळा तो एके सै, यानिके जो वचन मन्ने कह्या सै, वोए पाच्छले दिन म्ह उस ताहीं कसूरवार ठहरावैगा। 49 क्यँके मै अपनी ओर तै बात न्ही कहन्दा, पर पिता जिसनै मेरै ताहीं भेज्या सै, उसनै मेरै ताहीं हुकम दिया सै के, के मै कहुँ अर किस तरियां बोल्हूँ? 50 अर मन्ने बेरा सै के उसका हुकम अनन्त जीवन देवै सै। ज्यांतै मै जो कुछ कहुँ सूँ, ठीक उसापै कहुँ सूँ, जिसा पिता नै मेरै ताहीं कहण का हुकम दिया सै।” (aiōnios g166)

13 फसह के त्यौहार तै पैहल्या, जिव यीशु नै बेरा लागग्या, के मेरा वो बखत आ लिया सै, के दुनिया छोड़के पिता के धारे उल्टा जाऊँ, तो अपणे मानण आळा तै, जो दुनिया म्ह थे, जिसा प्यार वो करया करदा, आखर ताहीं उसापै प्यार करदा रह्या। 2 यीशु अर उसके चेल्लें साँझ नै खाणा खाण लागरे थे। शमोन के बेट्टे यहूदा इस्करियोती

के मन मह शैतान नै यो विचार घाल दिया था, के वो यीशु के गेल्या धोक्खा करे। 3 यीशु यो जाणै था, के पिता नै सब कुछ उसके हाथ मह सौप दिया सै, अर यो भी के वो परमेसवर की ओड़ तै आया सै, परमेसवर के धोरै ए उल्टा जाण लागरया सै। 4 इस खातर वो खाणा छोड़के खड्या होग्या, उसनै अपणे उप्परले लत्ते उतार दिये, अंगोच्छा लेके अपणी कमर मह बाँध लिया। 5 फेर बास्सन मह पाणी भरके चेल्यां के पैर धोये, अर जो अंगोच्छा कमर पै बाँध राख्या था, उससे तै पूंझण लागग्या। 6 जिव वो शमौन पतरस के धोरै आया, फेर पतरस नै उस ताहीं कह्या, “हे प्रभु, के तू मेरे पैर धोवैगा?” 7 यीशु नै उस ताहीं जवाब दिया, “जो मे करूँ सूँ, तू उसका मतलब इब्बे न्ही समझ पावैगा, पर इसके बाद समझैगा।” 8 पतरस नै उस ताहीं कह्या, “मै अपणे पैर तेरे ताहीं कदे न्ही धोण दियुँगा।” न्यू सुणके यीशु नै उस ताहीं कह्या, “जै मै तेरे पैर ना धोऊँ, तो तू मेरा चेल्ला न्ही कुहावैगा।” (aiōn g165) 9 शमौन पतरस नै उस ताहीं कह्या, “हे प्रभु, फेर मेरे पैर ए न्ही बल्के मेरे हाथ अर सिर भी धोदे।” 10 यीशु नै उस ताहीं कह्या, “जो माणस न्हा लिया हो उस ताहीं पैर के सिवाय और कुछ धोण की जरूरत कोनी, पर वो पूरी तरियां साफ हो चुका सै, थम सारे साफ सो, पर एक नै छोड़ के।” 11 यीशु तो अपणे पकड़वाण आळे नै जाणै था, ज्यातै उसनै कह्या, “थम सारे साफ सो, पर एक नै छोड़ के।” 12 जिव यीशु नै पैर धो लिये, अर अपणे लत्ते दुबारा पहरके फेर बैठग्या, तो उन ताहीं कहण लागग्या, “के थम समझे के मन्ने थारे गेल्या के करया?” 13 थम मन्ने गुरु अर प्रभु कहो सो, अर सही कहो सो, क्यूँके मै वोए सूँ। 14 जिव मन्ने गुरु अर प्रभु होके थारे पैर धोए, तो थमनै भी मेरी तरियां एक-दुसरे के पैर धोणे चाहिये। 15 क्यूँके मन्ने थारे ताहीं नमूना दिखाया सै, के जिसा मन्ने थारे गेल्या करया सै, थम भी उसाए करया करो। 16 मै थारे तै साच्ची-साच कहुँ सूँ, नौक्कर अपणे माल्लिक तै बड़ड़ा कोनी, अर ना प्रेरित अपणे भेजण आळे तै। 17 इब थम ये बात जाणगे सों, जै उनपै चाल्लों तो थम सुखी रहोगे। 18 मै थम सारया के बारें मह कोनी कहन्दा, मै उननै जाणु सूँ, जिनताहीं मन्ने छॉट लिया सै, (अर यो भी के यहूदा बिश्वासघाती सै) क्यूँके मन्ने उस ताहीं इस खात्तर छाट्या सै, ताके पवित्र ग्रन्थ का यो वचन पूरा हो, “जो मेरी रोटी खावे सै, उसनै मेरे पै लात ठाई।” 19 “थे सब कुछ मन्ने थारे ताहीं पैहले ए बता दिया था, के जब न्यू हो जावै तो थम बिश्वास करियो के मै वोए सूँ। 20 मै थारे ताहीं साच्ची-साच कहुँ सूँ, के जो मेरे भेज्जे होया नै अपणावै सै, वो मन्ने अपणावै सै, अर जो मन्ने अपणावै सै, वो मेरे भेजण आळे नै अपणावै सै।” 21 ये बात कहके यीशु आत्मा मह दुखी होया अर या गवाही दी, “मै थारे ताहीं साच्ची-साच कहुँ सूँ, के थारे मह तै एक मन्ने धोक्खा देके पकड़वावैगा।” 22 चेल्लें यो शक करते होए के वो किसकै बाबत कहवै सै, एक-दुसरे के कान्ही लखाण लागगे। 23 उसके चेल्यां मह तै यूहन्ना जिस ताहीं यीशु प्यार राखे था, यीशु के धोरै बेठ्या था। 24 शमौन पतरस नै यूहन्ना कान्ही इशारा करके उस ताहीं बुझ्या, “बता तो, वो किसकै बाबत कहवै

सै?” 25 फेर उसनै उससे ढाळ यीशु की छाती के कान्ही झुकके उस ताहीं बुझ्या, “हे प्रभु, वो कौण सै?” 26 यीशु नै जवाब दिया, “जिस ताहीं मै यो रोटी का टुकड़ा डुबोके घुगां वोए सै।” अर उसनै टुकड़ा डुबोके शमौन के बेटे यहूदा इस्करियोती ताहीं दिया। 27 टुकड़ा खान्दे शैतान यहूदा इस्करियोती मह बड़ग्या। फेर यीशु नै उस ताहीं कह्या, “जो तू करे सै, तोळा कर।” 28 भोज पै बैठण आळे चेल्यां मह तै किसै नै भी यो कोनी बेरा लागण पाया के उसनै या बात उसतै किस मतलब तै कही। 29 कईयों नै सोच्या के रपियां की थेल्ली यहूदा के धोरै रहवै सै, ज्यातै यीशु उस ताहीं कहवै सै के त्योंहार के खात्तर जरूरी समान मोल ले आओ या गरीबां नै कुछ देवे, इस खात्तर यहूदा नै रोटी का टुकड़ा लिया। 30 आखर मह वो टुकड़ा खाके जिब्बे बाहरणै लिकड़ग्या, अर रात का बखत था। 31 जिव यहूदा बाहरणै लिकड़ग्या तो यीशु नै कह्या, “इब मुझ माणस के बेटे की महिमा होई सै, अर परमेसवर की महिमा मेरे मह होई सै, 32 परमेसवर भी अपणे बेटे की महिमा करैगा, अर वो जिब्बे करैगा।” 33 हे बाळकों, मै थोड़ी सी वार और थारे धोरै सूँ, फेर थम मन्ने टोहओगे, अर जिसा मन्ने यहूदियाँ ताहीं कह्या, “जड़ै मै जाऊँ सूँ, उड़ै थम कोनी आ सकदे, न्यू इब मै थारे ताहीं भी कहुँ सूँ।” 34 “मै थमनै नया हुकम घु सूँ, के एक-दुसरे तै प्यार करो, जिसा मन्ने थारैतै प्यार करया सै, उससे तरियां थम भी एक-दुसरे तै प्यार करो। 35 जै आप्पस मह प्यार राखोगे, तो इसतै सारया नै बेरा पाट्टैगा के थम मेरे चेल्लें सो।” 36 शमौन पतरस नै उस ताहीं कह्या, “हे प्रभु, तू कित्त जा सै?” यीशु नै जवाब दिया, “जड़ै मै जाऊँ सूँ, उड़ै तू इब्बे मेरे पाच्छे न्ही आ सकदा, पर इसके बाद मेरे गेल्या आवैगा।” 37 पतरस नै उसतै कह्या, “हे प्रभु, इब्बे मै तेरे पाच्छे क्यातै न्ही आ सकदा? मै तो तेरी खात्तर अपणी जान भी देण नै तैयार सूँ।” 38 यीशु नै जवाब दिया, “के तू मेरी खात्तर अपणी जान दे देवैगा? मै तेरे तै सच कहुँ सूँ, के मुर्ग के बाँग देण तै पैहल्या तू तीन बार मेरे बारें मह मुकरैगा।

14 “अपणे मन नै दुखी ना होण दो, थम परमेसवर पै बिश्वास राखो सो, अर मेरे पै भी बिश्वास राखो। 2 मेरे पिता के घर मह घणीए रहण की जगहां सै, जै न्ही होंदी तो मै थारे ताहीं कह देंदा, क्यूँके मै थारे खात्तर जगहां त्यार करण नै जाऊँ सूँ। 3 अर जै मै जाके थारे खात्तर जगहां त्यार करूँ, तो फेर दुबारे आके थमनै अपणे उरै ले जाऊँगा के जड़ै मै रहुँ उड़ै थम भी रहो। 4 अर जित्त मह जाऊँ सूँ, थम ओड़ै की राह जाणो सों।” 5 थोमा नै उसतै सवाल करया, “हे प्रभु, हमनै तेरे ठिकाणै का ए कोनी बेरा तो उसका राह किस तरियां जाण सका सां?” 6 यीशु नै उस ताहीं जवाब दिया, “मै ए वो राह अर सच अर अनन्त जीवन सूँ, बिना मेरे जरिये कोए पिता धोरै कोनी पोहच सकदा। 7 जै थम सच मह ए मन्ने जाणदे होन्दे, तो मेरे पिता नै भी जाणदे, इसके बाद थमनै उस ताहीं जाण लिया सै, अर उस ताहीं देख भी लिया सै।” 8 फिलिप्पुस नै उस ताहीं कह्या, “हे प्रभु, तू म्हारै ताहीं पिता के दर्शन ए करा दे, योए म्हारै खात्तर भतेरा होगा।” 9 यीशु नै उस ताहीं कह्या, “हे फिलिप्पुस, मै

इतने दिन तै थारे गेल्या सूं, के तू मन्ने कोनी जाण्दा? जिसनै मेरैताहीं देख्या सै उसनै पिता ताहीं देख्या सै। फेर क्यातै कहवै सै के पिता नै म्हारैताहीं दिखा?" 10 के तन्नै बिश्वास कोनी के मै पिता म्ह सूं, अर पिता मेरै म्ह सै? ये वचन जो मै थारे ताहीं बताऊँ सूं, अपणी ओड़ तै कोनी बतान्दा, पर मेरे भित्तर बसा पिता ए सै, जो मेरे म्ह होकै अपने काम पूरा करण लागरया सै। 11 मेरा-ए बिश्वास करो के मै पिता म्ह सूं, अर पिता मेरै म्ह सै, ना तो काम्मां के कारण मेरा बिश्वास करो। 12 मै थारैतै साच्ची-साच कहूँ सूं, के जो मेरै पै बिश्वास राक्खै सै, ये काम जो मै करूँ सूं, वो भी करैगा, बल्के इनतै भी बड़े-बड़े काम करैगा, क्यूँके मै इब पिता के धारे जाऊँ सूं। 13 मेरै नाम तै थम जो कुछ माँगोगे, वोए मै करूँगा, जिसतै बेटे के जरिये पिता की महिमा हो। 14 जै थम मेरै तै मेरै नाम तै कुछ माँगोगे, तो मै उस ताहीं पूरा करूँगा। 15 "जै थम मेरै तै प्यार करो सो, तो मेरे हुकमां नै मान्गोगे। 16 मै पिता तै बिनती करूँगा, अर वो थारे ताहीं एक और मददगार देवेगा के वो सारीहाण थारे गेल्या रहवै। (aiōn g165) 17 यानिके सच का आत्मा, जिस ताहीं दुनिया कोनी अपना सकदी, क्यूँके वो ना उसनै देखवै सै, अर ना उस ताहीं जाणै सै, थम उसनै जाणो सो, क्यूँके आज वो थारे गेल्या सै, अर आण आळे बखत म्ह भी वो थारे म्ह बणा रहवैगा।" 18 "मै थारे ताहीं अनाथ कोनी छोड़ूँगा, मै थारे धारे बोहड़ के आऊँगा। 19 थोड़ा ए बखत बाकी सै, जब दुनिया मेरै ताहीं कोनी देखवैगी, पर थम मन्ने देखवोगे, ज्यातै के मै जिन्दा सूं, थम भी जिन्दा रहोगे। 20 जब मै बोहड़ के आऊँगा, उस दिन थमनै बेरा लागैगा, के मै अपने पिता म्ह सूं, अर थम मेरै म्ह, मै थारे म्ह। 21 वो, जो मेरै हुकम नै मान्ने सै अर उननै निभावै सै, वोए मेरतै प्यार करै सै, अर जो मेरतै प्यार करै सै, वोए मेरे पिता का प्रियजन होगा, मै उसतै प्यार करूँगा, अर अपने-आप ताहीं उसपै जाहिर करूँगा।" 22 उस यहूदा नै (जो इस्करियोती कोनी था) यीशु ताहीं कह्या, "हे प्रभु, इसा के होया के तू अपने-आप ताहीं म्हारै पै जाहिर करणा चाहवै सै, अर दुनिया के माणसां पै न्ही?" 23 यीशु नै उस ताहीं जवाब दिया, "जै कोए मेरै तै प्यार करै सै, तो वो मेरी शिक्षा का पालन करैगा, वो मेरे पिता का प्रियजन बणैगा, अर हम उसकै धारे आकै उसकै गेल्या वास करागें।" 24 वो, जो मेरतै प्यार कोनी करदा, वो मेरै वचन नै कोनी मानता, अर जो वचन थम सुणो सो वो मेरे कोनी बल्के पिता के सै, जो मेरा भेजण आळा सै। 25 "ये बात मन्ने थारे गेल्या रहदे होए थारैतै कही। 26 पर मददगार यानिके पवित्र आत्मा जिस ताहीं पिता मेरै नाम तै भेजैगा, वो थारे ताहीं इन सारी बात्तां की शिक्षा देवैगा, अर जो कुछ मन्ने थारे तै कह्या सै, वो सारा कुछ थारे ताहीं याद दुआवैगा।" 27 मै थारे ताहीं शान्ति देके जाऊँ सूं, अपणी शान्ति थारे ताहीं दियुँ सूं, जिसी दुनिया थारे ताहीं शान्ति देवै सै, मै थमनै उसी शान्ति कोनी देँदा अपने मन नै दुखी ना होण द्यो अर ना डरियो। 28 थमनै सुण्या के मन्ने थारे ताहीं के कह्या, "मै जाऊँ सूं, अर थारे धारे फेर आऊँगा।" जै थम मेरै तै प्यार करदे, तो यो जाणके राज्जी होन्दे, के मै पिता के धारे जाऊँ सूं, जो

मेरै तै घणा महान् सै। 29 यो सब होण तै पैहल्या मन्ने थारे ताहीं इसके बारे म्ह बता दिया सै, के जब यो हो जावै, तो थम बिश्वास करो। 30 मै इब थारे तै घणा कुछ न्ही कहूँगा, क्यूँके इस दुनिया का शासक (शैतान) आवै सै। मेरै पै उसका कोए हक कोनी, 31 दुनिया यो समझ ले के मै पिता तै प्यार करूँ सूं, योए कारण सै के मै उसके सारे हुकमां का पालन करूँ सूं। उठो, हम याडै तै चाल्लां।

15 यीशु नै कह्या, "मै सच्ची अंगूर की बेल की तरियां सूं, अर मेरा पिता किसान की तरियां सै। 2 मेरे मै लाग्गी हरेक डाळो जो फळ न्ही देन्दी, उस ताहीं वो काट देवै सै, पर हरेक एक फळ देण आळी डाळी ताहीं छांगे सै ताके वा और घणा फळ ल्यावै। 3 थम तो उस वचन के कारण जो मन्ने थारैताहीं कह्या सै, शुद्ध होगे सो। 4 थम मेरे म्ह बणे रहो, अर मै थारे म्ह, जिस तरियां डाळी जै अंगूर की बेल म्ह बणी न्ही रहवै तो खुद तै कोनी फळ सकदी, उरसे तरियां थम भी जै मेरे म्ह बणे न्ही रहो तो कोनी फळ सकदे।" 5 मै अंगूर की बेल की ढाळ सूं अर थम डाळी सो। जो मेरे म्ह बण्या रहवै सै अर मै उस म्ह, वो घणाए फळ फळे सै, क्यूँके मेरै तै न्यारे पाटके थम कुछ न्ही कर सकदे। 6 जै कोए मेरे म्ह न्ही बण्या रहंदा, तो वो डाळी की तरियां बगा दिया जावैगा, अर सूख जावै सै, अर माणस उन ताहीं कट्टे करकै आग म्ह झोक देवै सै, अर वे बळ जावै सै। 7 जै थम मेरै म्ह बणे रहो अर मेरे वचन थारे म्ह बणे रहवै, तो थारे माँगण पै थारी इच्छा पूरी करी जावैगी। 8 थारे फळ की भरपूरी म्ह मेरै पिता की महिमा अर थारा मेरे चेल्लें होण का सबूत सै। 9 जिसा पिता नै मेरै तै प्यार करया, उसाए मन्ने थारैतै प्यार करया, मेरै प्यार म्ह बणे रहो। 10 जै थम मेरे हुकमां नै मान्गोगे, तो मेरै प्यार म्ह बणे रहोगे, जिस ढाळ के मन्ने अपने पिता का हुकम मान्या सै, अर उसके प्यार म्ह बणा रहुँ सूं। 11 मन्ने ये बात थारे तै ज्यातै कही, के जो आनन्द मेरे म्ह सै, वो थारे म्ह भी हो अर बढ़ता जावै। 12 "मै थमनै नया हुकम द्यु सूं, के एक-दुसरे तै प्यार करियो, जिसा मन्ने थारैतै प्यार करया सै, उसाए थम भी एक-दुसरे तै प्यार करियो। 13 इसतै बड़ड़ा प्यार किसे का कोनी के कोए अपने दोस्तां के खात्तर अपनी जान दे। 14 जो हुकम मै थारे ताहीं दियुँ सूं, जै थम उसपै चाल्लों सों तो थम मेरे साथी सो।" 15 मन्ने थारे ताहीं नौक्कर न्ही, पर साथी मान्या सै, क्यूँके नौक्कर माल्लिक के काम्मां तै अनजाण रहवै सै, मन्ने थारे ताहीं वे सारी बात बता दी सै, जो मन्ने पिता तै मिली सै। 16 थमनै मेरै ताहीं कोनी चुण्या पर मन्ने थारे ताहीं चुण्या सै अर थारैताहीं काम पै लाया सै, के थम जाके फळ ल्याओ अर थारा फळ बणा रहवै, के थम मेरै नाम तै जो कुछ पिता तै माँगो, वो थारे ताहीं दे दे। 17 मेरा हुकम यो सै के थम एक-दुसरे तै प्यार करो। 18 "जै दुनिया के माणस थारैतै बैर राक्खै सै, तो जाण ल्यो के उसनै थारैतै पैहल्या मेरै तै बैर राख्या सै। 19 जै थम दुनिया के माणसां जिसे होन्दे, तो दुनिया थारे तै आपण्यां जिसा प्यार करदी, पर थम दुनिया के कोनी, बल्के मन्ने थारैताहीं दुनिया म्ह तै छोट लिया सै, इस करके दुनिया के माणस थारे तै बैर राक्खै सै। 20 याद

राक़्खों मन्ने थारे तै के कह्वा था, 'नौक्कर अपणे माल्लिक तै बड़्ड़ा कोनी होंदा,' जिब उननै मेरे ताहीं सताया, तो थारैताहीं भी सतावेंगे। जै उननै मेरी शिक्षा मान्नी, तो थारी भी मॉन्नेगें। 21 पर यो सब कुछ माणस मेरे नाम के कारण थारे गेल्या करैगें, क्यूँके माणस मेरे भेजण आळे नै कोनी जाणदे। 22 जै मै न्ही आन्दा, अर उनतै बात न्ही करदा, फेर वे पापी कोनी ठहरदे, पर इब उननै उनके पाप खात्तर कोए बहान्ना कोनी। 23 जो मेरै तै बैर राक़्खै सै, वो मेरै पिता तै भी बैर राक़्खै सै। 24 जै मै उनके बीच म्ह वे काम न्ही करदा, जो और किसे नै कोनी करे, तो वे पापी कोनी ठहरदे, पर इब तो जो कुछ मन्ने करया सै उननै मेरै ताहीं देख लिया सै, उननै मेरै ताहीं अर मेरे पिता दोनुआ तै बैर करया। 25 पर यो इस करके होया के जो उनके नियम-कायदा म्ह लिख्या सै वो सच हो सके, 'उननै मेरै तै खामखां बैर करया।' 26 पर जिब वो मददगार (सच का आत्मा जो पिता की ओड़ तै आवै सै) धोरे आवैगा, जिसनै मै थारे धोरे पिता की ओड़ तै भेज्जूंगा, तो वो मेरी गवाही देवैगा, 27 अर थम भी मेरे गवाह सो, क्यूँके थम शरु तै मेरै गेल्या रहे सो।

16 "ये बात मन्ने थारैतै ज्यांतै बताई सै के थारा बिश्वास डगमगा न्ही जावै।" 2 वे थमनै आराधनालयों म्ह तै काढ देवैगें, बल्के वो बखत आवै सै, के जो कोए थमनै मार देवैगा, वो न्यू समझैगा के मै परमेसवर की सेवा करूँ सूँ। 3 इसा वे ज्यांतै करैगें के उननै ना पिता ताहीं जाणया सै, अर ना मन्ने जाणै सै। 4 पर ये बात मन्ने ज्यांतै थारैतै कही, के जिब इनका बखत आवै तो थमनै याद रहवै के मन्ने थारैतै पैहल्याए उसके बारे म्ह बता दिया था। "मन्ने शरु म्ह थारैतै ये बात ज्यांतै कोनी कही क्यूँके मै थारे गेल्या था।" 5 पर इब मै अपणे भेजण आळे के धोरे जाऊँ सूँ, अर थारे म्ह तै कोए मेरै तै कोनी बुझता, "तू कित्त जावै सै?" 6 पर मन्ने जो ये बात थारैतै कही सै, ज्यांतै थारा मन दुख तै भरग्या सै। 7 फेरभी मै थारैतै साच्ची कहुँ सूँ, के मेरा जाणा थारे खात्तर ठीक सै, क्यूँके जै मै ना जाऊँ तो वो मददगार थारे धोरे कोनी आवैगा, पर जै मै जाऊँगा, तो उस ताहीं थारे धोरे भेज्जूंगा। 8 वो आके दुनिया के माणसां ताहीं पाप अर धार्मिकता अर न्याय के बाबत बतावैगा। 9 पाप कै बारे म्ह ज्यांतै के वे मेरै पै बिश्वास कोनी करदे। 10 अर धार्मिकता के बारे म्ह ज्यांतै के मै पिता के धोरे जाऊँ सूँ, अर थम मन्ने दुबारे कोनी देख्खोगे, 11 न्याय के बारे म्ह ज्यांतै के दुनिया का शासक कसूरवार ठहरया जा चुक्या सै। 12 मन्ने थारे तै और भी घणीए बात कहणी सै, पर इब्बे थम उननै सह न्ही सकदे। 13 पर जिब वो यानिके सच का आत्मा आवैगा, तो थम सारया नै सच का रास्ता बतावैगा, क्यूँके वो अपणी ओड़ तै कोनी कहवैगा पर जो कुछ सुणैगा वोए कहवैगा, अर होण आळी बात थारे ताहीं बतावैगा। 14 वो मेरी महिमा करैगा, क्यूँके उस ताहीं मेरी ओड़ तै जो मिला सै, वो थारे ताहीं मेरी बात्तां म्ह तै लेके बतावैगा। 15 वो सब कुछ, जो पिता का सै, वो सारा मेरा सै, ज्यांतै मन्ने कह्वा के वो मेरी बात्तां म्ह तै लेके थारे ताहीं बतावैगा। 16 "थोड़ी देर म्ह थम मन्ने कोनी देख्खोगे, अर फेर थोड़ी देर

म्ह मन्ने दुबारा देख्खोगे।" 17 फेर उसके कुछ चेल्यां नै आप्पस म्ह कह्वा, "उसका इस बात तै के मतलब सै जो वो म्हारै ताहीं कहवै सै, 'थोड़ी देर म्ह थम मन्ने कोनी देख्खोगे, अर फेर थोड़ी देर म्ह मन्ने दुबारा देख्खोगे?' अर यो 'ज्यांतै के मै पिता के धोरे जाऊँ सूँ?'" 18 फेर उननै कह्वा, "यो 'थोड़ी देर' जो वो कहवै सै, या के बात सै? हम कोनी जाणदे के वो के कहवै सै।" 19 यीशु नै न्यू जाणके के वे मेरैतै बुझणा चाहवै सै, उन ताहीं कह्वा, "के थम आप्पस म्ह मेरी इस बात बाबत जाँच-पड़ताळ करो सो, 'थोड़ी देर म्ह थम मन्ने कोनी देख्खोगे, अर फेर थोड़ी देर म्ह मन्ने दुबारा देख्खोगे?'" 20 मै थारे तै साच्ची-साच कहुँ सूँ, के जिब मै मरूँगा तो थम रोओगे अर बिलाप करोगे, पर दुनिया राज्जी होवैगी। थमनै दुख होगा, पर थारा दुख आनन्द म्ह बदल जावैगा। 21 जाप्यै के बखत बिरबान्नी नै दुख होवै सै, क्यूँके उसके दुख का बखत आरया सै, पर जिब वा बाळक नै जन्म दे सै, तो इस खुशी तै, के दुनिया म्ह एक माणस पैदा होया, उस दुख नै फेर याद कोनी कर दी। 22 उससे तरियां थारे म्ह भी इब तो दुख सै, पर मै थारे तै दुबारा मिलूँगा अर थारे मन आनन्द तै भर जावैगे, थारा आनन्द कोए थारे तै खोस न्ही सकदा। 23 उस बखत थम मेरैतै कुछ न्ही बुझ्खोगे। मै थारैतै सच कहुँ सूँ, जै थम पिता तै कुछ माँगोगे, तो वो मेरै नाम तै थमनै देवैगा। 24 इब ताहीं थमनै मेरै नाम तै पिता तै कुछ न्ही माँग्या, माँग्यो, तो पा ल्योगे ताके थारा आनन्द पूरा हो जावै। 25 "मन्ने ये बात थारैताहीं उदाहरणां म्ह कही सै, पर वो बखत आवै सै, जिब पिता के बारे म्ह मै उदाहरणां म्ह न्ही कहुँगा, पर साफ शब्दां म्ह थारे ताहीं बताऊँगा। 26 उस दिन थम मेरै नाम तै माँग्यो, अर मै थारैतै न्यू कोनी कहन्दा के मन्ने ए थारे खात्तर पिता तै बिनती करणी पड़ैगी, 27 क्यूँके मेरा पिता तो खुदे थारैतै प्यार करै सै, ज्यांतै के थमनै मेरैतै प्यार करया सै अर यो बिश्वास करया सै के मै पिता की ओड़ तै भेज्या होइ सूँ। 28 मै पिता की ओड़ तै दुनिया म्ह आया सूँ, अर इब दुनिया नै छोड़के पिता के धोरे जाऊँ सूँ।" 29 उसके चेल्यां नै कह्वा, "हाँ, इब तू उदाहरणां म्ह न्ही, बल्के साफ शब्दां म्ह समझाण लागरया सै। 30 इब हम समझ्खे सां, के तू सब कुछ जाणै सै, अर इब किसे नै तेरे तै कोए सवाल पूछ्ण जुरत कोनी, इस खात्तर हम बिश्वास करा सां के तू परमेसवर की ओड़ तै आया सै।" 31 न्यू सुणके यीशु नै उन ताहीं कह्वा, "के थमनै इब बिश्वास होया सै?" 32 लखाओ, वो बखत आवै सै बल्के आण पहोंच्या सै के थम सारे खिंड-मिन्ड होके अपणे-अपणे घर बोहड़ जाओगे, अर मन्ने एकला छोड़ दोगे, फेरभी मै एकला कोनी क्यूँके पिता मेरै गेल्या सै। 33 "मन्ने ये बात थारैतै ज्यांतै कही सै, के थम मेरै म्ह शान्ति पाओ। दुनिया म्ह थारे पै क्लेश होवै सै, पर हिम्मत राखियो, मन्ने दुनिया ताहीं जीत लिया सै।"

17 यीशु नै ये बात कही अर अपणी नजर अकास कान्ही ठाके कह्वा, "हे पिता, वो बखत आण पहोंच्या सै, अपणे बेट्टे की महिमा कर, के बेट्टा भी तेरी महिमा कर सकै, 2 क्यूँके तन्नै उस ताहीं सारी मानवजाति पै हक दिया, के वो सब नै अनन्त जीवन देवै जो तन्नै उस

ताहीं सौप्या सै। (aiōnios g166) 3 अर अनन्त जीवन यो सै के वे तुझ, जो के एकमात्र सच्चे परमेसवर अर यीशु मसीह नै जिस ताहीं तन्नै भेज्या सै, जाणै। (aiōnios g166) 4 जो काम तन्नै मेरे ताहीं सौप्या था, उस ताहीं पूरा करके मन्नै धरती पै तेरी महिमा करी सै। 5 जो महिमा मेरी तेरे गैल दुनिया की सृष्टि तै पैहल्या थी, इब हे पिता, तू अपणे गेल्या मन्नै भी महिमावान कर।” 6 “मन्नै तेरा नाम उन माणसां पै जाहिर करया सै दुनिया म्ह तै जिनताहीं तन्नै छाटकै मेरे ताहीं सौप्या था, वे तेरे थे पर तन्नै उन ताहीं मेरे ताहीं सौप्या सै, अर उननै तेरे वचन का पालन करया सै।” 7 इब जाणगे सै के जो कुछ तन्नै मेरे ताहीं दिया सै, वो सारा तेरी ओड़ तै सै, 8 क्यूँके जो बात तन्नै मेरे ताहीं बताई, मन्नै उन ताहीं उनके धोरे पहोंच्या दी सै, अर उननै उन ताहीं अपणालिया, अर सच म्ह ए जाण लिया सै के मै तेरी ओड़ तै आया सूं, अर उननै बिश्वास भी कर लिया सै के तू ए मेरा भेजण आळा सै। 9 मै उन खात्तर बिनती करूं सूं, दुनिया के माणसां कै खात्तर बिनती कोनी करदा पर उननैए कै खात्तर करूं सूं जिन ताहीं तन्नै मेरे ताहीं दिया सै, क्यूँके वे तेरे सै, 10 अर जो कुछ मेरा सै वो सारा तेरा सै, अर जो तेरा सै वो मेरा सै, अर मन्नै उनके जरिये महिमा पाई सै। 11 इब मै इस दुनिया म्ह कोनी रहूँगा, अर मै तेरे धोरे आऊँ सूं, पर ये दुनिया म्ह रहवंगे, हे पवित्र पिता, अपणे नाम की शक्ति तै उनकी रुखाळ कर, जो तन्नै मेरे ताहीं दिया सै, ताके जिस तरियां मै अर तू एक सां, वे भी एक हो सकै। 12 जिन मै उनकै गेल्या था, तो मन्नै उन ताहीं तेरे नाम म्ह, जो तन्नै मेरे ताहीं दिया था, उनकी रुखाळ करी, अर उन म्ह तै किसे का नाश कोनी होया, सिवाए उसके जिस ताहीं खोणा जरूरी था, वो भी ज्यातै के पवित्र ग्रन्थ म्ह जो लिख्या होइ सच हो। 13 पर इब मै तेरे धोरे आऊँ सूं, अर ये बात दुनिया म्ह रहते होए करूं सूं, ताके वे अपणे मनां म्ह मेरे भरपूर आनन्द नै पा सकै। 14 मन्नै तेरा वचन उन ताहीं पोहोचा दिया सै, अर दुनिया के माणसां नै उनतै बैर करया, क्यूँके जिस तरियां मै इस दुनिया का कोनी, उरसे तरियां वे भी इस दुनिया के कोनी। 15 मै या बिनती कोनी करदा के उननै तू दुनिया तै लिकाड़ ले, बल्के तू उननै उस शैतान तै बचाए राख। 16 जिस तरियां मै दुनिया का कोनी, उरसे तरियां वे भी दुनिया के कोनी। 17 तेरा वचन साच्या सै, सच कै जरिये तू उननै अलग करण खात्तर समर्पित कर। 18 जिस तरियां तन्नै मेरे ताहीं दुनिया म्ह भेज्या, उरसे तरियां मन्नै भी उन ताहीं दुनिया म्ह भेज्या, 19 मै उनकै खात्तर खुद नै तेरी सेवा म्ह समर्पित करूं सूं, ताके वे भी सच कै खात्तर समर्पित हो जावै। 20 “मै केवल इन्हे खात्तर बिनती कोनी करदा, पर उन माणसां खात्तर भी जो इनकै वचन कै जरिये मेर पै बिश्वास करेगें, 21 ताके वे सब एक हों, जिस तरियां हे पिता तू मेरे म्ह सै, अर मै तेरे म्ह सूं, उरसे तरियां वे भी म्हारे म्ह एक हो, जिसतै दुनिया के माणस बिश्वास करै के तन्नै ए मेरे ताहीं भेज्या सै। 22 वा महिमा जो तन्नै मेरे ताहीं दी, मन्नै उन ताहीं दी सै, ताके वे उरसे तरियां ए एक होवै जिस तरियां हम एक सा, 23 मै उन म्ह अर तू मेरे म्ह ताके वे सिध्द होके एक हो जावै, अर दुनिया

नै बेरा पाट्टे के तन्नै ए मेरे ताहीं भेज्या, अर जिस तरियां तन्नै मेरे तै प्यार करया उरसे तरियां उनतै प्यार करया।” 24 हे पिता, मै चाहूं सूं, के जिन ताहीं तन्नै मेरेताहीं सौप्या सै, जड़ै मै सूं उड़ै वे भी मेरे गेल्या हो, के वे मेरी उस महिमा नै देखे जो तन्नै मेरेताहीं दी सै, क्यूँके तन्नै दुनिया नै बणाण तै पैहल्या मेरतै प्यार करया सै। 25 “हे धार्मिक पिता, दुनिया के माणसां नै तो तेरे ताहीं कोनी जाणया, पर मन्नै तेरे ताहीं जाण लिया सै, अर मेरे चेल्यां नै भी बेरा पाटग्या के तन्नै ए मेरेताहीं भेज्या सै। 26 मन्नै तेरे ताहीं उनपै जाहिर करया सै, अर जाहिर होन्दा रहूँगा, के जो प्यार तन्नै मेरतै करया था वोए प्यार उन म्ह बस जावै, अर मै उन म्ह रहूं।”

18 जिन यीशु नै प्रार्थना खतम कर ली, तो वो अपणे चेल्यां कै गेल्या किद्रोन नाळे कि परली ओड़ गया। उड़ै एक फूल्लां का बाग था, जिस म्ह वो अर उसके चेल्लें गए। 2 यीशु का पकड़ाण आळा यहूदा भी उस जगहां नै जाणै था, क्यूँके यीशु अपणे चेल्यां कै गैल उड़ै जाया करै था। 3 फेर यहूदा, सिपाहियाँ के एक टोळ नै अर प्रधान याजकां अर फरीसियाँ की ओड़ तै मन्दर के पैहरेदारां नै लेके, दीवे अर मशाल अर हथियारां नै लेके उड़ै आया। 4 फेर यीशु, उन सारी बातानं नै जो उसपै भीतण आळी थी जाणके, लिक्ड़के उन ताहीं पूछा, “किसनै टोहो सो?” 5 उननै उस ताहीं जवाब दिया, “यीशु नासरी नै।” यीशु नै उन ताहीं कह्या, “मैए सूं।” यीशु नै पकड़वाण आळा यहूदा भी उनकै गेल्या खड्या था। 6 जिन यीशु नै उनतै कह्या, “मै सूं।” वे पाच्छे हटकै धरती पै पड़गे। 7 फेर उसनै दुबारे उन ताहीं बुझ्या, “थम किसनै टोहो सो?” वे बोल्ले, “यीशु नासरी नै।” 8 यीशु नै जवाब दिया, “मन्नै तो थारे ताहीं कह दिया सै के वो मै सूं, जै थम मन्नै टोहो सो तो इन माणसां नै जाण दो।” 9 यो इस करके के खुद उसके जरिये कह्या गया यो वचन पूरा हो, “मन्नै उन म्ह तै एक भी नही खोया, जिन ताहीं तन्नै मेरतै सौप्या था।” 10 फेर शमोन पतरस नै तलवार, जो उसके धोरे थी, खीँची अर महायाजक के नौक्कर पै चलाके उसका सोळा कान उड़ा दिया, उस नौक्कर का नाम मलखुस था। 11 फेर यीशु नै पतरस तै कह्या, “अपणी तलवार म्यान म्ह धर। जो दुख का कटोरा पिता नै मेरे ताहीं दिया सै, के मै उसनै नही पीऊँ?” 12 फेर रोमी सिपाहियाँ अर उनके सूबेदार अर यहूदिया परदेस के मन्दर के पैहरेदारां नै यीशु ताहीं पकड़के बाँध लिया, 13 अर पैहल्या उस ताहीं हन्ना कै धोरे ले गए, क्यूँके वो उस साल के महायाजक काइफा का सुसरा था। 14 यो वोए काइफा था, जिसनै यहूदियाँ ताहीं सलाह दी थी के म्हारे माणसां खात्तर एक आदमी का मरणा ठीक सै। 15 शमोन पतरस अर एक और दुसरा चेल्ला भी यीशु कै पाच्छे हो लिए। यो चेल्ला महायाजक का जाण-पिच्छाण का था, ज्यातै वो यीशु कै गेल्या महायाजक कै आँगण म्ह गया, 16 पर पतरस बाहरणै दरबाजे पै खड्या रह्या। फेर दुसरा चेल्ला जो महायाजक की जाण-पिच्छाण का था, वो बाहरणै लिक्ड़या अर पहेरेदारणी तै कहके पतरस ताहीं भीत्तर लियाया। 17 उस नौकराणी नै, जो पहेरेदारणी भी थी, पतरस तै कह्या, “कदे तू भी इस माणस के चेल्यां म्ह तै तो नही

सै?" उसने कहा, "मै कोनी।" 18 नौकर अर मन्दर के पहरेदारानै नै जाड़े के कारण आग जळा राक्खी थी, अर खड़े होकै सेककै थे, अर पतरस भी उनकै गेल्या खड्या आग सेककै था। 19 फेर महायाजक नै यीशु तै उसकै चेल्यां कै बाबत अर उसकै उपदेशां कै बाबत जाँच-पड़ताळ करी। 20 यीशु नै उस ताहीं जवाब दिया, "मन्नै हरेक माणस तै खुलकै बात करी, मन्नै सभायां अर आराधनालयॉं म्ह, जडै सारे यहूदी कठ्ठे होया करै सै, सारी हाण उपदेश दिया अर लुहक कै कुछ कोनी कहा। 21 तू क्यूँ मेरे तै सवाल बुझ्झै सै? सवाल उनतै कर जिननै मेरे वचन सुणे सै, वे जाणे सै, के मन्नै उन ताहीं के-के कहा।" 22 जिव उसने न्यू कहा, तो मन्दर के पहरेदारानै म्ह तै एक नै जो धोरै खड्या था, यीशु कै थप्पड़ मारकै कहा, "के तन्नै महायाजक ताहीं इस तरियां जवाब देण की हिम्मत किसी करी?" 23 यीशु नै उसतै जवाब दिया, "जै मेरा कहणा गलत सै तो साबित करो पर मन्नै जो कहा सै वो सही सै तो फेर थम मेरे क्यूँ मारण लागे सों?" 24 इस खात्तर यीशु ताहीं जो इब भी बाँधे होए थे, हन्ना नै काइफा महायाजक कै धोरै भेज दिया। 25 शमौन पतरस खड्या होया आग सेककै था, फेर उननै उसतै कहा, "कदे तू भी उसकै चेल्यां म्ह तै तो न्ही सै?" उसनै नाट-कै कहा, "मै कोनी।" 26 महायाजक के नौकरानै म्ह तै एक, जो उसकै कुण्बे म्ह तै था, जिसका कान पतरस नै काट दिया था, बोल्या, "के मन्नै तेरे ताहीं यीशु कै गेल्या फूल्लां के बाग म्ह कोनी देख्या था?" 27 पतरस फेर नाटग्या, अर जिब्बे मुगँ नै बाँग देई। 28 फेर वे यीशु ताहीं काइफा कै धोरै तै किले म्ह लेगे, अर तड़कैए का बखत था, पर वे खुद किले कै भीत्तर कोनी गए ताके वे फसह का भोज खाण तै पैहल्या अशुद्ध ना हों जावै। 29 फेर राज्यपाल पिलातुस उनकै धोरै बाहरणै लिकड़कै आया अर कहा, "थम इस माणस पै किस बात का दोष लाओ सो?" 30 उननै उस ताहीं जवाब दिया, "जै वो बुरे काम करणीया न्ही होंदा तो हम इसने तेरे धोरै कोनी ल्यान्दे।" 31 पिलातुस नै उनतै कहा, "थमे इसने ले जाके अपने नियम-कायदा कै मुताबिक इसका न्याय करो।" यहूदी अगुवां नै उसतै कहा, "हमने हक कोनी के किसै की जानलेवां।" 32 "यो इस करकै होया, ताके यीशु की वा बात पूरी हो जो उसनै यो इशारा देदे होड़ कही थी के उसकी मौत किस ढाळ होगी।" 33 फेर पिलातुस दुबारे किले कै भीत्तर गया, यीशु ताहीं बुलाके उसनै बुझ्झया, "के तू यहूदियाँ का राजा सै?" 34 यीशु नै जवाब दिया, "के तू या बात अपनी ओड़ तै कहवै सै या दुसरयां नै मेरे बाबत तेरे तै न्यू कहा सै?" 35 पिलातुस नै जवाब दिया, "के मै यहूदी न्ही सूँ, तेरी-ए कोम अर प्रधान याजकां नै तेरे ताहीं मेरे हाथ म्ह सौंप्या सै। तन्नै के करया सै?" 36 यीशु नै जवाब दिया, "मेरा राज्य इस दुनिया का कोनी, जै मेरा राज्य इस दुनिया का होंदा, तो मेरे सेवादार लड़दे के मै यहूदी अगुवां कै हाथ्यां सौंप्या कोनी जान्दा पर सच्चाई तो या सै के मेरा राज्य आड़ै का सै ए कोनी।" 37 पिलातुस नै उसतै कहा, "के तू राजा सै?" यीशु नै जवाब दिया, "तू कहवै सै के मै राजा सूँ। मन्नै ज्यातै जन्म लिया अर ज्यातै दुनिया म्ह

आया सूँ, के सच की गवाही दियुँ। जो कोए सच का सै, वो मेरा वचन सुणे सै।" 38 पिलातुस नै उसतै कहा, "सच के सै?" न्यू कहकै वो फेर यहूदी अगुवां कै धोरै लिकड़ आया अर उन ताहीं कहा, "मै तो उस म्ह कुछ खोट कोनी पांदा।" 39 पर थारे यो रिवाज सै के मै फसह पै थारे खात्तर एक माणस नै छोड़ दियुँ। आखर के थम चाहो सो, "के मै थारे खात्तर यहूदियाँ के राजा नै छोड़ दियुँ?" 40 फेर उननै रुक्के मारकै कहा, "इसनै न्ही, पर म्हारे खात्तर बरअब्बा नै छोड़दे।" जिव के बरअब्बा बिद्रोही था।

19 फेर पिलातुस राज्यपाल नै यीशु कै कोड़े लगवाण खात्तर सिपाहियाँ के हाथ सौप दिया। 2 सिपाहियाँ नै काण्डयाँ का मुकुट गूँथकै उसकै सिर पै धरया, अर उस ताहीं बैजनी लत्ते पिहराये, 3 अर उसकै धोरै आ-आकै कहण लागे, "हे यहूदियाँ के राजा, प्रणाम!" अर उसकै थप्पड़ भी मारे। 4 फेर पिलातुस नै दुबारे बाहरणै लिकड़कै माणसां ताहीं कहा, "लखाओ, मै उसनै थारे धोरै फेर ल्याया सूँ, ताके थमने बेरा लागे के मै उस म्ह कुछ भी खोट कोनी पान्दा।" 5 फेर यीशु ताहीं काण्डयाँ का मुकुट अर बैजनी लत्ते पहरे होड़ बाहरणै लेग्या, अर पिलातुस नै उन ताहीं कहा, "देख्यो, इस माणस नै!" 6 जिव प्रधान याजकां अर मन्दर के पहरेदारानै नै उस ताहीं देख्या, तो रुक्के मारकै कहा, "उस ताहीं क्रूस पै चढ़ा, क्रूस पै।" पिलातुस नै उनतै कहा, "थमे उसनै ले जाके क्रूस पै चढ़ाओ, क्यूँके मै उस म्ह कोए खोट कोनी पान्दा।" 7 यहूदी अगुवां नै उस ताहीं जवाब दिया, "म्हारे नियम-कायदे सै अर उस नियम-कायदा कै मुताबिक इस माणस नै मौत की सजा मिलणी चाहिये, क्यूँके इसने खुद ताहीं परमेसवर का बेटा होण का दावा करया सै।" 8 जिव पिलातुस नै या बात सुणी तो और भी घणा डरग्या, 9 अर दुबारे किले कै भीत्तर गया अर यीशु तै कहा, "तू कितका सै?" पर यीशु नै उसतै कुछ भी जवाब कोनी दिया। 10 इसपै पिलातुस नै उसतै कहा, "मेरतै क्यातै न्ही बोल्दा? के तन्नै कोनी बेरा के तेरे ताहीं छोड़ देण का हक मेरे ताहीं सै, अर तेरे ताहीं क्रूस पै चढ़ाण का भी मेरे ताहीं हक सै।" 11 यीशु नै जवाब दिया, "जै तेरे ताहीं परमेसवर की ओड़ तै हक न्ही दिया जान्दा, तो तेरा मेरे पै कोए हक कोनी होंदा, ज्यातै जिसनै मेरे ताहीं तेरे हाथ पकड़या सै उसका पाप घणा सै।" 12 इस बात नै सुणके पिलातुस नै उस ताहीं छोड़ देणा चाह्दा, पर यहूदी माणसां की भीड़ नै रुक्के मार-मारके कहा, "जै तू इसनै छोड़ देवेगा, तो तू कैसर का बिरोधी बण जावेगा। जो कोए खुद नै राजा होण का दावा करै सै, वो कैसर का बिरोध करै सै।" 13 ये बात सुणके पिलातुस यीशु नै बाहरणै ल्याया अर उड़े न्याय की गद्दी पै बैठग्या, जो इब्रानी भाषा म्ह "गब्बता" कुहावै सै, जिसका मतलब चोतरा हो सै। 14 यो फसह की त्यारी का दिन था, अर दोफाहरा का बखत था। फेर उसने यहूदी माणसां ताहीं कहा, "यो रह्या थारा राजा!" 15 पर उननै और ऊँची आवाज म्ह कहा, "उस ताहीं मार द्यो! उस ताहीं मार द्यो! उस ताहीं क्रूस पै चढ़ा!" पिलातुस नै उनतै कहा, "के मै थारे राजा नै क्रूस पै चढ़ाऊँ?"

प्रधान याजकों नै जवाब दिया, “कैसर नै छोड़ म्हारा और कोए राजा कोनी।” 16 फेर पिलातुस नै यीशु ताहीं कूस पै चढ़ाण खात्तर उनके हवालै कर दिया। 17 फेर सिपाही यीशु नै ले गए, अर यीशु अपना कूस ठाए होए उस जगहां तक बाहर गया, जो “खोपड़ी” यानी इब्रानी भाषा म्ह “गुलगुता” कुहावै सै। 18 उडै उननै उस ताहीं अर उसके गेल्या और दो माणसां ताहीं कूस पै चढ़ाया, एक इस ओड़ अर एक दुसरी ओड़, अर बिचाळै यीशु ताहीं। 19 पिलातुस नै एक दोषपत्र लिखकै कूस पै लगवा दिया, अर उसपै लिख्या होया था, “यीशु नासरी, यहूदियाँ का राजा।” 20 यो दोषपत्र घणखेर यहूदियाँ नै पढ़्या, क्यूँके यरुशलम नगर जडै यीशु कूस पै चढ़ाया गया था नगर कै धोरै थी, अर दोषपत्र इब्रानी अर लतीनी अर यूनानी म्ह लिख्या होया था। 21 फेर यहूदियाँ के प्रधान याजकों नै पिलातुस तै कह्या, “यहूदियाँ का राजा” मतना लिखै पर यो के उसनै कह्या, “मै यहूदियाँ का राजा सूँ।” 22 पिलातुस नै जवाब दिया, “मन्नै जो लिखणा था, लिख दिया।” 23 जिब सिपाहियाँ नै यीशु ताहीं कूस पै चढ़ा दिया, तो उसके लते लेकै चार हिस्यां म्ह बांड लिए, हरेक सिपाही खात्तर एक हिस्सा, अर कुड़ता भी लिया, पर कुड़ता बिन सिलाई उपपर तै तळै ताहीं सिम्या होया था। 24 इस करकै सिपाहियाँ नै आप्पस म्ह कह्या, “हम इस ताहीं पाड़ा कोनी, पर इसपै पर्चीं गेर कै, के यो किसका होवैगा।” न्यू इस करकै होया के पवित्र ग्रन्थ म्ह जो लिख्या होया वो पूरा हो, “उननै मेरे लते आप्पस म्ह बांड लिए अर मेरे लते पै पर्चीं गेरी।” 25 आखर म्ह सिपाहियाँ नै इसाए करया। यीशु कै कूस कै धोरै यीशु की माँ, अर उसकी मौस्सी, क्लोपास की घरआळी मरियम, अर मगदल गाम की मरियम खड़ी थी। 26 जिब यीशु नै अपना माँ, अर उस चेल्लें ताहीं जिसतै वो प्यार करै था, धोरै खड़े देख्या तो अपना माँ तै कह्या, “हे नारी, लखा, यो तेरा बेटा सै।” 27 फेर उस चेल्लें तै कह्या, “या तेरी माँ सै।” अर उससे बखत वो चेल्ला उस ताहीं अपने घरां लेग्या। 28 इसके पाछै यीशु नै बेरा लागग्या के इब उसनै सारा काम पूरा कर लिया सै, ज्यातै के पवित्र ग्रन्थ म्ह जो कह्या गया वो पूरा हो, कह्या, “मै तिसाया सूँ।” 29 उडै सिरके तै भरया होड़ एक बास्सण धरया था, आखर म्ह सिपाहियाँ नै सिरके म्ह भेकै स्पंज (फोम) ताहीं जुफे की लाठी पै धरके उसके मुँह कै लगाया 30 जिब यीशु नै वो सिरका चख्या, तो कह्या, “पूरा होया,” अर सिर झुकाकै जी दे दिया। 31 इब यो त्यारी का दिन था, अर आगला दिन आराम का दिन अर फसह का दिन था, यो यहूदी माणसां खात्तर एक खास दिन था, अर वे न्ही चाहवै थे, के इस दिन देह कूस पै टंगी रहवै, इस करके यहूदियाँ नै पिलातुस तै बिनती करी के उन माणसां की टाँग तोड़ दी जावै, जो कूस पै चढ़ाये गये थे। 32 आखर म्ह सिपाहियाँ नै आके उन माणसां म्ह तै पैहले की टाँग तोड़ी फेर दुसरे की भी, जो उसके गेल्या कूस पै चढ़ाए गए थे, 33 पर जिब यीशु कै धोरै आके देख्या के वो मर लिया सै, तो उसकी टाँग कोनी तोड़ी। 34 पर सिपाहियाँ म्ह तै एक नै बरछी तै उसका पंजर चीर दिया, अर उस म्ह तै जिब्बे लहू अर पाणी लिकड़या। 35 जिस

माणस नै यो देख्या, उसनै गवाही दी सै, अर उसकी गवाही साच्ची सै, अर उननै बेरा सै के वो साच्ची कह सै के थम भी बिश्वास करो। 36 ये बात ज्यातै होई के पवित्र ग्रन्थ म्ह जो कह्या गया वो पूरा हो, “उसकी कोए हाड्डी कोनी तोड़ी जावैगी।” 37 फेर एक और जगहां पै पवित्र ग्रन्थ म्ह न्यू लिख्या सै, “जिस ताहीं उननै बेधा सै, उसनै वे देखेगें।” 38 इन बातां पाछै अरिमतिया गाम के यूसुफ नै जो यीशु का चेल्ला था, पर यहूदी अगुवां कै डर के मारे इस बात नै लकोए राखै था, पिलातुस तै बिनती करी, के वो यीशु की लाश ले जा सके सै। पिलातुस नै उसकी बिनती सुणी, अर वो आके उसकी लाश लेग्या। 39 नीकुदेमुस भी, जो पैहले यीशु कै धोरै रात नै गया था, पचास सेर कै करीबन रळा होड़ गन्धरस अर एलवा (काण्डयाँ आळा पौधा) लियाया। 40 फेर उननै यीशु की लाश ली, अर यहूदियाँ कै गाड्डण कै रिवाज कै मुताबिक उस ताहीं खुशबुदार द्रव्य के गेल्या कफन म्ह लपेट्या। 41 उस जगहां पै जडै यीशु कूस पै चढ़ाया गया था, एक फूल्लां का बगीचा था, अर उस फूल्लां की क्यारी म्ह एक नई कब्र थी जिसम्ह कदे कोए कोनी राख्या ग्या था। 42 ज्यातै उननै यीशु की लाश ताहीं उससे कब्र म्ह धर दिया, क्यूँके वा लोवै ए थी, अर वो यहूदियाँ के आराम की त्यारी का दिन भी था।

20 हप्तै कै पैहलडे दिन तडकैए सूरज लिकड़ण तै पैहल्या अन्धेरै रहंदे ए मगदल गाम की मरियम कब्र पै गई, अर पत्थर ताहीं कब्र पै तै हटया होड़ देख्या। 2 फेर वा भाज्जी अर शमीन पतरस अर उस दुसरे चेल्लै कै धोरै जिसतै यीशु प्यार राखै था, आके कह्या, “वे प्रभु की लाश नै कब्र म्ह तै काढ लेगे सै, अर हमनै न्ही बेरा के उस ताहीं कित्त धर दिया सै।” 3 फेर पतरस अर वो दुसरा चेल्ला लिकड़कै कब्र कै कान्ही चाल्ले। 4 वे दोन्नु गैल-गैल भाजरे थे, पर दुसरा चेल्ला पतरस तै तेज भाजकै कब्र पै पैहल्या पोंहच्या, 5 अर झुकके लते पड़े देखे, तोभी वो भीत्तर कोनी गया। 6 फेर शमीन पतरस उसके पाछै-पाछै पोंहच्या, अर कब्र कै भीत्तर गया अर उसनै भी लते पड़े देखे, 7 अर वो अंगोच्छा जो उसके सिर पै बन्धया होड़ था, लत्यां कै गेल्या कोनी पड्या था, पर न्यारा एक जगहां लपेटकै धरया होया देख्या। 8 फेर दुसरा चेल्ला भी जो कब्र पै पैहल्या पोंहच्या था, भीत्तर गया अर देखकै बिश्वास करया के यीशु मुर्दा म्ह तै जिन्दा होग्या। 9 पतरस अर दुसरा चेल्ला इब ताहीं पवित्र ग्रन्थ की वा बात कोनी समझे थे के उसनै मरे होया म्ह तै जी उठणा होगा। 10 फेर चेल्लें अपने घरां बोहड़गे। 11 पर मरियम रोंदी होई कब्र कै धोरै ए बाहरणै खड़ी रही, अर रोन्दे-रोन्दे कब्र कै कान्ही कोड्डी होके, 12 दो सुगंदूनां ताहीं धोळे-चमकदे लते पहरै होड़ एक सिरहाणै अर दुसरे ताहीं पांयां की ओड़ बेठे देख्या, जडै यीशु की लाश धरी गई थी। 13 उननै उस ताहीं कह्या, “हे नारी, तू क्यातै रोवै सै?” उसनै उन ताहीं कह्या, “वे मेरे प्रभु की लाश नै ठा लेगे अर मन्नै कोनी बेरा के उसनै कित्त धर राख्या सै।” 14 न्यू कहकै वा पाछै मुड़ी अर यीशु ताहीं खड़े देख्या, पर पिच्छाणया कोनी के यो यीशु सै। 15 यीशु नै उसतै कह्या, “हे नारी, तू क्यातै रोवै सै? किसनै तोहवै सै?”

उसने माळी समझके उस तारीं कहा, “हे श्रीमान, जै तन्नै उस लाश तारीं ठा लिया सै, तो मन्नै बता के उस तारीं किन्त धर राख्या सै, अर मै उसनै ले जाऊँगी।” 16 यीशु नै उस तारीं कहा, “मरियम!” उसनै बोहड़के उस तारीं इब्रानी म्ह कहा, “रब्बुनी!” यानिके “हे गुरु”। 17 यीशु नै उस तारीं कहा, “पैरां म्ह लिपटके मन्नै मतना छुओ, क्यूँके मै इब तारीं पिता के धोरे उप्पर कोनी गया, पर मेरे भाईयाँ के धोरे जाके उनतै कह दे, के मै अपने पिता अर थारे पिता, अर अपने परमेसवर अर थारे परमेसवर के धोरे उप्पर जाके आऊँ सूँ।” 18 मरियम मगदलीनी नै जाके चेल्यां तारीं बताया, “मन्नै प्रभु तारीं देख्या, अर उसनै मेरे तै ये बात कही।” 19 उससे दिन जो हफ्ते का पहलड़ा दिन था, साँझ के बखत यहूदियाँ के डर के मारे चेल्लें जिब किवाड़ मूँदे होड़ एक कमरे म्ह थे, तो यीशु उनकै बिचाळै आ खड्या होया अर उनतै बोल्या, “थमनै शान्ति मिलै।” 20 अर न्यू कहके उसनै अपने हाथ्यां के घा अर अपना पंजर उनतै दिखाए। फेर चेल्लें यीशु नै देखके राज्जी होए। 21 यीशु नै फेर उनतै कहा, “थमनै शान्ति मिलै: जिस तरियां पिता नै मेरे तारीं दुनिया म्ह भेज्या सै, उससे तरियां ए मै थमनै दुनिया म्ह भेज्जू सूँ।” 22 न्यू कहके उसनै उनपै पूँक मारी अर उसनै कहा, “पवित्र आत्मा ल्यो। 23 जिनके पाप थम माफ करो, वे उनकै खात्तर माफ करे गए सै, जिनके थम राक्खो, वे राक्खे गए सै।” 24 पर बारहा चेल्यां म्ह तै एक, यानिके थोमा जो दिद्रुमुस कुहावै सै, जिब यीशु आया तो उनकै गेल्या कोनी था। 25 जिब दुसरे चेल्लें उसतै कहण लागे, “हमनै प्रभु तारीं देख्या सै,” फेर उसनै उनतै कहा, “जिब तारीं मै उसकै हाथ्यां म्ह कील्लां के छेद न्ही देख ल्युँ, अर कील्लां के छेदां म्ह अपनी आंगळी न्ही घाल ल्युँ, अर उसकै पंजर म्ह अपना हाथ ना घाल ल्युँ, जद तारीं बिश्वास कोनी करूँगा।” 26 आठ दिन के पाछै उसके चेल्लें फेर घर के भीत्तर थे, अर थोमा उनकै गेल्या था, अर किवाड़ मूँद राक्खे थे, फेर यीशु आया अर उनकै बिचाळै खड्या होके कहा, “थमनै शान्ति मिलै।” 27 फेर उसनै थोमा तै कहा, “अपणी आंगळी याडै ल्याके मेरे हाथ्यां नै देख अर अपना हाथ ल्याके मेरे पंजर म्ह घाल, अर अबिश्वासी न्ही पर बिश्वासी बणा।” 28 न्यू सुणके थोमा नै जवाब दिया, “हे मेरे प्रभु, हे मेरे परमेसवर!” 29 यीशु नै उसतै कहा, “तन्नै तो मेरे तारीं देखके बिश्वास करया सै, धन्य वे सै जिन नै बिन देखके बिश्वास करया।” 30 यीशु नै और भी घणखरे चमत्कार चेल्यां के आगै दिखाए, जो इस किताब म्ह कोनी लिक्खे गए, 31 पर ये ज्यांतै लिक्खे गए सै के थम बिश्वास करो के यीशु ए परमेसवर का बेट्टा मसीह सै, अर बिश्वास करके उसके नाम म्ह अनन्त जिन्दगी पाओ।

21 इन बातां के पाछै यीशु नै खुद तारीं तिबिरियास झील के किनारे चेल्यां पै जाहिर करया, अर इस ढाळ जाहिर करया 2 शमौन पतरस, अर थोमा जो दिद्रुमुस कुहावै सै, अर गलील परदेस के काना नगर का नतनएल, अर जब्दी के बेट्टे, अर उसके चेल्यां म्ह तै दो और जणे कट्टे थे। 3 शमौन पतरस नै उन तारीं कहा, “मै मच्छी पकड़ण नै

जाऊँ सूँ।” उननै उसतै कहा, “हम भी तेरे गेल्या चाल्लां सां।” इस करके वे लिकड़के किस्ती पै चढे, पर उस रात उननै कुछ न्ही पकड्या। 4 सबरे होन्दे-ए यीशु किनारे पै आ खड्या होया, फेरभी चेल्यां नै कोनी पिच्छाणा के यो यीशु सै। 5 फेर यीशु नै उन तारीं कहा, “हे बाळकों, के थारे धोरे कुछ खाण नै सै?” उननै जवाब दिया, “कोनी।” 6 यीशु नै उन तारीं कहा, “किस्ती के सोळी ओड़ जाळ गेरो फेर पाओगे।” आखर उननै जाळ गेरया, अर इब घणी मच्छियाँ के बाबत जाळ उनपै खिच्या कोनी। 7 फेर उस चेल्लें नै जिसतै यीशु प्यार करे था, पतरस तै कहा, “यो तो प्रभु सै!” शमौन पतरस नै न्यू सुणके के वो तो प्रभु सै, अपना बाहरी कपड़ा लपेट्या अर झील म्ह कूद पड्या, क्यूँके उस बखत वो अंगोच्छें-अंगोच्छें म्ह था। 8 पर दुसरे चेल्लें डोंगी पै मच्छी तै भरया होड़ जाळ खिचंदे होए आए, क्यूँके वे किनारे तै घणी दूर कोनी, पर कोए दो सौ हाथ (सौ मीटर) की दूरी पै थे। 9 जिब चेल्लें किनारे पै उतरे, तो उननै कोयले की आग अर उसपै मच्छी धरी होई, अर रोटी देख्खी। 10 यीशु नै उनतै कहा, “जो मच्छी थमनै इब्बे पकड़ी सै, उन म्ह तै कुछ ल्याओ।” 11 फेर शमौन पतरस नै डोंगी पै चढके एक सौ तरेपन बट्टी मच्छियाँ तै भरया होड़ जाळ किनारे पै खिच्या, अर इतनी मच्छी होन्दे होए भी जाळ कोनी पाट्या। 12 यीशु नै उनतै कहा, “आओ, खाणा खाओ।” चेल्यां म्ह तै किसे की हिम्मत कोनी होई, के उसतै बुड़्झै, “तू कौण सै?” क्यूँके उननै बेरा था, के हो ना हो यो प्रभु ए सै। 13 यीशु आया अर रोटी लेके उन तारीं दी, अर उससे ढाळ मच्छी भी। 14 यो तीसरी बार सै के यीशु मरे होया म्ह तै जिन्दा उठण के पाछै चेल्यां नै दिखाई दिया। 15 खाणा खाणे के पाछै यीशु नै शमौन पतरस तै कहा, “हे शमौन, यूहन्ना के बेट्टे, के तू चेल्यां तै बाध मेरतै प्यार करै सै?” उसनै उसतै कहा, “हाँ प्रभु, तन्नै तो बेरा सै के मै तेरे तै प्यार राक्खूँ सूँ।” उसनै उसतै कहा, “मेरे मेम्ना नै चरा।” 16 उसनै दुसरी बर उसतै कहा, “हे शमौन, यूहन्ना के बेट्टे, के तू मेरे तै प्यार राक्खै सै?” उसनै उसतै कहा, “हाँ प्रभु, तन्नै तो बेरा सै के मै तेरे तै प्यार राक्खूँ सूँ।” उसनै उसतै कहा, “मेरी भेट्ठां की रुखाळी कर।” 17 उसनै तीसरी बर उस तारीं कहा, “हे शमौन, यूहन्ना के बेट्टे, के तू मेरतै प्यार राक्खै सै?” पतरस काल होया के उसनै उसतै तीसरी बर इसा कहा, “हे शमौन, यूहन्ना के बेट्टे, के तू मेरतै प्यार राक्खै सै?” अर उसतै कहा, “हे प्रभु, तन्नै तो सारा कुछ बेरा सै, तन्नै न्यू बेरा सै के मै तेरे तै प्यार राक्खूँ सूँ।” यीशु नै उसतै कहा, “मेरी भेट्ठां नै चरा।” 18 मै तेरे तै साच्ची-साच कहूँ सूँ, “जिब तू जवान था तो अपनी कड़ बाँधके जड़ै चाहवै था उडै हॉँडे था, पर जिब तू बूढ़ा होगा तो अपने हाथ पसारैगा, अर दुसरा तेरी कड़ बाँधके जड़ै तू ना चाहवैगा उडै तन्नै ले जावैगा।” 19 यीशु नै इन बातां तै इशारा करया के पतरस किसी मौत तै परमेसवर की महिमा करैगा, अर फेर उसनै उसतै कहा, “मेरे पाछै हो ले।” 20 पतरस नै बोहड़के उस चेल्लें तारीं पाछै आन्दे देख्या, जिसतै यीशु प्यार राक्खै था, जो खाणे के बखत उसके साथ बेठ्या था, उसतै बुड़्झया,

“हे प्रभु, तेरा पकड़वाण आळा कौण सै?” 21 उस तारीं देखके पतरस नै यीशु तै कह्या, “हे प्रभु, इसका के हाल होगा?” 22 यीशु नै उसतै कह्या, “जै मै चाहूँ के वो मेरै आण तारीं रुक्या रहवै, तो तन्नै इसतै के? तू मेरै पाच्छै हो ले।” 23 ज्यांतै भाईयाँ म्ह या बात फैलगी के वो चेल्ला कोनी मरैगा, फेरभी यीशु नै उसतै न्यू कोनी कह्या के वो कोनी मरैगा, पर यो के, “जै मै चाहूँ के वो मेरै आण तारीं रुक्या रहवै, तो तन्नै इसतै के?” 24 यो वोए चेल्ला सै जो इन बाततां की गवाही देवै सै अर जिसनै इन बाततां तारीं लिख्या सै, अर हमनै बेरा सै के उसकी गवाही साचची सै। 25 और भी घणेए काम सै, जो यीशु नै करे, जै वे एक-एक करके लिखे जान्दे, तो मै समझू सूं के किताब जो लिक्खी जान्दी वा दुनिया म्ह भी कोनी समान्दी।

प्रेरितों के काम

1 हे थियुफिलुस, मन्ने पैहल्डी किताब उन सारी बातां के बारे में हे लिक्खी, जो यीशु शरु तै लेकै सुर्ग म्ह ठाए जाण तक करदा अर सिखान्दा रहया, 2 पर यीशु ताहीं परमेसवर के जरिये सुर्ग म्ह उठाए जाण तै पैहले उसने अपने चुणे होए प्रेरितां ताहीं पवित्र आत्मा के जरिये हुकम दिया। 3 यीशु के दुख ठाण के पाच्छे उन प्रेरितां के स्याम्ही भोत-से पक्के सबूत दिखाए के वो जिन्दा सै, अर वो चाळोस दिन तक उननै दिखदा रहया, अर परमेसवर के राज्य की बात करदा रहया। 4 अर एक दिन मसीह यीशु नै उनतै कठ्ठे करके उन ताहीं हुकम दिया, “यरुशलेम नगर नै ना छोड़ो, पर पिता की उस प्रतिज्ञा की पूरे होण की बात देखदे रहो, जिसका जिक्र थम मेरै तै सुण चुके सो। 5 क्यूँके यूहन्ना नै तो पाणी तै बपतिस्मा दिया सै पर थोड़े दिनां पाच्छे थम पवित्र आत्मा तै बपतिस्मा पाओगे।” 6 चेल्लें जिब यीशु तै दुबारा मिले तो उननै उसतै बुझ्झया, “हे प्रभु, के वो बखत आ गया सै, के तू इस्राएल ताहीं छुड़वा के उसनै दुबारा बसाके राजा के रूप म्ह सब पै शासन करैगा।” 7 उसनै उनतै कहा, “उस बखत या युगा ताहीं, जिन ताहीं पिता नै अपने अधिकार म्ह कर राख्या सै, उननै जाणणा थारा काम कोनी। 8 पर जिब पवित्र आत्मा थारे पै आवैगा फेर थम सामर्थ पाओगे, अर यरुशलेम नगर अर सारे यहूदिया और सामरिया परदेसां म्ह, अर धरती के सिरे ताहीं मेरे बारे में गवाही द्योगे।” 9 न्यू कहके यीशु उनके देखदे-देखदे परमेसवर के जरिये उप्पर ठा लिया गया, अर बादल नै उस ताहीं उनकी आँखां तै लहको लिया। 10 उसके जान्दे बखत जिब वे अकास की ओड़ देखखे थे, तो देखको, चाणचक दो माणस धोळे लते पदरे ओड़ उनके लोवै आण खड़े होए, 11 अर उनतै कहा, “हे गलील परदेस के माणसां, थम खड़े अकास कान्ही क्यातै लखाओ सो? योए यीशु, जो परमेसवर के जरिये थारे धारे तै सुर्ग पै ठा लिया गया सै, जिस तरियां तै थमनै उस ताहीं सुर्ग नै जान्दे देख्या उससे तरियां तै वो दुबारा आवैगा।” 12 जिब सुर्गदूत चले गये, तो चेल्लें जैतून नाम के पहाड़ तै जो यरुशलेम नगर तै करीब आधे कोस की दूरी पै सै, यरुशलेम नगर म्ह बोह्दे। 13 जिब वे नगर पोहचे तो उस चुबारे पै गये, जित्त पतरस अर यूहन्ना अर याकूब अर अन्द्रियास अर फिलिप्पुस अर थोमा अर बरतुल्मै अर मत्ती अर हलफई का बेटा याकूब अर शमौन, जेलोतेस अर याकूब का बेटा यहूदा ये सारे माणस ओड़े थे। 14 ये सारे कई बिरबानियाँ अर यीशु की माँ मरियम अर उसके भाईयाँ के गेल्या कठ्ठे होके एक मन तै प्रार्थना म्ह लागे रहे। 15 उन्हे दिनां म्ह पतरस बिश्रासियाँ के बिचाळे म्ह जो एक सो बीस आदमियाँ के करीबन थे, खड्या होके कहण लाग्या, 16 हे भाईयो, जरूरी था के पवित्र ग्रन्थ का वो लेख पूरा हो जो पवित्र आत्मा नै दाऊद के मुँह तै यहूदा के बाबत, जो यीशु के पकड़वाण आळा का अगुवां था, पैहल्याए तै कहा था। 17 क्यूँके वो तो म्हारे म्ह गिण्या गया, अर इस सेविकाई म्ह साइझी होया। 18 “जिसा थम जाणो सों

(उसनै पाप की कमाई तै एक खेत मोल लिया, अर सिर के बळ गिरया अर उसका पेट पाटाया अर उसकी सारी आन्दड़ी लिकड़गी। 19 इस बात ताहीं यरुशलेम नगर के सारे रहणीये जाणगे, उरै ताहीं के उस खेत का नाम उनकी भाषा म्ह ‘हक्कलदमा’ यानिके ‘लहू का खेत’ पड़ग्या।)” 20 “दाऊद नै भजन संहिता म्ह लिख्या सै, ‘उसका घर उजड़ जावै, अर यो भी लिख्या सै, के उस म्ह कोए न्ही बसै,’ अर ‘उसका पद कोए और ले लेवै।” 21 “इस करके यो जरूरी सै के एक इसा माणस छाट्या जावै, जो प्रभु यीशु के सारे काम्मां के हरेक बखत का गवाह हो, प्रभु यीशु ताहीं यूहन्ना के जरिये बपतिस्मा दिये जाण तै लेके, सुर्ग म्ह स्वीकार किये जाण तक, 22 वो माणस म्हारे गैल प्रभु यीशु के जिन्दा होण का गवाह बणै।” 23 फेर उननै दो नाम सुझाए, एक यूसुफ जो बरसब्बा कुहावै था, जिसका उपनाम यूसतुस सै, दुसरा मत्तियाह ताहीं, 24 अर या प्रार्थना करी, “हे प्रभु, तू जो सारया के मनां नै जाणै सै, न्यू बता के इन दोनुआ म्ह तै तन्नै किस ताहीं चुण्या सै, 25 के वो इस सेवा के काम अर प्रेरितों की वा खाल्ली जगहां ले, जिसनै यहूदा छोड़के अपनी जगहां चल्या गया, जित्त उसनै जाणा चाहिए था।” 26 फेर उननै उनके बाबत पर्ची मेरी, अर पर्ची मत्तियाह के नाम लिकड़ी। आखर वो उन ग्यारहां प्रेरितां के गेल्या गिण्या गया।

2 यहूदियाँ के पिन्तेकुस्त त्यौहार के दिन, यीशु के चेल्लें एक जगहां कठ्ठे थे। 2 चाणचक अकास तै तेज आँधी जिसी आवाज आई, अर उसतै सारा घर जित्त वे बेट्ठे थे, गूँजग्या। 3 अर उननै एक आग की लपट दिक्खी, जो जीभ के समान थी, वा आग की लपट अलग-अलग होके उन सब के उप्पर आ उतरी। 4 वे सारे पवित्र आत्मा तै भरगे, अर जो वरदान पवित्र आत्मा नै उन ताहीं दिया, उसके मुताबिक वो अन्य-अन्य भाषा बोल्लण लागगे। 5 उस बखत पूरी दुनिया की हरेक जात म्ह तै यहूदी-भगत यरुशलेम नगर म्ह रहण लागरे थे। 6 जिब आँधी जिसा शब्द गरजा, तो भीड़ लागी अर आदमी घबरागे, क्यूँके हर एक अपनी-अपनी भाषा म्ह चेल्यां ताहीं बोलदे सुणण लागरे थे। 7 वे सारे हैरान अर अचम्भा करके कहण लागगे, “देखको, जो वे बोल्लण लागरे सै के सारे गलीलवासी कोनी? 8 तो यो के होण लागरया सै, के जो म्हारे म्ह तै हर एक इन ताहीं अपनी-अपनी जन्म-भूमि की भाषा म्ह बात करते सुणै सै! 9 हम जो पारथी अर मेदी अर एलामी अर मेसोपोटामिया अर यहूदिया अर कप्पूदकिया अर पुन्तुस अर आसिया परदेस, 10 कुछ फ्रुगिया, पंफूलिया परदेस अर कुछ मिस्र देश अर लीबिया देश जो कुरेने नगर के लोवे-धारे सै, इन सारे देशां के रहण आळे अर रोमी प्रवासी, 11 यानिके यहूदी माणस अर यहूदी पंथ धारण करण आळे, क्रेतो दीप अर अरब देश के माणस भी सै, पर अपनी-अपनी भाषा म्ह उनतै परमेसवर के बड़े-बड़े काम्मां का जिक्र सुणै सै।” 12 अर वे सारे हैरान होए अर घबराके एक-दुसरे तै कहण लागगे, “यो के होण लागरया सै?” 13 पर औरां नै मखौल करके कहा, “वे तो नई मदिरा के नशै म्ह चूर सै।”

14 जब पतरस उन ग्यारहों प्रेरितां के गेल्या खड्या होया, अर ठाडू आवाज म्ह बोल्या, “हे यहूदवासियों अर हे यरुशलमवासियों, न्यू जाण ल्यो, अर कान लाके मेरी बात सुणो।” 15 जिंसा थम समझरे सो, ये आदमी नशै म्ह कोनी, क्यूँके इब्बे दिन के नौ बजे सै। 16 जो थम म्हारे साथ होते होए देखण लागरे सों, यो योएल नबी के जरिये कही गई भविष्यवाणी का पूरा होणा सै। 17 “परमेसवर कहवै सै, के अन्त के दिनां म्ह इसा होवैगा के मै अपना आत्मा सारे माणसां ताहीं दियुंगा, अर थारे बेटे अर थारी बेट्टी भविष्यवाणी करेगी, अर थारे जवान दर्शन देखेंगे, अर थारे बुजुर्ग सपना देखेंगे।” 18 उन दिनां म्ह, मै अपने दास्सां, अर दासियाँ ताहीं अपनी आत्मा दियुंगा, अर वे भविष्यवाणी करेगें। 19 अर मै उप्पर अकास म्ह अनोक्खे काम अर तळै धरती पै निशान, यानिके लहू अर आग अर धुमै का बाढळ दिखाऊंगा। 20 प्रभु के महान् अर तेजस्वी दिन के आण तै पैहल्या सूरज अँधेरा अर चाँद लहू-सा हो जावैगा। 21 अर जो कोए प्रभु का नाम लेवैगा, उसका उद्धार होवैगा। 22 “हे इस्राएलियों, इन बातों नै सुणो यीशु नासरी एक माणस था जिसका परमेसवर की ओड़ तै होण का सबूत उन सामर्थ के कामां अर हैरानी के कामां अर चमत्कारां तै जाहिर सै, जो परमेसवर नै थारे बिचाळै उसके जरिये कर दिखाए जिसके बारे म्ह थमनै खुदे बेरा सै। 23 उस्से यीशु ताहीं, जो परमेसवर की ठहराई होई योजना अर पूर्व ज्ञान के मुताबिक पकड़वाया गया, थमनै अधर्मियाँ के हाथ्यां तै क्रूस पै चढ़ाके उस ताहीं मार दिया। 24 पर उस्से ताहीं परमेसवर नै मौत के बन्धनां तै छुड़ाके जिन्दा करया, क्यूँके यीशु ताहीं अपने बस म्ह राखणा मौत खात्तर असम्भव था।” 25 राजा दाऊद यीशु के बारे म्ह कहवै सै, “मै प्रभु नै सारी हाण अपने धौरे देख्दा रहया क्यूँके वो मेरी सोळी ओड़ सै, मै उनतै न्ही डहँगा जो लोग मेरा नुकसान करणा चाहवै सै।” 26 इस्से कारण मेरा मन आनन्दित होया, अर मै खुशी तै गाऊँगा, बल्के मेरी आस भी उस्से म्ह बणी रहवैगी। 27 क्यूँके तू मेरे प्राणां नै अधोलोक म्ह कोनी छोड़ेगा, अर ना अपने पवित्र माणस नै सड़ण देवैगा। (Hades 986)

28 “तन्नै मेरे ताहीं जीण का राह बताया सै, तू मन्नै दर्शन के जरिये आनन्द तै भर देवैगा।” 29 “हे भाईयो, मै कुलपति राजा दाऊद के बारे म्ह थारे तै हिम्मत करके कहूँ सूँ के वो तो मरग्या अर गाड्या भी गया अर उसकी कब्र आज ताहीं म्हारे उरै न्यू-की-न्यू सै। 30 वो नबी था अर उसनै बेरा था के परमेसवर नै मेरे तै वादा करया सै के मै तेरी पीढ़ी म्ह तै एक माणस नै तेरे सिंहासन पै बिठाऊँगा, 31 उसनै होण आळी बात ताहीं पैहल्याए तै देखके मसीह के जिन्दा उठण के बारे म्ह भविष्यवाणी करी के ना तो उसका प्राण अधोलोक म्ह छोड्या गया अर ना उसकी देह सड़ण पाई। (Hades 986)

32 इस्से यीशु ताहीं परमेसवर नै जिन्दा करया, जिसके हम सारे गवाह सां। 33 इस तरियां परमेसवर के सोळे हाथ पै सबतै ऊँच्या पद पाके, अर पिता तै वो पवित्र आत्मा पाके जिसका वादा लिया गया था, उसनै यो उण्डेल दिया सै जो थम देखे अर सुणो सो। 34 क्यूँके दाऊद तो सुर्ग पै कोनी चढ्या, पर वो खुद कहवै सै, ‘प्रभु

परमेसवर नै मेरे प्रभु तै कहा, मेरे सोळी ओड़ नै बैठ, 35 “जिब ताहीं के मै तेरे बैरियाँ नै तेरे कदमां तळै ना झुका दियुँ।” 36 “आखर इस्राएल का सारा खानदान पक्की तरियां तै जाण लेवै के परमेसवर नै उस्से यीशु ताहीं जिस ताहीं थमनै क्रूस पै चढ़ाया, प्रभु भी ठहराया अर मसीह भी।” 37 जिब माणसां नै यो सुणया, तो विश्वास होगया था के उननै गलत काम करया सै, अर वे पतरस अर बाकी प्रेरितां तै बुझ्झण लागे, “हे भाईयो, हम के करा?” 38 पतरस नै उनतै कहा, “पाप करणा छोड़ दो, अर थारे म्ह तै हरेक अपने-अपने पापां की माफी के खात्तर यीशु मसीह के नाम तै बपतिस्मा लेवै, जिब थम पवित्र आत्मा का दान पाओगे। 39 क्यूँके या प्रतिज्ञा थम, अर थारी ऊलादां, अर उन सारे दूर-दूर के आदमियाँ खात्तर भी सै जिं ताहीं प्रभु म्हारा परमेसवर अपने धौरे बुलावैगा।” 40 पतरस नै कई और बातों तै, भी गवाही दे-देके समझाया के अपने-आपने इस टेढ़ी जात तै बचाओ। 41 आखर जिंनै उसके वचन पै विश्वास करके बपतिस्मा लिया, अर उस्से दिन तीन हजार माणसां के करीबन उन म्ह मिलगे। 42 जिंनै पतरस के वचन पै विश्वास करया, वे प्रेरितां तै शिक्षा लेन्दे, अर संगति राखदे, अर रोटी तोड़ण, अर प्रार्थना करण म्ह मग्न रहे। 43 अर सारे के यरुशलम माणस डरगे, अर घणे अनोक्खे काम अर चमत्कार प्रेरितां के जरिये जाहिर होवै थे। 44 अर सारे विश्वास करणीये कठे रहवै थे, अर उनकी सारी चीज साझे म्ह थी। 45 वे अपनी-अपनी जायदाद अर सामान बेच-बेचके जिसकी जरूरत होवै थी बांड दिया करै थे। 46 वे हरेक दिन एक मन होके मन्दर म्ह कठे होवै थे, घर-घर रोटी तोड़दे होए खुशी अर मन की सीधाई तै खाणा खावै थे, 47 अर परमेसवर की जय-जयकार करै थे, अर सारे माणस उनतै राज्जी थे जो उद्धार पावें थे, उन ताहीं प्रभु हरेक दिन उन म्ह मिला देवै था।

3 पतरस अर यूहन्ना दोफाहरे के तीन बजे पाछै प्रार्थना के बखत मन्दर म्ह जाण लागरे थे। 2 अर माणस एक जन्म तै लंगड़े नै ल्यावै थे, जिस ताहीं वे हरेक दिन मन्दर के बाहरणै पै जो सुन्दर नामक फाटक कुहावै सै, बिठा देवै थे, के वो मन्दर म्ह जाण आळा तै भीख माँगै। 3 जिब उसनै पतरस अर यूहन्ना ताहीं मन्दर म्ह जान्दे देख्या, तो उनतै भीख माँगै। 4 पतरस नै यूहन्ना के गेल्या उसकी ओड़ गौर तै देखके कहा, “म्हारी ओड़ लखा।” 5 आखर वो उनतै कुछ पाण की आस राखते होए उनकी ओड़ लखाण लाग्या। 6 फेर पतरस नै कहा, “चाँदी अर सोन्ना तो मेरे धौरे सै न्ही, पर जो मेरे धौरे सै वो तन्नै दियुँ सूँ, यीशु मसीह नासरी के नाम तै उठ अर चाल-फिर।” 7 पतरस नै उसका सोळा हाथ पकड़के उस ताहीं ठाया, अर जिब्बे उसके पायां अर टाखणयां म्ह ताकत आगी। 8 वो उछळते-कूदते खड्या होगया अर चाल्लण-फिरण लाग्या, अर चाल्दा, अर कुद्दा, अर परमेसवर की जय-जयकार करदा होया उनके गेल्या मन्दर म्ह गया। 9 सारे आदमियाँ नै उस ताहीं चाल्दे-फिरदे अर परमेसवर की जय-जयकार करदे होए देखके, 10 उस ताहीं पिच्छाण लिया के यो वोए सै जो मन्दर के “सुन्दर” नामक फाटक पै

बैठकें भीख मांग्या करै था, अर उस घटना तै जो उसके गेल्या होई थी वे घणे अचम्भित अर हैरान होए। 11 जिब वो पतरस अर यूहन्ना ताहीं पकड़े होए था, तो सारे माणस घणे हैरान होन्दे होए उस बरामदा म्ह जो सुलेमान का कुह्वावै सै, उनकै धोरै भाज्जे आये। 12 न्यू देखकै पतरस नै माणसां तै कह्वा, “हे इस्राएलियों, थम इस माणस पै क्यातै हैरान होवो सो, म्हारी ओड़ क्यातै इस ढाळ लखाओ सों, के मान्ना हमनै-ए अपणी सामर्थ या भगतितै इस ताहीं चाल्लण-फिरण जोग्गा बणा दिया। 13 अब्राहम अर इसहाक अर याकूब के परमेसवर, म्हारे पूर्वजां के परमेसवर नै अपणे सेवक यीशु मसीह की महिमा करी, जिस ताहीं थमनै पकड़वा दिया, अर जिब राज्यपाल पिलातुस नै उस ताहीं छोड़ देण का विचार करया, फेर थमनै उसके स्याम्ही उसका इन्कार करया। 14 थमनै उस धर्मी अर पवित्र का इन्कार करया, अर बिनती करी के एक खूनी ताहीं थारे खात्तर छोड़ दिया जावै, 15 अर थमनै अनन्त जीवन के कर्ता ताहीं मार दिया, जिस ताहीं परमेसवर नै मरे होया म्ह तै जिन्दा करया, अर इस बात के हम गवाह सां। 16 मसीह यीशु के नाम म्ह बिश्वास के कारण इस माणस नै जिसनै थम जाणो सों, जिसनै थम इस बखत देख्खण लागरे सों, उस ताहीं ताकत दी सै, यो माणस यीशु के नाम म्ह अर मसीह यीशु पै बिश्वास के जरिये कती भला चंगा होया सै, जिसा के थम खुद देख सको सों।” 17 “इब हे भाईयो, मनै बेरा सै के थमनै अर थारे अगुवां नै यो काम अज्ञानता म्ह करया, क्यूँके थम न्ही जाणो थे के वो मसीह सै। 18 पर जिन बात्तां ताहीं परमेसवर नै सारे नबियाँ के मुँह तै पैहल्याए तै बता दिया था, के उसका मसीह दुख ठावैगा, उन ताहीं उसने इस्से ढाळ पूरा करया। 19 इस करके, पाप करणा छोड़ घो अर बोहड़ आओ के थारे पाप मिटाए जावै, जिसतै प्रभु के स्याम्ही तै सुख-चैन के दिन आवै, 20 अर वो यीशु ताहीं भेज्जै, जो थारे खात्तर पैहल्या तै ए मसीह ठहराया गया सै। 21 जरूरी सै के वो सुर्ग म्ह उस बखत ताहीं रहवै जिब ताहीं के वो सारी बात्तां का सुधार ना कर लेवै जिसका जिक्र पुराणे बखत तै परमेसवर नै अपणे पवित्र नबियाँ के मुँह तै करया सै। (aiōn g165) 22 जिस ढाळ के मूसा नबी नै कह्वा, ‘परमेसवर थारे भाईयो म्ह तै थारे खात्तर मेरै जिसा एक नबी भेज्जैगा, जो किमे वो थारे तै कहवै उसकी सुणीयो।’ 23 पर हरेक माणस जो उस नबी की न्ही सुणै, आदमियाँ म्ह तै नाश करया जावैगा।” 24 “अर शमूल तै लेके उसके पाच्छे आळा ताहीं जितने नबी बोल्ले उन सारया नै इन दिनां का सन्देशा दिया सै। 25 थम सारे नबियाँ की ऊलाद अर उस करार के हिस्सेदार सो, जो परमेसवर नै थारे बाप-दादां तै करया, जिब उसने अब्राहम तै कह्वा, ‘तेरी पीढ़ी के जरिये धरती के सारे खानदान आशीष पावैगें।’ 26 परमेसवर नै अपणे सेवक ताहीं मरे होया म्ह तै ठाकै सब तै पैहल्या थारे धोरै भेज्या, के थारे म्ह तै हरेक ताहीं उसकी बुराईयाँ तै पलटा के आशीष देवै।”

4 जिब वे आदमियाँ तै न्यू कहण लागरे थे, तो याजक अर मन्दर के सरदार अर सदूकी दल के लोग उनपै चढ़ आये। 2 क्यूँके वे घणे

खुन्दक म्ह थे के वे आदमियाँ ताहीं सिखावै थे, अर यीशु का उदाहरण दे-देके प्रचार करै थे, के परमेसवर मुर्दा नै एक दिन जिन्दा करैगा जिसा उसनै यीशु ताहीं करया। 3 उननै उन ताहीं बन्दी बणाके दुसरे दिन तक हवालात म्ह राख्या क्यूँके साँझ होग्यी थी। 4 पर वचन के सुणण आळा म्ह तै घणाए नै बिश्वास करया, अर उनकी गिणती पाँच हजार माणसां के करीबन होग्यी थी। 5 दुसरे दिन इसा होया के उनके सरदार, यहूदी अगुवें, शास्त्री 6 अर महायाजक हन्ना, कैफा, यूहन्ना, सिकन्दर अर जितने महायाजक के कुणबे के थे, सारे यरुशलेम नगर म्ह एक जगहां कट्टे होए। 7 वे उन ताहीं बिचाळै खड्या करके बुड़झण लागरे के थमनै यो काम किसके सामर्थ तै अर किसके नाम तै करया सै। 8 फेर पतरस नै पवित्र आत्मा तै भरके उनतै कह्वा, 9 “हे माणसां के सरदारो अर यहूदी अगुवें, इस कमजोर माणस गेल्या जो भलाई करी गयी सै, जै आज म्हारै तै उसके बारे म्ह पूछताछ करी जावै सै, के वो किस ढाळ ठीक होया।” 10 तो थम सारे अर सारे इस्राएली आदमी जाण लेवै के यीशु मसीह नासरी के नाम तै जिस ताहीं थमनै क्रूस पै चढ़ाया, अर परमेसवर नै मरे होया म्ह तै जिन्दा करया, यो माणस थारे स्याम्ही भला-चंगा खड्या सै। 11 यीशु मसीह ए वो पत्थर सै जिस ताहीं थम राजमिस्त्रियाँ नै नकार दिया, अर वो सिरे का पत्थर होग्या। 12 “यीशु के अलावा किसे दुसरे नाम म्ह उद्धार कोनी, क्यूँके सुर्ग के तळै माणसां म्ह और कोए दुसरा नाम कोनी दिया गया, सिर्फ यीशु के जरिये हम उद्धार पा सकां सां।” 13 जिब उननै पतरस अर यूहन्ना की हिम्मत देख्खी, अर न्यू बेरा लाग्या के ये अनपढ़ अर साधारण सा माणस सै, तो अचम्भा करया, फेर उन ताहीं पिच्छाण्या के ये यीशु के गेल्या रहे सै। 14 उस माणस ताहीं जो ठीक होया था, पतरस अर यूहन्ना के गेल्या खड़े देखके, वे बिरोध म्ह किमे न्ही कह सके। 15 पर उन ताहीं यहूदी अगुवां की सभा तै बाहर जाण का हुकम देके, वे आप्पस म्ह विचार करण लागे, 16 “हम इन माणसां के गेल्या के करा? क्यूँके यरुशलेम नगर के सारे रहणीया नै बेरा पाटरया सै, के इनके जरिये एक मशहुर चमत्कार दिखाया गया सै, अर हम उसके बारे म्ह नाट न्ही सकदे। 17 पर माणसां म्ह इस सुसमाचार का और घणा प्रसार ना हो।” 18 फेर उन ताहीं बुलाया अर चेतावनी देके न्यू कह्वा, “यीशु के नाम पै ना तो वे चर्चा करै अर ना सिखाइयो।” 19 पर पतरस अर यूहन्ना नै उन ताहीं जवाब दिया, “थमे न्याय करो, के यो परमेसवर के धोरै भला सै के हम परमेसवर की बात तै बढ़के थारी बात मान्नां। 20 क्यूँके यो तो म्हारै तै न्ही हो सकदा के जो हमनै देख्या अर सुणया सै, वो न्ही कहां।” 21 फेर उननै उन ताहीं और धमकाके छोड़ दिया, क्यूँके आदमियाँ के कारण उन ताहीं सजा देण का कोए मौक्का न्ही मिल्या, इस करके के जो घटना होई थी उसके कारण सारे आदमी परमेसवर की बड़ाई करै थे। 22 वो माणस जो अचम्भे के काम तै ठीक होया था, चाळीस बरस तै घणी उम्र का था। 23 वे छूट के अपणे साथियाँ के धोरै आए, अर जो किमे प्रधान याजकां अर यहूदी अगुवां नै उनतै कह्वा था, उन ताहीं सुणया दिया।

24 न्यू सुणकै उननै एक मन होकै ठाडू आवाज तै परमेसवर तै कह्या, “हे माल्लिक,” तू वोए सै जिसनै सुर्ग अर धरती अर समुन्दर अर जो किमे उन म्ह सै बणाया सै। 25 तन्नै पवित्र आत्मा के जरिये अपणे सेवक म्हारे पूर्वज दाऊद के मुँह तै कह्या, “गैर यहूदियाँ नै रोळा क्यातै मचाया? अर देश-देश के माणसां नै क्यातै बेकार म्ह बात सोच्ची?” 26 प्रभु अर उसके अभिषिक्त के बिरोध म्ह धरती के राजा खड़े होए, अर हाकिम एक सेत्ती कठ्ठे होए। 27 “क्यूँके साच्चए तेरे सेवक यीशु के बिरोध म्ह, जिसका तन्नै अभिषेक करया, हेरोदेस अर पुन्तियुस पिलातुस भी गैर यहूदियाँ अर इस्राएलियाँ के गेल्या इस नगर म्ह कठ्ठे होए, 28 के जो किमे पैहल्या तै तेरी सामर्थ अर बुद्धि तै ठहरा था वोए करै। 29 इब हे प्रभु, उनकी धमकियाँ नै सुण, अर अपणे दास्सां ताहीं यो वरदान दे के तेरा वचन बड़ी हिम्मत तै सुणावै। 30 ठीक करण के खात्तर तू अपना हाथ बढ़ा के चमत्कार अर अनोक्खे काम तेरे पवित्र सेवक यीशु के नाम तै करे जावै।” 31 जिब उननै प्रार्थना कर ली, तो वा जगहां जित्त वे कठ्ठे थे काम्बगी, अर वे सारे पवित्र आत्मा तै भरगे, अर परमेसवर का वचन हिम्मत तै सुणान्दे रहे। 32 विश्वास करण आळा का टोळ एक चित्त अर एक मन का था, उरै ताहीं के कोए भी अपणी सम्पत्ति अपणी न्ही कहवै था, पर सारा किमे साइझी म्ह था। 33 प्रेरित बड़ी सामर्थ तै प्रभु यीशु के जिन्दा होण की गवाही देन्दे रहे, अर उन सारया पै घणा अनुग्रह था। 34 अर उन विश्वासियाँ म्ह कोए भी गरीब कोनी था, क्यूँके जिनके धोरै धरती या घर थे, वे उननै बेच-बेचकै, बिकी होई चिज्जां का दाम ल्यावै थे, अर उस ताहीं प्रेरितां के पायां म्ह धरै थे। 35 अर जिसी जिसकी जरूरत होवै थी, उसके मुताबिक हरेक ताहीं बांड दिया करै थे। 36 यूसुफ नाम का साइप्रस टापू का एक लेवी था जिसका नाम प्रेरितां नै बरनबास (यानिके उत्साहित करण आळा) धरया था। 37 उसकी किमे धरती थी, जिस ताहीं उसनै बेच्या, अर दाम के रपिये प्रेरितां के पायां म्ह धर दिए।

5 हनन्याह नाम का एक माणस अर उसकी घरआळी सफीरा नै अपणी कुछ जमीन बेची। 2 अर उसके दाम म्ह तै कुछ अपणे खात्तर राख लिया, अर या बात उसकी घरआळी भी जाणै थी, उसका एक हिस्सा ल्याकै प्रेरितां के पायां म्ह धर दिया। 3 पतरस बोल्या, “हे हनन्याह! शैतान नै तेरे मन म्ह या बात क्यातै घाल्ली के तू पवित्र आत्मा तै झूठ बोल्लै, अर जमीन के दाम म्ह तै किमे राख लेवै? 4 के बेचण तै पैहल्या वा जमीन तेरी कोनी थी? अर जिब बिकगी तो उस धन पै तेरा हक कोनी था? तन्नै या बात अपणे मन म्ह क्यातै सोच्ची? तन्नै माणसां तै न्ही, पर परमेसवर तै झूठ बोल्या सै।” 5 या बात सुणदे हनन्याह जमीन पै गिर पड्या अर जी लिकड़ग्या, सारे सुणण आळे घणे डरगे। 6 फेर जवानां नै उठकै उसकी लाश ताहीं कपड़े म्ह लपेटा अर बाहरणै ले जाकै गाड़ दिया। 7 करीबन तीन घंटा के पाच्छे उसकी घरआळी, जिसनै बेराए कोनी था जो किमे होया था, भीत्तर आई। 8 फेर पतरस नै उसतै कह्या, “मन्नै बता के थम दोनुआं नै वा जमीन इतनै म्ह बेची थी?” वा बोल्ली,

“हाँ, इतनै ए म्ह।” 9 पतरस नै उसतै कह्या, “या के बात सै के थम दोनुआं नै प्रभु की आत्मा ताहीं परखण खात्तर एक्का करया? लखा, तेरे धणी नै गाडुण आळे बाहरणै ए खड़े सै, अर तन्नै भी बाहरणै ले जावैगे।” 10 फेर वा जिबे उसकै पायां म्ह गिर पड़ी, अर जी लिकड़ग्या, अर जवानां नै भीत्तर आकै उस ताहीं मरया पाया, अर बाहरणै ले जाकै उसकै धणी के धोरै ए उस ताहीं भी गाड़ दिया। 11 यरुशलेम की सारी कलीसिया अर इन बात्तां के सारे सुणनियें भोत घणे डरगे। 12 प्रेरितां के जरिये घणे चमत्कार अर अनोक्खे काम आदमियाँ के बिचाळे दिखाए जावै थे, अर वे सारे एक चित्त होकै सुलैमान के बरामदे म्ह कठ्ठे होया करे थे। 13 पर औरां म्ह तै किसे और की या हिम्मत कोनी होवै थी के उन म्ह जा मिले, फेर भी आदमी उनकी बड़ाई करै थे। 14 प्रभु म्ह विश्वास करण आळी की गिणती बढ़ती गई भोत घणे विश्वासी प्रभु म्ह आ मिले, लोग-लुगाईयाँ का एक भोत बड़ा टोळ बणग्या। 15 जो प्रेरित करण लागरे थे, उसकी बजह तै माणस, बिमारां ताहीं सड़कां पै ल्या-ल्याकै, खाट-खटोल्यां पै लिटा देवें थे, के जिब पतरस आवै, तो उसकी छाया-ए उन म्ह तै किसे पै पड़ जावै। 16 यरुशलेम नगर के लोवै-धोवै के नगरां तै भी घणे माणस बिमारां अर भुंडी ओपरी आत्मायाँ के सताए होया ताहीं चेल्यां के धोरै ल्या-ल्याकै, कठ्ठे होवै थे, अर सारे ठीक कर दिए जावै थे। 17 फेर महायाजक अर उसके सारे मित्तर जो सदकियाँ के पंथ के थे, प्रेरितां तै जळण लागगे। 18 अर प्रेरितां ताहीं पकड़कै जेळ म्ह बन्द कर दिया। 19 पर रात नै प्रभु के एक सुर्गदूत नै जेळ के किवाड़ खोल के उन ताहीं बाहरणै ल्याकै कह्या, 20 “जाओ, मन्दर म्ह खड़े होके अनन्त जीवन की सारी बात आदमियाँ ताहीं सुणाओ।” 21 वे न्यू सुणकै सबेरा होन्दे मन्दर म्ह जाकै उपदेश देण लागगे। फेर महायाजक अर उसके मित्तरां नै आकै यहूदी अगुवां की सभा अर इस्राएलियाँ के सारे बुजुर्गां ताहीं कठ्ठे करया, अर जेळ म्ह कहवां भेज्या के उन ताहीं ल्याओ। 22 पर मन्दर के पैहरेदारां नै उड़ै पोहचकै उन ताहीं जेळ म्ह कोन्या पाया, अर बोहड़कै संदेशां दिया, 23 “हमनै जेळ ताहीं घणी चौकसी तै बन्द कर राख्या था, अर पैहरेदारां ताहीं बाहरणै दरवाज्यां पै खड़े पायां, पर जिब खोल्या, तो भीत्तर कोए ना मिल्या।” 24 जिब मन्दर के सरदार अर प्रधान याजकां नै या खबर सुणी, तो वे घबरागे थे, अर वे यो विचार करण लागगे के इन बात्तां का नतिज्जा के होगा! 25 इतनै म्ह किसे नै आकै उन ताहीं बताया, “देख्यो, जिन ताहीं थमनै जेळ म्ह बन्द कर राख्या था, वे माणस मन्दर म्ह खड़े होकै आदमियाँ नै उपदेश देण लागरे सै।” 26 फेर सरदार, पैहरेदारां के गेल्या ओड़ै जाकै, प्रेरितां ताहीं यहूदी अगुवां की सभा के स्याम्ही लीआया, पर हंगे तै न्ही, क्यूँके वे आदमियाँ तै डरै थे के कन्दे म्हारै पै पत्थर ना बरसा देवें। फेर महायाजक नै उनतै बुझ्ग्या, 28 “के हमनै थारे ताहीं चित्ताके हुकम न्ही दिया था के थम इस नाम तै उपदेश ना दियो? फेरभी, थमनै सारे यरुशलेम नगर ताहीं अपणे उपदेश तै भर दिया सै अर उस माणस की हत्या का कसूर थम म्हारै पै लगाणा चाहो सो।” 29 फेर पतरस अर दुसरे प्रेरितां नै जवाब दिया,

“माणसां के हुकम तै बढ़कै परमेसवर के हुकम का पालन करणा ए म्हारा फर्ज सै। 30 म्हारे पूर्वजां के परमेसवर नै यीशु ताहीं मुर्दा म्ह तै जिन्दा करया, जिस ताहीं थमनै क्रूस पै लटककै मार दिया था। 31 उससे ताहीं परमेसवर नै प्रभु अर उद्धारकर्ता ठहराया अर परमेसवर नै मसीह यीशु ताहीं अपने सोळे हाथ कान्ही बैठाया, ताके इस्राएल के माणस पाप करणा छोड़ दे, अर अपने पापां खातर उन ताहीं माफी मिल सकै। 32 हम इन बातों के गवाह सां अर उससे तरियां पवित्र आत्मा भी, जिस ताहीं परमेसवर नै उन ताहीं दिया सै जो उनका हुकम मान्ने सै।” 33 यहूदी अगुवां की सभा के सारे माणस या बात सुणके जळगे, अर प्रेरितां ताहीं मारणा चाह्वा। 34 पर गमलीएल नामक एक फरीसी नै जो शास्त्री अर सारे आदमियाँ म्ह आदर-मान राख्खे था, यहूदी अगुवां की सभा म्ह खड़े होकै प्रेरितां ताहीं थोड़ी देर खातर बाहरणै ले जाण का हुकम दिया। 35 फेर वो बोल्या, “हे इस्राएलियों, थम जो किमे इन माणसां गैल करणा चाहवो सो, सोच-समझके करियो। 36 इन दिनां तै पैहल्या थियूदास भी दावा करै था के मै भी किमे सूं, अर तकरीबन चार सौ माणस उसकै चेल्लें बणगे, पर वो मारया गया, अर उस ताहीं मानण आळे सब लोग बिखरगे अर उनका नामो-निशान भी कोनी रह्वा। 37 उसकै पाछै नाम लिखाई के दिनां म्ह गलीलवासी यहूदा आया, अर कई आदमी अपनी ओड़ कर लिये, वो भी मर गया, अर जितने आदमी उसनै मान्ने थे, सारे तित्तर-बितर होग्ये। 38 ज्यांतै मै थारे तै कहूँ सूं, इन माणसां तै दूर ए रहो अर इनतै किमे काम ना राख्खो, क्यूँके जै यो धर्म या काम माणसां की ओड़ तै हो फेर तो मिट जावैगा। 39 पर जै परमेसवर की ओड़ तै सै, तो थम उन ताहीं कदे भी न्ही मिटा सकदे। कदे इसा ना हो के थम परमेसवर तै भी लड़णआळे ठहरो।” फेर उननै उसकी बात मान ली। 40 अर प्रेरितां ताहीं बुलाकै छितवाया, अर यो हुकम देके छोड़ दिया के यीशु के नाम तै दुबारा कोए बात ना करणा। 41 वे इस बात तै राज्जी होकै यहूदी अगुवां की सभा के स्याम्ही तै चले गये, के हम यीशु के नाम के खातर बेईज्जत होण के जोगे तो ठहरे। 42 वे हरेक दिन मन्दर म्ह अर घर-घर म्ह उपदेश करण तै, अर इस बात का सुसमाचार सुणाण तै के यीशु ए मसीह सै न्ही रुके।

6 उन दिनां म्ह जिब चेल्यां की गिणती घणी बधण लाग्गी, फेर यूनानी भाषा बोल्लण आळे यहूदी चेल्लें इब्रानी भाषा बोल्लण आळे यहूदी चेल्यां पै बिरड़ाण लाग्गे, के हरेक दिन पईसा अर खाणे के मामले म्ह म्हारी बिधवायाँ की सुध कोनी ली जान्दी। 2 फेर उन बारहां चेल्यां नै उन बिश्वासियाँ ताहीं जो यरुशलेम म्ह थे, अपने धोरे बुलाके कह्वा, “यो ठीक कोनी के हम परमेसवर का वचन छोड़के खिलाण-पिलाण की सेवा म्ह रह्वां। 3 इस करके, हे बिश्वासी भाईयो, अपने म्ह तै सात बढ़िया नाम्मी माणसां ताहीं जो पवित्र आत्मा अर बुद्धि तै भरे हो, जिनके बारें म्ह सब नै बेरा हो, छौट ल्यो, के हम उननै इस काम पै ला देवां। 4 पर हम तो प्रार्थना म्ह अर वचन के प्रचार अर शिक्षा देण की सेवा म्ह लाग्गे रहवांगें।” 5 या बात सारे टोळ नै आच्छी लाग्गी, अर उननै स्तिफनुस

नामक एक माणस ताहीं जो बिश्वास अर पवित्र आत्मा तै भरया था, अर फिलिप्पुस, अर प्रुखुरुस, अर नीकानोर, अर तीमोन, अर परमिनास, अर अन्ताक्रियावासी नीकुलाउस ताहीं जो यहूदी पंथ म्ह आ ग्या था, छौट लिया। 6 इन ताहीं प्रेरितां के स्याम्ही ल्याए अर उननै प्रार्थना करके उनपै हाथ धरे, ताके वे उस काम नै करै। 7 परमेसवर का वचन फैलदा गया अर यरुशलेम नगर म्ह चेल्यां की गिणती घणी बढ़दी गई, अर भोत सारे यहूदी याजक भी प्रभु यीशु के सुसमाचार पै बिश्वास करके मानणआळे होगे। 8 स्तिफनुस अनुग्रह अर सामर्थ तै भरया-पूरा होके आदमियाँ म्ह बड़े-बड़े अनोक्खे काम अर चमत्कार दिखाया करै था। 9 फेर वो आराधनालय म्ह तै जो लिबिरतिनों की कुहावे थी, अर कुरेनी अर सिकन्दरिया अर किलिकिया अर आसिया परदेस के आदमियाँ म्ह तै कई माणस उठके स्तिफनुस तै बहसण लाग्गे। 10 पर उस ज्ञान अर उस पवित्र आत्मा का जिसतै वो बात करै था, वे सामना न्ही कर सके। 11 इसपै उननै कई आदमियाँ ताहीं उकसाया जो कहण लाग्गे, “हमनै इस ताहीं मूसा नबी अर परमेसवर के बिरोध म्ह बुराई की बात कहन्दे होए सुण्या सै।” 12 उननै स्तिफनुस के बिरुध्द माणसां, यहूदी अगुवां अर शास्त्रियाँ ताहीं उकसाया अर आके उस ताहीं पकड़के यहूदी अगुवां की सभा के स्याम्ही ले गये। 13 अर उननै झूठे गवाह खड़े करे, जिननै स्तिफनुस पै यो इलजाम लगाके, कह्वा, “यो माणस इस पवित्र जगहां अर मूसा के नियम-कायदे के बिरोध म्ह बुराई करणा न्ही छोड़दा। 14 क्यूँके हमनै उस ताहीं न्यू कहन्दे सुण्या सै के योए यीशु नासरी इस मन्दर नै गेर देवैगा, अर उन रिवाज्जां नै बदल देवैगा जो मूसा नबी नै म्हारै ताहीं सौंपी सै।” 15 फेर सारे आदमियाँ नै जो यहूदी अगुवां की सभा म्ह बैठे थे, उसपै निगाह गड़ाई तो उसका मुँह सुर्गदूत जिसा दिख्वा।

7 फेर महायाजक नै स्तिफनुस तै बुझ्झया, “के यो इलजाम सच सै?” 2 उसनै कह्वा, “हे भाईयो, अर बुजुर्गों सुणो। म्हारा पूर्वज अब्राहम हारान नगर म्ह बसण तै पैहल्या जिब वो मेसोपोटामिया परदेस म्ह था, तो तेजोमय परमेसवर नै उस ताहीं दर्शन दिया, 3 अर उसतै बोल्या, ‘तू अपने देश अर अपने कुण्बे म्ह तै लिकड़के उस देश म्ह जा, जिस ताहीं मै तन्नै दिखाऊँगा।’” 4 फेर अब्राहम कसदियो के देश तै लिकड़के हारान नगर म्ह जा बस्या। उसकै पिता की मौत के पाछै परमेसवर नै उस ताहीं ओड़ै तै इस देश म्ह ल्याके बसाया जिसमह इब हम बसां सां, 5 अर उस ताहीं कुछ भी विरासत न्ही दी, बल्के पैर धरण भर की भी उस म्ह जगहां कोनी देई, पर परमेसवर नै वादा करया, के मै यो देश तेरे अर तेरे बाद तेरे वंश के हाथ कर दियुँगा, हालाकि उस बखत उसके कोए बेटा कोनी था। 6 अर परमेसवर नै यो भी कह्वा, “वे लोग उननै गुलाम बणा लेंगे, अर चार सौ साल ताहीं उनकै गैल भुंडा बरताव करैगें।” 7 फेर परमेसवर नै यो भी कह्वा, “के जिस जात के वे गुलाम होवेंगें, उस ताहीं मै सजा देऊँगा, अर इसके बाद वे लिकड़के इस्से देश म्ह मेरी भगति करैगें।” 8 अर परमेसवर नै अब्राहम के गैल खतने का करार

करया, जिब अब्राहम के बेटे इसहाक का जन्म होया, तो आंटवै दिन उसका खतना करया गया, अर इसहाक तै याकूब अर याकूब तै बारहां कुलपति पैदा होए। 9 “कुलपतियाँ नै अपने भाई यूसुफ तै जळण करके उस ताहीं मिस्र देश जाण आळा ताहीं बेच्या। पर परमेसवर उसके गेल्या था, 10 अर परमेसवर नै यूसुफ ताहीं उसके सारे क्लेशां तै छुड़ाके मिस्र देश के राजा फिरौन की निगांह म्ह अनुग्रह अर बुद्धि दी, अर फिरौन नै उस ताहीं मिस्र देश पै अर अपने सारे घर पै हाकिम बना दिया। 11 “जिब यूसुफ मिस्र देश का हाकिम था, तो सारे मिस्र देश अर कनान देश म्ह अकाळ पड़ग्या, जिसतै हरेक जगहां हाहाकार माचग्या, अर म्हारे पूर्वजां ताहीं नाज कोनी मिलै था। 12 पर याकूब नै न्यू सुणके के मिस्र देश म्ह नाज सै, म्हारे पूर्वजां ताहीं नाज मोल लेण खात्तर पैहली बार भेज्या। 13 जिब वे दुसरी बार नाज मोल लेण खात्तर गये, तो यूसुफ नै खुद ताहीं अपने भाईयाँ पै जाहिर करया, अर यूसुफ के परिवार के बारे म्ह फिरौन नै बेरा पाटग्या। 14 फेर यूसुफ नै अपने बाप याकूब अर अपने साबतै कुणबे ताहीं, जो पचत्तर माणस थे, बुलवा भेज्या। 15 फेर याकूब मिस्र देश गया, अर कुछ सालां बाद ओड़ेए वो अर म्हारे पूर्वज मरग्ये। 16 उनकी लाश शकेम नगर म्ह पहुँचाके उस कब्र म्ह धरी गई, जिस ताहीं अब्राहम नै चाँदी देकै शकेम नगर म्ह हमोर की ऊलाद तै मोल लिया था।” 17 “पर जिब उस वादा के पूरे होण का बखत लौवै आया जो परमेसवर नै अब्राहम तै करया था, तो मिस्र देश म्ह वे आदमी बढ़ये अर घणे होग्ये। 18 फेर मिस्र देश म्ह दुसरा राजा होया जो यूसुफ ताहीं कोनी जाणे था। 19 उसनै म्हारे जाति भाईयाँ तै हेरा-फेरी करके म्हारे पूर्वजां के गेल्या उरै ताहीं भुंडा बीवार करया, के अपने माँ-बाप नै अपने बाळकां ताहीं बगाणे पड़गे, के एक भी बाळक जिन्दा ना रहवें। 20 “उस बखत मूसा नबी पैदा होया। वो परमेसवर की निगांह म्ह घणा सुथरा था। वो तीन महिन्ने ताहीं अपने बाप के घरां लुहको के पाळया गया। 21 जिब उसके परिवार आळे उस ताहीं और न्ही लहको सके, तो उननै मूसा ताहीं छोड़णा पड्या, फेर फिरौन की बेट्टी नै उस ताहीं ठा लिया, अर अपना बेट्टा करके पाळया। 22 मूसा नबी नै मिस्र देश की सारी विद्या पढ़ाई गई, अर वो बोलण म्ह अर काम करण म्ह, दोनुआ म्ह सामर्थी था।” 23 “जिब मूसा नबी चाळीस साल का होया, तो उसके मन म्ह आया के मै अपने इस्राएली भाईयाँ तै मिलूं। 24 उसनै एक इस्राएली माणस पै जुल्म होन्दे देखके उस ताहीं बचाया, अर उस मिस्री आदमी ताहीं मारके सताए होए का बदला लिया। 25 मूसा नै सोच्या के उसके भाई-बन्धु जाण जावेंगे के उन ताहीं गुलामी तै छुटकारा दुआण खात्तर परमेसवर उसका इस्तमाल करण लाग रह्या सै, पर वे इस ताहीं समझ न्ही पाये। 26 दुसरे दिन जिब वे आप्पस म्ह लड़े थे, तो वो उड़ै तै आण लिकड़या, अर न्यू कहके उननै मेल करण के खात्तर समझाया, ‘हे भले माणसां, थम तो भाई-भाई सो, एक-दुसरे पै क्यातै जुल्म करो सो?’” 27 “पर जो अपने पड़ोसी पै जुल्म करै था, उसनै उस ताहीं न्यू कहके धक्का दिया, ‘तेरे ताहीं किसनै म्हारे पै हाकिम अर न्यायाधीश

ठहराया सै? 28 के जिस ढाळ तै तन्नै काल उस मिस्री आदमी ताहीं मार दिया मन्नै भी मार देणा चाहवै सै?’ 29 या बात सुणके मूसा नबी डरके भाज्या अर मिधान देश म्ह परदेशी होके रहण लाग्या, अर ओड़े उसके दो बेट्टे पैदा होए।” 30 “जिब मूसा ताहीं ओड़े रहन्दे पूरे चाळीस साल बीतगे, तो परमेसवर नै एक सुर्गदूत के रूप म्ह सीनै पहाड़ के बण म्ह उस ताहीं बळदी होई झाड़ी की ज्वाला म्ह दर्शन दिया। 31 मूसा नबी नै यो बळदी होई झाड़ी का दर्शन देखके हैरानी होई, अर जिब देखण खात्तर लौवै गया, तो प्रभु की या वाणी सुणाई दी, 32 ‘मै तेरे पूर्वज, अब्राहम, इसहाक, याकूब का परमेसवर सूँ; फेर मूसा नबी डर के मारे काम्बग्या, उरै ताहीं के उसकी देखण की हिम्मत भी कोनी होई।’ 33 “फेर प्रभु नै मूसा नबी तै कह्या, ‘अपणे पायां तै जूती उत्तार ले, क्यूँके जिस जगहां तू खड्या सै, वा पवित्र धरती सै। 34 मन्नै साच्ये अपने आदमियाँ की जो मिस्र देश म्ह सै, भुन्डी हालत देखी सै, अर उनकी आह अर उनका रोणा सुणया सै, ज्यातै उन ताहीं छुड़ाण के खात्तर उतरया सूँ। इब आ, मै तन्नै मिस्र देश भेज्जूंगा।’” 35 “जिस मूसा नबी ताहीं उननै न्यू कहके नकारा दिया था, ‘तेरे ताहीं किसनै म्हारे पै हाकिम अर न्यायाधीश ठहराया सै?’ उससे ताहीं परमेसवर नै हाकिम अर छुड़ाण आळा ठहराके उस सुर्गदूत के जरिये जिसनै उस ताहीं झाड़ी म्ह दर्शन दिया था, भेज्या। 36 योए माणस मिस्र देश अर लाल समुन्दर अर जंगळ म्ह चाळीस साल ताहीं अनोक्खे काम अर चमत्कार दिखा-दिखाके उन ताहीं लिकाड़ ल्याया।” 37 यो वोए मूसा नबी सै, जिसनै इस्राएल के माणसां तै कह्या, “परमेसवर थारे भाईयाँ म्ह तै थारे खात्तर मेरे जिसा एक नबी ठावैगा। 38 यो वोए सै, जिसनै जंगळ म्ह इस्राएली मण्डळी के बिचाळे उस सुर्गदूत के साथ सीनै पहाड़ पै उसतै बात करी, अर म्हारे पूर्वजां कै गेल्या था, उससे ताहीं जिन्दा वचन मिल्या ताके म्हारे तक पोहोचावै।” 39 पर म्हारे पूर्वजां नै उसकी मानणी कोनी चाह्नी, बल्के उस ताहीं हटाके अपने मन मिस्र देश की ओड़ पलटे, 40 अर मूसा नबी के भाई हारुन तै, कह्या, म्हारे खात्तर इसा देवता बणा, जो म्हारे आगै-आगै चाल्लै, क्यूँके यो मूसा नबी जो हमनै मिस्र देश तै लिकाड़ ल्याया, हमनै न्ही बेरा के उसके के होया? 41 उन दिनां म्ह उननै एक बाछड़े की मूर्ति बणाके उसके आगै बलि चढ़ाई, अर अपने हाथ्यां तै बणाई होई मूर्ति तै मग्न होण लागगे। 42 इस खात्तर परमेसवर नै मुँह मोड़के उन ताहीं छोड़ दिया, के अकास के सूरज चाँद सितारां ताहीं परमेसवर मानके पुजै, जिसा नबियाँ की किताब म्ह लिख्या सै, “हे इस्राएल के घराणे, के थम जंगळ म्ह चाळीस साल ताहीं पशुबलि अर अन्नबलि मेरै ताहीं ए चढ़ान्दे रहे?” 43 “थम उस तम्बू ताहीं जिस म्ह मोलेक देवता की मूर्ति अर अपने रिफान देवता, के तारे नै लिये फिरे, यानिके उन मूरतां ताहीं जिन ताहीं थमनै आराधना करण के खात्तर बणाया था। इस करके मै थारे ताहीं बेबीलोन देश तै परली ओड़ ले जाके बसाऊंगा।” 44 “मिलापआळे तम्बू की जंगल-बियाबान म्ह म्हारे पूर्वजां के बिचाळे था, जिसा उसनै ठहराया जिसनै मूसा नबी तै कह्या, ‘जो रूप

तन्मै देखा सै, उसके मुताबिक इसनै बणा।' 45 उससे तम्बू नै म्हारे पूर्वज पाच्छले बखत तै पाकै यहोशू कै गेल्या उरै लियाये, जिस बखत के उननै उन दुसरी जात्तां पै हक पाया, जिन ताहीं परमेसवर नै म्हारै पूर्वजां कै स्याम्ही तै लिकाड़ दिया, अर वो तम्बू राजा दाऊद के बखत ताहीं रहया। 46 दाऊद पै परमेसवर नै अनुग्रह करया, राजा दाऊद नै याकूब के परमेसवर कै खातर रहण की जगहां बणाण की बिनती करी। 47 पर उसके बेटे राजा सुलैमान नै उसके खातर घर बणाया।" 48 पर परमप्रधान हाथ के बणाए होए घरां म्ह कोनी रहन्दा, जिसा के यशायाह नबी की किताब म्ह कह्या, 49 "परमेसवर कहवै सै, सुर्ग मेरा सिंहासन अर धरती मेरी पायां तळे की पीढ़ी सै, मेरे खातर थम किस ढाळ का घर बणाओगे? अर मेरे आराम कि कौण-सी जगहां होवैगी?" 50 के ये सारी चीज मेरे जरिये न्ही बणाई गई सै? 51 "हे जिद्दी, अर मन अर कान के खतनारहित आदमियो, थम सारी हाण पवित्र आत्मा का बिरोध करो सो। जिसा थारे पूर्वज करै थे, उससे तरियां ए थम भी करो सो। 52 के कोए इसा भी नबी था, जिस ताहीं थारे पूर्वजां नै न्ही सताया हो? उननै तो उस ताहीं भी मार दिया, जिननै भोत पैहले ए तै उस मसीहा के आण की मुनादी कर दी थी, जिस ताहीं इब थमनै धोकखे तै पकड़वा दिया अर मार दिया। 53 थमनै सुर्गदूतां कै जरिये ठहराये होए नियम-कायदे तो पाए, पर उसका पालन कोनी करया।" 54 ये बात सुणकै यहूदी अगुवें छो म्ह भरगे अर स्तिफनुस पै दाँत पिस्सण लागगे। 55 पर उसनै पवित्र आत्मा तै पूरी तरियां भरके सुर्ग की ओड़ देखा अर परमेसवर की महिमा अर यीशु ताहीं परमेसवर के सोळी ओड़ खड्या देखकै 56 कह्या, "देक्खो, मै सुर्ग नै खुल्या होया, अर माणस के बेटे ताहीं परमेसवर के सोळी ओड़ खड्या देखुं सू।" 57 फेर ये बात सुणते ए सुणण आळा नै चीखते होए अपने कान्ना पै हाथ रख लिये, अर वे छो म्ह एक साथ उसपै टूट पड़े, 58 अर स्तिफनुस ताहीं यरुशलेम नगर कै बाहरणै लिकाड़कै उसपै पत्थर बरसाण लागगे। गवाहां नै अपने लत्ते शाऊल नामक एक जवान कै पायां कै धोरै उतारकै धर दिए। 59 वे स्तिफनुस पै पत्थर बरसान्दे रहे, अर वो न्यू कहकै प्रार्थना करदा रह्या, "हे प्रभु यीशु, मेरी आत्मा ताहीं अपनाले।" 60 फेर गोड्डे टेककै ठाडू आवाज म्ह रुक्का मारया, "हे प्रभु, यो पाप उनपै मतना ला।" अर न्यू कह कै उसनै अपने प्राण दे दिए।

8 शाऊल उसकै मारण म्ह सहमत था। उससे दिन यरुशलेम नगर की कलीसिया म्ह घणा दंगा शरु होग्या अर प्रेरितां नै छोड़कै सारे के सारे यहूदिया अर सामरिया परदेस म्ह खिंड-मिंड होगये। 2 कुछ परमेसवर भगतां नै स्तिफनुस ताहीं कब्र म्ह धरया अर उसके खातर घणा बिलाप करया। 3 शाऊल कलीसिया नै सताण लागरया था, अर घर-घर म्ह बड़के माणसां अर लुगाईयां ताहीं घिसड़ा-घिसड़ा कै जेळ म्ह गेरे था। 4 जो बिश्वासी खिंड-मिन्ड होए थे, वे सुसमाचार सुणान्दे होए हान्डे, 5 अर फिलिप्पुस सामरिया परदेस के एक नगर म्ह जाकै माणसां म्ह मसीह का प्रचार करण लागया। 6 जो बात फिलिप्पुस नै कही उन

ताहीं आदमियां नै सुणकै अर जो चमत्कार वो दिखावै था उन ताहीं देख देखकै, एक चित्त होकै मन लगाया। 7 क्यूँके घणखरयां म्ह तै भुंडी ओपरी आत्मा ठाडू आवाज म्ह किलकी मारदी होई लिकड़ग्यी, अर घणखरे लकवे के बीमार अर लंगड़े भी ठीक करे गये, 8 अर उस नगर म्ह घणी खुशी मनाई गई। 9 उस नगर म्ह शमौन नाम का एक माणस था, जो जादू-टोणा करके सामरिया परदेस के आदमियां नै हैरान करदा अर खुद ताहीं एक बड़ड़ा माणस बतावै था। 10 छोट्या तै लेकै बड्डयां ताहीं सारे उसका आदर करके कहवै थे, "यो माणस परमेसवर की वा शक्ति सै, जो महान् कुहावै सै।" 11 उसनै घणे दिनां तै उन ताहीं अपने जादू के काम्मां तै हैरान कर राख्या था, ज्याते वे उसकी घणी मान्ने थे। 12 पर जब माणसां नै परमेसवर के राज्य अर यीशु मसीह के नाम का सुसमाचार, फिलिप्पुस के संदेश म्ह सुणया, तो सारे माणसां अर लुगाईयां नै बिश्वास करया अर सब नै बपतिस्मा ले लिया। 13 फेर शमौन नै खुद भी फिलिप्पुस के संदेश का बिश्वास करया अर बपतिस्मा लेकै उसकै गेल्या रहण लागया। वो चमत्कार अर बड़े-बड़े सामर्थ के काम होन्दे देखके हैरान होवै था। 14 जब प्रेरितां नै जो यरुशलेम नगर म्ह थे, सुणया के सामरिया परदेस के माणसां नै परमेसवर का वचन मान लिया सै तो पतरस अर यूहन्ना ताहीं उनके धोरै भेज्या। 15 उननै ओड़ै जाके उनके खातर प्रार्थना करी के पवित्र आत्मा पावै। 16 क्यूँके वो इब ताहीं इन म्ह तै किसे पै भी कोनी उतरया था, उननै तो सिर्फ प्रभु यीशु के नाम तै बपतिस्मा लिया था। 17 फेर प्रेरितां नै उनपै हाथ धरे अर उननै पवित्र आत्मा पाया। 18 जब शमौन नै देखा के प्रेरितां कै हाथ धरण तै पवित्र आत्मा दिया जावै सै, तो उनके धोरै रपिये ल्याकै कह्या, 19 "या शक्ति मन्ने भी घो, के जिस किसे पै हाथ धरुं वो पवित्र आत्मा पावै।" 20 पतरस नै उसतै कह्या, "तेरे रपिये तेरे गेल्या नाश होज्या, क्यूँके तन्मै परमेसवर का दान रपियां तै मोल लेण का विचार करया। 21 इस बात म्ह ना तेरा हिस्सा सै, ना हक, क्यूँके तेरा मन परमेसवर कै आगै सच्चा कोनी। 22 इस करके अपनी इस बुरी सोच नै छोड़के प्रभु तै प्रार्थना कर, हो सकै सै वो तेरे मन का यो बुरा विचार माफ करदे। 23 क्यूँके मै देखूँ सू के तू कड़वाहट तै भरया सै अर पाप के चुंगल म्ह फँसा सै।" 24 शमौन नै जवाब दिया, "थम मेरै खातर प्रभु तै प्रार्थना करो के जो बात थमनै कही, उन म्ह तै कोए भी मेरै पै न्ही आवै।" 25 आखर म्ह वे गवाही देकै प्रभु यीशु का वचन सुणाकै यरुशलेम नगर नै बोहड़गे, अर सामरिया के घणखरे गाम्मां म्ह सुसमाचार सुणान्दे गये। 26 फेर प्रभु के एक सुर्गदूत नै फिलिप्पुस तै कह्या, "उठ अर दक्षिण की ओड़ उस राह पै जा, जो यरुशलेम नगर तै गाज़ा नगर म्ह जावै सै।" यो बियाबान राह सै। 27 वो उठकै चल दिया, अर देक्खो, कूश देश का एक माणस आण लागरया था जो खोजा (किन्नर) अर कूशियों की राणी कन्दाके का मंत्री अर खजांची था। वो आराधना करण खातर यरुशलेम नगर म्ह आया था। 28 वो अपने रथ पै बैठ्या होया था, अर यशायाह नबी की किताब पढ़दा होया बोहड़ण लागरया था। 29

फेर पवित्र आत्मा नै फिलिप्पुस ताहीं कह्या, “लोवै जाके इस रथ कै गेल्या हो ले।” 30 फिलिप्पुस दौड़ कै रथ कै धोरे पोहचा अर उस ताहीं यशायाह नबी की किताब पढ़ते होए सुणया, अर बुझ्झया, “तू जो पढ़ै सै, के उसने समझै भी सै?” 31 वो बोल्या, “जिब ताहीं कोए मेरै ताहीं न्ही समझावै तो मै किस ढाळ समझूँ।” अर फिलिप्पुस तै बिनती करी के वो रथ पै चढ़के उसके धोरे बैठे। 32 पवित्र ग्रन्थ का जो पाठ वो पढ़ै था, वो यो था: “वो भेड़ की ढाळ मारण खात्तर पोहचाया गया, अर जिस तरियां मेम्ना अपणे ऊन काटण आळा के स्याम्ही बोल-बाल्ला रहवै सै, उस्से तरियां ए उसने भी अपणा मुँह कोनी खोल्या।” 33 “उस ताहीं अपमानित करया गया अर उस ताहीं कोए न्याय न्ही मिल्या। उसके बखत के माणसां का ब्यौरा कौण देवेगा? क्यूँके धरती तै उसका प्राण ठा लिया जावै सै।” 34 इसपै खोजे (किन्नर) नै फिलिप्पुस तै बुझ्झया, “मै तेरे तै बिनती करूँ सूँ, न्यू बता के नबी यो किसके बारे म्ह कहवै सै, अपणे या किसे दुसरे के बारे म्ह?” 35 फेर फिलिप्पुस नै बताणा शरु करया, अर इस्से पवित्र ग्रन्थ तै शरु करके उस ताहीं यीशु का सुसमाचार सुणाया। 36 राह म्ह चाल्दे-चाल्दे वे किसे तालाब के धोरे पोहवे। फेर खोजे नै कह्या, “लखा उरै पाणी सै, इब मन्ने बपतिस्मा लेण म्ह के रोक सै।” 37 फिलिप्पुस बोल्या, “जै तू पूरे मन तै विश्वास करै सै तो ले सकै सै।” उसने जवाब दिया, “मै विश्वास करूँ सूँ के यीशु मसीह परमेसवर का बेटा सै।” 38 फेर उसने रथ खड्या करण का हुकम दिया, अर फिलिप्पुस अर खोजा (किन्नर) दोन्नु तालाब म्ह बड़गे, अर उसने खोजा (किन्नर) ताहीं बपतिस्मा दिया। 39 जिब वे पाणी म्ह तै लिंकड़के ऊपरान आये, तो प्रभु का आत्मा फिलिप्पुस ताहीं ठा लेग्या, अर खोजे नै उस ताहीं दुबारा न्ही देख्या, अर वो खुश था क्यूँके परमेसवर नै उस ताहीं बचा लिया सै। 40 फिलिप्पुस अशदोद नगर म्ह आ लिंकड़या, अर जिब ताहीं कैसरिया नगर म्ह न्ही पोंहच्या, तब तक नगर-नगर सुसमाचार सुणान्दा गया।

9 शाऊल जो इब ताहीं प्रभु यीशु के चेल्यां ताहीं धमकाण अर मारण की धुन म्ह था, महायाजक के धोरे गया 2 अर उसतै दमिश्क नगर के आराधनालयों के नाम पै इस बाबत म्ह चिट्टियाँ माँगी के, के चाहे माणस हो, चाहे लुगाई हो, जिन नै वो इस पंथ म्ह पावै उन ताहीं बाँधके यरुशलेम नगर लियावै। 3 पर चाल्दे-चाल्दे जिब शाऊल अर उसके साथी दमिश्क नगर के लोवै पोहुच्ये, तो चाणचक अकास तै उसके चौगरदे नै चाँदणा चमक्या, 4 अर वो धरती पै पड़ग्या अर परमेसवर का यो शब्द सुणया, “हे शाऊल, हे शाऊल, तू मन्ने क्यातै सतावै सै?” 5 उसने बुझ्झया, “हे प्रभु, तू कौण सै?” उसने कह्या, “मै यीशु सूँ, जिस ताहीं तू सतावै सै। 6 पर इब उठके नगर म्ह जा, अर जो तन्ने करणा सै वो तेरे तै कह्या जावेगा।” 7 जो माणस उसके गेल्या थे, वे हैरान रहग्ये, क्यूँके बोल तो सुणे थे पर किसे ताहीं देख्खे कोनी थे। 8 फेर शाऊल धरती पै तै उठ्या, पर जिब आँख खोल्ली तो उस ताहीं किमे कोनी दिख्या, अर वे उसका हाथ पकड़के दमिश्क नगर म्ह ले गये। 9

वो तीन दिन ताहीं कोनी देख सक्या, अर ना खया अर ना पिया। 10 दमिश्क नगर म्ह हनन्याह नामक एक चेल्ला था, उसतै प्रभु यीशु नै दर्शन म्ह कह्या, “हे हनन्याह!” वो बोल्या, “हाँ, प्रभु!” 11 फेर प्रभु नै उसतै कह्या, “उठके उस गळी म्ह चल्या जा जो ‘सीध्धी’ कुहावे सै, अर यहूदा के घर म्ह शाऊल नामक एक तरसुसवासी नै बुझ, क्यूँके देख, वो प्रार्थना करण लागरया सै, 12 अर उसने दर्शन म्ह हनन्याह नामक एक माणस ताहीं भीत्तर आन्दे अर अपणे उप्पर हाथ धरदे देख्या सै, ताके दुबारा आँखां की रोशनी पावै।” 13 हनन्याह नै जवाब दिया, “हे प्रभु, मन्ने इस माणस के बारे म्ह घणाए तै सुणया सै के इसने यरुशलेम नगर म्ह तेरे आदमियाँ गेल्या बड्डी-बड्डी बुराई करी सै, 14 अर उरै भी इस ताहीं प्रधान याजकां की ओड़ तै हक मिल्या सै के जो माणस तेरे म्ह विश्वास राक्खै सै, उन सारया नै बाँधके यरुशलेम ले जा।” 15 पर प्रभु नै उसतै कह्या, “तू चल्या जा, क्यूँके वो तो गैर यहूदी अर राजयां अर इस्राएलियों के स्याम्ही मेरा नाम का प्रचार करण कै खात्तर चुण्या होया पात्र सै। 16 अर मै उसने बताऊँगा, के मेरे बारे बताण के खात्तर उसने किसा-किसा दुख ठाणा पड़ेगा।” 17 फेर हनन्याह उठके उस घर म्ह गया जड़े शाऊल रुक्या था, अर उसपै अपणा हाथ धरके कह्या, “हे भाई शाऊल, प्रभु, यानिके यीशु, जो उस राह म्ह, जिसतै तू आया तेरे ताहीं दिखया था, उस्से नै मेरे ताहीं भेज्या सै के तू दुबारा आँखां की रोशनी पावै अर पवित्र आत्मा तै भरया-पूरा हो जावै।” 18 अर जिब्बे उसकी आँखां तै छिल्के-से पड़े अर वो देखण लाग्या, अर उठके बपतिस्मा लिया, 19 फेर खाणा खाके हिम्मत पाई। शाऊल कई दिन उन चेल्यां के गेल्या रहया जो दमिश्क नगर म्ह थे। 20 अर वो जिब्बे दमिश्क नगर के आराधनालयों म्ह यीशु का प्रचार करण लाग्या, के वो परमेसवर का बेटा सै। 21 सारे सुणण आळे हैरान होके कहण लागगे, “के यो वोए माणस न्ही सै जो यरुशलेम नगर म्ह उन ताहीं जो यीशु मसीह के विश्वासी थे, उनका नाश करया करै था, अर उरै भी इस्से खात्तर आया था, के उनने बाँधके प्रधान याजकां के धोरे ले जावै?” 22 पर शाऊल और भी सामर्था होंदा गया, अर इस बात का सबूत दे-देके, के मसीह यीशु-ए सै, दमिश्क नगर के रहणीये यहूदियाँ का मुँह बन्द करदा रहया। 23 जिब शाऊल नै ओड़े रहन्दे होए भोत दिन बीतगे, तो यहूदियाँ नै मिलके उस ताहीं मारण की साजस रची। 24 पर उनकी साजिस का शाऊल नै बेरा पाटग्या। वे तो उसने मारण खात्तर रात-दिन फाटकां पै घात म्ह लागगे रहवै थे। 25 पर रात नै उसके चेल्यां नै उस ताहीं टोकरे म्ह बिठाया, अर दमिश्क नगर की चारदीवारी पै तै लटकाके उतार दिया। 26 यरुशलेम नगर म्ह पोहचके शाऊल नै चेल्यां के गेल्या मिल जाण की कोशिश करी, पर सारे उसतै डरै थे, क्यूँके उनने विश्वास कोनी होवै था, के वो भी चेल्ला सै। 27 पर बरनबास नै उस ताहीं अपणे गेल्या प्रेरितां के धोरे ले जाके उन ताहीं बताया के इसने किस ढाळ तै राह म्ह प्रभु यीशु ताहीं देख्या, अर यीशु नै इसतै बात करी, फेर दमिश्क नगर म्ह इसने किस तरियां हिम्मत दिखाके यीशु के नाम

का प्रचार करया। 28 वो उनके गेल्या यरुशलम नगर म्ह आन्दा-जान्दा रहया 29 अर बेधड़क होके प्रभु का नाम तै प्रचार करै था, अर यूनानी भाषा बोल्लण आळे यहूदियाँ के गेल्या बोलचाल अर बहस करै था, पर वे उसने मारण की कोशिश करण लागे। 30 न्यू जाणकै भाई उस ताहीं कैसरिया नगर लिआये, अर तरसुस नै भेज दिया। 31 इस तरियाँ सारे यहूदिया परदेस, अर गलील परदेस, अर सामरिया परदेस की कलीसिया नै चैन मिल्या, अर उसकी बढ़ोतरी होन्दी गई, अर वा प्रभु कै भय अर पवित्र आत्मा की शान्ति म्ह चाल्दी अर बढ़दी गई। 32 फेर इसा होया के पतरस हरेक जगहां हांडा हाया, उन पवित्र आदमियाँ कै धोरे भी पोंहच्या जो लुद्दा नगर म्ह रहवै थे। 33 ओइडे उसनै एनियास नामक लकवे का रोगी एक माणस मिल्या, जो आठ साल तै खाट पै पड्या था। 34 पतरस नै उसतै कह्या, “हे एनियास! यीशु मसीह तन्नै ठीक करै सै। उठ, अपना बिछाणा ठा।” फेर वो जिब्बे उठ खड्या होया। 35 फेर लुद्दा नगर अर शारोन के सारे रहणीये उस ताहीं देखके प्रभु की ओइ फिरे। 36 याफा नगर म्ह तबीता यानिके दोरकास नाम की एक बिश्वासण रहवै थी। वा घणे भले-भले काम अर दान करया करै थी। 37 उन्हे दिनां म्ह जिब पतरस लुद्दा नगर म्ह था, तो वा बीमार होके मरग्यी, अर उननै उस ताहीं नुहाके चुबारे पै धर लिया। 38 लुद्दा नगर याफा नगर कै धोरे था, चेल्याँ नै न्यू सुणकै पतरस ओइडे सै, दो माणस भेजके उसतै बिनती करी, “म्हारे धोरे आण म्ह वार ना लावै।” 39 फेर पतरस उठके उसके गेल्या हो लिया, अर जिब वो पोंहच्या तो वे उसनै उस चौबारे म्ह ले गये। सारी बिधवाँ रोंदी होई उसके धोरे आण खड़ी होई, अर जो कुड़ते अर लत्ते दोरकास नै उनके गेल्या रहदे होए बणाए थे, दिखाण लागी। 40 फेर पतरस नै सारया ताहीं बाहरणै कर दिया, अर गोड्डे टेक कै प्रार्थना करी अर लाश की ओइ लखाके कह्या, “हे तबीता, उठ!” फेर उसनै अपनी आँख खोल दी, अर पतरस ताहीं देखके उठ बेठ्ठी। 41 उसनै हाथ बढ़ाके उस ताहीं ठाया, अर पवित्र आदमी अर बिधवायाँ ताहीं बुलाके उस ताहीं जिन्दा दिखा दिया। 42 या बात साब्त याफा नगर म्ह फैलग्यी, अर घणखरयाँ नै प्रभु यीशु पै बिश्वास करया। 43 अर पतरस याफा नगर म्ह शमौन नामक किसे चमड़े का धन्धा करणीये कै उरै घणे दिनां ताहीं रहया।

10 कैसरिया नगर म्ह कुरनेलियुस नाम का एक माणस था, जो इतालियानी नामक पलटन का सूबेदार था। 2 वो भगत था, अर अपने साबते कुणबे सुधा परमेसवर तै डरे था, अर गरीब यहूदी आदमियाँ ताहीं घणा दान देवै था, अर बराबर परमेसवर की प्रार्थना करै था। 3 उसने दिन के बजे कै लोवै दर्शन म्ह साफ तौर तै देख्या के परमेसवर का एक सुर्गदूत उसके धोरे भीत्तर आके कहवै सै, “हे कुरनेलियुस!” 4 कुरनेलियुस नै उस ताहीं गौर तै देख्या अर डरके कह्या, “हे प्रभु, के हुकम सै?” उसनै उसतै कह्या, “तेरी प्रार्थनाएँ अर तेरे दान याद कै खात्तर परमेसवर कै स्याम्ही पोहचे सै, 5 अर याफा नगर म्ह माणस भेजके शमौन नै, जो पतरस कुहावै सै, बुलवा ले। 6 वो शमौन, चमड़े

का धन्धा करण आळे कै उरै मेहमान सै, जिसका घर समुन्दर कै किनारे सै।” 7 जिब वो सुर्गदूत जिसनै उसतै बात करी थी चल्या गया, तो कुरनेलियुस नै दो नौक्कर, अर जो उसके लोवै हाजिर रहया करै थे उन म्ह तै एक भगत सिपाही ताहीं बुलाया, 8 अर उन ताहीं सारी बात बताके याफा नगर की ओइ भेज्या, ताके पतरस ताहीं ले आवै। 9 दुसरे दिन जिब वे तीन आदमी जो कुरनेलियुस जरिये भेज्जे गये थे, चाल्दे-चाल्दे नगर कै धोरे पोहचे, तो दोफारी कै लोवै पतरस छात पै प्रार्थना करण चढ्या। 10 उसने भूख लागी अर कुछ खाणा चाहवै था, पर जिब वे खाणा त्यार करै थे तो वो बेसुध होग्या, 11 अर उसनै देख्या, के अकास खुलग्या, अर एक बड्डी चादर च्यारु कुणयाँ तै लटकदी होई, धरती की ओइ उतरै सै। 12 जिस म्ह धरती के सारे ढाळ के चार पैरां आळे अर रेंगणेआळे जिनोर अर अकास के पंछी थे। 13 उसनै एक इसा बोल सुण्या, “हे पतरस उठ, मार अर खा।” 14 पर पतरस नै कह्या, “ना प्रभु, कती भी न्ही, क्यूँके मन्नै कदे कोए अशुद्ध चीज न्ही खाई सै।” 15 फिर दुसरी बर उस ताहीं बोल सुणाई दिया “जो किमे परमेसवर नै शुद्ध कर दिया सै, उस ताहीं अशुद्ध मतना कहवै।” 16 तीन बर इस तरियाँ ए होया, फेर जिब्बे वा चादर अकास म्ह ठा ली गई। 17 जिब पतरस अपने मन म्ह दुबिध्या म्ह था, के यो दर्शन जो मन्नै देख्या इसका के मतलब हो सकै सै, तो देख्खो, वे माणस जिन ताहीं कुरनेलियुस नै भेज्या था, शमौन कै घर का पता लगाके दरबाजे पै आण खड़े होए, 18 अर रुक्का मारके बुड्झण लागे, “के शमौन जो पतरस कुहावै सै, याडैए सै के?” 19 पतरस तो उस दर्शन पै सोचण ए लागरया था, के पवित्र आत्मा नै उसतै कह्या, “देख, तीन माणस तेरी टोह म्ह सै। 20 आखर उठके तळै जा, अर बेझिझक उनके गेल्या हो ले, क्यूँके मन्नै ए उन ताहीं भेज्या सै।” 21 फेर पतरस नै उतरके उन माणसां ताहीं कह्या, “देख्खो, जिसकी टोह म्ह थम सो, वो मै सूँ। थारे आण का के कारण सै?” 22 वे बोल्ते, “कुरनेलियुस सूबेदार जो धर्मी अर परमेसवर तै डरणआळा अर सारी यहूदी जात म्ह नाम्मी माणस सै, उसनै एक पवित्र सुर्गदूत तै यो निर्देश पाया सै के तेरे ताहीं अपने घरां बुलाके तेरे तै वचन सुणौ।” 23 फेर उसनै उन ताहीं भीत्तर बुलाके उनकी मेहमान-नवाजी करी। दुसरे दिन वो उनके गेल्या गया, अर याफा नगर के बिश्वासी भाईयाँ म्ह तै कुछ उसके गेल्या हो लिए। 24 आगले दिन वे कैसरिया नगर पोहचे, अर कुरनेलियुस अपने कुणबे आळा अर प्यारे साथियाँ ताहीं कठ्ठा करके उनकी बाट देख्खे था। 25 जिब पतरस भीत्तर आवै था, तो कुरनेलियुस उसतै मिल्या, अर उसके पायां म्ह पड़के उस ताहीं प्रणाम करया, 26 पर पतरस नै उस ताहीं ठा कै कह्या, “खड्या हो, मै भी तो माणस सूँ।” 27 अर उसके गेल्या बतळान्दा भीत्तर गया, अर घणे आदमियाँ ताहीं कठ्ठे देखके 28 पतरस नै उनतै कह्या, “थमनै बेरा सै के हम यहूदियाँ कै खात्तर गैर यहूदियाँ तै संगति करणा या उसके उरै जाणा कानून के खिलाफ सै, पर परमेसवर नै मैरे तै बताया सै के किसे माणस ताहीं अपवित्र या अशुद्ध ना कहूँ। 29 ज्यातै मै जिब बुलाया गया तो बिना कुछ

कहे चल्या आया। इब मै बुद्दसु सूं के मेरै ताहीं किस काम के खात्तर बुलाया गया?” 30 कुरनेलियुस बोल्या, “इस्से घड़ी, पूरे चार दिन होए, मै अपने घर म्ह दोफाहरे पाच्छे तीन बजे प्रार्थना करण लागरया था, तो एक माणस चमकीला बाणा पहरे होए, मेरै स्याम्ही आण खड्या होया 31 अर कहण लाग्या, ‘हे कुरनेलियुस, तेरी प्रार्थनाएँ अर तेरे दान याद के खात्तर परमेसवर के स्याम्ही पोहचे सै।’ 32 इस् करके किसे नै याफा नगर भेजके शमौन जो पतरस कुहावै सै, बुलवा ले। वो शमौन, चमड़े का धन्धा करण आळे के उरै मेहमान सै, जिसका घर समुन्दर के किनारे सै।’ 33 फेर मन्ने जिब्बे तेरे धोरै आदमी भेज्जै, अर तन्नै भला करया जो आ गया। इब हम सारे उरै परमेसवर के स्याम्ही सां, ताके जो किमे परमेसवर नै तेरे तै कह्या उस ताहीं सुणां।” 34 फेर पतरस बोल्या, “इब मेरै पक्का यकिन होग्या के परमेसवर किसे का पक्षपात कोनी करदा, 35 बल्के हरेक जात म्ह जो परमेसवर तै डरै अर धर्म के काम करै सै, वो उसनै भावै सै। 36 थम जाणो सों के परमेसवर नै इस्राएल के माणसां ताहीं अपना संदेश भेज्जा, उसनै शान्ति के बारे म्ह सुसमाचार सुणाया जो माणसां ताहीं यीशु मसीह पै विश्वास करण के जरिये मिले सै। 37 वो वचन थमनै बेरा सै, जो यूहन्ना के बपतिस्मा के प्रचार के पाच्छे गलील परदेस तै शरु होके साब्ले यहूदिया परदेस म्ह फैलग्या। 38 परमेसवर नै किस तरियां तै यीशु नासरी ताहीं पवित्र आत्मा अर सामर्थ तै अभिषेक करया, वो भलाई करदा अर सारया ताहीं जो शैतान के सताए होइ थे, आच्छा करदा फिरया, क्यूँके परमेसवर उसके गेल्या था।” 39 “हम उन सारे कामां के गवाह सां, जो उसनै यहूदिया परदेस अर यरुशलेम नगर म्ह भी करे, अर उननै उस ताहीं क्रूस पै लटकाके मार दिया। 40 उस ताहीं परमेसवर नै तीसरे दिन जिन्दा करया, अर जाहिर भी कर दिया सै, 41 सारे आदमियाँ पै नही बल्के उन गवाह पै जिन ताहीं परमेसवर नै पैहल्या तै छॉट लिया था, यानिके म्हारै पै जिन नै उसके मरे होया म्ह तै जिन्दा उठण के पाच्छे उसके गेल्या खाया-पिया, 42 अर उसनै म्हारै ताहीं हुकम दिया के आदमियाँ म्ह प्रचार करो अर गवाही घो, के यो वोए सै जिस ताहीं परमेसवर नै जिन्दा अर मरया होया का न्यायी ठहराया सै। 43 उसकी सारे नबी गवाही देवें सै के जो कोए उसपै विश्वास करैगा, उस ताहीं उसके नाम तै पापां की माफी मिलैगी।” 44 पतरस ये बात कहण ए लागरया था के पवित्र आत्मा वचन के सारे सुणण आळा पै उतर आया। 45 अर जितने खतना करे होए विश्वासी पतरस के गेल्या आये थे, वे सारे हैरान होए के गैर यहूदियाँ पै भी पवित्र आत्मा का दान ढाळा गया सै। 46 क्यूँके उननै उन ताहीं कई ढाळ की भाषा बोल्दे अर परमेसवर की बड़ाई करदे सुणया। इसपै पतरस नै कह्या, 47 “के कोए पाणी नै रोक सके सै के ये बपतिस्मा ना पावै, जिननै म्हारै की ढाळ परमेसवर की ओइ तै पवित्र आत्मा पाया सै?” 48 अर उसनै हुकम दिया के उननै यीशु मसीह के नाम म्ह बपतिस्मा दिया जावै। फेर उननै उसतै बिनती करी के वो कुछ दिन और उनके गेल्या रहवै।

11 फेर प्रेरितां अर विश्वासी भाईयाँ नै जो यहूदिया परदेस म्ह थे सुणया के गैर यहूदियाँ नै भी परमेसवर का वचन मान लिया सै। 2 आखर म्ह जिब पतरस यरुशलेम नगर म्ह आया, तो खतना किये होए आदमी उसतै बहस करण लाग्गे, 3 “तन्नै खतनारहित आदमियाँ के उरै जाके उनके गेल्या खाया।” 4 फेर पतरस नै उन ताहीं शरु तै आखर ताहीं सारा किमे कह सुणाया 5 “मै याफा नगर म्ह प्रार्थना करण लागरया था, अर बेसुध होके एक दर्शन देखा के एक बड्डी चादर च्यार कुणयां तै लटकदी होई, अकास तै उतरके मेरै धोरै आई।” 6 जिब मन्ने उसपै गौर करया, तो उस म्ह धरती के चार पैरां आळे अर बणपशु अर रेंगण आळे जिनोर अर अकास के पंछी देख्के, 7 अर यो बोल भी सुणया, “हे पतरस उठ, मार अर खा।” 8 मन्ने कह्या, “ना प्रभु, ना, क्यूँके कोए अशुद्ध चीज मेरै मुँह म्ह कदे नही गई।” 9 इसके जवाब म्ह अकास तै दुसरी बर आवाज होई, “जो किमे परमेसवर नै शुद्ध ठहराया सै, उस ताहीं अशुद्ध मतना कहवै।” 10 तीन बर इसा होया, फेर सारा किमे दुबारा अकास पै खींच लिया गया। 11 जिब्बे तीन माणस जो कुरनेलियुस नै कैसरिया परदेस तै मेरै धोरै भेज्जे थे, उस घर पै जिसम्ह हम थे, आण खड़े होए। 12 फेर पवित्र आत्मा नै मेरै तै बेझिझक होके उनके गेल्या जाण खात्तर कह्या, अर छः भाई भी मेरै गेल्या हो लिये, अर हम उस माणस के घरां गये। 13 उसनै म्हारै ताहीं बताया, के उसनै एक सुर्गदूत ताहीं अपने घर म्ह खड्या देखा, जिसनै उसतै कह्या, “याफा नगर म्ह माणस भेजके शमौन ताहीं जो पतरस कुहावै सै, बुलवा ले। 14 वो थारे तै इसी बात कहवैगा, जिनके जरिये तू अर तेरा सारा घराना उद्धार पावैगा।” 15 जिब म्ह बात करण लाग्या, तो पवित्र आत्मा उनपै उससे तरियां तै उतरया जिस तरियां तै शरु म्ह म्हारै पै उतरया था। 16 फेर मन्ने प्रभु का यो वचन याद आया, जो उसनै कह्या था, “यूहन्ना नै तो पाणी तै बपतिस्मा दिया, पर थम पवित्र आत्मा तै बपतिस्मा पाओगे। 17 इस खात्तर जिब परमेसवर नै उन ताहीं भी वोए दान दिया, जो म्हारै ताहीं प्रभु यीशु मसीह पै विश्वास करण तै मिल्या था, तो मै कौण था जो परमेसवर नै रोक सकदा?” 18 यो सुणण के बाद उसके जवाब म्ह वे यहूदी विश्वासी कुछ भी नही बोल पाए, अर परमेसवर की बड़ाई करके कहण लाग्गे, “फेर तो परमेसवर नै गैर यहूदियाँ ताहीं भी अनन्त जीवन के खात्तर पापां की माफी अर यीशु मसीह पै विश्वास करण का दान दिया सै।” 19 जो आदमी उस क्लेश के मारे जो स्तिफनुस के कारण पड्या था, खिंड-मिंड हो गये थे, वे हांडे-हांडे फीनीके परदेस अर साइप्रस टापू अर अन्ताकिया नगर म्ह पोहचे, पर यहूदियाँ नै छोड़ किसे और ताहीं वचन कोनी सुणावै थे। 20 पर उन म्ह तै कुछ विश्वासी साइप्रस टापू अर कुरेनवासी थे, जो अन्ताकिया नगर म्ह आके यूनानियाँ ताहीं भी प्रभु यीशु का सुसमाचार सुणाण लाग्गे। 21 प्रभु का हाथ उनपै था, अर घणो आदमी विश्वास करके प्रभु की ओइ फिरे। 22 जिब उनका जिक्र यरुशलेम नगर की कलीसिया के लोगां के सुणण म्ह आया, तो उननै बरनबास ताहीं अन्ताकिया नगर भेज्या। 23 वो उड़ै पोहचके अर

परमेसवर के अनुग्रह नै देखके राज्जी होया, अर सारया ताहीं उपदेश दिया के तन-मन लगाके प्रभु तै लिपटे रहो। 24 वो एक भला माणस था, अर पवित्र आत्मा अर बिश्वास तै पूरा भरया था, अर दुसरे घणखरे आदमी प्रभु म्ह आ मिले। 25 फेर वो शाऊल नै टोहू कै खात्तर तरसुस नगर म्ह चल्या गया। 26 जिब वो उसतै मिल्या तो उस ताहीं अन्ताकिया नगर ल्याया, अर इसा होया के वे एक साल ताहीं कलीसिया के गेल्या मिलदे अर प्रभु यीशु मसीह का घणे आदमियाँ ताहीं उपदेश देन्दे रहे, अर चेल्लें सारया तै पैहल्या अन्ताकिया नगर ए म्ह मसीह कुहाए। 27 उननै दिनां म्ह कई नबी यरुशलेम नगर तै अन्ताकिया नगर आए। 28 उन म्ह तै अगबुस नामक एक नबी नै खड़े होके आत्मा की प्रेरणा तै न्यू बताया के सारी दुनिया म्ह बड़ड़ा अकाळ पड़ैगा, वो अकाळ (रोम के सम्राट) क्लौदियुस के बखत म्ह पड्या। 29 फेर चेल्यां नै फैसला लिया के हरेक अपणी-अपणी पूंजी के मुताबिक यहूदिया परदेस म्ह रहण आळे भाईयाँ की मदद के खात्तर किमे भेज्जै। 30 उननै इस तरियां ए करया, अर बरनबास अर शाऊल कै हाथ कलीसिया के अगुवां कै धोरे कुछ भेज दिया।

12 उस बखत हेरोदेस राजा नै कलीसिया के कई माणसां ताहीं सताण के मकसद तै बन्दी बना लिया। 2 उसनै प्रेरित यूहन्ना के भाई याकूब ताहीं तलवार तै मरवा दिया। 3 जिब उसनै देख्या के यहूदी माणस इसतै राज्जी होवै सै, तो उसनै पतरस ताहीं भी पकड़ लिया। वे अखमीरी रोटी के त्यौहार के दिन थे। 4 हेरोदेस नै उस ताहीं पकड़के जेळ म्ह गेरया, अर चार-चार सिपाहियाँ के चार पहरया म्ह राख्या, इस विचार तै के फसह कै बाद उसनै आदमियाँ कै स्याम्ही ल्यावै। 5 जेळ म्ह पतरस बन्द था, पर कलीसिया उसके खात्तर लौ लाके परमेसवर तै प्रार्थना करण लागरी थी। 6 जिब हेरोदेस राजा उसनै आदमियाँ कै स्याम्ही ल्याण आळा था, उससे रात पतरस दो जंजीरां तै बंध्या होड़ दो सिपाहियाँ के बिचाळे सोण लागरया था, अर पहरदार दरबाजे पै जेळ की रुखाळी कररे थे। 7 तो देक्खो, प्रभु का एक सुर्गदूत आण खड्या होया अर उस कोठड़ी म्ह चाँदणा चमक्या, अर उसनै पतरस की पासळी पै हाथ मारके उस ताहीं जगाया अर बोल्या, “उठ, तावळ कर।” अर उसके हाथ्यां तै बेड़ी खुलके गिरगी। 8 फेर सुर्गदूत नै उसतै कह्या, “कमर बाँध, अर अपणे जूते पहर ले।” उसनै उससे ढाळ करया। फेर उसनै उसतै कह्या, “अपणे लत्ते पहरके मेरे पाच्छे हो ले।” 9 वो लिकड़के उसके पाच्छे हो लिया, पर उसनै न्यू नही बेरा था के जो किमे सुर्गदूत कर रह्या सै वो साच्ची सै, बल्के न्यू समझै था के जणु मै दर्शन देखण लागरया सूं। 10 फेर वे पैहल्या अर दुसरे पहरे तै लिकड़के उस लोहे के फाटक पै पोहचे, जो नगर की ओड़ सै। वो उनके खात्तर अपणे-आप्ये खुलग्या, अर वे लिकड़के एक गळी म्ह गए, अर जिबे ए सुर्गदूत उसनै छोड़के चल्या गया। 11 फेर पतरस नै चेत म्ह होके कह्या, “इब मन्नै सच का बेरा पटया सै के प्रभु नै अपणा सुर्गदूत भेजके मेरे ताहीं हेरोदेस राजा के हाथ्यां तै छुड़ा लिया, अर यहूदी अगुवां की सारी मनसा

पै पाणी फेर दिया सै।” 12 न्यू जाणके वो उस यूहन्ना की माँ मरियम कै घरां आया, जो मरकुस कुहावे सै। ओड़ै घणे आदमी कठ्ठे होके प्रार्थना करण लागरे थे। 13 जिब उननै दरबाजा खटखटाया, तो रुदे नामक एक नौकराणी देखण नै आई। 14 पतरस का बोल पिच्छाणके उसनै खुशी के मारे दरबाजा नही खोल्या, पर भाजके भीत्तर गई अर बताया के पतरस दरबाजे पै खड्या सै। 15 उननै उसतै कह्या, “तू बावळी सै।” पर वा पूरे बिश्वास तै बोल्ली के पतरस ए सै। फेर उननै कह्या, “उसका सुर्गदूत होगा।” 16 पर पतरस खटखटान्दा ए रहया आखर म्ह उननै दरबाजा खोल्या, अर उस ताहीं देखके हैरान होग्ये। 17 फेर उसनै उन ताहीं हाथ तै इशारा करया के बोल-बाल्ले रहवें, अर उन ताहीं बताया के प्रभु किस ढाळ उस ताहीं जेळ तै लिकाड़ ल्याया सै। फेर बोल्या, “याकूब अर दुसरे भाईयाँ नै या बात बता दियो।” फेर लिकड़के दुसरी जगहां चल्या गया। 18 तड़कैए जेळ के सिपाहियाँ म्ह घणी भगदड़ माचगी के पतरस कित्त गया। 19 जिब हेरोदेस राजा नै उसकी टोहया-टाही करवाई अर नही मिल्या, तो पैहरेदारां की जाँच करके हुकम दिया के वे मार दिये जावै, अर वो यहूदिया परदेस नै छोड़के कैसरिया नगर म्ह जाके रहण लाग्या। 20 हेरोदेस राजा सूर अर सैदा नगर के लोगमां तै घणा नाराज था। वे एक टोळ बनाके उसतै मिलण आये, राजा का एक खास कर्मचारी बलास्तुस ताहीं मनाके राजा तै मेल करणा चाह्या, क्यूँके राजा के देश म्ह उनके देश का पालन-पोषण होवै था। 21 खास दिन पै हेरोदेस राजा राजसी-बाणा पहरके सिंहासन पै बैठ्या, अर उन ताहीं खुलास्सा करण लाग्या। 22 फेर आदमियाँ नै रुक्का मारया, “यो तो माणस का नही ईश्वर का बोल सै।” 23 उससे घड़ी प्रभु कै एक सुर्गदूत नै जिबे आके हेरोदेस राजा ताहीं झिड़का, अर वो कीड़े पड़के मरग्या। क्यूँके उसनै परमेसवर की महिमा कोनी करी, 24 पर परमेसवर का वचन बढ़ा अर फैलदा गया। 25 जिब बरनबास अर शाऊल नै अपणी सेवा पूरी कर ली तो यूहन्ना जो मरकुस कुहावे था, गेल्या लेके यरुशलेम नगर तै बोड़ै।

13 अन्ताकिया नगर की कलीसिया म्ह कई नबी अर उपदेशक थे, यानी बरनबास, शमोन जो नीगर (काळा आदमी) कुहावे सै, अर शाऊल अर कुरेनी लूकियुस, मनाहेम जिसका पालन-पोषण चौथाई देश के राजा हेरोदेस के गैल होया था। 2 जिब ये लोग प्रभु की आराधना अर ब्रत करण लागरे थे, तो पवित्र आत्मा नै उनतै कह्या, “मेरे खात्तर बरनबास अर शाऊल नै उस काम के खात्तर न्यारा करो जिसके खात्तर मन्नै उन ताहीं बुलाया सै।” 3 फेर उननै ब्रत अर प्रार्थना करके अर उनपै हाथ धरके उन ताहीं परमेसवर के काम खात्तर बिदा करया। 4 शाऊल अर बरनबास पवित्र आत्मा के भेज्जै होए सिलूकिया बन्दरगाह गये, अर ओड़ै तै जहाज पै चढ़के साइप्रस टापू कान्ही चाल्ले, 5 अर सलामीस नगर म्ह पोहचके, परमेसवर का वचन यहूदियाँ के आराधनालायाँ म्ह सुणाया। यूहन्ना उनका सेवक था। 6 वे उस सारे टापू म्ह होन्दे होए पाफुस परदेस ताहीं पोहचे। ओड़ै उननै बारयीशु नामक एक यहूदी जादूगर अर झूठा नबी मिल्या। 7 वो राज्यपाल सिरगियुस पौलुस कै

गेल्या था, जो अकलमंद माणस था। उसने बरनबास अर शाऊल ताहीं अपणे धोरै बुलाकै परमेसवर का वचन सुणणा चाह्या। 8 पर इलीमास जादूगर नै (क्यूँके योए उसके नाम का मतलब सै) उनका बिरोध करकै हाकिम ताहीं यीशु पै बिश्वास करण तै रोकणा चाह्या। 9 फेर शाऊल नै जिसका नाम पौलुस भी सै, पवित्र आत्मा तै पूरी तरियां भरकै उसकी ओड़ टकटकी लाकै देख्या अर बोल्या, 10 “हे सारे कपट अर सारी ढाळ कि चतुराई तै भरे होड़ शैतान की ऊलाद, सारे धर्मा के बैरी, के तू प्रभु के सीध्दी राही नै टेढ़ी करणा न्ही छोडैगा?” 11 इब लखा, “प्रभु का हाथ तेरे बिरोध म्ह उठ्या सै, अर तू कुछ बखत ताहीं आन्धा रहवैगा अर सूरज नै कोनी देखवैगा।” फेर जिब्बे धुँधळापण अर अन्धेरा उसपै छा गया, वो आससै-पाससै टटोळण लाग्या ताके कोए उसका हाथ पकड़कै ले चाल्लै। 12 फेर हाकिम नै जो होया था उस ताहीं देखकै अर प्रभु के उपदेश तै हैरान होकै यीशु पै बिश्वास करया। 13 पौलुस अर उसके मित्तर पाफुस परदेस तै पाणी का जहाज खोल कै पंफूलिया परदेस के पिरगा नगर म्ह आये, अर यूहन्ना उननै छोड़कै यरुशलेम नगर बोहड़ गया। 14 पिरगा नगर तै आगै बढ़कै वे पिसिदिया परदेस के अन्ताकिया नगर म्ह पोहचे, अर आराम कै दिन आराधनालय म्ह जाकै बैठग्ये। 15 मूसा के नियम-कायदे अर नबियाँ की किताब नै पढ़ण कै पाच्छै आराधनालय के सरदारानं नै उनकै धोरै कहवानं भेज्या, “हे भाईयो, जै आदमियाँ के उपदेश कै खात्तर थारे मन म्ह कोए बात हो तो कही।” 16 फेर पौलुस नै खड़े होकै अर हाथ तै इशारा करके कह्या, “हे इस्राएलियों, अर गैर यहूदी जो परमेसवर तै डरण आळो, सुणो!” 17 इस्राएल के परमेसवर नै म्हारे पूर्वजानं ताहीं छॉट लिया, अर जिब वे मिस्र देश म्ह परदेशी होकै रहवै थे, तो उनकी बढ़ोतरी करी, अर अपनी शक्ति के दम पै उननै लिकाड़ ल्याया। 18 वो कोए चाळीस साल ताहीं जंगल-बियाबान म्ह उनकी सहण करदा रहया, 19 अर कनान देश की सात जात्तानं का नाश करके उनका देश कोए साढ़े चार सौ साल म्ह इनकी वसियत म्ह कर दिया। 20 “इसके बाद परमेसवर नै शमूएल नबी ताहीं उन म्ह न्यायाधीश ठहराया। 21 इसकै पाच्छे उननै शमूएल तै उनपै एक राजा ठहराण की माँग करी, फेर परमेसवर नै चाळीस साल कै खात्तर बिन्यामीन के गोत्र म्ह तै एक माणस, यानिके कीश के बेटे शाऊल ताहीं उनपै राजा ठहराया। 22 फेर परमेसवर नै शाऊल ताहीं पद तै हटाकै दाऊद ताहीं उनका राजा बनाया, जिसकै बारे म्ह उसनै गवाही दी, ‘मन्नै एक माणस यिशै का बेटा दाऊद, जो मेरी इच्छा कै मुताबिक मिलग्या सै, वोए मेरी सारी इच्छा पूरी करैगा।” 23 इससे पीढ़ी म्ह तै परमेसवर नै अपणे वादा कै मुताबिक इस्राएल कै धोरै एक उद्धारकर्ता, यानिके यीशु भेज्या। 24 यीशु कै आण तै पैहल्या यूहन्ना नै सारे इस्राएलियाँ नै अपणे पाप मान के परमेसवर की ओड़ मुड़ण का अर बपतिस्मा का प्रचार करया। 25 जिब यूहन्ना अपनी सेवा पूरी करण पै था, तो उसनै कह्या, “थम मन्नै के समझो सो? मै मसीह कोनी! बल्के देख्खो, मैरे पाच्छे एक आण आळा सै, जो भोत महान् सै, जिसके जूत्याँ के फिते

भी मै खोल्लण जोगगा कोनी।” 26 “हे भाईयो, थम जो अब्राहम की ऊलाद सो, अर थम गैर यहूदी जो परमेसवर तै डरो सो, थारे धोरै इस उद्धार का वचन भेज्या गया सै। 27 यरुशलेम नगर के रहणआळो अर उनकै सरदारानं नै, ना मसीह यीशु ताहीं पिच्छाणा अर ना नबियाँ की बात समझी, जो हरेक आराम कै दिन पढ़ी जावै सै, ज्यातै उस ताहीं कसूरवार ठहराकै उन बातानं नै पूरा करया। 28 उननै मारण कै जोगगा कोए कसूर उस म्ह कोनी पाया, फेरभी राज्यपाल पिलातुस तै बिनती करी, के वो मार दिया जावै। 29 जिब उननै उसके बारे म्ह पवित्र ग्रन्थ लिक्खी होई सारी बात पूरी करी, तो उस ताहीं क्रूस पै तै उतारकै कन्न म्ह धरया। 30 पर परमेसवर नै उस ताहीं मरे होया म्ह तै जिन्दा करया, 31 अर वो उन ताहीं जो उसके गेल्या गलील परदेस तै यरुशलेम नगर आये थे, घणे दिनानं ताहीं अपणे चेल्यां नै दिख्खा रहया, आदमियाँ कै स्याम्ही इब वए उसके गवाह सै।” 32 हम थमनै उस वादा कै बारे म्ह जो बाप-दाद्या तै करया गया था, यो सुसमाचार सुणावानं सां, 33 के परमेसवर नै यीशु ताहीं जिन्दा करकै, वोए वादा म्हारी ऊलाद कै खात्तर पूरा करया, जिसा के भजन संहिता दो म्ह लिख्या सै, “तू मेरा बेटा सै, आज तै ए मै तेरा पिता बणग्या सू।” 34 अर उसके इस तरियां तै मरे होया म्ह तै जिन्दा होण कै बारे म्ह भी के वो कदे न्ही सड़ै, परमेसवर नै यो कह्या सै, “मै दाऊद पै की पवित्र अर अटल दया तेरे पै करूँगा।” 35 दाऊद नै और जगहानं भी भजन संहिता म्ह भी लिख्या सै, “तू अपणे पवित्र माणस नै सड़ण न्ही देवैगा।” 36 दाऊद तो परमेसवर की मर्जी कै मुताबिक अपणे बखत म्ह सेवा करके मर गया, अर अपणे बाप-दाद्या म्ह जा मिल्या, अर सड़ भी गया। 37 पर जिस ताहीं परमेसवर नै जिन्दा करया, वो सड़ण कोनी पाया। 38 ज्यातै, हे भाईयो, थम जाण ल्यो के इससे के जरिये पापानं की माफी का सुसमाचार थारे ताहीं दिया जावै सै, 39 अर पापानं तै मुक्त करण म्ह मूसा नबी के नियम-कायदे हमेशा नाकामयाब रहे सै, हरेक जो बिश्वास करै सै, वो यीशु के जरिये सारे पापानं तै मुक्त करया जावै सै। 40 ज्यातै चौकन्ने रहो, इसा ना हो के जो नबियाँ की किताब म्ह आया सै, थारे पै भी आण पड़े 41 “हे बुराई करण आळो, देख्खो, अर हैरान होवो, अर मिट जाओ, क्यूँके मै थारे दिनानं म्ह एक काम करूँ सूँ, इसा काम के जै कोए थारे तै उसका जिक्र करै, तो थम भी बिश्वास कोनी करोगे।” 42 जिब पौलुस अर बरनबास यहूदी सभाघर तै बाहरणै लिक्कण लागे थे, तो माणस उनतै बिनती करण लागे के आगले आराम कै दिन म्हारे ताहीं ये बात फेर सुणाई जावै। 43 जिब सभा उठ ली फेर भोत-से यहूदी अर यहूदी पंथ म्ह आये होए भगतानं म्ह तै घणखरे पौलुस अर बरनबास कै पाच्छे हो लिये, अर उननै उन ताहीं बात करके समझाया के परमेसवर के अनुग्रह म्ह बणे रहो। 44 आगले आराम कै दिन नगर के तकरीबन सारे लोग परमेसवर का वचन सुणण नै कट्टे हो गये। 45 पर यहूदी भीड़ नै देखके मन ए मन म्ह जळण लागे, अर बुराई करदे होए पौलुस की बातानं के बिरोध म्ह बोल्लण लागे। 46 फेर पौलुस अर बरनबास हिम्मत करके कहण लागे, “जरूरी था के परमेसवर का

वचन पैहल्या थारे तै सुणाया जान्दा, इब जिब के थमने इस ताहीं नकार दिया सै, अर यो करते होए अपणे-आप ताहीं अनन्त जीवन के खात्तर अयोग्य घोषित कर दिया सै, तो देखखो, हम गैर यहूदियाँ के कान्ही फ़िरां सां। (aiōnios g166) 47 क्यूँके प्रभु नै म्हारे ताहीं यो हुकम दिया सै, 'मन्ने तेरे ताहीं गैर यहूदियाँ के खात्तर चाँदणा ठहराया, ताके तू धरती के छोर ताहीं उद्धार का दरबाजा हो।' 48 न्यू सुणके गैर यहूदी राज्जी होए, अर परमेसवर के वचन की बड़ाई करण लाग्गे, अर जितने अनन्त जीवन के खात्तर ठहराए गये थे, उननै बिश्वास करया। (aiōnios g166) 49 फेर प्रभु का वचन उस सारे देश म्ह फैलाण लाग्या। 50 पर यहूदी अगुवां नै भगत अर आच्छे खानदान की लुगाईयाँ ताहीं अर नगर के खास आदमियाँ ताहीं उकसाया, अर पौलुस अर बरनबास के खिलाफ दंगा करा के उन ताहीं अपनी सीमा तै लिकाड़ दिया। 51 फेर पौलुस अर बरनबास उनकै स्याम्ही पायां की धूळ झाड़के इकुनियुम नगर म्ह चले गये। 52 अर चेल्लें आनन्द अर पवित्र आत्मा तै भरदे चले गये।

14 इकुनियुम नगर म्ह इसा होया के वे यहूदियाँ के आराधनालय म्ह गैल-गैल गये, अर इस ढाळ बात करी के यहूदियाँ अर यूनानियाँ म्ह घणखरयां नै बिश्वास करया। 2 पर बिश्वास ना करण आळे गैर यहूदियाँ के मन बिश्वासी भाईयाँ के बिरोध म्ह उकसाये अर कडुवापण पैदा करया। 3 पौलुस अर बरनबास घणे दिन ताहीं उड़ै रहे, अर प्रभु के भरोसे पै हिम्मत तै बात करै थे, अर वो उनकै हाथ्यां तै चमत्कार अर अनोक्खे काम करवा के अपणे अनुग्रह के वचन ताहीं साबित करदा रद्दा। 4 पर नगर के लोगां म्ह फूट पड़गी थी, इसतै घणेए तो यहूदियाँ कान्ही अर घणेए प्रेरितां कान्ही होगये। 5 जिब गैर यहूदी अर यहूदी उनकी बेजती करण नै अर उनकै पत्थर मारण के खात्तर अपणे सरदारां सुधा उन कान्ही भाज्जे, 6 फेर वे इस बात नै जाणगे अर लुकाउनिया परदेस के लुस्त्रा अर दिरबे नगरां म्ह, अर लोवे-धोरे के परदेसां म्ह भाजगे 7 अर ओड़ै सुसमाचार सुणाण लाग्गे। 8 लुस्त्रा नगर म्ह एक माणस बेठ्या था, जो पायां तै लाचार था। वो जन्म ते ए लंगड़ा था, अर कदे न्ही चाल्या था। 9 वो पौलुस नै बात करदे सुणै था। पौलुस नै उसकी ओड़ टकटकी लाके देख्खा के उसनै ठीक होण का बिश्वास सै, 10 अर ठाडू आवाज म्ह बोल्या, “अपणे पायां के बळ सीध्था खड्या हो।” फेर वो उछळके चाल्लण-फिरण लाग्या। 11 लोगां नै पौलुस का यो काम देखके लुकाउनिया की भाषा म्ह ठाडू आवाज म्ह कह्या, “देवता माणस के रूप म्ह होके म्हारे धोरे उतर आये सै।” 12 उननै बरनबास ताहीं ज्यूस देवता, अर पौलुस ताहीं हिरमेस कह्या क्यूँके वो खास संदेश देण आळा था। 13 ज्यूस देवता के उस मन्दर का पुजारी जो उनके नगर के स्याम्ही था, बळध अर फूल्लां के हार फाटकां पै ल्याके लोगां के गेल्या बलिदान करणा चाहवै था। 14 पर बरनबास अर पौलुस प्रेरितां नै जिब यो सुणया, तो अपणे लत्ते पाड़े अर भीड़ म्ह लपके, अर रुक्का मारके कहण लाग्गे, 15 “हे भले माणसाँ, थम के करो सो? हम भी तो थारे तरियां दुख-सुख भोग्गण आळे माणस सां, अर थमने सुसमाचार सुणावां सां के थम इन

बेकार चिज्जां तै न्यारे होके जिन्दे परमेसवर के कान्ही फ़िरो, जिसनै सुर्ग अर धरती अर समुन्दर अर जो किमे उन म्ह सै बाणाया सै। 16 उसनै बीते होए बखत म्ह सारी जात्तां ताहीं अपणे-अपणे रास्तयां पै चाल्लण दिया। 17 फेर भी वो अपणे भले काम करण के जरिये अपणे बारें म्ह गवाही देँदा रहया, अर अकास तै मिह अर फळआळी ऋतु देके थारे मन नै खाणे अर खुशी तै भरदा रहया।” 18 न्यू कहके भी उननै लोगां ताहीं बड्डी मुश्किलां तै रोक्या के उनकै खात्तर बलिदान ना करै। 19 पर कुछ यहूदियाँ नै अन्ताकिया नगर अर इकुनियुम नगर तै आके लोगां ताहीं अपनी ओड़ कर लिया, अर पौलुस पै पत्थर बरसाए, अर मरया होड़ सोचके उस ताहीं नगर के बाहरणे घसीट लेगे। 20 पर चेल्लें जिब उसकै चौगरदेके आण खड़े होए, तो वो उठके नगर म्ह गया अर दुसरे दिन बरनबास के गेल्या दिरबे नगर कान्ही चल्या गया। 21 वे उस नगर के लोगां ताहीं सुसमाचार सुणाके अर घणे चेल्लें बाणाके, लुस्त्रा अर इकुनियुम अर अन्ताकिया नगर नै बोहड़ आये, 22 अर चेल्यां के मनां नै स्थिर करदे अर उत्साहित करते होए या शिक्षा देते रहबे के बिश्वास म्ह बणे रहो, अर न्यू कहवै थे, “हमनै घणे दुख ठाके परमेसवर के राज्य म्ह बड़णा होगा।” 23 अर उननै हरेक कलीसिया म्ह उनकै खात्तर अगुवें ठहराए, अर ब्रत सुधा प्रार्थना करके उन ताहीं प्रभु के हाथ्यां म्ह सौप्या जिसपै उननै बिश्वास करया था। 24 फेर पिसिदिया परदेस तै होन्दे होए वे पंपूलिया परदेस पोहचे, 25 फेर पिरगा नगर म्ह वचन सुणाके अत्तलिया नगर म्ह आये, 26 अर ओड़ै तै वे पाणी के जहाज तै अन्ताकिया नगर गये, जित्त वे उस काम के खात्तर जो उननै पूरा करया था परमेसवर के अनुग्रह म्ह सौपे गये थे। 27 अन्ताकिया नगर पोहचके उननै कलीसिया कट्टी करी अर बताया के परमेसवर नै उनकै गेल्या होके किसे बड़े-बड़े काम करे, अर गैर यहूदियाँ के खात्तर बिश्वास का बारणा खोल दिया। 28 अर वे चेल्यां के गेल्या घणे दिन ताहीं रहे।

15 फेर कुछ यहूदी बिश्वासी यहूदिया परदेस तै आके भाईयाँ नै सिखाण लाग्गे “जै मूसा नबी की रीत पै थारा खतना न्ही हो तो थम उद्धार कोनी पा सकदे।” 2 जिब पौलुस अर बरनबास का उनतै घणा वाद-विवाद अर बहस होई तो यो फैसला लिया गया के पौलुस अर बरनबास अर उन म्ह तै कुछ माणस इस बात के बारे म्ह प्रेरितां अर कलीसिया के अगुवां के धोरे यरुशलेम नगर म्ह जावै। 3 कलीसिया नै उन ताहीं बिदा करया, अर वे फीनीके अर सामरिया परदेसां तै होन्दे होए गैर यहूदियाँ के जरिये यीशु मसीह पै बिश्वास करण का जिक्क करते गये, जिसतै सारे बिश्वासी भाई घणे राज्जी होए। 4 जिब वे यरुशलेम नगर पोहचे, तो कलीसिया अर प्रेरित अर कलीसिया के अगुवें उनतै खुशी के गैल मिले, अर पौलुस अर बरनबास नै बताया के परमेसवर नै उनकै गेल्या होके किसे-किसे काम करे थे। 5 पर फरीसियाँ के पंथ म्ह तै जिन नै बिश्वास करया था, उन म्ह तै कितन्याँ नै उठके कह्या, “गैर यहूदियाँ ताहीं खतना करण अर मूसा नबी के नियम-कायदे नै मानण का हुकम देणा चाहिए।” 6 फेर प्रेरित अर कलीसिया के अगुवें इस बात के बारे

मह विचार करण कै खात्तर कठ्ठे होए। 7 फेर पतरस नै घणी बहस हो जाणकै पाछै खड़े होकै उनतै कह्या, “हे भाईयो, थमनै बेरा सै के घणे दिन होए परमेसवर नै थारे मह तै मेरै ताहीं छॉट लिया के मेरै मुँह तै गैर यहूदी सुसमाचार का वचन सुणकै बिश्वास करै। 8 मन कै जाँचण आळे परमेसवर नै उन ताहीं भी म्हारै की तरियां पवित्र आत्मा देकै यो बताया सै के वे सब भी उसके माणस सै, 9 अर बिश्वास कै जरिये उनके मन शुद्ध करकै म्हारै मह अर उन मह किमे फर्क कोनी राख्या। 10 तो इब थम क्यांतै परमेसवर नै परखो सों, ताके गैर यहूदी चेल्यां के कंध्या पै इसा जूआ थरो, जिसनै ना म्हारे बाप-दादे ठा सकै थे अर ना हम ठा सकां सां? 11 हाँ, म्हारा यो यकिन सै के जिस तरियां तै वे प्रभु यीशु के अनुग्रह तै उद्धार पावेंगें, उस्से तरियां तै हम भी पावागें।” 12 फेर सारी सभा चुपचाप बरनबास अर पौलुस की सुणण लागी, के परमेसवर नै उनकै जरिये गैर यहूदियाँ मह किसे बड़े-बड़े चमत्कार, अर अनोखे काम दिखाए। 13 उनके भाषण के खतम होण पै याकूब सभा ताहीं कहण लाग्या, “हे भाईयो, मेरी सुणो।” 14 शमौन पतरस नै बताया के परमेसवर नै पैहले-पहल गैर यहूदियाँ पै किसी दया की निगाह करी के उन मह तै अपने नाम कै खात्तर एक प्रजा बणा ले। 15 नबियाँ लेख भी इस बात का समर्थन करै सै, जिसा के पवित्र ग्रन्थ मह लिख्या सै 16 “इसकै पाछै मै फेर आकै दाऊद का पड्या होइ डेरा उठाऊंगा, अर उसके खण्डरां नै दुबारा बाणाऊंगा, अर उस ताहीं खड्या करूंगा,” 17 जिसके कारण बाकी की बची होइ मानवजाति परमेसवर नै पा सकै, अर वे सारी गैर यहूदी भी, जिनपै मेरै नाम की छाप लागी सै, प्रभु नै टोहवें, 18 यो वोए प्रभु कहवै सै जो दुनिया की शरुआत तै इन बातां की खबर देंदा आया सै। (aiōn g165) 19 “ज्यांतै मेरा विचार यो सै के हम उन गैर यहूदियाँ खात्तर कोए मुसीबत पैदा ना करा, जो परमेसवर कै कान्ही फिरे सै, हम उन ताहीं दुख ना देवां, 20 पर आच्छा तो यो होगा के हम उन ताहीं यो हुकम लिख भेज्जा, के वे मूर्तियाँ नै चढ़ाण आळी चिज्जां अर जारी अर गळा घोटे होया के माँस तै अर लहू तै दूर रहवै। 21 क्यूँके गुजरे बखत तै नगर-नगर मूसा नबी के नियम-कायदे का प्रचार करण आळे होन्दे चले आये सै, अर वा हरेक आराम कै दिन आराधनालय मह पढ़ी जावै सै।” 22 फेर सारी कलीसिया सुधा प्रेरितां अर कलीसिया के अगुवां नै आच्छा लाग्या के अपने मह तै कुछ माणसां नै चुणै, यानिके यहूदा जो बरसब्बा कुहावै सै, अर सीलास ताहीं जो भाईयाँ मह मुखिया थे, अर उन ताहीं पौलुस अर बरनबास कै गेल्या अन्ताकिया नगर खन्दावै। 23 उननै उनकै हाथ या चिट्ठी लिख भेजी “अन्ताकिया नगर, सीरिया अर किलिकिया परदेस के रहण आळे भाईयाँ नै जो गैर यहूदियाँ मह तै सै, प्रेरितां अर कलीसिया के अगुवें भाईयाँ का नमस्कार। 24 हमनै सुणया सै के म्हारै मह तै कुछां नै ओड़ै जाकै, थारे ताहीं अपणी बात्तां तै डरा दिया, अर थारे मन उल्ट दिये सै पर हमनै उन ताहीं हुकम कोनी दिया था। 25 इस करके हमनै एक चित्त होकै ठीक जाण्या के छॉट होइ माणसां ताहीं अपने प्यारे बरनबास अर

पौलुस कै गेल्या थारे धोरे भेज्जा। 26 ये इसे माणस सै जिन नै अपणी ज्यांन म्हारै प्रभु यीशु मसीह के नाम कै खात्तर जोख्खम मह गेरी सै। 27 ज्यांतै हमनै यहूदा अर सीलास ताहीं भेज्जा सै, के थम खुद उनकै ए मुँह तै इस बारें मह सुण सको। 28 पवित्र आत्मा नै अर हमनै ठीक जाण पाटी के इन जरूरी बात्तां नै छोड़, थारे पै और बोझ ना गरे, 29 के थम मूर्तियाँ पै बलि करे होया तै अर लहू तै, अर गळा घोटे होए पशुआं के माँस तै, अर जारी तै दूर रहो। इनतै दूर रहो तो थारा भला होगा। बाकी सब ठीक-ठाक सै।” 30 फेर वे बिदा होकै अन्ताकिया नगर पोहचे, अर सभा नै कठ्ठी करके वा चिट्ठी उन ताहीं दे दी। 31 वे चिट्ठी पढ़कै उस उपदेश की बात तै घणे राज्जी होए। 32 यहूदा अर सीलास नै जो आप भी नबी थे, घणी बात्तां तै बिश्वासी भाईयाँ ताहीं उपदेश देकै पक्का करया। 33 वे कुछे दिन रहकै, बिश्वासी भाईयाँ तै शान्ति कै गेल्या बिदा होए के अपने खन्दाण आळा कै धोरे जावै। 34 (पर सीलास नै ओड़ै रहणा आच्छा लाग्या।) 35 पर पौलुस अर बरनबास अन्ताकिया नगर मह रह गये अर और घणखरे आदमियाँ कै गेल्या प्रभु यीशु कै वचन का उपदेश करदे अर सुसमाचार सुणान्दे रहे। 36 कुछे दिनां पाछै पौलुस नै बरनबास तै कह्या, “जिन-जिन नगरां मह हमनै प्रभु का वचन सुणाया था, आओ, फेर उन मह चालकै अपने बिश्वासी भाईयाँ ताहीं देखै के वे किस तरियां सै।” 37 फेर बरनबास नै यूहन्ना ताहीं जो मरकुस कुहावै सै, गेल्या लेण का विचार करया। 38 पर पौलुस नै उस ताहीं जो पंफूलिया परदेस मह उनतै न्यारा होगया था, अर काम पै उनकै गेल्या कोनी गया, गेल्या ले जाणा ठीक कोनी समझया। 39 आखर मह इसा वाद-विवाद होया के वे एक-दुसरे तै न्यारे पाटगे, अर बरनबास, मरकुस नै लेकै जहाज पै साइप्रस टापू चल्या गया। 40 पर पौलुस नै सीलास ताहीं छॉट लिया, अर बिश्वासी भाईयाँ तै परमेसवर के अनुग्रह मह सौंप्या जाकै ओड़ै तै चल्या गया, 41 अर वो कलीसियाओं ताहीं स्थिर करदा होया सीरिया अर किलिकिया परदेस तै होन्दे होए लिंकइया।

16 फेर वो दिरबे अर लुस्त्रा नगर मह भी गया। ओड़ै तीमुथियुस नाम का एक चेल्ला था, उसकी माँ एक यहूदी बिश्वासी थी, पर उसका बाप यूनानी था। 2 वो लुस्त्रा अर इकुनियुम नगर के भाईयाँ मह उसका आच्छा नाम था। 3 पौलुस की मर्जी या थी के वो उसके गेल्या जावै, अर जो यहूदी माणस उन जगहां मह थे उनकै कारण उननै उनका खतना करया, क्यूँके वे सारे जाणै थे, के उनका बाप यूनानी था। 4 पौलुस अर उसका साथी नगर-नगर जान्दे होइ चेल्यां ताहीं वे सारे हुकम सौंपते जावै थे, जो यरुशलम नगर के प्रेरितां अर कलीसिया के अगुवां नै तय करी थी। 5 इस तरियां कलीसिया बिश्वास मह पक्की होंदी गई अर गिणती दिन-ब-दिन बधती गई। 6 वे फ्रुगिया अर गलातिया परदेसां मह तै होकै गये, क्यूँके पवित्र आत्मा नै उननै आसिया परदेस मह वचन सुणाण तै मना करया। 7 उननै मूसिया परदेस के लोवे पोहचके, बिथुनिया परदेस मह जाणा चाह्या, पर पवित्र आत्मा नै उन ताहीं जाण कोनी दिया। 8 आखर मह वे मूसिया परदेस तै होकै त्रोआस मह आये। 9 ओड़ै पौलुस

नै रात नै दर्शन देख्या के एक मकिदुनिया परदेस का माणस खड्या होया उनतै बिनती करके कहण लागरया सै, “पार उतरकै मकिदुनिया परदेस म्ह आ, अर म्हारी मदद कर।” 10 उसकै यो दर्शन देखदे हमनै जिब्बे मकिदुनिया परदेस जाणा चाह्या, न्यू सोचकै के परमेसवर नै म्हारै ताहीं उनतै सुसमाचार सुणाण कै खातर बुलाया सै। 11 इस करकै त्रोआस नगर तै जहाज खोल कै हम सीधे सुमात्राके टापू अर दुसरे दिन नियापुलिस नगर म्ह आये। 12 ओडै तै हम फिलिप्पी नगर पोहचे, जो मकिदुनिया परदेस का खास नगर अर रोमियों का मोहल्ला सै, अर हम उस नगर कुछे दिन रहे। 13 आराम कै दिन हम नगर कै फाटक कै बाहरणै नदी कै किनारे न्यू सोचकै गये के ओडै प्रार्थना करण की जगहां होगी, अर बैठकै उन लुगाईयाँ तै जो कठ्ठी होई थी, बतळाण लागे। 14 थुआतीरा नगर की बेंजनी लत्ते बेचण आळी एक लुदिया नाम की परमेसवर की भगतणी उनकी बात सुणण लागरी थी। प्रभु नै उसका मन खोल्या ताके वा पौलुस की बातान पै मन लगावै। 15 जिव उसनै अपणे कुणबे सुधा बपतिस्मा लिया, तो उसनै म्हारै तै बिनती करी, “जै थम मन्नै प्रभु की विश्वासिणी समझो सो, तो चालकै मेरै घर म्ह रहो,” अर वा हमनै मनाकै ले गई। 16 जिव हम प्रार्थना करण की जगहां पै जाण लागरे थे, तो हमनै एक कम उम्र की दास्सी मिली जिसम्ह भविष्य बताण आळी आत्मा थी, अर वा भविष्य बताकै अपणे मालिकां कै खातर घणाए कमा लेवै थी। 17 वा पौलुस कै अर म्हारै पाछै आकै नै किल्की मारण लागी, “ये माणस परमप्रधान परमेसवर के दास सै, जो म्हारै ताहीं उद्धार के राह की कथा सुणावै सै।” 18 वा घणे दिनां ताहीं न्यूए कर दी रही, पर पौलुस परेशान होग्या, अर बोहड़कै उस ओपरी आत्मा तै बोल्या, “मै तन्नै यीशु मसीह कै नाम तै हुकम दियूं सूं के उस म्ह तै बाहरणै लिकड़ जा।” अर वा उससे बखत लिकड़गी। 19 जिव उसके मालिकां नै देख्या के म्हारी कमाई की आस खतम होग्यी, तो पौलुस अर सीलास नै पकड़के चौक म्ह प्रधानां कै धोरै खींच ल्याए, 20 अर उन ताहीं न्यायाधीश कै धोरै ल्याए अर बोल्ले, “ये माणस जो यहूदी सै, म्हारै नगर म्ह दंगा मचाण लागरे सै, 21 अर इसे रीति-रिवाज बतावै सै, जिन ताहीं हम रोमियाँ कै खातर अपणाणा सही कोनी।” 22 फेर भीड़ के माणस उनके बिरोध म्ह कठ्ठे होकै उनपै चढ़ याए, अर हाकिमां नै उनके लत्ते पाड़के उतार दिये, अर उनके बैत मारण का हुकम दिया। 23 घणी बैत मारे पाछै उननै उन ताहीं जेळ म्ह गेर दिया अर दरोग्गा ताहीं हुकम दिया के उननै चौक्कस राखिये। 24 उसनै इसा हुकम पाकै उन ताहीं भितरली कोठड़ी म्ह राख्या अर उनके पाँ काठ की बेड़ियाँ तै जकड़ दिये। 25 आध्नी रात कै बखत पौलुस अर सीलास प्रार्थना करदे होए परमेसवर के भजन गाण लागरे थे, अर कैदी उनकी सुणाण लागरे थे। 26 इतनै म्ह चाणचक बड़ड़ा हाल्लण आ ग्या, उरै ताहीं के जेळ की नीम भी हालगी, अर जिब्बे सारे दरबाजे खुलगे, अर सारया के बन्धन खुलकै पड़गे। 27 दरोग्गा जागग्या, अर जेळ के दरबाजे खुल्ले देखकै समझ गया के कैदी भाजगे सै, इस करके उसनै तलवार खिंचकै खुद

ताहीं मारणा चाह्या। 28 पर पौलुस नै ठाडू आवाज म्ह रुक्का मारया, “अपणे-आपनै किमे नुकसान ना पोहोचाइये, क्यूँके हम सारे उरैए सां।” 29 फेर दरोग्गा दिवां मँगकै भितर आया, अर काम्बदा होया पौलुस अर सीलास कै आगै पड्या, 30 अर उन ताहीं बाहरणै ल्याकै बोल्या, “हे भले माणसों, उद्धार पाण कै खातर मै के कइँ?” 31 उननै कहा, “प्रभु यीशु मसीह पै विश्वास कर, तो तू अर तेरा कुणबा उद्धार पावैगा।” 32 अर उननै उस ताहीं अर उसके सारे घर के माणसां ताहीं प्रभु का वचन सुणाया। 33 रात नै उससे बखत उसनै उन ताहीं ले जाकै उनके घाव धोये, अर उसनै अपणे सारे माणसां सुधा जिब्बे बपतिस्मा लिया। 34 फेर दरोग्गै नै उन ताहीं अपणे घरां ले जाकै उनके आगै खाणा धरया, अर साब्ले कुणबे सुधा परमेसवर पै विश्वास करके आनन्द करया। 35 आगले दिन फेर हाकिमां नै सिपाहियाँ के हाथ्यां कहवां भेज्या के उन माणसां नै छोड़ द्यो। 36 दरोग्गै नै ये बात पौलुस तै कही, “हाकिमां नै थारे ताहीं छोड़ देण का हुकम दिया सै। ज्यांतै इब खुश होके जाओ।” 37 पर पौलुस नै उनतै कहा, “उननै म्हारै ताहीं जो रोमी माणस सै, कसूरवार ठहराए बिना माणसां कै स्याम्ही मारया अर जेळ म्ह गेरया। इब के हमनै बोल-बाल्ले लिकाड़ण लागरे सै? इसा कोनी, पर वे खुद आकै हमनै बाहरणै लिकाड़ै।” 38 सिपाहियाँ नै ये बात हाकिमां तै कही, अर वे न्यू सुणकै के वे रोम के बासिन्दे सै, डरगे, 39 अर आकै उन ताहीं मनाया, अर बाहरणै ले जाकै बिनती करी के नगर चले जाओ। 40 वे जेळ तै लिकड़के लुदिया के उरै गये, अर विश्वासी भाईयाँ तै भेंट करके उन ताहीं शान्ति देई, अर चले गये।

17 पौलुस अर सीलास अम्फिपुलिस अर अपुल्लोनिया नगरां तै होके थिस्सलुनीके नगर म्ह आये, जित्त यहूदियाँ का एक आराधनालय था। 2 पौलुस अपणी रीत के मुताबिक उनके धोरै गया, अर तीन्नु आराम कै दिनां म्ह पवित्र ग्रन्थ म्ह तै उनके गेल्या बहस करी, 3 अर वो उनका मतलब खोल-खोल कै समझावै था के मसीह नै दुख ठाणा, अर मरे होया म्ह तै जिन्दा उठणा, जरूरी था, अर “घोए यीशु जिसकी मै थमने कथा सुणाऊँ सूं, मसीह सै।” 4 कितने यहूदी अर परमेसवर के भगत यूनानियाँ म्ह तै घणखरयां नै, अर घणी आच्छे खानदान की लुगाईयाँ नै मान लिया, अर पौलुस अर सीलास कै गेल्या मिलगे। 5 पर यहूदियाँ नै जळण तै भरके बाजारू माणसां म्ह तै कुछ दुष्ट माणसां ताहीं अपणे गेल्या लिया, अर भीड़ कठ्ठी करके नगर म्ह दंगा मचाण लागे, अर यासोन कै घर पै चढ़ाई करके उन ताहीं आदमियाँ कै स्याम्ही ल्याणा चाह्या। 6 उननै जिव वे ओडै न्ही मिले तो वे किल्की मारदे होए यासोन अर कुछ बिश्वासी भाईयाँ ताहीं नगर के हाकिमां कै स्याम्ही खींच ल्याए, “ये माणस जिन नै दुनिया ताहीं उल्टा-पुल्टा कर दिया सै, उरै भी आ लिए सै। 7 यासोन नै उन ताहीं अपणे घरां रहण की इजाजत दी सै। ये सारे के सारे न्यू कहवै सै के यीशु राजा सै, अर कैसर के हुकमां का बिरोध करै सै।” 8 उननै आदमियाँ ताहीं अर नगर के हाकिमां ताहीं न्यू सुणाकै डरा दिया। 9 ज्यांतै उननै यासोन अर

बाकी माणसां तै जमानत पै उन ताहीं छोड़ दिया। 10 विश्वासी भाईयाँ नै जिब्बे राते-रात पौलुस अर सीलास ताहीं बिरीया नगर भेज दिया, अर वे ओड़े पोहचकै यहूदियाँ के आराधनालय म्ह गये। 11 ये माणस तो थिस्सलुनीके नगर के यहूदियाँ तै आच्छे थे, अर उननै घणे चाह् तै वचन अपणाया, अर हर-रोज पवित्र ग्रन्थां म्ह टोह्न्दे रहे के ये बात न्यू सै के न्ही। 12 ज्यांतै उन म्ह तै घणखरयां नै, अर यूनानी आच्छे खानदान की बिरबानियाँ म्ह तै अर माणसां म्ह तै भी घणखरयां नै बिश्वास करया। 13 पर जिब थिस्सलुनीके नगर के यहूदी जाणगे के पौलुस बिरीया नगर म्ह भी परमेसवर का वचन सुणावै सै, तो ओड़े भी माणसां ताहीं उकसाण अर गड़बड़ मचाण लाग्गे। 14 फेर बिश्वासी भाईयाँ नै जिब्बे पौलुस ताहीं बिदा करया के समुन्दर कै किनारे चल्या जावै, पर सीलास अर तीमुथियुस बिरीया रहगे। 15 पौलुस के मददगार उस ताहीं एथेंस नगर तक लेगे, अर सीलास अर तीमुथियुस कै खात्तर या आज्ञा पाकै बिदा होए के उसके धौरे घणी तगाजै तै आवै। 16 जिब पौलुस एथेंस नगर म्ह उसकी बाट देख्खै था, तो नगर नै मूर्तियाँ तै भरया होड़ देख्कै भोत परेशान होग्या। 17 इस करकै वो आराधनालय म्ह यहूदियाँ तै अर भगतां तै, अर चौक म्ह जो माणस उसतै फेटै थे उनतै हरेक दिन बहस करया करै था। 18 फेर इपिकूरी अर स्तोईकी उपदेशकां म्ह तै कुछे उसतै तर्क करण लाग्गे, अर कुछां नै कह्या, “यो बकवादी के कहणा चाहवै सै?” पर दुसरयां नै कह्या, “वो दुसरे देवत्यां का प्रचारक दिक्खै सै” क्यूँके वो यीशु का अर पुनरुत्थान का सुसमाचार सुणावै था। 19 फेर वे उसनै अपणे गेल्या अरियुपगुस नामक आराधनालय म्ह लेगे अर बुझ्या, “के हम जाण सकां सां के यो नया पंथ जो तू सुणावै सै, के सै? 20 क्यूँके तू अनोक्खी बात म्हारै ताहीं सुणावै सै, ज्यांतै हम जाणणा चाहवां सां के इनका के मतलब सै।” 21 (ज्यांतै के सारे एथेंसवासी अर परदेशी जो ओड़े रहवै थे, नयी-नयी बात कहण अर सुणाण कै सिवाए और किसे काम म्ह बखत कोनी बितावैं थे।) 22 फेर पौलुस नै अरियुपगुस कै बिचाळै खड़े होकै कह्या, “हे एथेंस के माणसां, मै देख्खूँ सूं के थम हर बात म्ह देवत्यां के घणे मानण आळे सो। 23 क्यूँके मै हांडदे होए जिब थारी पूज्जण की चिज्जां नै देखण लागरया था, तो एक इसी वेदी भी मिली, जिसपै लिख्या था, ‘अनजाणे ईश्वर कै खात्तर।’ इस करकै जिसनै थम बिना बेरे पूज्जो सो, मै थमनै उरसे परमेसवर का सुसमाचार सुणाऊँ सूं।” 24 जिस परमेसवर नै धरती अर उसकी सारी चिज्जां ताहीं बणाया, वो सुर्ग अर धरती का माल्लिक होकै, हाथ के बणाए होड़ मन्दरां म्ह कोनी रहन्दा, 25 उसनै माणसां की जरूरत कोनी, क्यूँके वो तो खुदे सारया ताहीं जिन्दगी अर साँस अर सारा किमे देवै सै। 26 उसनै एक ए मूल तै माणसां की सारी जात सारी धरती पै रहण के खात्तर बणाई सै, अर उनकै ठहराए होड़ बखत अर रहण या निवास की हदां ताहीं ज्यांतै बाँधया सै, 27 के वे परमेसवर नै टोहवै, कदाचित उस ताहीं टटोळकै पावै, फेरभी वो म्हारै म्ह तै किसे तै दूर कोनी। 28 क्यूँके उरसे म्ह म्हारा जीवन, चलणा-फिरणा अर म्हारी

पहचान बणै सै, जिस ढाळ थारे कितने कवियाँ नै भी कह्या सै, “हम तो उरसे के वंशज सां।” 29 “इस करकै म्ह परमेसवर का वंश होकै म्हारा यो समझणा सही कोनी के ईश्वरत्व सोन्ने-चाँदी, पत्थर के जिसा सै, जो माणसां की कारीगरी अर कल्पना तै गढ़े गये हों। 30 ज्यांतै परमेसवर नै अज्ञानता के बखत पै खियास कोनी करी, पर इब हरेक जगहां सारे माणसां ताहीं पाप छोड़ण का हुकम देवै सै। 31 क्यूँके उसनै एक दिन तय करया सै, जिसम्ह वो धार्मिकता म्ह खुद के जरिये ठहराया गये उस माणस के जरिये दुनिया का न्याय करैगा, जिन ताहीं उसनै मरे होया म्ह तै दुबारा जिन्दा करकै या बात सारे माणसां के स्याम्ही साबित कर दी सै।” 32 मरे होया के पुनरुत्थान की बात सुणकै कुछ तो मखौल करण लाग्गे, अर कुछां नै कह्या, “या बात हम तेरे तै फेर कदे सुणांगें।” 33 इसपै पौलुस उनकै बिचाळै तै लिकड़ग्या। 34 पर कई माणस प्रभु यीशु कै गेल्या मिलगे, अर बिश्वास करया, जिन म्ह दियुनिसियुस जो अरियुपगुस का सदस्य था, अर दमरिस नामकी एक लुगाई थी, अर उनकै गेल्या कुछ और भी माणस थे।

18 इसके पाछै पौलुस एथेंस नगर नै छोड़कै कुरिन्थुस नगर म्ह आया। 2 ओड़े उसनै अक्विला नामक एक यहूदी मिल्या, जिसका जन्म पुन्तुस परदेस म्ह होया था। वो अपनी घरआळी प्रिसकिल्ला कै गेल्या इटली देश तै इब्बे आया था, क्यूँके सम्राट क्लौडियुस नै सारे यहूदियाँ ताहीं रोम तै लिकड़ जाण का हुकम दिया था। ज्यांतै वो उनकै उरै गया। 3 पौलुस अर अक्विला का एक ए काम-धन्धा था, इस करकै वो उनकै गेल्या रहया अर वे काम करण लाग्गे, अर उनका काम-धन्धा तम्बू बणाण का था। 4 पौलुस हरेक आराम के दिन आराधनालय म्ह बहस करकै यहूदियाँ अर यूनानियाँ ताहीं भी समझावै था, के यीशु ए मसीह सै। 5 जिब सीलास अर तीमुथियुस मकिदुनिया परदेस तै आये, तो पौलुस वचन सुणाण की धुन म्ह यहूदियाँ ताहीं गवाही देण लाग्या के यीशु ए मसीह सै। 6 पर जिब यहूदी बिरोध अर बुराई करण लाग्गे, तो उसनै अपणे लत्यां तै धूळ झाड़कै उनतै कह्या, “इब जै परमेसवर थमनै इस पाप की सजा देवे तो उसकी मौत के जिम्मेदार थम खुदे हो! मै बेकसूर सूं। इब तै मै गैर यहूदियाँ कै धौरे जाऊँगा।” 7 पौलुस यहूदी आराधनालय तै लिकड़कै वो तीतुस यूस्तुस नामक परमेसवर के एक भगत तै घरां आया, जिसका घर आराधनालय तै लाग्या होड़ था। 8 फेर आराधनालय के सरदार क्रिस्पुस नै अपणे सारे कुण्बे सुधा प्रभु पै बिश्वास करया, अर घणखरे कुरिन्थवासी सुणकै बिश्वास लाये, अर बपतिस्मा लिया। 9 प्रभु नै एक रात दर्शन के जरिये पौलुस तै कह्या, “मतना डरै, बल्के कहे जा अर बोल-बाल्ला मतना रहवै, 10 क्यूँके मै तेरे गैल सूं अर कोए तेरे पै चढ़ाई करकै तेरा नुकसान कोनी करैगा, क्यूँके इस नगर म्ह मेरे घणे माणस सै।” 11 ज्यांतै पौलुस उन म्ह परमेसवर का वचन सिखान्दे होए डेढ़ साल ताहीं रहया। 12 जिब गल्लियो अखाया परदेस का राज्यपाल था, तो यहूदी माणस एक्का करकै पौलुस पै चढ़ आये, अर उस ताहीं न्याय गद्दी कै स्याम्ही ल्याकै कहण लाग्गे, 13 “यो

माणसां नै समझावै सै, के परमेसवर की आराधना इस ढाळ तै करो, जो नियम-कायदे के उल्ट सै।” 14 जिब पौलुस बोल्लण पैए था, तो गल्लियो नै यहूदियाँ ताहीं कह्या, “हे यहूदियों, जै या किमे अन्याय या दुष्टता की बात होन्दी, तो सही था के मै थारी सुणदा। 15 पर जै या बहस शब्दां, अर नाम्मां, अर थारे उरै के नियम-कायदे के बारे म्ह सै, तो थमे जाणो, क्यूँके मै इन बातां का न्यायाधीश कोनी बणणा चाहन्दा।” 16 अर उसनै उन ताहीं न्याय गद्दी के स्याम्ही तै लिकाड़ दिया। 17 जद सारे माणसां नै आराधनालय के सरदार सोरिथनेस ताहीं पकड़के न्याय गद्दी के स्याम्ही मारया। पर गल्लियो नै इन बातां की भी किमे चिन्ता कोनी करी। 18 पौलुस घणे दिन ताहीं कुरिन्थुस नगर रहया। फेर बिश्वासी भाईयाँ तै बिदा होके किंखिया बन्दरगाह म्ह ज्यांतै सिर मुण्डाया, क्यूँके उसनै मन्नत मान्नी थी, अर जहाज पै सीरिया परदेस नै चल्या गया अर उसकै गेल्या प्रिसकिल्ला अर अक्विला थे। 19 उसनै इफिसुस नगर पोहचके उन ताहीं ओड़ै छोड्या, अर खुद आराधनालय म्ह जाके यहूदियाँ तै बहस करण लाग्या। 20 जिब माणसां नै उसतै बिनती करी, “म्हारे गेल्या कुछ और दिन रह।” तो उसनै कोनी मान्नी, 21 पर न्यू कहके उसतै बिदा होया, “जै परमेसवर नै चाह्या तो मै थारे धौरे फेर आऊँगा।” फेर वो इफिसुस नगर तै जहाज खोल कै चाल दिया, 22 अर कैसरिया नगर म्ह उतरके (यरुशलेम नगर नै) गया अर कलीसिया ताहीं नमस्कार करके अन्ताकिया नगर म्ह आया। 23 फेर किमे दिन रहके वो ओड़ै तै लिकड़्या, अर एक और तै गलातिया अर फुगिया परदेसां म्ह सारे चेल्यां ताहीं स्थिर करदा हांड्या। 24 अपुल्लोस नामक एक यहूदी, जिसका जन्म सिकन्दरिया नगर म्ह होया था, जो ज्ञान्नी माणस था अर पवित्र ग्रन्थ ताहीं आच्छी तरियां तै जाणै था, इफिसुस नगर म्ह आया। 25 उसनै प्रभु कै राह की शिक्षा पाई थी, अर मन लाके यीशु के बारे म्ह सही-सही सुणावै अर सिखावै था, पर वो सिर्फ यहून्ना के बपतिस्मा की बात जाणै था। 26 वो आराधनालय म्ह बिना डरे बोल्लण लाग्या, पर प्रिसकिल्ला अर अक्विला उसकी बात सुणके उस ताहीं अपणे उरै लेगे अर परमेसवर की राह उस ताहीं और भी सही-सही बताई। 27 जिब उसनै फैसला करया के पार उतरके अखाया परदेस म्ह जावै तो बिश्वासी भाईयाँ नै उस ताहीं धीरज बन्धाके चेल्यां ताहीं लिख्या के वे उसतै आच्छी ढाळ फेटै, अर उसनै ओड़ै पोहचके उन माणसां की घणी मदद करी जिन नै अनुग्रह के कारण बिश्वास करया था। 28 क्यूँके वो पवित्र ग्रन्थ तै सबूत दे-देके के यीशु ए मसीह सै, घणे तावळेपण तै यहूदियाँ ताहीं सारया के स्याम्ही निरुतर (बोलती बन्द) करदा रहया।

19 जिब अपुल्लोस कुरिन्थुस नगर म्ह था, तो पौलुस उप्पर के सारे परदेस तै होके इफिसुस नगर म्ह आया। ओड़ै कई चेल्यां ताहीं मिल्या। 2 उनतै बोल्या, “के थमनै बिश्वास करदे बखत पवित्र आत्मा पाया था?” उननै उसतै कह्या, “हमनै तो पवित्र आत्मा का जिक्र भी कोनी सुण्या।” 3 पौलुस नै उनतै कह्या, “तो फेर थमनै

किसका बपतिस्मा लिया?” वे बोल्ले, “यहून्ना का बपतिस्मा।” 4 पौलुस बोल्या, “यहून्ना नै न्यू कह्या, के पाप करणा छोड़ दो, अर बपतिस्मा ल्यो, परमेसवर थारे पाप माफ कर देगा, अर जो मैरे पाछै आण आळा सै, उसपै बिश्वास करियो, यानिके यीशु पै।” 5 न्यू सुणके उननै प्रभु यीशु के नाम म्ह बपतिस्मा लिया। 6 जिब पौलुस नै उनपै हाथ धरे, तो पवित्र आत्मा उनपै उतरया, अर वे अन्य-अन्य भाषा बोल्लण अर भविष्यवाणी करण लाग्गे। 7 ये सारे करीबन बारहा माणस थे। 8 पौलुस आराधनालय म्ह जाके तीन महिन्ने ताहीं बिना डरे होके बोल्दा रहया, अर परमेसवर के राज्य कै बारे म्ह बहस करदा अर समझान्दा रहया। 9 पर जो माणसां कठोर थे उननै उसका बिश्वास कोनी करया, बल्के माणसां के स्याम्ही इस पंथ नै बुरा कहण लाग्गे, तो उसनै उन ताहीं छोड़ दिया अर चेल्यां ताहीं साथ लेके तुरन्नुस की पाठशाला म्ह गये, जित्त वे रोज भीड़ तै परमेसवर के बारे म्ह बहस करया करै थे। 10 दो साल ताहीं न्यूए होन्दा रहया, उरै ताहीं के आसिया परदेस के रहणीये के यहूदी के यूनानी सारया नै प्रभु का वचन सुण लिया। 11 परमेसवर नै पौलुस ताहीं अदभुत चमत्कार करण की सामर्थ दी। 12 उरै ताहीं के रूमाल अर अन्नोछे उसके गात तै छुआ के बिमारां पै गैरे थे, अर उनकी बीमारी जान्दी रहवै थी, अर भुंडी ओपरी आत्मा उन म्ह तै लिकड़ जाया करै थी। 13 पर कुछ यहूदी लोग जो झाड़ा-फूँक करदे हान्डै थे, न्यू करण लाग्गे के जिन म्ह भुंडी ओपरी आत्मा हो उनपै प्रभु यीशु का नाम न्यू कहके फूँके, “जिस यीशु का प्रचार पौलुस करै सै, मै थारे ताहीं उससे आदमी की कसम दियुं सूं।” 14 अर स्किक्वा नाम का एक यहूदी प्रधान याजक के सात बेटे थे, जो इस्से तरियां ए करै थे। 15 पर भुंडी ओपरी आत्मा नै उन ताहीं जवाब दिया, “यीशु ताहीं मै जांगु सूं, अर पौलुस ताहीं भी पिच्छाणु सूं, पर थम कौण सो?” 16 अर उस माणस नै जिसम्ह भुंडी ओपरी आत्मा थी उनपै लपकके अर उन ताहीं बस म्ह करके, उनपै इसा दुर्गाति मचाया के वे उघाड़े अर घायल होके उस घर तै लिकड़ भाज्जे। 17 या बात इफिसुस नगर के रहण आळे सारे यहूदी अर यूनानी भी जाणगे, अर वे सारे डरगे, अर प्रभु यीशु के नाम की बड़ाई होई। 18 जिन नै बिश्वास करया था, उन म्ह तै घणखरयां नै आके अपणे-अपणे काम्मां ताहीं मान लिया अर दिखा दिया। 19 जादू करण आळा म्ह तै घणाए नै अपणी-अपणी सारी पोथी कठी करके सारया के स्याम्ही जळा दी, अर जिब उसका दाम जोड़या गया, तो पचास हजार चाँदी के सिक्के के बराबर लिकड़या। 20 इस तरियां प्रभु का वचन सामर्थी तरिकके तै फैलदा अर हावी होंदा गया। 21 जिब ये बात हो ली तो पौलुस नै आत्मा म्ह ठाण लिया के मकिदुनिया अर अखाया परदेस तै होके यरुशलेम नगर जाऊँ, अर बोल्या, “यरुशलेम जाणके बाद मनै रोम ताहीं भी देखणा जरूरी सै।” 22 इस करके अपणी सेवा करणीया म्ह तै तीमुथियुस अर इरास्तुस ताहीं मकिदुनिया परदेस भेजके खुद किमे दिन आसिया परदेस म्ह रहग्या। 23 उस बखत उस पन्थ कै बारे म्ह घणा दंगा माच्या। 24 क्यूँके देमेत्रियुस नाम का एक सुनार अरतिमिस

के चाँदी के मन्दर बगवाकै कारिगरां ताहीं घणा काम दुवाया करै था। 25 उसनै उन ताहीं अर इस्से तरियां की चिज्जां के कारिगरां ताहीं कठ्ठा करके कह्या, “हे भाईयो, थमनै बेरा सै के इस काम तै हमनै कितना धन मिलै सै। 26 थम देख्यो अर सुणो सो के सिर्फ इफिसुस नगर म्ह ए कोनी, बल्के कई बर सारे आसिया परदेस म्ह न्यू कह-कहकै इस पौलुस नै घणे माणसां ताहीं समझाया अर भकाया भी सै, के जो हाथ की कारीगरी सै, वे ईश्वर कोनी। 27 इसतै इब सिर्फ इस्से बात का ए भय न्ही सै के म्हारै इस धन्धे की इज्जत-मान जान्दी रहवैगी, बल्के न्यू भी के महान् देवी अरतिमिस का मन्दर तुच्छ समझया जावैगा, अर जिस ताहीं सारा आसिया परदेस अर दुनिया पूज्जै सै उसका महत्व भी जान्दा रहवैगा।” 28 कारीगर न्यू सुणके खुन्दक तै भरगे अर किल्की मार-मारके कहण लाग्गे, “इफिसियाँ की अरतिमिस देवी, महान् सै!” 29 अर सारे नगर म्ह घणा दंगा माचग्या, अर माणसां नै मकिदुनियावासी गयुस अर अरिस्तर्खुस ताहीं जो पौलुस के संगी मुसाफर थे, पकड़ लिया, अर एक सेत्ती रंगशाला म्ह भाजगे। 30 जिब पौलुस नै माणसां कै धोरै भीत्तर जाणा चाह्या तो चेल्यां नै उस ताहीं जाण न्ही दिया। 31 आसिया परदेस के हाकिमां म्ह तै भी उसके कई साथियाँ नै उसके धोरै कहवां भेज्या अर बिनती करी के रंगशाला म्ह जाके जोखम ना ठाईयो। 32 भीड़ म्ह तै कोए कुछ चिल्लावै था अर कोए कुछ, सारी भीड़ पूरी तरियां घबराई होई थी, अर घणखरे माणसां नै तो न्यूप कोनी बेरा था के वे क्यां खात्तर कठ्ठे होए सै। 33 फेर उननै सिकन्दर ताहीं, जिस ताहीं यहूदियाँ नै खड्या करया था, भीड़ म्ह आग्वै बढ़ाया। सिकन्दर हाथ तै इशारा करके माणसां के स्याम्ही जवाब देणा चाहवै था। 34 पर जिब उननै बेरा लागग्या के वो यहूदी सै, तो सारे के सारे एक बोल म्ह कोए दो घंटे ताहीं चिल्लान्दे रहे, “इफिसियाँ की अरतिमिस देवी, महान् सै!” 35 फेर नगर के मन्त्री नै माणसां ताहीं शान्त करके कह्या, “हे इफिसुस नगर के माणसाँ, किसनै न्ही बेरा के इफिसियाँ का नगर महान् अरतिमिस देवी के मन्दर, अर ज्यूस की ओड़ तै गिरी होड़ मूर्ति का टहलुआ सै।” 36 आखर म्ह जिब के इन बातों का खण्डन ए कोनी हो सकदा, तो सही सै के थम शान्त रहो अर बिना सोच्चे-समझे किमे ना करो। 37 क्यूँके थम इन माणसां नै ल्याए सो जो ना मन्दर के लुट्टण आळे सै अर ना म्हारी देवी के बुराई करणीये सै। 38 इस करके देमेत्रियुस अर उसके मित्तर-कारिगरां ताहीं किसे तै एतराज हो तो कन्हेड़ी जा सकै सै अर हाकिम भी सै, वे एक-दुसरे पै दोष लावै। 39 पर जै थम किसे और बात के बारे म्ह किमे बुझणा चाहो सो, तो बखत पै सभा म्ह फैसला करया जावैगा। 40 आज की इस घटना कै कारण म्हारै पै उपद्रव का इल्जाम लागगण का खतरा सै, क्यूँके इसकै खात्तर कोए भी ठोस कारण दिखाई कोनी देंदा, “हम इस भीड़ के कठ्ठा होण का कोए जवाब कोनी दे सकांगें।” 41 न्यू कहके उसनै सभा ताहीं बिदा करया।

20 जिब दंगा थम गया तो पौलुस नै चेल्यां ताहीं बुलाकै उत्साहित करया, अर उनतै बिदा होकै मकिदुनिया परदेस की ओड़ चाल

दिया। 2 उस सारे परदेस म्ह तै होकै अर चेल्यां ताहीं घणा समझाकै वो यूनान देश म्ह आया। 3 जिब तीन महिन्ने रहकै वो ओड़ै तै जहाज पै सीरिया परदेस की ओड़ जाण पै था, तो यहूदी अगुवें उसकी टाह म्ह लाग्गे, ज्यांतै उसनै निश्चय करया के मकिदुनिया परदेस होकै बोहड़ जावै। 4 बिरीयावासी पुरुस का बेटा सोपत्रुस अर थिस्सलुनीकियों नगर म्ह तै अरिस्तर्खुस अर सिकुन्दुस, अर दिरबे नगर का गयुस, अर तीमुथियुस, अर आसिया परदेस का तुखिकुस अर त्रुफिमस आसिया परदेस ताहीं उसके गैल हो लिये। 5 ये म्हारै मुसाफिर साथी म्हारै तै पैहले चले गये। 6 अर हम अखमीरी रोटी के त्यौहार के दिनां कै पाछै फिलिप्पी तै जहाज पै चढ़के पाँच दिन म्ह त्रोआस म्ह उसके धोरै पोहचे, अर सात दिन ताहीं रहे। 7 हप्तै के पैहल्ले दिन जिब हम प्रभुभोज कै खात्तर कठ्ठे होए, तो पौलुस जो दुसरे दिन चले जाण पै था, उनतै बात करी, आध्धी रात ताहीं बात करदा रहया। 8 जिस चौबारे पै हम कठ्ठे थे, उस म्ह घणे दीवे जळण लागरे थे। 9 अर यूतुखुस नाम का एक जवान खिड़की पै बेठ्या होया नींद की झपकियाँ लेण लागरया था। जिब पौलुस वारी ताहीं बात करदा रहया तो यूतुखुस नींद कै झोक्के म्ह तीसरी अटारी पै तै पड़ग्या, अर उसकी मौत होगी। 10 पौलुस नीचै गया, उसके धोरै जाके उसतै लिपटग्या, अर गळे लाकै कह्या, “घबराओ ना, वो जीवै सै।” 11 अर उसनै दुबारा उप्पर जाके रोटी तोड़ी अर खाके दिन लिक्ड़ण ताहीं उनतै बात करदा रहया, सबेरा होग्या। फेर वो चल्या गया। 12 अर वे उस जवान ताहीं जिन्दा लियाए अर माणस भोत खुश होए। 13 हम पाणी के जहाज पै सवार होकै अस्सुस नगर की ओड़ बढे, जडै हमनै पौलुस ताहीं साथ लेके आग्वै बढ़णा था, पर पौलुस ओड़ै पैदल राह तै पोहोचा था, क्यूँके या उसकी पैहले तै बणाई तरकीब थी। 14 अस्सुस नगर उन ताहीं मिल्या तो हमनै उस ताहीं पाणी के जहाज म्ह अपणे साथ लिया अर मितुलेने नगर म्ह जा पोहचे। 15 ओड़ै तै जहाज खोल कै हम दुसरे दिन खियुस टापू कै स्याम्ही पोहचे, अर आगले दिन सामुस टापू म्ह जाण लाग्गे, पर उसके आगले एक दिन के बाद मीलेतुस बन्दरगाह म्ह आये। 16 पौलुस नै इफिसुस नगर म्ह ना उतरके आग्वै बढ़ जाण का इरादा करया क्यूँके वो चाहवै था के आसिया परदेस म्ह ठैहरण की बजाए जै हो सक्या तो तगाजै तै पिन्तेकुस्त कै त्यौहार के मौक्के पै यरुशलम नगर म्ह पोहच जावै। 17 मीलेतुस नगर तै पौलुस नै इफिसुस नगर म्ह समाचार भेजके कलीसिया के अगुवां ताहीं बुलवाया। 18 जिब वे उसके लोवै आये, तो उनतै कह्या “थमनै बेरा सै के पैहल्ले ए दिन तै जिब मै आसिया परदेस म्ह पोंहच्या, मै हर-बखत थारे गेल्या किस ढाळ रहया, 19 यानिके घणी दीनता तै, अर आँसू बहा-बहाके, अर उन मुसीबतां म्ह जो यहूदियाँ की साजिस के कारण मैरे पै आण पड़ी, मै प्रभु की सेवा करदा ए रहया। 20 अर जो-जो बात थारे फायदे की थी, उन ताहीं बताण अर माणसां के स्याम्ही अर घर-घर सिखाण तै कदे न्ही झिझक्या, 21 बल्के यहूदियाँ अर यूनानियाँ के स्याम्ही गवाही देंदा रहया के परमेसवर की ओड़ मन फिराणा अर म्हारै प्रभु यीशु पै विश्वास करणा

चाहिये।” 22 इब देक्खो, मै पवित्र आत्मा म्ह बन्धया होया यरुशलेम नगर नै जाऊँ सूँ. अर मन्ने न्ही बेरा के ओड़े मेरे पे के-के बीतगी। 23 सिर्फ यो के पवित्र आत्मा हरेक नगर म्ह गवाही दे-देकै मेरे तै कहवै सै के बन्धन अर क्लेश तेरे खातर त्यार सै। 24 पर मै अपनी जान नै किमे न्ही समझदा के उसतै प्यार राक्खूँ, बल्के यो के मै अपनी दौड़ ताहीं अर उस सेवा नै पूरी करँ, जो मन्ने परमेसवर के अनुग्रह के सुसमाचार पै गवाही देण के खातर प्रभु यीशु तै पाई सै। 25 इब देक्खो, मन्ने बेरा सै के थम सारे जिन म्ह मै परमेसवर के राज्य का प्रचार करया सै, मेरा मुँह दुबारा कोनी देक्खोगे। 26 ज्यांतै मै आज के दिन थारे तै गवाही देकै कहूँ सूँ, के मै किसे की भी मौत का कसूरवार न्ही सूँ। 27 क्यूँके मै परमेसवर की सारी इच्छा नै थारे ताहीं बताण म्ह कदे कोनी हिचकिचाया। 28 इस करके थम अपना ध्यान राक्खो अर उस टोळ का भी, जिसका रुखाळा थारे ताहीं पवित्र आत्मा ठहराया सै, के थम परमेसवर की कलीसिया की रुखाळी करो, जिस ताहीं उसनै खुद अपने लहू तै मोल लिया सै। 29 मन्ने बेरा सै के मेरे जाणके बाद पाड़ण आळे भेड़िये थारे म्ह आवैगें जो टोळ नै कोनी छोड़ैगें। 30 थारे ए बिचाळै तै भी इसे-इसे माणस उठैगें, जो चेल्यां ताहीं अपने पाच्छे खींच लेण ताहीं टेढ़ी-मेढ़ी बात कहवैगें। 31 इस करके जागदे रहो, अर याद राक्खो के मन्ने तीन साल्लां ताहीं रात-दिन आँसू बहा-बहाके हरेक ताहीं चेतावनी देणा न्ही छोड़्या। 32 “अर इब मै थमनै परमेसवर अर उनके अनुग्रह के वचन की देखभाळ म्ह सौपण लागरया सूँ, जिस म्ह थारी बढ़ोतरी करण अर उन सब के साथ मीरास देण की ताकत सै, जो प्रभु खातर न्यारे करे गये सै। 33 मन्ने किसे के चाँदी, सोन्ने या लत्ते का लोभ कोनी करया। 34 थमनै खुदे बेरा सै के इन्हे हाथ्यां नै मेरी अर मेरे साथियाँ की जरूरत पूरी करी सै। 35 मन्ने थारे ताहीं सारया किमे करके दिखाया के इस तरियां तै मेहनत करदे होए कमजोरां ताहीं सम्भालणा अर प्रभु यीशु के वचन याद राखणा जरूरी सै, जो उसनै खुदे कहा सै: ‘लेण तै देणा धन्य सै।’” 36 न्यू कहके उसनै गोड़े टेक्के अर उन सारया के गेल्या प्रार्थना करी। 37 फेर वे सारे घणे रोये अर पौलुस के गळे लिपटके उस ताहीं चुम्प लागगे। 38 वे खासकर इस बात तै दुखी थे जो उसनै कही थी के थम मेरा मुँह दुबारा कोनी देक्खोगे। इसके बाद वे पौलुस के साथ पाणी के जहाज तक गये।

21 जिब हमनै उनतै न्यारे होकै जहाज खोल्या, तो सीध्दी राही तै कोस टापू म्ह आये, अर दुसरे दिन रुदुस टापू म्ह अर ओड़ै तै पतरा टापू म्ह। 2 ओड़ै एक जहाज फीनीके परदेस नै जान्दा होया मिल्या, अर हमनै उसपै चढ़के अपना सफर शरु करया। 3 हमनै ओळै हाथ कान्ही साइप्रस टापू दिखया, तो हम उसनै छोड़के सीरिया परदेस की ओड़ बढ़ते गये अर सूर नगर म्ह जा पोहचे, क्यूँके ओड़ै जहाज तै समान उतारया जाणा था। 4 चेल्यां नै पाके हम ओड़ै सात दिन ताहीं रहे। उननै पवित्र आत्मा के सिखाए पौलुस तै कहा के ओड़ै (यरुशलेम नगर म्ह) पाँ ना धरिये। 5 सात दिन के बाद जिब ओड़ै तै म्हारे जाण का

बखत आया, तो वे पूरे परिवार के साथ म्हारे ताहीं बिदा करण खातर नगर की सीमा तक आये, अर समन्दर के किनारे हमनै घुटने टेकके प्रार्थना करी, 6 फेर एक-दुसरे तै बिदा होकै, हम तो जहाज पै चढ़गे अर वे अपने-अपणे घरां बोहड़गे। 7 जिब हम सूर नगर तै जहाज पै सफर करके पतुलिमियस नगर म्ह पोहचे, अर बिश्वासी भाईयाँ नै नमस्कार करके उनके गेल्या एक दिन रहे। 8 दुसरे दिन हम ओड़ै तै चालके कैसरिया नगर म्ह आये, अर फिलिप्पुस सुसमाचार प्रचारक के घर म्ह जो उन सात आदमियाँ म्ह तै एक था, जिन ताहीं प्रेरितां नै बिधवा जनानियाँ की सेवा करण खातर यरुशलेम म्ह छाट्या था, हम उससे कै घर म्ह ठहरे। 9 उसकी चार कुँवारी बेट्टी थी, जो भविष्यवाणी करया करै थी। 10 जिब हम ओड़ै घणे दिन ताहीं रह लिये, तो अगबुस नाम का एक नबी यहूदिया परदेस म्ह आया। 11 उसनै म्हारे धोरे आके पौलुस का कमरबन्द लिया, अर अपने हाथ-पाँ बाँधके कहा, “पवित्र आत्मा न्यू कहवै सै के जिस माणस का यो कमरबन्द सै, उस ताहीं यरुशलेम नगर म्ह यहूदी इस्से तरियां तै बाँधेगें, अर गैर यहूदियाँ के हाथ्यां म्ह सौपेगें।” 12 जिब हमनै ये बात सुणी, तो हमनै अर ओड़ै के माणसां नै पौलुस तै बिनती करी के यरुशलेम नगर नै ना जाइए। 13 पर पौलुस नै जवाब दिया, “थम के करो सो के रो-रोके मेरा मन तोड़ो सो? मै तो प्रभु यीशु के नाम के खातर यरुशलेम नगर म्ह ना सिर्फ बाँधे जाण ए के खातर बल्के मरण के खातर भी त्यार सूँ।” 14 जिब उसनै न्ही मानी तो हम न्यू कहके बोल-बाल्ले रहगे, “प्रभु की मर्जी पूरी हो।” 15 कई दिनां पाच्छे हमनै त्यारी करी अर यरुशलेम नगर नै चाल दिए। 16 कैसरिया नगर तै भी कुछ चेल्लें म्हारे गेल्या हो लिए, अर म्हारे ताहीं ठहराण खातर साइप्रसवासी मनासोन के घर ले गये, वो सब तै पैहले के चेल्यां म्ह तै एक था। 17 जिब हम यरुशलेम नगर म्ह पोहचे, तो बिश्वासी भाई घणी खुशी के गेल्या हम तै मिले। 18 दुसरे दिन पौलुस म्हारे ताहीं लेके याकूब के धोरे गया, जित्त सारे कलीसिया के अगुवें कठुे थे। 19 जद उसनै उन ताहीं नमस्कार करके, जो-जो काम परमेसवर नै उसकी सेवा के जरिये गैर यहूदियाँ म्ह करे थे, एक-एक करके सारे बताए। 20 उननै न्यू सुणके परमेसवर की महिमा करी, फेर उसतै बोल्या, “हे भाई, तू देक्खे सै के यहूदियाँ म्ह तै कई हजारों नै बिश्वास करया सै, अर सारे नियम-कायदे के खातर मानण म्ह पक्के सै। 21 उननै यो सुण राख्या सै के तू गैर यहूदी माणसां के बीच म्ह रहन्दे होए यहूदियाँ ताहीं या शिक्षा देण लागरया सै के मूसा नबी के नियम-कायदा नै छोड़ द्यो, ना तो अपने बाळकां का खतना करो अर ना रीति-रिवाज्जां पै चाल्लों। 22 तो फेर के करया जावै? माणस जरूर सुणैगें के तू आया सै। 23 इस करके जो हम तेरे तै कहां सां, वो कर। म्हारा सुझाव मान उरै इसे चार माणस सै, जिन नै कसम खाई सै।” 24 तू उनके गैल जा, शुद्ध होण की विधि पूरी कर, अर उसके मुण्डन का खर्चा ठा, फेर सारया नै यो बेरा लाग ज्यागा के जो कुछ भी बात तेरे बारे म्ह कहा गया सै, उस म्ह कोए सच्चाई न्ही सै पर तू खुद भी नियम-कायदे का पालन करै सै। 25 पर उन गैर यहूदियाँ के

बारै म्ह जिन नै बिश्वास करया सै, हमनै यो फैसला करकै लिख भेज्या सै “के वे मूर्तियाँ के स्याम्ही बलि करे हाड़ माँस तै, अर लहू तै अर घेटी घोट्टे होयां के माँस तै अर जारी तै बचे रहवै।” 26 फेर पौलुस उन माणसां नै लेकै, अर दुसरे दिन उनकै गेल्या शुद्ध होकै मन्दर म्ह गया, अर ओड़ै बता दिया के शुद्ध होण के दिन, यानिके उन म्ह तै हरेक कै खात्तर चढ़ावा चढ़ाए जाण तक के दिन कद पूरे होवैगें। 27 जिब वे सात दिन पूरे होण पै थे, तो आसिया परदेस के यहूदियाँ नै पौलुस ताहीं मन्दर म्ह देखकै सारे माणसां ताहीं उकसाया, अर न्यू रुक्का मारके उस ताहीं पकड़ लिया, 28 “हे इस्राएलियों, मदद करो, यो वोए माणस सै, जो माणसां के, अर नियम-कायदे के, अर इस जगहां के बिरोध म्ह हरेक जगहां सारे माणसां नै सिखावै सै, उरै ताहीं के यूनानियाँ ताहीं भी मन्दर म्ह ल्याकै उसनै इस पवित्र जगहां ताहीं अपवित्र करया सै।” 29 उननै इसतै पैहल्या इफिसुसवासी त्रुफिमस ताहीं पौलुस कै गेल्या नगर म्ह देख्या था, अर सोचै थे के पौलुस उसनै मन्दर म्ह लियाया सै। 30 फेर सारे नगर म्ह दंगा माचग्या, अर माणस भाजकै कट्टे होए, अर पौलुस नै पकड़के मन्दर के बाहरणै घसीट ल्याए, अर जिब्बे किवाड़ बन्द करे गये। 31 जिब वे उसनै मार देणा चाहवै थे, तो पलटन के सरदार नै सन्देशा पोंहच्या के सारे यरुशलेम नगर म्ह दंगा माचरया सै। 32 फेर वो जिब्बे सिपाहियाँ अर सूबेदारानं नै लेकै उनकै धोरै तळै भाज आया, अर उननै पलटन के सरदार अर सिपाहियाँ ताहीं देखकै पौलुस ताहीं मारणा-छेतणा छोड़ दिया। 33 फेर पलटन के सरदार नै धोरै आकै पौलुस ताहीं पकड़ लिया, अर दो साँकळां तै बाँधण का हुकम देकै बुझ्झण लाग्या, “यो कौण सै अर इसनै के करया सै?” 34 पर भीड़ म्ह तै कोए किमे अर कोए किमे चिल्लान्दा रहया। जिब रोले कै कारण वो सही सच्चाई न्ही जाण सक्या, तो उस ताहीं गढ़ म्ह ले जाण का हुकम दिया। 35 जिब वो सीढ़ी पै पोंहच्या, तो इसा होया के भीड़ की दाब के मारे सिपाहियाँ नै उस ताहीं ठाकै ले जाणा पड्या। 36 क्यूँके माणसां की भीड़ न्यू चिल्लान्दी होई उसकै पाच्छे पड़री थी, “उसनै खतम कर द्यो।” 37 जिब वे पौलुस नै गढ़ म्ह ले जावण आळे थे, तो उसनै पलटन के सरदार तै कह्या, “जै मन्ने इजाजत हो तो मै थारे तै किमे कहूँ?” वो बोल्या, “के तू यूनानी भाषा जाणै सै? 38 “के तू मिस्र देश का कोनी, जो इन दिनां तै पैहल्या बिद्रोही बणकै, चार हजार हथियार सुधा माणसां नै जंगळ म्ह लेग्या?” 39 पौलुस नै कह्या, “मै तो तरसुस का यहूदी माणस सूँ! मै किलिकिया परदेस के तरसुस नगर का बासिन्दा सूँ। मै तेरे तै बिनती करूँ सूँ के मन्ने माणसां तै बात करण दे।” 40 जिब उसनै हुकम दिया, तो पौलुस नै सीढ़ी पै खड़े होकै माणसां ताहीं हाथ तै इशारा करया। जिब वे चुप होए तो वो इब्रानी भाषा म्ह बोल्लण लाग्या:

22 “हे भाईयो अर बुजुर्गो, मेरा बदले म्ह जवाब सुणो, जो मै इब थारे स्याम्ही ल्याऊँ सूँ।” 2 वे न्यू सुणकै के वो हम तै इब्रानी भाषा म्ह बोल्लै सै, और भी बोल-बाल्ले होगे। फेर उसनै कह्या 3 “मै तो यहूदी माणस सूँ, जो किलिकिया के तरसुस नगर म्ह जन्मा, पर इस नगर म्ह

गमलीएल के पायां कै धोरै बैठकै पढ़ाया गया, अर पूर्वजां के नियम-कायदा नै ठीक रीति तै सिखाया गया अर परमेसवर के खात्तर इसी धुन लारया था, जिस तरियां थम सारे आज लारे सो। 4 मन्ने माणस अर लुगाई दोनुआ ताहीं जुड़-जुड़कै अर जेळ म्ह गेर-गेर कै, इस पंथ नै उरै ताहीं सताया के उन ताहीं मरवा भी दिया। 5 इस बात कै खात्तर महायाजक अर सारे यहूदी अगुवें गवाह सै, के उनतै मै भाईयोँ के नाम पै चिट्ठियाँ लेकै दमिश्क नगर नै चाल्या जाऊँ था, के जो ओड़ै हों उन ताहीं भी सजा दुवाण कै खात्तर बाँधकै यरुशलेम नगर लाऊँ। 6 “जिब मै चाल्दे-चाल्दे दमिश्क नगर कै लौवै पोंहच्या, तो इसा होया के दोपहर कै करीबन चाणचक एक घणा चाँदणा अकास तै मेरै चौगरदे नै चमक्या। 7 अर मै धरती पै गिर गया अर यो शब्द सुणया, ‘हे शाऊल, हे शाऊल, तू मन्ने क्यातै सतावै सै?’” 8 मन्ने जवाब दिया, “हे प्रभु, तू कौण सै?” उसनै मेरै तै कह्या, “मै यीशु नासरी सूँ,” जिस ताहीं तू सतावै सै। 9 मेरै साथियाँ नै चाँदणा तो देख्या, पर मेरै तै जो बोल्लै था उसनै समझ कोनी पाए। 10 फेर मन्ने कह्या, “हे प्रभु, मै के करूँ?” प्रभु नै मेरै तै कह्या, “उठकै दमिश्क नगर म्ह जा, अर जो किमे तेरे तै करण कै खात्तर ठहराया गया सै ओड़ै तेरे तै सब बता दिया जावैगा।” 11 जिब उस चाँदणे के तेज के मारे मन्ने किमे कोनी दिख्या, तो मै अपने साथियाँ का हाथ पकड़े होए दमिश्क नगर म्ह आया। 12 “फेर हनन्याह नामक नियम-कायदे के मुताबिक एक भगत माणस, जो ओड़ै के रहणीये सारे यहूदियाँ म्ह सुनाम्मी था, मेरै धोरै आया,” 13 अर खड़े होकै मेरै तै कह्या, “हे भाई शाऊल, फेर देखण लाग।” उससे बखत मेरी आँख खुलगी अर मन्ने उस ताहीं देख्या। 14 फेर उसनै कह्या, “म्हारै बाप-दाद्या के परमेसवर नै तेरे ताहीं ज्यातै ठहराया के तू उसकी मर्जी नै जाणै, अर उस धर्मी नै देख्खै अर उसकै मुँह की बात सुणै। 15 क्यूँके तू उसकी ओड़ तै सारे माणसां कै स्याम्ही उन बाचां का गवाह होगा जो तन्नै देख्खी अर सुणी सै। 16 इब क्यातै वार करै सै? उठ, बपतिस्मा ले, अर उसका नाम लेके अपने पापां की माफी पा ले।” 17 “जिब मै दुबारा यरुशलेम नगर म्ह आकै मन्दर म्ह प्रार्थना करण लागरया था, तो बेसुध होग्या, 18 अर उस ताहीं देख्या के वो मेरै तै कहवै सै, ‘तावळ करकै यरुशलेम नगर तै झट दे-सी लिकड़ज्या,’ क्यूँके वे मेरै बारै म्ह तेरी गवाही कोनी मान्नेगें।” 19 मन्ने कह्या, “हे प्रभु, उननै तो खुदे बेरा सै के मै तेरे पै बिश्वास करण आळा नै जेळ म्ह गेरू अर जगहां-जगहां आराधनालय म्ह छित्वाऊँ था। 20 जिब तेरे गवाह स्तिफनुस का लहू बहाया जाण लागरया था जद मै भी ओड़ैए खड्या था अर इस बात म्ह सहमत था, अर उसकै मारणीयां के लत्यां की रुखाळी करूँ था।” 21 अर प्रभु नै मेरै तै कह्या, “चल्या जा क्यूँके मै तेरे ताहीं गैर यहूदियाँ कै धोरै दूर-दूर भेज्जूंगा।” 22 माणस इस बात तक उसकी सुणदे रहे, फेर जोर तै चिल्लाए, “इसे माणस का नाश करो, उसका जिन्दा रहणा ठीक कोनी!” 23 जिब वे चिल्लान्दे अर लत्ते बगान्दे अर अकास म्ह धूळ उड़ावै थे, 24 तो पलटन के सरदार नै कह्या, “इस ताहीं गढ़ म्ह ले

जाओ, अर कोड़े मारके जाँचो, के मन्ने बेरा लागै के माणस किस कारण उसके बिरोध म्ह इस ढाल चिल्लावे सै।” 25 जिब उनने उस ताहीं फित्यां तै बाँधया तो पौलुस नै उस सूबेदार तै जो धोरै खड्या था, कह्या, “के यो सही सै के थम एक रोमी माणस ताहीं, अर वो भी बिना कसूरवार ठहराए होए, कोड़े मारो?” 26 सूबेदार नै न्यू सुणकै पलटन के सरदार के धोरै जाके कह्या, “तू यो के करै सै? यो तो रोमी माणस सै।” 27 फेर पलटन के सरदार नै उसके धोरै आके कह्या, “मन्ने बता, के तू रोमी सै?” उसने कह्या, “हाँ।” 28 न्यू सुणकै पलटन के सरदार नै कह्या, “मन्ने रोमी होण का पद घणे रपिये देकै मिल्या सै।” पौलुस नै कह्या, “मै तो जन्म तै रोमी सू?” 29 फेर जो माणस उस ताहीं जांचण पै थे, वे जिब्बे उसके धोरै तै हट्यो, अर पलटन का सरदार भी न्यू जाणकै के यो रोमी सै अर मन्ने उस ताहीं बाँधया सै, डरग्या। 30 दुसरे दिन उसने सही-सही जाणण की मर्जी तै के यहूदी उसपै क्यातै दोष लावै सै, उसके बन्धन खोल दिए, अर प्रधान याजकां अर यहूदी अगुवां की सभा ताहीं कठ्ठा होण का हुकम दिया, अर पौलुस नै तळै ले जाके उनके स्याम्ही खड्या कर दिया।

23 पौलुस नै यहूदी अगुवां की सभा की ओड़ गौर तै देख्या अर कह्या, “हे भाईयो, मन्ने आज ताहीं परमेसवर के खात्तर जमा-कती सच्चे मन तै जीवन बिताया सै।” 2 इसपै हनन्याह महायाजक नै उन ताहीं जो उसके धोरै खड़े थे, उसके मुँह पै थपड़ मारण का हुकम दिया। 3 फेर पौलुस नै उसतै कह्या, “हे चुन्ना फिरी होड़ भीत, परमेसवर तेरे ताहीं मारैगा। तू नियम-कायदे के मुताबिक मेरा न्याय करण नै बैठ्या सै, अर फेर के नियम-कायदे के खिलाफ मेरै ताहीं मारण का हुकम देवै सै?” 4 जो धोरै खड़े थे उनने कह्या, “के तू परमेसवर के महायाजक नै आच्छा-भुंडा बोल्लै सै?” 5 पौलुस नै कह्या, “हे भाईयो, मन्ने न्ही बेरा था के यो महायाजक सै, क्यूँकै वचन म्ह लिख्या सै: ‘अपणे माणसां के प्रधान नै भुंडा ना बोलिए।’” 6 फेर पौलुस नै न्यू जाणकै के एक टोळ सदूकी अर दुसरा फरीसी लोग्गां का सै, यहूदी अगुवां की सभा म्ह रुक्का मारके कह्या, “हे भाईयो, मै फरीसी अर फरीसी लोग्गां के वंश का सूं, मेरे होया की आस अर पुनरुत्थान के बारे म्ह मेरा मुकद्दमा होरया सै।” 7 जिब उसने या बात कही तो फरीसियाँ अर सदूकियाँ म्ह दंगा होण लाग्या, अर सभा म्ह फूट पड़गी। 8 क्यूँकै सदूकियाँ का बिश्वास तो न्यू कहवै सै, के ना पुनरुत्थान सै, ना सुर्गदूत अर ना आत्मा सै, पर फरीसी इन सारया नै मान्नै सै। 9 फेर घणा दंगा माच्या अर कुछ शास्त्री जो फरीसियाँ के टोळ के थे, उठ लिए अर न्यू कहकै दंगा करण लाग्ये, “हम इस माणस म्ह कोए बुराई कोनी पांदे, अर जै कोए आत्मा या सुर्गदूत उसतै बोल्या सै तो फेर के होग्या?” 10 जिब घणा दंगा होया, तो पलटन के सरदार नै इस भय तै के वे पौलुस के टुकड़े-टुकड़े ना कर देवै, पलटन ताहीं हुकम दिया के उतरके उस ताहीं उनके बिचाळे तै हाँगे तै लिकाड़े, अर गढ़ म्ह ले जावै। 11 उससे रात प्रभु यीशु नै उसके धोरै खड़े होकै कह्या, “हे पौलुस, धीरज राख, क्यूँकै जिसी तन्ने यरुशलम नगर

म्ह मेरी गवाही देई, उसीए तन्ने रोम म्ह भी गवाही देणी होगी।” 12 जिब दिन लिकड़या तो यहूदियाँ नै साजिस रची अर कसम खाई के जिब ताहीं हम पौलुस नै मार न्ही देवा, जै हम खावां या पीवां तो म्हारै पै धिक्कार सै। 13 जिन नै आप्पस म्ह या कसम खाई थी, वे चाळीस जणयां तै घणे थे। 14 उनने प्रधान याजकां अर यहूदी अगुवां के धोरै जाके कह्या, “हमने न्यू ठान लिया सै के जिब ताहीं हम पौलुस नै मार न्ही देंदे, जद ताहीं जै किमे चाक्खां तो म्हारै पै धिक्कार सै। 15 इस करके इब यहूदी अगुवां की सभा सुधा पलटन के सरदार नै समझाओ के उसने थारे धोरै लियावे, मान ल्यो के थम उसके बारे म्ह और भी सही तै जाँच करणा चाहवो सो, अर हम उसके पोहोचण तै पैहल्याए उस ताहीं मार देण के खात्तर तयार रहवांगे।” 16 पौलुस के भाणजै नै सुणया के वे उसकी टाह म्ह सै, तो गढ़ म्ह जाके पौलुस ताहीं संदेशां दिया। 17 पौलुस नै सूबेदारां म्ह तै एक ताहीं अपणे धोरै बुलाके कह्या, “इस जवान नै पलटन के सरदार के धोरै ले जाओ, यो उसतै किमे कहणा चाहवै सै।” 18 इस करके उसने उस ताहीं पलटन के सरदार के धोरै ले जाके कह्या, “केदी पौलुस नै मेरै ताहीं बुलाके बिनती करी के यो जवान पलटन के सरदार तै किमे कहणा चाहवै सै, उस ताहीं उसके धोरै ले जा।” 19 पलटन के सरदार नै उसका हाथ पकड़के अर न्यारा जाके बुड़झया, “तू मेरै तै के कहणा चाहवै सै?” 20 वो बोल्या, “यहूदियाँ नै साजिस रची सै के तेरे तै बिनती करै के काल पौलुस नै यहूदी अगुवां की सभा म्ह ल्यावै, मान्नो वे और सही ढाळ तै उसकी जाँच करणा चाहवै सै। 21 पर उनकी मानियो मतना, क्यूँकै उन म्ह तै चाळीस के उप्पर माणस उसने मारण की टाह म्ह सै, जिन नै न्यू ठान लिया सै के जिब ताहीं वे पौलुस नै मार न्ही देवै, जद ताहीं ना खावैंगे अर ना पीवैंगे, अर इब वे तयार सै अर तेरे वचन की बाट देखण लागरे सै।” 22 फेर पलटन के सरदार नै जवान ताहीं यो हुकम देके बिदा करया, “किसे तै ना कहिये के तन्ने मेरै तै ये बात बताई सै।” 23 फेर उसने दो सूबेदारां ताहीं बुलाके कह्या, “दो सौ सिपाही, सत्तर सवार, अर दो सौ भालेत, रात के नौ बजे कैसरिया नगर नै जाणके खात्तर तयार कर करो। 24 अर पौलुस की सवारी के खात्तर घोड़े तयार राक्खो, के उस ताहीं फेलिक्स राज्यपाल के धोरै राज्जी-खुशी तै पोहोच दे।” 25 उसने इस तरियां की चिट्ठी भी लिक्खी 26 महामहिम फेलिक्स राज्यपाल ताहीं क्लौकियुस लूसियास का नमस्कार। 27 इस माणस ताहीं यहूदियाँ नै पकड़के मार देणा चाह्या, पर जिब मन्ने जाणया के रोमी सै, तो पलटन लेके छुड़ा ल्याया। 28 मै जाणणा चाहूँ था के वे उसपै किस कारण दोष लावै सै, ज्यांतै उस ताहीं यहूदी अगुवां की सभा म्ह ले गया। 29 फेर मन्ने जाण लिया के वे अपणे नियम-कायदे के रोळे के बारे म्ह उसपै इल्जाम लगावै सै, पर मार देण जोगगा या बाँधे जाणके जोगगा उस म्ह कोए कसूर कोनी। 30 जिब मेरै ताहीं बताया गया के वे इस माणस की टाह म्ह लागरे सै तो मन्ने जिब्बे उस ताहीं तेरे धोरै भेज दिया, अर बैरियाँ ताहीं भी हुकम दिया के तेरे स्याम्ही उसपै नालिश करै। 31 आखर म्ह जिसा सिपाहियाँ नै हुकम मिल्या था, उससे तरियां ए वे पौलुस नै लेके

रातो-रात अन्तिपत्रिस म्ह आये। 32 दुसरे दिन वे सवारा नै उसकै गेल्या जाणकै खात्तर छोडकै खुद यरुशलम म्ह बोहडै। 33 उननै कैसरिया पोहचकै राज्यपाल ताहीं चिट्ठी दी, अर पौलुस ताहीं भी उसकै स्याम्ही खड्या करया। 34 राज्यपाल नै चिट्ठी पढ़कै बुझ्झया, “यो किस प्रान्त का सै?” 35 अर जिब जाण लिया के किलिकिया परदेस का सै तो उसतै क्हा, “जिब तेरे बैरी भी आवैगें, तो मै तेरा मुकद्मा करूँगा।” अर उसनै उस ताहीं हेरोदेस कै किले म्ह पहरे म्ह राक्खण का हुकम दिया।

24 पाँच दिन के पाछै हनन्याह महायाजक कई यहूदी अगुवें अर तिरतुल्लुस नामक किसे वकील नै गेल्या लेके कैसरिया नगर आ पोहचे। उननै राज्यपाल के स्याम्ही पौलुस कि बुराई करी। 2 जिब पौलुस बुलाया गया तो तिरतुल्लुस उसपै इल्जाम लाकै कहण लाग्या: “हे महामहिम फेलिक्स, तेरे जरिये हम राज्जी-खुशी सां, अर तेरे इन्तजाम तै इस जात के खात्तर घणीए बुराईयाँ सुधरदी जावै सै। 3 इस ताहीं हम हरेक जगहां अर हरेक तरियां तै धन्यवाद के गैल मान्नां सां। 4 मै तेरा और ज्यादा बखत कोनी लेऊँ, मै तेरे तै बिनती करूँ सूँ के दया करके दो-एक बात सुण ले।” 5 “बात या सै के इस माणस ताहीं हमनै एक उत्पाती के रूप म्ह पाया सै, सारी दुनिया के यहूदिया परदेस म्ह इसनै दंगे भड़काए सै, यो नासरियाँ के पंथ का नेता सै। 6 उसनै मन्दर ताहीं अशुद्ध करणा चाह्या, पर हमनै उस ताहीं पकड़ लिया। (हमनै उस ताहीं अपणे नियम-कायदे के मुताबिक सजा दे दी होन्दी, 7 पर पलटन के सरदार लूसियास नै उस ताहीं हाँगे तै म्हारे हाथ तै खोस लिया, 8 अर बैरियाँ ताहीं तेरे स्याम्ही आण का हुकम दिया।) इन सारी बात्तां नै जिनके बारे म्ह हम उसपै इल्जाम लावां सां, तू खुदे ए उसनै जाँच करके जाण लेवैगा।” 9 यहूदियाँ नै भी उसका साथ देकै क्हा, ये बात इस्से ढाळ तै करी सै। 10 जिब राज्यपाल नै पौलुस ताहीं बोल्लण का इशारा करया, तो उसनै जवाब दिया: “मै न्यू जाणके के तू घणे साल्लां तै इस जात का न्याय करण लागरया सै, खुशी तै अपणा बदले का जवाब देऊँ सूँ। 11 तू आप्पे ए जाण सके सै जिब तै मै यरुशलम नगर के मन्दर म्ह आराधना करण नै आया, मन्नै बारहा दिनां तै बाध कोनी होए, 12 उननै मेरे ताहीं ना मन्दर म्ह, ना आराधनालयों म्ह, ना किसे नगर म्ह किसे तै बहस करदे या भीड़ लगांदे पाया, 13 अर ना तो वे उन बात्तां ताहीं, जिनका वे इब मेरे पै दोष लावै सै, तेरे स्याम्ही साच्ची साबित कर सके सै। 14 पर मै तेरे स्याम्ही यो मान ल्यु सूँ के जिस पन्थ नै वे बुरा पन्थ कहवै सै, उस्से की रीत पै मै अपणे बाप-दादा के परमेसवर की सेवा करूँ सूँ, अर जो बात नियम-कायदे अर नबियाँ की किताबां म्ह लिक्खी सै, उन सारया पै बिश्वास करूँ सूँ। 15 अर परमेसवर तै आस राक्खूँ सूँ जो वे खुद भी राक्खै सै, के धर्मी अर अधर्मी दोनुआ का जिन्दा उठणा होवैगा। 16 इसतै मै खुद भी कोशिश करूँ सूँ के परमेसवर की, अर माणसां की ओड़ तै मेरा मन सारी-हाण बेकसूर रहवै।” 17 “घणे साल्लां पाछै मै गरीबां नै दान पोहोचाण, अर भेंट चढ़ाण आया था। 18 उस्से

बखत इननै मेरे ताहीं मन्दर म्ह, शुद्ध होण की रीति पूरी करते देख्या, ओड़ै ना कोए भीड़ थी, अर ना ए किसे ढाळ का शोर, पर ओड़ै आसिया परदेस के कई यहूदी थे 19 जै मेरे बिरोध म्ह उनके धारे कोए बात कहण की हो तो उरै तेरे स्याम्ही आके मेरे पै इल्जाम लांदे। 20 या ये खुद ए बतावै के जिब मै यहूदी अगुवां की सभा कै स्याम्ही खड्या था, तो उननै मेरे म्ह कौण सा कसूर पाया? 21 इस एक बात नै छोड़ जो मन्नै उनकै बिचाळै खड्या होके कही थी: “मेरे होया के जिन्दा उठण कै बारे म्ह आज मेरा थारे स्याम्ही मुकद्मा होण लागरया सै।” 22 फेलिक्स नै, जो इस पन्थ की बात सही-सही जाणै था, उन ताहीं न्यू कहके ढाळ दिया, “जिब पलटन का सरदार लूसियास आवैगा, तो थारी बात का फैसला करूँगा।” 23 उसनै सूबेदार ताहीं हुकम दिया के पौलुस ताहीं जेळ म्ह तो राख्या जावै पर उस ताहीं इतनी छूट जरूर दी जावै के उसके खास साथी आके उसकी सेवा कर सके। 24 कुछ दिनां पाछै फेलिक्स हाकिम अपणी घरआळी दुसिल्ला ताहीं, जो यहूदी थी, गेल्या लेके आया अर पौलुस ताहीं बुलवाके उस बिश्वास कै बारे म्ह जो मसीह यीशु पै सै, उसतै सुणया। 25 जिब पौलुस धर्म, अर संयम, अर आण आळे न्याय का जिक्र करण लागरया था, तो फेलिक्स नै भयभीत होके जवाब दिया, “इब तो जा, मौक्का मिल तिए मै तन्नै दुबारा बुलवाऊँगा।” 26 फेलिक्स ताहीं पौलुस तै कुछ रपिये मिलण की भी आस थी, ज्यांतै और भी बुला-बुलाके उसतै बात करया करै था। 27 पर जिब दो साल बीतगे तो पुरकियुस फेस्तुस, फेलिक्स की जगहां पै आया, अर फेलिक्स यहूदियाँ ताहीं राज्जी करण की मर्जी तै पौलुस ताहीं कैदी ए छोड़ गया।

25 राज्यपाल पद का काम सम्भाळण के तीन दिन बाद फेस्तुस कैसरिया नगर तै यरुशलम नगर म्ह गया। 2 फेर प्रधान याजकां अर यहूदियाँ के खास माणसां नै उसके स्याम्ही पौलुस की बुराई करी, 3 के वो खियास करके पौलुस ताहीं यरुशलम नगर भेजदे, असल म्ह उसकी तरकीब राह म्ह मौक्का देखके पौलुस ताहीं मारण की थी। 4 फेस्तुस नै जवाब दिया, “पौलुस कैसरिया म्ह पहरे म्ह सै, अर मै आप्पे ए तावळ तै ओड़ै जाऊँगा।” 5 फेर बोल्या, “थारे म्ह जो अधिकार राक्खै सै वे गैल चाल्लै, अर जै इस माणस नै किमे गलत काम करया सै तो उसपै इल्जाम लावै।” 6 उनके बिचाळै कोए आठ-दस दिन रहके फेस्तुस कैसरिया चल्या गया, अर दुसरे दिन न्याय-गद्दी पै बैठके पौलुस ताहीं ल्याण का हुकम दिया। 7 जिब वो आया तो जो यहूदी अगुवें यरुशलम नगर तै आये थे, उननै लोवै-धोवै खड़े होके उसपे घणे भारया दोष लगाये, जिनका सबूत वे कोनी दे सके थे। 8 पर पौलुस नै जवाब दिया, “मन्नै ना तो यहूदियाँ के नियम-कायदे के अर ना मन्दर के, अर ना ए कैसर के बिरुद्ध कोए अपराध करया सै।” 9 फेर फेस्तुस नै यहूदी अगुवां ताहीं राज्जी करण के मकसद तै पौलुस तै क्हा, “के तू चाहवै सै के यरुशलम नगर नै जावै, अर ओड़ै मेरे स्याम्ही तेरा यो मुकद्मा तय करया जावै?” 10 पौलुस नै क्हा, “मै कैसर के न्याय-गद्दी के स्याम्ही खड्या सूँ, मेरे मुकद्मे फैसला उरैए होणा चाहिये। जिसा तन्नै आच्छी

ढाळ बेरा सै, यहूदियाँ का मन्ने किमे अपराध कोनी करया। 11 जै मै अपराधी सूं अर मारण के जोगगा कोए काम करया सै, तो मरण तै कोनी नाटदा, पर जिन बातां की ये मेरै पै इल्जाम लावै सै, जै उन म्ह तै कोए भी बात साच्यी न्ही लिक्की, तो कोए मेरै ताहीं उनकै हाथ्यां न्ही सोंप सकदा। मै कैसर की दुहाई यु सूं।” 12 फेर फेस्तुस नै मन्त्रियाँ की सभा के गेल्या बात करके जवाब दिया, “तन्ने कैसर की दुहाई दी सै, तू कैसर कै ए धोरे जावैगा।” 13 कुछे दिन बीतण के पाच्छे अग्रिप्पा राजा अर बिरनीके नै कैसरिया म्ह आके फेस्तुस तै भेंट करी। 14 उनकै घणे दिन ओड़ै रहण के पाच्छे फेस्तुस नै पौलुस कै बारे म्ह राजा ताहीं बताया “एक माणस सै, जिस ताहीं फेलिक्स कैदी छोड़ गया सै।” 15 जिन मै यरुशलेम नगर म्ह था, तो प्रधान याजक अर यहूदिया परदेस के यहूदी अगुवां नै उसकी बुराई करी अर चाह्या के उसपै दण्ड का हुकम होवै। 16 पर मन्ने उन ताहीं जवाब दिया के रोमियों की या रीत कोनी के किसे माणस ताहीं सजा के खात्तर सोंप देवै, जिन ताहीं मुजरिम ताहीं अपने बैरियाँ के स्याम्ही खड़े होके दोष का जवाब देण का मौक्का ना मिलै। 17 आखर जिन वे कठ्ठे होए, तो मन्ने किमे वार कोनी करी, पर दुसरे ए दिन न्याय-गद्दी पै बैठके उस माणस ताहीं ल्याण का हुकम दिया। 18 जिन उसके बैरी खड़े होए, तो उननै इसी गलत बातां की इल्जाम कोनी लाई, जिसा मै समझूँ था। 19 पर वे अपने पंथ के अर यीशु नाम किसे माणस कै बारे म्ह, जो मरया था अर पौलुस उस ताहीं जिन्दा बतावै था, बहस करै थे। 20 मै उळझन म्ह था के इन बातां का बेरा किस ढाळ लाऊँ? ज्यांतै मन्ने उसतै बुझ्या, के तू यरुशलेम नगर जावैगा के ओड़ै इन बातां का फैसला होवै? 21 पर जिन पौलुस नै दुहाई देई के “उसके मुकद्दमे का फैसला सम्राट कै उरै हो, तो मन्ने हुकम दिया के जिन तक उस ताहीं कैसर कै धोरे न्ही भेजजू, उस ताहीं हिरासत म्ह राख्या जावै।” 22 फेर अग्रिप्पा नै फेस्तुस तै कह्या, “मै भी उस माणस की सुणणा चाहूँ सूं।” उसनै कह्या, “तू काल सुण लेवैगा।” 23 आखर म्ह दुसरे दिन जिन अग्रिप्पा अर बिरनीके बड्डी धूम-धड़ाके तै आये अर पलटन के सरदारों अर नगर के खास आदमियाँ के गेल्या दरबार म्ह पोहचे। फेर फेस्तुस नै हुकम दिया के वे पौलुस ताहीं ली यावै। 24 फेस्तुस नै कह्या, “हे राजा अग्रिप्पा, अर हे सारे माणसों जो उरै म्हारे गेल्या सो, थम इस माणस नै देखो सो, जिसके बारे म्ह सारे यहूदियाँ नै यरुशलेम नगर म्ह अर उरै भी रुक्के मार-मारके मेरै तै बिनती करी के इसका जिन्दा रहणा सही कोनी। 25 पर मन्ने बेरा पाट लिया के उसनै इसा किमे कोनी करया के मार दिया जा, अर जिन के उसनै आप्पे ए सम्राट की दुहाई दी, तो मन्ने उस ताहीं खन्दाण का फैसला करया। 26 मन्ने उसके बारे म्ह कोए पक्की बात कोनी पाई के अपने मालिक के धोरे लिखूँ। ज्यांतै मै उस ताहीं थारे स्याम्ही अर खासकर हे राजा अग्रिप्पा तेरे स्याम्ही ल्याया सूं के जाँचे पाच्छे मन्ने किमे लिखण का मौक्का मिलै। 27 क्यूँके कैदी ताहीं खन्दाणा अर जो दोष उसपै लगाये सै, उन ताहीं न्ही बताणा, मन्ने खामखां लाग्या सै।”

26 अग्रिप्पा नै पौलुस तै कह्या, “तेरे ताहीं अपने बाबत बोल्लण की आजा सै।” फेर पौलुस हाथ तै इशारा करके जवाब देण लाग्या, 2 “हे राजा अग्रिप्पा, जितनी बातां का यहूदी अगुवें मेरै पै इल्जाम लावै सै, आज तेरे स्याम्ही उनका जवाब देण म्ह अपने ताहीं धन्य समझूँ सूं, 3 खास करके ज्यांतै के तू सारी यहूदी प्रथा अर परेशानियाँ नै भली-भाँति जाणै सै। इस करके मै बिनती करूँ सूं, धीरज तै मेरी सुण।” 4 “मेरा चाल-चलण शरुआत तै अपनी जात कै बिचाळै अर यरुशलेम नगर म्ह जिसा था, उसका सारे यहूदियाँ नै बेरा सै। 5 जै वे गवाही देणा चाहवें, तो तू मेरै ताहीं तब तै पिच्छाणै सै जिन मै जवान था, के मै फरीसी होके अपने धर्म के सबतै खरे पन्थ के मुताबिक चाल्या। 6 अर आज मै परमेसवर के जरिये म्हारे पूर्वजां नै दिए गये उस वादे की आस के कारण उरै दोषी के रूप म्ह खड्या सूं। 7 यो वोए वादा सै, जिसके पूरे होण की आस म्हारे बारहां कुल दिन-रात सच्चाई म्ह परमेसवर की भगति-आराधना करदे होए आये सै। हे राजा, आज मेरे पै यहूदियाँ के जरिये मुकद्दमा इस्से आस के कारण चलाया जाण लागरया सै। 8 जिन के परमेसवर मरे होया नै जिन्दा करै सै, तो थारे उरै या बात क्यांतै बिश्वास के जोगगी कोनी समझी जान्दी?” 9 “मन्ने भी समझया था के यीशु नासरी के नाम के बिरोध म्ह मन्ने भोत कुछ करणा चाहिये। 10 अर मन्ने यरुशलेम नगर म्ह न्यूप करया, अर प्रधान याजकां तै हक पाके घणखरे पवित्र माणसां ताहीं जेळ म्ह गेरया, अर जिन वे मार दिये जावै थे तो मै भी उनके बिरोध म्ह अपनी राय यु था। 11 हरेक आराधनालय म्ह मै उन ताहीं काल कर-करके यीशु की बुराई करवाऊँ था, उरै ताहीं के छो के मारे इसा बावळा होग्या के दुसरे नगरां म्ह भी जाके उन ताहीं काल करूँ था।” 12 “इस्से धुन म्ह जिन मै प्रधान याजकां तै अधिकार अर हुकम-चिट्टी लेके दमिश्क नगर नै जाण लागरया था, 13 तो हे राजा, राह म्ह दोफारी के बखत मन्ने अकास तै सूरज कै तेज तै भी बढ़के एक चाँदणा, अपने अर अपने गेल्या चाल्लण आळा के चौगरदे नै चमकदा होड़ देख्या। 14 जिन हम सारे धरती पै पड़गे, तो मन्ने इब्रानी भाषा म्ह, मेरै तै न्यू कहन्दे होए एक बोल सुणया, ‘हे शाऊल, हे शाऊल, तू मन्ने क्यांतै सतावै सै? पैने पै लात मारणा तेरे खात्तर ओक्खा सै। (जै तू मन्ने सतावैगा तो तू खुद नै सतावैगा)’” 15 फेर मै बोल्या, “हे प्रभु, तू कौण सै?” प्रभु नै कह्या, “मै यीशु सूं, जिस ताहीं तू सतावै सै। 16 पर तू उठ, अपने पायां पै खड्या हो, क्यूँके मन्ने तेरे ताहीं ज्यांतै दर्शन दिया सै के तन्ने उन बातां का भी सेवक अर गवाह ठहराऊँ, जो तन्ने देखी सै, अर उनका भी जिनके खात्तर मै तन्ने दर्शन दियूँगा। 17 अर मै तन्ने तेरे माणसां तै अर गैर यहूदियाँ तै बचान्दा रहूँगा, जिनके धोरे मै इब तन्ने इस करके भेजजू सूं 18 के तू उनकी आँख खोल्लै के वे अन्धेरे तै चाँदणे कान्ही, अर शैतान के अधिकार तै परमेसवर के कान्ही पलटै, इस करके के पापां की माफी अर उन माणसां के गेल्या जो मेरै पै बिश्वास करण तै पवित्र करे गये सै, वसियत पावें।” 19 “इस करके हे राजा अग्रिप्पा, मन्ने उस सुर्गिय दर्शन की बात कोनी टाळी, 20

मन्ने सबतै पैहल्या दमिश्क नगर कै, फेर यरुशलेम नगर कै, अर फेर यहूदिया परदेस के बसिन्दा ताहीं, अर गैर यहूदियाँ म्ह भी यो प्रचार करदा रहया के पाप करणा छोड़के परमेसवर कान्ही बोहड़ आओ, अर अपणे सुभाव के जरिये यो साबित करो के थमनै पाप करणा छोड़ दिया सै। 21 इन बात्तां के कारण यहूदी मन्ने मन्दर म्ह पकड़के मार देण की कोशिश करै थे। 22 पर परमेसवर की मदद तै मै आज ताहीं बणया सूँ छोट्या-बड़या सारया के स्याम्ही गवाही घूँ सूँ, अर उन बात्तां नै छोड़ किमे कोनी कहन्दा जो नबियाँ अर मूसा नबी नै भी कह्वा के होण आळी सै, 23 के मसीह नै दुख ठाणा होगा, अर वोए सब तै पैहल्या मरे होया म्ह तै जी उठके, म्हारे माणसां म्ह गैर यहूदियाँ म्ह चाँदणे का प्रचार करैगा।” 24 जिव वो इस तरियां तै जवाब देण लागरया था, तो फेस्तुस नै ऊँच्ची आवाज म्ह कह्वा, “हे पौलुस, तू बावळा सै। घणे ज्ञान नै तेरे ताहीं बावळा कर दिया सै।” 25 पर पौलुस नै कह्वा, “हे महामहिम फेस्तुस, मै बावळा कोनी, पर सच्चाई अर बुद्धि की बात कहूँ सूँ। 26 राजा नै भी जिसके स्याम्ही मै बिना डरे बोल्लण लागरया सूँ, इन बात्तां का बेरा सै, अर मन्ने बिश्वास सै के इन बात्तां म्ह तै कोए उसतै लुकही कोनी, क्यूँके यो वाक्या गुप्त म्ह कोनी होया। 27 हे राजा अग्रिप्पा, के तू नबियाँ का बिश्वास करै सै? हाँ, मन्ने बेरा सै के तू बिश्वास करै सै।” 28 फेर अग्रिप्पा नै पौलुस तै कह्वा, “तू माड़े-से समझाण तै मन्ने मसीह बणाणा चाहवै सै?” 29 पौलुस बोल्या, “परमेसवर तै मेरी प्रार्थना सै के, देर या सबेर तै, पर ये सारे सुणण आळे, जो आज मेरी बात सुणै सै, वे मेरै समान हो जावै।” 30 फेर राजा अर अधिकारी अर बिरनीके अर उनके गेल्या बैठणीये उठ खड़े होए, 31 न्यायालय तै बाहर लिकाड़के आप्पस म्ह कहण लागे, “यो माणस इसा तो किमे कोनी करदा, जो मौत की सजा या जेळ, म्ह गेरण जोगगा हो।” 32 अग्रिप्पा नै फेस्तुस तै कह्वा, “जै यो माणस कैसर की दुहाई न्ही देंदा, तो छूट सके था।”

27 जिव फेस्तुस राज्यपाल के जरिये यो पक्का होग्या के हम जहाज के जरिये इटली देश जावां, तो उननै पौलुस अर कुछ दुसरे कैदियाँ ताहीं भी यूलियुस नामक औगुस्तुस सम्राट की पलटन के एक सूबेदार के हाथ्यां सौंप दिया। 2 अद्रमुत्तियुम नगर के एक जहाज पै जो आसिया परदेस के किनारे की जगहां पै जाण पै था, पाणी रास्ते हमनै अपना सफर शरू करया, अर अरिस्तर्खुस नामक जो मकिदुनिया परदेस के थिस्सलुनीके नगर का एक बसिन्दा था। 3 दुसरे दिन हम सैदा नगर पोहचये गये, अर यूलियुस नै पौलुस पै दया करके उस ताहीं साथियाँ के उरै जाण दिया के उनतै जरूरी चीज ले आवां। 4 ओड़ै तै हमनै सफर दुबारा शरू करया, हवा कै पलट होण के कारण हम साइप्रस टापू की ओट म्ह होके चाल्ले, 5 अर किलिकिया परदेस अर पंफूलिया किनारे के लोवै के समुन्दर म्ह होके लूसिया के मूरा नगर म्ह उतरे। 6 ओड़ै सूबेदार नै सिकन्दरिया नगर का एक जहाज इटली देश जान्दा होड़ मिल्या, अर उसनै म्हारै ताहीं उस जहाज पै चढा दिया। 7 जिव हम घणे दिनां ताहीं होळे-होळे चालके मुश्किल तै कनिदुस कखे के स्याम्ही पोहचे, तो इस

करके के हवा म्हारै ताहीं आगै बढ़ण कोनी देवै थी, हम सलमोने के स्याम्ही तै होके क्रेते टापू की आड़ म्ह चाल्ले, 8 अर उसके किनारे-किनारे मुश्किल तै चालके “शुभलंगरबारी” नामक एक जगहां पोहचे, जित्त तै लसया नगर लोवै था। 9 जिव घणे दिन बीत लिये अर पाणी कै सफर म्ह जोखम ज्यातै होवै थी ब्रत के दिन इब बीत लिये थे। आखर म्ह पौलुस नै उन सारया ताहीं कहके चेतावनी दी, 10 “हे सज्जनों, मन्ने इसा लागै सै के इस सफर म्ह मुश्किल अर घणा नुकसान, ना सिर्फ माळ अर जहाज की बल्के म्हारी जान का भी, होणआळा सै।” 11 पर सूबेदार नै पौलुस की बात्तां तै कप्तान अर जहाज कै माल्लिक की बात्तां तै बाध मान्या। 12 शुभ लंगरबारी नाम का बंदरगाह जाड्डा काटण के खात्तर सही कोनी था, ज्यातै घणाए का विचार होया के ओड़ै तै आगै बढ़ जावां जै किसे तरियां तै हो सकै तो फिनिक्स पोहचके जाड्डा काटै। यो तो क्रेते टापू का एक बंदरगाह सै जो दक्षिण-पश्चिम अर उत्तर-पश्चिम कान्ही खुलै सै। 13 जिव दक्षिणी हवा होळे-होळे चाल्लण लागी, तो न्यू सोच्या के उनकी तरकीब पूरी करण खात्तर बढिया बखत था, लंगर उठया अर किनारे धोरै होन्दे होए क्रेते टापू के किनारे जाण लागे। 14 पर माड़ी वार म्ह धरती के कान्ही तै बड्डी ए आँधी उठी, जो “यूरकुलिन” कुह्वावै सै। 15 जिव आँधी जहाज पै लागी तो जहाज उसके स्याम्ही ठैहर कोनी सक्या, इस करके हमनै जहाज ताहीं हवा के बाहाव छोड़ दिया, अर इससे तरियां बहन्दे होए चाल्ले गये। 16 फेर कौदा नामक एक छोट्टे-से टापू की आड़ म्ह बहन्दे-बहन्दे हम मुश्किल तै डोंगी नै बस म्ह कर सके। 17 फेर जहाज के मल्लाहां नै उस ताहीं ठाके सही उपाय करके जहाज ताहीं तळै तै रस्यां तै कसके बाँधया, अर सुरतिस खाड़ी के चोरबालू पै फँस जाणके डर तै उननै लंगर ताहीं थोड़े नीचै उतारके जहाज ताहीं हवा के बाहाव के गैल-गैल बहण के खात्तर छोड़ दिया। 18 जिव हमनै आँधी तै घणे हिचकोले अर धक्के खाए, तो दुसरे दिन वे जहाज का माळ बगाण लागे, 19 अर तीसरे दिन उननै अपने हाथ्यां तै जहाज का साज-सामान भी बगा दिया। 20 जिव घणे दिन ताहीं ना सूरज, ना तारे दिक्खे अर बड्डी आँधी चाल्दी रही, तो आखर म्ह म्हारै बचण की सारी उम्मीद जान्दी रही। 21 जिव वे घणे दिन ताहीं भूखे रह लिये, तो पौलुस नै उनके बिचाळे खड़े होके कह्वा, “हे भाईयो, चाहिये था के थम मेरी बात मानके क्रेते टापू तै आगै ए ना बढ़ते तो या मुसीबत न्ही आन्दी अर ना यो नुकसान ठान्दे। 22 पर इब मै थमनै समझाऊँ सूँ के धीरज राखो, क्यूँके थारे म्ह तै किसे की जान का नुकसान कोनी होवैगा, पर सिर्फ जहाज का। 23 क्यूँके परमेसवर जिसका मै सूँ, अर जिसकी भगति करूँ सूँ, उसके सुगंदूत नै आखरी रात मेरै धोरै आके कह्वा, 24 ‘हे पौलुस, डरे मतना! तन्नै कैसर के स्याम्ही खड्या होणा जरूरी सै। परमेसवर नै सारया ताहीं जो तेरे गेल्या सफर करै सै, जीवन दान दिया सै।’ 25 ज्यातै, हे भले माणसां, सब करो, क्यूँके मै परमेसवर का बिश्वास करूँ सूँ, के जिसा मेरै तै कह्वा गया सै, उसाए होगा। 26 पर म्हारै ताहीं किसे टापू पै जा टिकणा होगा।” 27 जिव चौदहवीं रात आई,

अर हम अद्रिया समुन्दर म्ह भटकदे होए हॉ डरे थे, तो आध्धी रात कै लोवै मल्लाहां नै अंदाजे तै जाण्या के हम किसे देश कै लोवै पोहच रहे सां। 28 पाणी की गहराई नाप्पण पै उननै एक सौ बीस फुट डून्या पाया, अर थोड़ा आगमै बढ़कै दुबारा थाह लेई तो नब्बै फुट पाया। 29 फेर पथरीली जगहां तै टकराण के डर तै उननै जहाज की पिछली ओड़ चार लंगर गेरे, अर सबेरे होण की चाह करदे रहे। 30 पर जिव मल्लाह जहाज पै तै भाजणा चाहवें थे, अर गलही तै लंगर गेरण कै बहाणै डोंगी समुन्दर म्ह उतार दी, 31 तो पौलुस नै सूबेदार अर सिपाहियाँ तै कह्या, “जै ये जहाज पै नही रहे, तो थम भी कोनी बच सकदे।” 32 फेर सिपाहियाँ नै जोड़े काटके डोंगी गेर दी। 33 जिव सबेरे होण पै था, फेर पौलुस नै न्यू कहकै, सारया ताहीं खाणा खाण कै खात्तर बिनती करी, “आज चौदहा दिन होगे सै के थम चिन्ता करते-करते भूखे रहे, अर किमे नही खाया। 34 ज्यांतै थारे तै समझाऊँ सूँ के किमे खा ल्यो, जिसते थारा बचाव होवै, क्यूँके थारे म्ह तै किसे का सिर का एक बाल भी कोनी गिरैगा।” 35 न्यू कहकै उसनै रोटी लेकै सारया कै स्याम्ही परमेसवर का धन्यवाद करया अर तोड़के खाण लाग्या। 36 इस बात तै वे सारे उत्साहित होकै खाणा खुवाण लाग्ये। 37 हम सारे मिलकै जहाज पै दो सौ छिहत्तर जणे थे। 38 जिव वे खाणा खाकै छिक्क लिये, तो गेहूँ ताहीं समुन्दर म्ह बगाकै जहाज हल्का करण लाग्ये। 39 जिव दिन लिकड़या तो उननै उस देश ताहीं कोनी पिच्छाणा, पर एक खाड़ी देखी जिसका किनारा चौरस था, अर विचार करया के जै हो सकै तो इस्से पै जहाज नै टिकावै। 40 फेर उननै लंगरा ताहीं खोल के समुन्दर म्ह छोड़ दिया अर उरसे बखत पाल के रस्से ढील्ले कर दिये, अर हवा कै स्याम्ही आगला पाल चढ़ाकै किनारे कै कान्ही चाल्ले। 41 पर दो समुन्दर के संगम की जगहां पड़कै उननै जहाज ताहीं टिकाया, अर आगला भाग तो टिक गया, पर पिछली ओड़ लहरा तै टूटण लाग्यी। 42 फेर सिपाहियाँ का यो विचार होया के कैदियाँ ताहीं मार देवें, इसा ना हो के कोए तैर कै लिकड़ भाज्यै। 43 पर सूबेदार नै पौलुस ताहीं बचाण की मर्जी तै उन ताहीं इस विचार तै रोक्या अर न्यू कह्या, के जो तैर सकै सै, पैहल्या छलाँग मारकै किनारे पै लिकड़ जावै। 44 अर बाकी कोए फट्टा पै, अर कोए जहाज की दुसरी चीज कै सहारे लिकड़ जावै। इस तरियाँ तै सारे धरती पै बच लिकड़े।

28 जिव हम बच लिकड़े, तो बेरा लाग्या के यो माल्टा टापू कुहावै सै।

2 ओड़ै के बासिन्द्यां नै म्हारे पै अनोक्खी दया करी, क्यूँके मिह बरसण कै कारण ठण्ड थी, ज्यांतै आग सुलगाकै हम सारया ताहीं ठहराया। 3 जिव पौलुस नै लाकड़ियाँ का भरोटा कठ्ठा करके आग पै धरया, तो एक साँप आँच पाके लिकड़या अर उसके हाथ तै लिपट गया। 4 जिव उन बासिन्द्यां नै साँप ताहीं उसके हाथ तै लिपटे होड़ देख्या, तो आप्पस म्ह कह्या, “साच्चए यो माणस खून्नी सै के फेर भी समुन्दर तै बच गया, तोभी न्याय नै जिन्दा कोनी रहण दिया।” 5 फेर उसनै साँप ताहीं आग म्ह झटक दिया, अर उस ताहीं किमे नुकसान कोनी होया। 6 पर वे लोग बाट देक्खे थे के वो सूज जावैगा या चाणचक पड़कै मर

जावैगा, पर जिव वे घणी वार ताहीं देखदे रहे अर देख्या के उसका किमे भी कोनी बिगड़या, तो अपणा विचार बदलके कह्या, “यो तो कोए देवता सै।” 7 उस जगहां कै लोवै-धोवै उस टापू के प्रधान पुबलियुस की धरती थी। उसनै म्हारे ताहीं अपणे घरां ले जाकै तीन दिन मित्तर की ढाळ सेवा-पाणी करी। 8 पुबलियुस का बाप बुखार अर बवासीर तै बीमार पड्या था। आखर म्ह पौलुस नै उसके धोरे कमरे म्ह जाके प्रार्थना करी अर उसपै हाथ धरकै उस ताहीं ठीक करया। 9 जिव इसा होया तो उस टापू के बाकी बीमार पौलुस के धोरे आये अर वे चंगे करे गये। 10 उननै म्हारा घणा आदर-मान करया, अर जिव हम चाल्लण लाग्ये तो जो किमे म्हारे खात्तर जरूरी था, उननै जहाज पै धर दिया। 11 तीन महिन्ने कै पाच्छे हमनै सिकन्दरिया जावण आळे जहाज पै सफर शरु करया, यो जहाज ठण्ड के कारण इस टापू म्ह ठहरा होया था, इस जहाज के आगले भाग पै एक जोड़ी देवत्यां का एक निशान था। (दियुसकूरी गद्दी होई थी) 12 सुरकूसा नगर म्ह लंगर गेर कै हम तीन दिन टिके रहे। 13 ओड़ै तै आगमै बढ़कै हम रेगियुम नगर म्ह आये, अर एक दिन कै पाच्छे दक्षिणी हवा चाल्ली, फेर हम दुसरे दिन पुतियुली नगर म्ह आये। 14 ओड़ै हमनै विश्वासी भाई मिले, उनके कहणे तै हम उनके उरै सात दिन ताहीं रहे, अर इस तरियाँ तै हम रोम देश कान्ही चाल्ले। 15 कुछ बिश्वासी भाई रोम देश तै म्हारी खबर सुणकै अप्पियुस कै चौक अर तीन-सराए ताहीं म्हारे तै फेटण नै लिकड़ आये, जिन नै देखके पौलुस नै परमेसवर का धन्यवाद करया अर बड़ा उत्साहित होया। 16 जिव हम रोम नगर म्ह पोहचे, तो पौलुस ताहीं एक सिपाही कै गेल्या जो उसकी रुखाळी करै था, एकले रहण का हुकम मिलग्या। 17 तीन दिन कै पाच्छे उसनै यहूदियाँ के खास माणसां ताहीं बुलाया, अर जिव वे कठ्ठे होए तो उनतै कह्या, “हे भाईयो, मन्नै अपणे माणसां कै या बाप-दादा कै बीवारां कै बिरोध म्ह किमे भी कोनी करया, तोभी कैदी बणाके यरुशलेम नगर तै रोमी सरकार के हाथ्यां सौंप्या गया। 18 उननै मेरै ताहीं जाँचके छोड़ देणा चाह्या, क्यूँके मेरै म्ह मौत कै जोग्या कोए कसूर कोनी था। 19 पर जिव यहूदी अगुवें इसके बिरोध म्ह बोल्लण लाग्ये, तो मन्नै कैसर की दुहाई देणी पड़ी यो न्ही के मन्नै अपणे माणसां पै कोए दोष लाणा था। 20 ज्यांतै मन्नै थारे ताहीं बुलाया सै के थारे तै मिलूँ अर बतळाऊँ, क्यूँके इसाएल की आस कै खात्तर वो मसीह इस बेल तै जकड़े होए सै।” 21 उननै उसतै कह्या, “ना हमनै तेरे बारे म्ह यहूदिया परदेस तै चिट्ठी पाई, अर ना बिश्वासी भाईयाँ म्ह तै किसे नै आके तेरे बारे म्ह किमे बताया अर ना बुरा कह्या। 22 पर तेरा विचार के सै? वोए हम तेरे तै सुणणा चाहवां सां, क्यूँके हमनै बेरा सै के हरेक जगहां इस पंथ कै बिरोध म्ह माणस बात करै सै।” 23 फेर जो यहूदी पौलुस कै गैल थे, उननै उसके खात्तर एक दिन ठहराया, अर घणे माणस उसके उरै कठ्ठे होए, अर वो परमेसवर के राज्य की गवाही देंदा होया, अर मूसा नबी के नियम-कायदे अर नबियाँ की किताबां तै यीशु के बारे म्ह समझा-समझाके सबेरे तै साँझ ताहीं वर्णन करदा रहया। 24 फेर कुछां नै उन बातां ताहीं मान

लिया, अर कुछां नै बिश्वास कोनी करया। 25 जिब वे आप्पस म्ह एक पंथ कोनी होए, तो पौलुस की इस बात कै कहण पै चाल्ले गये “पवित्र आत्मा नै यशायाह नबी कै जरिये थारे बाप-दादा तै सही ए कह्या था,” 26 “जाकै इन माणसां तै कह, के सुणदे तो रहोगे, पर ना समझोगे, देखदे तो रहोगे, पर ना बुझोगे! 27 क्यूँके ‘इन माणसां का मन मोट्टा अर उनके कान भारया हो गये सै, अर उननै अपणी आँख मूंद ली सै, इसा ना हो के वे कदे आँखां तै देख्खै अर कान्ना तै सुणै अर मन तै समझै अर पलटै, अर मै उन ताहीं ठीक करूँ।’ 28 “इस करकै थम जाणो सो के परमेसवर कै इस उद्धार की कथा गैर यहूदियाँ कै धौरै भेज्जी गयी सै, अर वे स्वीकार करैगें।” 29 जिब उसनै न्यू कह्या तो यहूदी आप्पस म्ह घणे बहस करण लागे अर ओड़ै तै चले गये। 30 वे पूरे दो साल अपणे किराए कै घर म्ह रहया, 31 अर जो उसकै धौरै आवै थे, उन सारया तै मिलदा रहया अर बिना रोक-टोक घणा निडर होकै परमेसवर कै राज्य का प्रचार करदा अर प्रभु यीशु मसीह की बात सिखान्दा रहया।

रोमियों

1 या चिट्ठी पौलुस की ओड़ तै सै, जो यीशु मसीह का दास सै अर परमेसवर के जरिये प्रेरित होण के खातर चुण्या गया अर उसका सुसमाचार सुणाण खातर न्यारा करया गया सै। 2 यीशु के इस दुनिया म्ह आण तै भोत पैहले परमेसवर नै वादा करया था, के वो नबियाँ के जरिये इस सुसमाचार ताहीं जाहिर करै, जिननै इसके बारे म्ह पवित्र ग्रन्थ म्ह लिख्या सै। 3 यो सुसमाचार परमेसवर के बेटे के बारे म्ह सै, जो म्हारा प्रभु यीशु मसीह सै। वो शारीरिक तौर पै तो राजा दाऊद की पीढ़ी तै पैदा होया, 4 पर पवित्र आत्मा की शक्ति तै मरे होया म्ह तै जिन्दा होण के कारण परमेसवर का बेटा कुहाया। 5 मसीह के जरिये हमनै अनुग्रह अर प्रेरिताई परमेसवर तै मिली, ताके उसके नाम के कारण गैर यहूदी माणस मसीह म्ह बिश्वास करके उसकी मान्ने, 6 थम गैर यहूदी बिश्वासी जो रोम नगर म्ह सों, उन माणसां म्ह शामिल सों, जिन ताहीं परमेसवर नै यीशु मसीह के माणस होण खातर बुलाया सै। 7 या चिट्ठी रोम नगर के उन सारे माणसां के नाम सै, जो परमेसवर के प्यारे सै, अर उसके पवित्र जन होण के खातर बुलाए गये सै। मै प्रार्थना करूँ सूँ, के म्हारे पिता परमेसवर अर प्रभु यीशु मसीह की ओड़ तै थारे ताहीं अनुग्रह अर शान्ति मिलदी रहवै। 8 सब तै पैहल्या मै थम सारया के खातर यीशु मसीह के जरिये अपने परमेसवर का धन्यवाद करूँ सूँ, क्यूँके यीशु मसीह म्ह थारे बिश्वास का जिक्र साब्वी दुनिया म्ह होरया सै। 9 परमेसवर, जिसकी सेवा मै पूरे मन तै करूँ सूँ, अर उसके बेटे के सुसमाचार के बारे म्ह माणसां ताहीं बताऊँ सूँ, वोए मेरा गवाह सै, के मै अपनी प्रार्थना म्ह थमनै किस तरियां सारी हाण याद करूँ सूँ। 10 अर बिनती करूँ सूँ, के जै हो सक्या तो परमेसवर की इच्छा के मुताबिक मै थारे तै मिलण भी आऊँ। 11 क्यूँके मै थारे तै मिलण की लालसा करूँ सूँ, ताके मै थमनै कोए आत्मिक आशीष दिवूँ जिसतै थम बिश्वास म्ह मजबूत हो जाओ। 12 मेरे कहण का मतलब यो सै, के जिब मै थारे तै मिलु, तो मै थारे ताहीं अर थम मन्ने उत्साहित कर सको, थम मेरे बिश्वास नै जाणके मजबूत हो जाओ, अर मै थारे बिश्वास नै जाणके मजबूत हो जाऊँ। 13 हे बिश्वासी भाईयो, मै चाहूँ सूँ के थम इस बात नै जाणो, के मन्ने कई बार थारे धारे आण की योजना बनाई, के मै थारे बीच म्ह उसीए आत्मिक बढ़ोतरी देख सकूँ, जिसी मन्ने बाक्की गैर यहूदियाँ म्ह देखखी सै, पर इब तक मेरे आण म्ह रुकावट ए होन्दी रही सै। 14 मै उन संस्कारी माणसां का जो यूनानी भाषा अर सभ्यता नै जाणै सै, अर जो माणस उनकी भाषा अर सभ्यता नै न्ही जाणते, अर अकलमंद अर बेअक्ल माणसां ताहीं वचन सुणाण का मन म्ह बोझ राखवूँ सूँ। 15 इस करके म्ह मै थमनै भी जो रोम नगर म्ह रहो सो, सुसमाचार सुणाण खातर जमा उत्सुक सूँ। 16 क्यूँके मै मसीह के सुसमाचार के बारे म्ह कोनी सरमान्दा, परमेसवर अपनी शक्ति के जरिये सब नै बचावै सै जो सुसमाचार पै बिश्वास करै सै, पैहल्या यहूदियाँ ताहीं अर फेर गैर यहूदी ताहीं। 17 क्यूँके सुसमाचार

हमनै बतावै सै, के परमेसवर अपनी नजर म्ह हमनै किस तरियां धर्म बणावै सै। जो शुरु तै लेके अंत तक मसीह पै बिश्वास करण तै हो सै, जिसा पवित्र ग्रन्थ म्ह लिख्या भी सै, के परमेसवर अपनी नजर म्ह धर्म जन बणावै सै, वो बिश्वास तै जिन्दा रहवैगा। 18 परमेसवर का छो तो उन माणसां की सारी अभगति अर अधर्म के काम्मां के कारण जो माणस करै सै, सुर्ग तै जाहिर हो सै, वो अपने सब अधर्म के काम्मां तै माणस ताहीं, परमेसवर की सच्चाई के बारे म्ह जाणण तै रोकके सै। 19 वे परमेसवर के बारे म्ह इस करके सही अर आसान्नी तै जाण सकै सै, क्यूँके परमेसवर नै उन ताहीं इन बात्तां के बारे म्ह बताया सै। 20 सच यो सै के दुनिया की शुरुआत तै ए परमेसवर के अनदेखे गुण, उसकी अनन्त सामर्थ्य अर उनका परमेसवरत्व, दुनिया म्ह सै, अर दिक्खे भी सै, इस करके माणस के धारे कोए बहाना कोनी, के वो परमेसवर नै न्ही जाणता। (aitidios g126) 21 परमेसवर का ज्ञान होण पै, भी उननै ना तो उस ताहीं परमेसवर होण के लायक सम्मान दिया, अर ना ए उसका धन्यवाद करया। इसके उल्ट वो उसके बारे म्ह बेकार की बात सोच्यण लागे, अर जिसा उन ताहीं सोचणा चाहिए था उसा न्ही सोच्या, पर बुरा ए सोच्या। 22 वे अपने-आप ताहीं अकलमंद मानके बेअक्ले बणगे, 23 अर अविनाशी परमेसवर की महिमा न्ही करी, बल्के नाशवान माणस, अर पंछियाँ, रेंगण आळे अर चार पैरां आळे जानवरां की मूर्ति की आराधना करण लागे। 24 इस करके परमेसवर नै उन ताहीं उनके मन की बुरी इच्छा के मुताबिक गलत काम करण खातर छोड़ दिया ताके वे आप्स म्ह अपने शरीरां तै गन्दे काम करै। 25 क्यूँके उननै परमेसवर के बारे म्ह सच्ची बात्तां ताहीं जाणण की बजाये झूठ पै बिश्वास करया, अर सृष्टि की चिज्जां की आराधना अर सेवा करी, ना के उस सृजनहार परमेसवर की जो सदा खातर महिमा के लायक सै। आमीन। (aiōn g165) 26 ज्यांतै परमेसवर नै उन ताहीं उनकी नीच कामनाओं के बस म्ह छोड़ दिया, जिस कारण उनकी लुगाईयाँ नै भी प्राकृतिक संभोग की जगहां अप्राकृतिक संभोग अपनालिया। 27 उस्से तरियां ए लुगाईयाँ के गेल्या प्राकृतिक संभोग नै छोड़के माणस दुसरे माणस के खातर आप्स म्ह कामुकता म्ह जळण लागे, अर माणस का माणस के गेल्या बेशर्मी के काम करणा उनके उप्पर दण्ड लेके आये। 28 अर जिब उननै परमेसवर ताहीं जाणणा बेवकूफी लाग्या, तो परमेसवर नै भी उन ताहीं उनके निकम्मे मन के बस म्ह छोड़ दिया, ताके वे बुरे काम करै। 29 ज्यांतै वे सारे ढाळ के अधर्म, दुष्टता, लालच, अर बैर-भाव तै भरगे, अर जळण, हत्या, झगड़े, छळ, ईर्ष्या तै भरगे, अर चुगलखोर, 30 बदनाम करण आळे, परमेसवर तै नफरत करण आळे, बुराई करण आळे, दुसरयां की बेजती करण आळे, डिंगमार, घमण्डी, भुंडी-भुंडी बात्तां के बणाण आळे, माँ-बाप का हुकम ना मानण आळे, 31 बेअक्ले, बिश्वासघाती, प्यार अर दया की कमी अर निर्दयी होग्ये। 32 वे तो परमेसवर की या धार्मिक विधि नै जाणै सै, के इसे-इसे काम

करण आळे मौत के दण्ड कै जोगे सै, फेरभी ना सिर्फ आप ए इसे काम करै सै, बल्के इसे काम करण आळा तै राज्जी भी होवै सै।

2 इस करकै हे मेरे बिश्वासी भाईयो, थम जो कोए भी क्यूँ ना हो, थारे धोरै इस बात का कोए जवाब कोनी, के थम जो दुसरयां पै दोष लगाओ सों, तो उस बात के कारण खुद अपने-आप पै दण्ड लेकै आओ सों, क्यूँके जिस बात के बारे म्ह थम उसनै दोषी बणाओ हो, थम खुद भी वोए काम करो सों। 2 हमनै यो बेरा सै, के परमेसवर उसका न्याय धार्मिकता कै साथ जरूर करैगा, जो इसे बुरे काम करै सै। 3 जब के थम जो इसे-इसे काम करणीया पै दोष लगाओ सों, अर खुद वैए काम करो सों, के न्यू समझों सों के थम परमेसवर के दण्ड तै बच जाओगे? 4 के थम परमेसवर की भलाई, सहनशीलता, अर धीरजरूपी धन ताहीं तुच्छ जाणो सों? के थम न्ही समझते के परमेसवर की भलाई ए थारे ताहीं पाप छोड़णा सिखावै सै? 5 पर थम हठिल्ले सों, अर पाप करणा न्ही छोड़दे, अर ना ए अपने-आपनै बदलना चाहन्दे। इस करकै जिस दिन परमेसवर अपना छो दिखावैगा, उस दिन धार्मिकता कै साथ उसका न्याय जाहिर होवैगा, अर वो थारे ताहीं भारी दण्ड देवैगा। 6 परमेसवर हरेक नै उसके काम कै मुताबिक फळ देवैगा। 7 जो माणस भले काम करते रहवै सै, अर परमेसवर की महिमा, आदर अर अनन्त जीवन की खोज म्ह लागे रहवै सै, परमेसवर उन सारया ताहीं अनन्त जीवन देवैगा। (aiōnios g166) 8 पर जो मतलबी सै अर सच नै कोनी मान्दे, बल्के अधर्म नै मान्दै सै, उनपै परमेसवर का छो अर प्रकोप पड़ेगा। 9 क्लेश अर संकट हरेक माणस पै आवैगा। परमेसवर सबतै पैहल्या यहूदियाँ का अर बाद म्ह उन माणसां का न्याय करैगा जो गैर यहूदी सै। 10 पर महिमा, आदर अर शान्ति हरेक नै मिलैगी, जो भले काम करै सै, पैहल्या यहूदी ताहीं फेर उन माणसां ताहीं जो गैर यहूदी सै। 11 क्यूँके परमेसवर किसे का पक्षपात कोनी करदा। 12 वे सारे गैर यहूदी माणस जिननै परमेसवर के नियम-कायदे जो मूसा नबी ताहीं मिले थे, उन ताहीं जाणे बिना जिसनै पाप करया सै, वे नियम-कायदा नै बिना जाणे नाश भी होवेंगें, पर जिन नै नियम-कायदे नै जाणकै भी पाप करया सै, उनका न्याय भी नियम-कायदे के मुताबिक करया जावैगा। 13 क्यूँके परमेसवर की निगाह म्ह नियम-कायदे कै सुणण आळे धर्मी माणस कोनी, पर नियम-कायदे पै चाल्लण आळा नै धर्मी बणावैगा। 14 फेर जब गैर यहूदी लोग जिनके धोरै मूसा नबी के नियम-कायदे कोनी, कुदरती तौर पैए नियम-कायदे की बातां पै चाल्लै सै, तो नियम-कायदे उनके धोरै ना होण पै भी, उन ताहीं बेरा सै, के उननै के करणा सै, अर के न्ही करणा। 15 वे नियम-कायदे की बात अपने-अपने दिलां म्ह लिखी होई दिखावै सै अर उनकी अन्तरात्मा भी इसकी गवाही देवें सै, के ये बात सच सै, क्यूँके उनके विचार उनपै दोष लगावै सै, या फेर यो बतावै सै के वो ठीक करै सै। 16 यो सब उस दिन स्पष्ट हो जावैगा, जब परमेसवर मैरे जरिये सुणाये गये सुसमाचार के मुताबिक, माणसां की लुक्ही होई बातां का न्याय, यीशु मसीह कै जरिये करैगा। 17 थम खुद नै यहूदी कुहावै सों,

अर मूसा नबी के नियम-कायदे पै भरोस्सा राक्खों सों, परमेसवर थारे पै दया करै सै, इस कारण थम घमण्ड करण लागरे सों। 18 अर थमनै परमेसवर की मर्जी का बेरा से, थम आच्छी-आच्छी बातां नै तो चाहो सों, क्यूँके थारे ताहीं ये बात मूसा नबी के नियम-कायदे म्ह तै सिखाई गई सै। 19 अर थमनै इस बात का पूरा भरोस्सा सै, के थम आंध्यां नै राह दिखाण आळे अर अन्धकार म्ह भटके होए माणसां खातर परमेसवर का चाँदणा सों। 20 अर बेअक्लां नै सिखाण आळे अर बाळकां के उपदेशक सों। थमनै बेरा सै के परमेसवर के नियम-कायदे थमनै पूरी तरियां तै ज्ञान अर सच्चाई देवै सै। 21 इस करकै थम जो दुसरयां नै शिक्षा देओ सों, तो अपने-आपनै शिक्षा क्यूँ न्ही देन्दे? थम उपदेश देओ सों, के “चोरी ना करियो,” के थम खुद चोरी कोनी करते! 22 थम जो कहवै सों, के “जारी ना करियो,” के खुद जारी कोनी करते? थम जो मूर्तियाँ तै नफरत करो सों, के खुद ए मन्दरां नै कोनी लूटते? 23 थम जो नियम-कायदे नै जाणण का घमण्ड करो सों, के नियम-कायदे नै ना मानकै परमेसवर का अनादर कोनी करते? 24 “थम यहूदियाँ के कारण गैर यहूदियाँ म्ह परमेसवर के बारे म्ह बुरा भला कहा जावै सै, जिसा पवित्र ग्रन्थ म्ह लिख्या भी सै।” 25 मै थमनै कुछ बताऊँ सूँ, थारा खतना करया जाणा जिब्बे फायदेमन्द सै, जब थम नियम-कायदा नै मान्ने, जै थम इसा न्ही करते तो थम उन माणसां की ढाल सों जिनका खतना न्ही होया। 26 जै बिना खतना करे होए माणस नियम-कायदे की विधियाँ नै मान्ने, तो परमेसवर उन ताहीं अपने माणस क्यूँ न्ही कहवैगा। 27 बिना खतना होए माणस जो परमेसवर के हुकमां नै मान्ने सै, वे थारी बुराई करेंगें जिनके धोरै परमेसवर के नियम-कायदे सै जिन ताहीं थम मानते न्ही। 28 असली यहूदी वो कोनी जो सिर्फ यहूदी माँ-बाप तै पैदा होया सै, अर ना ए वो असली खतना सै, जो दिखाण खातर देह म्ह करया गया सै। 29 यहूदी वो सै, जो अपने मन म्ह यहूदी सै, अर खतना वो सै, जो पवित्र आत्मा के जरिये मन का करया जावै सै, ना के वो जो नियम-कायदा के मुताबिक करया जावै सै, इस ढाल के माणसां की तारीफ माणसां की ओड़ तै न्ही, पर परमेसवर की ओड़ तै करी जावै सै।

3 कोए कह सकै सै, के भला यहूदी होण का के फायदा, या खतना कारण का के फायदा? 2 यहूदी होण के भोत फायदे सै, क्यूँके परमेसवर के वचन यहूदियाँ ताहीं ए सौंपे गये सै। 3 अगर कुछ यहूदी माणस बिश्वासघाती लिक्डै भी तो उसतै के फर्क पड़े सै? परमेसवर अपने वादे पूरा करण म्ह बिश्वास जोगगा सै, तो इसका यो मतलब कोनी के परमेसवर भी बिश्वासघाती सै। 4 न्ही! बिल्कुल न्ही! बल्के परमेसवर सच्चा सै, अर दुनिया का हरेक माणस झूठा ठैहरै, जिसा पवित्र ग्रन्थ म्ह परमेसवर के बारे म्ह लिख्या सै, “जिसतै तू अपनी बातां म्ह धर्मी साबित हो अर न्याय करदे बखत तू जीत पावै।” 5 इस करकै जै म्हारे बुरे काम परमेसवर की धार्मिकता साबित कर देवै सै, तो हम के कहां? के न्यू कहां के परमेसवर जो छो करै सै, तो के वो

अन्यायी सै? (यो तो मै दुनियावी नजरिये तै कहूँ सूँ)। 6 न्ही! बिल्कुल न्ही! जै परमेसवर यहूदी माणसां का न्याय सही तरिककें तै न्ही कर सकता, तो वो दुनिया के माणसां का भी न्याय सही तरिककें तै न्ही कर सकता? 7 के कोए कह सकै सै, जै मेरा झूठ परमेसवर की सच्चाई नै दिखावे अर उसकी महिमा नै बढ़ावे, तो परमेसवर किस तरियां मन्ने परख के पापी साबित कर सकै सै? 8 कई माणस यो कह के मेरे पै दोष लगावै सै, के “आओ, हम बुरे काम करा के इसतै ए कुछ भलाई हो जा।” जो मेरे बिरुद्ध इसी बात कहवै सै वो दण्ड के लायक सै। 9 तो फेर हम के कह सका सां? के हम यहूदी गैर यहूदियाँ तै आच्छे सां? कदे भी न्ही! क्यूँके हम यहूदी अर गैर यहूदी दोनुवां पै यो दोष ला चुके सां के वे सारे के सारे पाप की शक्ति के बस म्ह सै। 10 जिसा के पवित्र ग्रन्थ म्ह लिख्या सै: “कोए भी माणस परमेसवर की नजर म्ह धर्मी कोनी, एक भी कोनी। 11 कोए भी माणस समझदार कोनी, कोए परमेसवर का टोह् आळा कोनी। 12 सारे माणस परमेसवर की राह तै भटक गये सै, सबके सब परमेसवर की नजर म्ह निकम्मे बणगे सै, कोए भी भलाई करण आळा कोनी, एक भी कोनी। 13 उनका मुँह खुली होई कन्न की ढाळ सै, जिस म्ह तै बदबू आवै सै। क्यूँके अपणे मुँह तै वे भुंडा बोल्लै सै, अर वे जो भी बोल बोल्लै सै वो साँप के जहर की तरियां जहरीले सै। 14 उनका बोल श्राप अर कड़वाहट तै भरया सै। 15 वो लहू बहाण खात्तर फुर्तिले सै, 16 वे जित्त भी किते जावै सै औड़े नाश अर क्लेश लेकै जावै सै, 17 वे न्ही जाणते के माणसां के गैल खुशी अर शान्ति तै किस तरियां जीणा सै। 18 उन म्ह परमेसवर का डर सै ए कोनी।” 19 हमनै बेरा सै के मूसा नबी के नियम-कायदे जो कुछ कहवै सै, उन्हे तै कहवै सै, जो नियम-कायदे के अधीन सै, ताके कोए भी माणस भान्ना न्ही बणा सकै, अर दुनिया के सारे माणस परमेसवर के स्याम्ही दोषी ठैहराये जावै। 20 क्यूँके मूसा नबी के नियम-कायदे के पुगाण तै कोए माणस उसकै स्याम्ही धर्मी कोनी बणैगा, क्यूँके नियम-कायदा के जरिये हमनै बेरा लागै सै के हम पापी सां। 21 पर इब नियम-कायदा नै मान्ने बिना धार्मिकता जो परमेसवर तै मिलै सै, अर जिसके बारे म्ह मूसा नबी के नियम-कायदा अर नबियाँ की किताब्बां म्ह भोत पैहले लिख्या सै, के परमेसवर हमनै धर्मी किस तरियां बणावै सै। 22 मतलब यो के हम प्रभु यीशु मसीह पै बिश्वास करण तै धर्मी बणा सां, जो यीशु मसीह पै बिश्वास करण तै सब माणसां खात्तर सै। क्यूँके परमेसवर की नजर म्ह सब माणस एक समान सै। 23 क्यूँके सारया नै पाप करया सै, अर सब परमेसवर की महिमा तै दूर होगे सै, 24 परमेसवर नै म्हारे पै अनुग्रह करया, के उसनै यीशु मसीह के जरिये म्हारे ताहीं म्हारे पापां के दण्ड तै छुड़ा लिया, अर म्हारे ताहीं बिना कुछ करे धर्मी बणाया। 25 परमेसवर नै यीशु मसीह ताहीं म्हारे पाप की कीमत चुकाण खात्तर इस दुनिया म्ह भेज्जा, यीशु मसीह नै म्हारे खात्तर अपना लहू बहा के अपनी जान दे दी। ताके हम उसपै बिश्वास करण के जरिये परमेसवर कै धोरे आ सकां, अर उसनै इसा यो दिखाण खात्तर करया, के वो पैहले जमाने म्ह भी

पापी माणसां गैल सबर तै रहण म्ह अर उनके पाप माफ करण म्ह धर्मी था, बल्के इब भी उसकी धार्मिकता जाहिर हो जावै, जिसतै वे खुद धर्मी बणै अर जो प्रभु यीशु म्ह बिश्वास राकखै सै, वो परमेसवर की नजर म्ह भी धर्मी बण जावै। 27 तो के हम किसे बात पै घमण्ड कर सकां सां? उसके खात्तर कोए जगहां न्ही। के नियम-कायदा के जरिये या उननै मानण के जरिये सां? न्ही! पर यीशु मसीह पै बिश्वास करण तै घमण्ड करां सां। 28 इस करके हम इस नतीजै पै पोहवे सा, के परमेसवर म्हारे ताहीं यीशु मसीह पै बिश्वास करण के जरिये धर्मी बणावै सै, ना के मूसा नबी के नियम-कायदा ताहीं मानण तै। 29 परमेसवर सिर्फ यहूदियाँ ए का परमेसवर कोनी, पर वो गैर यहूदियाँ का भी परमेसवर सै। 30 क्यूँके एक ए परमेसवर सै, जो खतना आळा नै यीशु मसीह पै बिश्वास करण तै अर बिन-खतना आळा ताहीं भी, बिश्वास कै जरिये धर्मी बणावै सै। 31 तो के म्हारा बिश्वास नियम-कायदे नै बेकार बतावै सै? न्ही! बिल्कुल न्ही! बल्के इसके उल्ट जिब हम बिश्वास करा सां तो हम समझ जावां सां, के परमेसवर नै म्हारे ताहीं नियम-कायदा क्यूँ दिये।

4 तो हम यहूदी होण के नाते म्हारे पूर्वज अब्राहम के बारे म्ह के कहवा।

2 जै अब्राहम आच्छे काम्मां तै धर्मी बणाया जान्दा, तो वो इसका घमण्ड कर सकै था, पर वो परमेसवर के स्याम्ही आच्छे काम्मां के जरिये घमण्ड न्ही कर सकदा। 3 पवित्र ग्रन्थ के कहवै सै? न्यू के “अब्राहम नै परमेसवर के वादे पै बिश्वास करया, अर परमेसवर नै उसके बिश्वास के कारण उस ताहीं धर्मी बणा दिया।” 4 जो मेहनत करै सै उसकी मजदूरी नै ईनाम न्ही कहन्दे, बल्के वो तो उसका हक सै। 5 पर माणस काम्मां के जरिये धर्मी कोनी बणता, पर भगतिहीन माणस जो परमेसवर पै बिश्वास करै सै उसके बिश्वास के करण वो धर्मी बणै सै। 6 जिसनै परमेसवर बिना काम्मां के धर्मी बणावै सै, पवित्र ग्रन्थ म्ह राजा दाऊद भी धन्य उस ताहीं कहवै सै। 7 “धन्य सै, वे जिनके अधर्म माफ होए, अर पाप भूला दिये गये। 8 धन्य सै वो माणस जिसके पापां का हिसाब परमेसवर न्ही राखदा।” 9 के या आशीष जिन माणसां का खतना हो लिया, उनके ए खात्तर सै, या जिनका खतना न्ही होया उन खात्तर भी सै? हम न्यू कहां सां, “अब्राहम नै परमेसवर पै बिश्वास करया, अर परमेसवर नै उसके बिश्वास के कारण उस ताहीं धर्मी बणा दिया।” 10 तो यो कद होया? खतने की हालत म्ह या बिना खतने की हालत म्ह? खतने की हालत म्ह कोनी पर बिना खतने की हालत म्ह। 11 जिब अब्राहम का खतना न्ही होया था, जिब भी परमेसवर नै उस ताहीं स्वीकार करया, अर उस ताहीं धर्मी बणाया, खतने का निशान अब्राहम ताहीं अपनाण की छाप सै, इस करके अब्राहम उन माणसां का आत्मिक पूर्वज सै, जो बिश्वास करै सै पर जिनका खतना न्ही होया, वो बिश्वास के जरिये धर्मी बणे। 12 अर वो उन खतना करे होए माणसां का आत्मिक पूर्वज सै, जो ना सिर्फ खतना करे होए सै, पर उनका बिश्वास उसाए हो जिसा उनके पूर्वज अब्राहम का तब था, जिब उसका खतना न्ही होया था। 13 परमेसवर नै अब्राहम ताहीं अर उसके वंश ताहीं पूरी

दुनिया देण का वादा करया, यो इस करके कोनी होया के अब्राहम नै नियम-कायदा ताहीं मान्या, क्यूँके उसनै परमेसवर पै बिश्वास करया, इस बजह तै उसनै उस ताहीं धर्मी बना दिया। 14 अब्राहम अर उसके वंश ताहीं यो वादा इस खात्तर दिया गया, क्यूँके उननै नियम-कायदा ताहीं मान्या, तो बिश्वास बेकार अर वादा झूठा लिकड़या। 15 परमेसवर का छो नियम-कायदा नै ना मानण आळा पै पड़े सै, अर जित्त नियम-कायदे कोनी ओड़े उसका उल्लंघन भी कोनी। 16 इस बजह तै वादा परमेसवर पै बिश्वास करण तै मिलै सै, जो अनुग्रह के मुताबिक से, यो वादा अब्राहम के सारे वंशा ताहीं मिल्या सै, ना कै सिर्फ उन ताहीं जो माणस मूसा नबी के नियम-कायदा नै मान्ने सै, पर उन माणसां के खात्तर भी जो अब्राहम की ढाळ परमेसवर पै बिश्वास करै सै, क्यूँके अब्राहम ए म्हारे सारया का पूर्वज सै। 17 जिसा पवित्र ग्रन्थ म्ह लिख्या सै, “मन्ने तेरे ताहीं घणीए जात्तां का पूर्वज बनाया सै” परमेसवर की नजर म्ह अब्राहम म्हारा पूर्वज सै। उननै उस परमेसवर पै बिश्वास करया, जो मरे होया नै जिन्दा करै सै, अर जो बात सै ए न्ही उनका नाम इसा लेवै सै के मान्ने वे सै। 18 परमेसवर नै अब्राहम तै कह्या, तेरे भोत-से वंश होवेंगे। पर अब्राहम नै सोच्या के बुढ़ापे म्ह, मरै किस तरियां ऊलाद पैदा होगी? क्यूँके वो तकरीबन सौ साल का हो लिया था, अर सारा भी बूढ़ी होण के कारण बच्चे पैदा कोनी कर सकै थी। इन सारी बातों तै साफ जाहिर था, के उसके भोत-से वंशज न्ही हो सकदे, तोभी अब्राहम का बिश्वास कमजोर न्ही होया, वो परमेसवर के वादे पै बिश्वास करदा रह्या, अर उसनै आस न्ही तोड़ी। 20 अर ना ए अबिश्वासी होके परमेसवर के वादा पै शक करया, पर बिश्वास म्ह पक्का होके उसकी महिमा करी। 21 अर पक्के तौर पै जाणया के जिस बात का परमेसवर नै वादा करया सै, वो उसनै पूरा करण म्ह भी सामर्थी सै। 22 अर परमेसवर नै उसके बिश्वास के कारण उस ताहीं धर्मी बना दिया। 23 अर पवित्र ग्रन्थ के इस वचन नै, “बिश्वास के कारण उस ताहीं धर्मी बना दिया।” ना सिर्फ यो वचन अब्राहम के खात्तर लिख्या गया, 24 बल्के म्हारे खात्तर भी जिनके खात्तर लिख्या गया, जो बिश्वास के जरिये धर्मी बण जावैगा, यानिके के म्हारै खात्तर, जो उसपै बिश्वास करा सां, जिसनै म्हारे प्रभु यीशु ताहीं मरे होया म्ह तै जिन्दा करया। 25 यीशु मसीह म्हारे अपराध्या के खात्तर पकड़वाया अर मारा भी गया, अर म्हारे ताहीं धर्मी बनाण के खात्तर परमेसवर नै उस ताहीं जिन्दा कर दिया।

5 इस करके जिब हम मसीह पै बिश्वास करण तै धर्मी बना दिए गये सां, तो परमेसवर तै म्हारा मेळ-मिलाप अपने प्रभु यीशु मसीह के जरिये हो लिया। 2 बिश्वास कै जरिये मसीह नै म्हारी पोहच पिता के उस अनुग्रह तक कर दी सै। उस अनुग्रह म्ह हम बणे होए सां, अर परमेसवर की महिमा की आस म्ह खुश सां। 3 सिर्फ योए न्ही, बल्के हम मुसीबतां म्ह भी खुश रहवां, न्यू जाणके के मुसीबतां तै धीरज, 4 धीरज तै खरयां लिकड़णा, अर खरे लिकड़ण तै आस होवै सै। 5 अर आस तै निराशा न्ही होन्दी, क्यूँके पवित्र आत्मा जो परमेसवर नै म्हारे ताहीं दिया सै,

उसके जरिये परमेसवर का प्यार म्हारै मन म्ह भरया गया सै। 6 क्यूँके जिब हम कमजोर थे, तो मसीह परमेसवर के बताये गये सही बखत पै बुरे माणसां के खात्तर मरया। 7 किसे धर्मी माणस कै खात्तर कोए जान देवै यो तो मुश्किल सै, पर शायद कोए भले माणस खात्तर जान देण खात्तर तैयार हो सकै सै। 8 पर परमेसवर म्हारे पै अपने प्यार की भलाई इस तरियां तै साबित करै सै, के जिब हम पापी ए थे, जिब्वे मसीह यीशु म्हारै खात्तर मरया। 9 जिब के इब यीशु कै लहू बहाण के कारण परमेसवर नै म्हारे ताहीं अपनी नजर म्ह धर्मी बनाया सै, तो उसके जरिये परमेसवर कै छो तै क्यातै न्ही बचांगें? 10 क्यूँके जिब हम परमेसवर के बेरी थे, तो उसके बेटे की मौत कै जरिये म्हारा मेळ-मिलाप परमेसवर कै गेल्या होया, अर सब तै आच्छी बात या सै, के मेळ-मिलाप हो जाण के कारण उसके बेटे यीशु मसीह के जरिये दिए गये जीवन के कारण म्हारा उद्धार पक्का सै। 11 इब तो म्हारे प्रभु यीशु मसीह के जरिये, परमेसवर म्ह म्हारा मेळ-मिलाप होगया सै, इस खात्तर हम उस म्ह खुश सां। 12 परमेसवर नै एक माणस आदम बनाया, जिसके कारण दुनिया म्ह पाप आया, अर उस पाप के करण मौत आई, अर इस तरियां तै मौत सारे माणसां म्ह फैलगी, क्यूँके आदम के वंश होण के कारण सब पापी बणगे। 13 मूसा नबी के नियम-कायदा के दिए जाण तै पैहले भी, दुनिया म्ह माणस पाप करै थे, पर वो पाप गिण्या कोनी जावै था, क्यूँके ओड़े नियम-कायदे कोनी थे, जिन ताहीं तोड्या जा सकै। 14 तोभी आदम तै लेके मूसा नबी तक सब नै मौत आई। जिस तरियां आदम नै परमेसवर के हुकम ताहीं तोड्या उसकी तरियां हमनै उसके हुकम ताहीं न्ही तोड़ा, अर आदम यीशु मसीह का नमूना था जो आण आळा था। 15 पर आदम के अपराध अर परमेसवर के अनुग्रह के वरदान के बीच म्ह एक भोत बड़ा अन्तर सै, क्यूँके जब एक माणस आदम, कै अपराध करण के कारण, भोत-से माणसां की मौत होई, पर दुसरे माणस यीशु मसीह के जरिये, परमेसवर का अनुग्रह भोत-से माणसां पै होया सै। 16 तो परमेसवर के वरदान का नतिज्जा आदम के पाप तै भोत अलग सै। उसका पाप दण्ड लेके आवै सै, पर परमेसवर का वरदान म्हारे ताहीं धर्मी बनावै सै, भलाए हम कई पापां के दोषी क्यूँ ना हो। 17 क्यूँके एक माणस के अपराध कै कारण सब नै मौत आई। पर इसतै ज्यादा परमेसवर का अनुग्रह अर धार्मिकता का वरदान सै, जो उस ताहीं पावै सै, वो पाप अर मौत पै यीशु मसीह कै जरिये जयवन्त होवै सै, अर वे उसके गैल अनन्त जीवन म्ह राज करैगें। 18 जिस तरियां आदम का अपराध, सारे माणसां कै खात्तर दण्ड लेके आया, ठीक उससे तरियां ए मसीह यीशु के धार्मिकता के काम करण तै, सारे माणसां नै जिन्दगी मिली, अर वे परमेसवर की नजर म्ह धर्मी बणै। 19 क्यूँके जिसा एक माणस कै हुकम ना मानण तै भोत-से माणस पापी बणे, उससे तरियां ए एक माणस कै हुकम मानण तै भोत-से माणस धर्मी बणैगें। 20 मूसा के नियम-कायदे म्हारे ताहीं इस खात्तर दिए गये, ताके माणस देख सकै के वे कितने पापी सै पर जिब माणस पाप पै पाप करै सै, तो

ओड़ै परमेसवर का अनुग्रह उसतै भी घणा होया करै। 21 सारे माणसां नै पाप पै पाप करया, अर वे मरगे, पर म्हारे प्रभु यीशु मसीह कै जरिये परमेसवर का अनुग्रह हमनै धर्मी बणावै सै, अर म्हारे ताहीं अनन्त जीवन देवै सै। (aiōnios g166)

6 कोए कह सकै सै? के परमेसवर अपणे अनुग्रह तै म्हारे पाप माफ करै सै, पर इसा मत सोच्यों के पाप करदे रहवां ताके अनुग्रह घणा हो। 2 न्ही! बिल्कुल न्ही! हम जिब पाप कै खात्तर मरये तो हमनै आगै तै दुबारा पाप न्ही करणा चाहिए। 3 हम जाणा सां, के हम सारे जिननै मसीह यीशु के नाम म्ह बपतिस्मा लिया सै, यो इसा सै, के जिसा हम मसीह के गैल मर जाणा। 4 इस करके जिब हम बपतिस्मा लेवां सां, तो हम उसके साथ मर जावां सां, अर उसके साथ गाड्डे जावां सां, ताके जिस तरियां मसीह पिता परमेसवर की महिमा कै जरिये मरे होया म्ह तै जिन्दा करया गया, उससे तरियां ए हमनै भी नया जीवन जीणा चाहिए। 5 क्यूँके जै हम उसकी मौत की समानता म्ह बपतिस्म के जरिये उसके गेल्या एक हो जावां सां, तो पक्के तौर पै उसके जिन्दा उठण की समानता म्ह भी एक हो जावांगे। 6 इससे तरियां म्हारा पुराणा पापी सुभाव यीशु मसीह के गेल्या क्रूस पै चढ़ाया गया, ताके जो पापी सुभाव म्हारी देह म्ह सै वो नाश हो जावै, अर हम आगै दुबारा पाप की गुलामी म्ह न्ही रहवां। 7 क्यूँके जिब हम मसीह के गैल मरा सां, तो हम पाप की शक्ति तै आजाद हो जावां सां। 8 इस करके जै हम मसीह कै गेल्या मरगे, तो म्हारा विश्वास यो सै के उसके गेल्या जीवांगे भी। 9 क्यूँके न्यू बेरा सै, के मसीह मरे होया म्ह तै जिन्दा उठके दुबारा फेर न्ही मरेगा, उसपे फेर मौत का राज न्ही होवेगा। 10 क्यूँके मसीह पाप कै खात्तर एक ए बार मर गया, पर इब जो जिन्दा सै, तो परमेसवर की महिमा करण कै खात्तर जिन्दा सै। 11 इससे तरियां थम भी अपणे-आप ताहीं पाप कै खात्तर तो मरया होड़, पर परमेसवर की महिमा करण खात्तर मसीह यीशु म्ह जिन्दा समझो। 12 इस करके पाप की लालसा थारी नाश होण आळी देह म्ह राज न्ही करै, के थम उसकी लालसाओं के कब्जे म्ह ना रहो। 13 अपणे देह के अंगा ताहीं अधर्म के काम्मां खात्तर इस्तमाल ना करो, पर अपणे-आप ताहीं मरे होया म्ह तै जिन्दे जाणकै अपणी जिन्दगी परमेसवर ताहीं दे दो, अर अपणे देह के अंगा ताहीं धार्मिक काम्मां खात्तर परमेसवर नै सौंप दो। 14 फेर थारे पै पाप का राज कोनी होवेगा, क्यूँके थम नियम-कायदे कै अधीन म्ह न्ही, बल्के परमेसवर के अनुग्रह कै अधीन म्ह जीण लागरे सों। 15 तो इसका मतलब के सै? के हम नियम-कायदे का अधीन म्ह न्ही, बल्के परमेसवर के अनुग्रह कै अधीन सां, इस करके के हम पाप कर सका सां? न्ही! बिलकुल न्ही! 16 थम जाणो सों के जिब थम खुद नै किसे का गुलाम होण खात्तर देओ सों, तो थम वोए करो सों, जो थारा माल्लिक कहवै सै। थम पाप के गुलाम भी बण सकों सों, जो मौत लेके आवै सै, या फेर थम परमेसवर के हुकम नै मानकै धार्मिकता का जीवन जी सको सों। 17 थम पाप के गुलाम थे, पर इब थमनै वे सारी शिक्षा मान्नी सै, जो थारे ताहीं मिली

थी, इस करके मै परमेसवर का धन्यवाद करूँ सूँ। 18 इब पाप की शक्ति तै छुटाये जाके परमेसवर के दास बणो ताके थम धर्म के काम करो। 19 मै थारे ताहीं आसान तरिककें लिखूँ सूँ, ताके आम आदमी भी आसान्नी तै समझ सकै, के जिब थम अपणी पिच्छली जिन्दगी की गुलाम थे, अर थम हरेक ढाळ के अशुद्ध अर भुन्दे काम करो थे। तो इब थम अपणी देह नै धार्मिक जीवन के दास बणा ल्यो, ताके थम पवित्र जीवन जी सको। 20 जिब थम पाप के गुलाम थे, तो थम धार्मिकता के काम न्ही कर पाओ थे। 21 थम बुरा काम करो थे, अर इब उन बुरे काम्मां के कारण शर्मिन्दा सों, तो थमनै के मिल्या? इन सारी बात्तां का नतिज्जा मौत सै। 22 पर इब पाप तै आजाद होके अर परमेसवर के दास बणके इब थम वो काम करो सों, जिसतै थम पवित्र बणो सों, अर उसका नतिज्जा अनन्त जीवन सै। (aiōnios g166) 23 क्यूँके पाप का नतिज्जां तो मौत सै, पर परमेसवर का वरदान म्हारे प्रभु मसीह यीशु म्ह अनन्त जीवन सै। (aiōnios g166)

7 हे विश्वासी भाईयो, थमनै बेरा सै, (मै नियम-कायदे के जाणण आळा तै करूँ सूँ) के जिब ताहीं माणस जिन्दा रहवै सै, तब तक उसनै नियम-कायदे मानने पड़ैगें। 2 उदाहरण के तौर पै एक ब्याता लुगाई नै मरते दम तक नियम-कायदे के मुताबिक अपणे धणी के साथ रहणा चाहिये, पर जै धणी मर जा, तो वा धणी के नियम-कायदे तै आजाद हो जा सै। 3 ज्यांतै जै धणी कै जिन्दे जी वा किसे दुसरे माणस की हो जावै, तो जार कुहावैगी, पर जै धणी मर ज्या, तो वा उस नियम-कायदे तै आजाद हो जा सै, उरै ताहीं के जै किसे दुसरे माणस की हो जावै तोभी जार कोनी ठेहरैगी। 4 उससे तरियां ए हे मेरे विश्वासी भाईयो, जिब थम मसीह के साथ मरगे, तो थम नियम-कायदा खात्तर मरेगे, इब थम मसीह के हो, जो मरे होया म्ह तै जिन्दा उठ्या, ताके हम परमेसवर के खात्तर धार्मिक जीवन जी सका। 5 क्यूँके जिब हम अपणे देह की इच्छा के मुताबिक जिवां सां, तो पाप की लालसा म्हारे अंगा म्ह काम करै सै, अर नियम-कायदे ए उन लालसा नै उजागगर करके मौत नै लेके आवै सै। 6 हम नियम-कायदा खात्तर मरगे जिसके बन्धन म्ह हम पैहले थे। इब हम पवित्र आत्मा की मानके, नये सिरे तै परमेसवर की सेवा कर सकां सां। 7 तो हम के कहां? के मूसा नबी के नियम-कायदे पाप सै? न्ही! बिलकुल न्ही! बल्के नियम-कायदा ए सै, जो मेरे ताहीं बतावै सै, के पाप के सै! जै नियम-कायदे न्ही कहन्दे, के लालच मतना करै तो मै लालच नै जाण ए न्ही पान्दा। 8 पर पाप नै मौक्का पाके, हुकम कै जरिये मेरे म्ह सारी तरियां का लालच पैदा करया, क्यूँके बिना नियम-कायदे पाप मुर्दा सै। 9 एक बखत था जिब मै मूसा नबी के नियम-कायदे बिना जीऊँ था, पर जिब मन्ने मूसा नबी के नियम-कायदा ताहीं जाणया, तो मेरे म्ह पाप करण की इच्छा होण लागी, अर मै मरे होया जिसा होग्या। 10 अर वो हुकम जिसतै मन्ने जिन्दगी मिलणी थी वो मेरी आत्मिक मौत का कारण बणया। 11 क्यूँके पाप नै मौक्का पाके हुकम कै जरिये मेरे ताहीं भकाया, अर उससे कै जरिये मेरी आत्मिक मौत भी हो गई। 12 ज्यांतै हम यो नतिज्जा लिकाड़ा सां, के नियम-कायदे पवित्र

सै, अर हुकम पवित्र, धर्मी अर खरया सै। 13 तो के मूसा नबी के नियम-कायदे जो खरे थे, मेरै खात्तर मौत लेकै आये? न्ही! बिलकुल न्ही! यो पाप ए था जिसनै इसा करया। पर नियम-कायदे जो खरे थे, मेरै खात्तर मौत लेकै आये, ताके पाप की असलियत जाहिर हो जा, अर हुकम दिखावे सै के पाप घणाए बुरा सै। 14 क्यूँके हमनै बेरा सै, के मूसा नबी के नियम-कायदे तो आत्मिक सै, पर मै शारीरिक सूं, अर पाप का गुलाम सूं। 15 अर जो मै करूँ सूं, उस ताहीं कोनी जाण्दा, क्यूँके जो मै चाहूँ सूं, वो न्ही करया करदा, पर जिसतै मन्ने घृणा आवै सै वोए करै सूं। 16 जै जो मै न्ही चाहन्दा वोए बुरे काम करूँ सूं, तो मै मान ल्यूँ सूं, के मूसा नबी के नियम-कायदे खरे सै। 17 तो इसी हालत म्ह जो मेरे म्ह बुरे काम करै सै, वो मै न्ही, बल्के पाप सै, जो मेरे म्ह बस्या होया सै। 18 क्यूँके मन्ने बेरा सै के मेरे म्ह यानिके मेरे पापी सुभाव म्ह कोए आच्छी चीज वास कोनी कर दी। मेरा जी तो भले काम करण की इच्छा तो करै सै, पर भले काम मेरे तै बणदे कोनी। 19 क्यूँके जिस आच्छे काम करण नै मेरा जी करै सै, वो तो कोनी करदा, पर जो बुरे काम करणा न्ही चाहन्दा, वोए करूँ सूं। 20 इस करके जै मै वोए करूँ सूं जो न्ही चाहन्दा, तो उसका करण आळा मै कोनी रहया, पर पाप सै जो मेरे भित्तर म्ह बस रहया सै। 21 इस तरियां तै मन्ने सच का बेरा पटै सै, के जब मै भलाई करण की इच्छा करूँ सूं, तो बुराई ए करूँ सूं। 22 क्यूँके मै भीतरी माणस-पण तै तो परमेसवर के नियम-कायदे तै घणा खुश रहूँ सूं। 23 पर मेरे भित्तर एक नियम-कायदा की शक्ति काम करण लागरी सै, जो मेरी पापी अन्तरात्मा तै युध्द करै सै। या नियम-कायदा की शक्ति मेरी अन्तरात्मा नै पाप का गुलाम बणावै सै जो इब भी मेरी देह म्ह सै। 24 मै किसा निरभागा माणस सूं! मन्ने इस पापी सुभाव तै जो मौत लेकै आवै सै, कौण छुड़ावैगा? 25 म्हारे प्रभु यीशु मसीह कै जरिये परमेसवर का धन्यवाद होवै। ज्यांतै मै अपनी समझ तै तो परमेसवर के नियम-कायदे नै मानना चाहूँ सूं, पर पापी सुभाव के कारण मै पाप का गुलाम सूं।

8 इस करके इब जो मसीह यीशु पै बिश्वास करै सै, उनपै दण्ड का हुकम कोनी। 2 क्यूँके पवित्र आत्मा थमनै वा जिन्दगी देवैगा, जो मसीह यीशु की ओड़ तै आवै सै, अर वो थारे ताहीं पाप अर मौत तै आजाद करे सै। 3 क्यूँके जो काम मूसा नबी के नियम-कायदे पापी सुभाव कै कारण देह म्ह न्ही कर सके, उस ताहीं परमेसवर नै करया, यानिके अपने ए बेट्टे ताहीं इन्सान के रूप म्ह पापबलि होण कै खात्तर भेज दिया, परमेसवर नै पाप की शक्ति ताहीं अपने बेट्टे की देह के बलिदान के जरिये तोड़ दिया। 4 ज्यांतै के मूसा नबी के नियम-कायदे की विधि म्हारे म्ह पूरी करी जावै, जो पापी सुभाव कै मुताबिक न्ही, बल्के पवित्र आत्मा कै मुताबिक चाल्लै सै, 5 क्यूँके जो अपने पापी सुभाव के कारण चाल्लै सै, वो बुरी चिज्जां कै बारे म्ह सोचै सै, पर जो-जो पवित्र आत्मा के जरिये चाल्लै सै, वो उन चिज्जां के बारे म्ह सोचै सै, जो पवित्र आत्मा ताहीं खुश करै सै। 6 जै थम अपनी पापमय लालसा के मुताबिक चाल्लोंगे तो मरोगे, पर पवित्र आत्मा के कहे

मुताबिक चाल्लोंगे तो जिन्दगी अर शान्ति पाओगे। 7 क्यूँके पापमय लालसा के मुताबिक चालणा तो परमेसवर तै बैर राखणा सै, क्यूँके ना तो वो परमेसवर के नियम-कायदे कै अधीन सै अर ना कदे हो सकै सै। 8 अर जो पापमय लालसा के मुताबिक चाल्लै सै, वे परमेसवर नै खुश न्ही कर सकदे। 9 पर जब के परमेसवर का पवित्र आत्मा थारे म्ह बसे सै, तो थम पापमय लालसा के मुताबिक न्ही पर पवित्र आत्मा के कहे मुताबिक चाल्लों। जै किसे म्ह मसीह का आत्मा कोनी चाल्दा तो वो परमेसवर का माणस कोनी। 10 जै मसीह थारे म्ह वास करै सै, तो पाप के कारण देह मरी होई सै, पर धार्मिकता के कारण थारी आत्मा जिन्दा सै। 11 जै परमेसवर का आत्मा जिसनै मसीह यीशु ताहीं मरे होया म्ह तै जिन्दा करया, थारे म्ह बस्या होया सै, तो जिसनै मसीह ताहीं मरे होया म्ह तै जिन्दा करया, वो थारी नाश होण आळी देह नै भी अपने पवित्र आत्मा कै जरिये जिन्दा करैगा, जो थारे म्ह बस्या होया सै। 12 इस करके हे बिश्वासि भाईयो, हम पापी सुभाव के कर्जदार कोनी के हम इसकै मुताबिक बरताव करां। 13 क्यूँके जै थम पापी सुभाव के मुताबिक जीओगे, तो मरोगे जै पवित्र आत्मा तै पापमय लालसा के काम्मां नै मारोगे तो जिन्दे रहोगे। 14 ज्यांतै के जितने माणस परमेसवर के आत्मा के चलाए चाल्लै सै, वैए परमेसवर की ऊलाद सै। 15 क्यूँके थारे ताहीं गुलामी की आत्मा कोनी दी गई, के थम डरो, पर पवित्र आत्मा हमनै परमेसवर की ऊलाद बणावै सै, जिसतै हम हे अब्बा, हे पिता कहकै बोल्लां सां। 16 पवित्र आत्मा आप ए म्हारी आत्मा कै गेल्या गवाही देवै सै, के हम परमेसवर की ऊलाद सां, 17 अर जै ऊलाद सां तो वारिस भी, बल्के परमेसवर के वारिस अर मसीह कै संगी वारिस सां, अगर हम मसीह के ढाळ दुख ठावांगे, तो हम उसकी महिमा म्ह भी शामिल हो पावांगे। 18 मन्ने पक्का यकिन सै, के इस बखत के दुख अर क्लेश उस महिमा कै स्याम्ही, उस महिमा के समान जो प्रभु म्हारे ताहीं देवैगा, किमे भी कोनी सै। 19 क्यूँके सृष्टि की सारी चिज्जें घणी उम्मीद भरी निगांह तै परमेसवर की ऊलाद की बाट देखण लागरी सै। 20 परमेसवर की बणाई गई हर एक चीज नै अपने मकसद ताहीं खो दिया सै, यो इस करके न्ही के सृष्टि खुद चाहवै थी, पर परमेसवर नै इसा करया, पर फेर भी आस सै। 21 सृष्टि भी खुद उस दिन की बाट देखै सै, जिब वो मौत अर विनाश की गुलामी तै छुटकारा पाकै, परमेसवर की महिमा म्ह उसकी ऊलाद कै साथ शामिल होवेंगे। 22 क्यूँके हमनै बेरा सै के सारी सृष्टि इब ताहीं मिलके कराहती अर दर्दा म्ह पड़ी, उस जनानी की तरियां सै, जिसा बच्चा होण तै पैहले दर्दा म्ह तड़फै सै। 23 अर सिर्फ परमेसवर की बणाई सृष्टि ए न्ही, पर हम भी जिस म्ह होण आळी महिमा के पैहले तै स्वाद चखण के रूप म्ह पवित्र आत्मा का वास सै, हम खुद भी अपने-आप म्ह कराहावा सां। यो जिब्बे होगा जिब हम देह तै आजाद होवांगे, अर परमेसवर हमनै अपनी ऊलाद बणाण कै खात्तर अपनावै। 24 आण आळी महिमा की आस के जरिये ए थारा उद्धार होया सै, जै थम उन चिज्जां की आस राक्खों सां जो थारे धारे पैहले तै सै, तो

थारी आस धरणा बेकार सै, कोए भी उस चीज की आस कोनी राखदा, जो उसके धोरे पैहले तै सै। 25 हम उन चिज्जां की आस करां सां, जो म्हारे धोरे इब ताहीं सै कोनी, तो हम धीरज तै बाट देख्वां सां, जिब तक वो चीज हमनै मिल ना जावै। 26 प्रार्थना करण खात्तर म्हारे धोरे बुद्धि कोनी, पर पवित्र आत्मा म्हारी मदद करै सै, क्यूँके हमनै न्ही बेरा के किन बातां के खात्तर प्रार्थना करणी चाहिये, पर पवित्र आत्मा आप्णे इसी आह भर-भरकै, जो बयान तै बाहरणै सै, म्हारे खात्तर बिनती करै सै। 27 परमेसवर जो मनां का जाँचण आळा सै उसनै बेरा सै, के पवित्र आत्मा का मकसद के सै? क्यूँके वो पवित्र माणसां के खात्तर परमेसवर की मर्जी के मुताबिक बिनती करै सै। 28 हमनै बेरा सै के जो माणस परमेसवर तै प्यार राख्खै सै, उनके खात्तर सारी बात मिलकै भलाई ए नै पैदा करै सै, यानिके उनके खात्तर जो उसकी मर्जी के मुताबिक चुणे होए सै। 29 क्यूँके जिन ताहीं परमेसवर नै पैहल्या तै चुण्या होया सै, उन ताहीं उसके बेटे यीशु मसीह जिसे बणण खात्तर ठहराया भी सै, ताके वो घणे भाईयाँ म्ह पैहल्डा यानी जेठ्ठा बणौ। 30 फेर जिन माणसां ताहीं उसनै पैहल्या तै ठहराया, उन ताहीं चुण्या भी, अर जिन ताहीं चुण्या, उन ताहीं धर्मी भी बणाया सै, अर जिन ताहीं धर्मी बणाया, उन ताहीं अपणी महिमा म्ह भागीदारी भी बणाया सै। 31 तो इन बातां तै हम यो नतिज्जां लिकाड़ा सां, जै परमेसवर म्हारी कान्ही सै, हमनै कौण हरा सकै सै? 32 परमेसवर वो सै जिसनै अपणे खुद के बेटे ताहीं भी म्हारे खात्तर बलिदान करण म्ह कोए संकोच कोनी करया, तो जो उसनै म्हारे तै वादा करया सै, वो सारा कुछ म्हारे ताहीं क्यूँ न्ही देवैगा? 33 कोए भी हमनै परमेसवर के स्याम्ही दोषी न्ही ठहरा सकता? परमेसवर ए सै जो म्हारे ताहीं धर्मी बणावे सै। 34 कोए भी हमनै दोषी न्ही ठहरा सकता? क्यूँके यीशु मसीह ए सै, जो मरया बल्के मुर्दा म्ह तै जिन्दा भी उठ्या, अर परमेसवर के सोळी ओड़ सै, अर म्हारे खात्तर बिनती भी करै सै। 35 कौण हमनै मसीह के प्यार तै न्यारा करैगा? के क्लेश, संकट, उपद्रव, अकाळ, नंगाई, जोखम, या तलवार? 36 जिसा पवित्र ग्रन्थ म्ह लिख्या सै, “तेरे खात्तर लोग हमनै रोज मारण की धमकी देवै सै, हम मरण आळी भेड्डां की तरियां समझे गये सां।” 37 पर इन सारी बातां म्ह हम उसके जरिये जिसनै म्हारे तै प्यार करया सै, जयवन्त तै भी बाध सै। 38 क्यूँके मै जाणुं सूं, के कोए भी चीज मसीह नै म्हारे तै प्यार करण तै न्ही रोक सकदी। इसतै कोए फर्क न्ही पड़ता के चाहे हम जिवां या मरा, सुगंदूत, प्रधानताएँ, शक्तियाँ जो सुर्मा म्ह सै इन म्ह तै कोए भी हमनै मसीह के प्यार तै अलग न्ही कर सकदी, अर इब जो होण लागरया सै, जो भविष्य म्ह होण आळा सै, गहराई, ऊँचाई हमनै परमेसवर के प्यार तै, जो म्हारे प्रभु यीशु मसीह म्ह सै अलग न्ही कर सकदी।

9 जै कोए भी चीज हमनै परमेसवर के प्यार तै अलग न्ही कर सकदी, तो क्यूँ इस्राएली, मेरे यहूदी भाई परमेसवर तै दूर सै? मेरा मन उन खात्तर भोत दुखी सै, जै उन माणसां के छुटकारै खात्तर मेरे उप्पर चाहे दोष भी लगाये जावे या मसीह तै अलग करया जावे, तोभी मै इसकै

खात्तर तैयार सूं, अर मै मसीह नै गवाह मानते होए सच बोल्लू सूं, पवित्र आत्मा अर मेरी अन्तरात्मा भी या गवाही देवै सै के मै झूठ कोनी बोल्दा। 4 वे इस्राएल देश के माणस सै, अर वे परमेसवर के गोद लिये होड़ माणस सै, अर महिमा, करार, नियम-कायदे अर परमेसवर की आराधना करण का हक अर वादे उन्हे के सै। 5 अब्राहम, इसहाक, याकूब ये सारे पूर्वज भी उन्हे के सै, अर मसीह भी देह के भाव तै उन्हे म्ह तै इस्राएली सै। जो सारया के उप्पर परम परमेसवर सै, युगानयुग धन्य हो। आमीन। (aiōn g165) 6 पर इसा कोनी के परमेसवर अपणे वादे तै मुकर गया, ज्यातै के जो इस्राएल के वंशज सै, वे सारे सच्चे इस्राएली कोनी। 7 अर ना अब्राहम का वंश होण के कारण सारे उसकी सच्ची ऊलाद होगी, पर पवित्र ग्रन्थ म्ह लिख्या सै, “इसहाक के वंश म्ह जन्म लेण तै ए सारे उसकी सच्ची ऊलाद न्ही हो जान्दी।” 8 यानिके जो दुनियावी तौर पै शारीरिक रूप तै जन्मे होए परमेसवर की ऊलाद कोनी, पर वायदे की ऊलाद सै। 9 क्यूँके वादे का वचन यो सै: “आगले साल मै इससे बखत दुबारा आऊँगा, अर तब सारा के एक बेट्टा पैदा होवैगा।” 10 अर सिर्फ योए न्ही, पर जिब रिबका के गर्भ म्ह एक ए आदमी यानिके म्हारे पूर्वज इसहाक तै जुड़वां बाळक पैदा होए। 11 इब तै पैहले के वो पैदा होते अर कुछ बुरा या भला काम जाणते, परमेसवर नै रिबका तै कह दिया था के “जेठ्ठा बेट्टा छोटळै का गुलाम होवैगा,” परमेसवर नै यो दिक्खाण के खात्तर कह्या था, वो अपणे मन की इच्छा तै खुद चुनाव करै सै, ना के उनके भले या बुरे कामां तै। 13 जिसा पवित्र ग्रन्थ म्ह लिख्या सै, “मन्नै एसाव तै बड़कै याकूब ताहीं घणा प्यार करया।” 14 ज्यातै हम के कह्ला? के परमेसवर की अपणी इच्छा तै चुनाव करणा अन्याय सै? न्ही! बिलकुल न्ही! 15 क्यूँके परमेसवर मूसा नबी तै कहवै सै, “मै जिस किसे पै दया करणा चाहूँ, उसपै दया करूँगा, अर जिस किसे पै तरस खाणा चाहूँ उससे पै तरस खाऊँगा।” 16 इस करके परमेसवर उस ताहीं चुणै सै, जिसके उप्पर वो दया दिखाणा चाहवै सै, उसका चुनाव इस बात पै आधारित कोनी, के लोग के चाहवै सै, अर वे के करण की कोशिश करै सै। 17 क्यूँके पवित्र ग्रन्थ म्ह परमेसवर नै फिरौन (मिस्र के राजा) तै कह्या, “मन्नै तेरे ताहीं ज्या ए तै राजा बणाया सै, के तेरे म्ह अपणी सामर्थ दिखाऊँ, अर मेरे नाम का प्रचार सारी धरती पै होवै।” 18 इस करके वो जिसपै चाहवै सै उसपै दया करै सै, अर जिस ताहीं चाहवै सै उस ताहीं हठील्ला बणा देवै सै। 19 तब घणखरे माणस मेरे तै कहवैगें, “जै इसा सै, तो परमेसवर किस तरियां कह सकै सै, के हम गलत सां? क्यूँके परमेसवर जो करणा चाहवै सै उसनै करण तै कौण रोक सकै सै?” 20 हे भले माणस, भला तू कौण सै जो परमेसवर तै वाद-विवाद करै? के बणाई होई चीज बणाण आळे तै कह सकै सै, “तन्नै मेरे ताहीं इसा क्यातै बणाया सै?” 21 के कुम्हार ताहीं माट्टी पै हक कोनी के एक ए लोदे म्ह तै एक बासण आदर के खात्तर, अर दुसरे ताहीं अनादर के खात्तर बणावै? 22 परमेसवर अपणा छो अर अपणी सामर्थ उनके बिरुध्द दिखाणा चाहवै सै, जो नाश ए होण लायक सै, पर

वो धीरज धरे सै क्यूँके वो दिखाणा चाहवै सै के वो कितना महान् सै, वो उन माणसां पै दया करै सै, जिन ताहीं उसने अपनी महिमा म्ह साँझा करण खातर चुण्या सै। 24 यानिके म्हारे पै जिन ताहीं उसने ना सिर्फ यहूदी माणसां म्ह तै, बल्के गैर यहूदियाँ म्ह तै भी चुण्या। 25 जिसा के वो होशे नबी की किताब म्ह भी गैर यहूदियाँ के बारे म्ह कहवै सै, “जो मेरी प्रजा कोनी थी, उन ताहीं मै अपनी प्रजा कहूँगा, अर जिनतै मै प्यार न्ही करूँ था, उन ताहीं प्यार करूँगा। 26 अर जिस जगहां पै परमेसवर नै इसा कह्ला था, के थम मेरी प्रजा कोनी सो, उससे जगहां पै परमेसवर उन ताहीं अपनी उलाद कहवैगा।” 27 अर यशायाह नबी इस्राएल के माणसां के बारे म्ह रुक्का मारकै कहवै सै, “चाहे इस्राएल की उलादां की गिणती समुन्दर के बालू के बराबर हो, तो भी उन म्ह तै थोड़े ए बवैंगे। 28 क्यूँके परमेसवर धरती पै तावळा-ए आवैगा, अर एक बार म्ह ए सबका न्याय करैगा।” 29 जिसा यशायाह नबी नै पैहल्या भी कह्ला था, “जै सेनाओं का प्रभु म्हारे खातर कुछ वंश न्ही छोड़दा, तो म्हारी हालत सदोम अर अमोरा नगर के जिसी हो जान्दी, जिस ताहीं परमेसवर नै पूरी तरियां तै नाश कर दिया।” 30 ज्यातै हम के कहां? गैर यहूदियाँ नै अपने-आप ताहीं धर्मी बणाण की कोशिश न्ही करी, पर परमेसवर नै मसीह यीशु पै विश्वास करण के कारण उन ताहीं धर्मी बणा दिया। 31 जो इस्राएली मूसा नबी के नियम-कायदा नै मानके धर्मी बणाणा चाहवै थे वे धर्मी न्ही बण पाये। 32 यो किस तरियां हो सकै सै? इस करके के वे विश्वास तै न्ही, पर मान्ना आच्छे काम्मां तै धर्मी बणाणा चाहवै थे। उननै उस ठोक्कर के पत्थर पै ठोक्कर खाई, 33 जिसा पवित्र ग्रन्थ यीशु मसीह के बारे कहवै सै, “देख्खो, मै यरुशलैम नगर म्ह एक ठेस लाग्गण का पत्थर, अर ठोक्कर खाण की चट्टान राक्खूँ सूँ, अर जो कोए उसपै विश्वास करैगा वो शर्मिन्दा कोनी होवैगा।”

10 हे विश्वासी भाईयो, मेरे मन की इच्छा अर मेरे यहूदी माणसां खातर, परमेसवर तै मेरी याए प्रार्थना सै के वे बचाए जावै। 2 क्यूँके मै उनकी गवाही वूँ सूँ, के उन ताहीं परमेसवर के खातर उत्साह रहवै सै, पर सही समझकै गेल्या न्ही। 3 क्यूँके वा धार्मिकता जो परमेसवर की ओड़ तै आवै सै, उस ताहीं वे समझण म्ह नाकामयाब रहे अर अपने तरिकके तै धर्मी बणाण की कोशिश करी, वे परमेसवर की धार्मिकता के अधीन न्ही होए। 4 क्यूँके मसीह नै पैहले तै ए उस मकसद ताहीं पूरा कर लिया सै। जिस खातर नियम-कायदे दिए गये थे, उसका नतिज्जां यो होया के जो यीशु मसीह पै विश्वास करै सै वो धर्मी बणाए जावैंगे। 5 क्यूँके मूसा नबी नै नियम-कायदा तै धर्मी बणाण के बारे म्ह पवित्र ग्रन्थ म्ह यो लिख्या सै, के जो माणस उननै मान्ने सै, वो इस्से कारण तै जिन्दा रहैगा। 6 पर विश्वास के जरिये धर्मी बणाये जाण के बारे म्ह पवित्र ग्रन्थ या कहवै सै, के “तू अपने मन म्ह न्यू ना कहिये, के मसीह ताहीं नीच्चे ल्याण खातर सुर्ग पै कौण चढ़ैगा?” 7 या “अधोलोक म्ह कौण उतरैगा?” (यानिके मसीह ताहीं मरे होया म्ह तै जिन्दा उप्पर लाण के खातर!) (Abyssos g12) 8 पर के कहवै सै,

योए के “परमेसवर का वचन तेरे धोरे सै, ताके तू उसनै अपने मुँह तै अंगीकार कर सकै अर अपने मन म्ह राक्ख सकै,” यो वोए विश्वास का वचन सै, जो हम प्रचार करा सां। 9 जै तू माणसां के स्याम्ही यीशु नै प्रभु मान ले, अर अपने मन तै विश्वास करै के परमेसवर नै उस ताहीं मरे होया म्ह तै जिन्दा करया, तो परमेसवर तन्ने बचावैगा। 10 क्यूँके हम अपने मन तै विश्वास करां सां, तो हम परमेसवर के जरिये धर्मी बणाए जावै सै, अर हम मुँह तै अंगीकार करां सां, के हम मसीह पै विश्वास करां सां, तो इस करके हम बच जावांगे। 11 क्यूँके यशायाह नै पवित्र ग्रन्थ म्ह मसीह के बारे म्ह यो लिख्या सै, “जो कोए उसपै विश्वास करैगा वो शर्मिन्दा कोनी होवैगा।” 12 यहूदियाँ अर यूनानियाँ म्ह किमे फर्क कोनी, ज्यातै के परमेसवर सारया का प्रभु सै, जो उसका नाम लेवै सै उस ताहीं वो बचावै सै। 13 क्यूँके पवित्र ग्रन्थ म्ह लिख्या सै के “जो कोए प्रभु का नाम लेवैगा, वो बचाया जावैगा।” 14 पर जिन माणसां नै मसीह पै विश्वास न्ही करया, तो वे उसनै मदद खातर किस तरियां पुकारैंगे? अर जिसकै बारे म्ह सुणया न्ही उसपै किस तरियां विश्वास करैंगे? अर वे किस तरियां सुणैंगे जब तक कोए प्रचारक ना जावै। 15 जै प्रचारक भेज्जे ना जावै, तो किस तरियां प्रचार करै? जिसा पवित्र ग्रन्थ म्ह लिख्या सै, “जो आच्छी बात्ता का सुसमाचार लेके आवै सै, उनके पाँव कितने सुहावने सै।” 16 पर सारया नै उस सुसमाचार पै विश्वास कोनी करया जिसा यशायाह नबी कहवै सै, “हे प्रभु, किस्से नै भी म्हारे सन्देश पै विश्वास न्ही करया?” 17 पर मसीह के बारे म्ह वचन सुणण तै विश्वास होवै सै। 18 पर मै पूच्छू सूँ, के यहूदियाँ नै, मसीह के बारे म्ह न्ही सुणया? सुणया तो जरूर सै, क्यूँके पवित्र ग्रन्थ म्ह लिख्या सै, “उनके बोल साक्ती धरती पै, अर उनके वचन दुनिया के कुणे ताहीं पोंहोचगे सै।” 19 फेर मै पूच्छू सूँ, के इस्राएली लोग मसीह के बारे म्ह सन्देश ताहीं समझै सै? पैहल्या तो प्रभु नै मूसा नबी के जरिये यो कह्ला, “मै उन गैर यहूदियाँ के जरिये थारे मन म्ह जळण पैदा करूँगा, मै थमनै यहूदियाँ के जरिये मूर्ख समझण आळे माणसां तै गुस्सा दिलाऊँगा।” 20 फेर जो बात प्रभु नै कही वा बात यशायाह नबी बड़ी हिम्मत करके कहवै सै, “जो मन्ने न्ही टोहवैं थे, उननै मेरे ताहीं पा लिया, अर जो मन्ने बुझ्झै भी कोनी थे, उनपै मै जाहिर होया।” 21 पर इस्राएल देश के माणसां के बारे म्ह, परमेसवर यशायाह नबी के जरिये न्यू भी कहवै सै, “मै सारा दिन अपने हाथ, एक हुकम ना मानण आळी अर विवाद करण आळी प्रजा के कान्ही पसारे रहया।”

11 ज्यातै मै पूच्छू सूँ, के परमेसवर नै अपनी प्रजा ताहीं छोड़ दिया? न्ही! बिलकुल न्ही! मै भी तो इस्राएली सूँ, मै अब्राहम की पीढ़ी अर बिन्यामीन के गोत्र म्ह तै सूँ। 2 परमेसवर नै अपनी उस प्रजा ताहीं कोनी छोड्या, जिस ताहीं उसनै पैहल्याए तै चुण्या सै। के थमने न्ही बेरा के पवित्र ग्रन्थ एलियाह नबी के बारे म्ह के कहवै सै, वो इस्राएल के माणसां के बिरोध म्ह परमेसवर तै शिकायत करै सै। 3 “हे प्रभु, उननै तेरे नबियाँ ताहीं मार दिया, अर तेरी वेदियाँ ताहीं नाश कर दिया सै, अर

मै ए एकला बचा सूँ, जो तेरे पै बिश्वास करूँ सूँ अर जिन्दा सूँ, अर वे मेरी जान भी लेणा चाहवै सै।” 4 तब परमेसवर नै एलिव्याह नबी तै कहा, “मन्नै अपने खात्तर सात हजार माणसां ताहीं राख राख्या सै, जिन नै बाल देवता की मूर्ति की आराधना करण खात्तर गोठ्ठे कोनी टेक्के सै।” 5 ठीक इस्से तरियां तै इस बखत भी, परमेसवर के अनुग्रह तै अलग करे होए कुछ यहूदी माणस बचरे सै, जिन ताहीं उसनै अपने खात्तर चुण्या सै। 6 जै उन ताहीं परमेसवर नै अपने अनुग्रह तै चुण्या सै, तो यो आच्छे काम्मां तै नही होया, नही तो अनुग्रह फेर अनुग्रह नही रहया। 7 फेर इसका नतिज्जा के लिंकड़या? हालाकि इस्राएली माणस जो परमेसवर की नजर म्ह धर्मी बणणा चाहवै थे, पर वो बण नही पाए, पर परमेसवर नै जिन ताहीं चुण्या वे उसके गैल धर्मी बण ग्ये, अर बचे होइ माणस हठीले करे गये अर उननै उसकी सुणण तै इन्कार कर दिया। 8 जिसा पवित्र ग्रन्थ म्ह यशायाह नबी नै लिख्या सै, “परमेसवर नै उन ताहीं आज कै दिन तक सुस्त दिमाग दे राख्या सै, अर इसी आँख दी जो ना देखखै, अर इसे कान दिये जो ना सुणै।” 9 अर राजा दाऊद कहवै सै, “के जिसा एक पंछी खाणा खाण खात्तर जाळ म्ह फँस जावै सै अर जानवर खड्डे म्ह गिर जावै सै, उसी तरियां ये माणस भी परमेसवर की ओइ तै दण्ड पावेंगे। 10 उनकी आँख आँधी हो जावै ताके वो देख नही पावै, अर वे सारी हाण मुसीबतां म्ह फसे रहवै।” 11 तो मै पृच्छू सूँ, के यहूदी लोग ठोक्कर खाण के कारण सदा कै खात्तर नाश होगे? नही! बिलकुल नही! पर उनके अबिश्वास के कारण गैर यहूदियाँ ताहीं उद्धार मिल्या, ताके इस्राएल के माणसां के जळण होवै। 12 ज्यांतै जै उनका अबिश्वास दुनिया की गैर यहूदियाँ के खात्तर भलाई का कारण बणै, तो इस्राएल के माणसां का परमेसवर के धोरे बोहड़ के आणा और भी आच्छा क्यूँ नही होगा। 13 मै थम दुसरी जात्तां तै ये बात कहूँ सूँ। जब के मै गैर यहूदियाँ के खात्तर प्रेरित सूँ, तो मै अपनी सेवा की बड़ाई करूँ सूँ, 14 ताके किसे तरियां तै मै अपने कुण्बे आळे माणसां म्ह जळण पैदा करवा के उन म्ह तै एक-आधै का उद्धार कराऊँ। 15 क्यूँके जिब इस्राएली माणसां का छोड़ दिया जाणा, गैर यहूदियाँ का परमेसवर के साथ मेळ-मिलाप का कारण होया। तो उनका मसीह ताहीं अपणया जाणा, इसा होगा, जिसा किसे माणस का मुर्दा म्ह तै जिन्दा जाणा। 16 मै थमनै एक उदाहरण देऊँ सूँ, यो यहूदी माणसां का रिवाज सै, जिब हम चून गुंधा सां, तो उस म्ह तै पैहले रोटी का एक पेड़ा परमेसवर के खात्तर लिकाड़ा सां, तो पूरा गुन्धा होया चून भी परमेसवर के खात्तर सै, उससे तरियां जिस तरियां जड़ परमेसवर की सै, तो डाळी भी उससे की सै। 17 इस्राएल के माणस जैतून की डाळी की तरियां सै अर पिता अब्राहम, इसहाक अर याकूब पेड़ की जड़ की तरियां सै, पर जै कुछ डाळी तोड़ दी गई, अर तू जंगळी जैतून होकै उन म्ह कलम करया गया, अर यहूदी माणसां ताहीं मिलण आळी आशीष का फायदा थारे ताहीं भी होया, जिसा जैतून के पेड़ की डाळी पेड़ की जड़ तै रस हासिल करै सै। 18 तो थम यो घमण्ड ना करियो, के थम उन कटी होई डाळियाँ तै बढ़िया सां, यो याद राक्खों के

थम जड़ नै कोनी पर, जड़ थमनै सम्भाळै सै। 19 फेर थम बोल सकों सां के “परमेसवर पेड़ तै टुट्टी होए डाळियाँ की तरियां थमनै छोड़ देगा।” ताके गैर यहूदियाँ ताहीं अपणाले, जो के उन डाळियाँ की तरियां सै जो कलम करके लगाई गई सै। 20 यो सच सै के वे तो अबिश्वास के कारण तोड़ी गई, पर तू बिश्वास तै बणया रहवै सै ज्यांतै घमण्डी ना होवै, पर भय मान, 21 क्यूँके जिब परमेसवर नै खुद की डाळियाँ पै दया नही करी तो वो थारे पै भी दया नही करैगा। 22 ज्यांतै परमेसवर की दया अर कठोरता नै देख! जो अबिश्वासी माणसां खात्तर कठोरता अर थारे खात्तर दया सै, जै थम असलियत म्ह उसकी दया की हद म्ह नही बणे रहवेंगे, तो थारे ताहीं भी काट के अलग कर दिया जावेगा। 23 यहूदी लोग भी जै बिश्वास करणा शरू करदे, तो दुबारा तै लगा दिए जावेंगे, क्यूँके परमेसवर उन ताहीं फेर छांग सकै सै। 24 एक जंगळी डाळी खात्तर एक आच्छे पेड़ का हिस्सा बणणा कुदरती नही सै, अर जो यहूदी कोनी जंगळी जैतून के पेड़ की डाळी की तरियां सै, जो के एक आच्छे जैतून के पेड़ म्ह लगाई गई सै, पर यहूदी एक डाळी की तरियां सै जो आच्छे पेड़ तै उगै सै, पक्के तौर पै वे अपने पेड़ म्ह शामिल हो सकै सै। 25 हे बिश्वासी भाईयो, मै नही चाहन्दा के थम इस भेद तै अनजाण रहों, इसा ना हो के थम अपने-आप पै घमण्ड करण लागगों, जिब तक गैर यहूदी परमेसवर के धोरे ना आवै सै, तब तक इस्राएल के कुछ माणस सख्त बणे रहवेंगे। 26 अर इसके बाद सारे इस्राएल के माणस उद्धार पावेंगे। जिसा पवित्र ग्रन्थ म्ह लिख्या सै, “छुटाण आळा यरुशलेम तै आवैगा, अर अभगति नै याकूब के वंश तै दूर करैगा। 27 अर उनके गेल्या मेरा यो करार होगा, जिब मै उनके पापां नै माफ कर दिऊँगा।” 28 यहूदी लोग परमेसवर के दुश्मन बणगे थे, क्यूँके वे उस सुसमाचार पै बिश्वास करणा नही चाहन्दे, यो थारे खात्तर फायदेमन्द होया, पर परमेसवर उनतै प्यार करै सै, क्यूँके उसनै अपने खात्तर उन ताहीं चुण्या सै, योए वो वादा सै जो उसनै म्हारे पूर्वजां तै करया था। 29 क्यूँके परमेसवर अपने वरदान्नां तै, अर बुलाहट तै कदे भी पाच्छै कोनी हटदा। 30 एक बखत था जिब थम गैर यहूदियाँ नै परमेसवर ताहीं ठुकरा दिया था, पर इब इस्राएल के माणसां नै परमेसवर ताहीं ठुकरा दिया, इस कारण थारे पै दया दिखाई गई। 31 थारे पै दया दिखाण के कारण उनपै भी दया दिखाई जावेगी। 32 क्यूँके सारे माणसां नै परमेसवर के हुकम का उलंघण करया सै, योए कारण सै के परमेसवर उनके गैल कैदियाँ की ढाळ बरताव करै सै, वो इस करके इसा करै सै के सब माणसां पै दया हो सकै। (Ephes 1:6) 33 ओह! किसा अपार सै परमेसवर की बुद्धि अर ज्ञान का भण्डार! कितने महान् सै उसके फैसले! अर किसा रहस्यमयी सै उसके काम करण का तरिककां! 34 “भला कौण जाण सकै सै परमेसवर के मन नै? या कौण उसका सलाहकार होया सै? 35 या किसनै परमेसवर ताहीं कुछ दिया सै, जिसका बदला उस ताहीं दिया जावै?” इसा कोए कोनी। 36 क्यूँके सब कुछ उससे कै कान्ही तै आवै

सै, अर उससे नै सब कुछ बणाया सै अर सब कुछ उससे का सै। उसकी महिमा युगानुयुग होन्दी रहवै आमीन। (aiōn g165)

12 ज्यांतै हे विश्वासी भाईयो, मै थारे तै परमेसवर की दया याद दुवाके बिनती करुँ सुं, के अपनी जिन्दगी ताहीं जिन्दा, पवित्र अर परमेसवर ताहीं भान्दा होया बलिदान करके चढ़ाओ। योए परमेसवर की सेवा करण का सही तरिककां सै। 2 इस दुनिया के माणसां बरगे ना बणो, पर परमेसवर थारी सोच नै बदलै, अर थारा चाल-चलण भी बदलता जावै, जिसतै थम परमेसवर की भली, अर आच्छी लागण आळी, अर सिध्द इच्छा अनुभव तै बेरा पाड़ सको। (aiōn g165) 3 क्यूँके मै उस अनुग्रह के कारण जो मेरे ताहीं मिल्या सै, थारे म्ह तै हरेक तै कहुँ सुं, के जिंसा समझणा चाहिये, उसतै बढ़के कोए भी अपणे-आपनै ना समझै। पर इसकी बजाए सदबुध्दी राखके, जिंसा परमेसवर नै जितना बिश्वास थारे ताहीं दिया सै उसके मुताबिक अपणे-आपनै समझो। 4 क्यूँके जिंसा म्हारी एक देह म्ह घण-ए अंग सै, अर सारे अंग का एके काम कोनी। 5 इस्से तरियां हम जो मसीह म्ह बिश्वास करा सां, हम उसके देह के कुछ अंग बणगे सां, अर हम दुसरे तै जुड़े होए सां। 6 जिब के उस अनुग्रह कै मुताबिक जो परमेसवर नै म्हारे ताहीं दिया सै, हमनै न्यारे-न्यारे वरदान मिले सै। तो जिंसा ताहीं परमेसवर नै भविष्यवाणी का दान दिया सै, वो उन ए बात्तां नै बोल्लै जो उसनै बिश्वास दिलाते हो के ये परमेसवर की ओड़ तै सै। 7 जै दुसरयां की सेवा करण का दान मिल्या हो, तो सेवा म्ह लाग्या रहवै, जै कोए सिखाण आळा हो, तो सिखाण म्ह लाग्या रहवै। 8 जो उत्साहित करण आळा हो, वो उत्साहित करण म्ह लाग्या रहवै, दान देण आळा हो उदारता तै देवै, जो अगुवाई करै, वो जोश तै करै, जो दया करै, वो खुशी तै करै। 9 प्यार करण का दिखावा ना करो, बुराई तै नफरत करो, भलाई म्ह उत्सुक रहो। 10 एक-दुसरे तै इस तरियां प्यार करो, जणु एक ए परिवार के हो, आप्पस म्ह एक-दुसरे का बढ़-चढ़के आदर करो। 11 कड़ी मेहनत करो अर आलसी ना बणो, आत्मिक जोश तै भरे रहो। प्रभु की सेवा पूरे मन तै करदे रहो। 12 आस म्ह खुश रहो, क्लेश म्ह धीरज धरो, प्रार्थना म्ह सारी हाण लागे रहो। 13 पवित्र माणसां ताहीं जो किमे जरूरी हो, उस म्ह उनकी मदद करो, अर अजनबी माणसां की सदा सेवा-पाणी म्ह लागे रहो। 14 अपणे सताण आळा ताहीं आशीष द्यो, आशीष दो श्राप ना द्यो। 15 आनन्द करण आळा कै गेल्या आनन्द करो, अर रोण आळा कै गेल्या रोओ। 16 जिंसा तरियां थम अपनी परवाह करो सों, उससे तरियां दुसरयां की परवाह करो, खुद पै घमण्ड ना करो, पर दीन-दुखियाँ कै गेल्या संगति राख्खो, अपनी नजर म्ह अकलमंद ना होवो। 17 बुराई कै बदले किसे तै बुराई ना करो, जो बात सारे माणसां कै लोवै आच्छी सै, उनकी फिक्र करया करो। 18 जित्त ताहीं हो सके, थम पूरे मन तै सारे माणसां कै गेल्या मेळ-मिलाप राख्खो। 19 हे प्यारे विश्वासी भाईयो, बदला ना लियो, पर परमेसवर ताहीं बदला लेण का मौक्का द्यो, क्यूँके पवित्र ग्रन्थ म्ह लिख्या सै, “बदला लेणा मेरा काम सै, प्रभु कहवै सै मै ए

बदला ल्यूँगा।” 20 पर वचन यो भी कहवै “जै तेरा बैरी भूक्खा हो तो उस ताहीं खाणा खुवा, जै तिसाया हो तो उस ताहीं पाणी पिला, क्यूँके तेरे इसा करण तै वो खुद शर्मिन्दा हो जावैगा।” 21 बुराई तै ना जीत हासिल करो, पर भलाई तै बुराई नै जीत ल्यो।

13 हरेक माणस शासन करण आळे अधिकारियां के अधीन रहवै, क्यूँके सारे अधिकार परमेसवर की ओड़ तै आवै सै, अर जो अधिकार सै, वे परमेसवर नै बणाये सै। 2 ज्यांतै जो कोए भी माणस उन माणसां का पालन करण तै इन्कार करै सै, जिनके थारे शासन करण की शक्ति सै, तो वो परमेसवर की विधि का बिरोध करै सै, अर बिरोध करण आळे दण्ड पावेंगें। 3 क्यूँके हाकिम आच्छे काम के न्ही, पर भुन्डे काम कै खातर डर का कारण सै। जै तू हाकिम तै बिना डरे रहणा चाहवै सै, तो आच्छा काम कर, ताके उसकी ओड़ तै तेरी बड़ाई हो। 4 क्यूँके वो तेरी भलाई कै खातर परमेसवर का सेवक सै। परन्तु जै तू बुराई करै, तो डर, क्यूँके उसनै दण्ड देण का हक सै, अर वो परमेसवर का सेवक सै ताके उसके छो कै मुताबिक भुन्डे काम करण आळे ताहीं सजा देवै। 5 ज्यांतै थम उनके अधीन रहों ना सिर्फ उसके दण्ड तै बचण खातर बल्के साफ अन्तरात्मा राक्खण खातर भी। 6 ज्यांतै चुंगी भी द्यो क्यूँके शासन करण आळे परमेसवर के सेवक सै अर सारी हाण उस फर्ज नै पूरा करण म्ह लागे रहवें सै। 7 ज्यांतै हरेक का हक चुकाया करो, जिंसा ताहीं चुंगी देणी चाहिये, उस ताहीं चुंगी देओ, कर देण आळे ताहीं कर देओ, जिंसतै डरणा चाहिये, उसतै डरो, जिंसाका आदर-मान करणा चाहिये, उसका आदर-मान करो। 8 एक ए चीज सै जिंसके थमनै कर्जदार होणा चाहिए, वो सै थारा आप्पस म्ह प्यार, क्यूँके जो एक-दुसरे तै प्यार करै सै, उससे नै परमेसवर के नियम-कायदा ताहीं पूरा करया सै। 9 क्यूँके, मूसा नबी के नियम-कायदा म्ह भोत-से हुकम सै, “जारी ना करणा, खून ना करणा, चोरी ना करणा, लालच ना करणा,” अर इन्ने छोड़ और कोए भी हुकम हो, तो सारया का निचोड़ इस एक हुकम म्ह पाया जावै सै, “अपणे पड़ोसी तै अपणे जिंसा प्यार करो।” 10 प्यार पड़ोसी की कुछ बुराई कोनी करदा, जो प्यार करै सै, वो परमेसवर के नियम-कायदा नै पूरा करै सै। 11 आप्पस म्ह हरेक नै एक-दुसरे तै प्यार करते रहणा चाहिए, क्यूँके वो बखत आवै सै, के जिब परमेसवर हमनै इस बुरी दुनिया तै छुड़ावैगा, जिब हमनै पैहली बार मसीह म्ह बिश्वास करया था, तब तै इब वो बखत धारै आ लिया सै, तो थारे ताहीं नींद तै जागणा चाहिए अर सावधान रहणा चाहिए। 12 दुनिया म्ह रहण का म्हारा बखत लगभग एक रात की ढाळ सै, जो खतम होण आळी सै, अर मसीह के बोहड़ण आळा बखत भोत लवै सै, ज्यांतै हमनै अन्धकार के काम्मां नै छोड़के, चाँदणे की ढाळ आच्छे काम करणे चाहिए, जो बुराई का बिरोध करण म्ह म्हारे हथियार बणै सके। 13 आओ! हम खुद नै सही तरिकके तै चलाणा शरु करा, जो उन माणसां की तरियां सै जो चाँदणे म्ह रहवै सै, पर अँधरे म्ह रहण आळे माणसां की ढाळ ना बणो जो भोग-विलास, दारूबाजी, जारी,

लुचपण, रोळे अर जळण करण जिसा काम करै सै। 14 बल्के प्रभु यीशु मसीह ताहीं कवच बणा के पैहर ल्यो, अर देह की पापी अभिलाषायां नै पूरा करण का उपाय ना करो।

14 जो माणस बिश्वास म्ह कमजोर सै, उस ताहीं अपणी संगति म्ह ले ल्यो, पर उस ताहीं के करणा चाहिए के न्ही करणा चाहिए इस बारे में बहस ना करो। 2 एक नै बिश्वास सै, के सारा कुछ खाणा सही सै, पर जो बिश्वास म्ह कमजोर सै वो साग-पात ए खावै सै। 3 अर माँस-मच्छी खाण आळे साग-पात खाण आळे ताहीं तुच्छ ना जाणै, अर ना साग-पात खाणआळा, माँस-मच्छी खाणआळे पै दोष लावै, क्यूँके परमेसवर नै दौनुआ ताहीं अपणाया सै। 4 तू कौण सै जो दुसरे के नौक्कर पै दोष लावै सै? पर उसकी कामयाबी या नाकामयाबी उसके माल्लिक के ए हाथ्यां म्ह सै, बल्के वो कामयाब ए कर दिया जावैगा, क्यूँके प्रभु उस ताहीं कामयाब कर सके सै। 5 इस तरियां कई माणस तो एक दिन नै दुसरे तै बाध मान्ने सै, अर कई माणस सारे दिनां नै एक जिसा जाणै सै, इस तरियां तै हरेक अपणे ए मन म्ह, इस बात नै पक्का कर लेवै जो वो सोचवै सै वोए सही सै। 6 जो कोए किसे दिन नै बाध मान्ने सै, वो प्रभु नै आदर मान देण खात्तर मान्ने सै। जो कोए माँस-मच्छी खावै सै, वो प्रभु नै आदर मान देण खात्तर खावै सै, क्यूँके वो परमेसवर का धन्यवाद करै सै, अर जो साग-पात खावै सै, क्यूँके वो प्रभु नै आदर मान देण खात्तर खावै अर परमेसवर का धन्यवाद करै सै। 7 क्यूँके हम सारे प्रभु के सां। म्हारै म्ह तै ना तो कोए अपणे खात्तर जिन्दा सै, अर ना कोए अपणे खात्तर मरै सै, पर परमेसवर ताहीं खुश करण खात्तर करै सै। 8 जै हम जिवां सां, तो प्रभु के खात्तर जिवां सां, अर जै मरा सां, तो प्रभु के खात्तर ए मरा सां, हम जिवां या मरा, हम प्रभु ए के सां। 9 क्यूँके मसीह यीशु इस्से खात्तर मरा अर मुर्दा म्ह तै जिन्दा भी हो गया के वो मरे होया अर जिन्द्यां का, दोनुआं का प्रभु होवै। 10 तू अपणे बिश्वासी भाई पै क्यातै दोष लावै सै? या फेर क्यातै अपणे बिश्वासी भाई नै तुच्छ जाणै सै? परमेसवर हम सारा का न्याय करैगा। 11 क्यूँके पवित्र ग्रन्थ म्ह लिख्या सै, “प्रभु कहवै सै, मेरे जीवन की कसम, के हरेक घुटना मेरे स्याम्ही टिकैगा, अर हरेक कोए अपणी जुबान तै मनै परमेसवर मान लेवैगा।” 12 ज्यांतै म्हारै म्ह तै हरेक नै अपणे-अपणे काम का लेक्खा परमेसवर ताहीं देणा पड़ेगा। 13 इस खात्तर आगै तै हम एक-दुसरे पै दोष न्ही लावांगे, पर थम या ठान ल्यो के कोए अपणे बिश्वासी भाई के स्याम्ही पाप करण की बजह ना बणै। 14 मनै बेरा सै अर प्रभु यीशु म्ह मनै पक्का यकिन होया सै, के कोए खाण-पीण की चीज अपणे-आप तै अशुद्ध कोनी, पर जो उस ताहीं अशुद्ध समझै सै, उसके खात्तर अशुद्ध सै। 15 जै तेरा बिश्वासी भाई तेरे खाणे के कारण दुखी होवै सै, तो फेर तू मसीह की प्यार की रीत पै न्ही चाल्दा, जिसके खात्तर मसीह मरा, तेरे खाणे की बजह तै तेरा बिश्वासी भाई मसीह तै पाछै ना हटै। 16 इस करके जै तू अपणी नजर म्ह बढ़िया काम करै सै, पर दुसरा उसनै बुरा मान्ने सै तो उसनै ना करै। 17 क्यूँके परमेसवर का

राज्य खाणा-पीणा कोनी, पर धार्मिकता अर मेळ-मिलाप म्ह ए खुशी सै, जो पवित्र आत्मा तै मिलै सै। 18 जो कोए इस तरियां तै मसीह की सेवा करै सै, इसतै परमेसवर खुश होवै सै, अर माणसां म्ह भी उसकी तारीफ होवै सै। 19 ज्यांतै हम उन काम्मां म्ह लागे रहां जिनतै मेळ-मिलाप अर शान्ति होवै, अर एक-दुसरे का बिश्वास मजबूत होवै। 20 खाणे के खात्तर परमेसवर का काम ना बिगाड़ै। सारी ढाळ का खाणा शुद्ध सै, पर उस माणस के खात्तर पाप करण की बजह ना बणो, जिस ताहीं उसके खाणे तै ठेस लागे सै। 21 भला तो यो सै के तू ना माँस-मच्छी खा अर ना अंगूर का रस पी, ना और किमे इसा करै जिसतै तेरे बिश्वासी भाई के बिश्वास नै ठेस लागे। 22 जै तू बिश्वास करै के तू सही करै सै, तो इन बातां नै अपणे ए अर परमेसवर के बीच म्ह राख। धन्य सै वो जो उस बात म्ह, जिस ताहीं वो सही समझै सै, अपणे-आपनै कसूरवार न्ही समझदे। 23 पर इब थारे मन म्ह शक सै, के खाणा सै अर के न्ही खाणा अर फेर भी खा ल्यो सो, तो पाप करो सों। क्यूँके थम अपणे बिश्वास के मुताबिक न्ही करते अर जै थम इसा काम करो सों, जिसपै थमनै बिश्वास सै, वो काम गलत सै, तो वो पाप सै।

15 हो सके सै के हम जो बिश्वास म्ह मजबूत सां, हम जाणा सां के इन बातां तै कोए फर्क न्ही पड़ता, हम इस खात्तर यो काम न्ही करते के हम अपणे-आपनै खुश कर सका, हमनै उन माणसां का डर अर शंका का भी ध्यान करणा सै, के जो यो सोचवै सै के हम गलत सां। 2 म्हारै म्ह तै हरेक नै अपणे बिश्वासी भाई के साथ भले काम करणे चाहिए, जो उसनै खुश करै अर उस ताहीं बिश्वास म्ह मजबूत बणाए राक्खै। 3 क्यूँके मसीह नै अपणे-आप ताहीं खुश कोनी करया, पर जिसा पवित्र ग्रन्थ म्ह लिख्या सै, “तेरी बुराई करण आळा नै मेरी बुराई करी सै।” 4 जितनी बात पैहल्या तै पवित्र ग्रन्थ म्ह लिक्खी गई, वे म्हारी ए सिखाण के खात्तर लिक्खी गई सै, ताके हम धीरज अर उत्साह जो म्हारे ताहीं पवित्र ग्रन्थ देवै सै, उसके जरिये हमनै आस मिलै। 5 मै प्रार्थना करूँ सूँ के धीरज अर उत्साह का दात्ता परमेसवर, थमनै यीशु मसीह की तरियां जीवन बिताण अर एक-दुसरां के साथ शान्ति तै रहण म्ह मदद करै। 6 ताके थम सब कठ्ठे होके म्हारै परमेसवर प्रभु यीशु मसीह के पिता की महिमा करो। 7 इस करके एक-दुसरे नै अपणाओ जिसा मसीह नै थारे ताहीं अपणाया सै, यो इस खात्तर करो के माणस परमेसवर की जै-जै कार करै। 8 ज्यांतै मै कहूँ सूँ के जो वादे म्हारे पूर्वजां ताहीं दिए गये थे, उन वादा नै मजबूत करण खात्तर मसीह, परमेसवर की सच्चाई साबित करण खात्तर मसीह, यहूदी माणसां का सेवक बणया। 9 अर गैर यहूदी भी परमेसवर की दया के कारण उसकी महिमा करै, जिसा पवित्र ग्रन्थ म्ह लिख्या सै, “ज्यांतै मै गैर यहूदी माणसां म्ह तेरा धन्यवाद करूँगा, अर तेरे नाम के भजन गाऊँगा।” 10 फेर कहा सै, “हे गैर यहूदी माणसां, परमेसवर की प्रजा के गैल आनन्द करो।” 11 अर फेर पवित्र ग्रन्थ कहवै सै, “हे गैर यहूदी माणसां, प्रभु की जय-जयकार करो, अर हे राज्य-राज्य के सारे माणसां, उसकी बड़ाई

करो।” 12 अर यशायह नबी पवित्र ग्रन्थ म्ह कहवै सै, “यिशै के वंश तै एक बेटा पैदा होगा, अर सारी जातां पै राज करैगा, वो गैर यहूदी माणसां नै बचावैगा।” 13 मै प्रार्थना करूँ सूँ, के परमेसवर जो आस का दाता सै, थारे ताहीं बिश्वास करण म्ह सारी तरियां के आनन्द अर शान्ति तै भरपूर करै, के पवित्र आत्मा की सामर्थ तै थारी आस बधती जावै। 14 हे मेरे बिश्वासी भाईयो, मै अपणे-आप थारे बारे म्ह पक्का जाणूँ सूँ, के थम भी आप ए भलाई तै भरे होए सों, अर थमनै बेरा होणा चाहिए के थमनै के करणा चाहिए, अर एक-दुसरे नै सीखा भी सको सों। 15 तोभी मन्नै कई बातां के बारे म्ह थारे ताहीं जो हिम्मत करके लिख्या। यो उस अनुग्रह कै कारण होया जो परमेसवर नै मेरे ताहीं दिया सै, 16 के मै गैर यहूदियाँ के खात्तर मसीह यीशु का सेवक होके परमेसवर कै सुसमाचार की सेवा याजक के ढाळ करूँ, ताके गैर यहूदियाँ ताहीं परमेसवर खात्तर भेट के रूप म्ह दे सकूँ, जिसके साथ वो खुश होवै सै, जिन ताहीं पवित्र आत्मा नै पवित्र माणस बना दिया। 17 ज्यांतै मै यीशु मसीह के कारण ए परमेसवर की सेवा पै गर्व कर सकूँ सूँ। 18 क्यूँके मै हिम्मत कै गैल सिर्फ उन बातां बारे म्ह जिक्र करणा चाहूँ सूँ, जो मसीह नै मेरे ताहीं करण के काबिल बनाया, ताके जो मन्नै कद्दा अर करया सै उसके जरिये गैर यहूदी माणस परमेसवर का हुकम मन्नै। 19 पवित्र आत्मा के जरिये दी गई शक्ति तै मै अद्भुत चिन्ह-चमत्कार करूँ सूँ, इस कारण जित भी मै यरुशलेम नगर तै लेके चौगरदेके इल्लुरिकुम परदेस तक गया, ओड़ै मन्नै सारया ताहीं यीशु मसीह का सुसमाचार सुणाया। 20 पर मेरे मन की इच्छा या सै के जित्त-जित्त मसीह यीशु का नाम न्ही लिया गया, ओड़ैए सुसमाचार सुणाऊँ, अर उस मकान बनाण आळे मिस्रि की ढाळ ना होऊँ जो दुसरे की नीम पै घर बनावै सै। 21 पर जिसा पवित्र ग्रन्थ म्ह लिख्या सै मै उस ताहीं पूरा करणा चाहूँ सूँ, “जिनके धोरे यीशु मसीह का सुसमाचार न्ही पोंहच्या, वैए देखेंगें, अर जिन नै न्ही सुणा वैए समझेंगें।” 22 ज्यांतै मै थारे धोरे आण तै बार-बार रुक्या रहया। 23 पर इब यरुशलेम नगर अर इल्लुरिकुम परदेस म्ह मन्नै माणसां ताहीं परमेसवर का वचन सुणा दिया सै, जिननै यीशु मसीह के बारे म्ह सुणया ए न्ही था, अर इब मै थारे तै आके मिलूँगा, जिसकी लालसा मन्नै घणे साल्लां तै थी। 24 ज्यांतै जिब मै स्पेन देश म्ह जाऊँगा, तो थारे धोरे होंदा होया जाऊँगा, क्यूँके मन्नै उम्मीद सै के उस सफर म्ह थारे तै भेंट होवैगी, अर जिब थारी संगति तै मेरा जी खुश हो जावै, तो थम मेरी स्पेन देश जाण म्ह मदद कर दिओ। 25 पर इब तो मै यरुशलेम नगर म्ह जाऊँ सूँ ताके ओड़ै परमेसवर के पवित्र माणसां नै दान दे सकूँ। 26 क्यूँके मकिदुनिया अर अखाया परदेस के माणसां नै यो आच्छा लाग्या के यरुशलेम नगर के गरीब माणसां के खात्तर कुछ दान कट्टा करै। 27 उननै आच्छा तो लाग्या, पर वे यरुशलेमवासियों के कर्जदार भी सै, क्यूँके यहूदियाँ नै गैर यहूदियाँ के साथ परमेसवर की आत्मिक बातां का साँझा करया सै, यो सही सै गैर यहूदियाँ की दुनियावी चिज्जां नै यहूदियाँ के गैल साँझा करै। 28 ज्यांतै मै यरुशलेम

नगर म्ह जाण लागरया सूँ, ताके वो दान दे सकूँ, जो मन्नै कट्टा करया सै, उसके बाद थारे तै रोम देश म्ह मिलके स्पेन देश म्ह जाऊँगा। 29 अर मन्नै बेरा सै के जिब मै थारे धोरे आऊँगा, तो मै मसीह की आशीष नै थारे साथ साँझा करूँगा। 30 हे बिश्वासी भाईयो, म्हारै प्रभु यीशु मसीह म्ह बिश्वास के कारण अर जो पवित्र आत्मा नै म्हारे ताहीं जो प्यार दिया सै मै थारे तै बिनती करूँ सूँ, के मेरे खात्तर अर मेरे साथ मन तै परमेसवर तै प्रार्थना करो 31 ताके मै यहूदिया परदेस के अबिश्वासियाँ तै बचा रहूँ, अर जो दान मै यरुशलेम नगर म्ह लेके जाण लागरया सूँ, वो परमेसवर के पवित्र माणसां खात्तर खुशी का कारण बणै। 32 अर मै परमेसवर की मर्जी तै थारे धोरे आनन्द के गैल आके थारे गेल्या आराम पाऊँ। 33 मै प्रार्थना करूँ सूँ, शान्ति का दाता परमेसवर थारे सारया के गेल्या रहवै। आमीन।

16 मै थारे तै फिबे के खात्तर जो म्हारी बिश्वासी भाण अर किंखिया नगर की कलीसिया की सेविका सै, मै चाहूँ सूँ के थम उसका आदर करो। 2 थम यो जाणके उसका इसा स्वागत करो जिसा थम परमेसवर के पवित्र माणसां का करो सों, अर जिस किसे बात म्ह उस ताहीं थारी जरूरत होवै, उसकी मदद करो, क्यूँके वा भी घणखरयां की बल्के मेरी भी उपकार करण आळी रही सै। 3 प्रिसकिल्ला बिश्वासी भाण अर उसके धणी अक्विला नै जो मसीह यीशु म्ह मेरे गैल काम करणीये सै, उन ताहीं मेरा नमस्कार। 4 उननै मेरे प्राण कै खात्तर अपणा ए जीवन जोख्खम म्ह गेर दिया था, अर सिर्फ मै ए न्ही, बल्के गैर यहूदियाँ की सारी कलीसिया भी उनका धन्यवाद करै सै। 5 अर उस कलीसिया नै भी नमस्कार जो उनके घर म्ह कट्टा होवै सै। मेरे प्यारे भाई इपैनिटुस नै, जिसनै आसिया म्ह सब तै पैहले मसीह पै बिश्वास करया, उस ताहीं भी मेरा नमस्कार। 6 बिश्वासी भाण मरियम ताहीं, जिसनै थारे खात्तर घणी मेहनत करी, नमस्कार। 7 बिश्वासी भाई अन्दुनीकुस अर उसकी भाण यूनियास नै जो मेरे यहूदी साथी सै, जो मेरे गेल्या कैद होए थे अर प्रेरितां म्ह बड़ा नाम्मी सै, अर मेरे तै पैहल्या मसीह म्ह आए थे, नमस्कार। 8 बिश्वासी भाई अम्पलियातुस नै, जो प्रभु मसीह म्ह मेरा प्यारा सै, नमस्कार। 9 बिश्वासी भाई उरबानुस नै, जो मसीह म्ह म्हारा गैल काम करणीया सै, अर मेरे प्यारे बिश्वासी भाई इस्तखुस नै नमस्कार। 10 बिश्वासी भाई अपिल्लेस नै जो मसीह म्ह खरयां लिकड़या, नमस्कार। बिश्वासी भाई अरिस्तुबलुस के कुणबे नै नमस्कार। 11 मेरे बिश्वासी साथी हेरोदियोन नै नमस्कार। बिश्वासी भाई नरकीस्सुस का कुणबे के जो माणस परमेसवर पै बिश्वास करै सै, उन ताहीं नमस्कार। 12 त्रुफेना अर त्रुफोसा बिश्वासी भाणां नै जो प्रभु म्ह मेहनत करै सै, नमस्कार। प्यारी बिश्वासी भाण पिरसिस नै, जिसनै प्रभु म्ह घणी मेहनत करी, नमस्कार। 13 बिश्वासी भाई रूफुस नै जो प्रभु नै अपणा होण खात्तर चुणया सै, अर उसकी माँ नै, जो मेरी भी माँ के समान सै, दोनुआ नै, नमस्कार। 14 बिश्वासी भाई अंसुकितुस,

फिलगोन, हिर्मेस, पत्रुबास, हर्मास अर उनके साथ के सारे विश्वासी भाईयों नै, नमस्कार। 15 विश्वासी भाई फिलुलुगुस, यूलिया अर नेर्युस अर उसकी बेब्बे, अर विश्वासी भाई उलुम्पास अर उनके साथ के सारे पवित्र माणसां नै नमस्कार। 16 आप्पस म्ह एक-दुसरे ताहीं गळे मिलकै प्यार तै नमस्कार करो। थारे ताहीं मसीह की सारी कलीसियाओं की ओड़ तै नमस्कार। 17 इब हे विश्वासी भाईयो, मै थारे तै बिनती करूँ सूँ, के जो माणस उस सच्ची शिक्षा कै उल्ट जो थमनै मिली सै, अर उन माणसां नै जो फूट गेरण अर ठेस लागण का कारण बणै सै, उननै ताड़ लिया करो अर उनतै दूर रहो। 18 क्यूँके इसे माणस म्हारै प्रभु मसीह के न्ही, पर अपणी ए इच्छा पूरी करै सै, अर चिकणी-चुपड़ी बात्तां तै सीधे-सादे माणसां नै भका देवें सै। 19 थारा, परमेसवर के हुकम मानण का जिक्र सारे माणसां म्ह फैल गया सै, ज्यांतै म्ह थारे बारे म्ह आनन्द करूँ सूँ, पर मै न्यू चाहूँ सूँ के थम भलाई कै खात्तर अकलमंद, पर बुराई कै खात्तर भोळे बणे रहो। 20 शान्ति का परमेसवर शैतान की शक्तियाँ नै खतम करके, थारे अधीन कर देवैगा। म्हारै प्रभु यीशु मसीह का अनुग्रह थारे पै होंदा रहवै। 21 मेरे गैल काम करणीया विश्वासी भाई तीमुथियुस का, अर मेरे कुणबे आळे भाई लूकियुस, यासोन अर सोसिपत्रुस का थारे ताहीं नमस्कार। 22 मै तिरतियुस जो पौलुस की चिट्ठी लिखण म्ह मदद करण लागरया सूँ, मेरा प्रभु म्ह थारे ताहीं नमस्कार। 23 विश्वासी भाई गयुस भी थारे ताहीं नमस्कार करै सै मै इब उसके घर म्ह रहण लागरया सूँ, जित्त कलीसिया कट्टी हो सै। विश्वासी भाई इरास्तुस जो नगर का भण्डारी सै, अर भाई क्वारतुस का भी थारे ताहीं नमस्कार। 24 मै प्रार्थना करूँ सूँ के म्हारै प्रभु मसीह का अनुग्रह थारे पै होंदा रहवै। 25 इब जो मन्नै थारे ताहीं सुसमाचार सुणाया सै, यानिके यीशु मसीह कै संदेश कै प्रचार कै मुताबिक जो थमनै विश्वास म्ह मजबूत कर सकै सै, उस भेद कै प्रकाशन कै मुताबिक जो पुराणे बखत तै लुहक्या रहया। (aiōnios g166) 26 पर इब जाहिर होकै, सनातन परमेसवर कै हुकम तै, अर नबियाँ की किताबां के जरिये गैर यहूदियाँ ताहीं बताया गया सै, ताके वे भी विश्वास करके हुकम मानणआळे हो जावै, (aiōnios g166) 27 यीशु मसीह के जरिये उस एकमात्र बुद्धिमान परमेसवर की युगानुयुग महिमा होन्दी रहवै। आमीन। (aiōn g165)

1 कुरिन्थियों

1 या चिट्ठी पौलुस की ओड़ तै सै, जो परमेसवर की इच्छा तै प्रभु यीशु मसीह का प्रेरित होण के खात्तर बुलाया गया अर बिश्वासी भाई सोस्थिनेस भी मेरे गैल सै। 2 मै या चिट्ठी परमेसवर की उस कलीसिया के माणसां ताहीं लिखूँ सूँ, जो कुरिन्थुस नगर म्ह सै, अर जिन ताहीं परमेसवर नै मसीह यीशु म्ह अपणे खात्तर अलग तै छौँट के राक्खे सै, अर उसनै म्हारे ताहीं अपणे पवित्र माणस होण के खात्तर बुलाया सै, अर उन सारया के नाम भी जो हरेक जगहां म्हारे अर अपणे प्रभु यीशु मसीह की सेवकाई करै सै। 3 हम प्रार्थना करां सां, के म्हारे पिता परमेसवर अर प्रभु यीशु मसीह की ओड़ तै थमनै अनुग्रह अर शान्ति मिल्दी रहवै। 4 मै थारे बारे म्ह अपणे परमेसवर का सारी हाण धन्यवाद करूँ सूँ, क्यूँके मसीह यीशु म्ह परमेसवर का अनुग्रह जो थारे पै होया सै, उसके कारण उसनै थारे ताहीं भोत सी आशीष दी सै। 5 थम मसीह यीशु म्ह सारी ढाळ तै सम्पन्न करे गये सों, उसनै थारे ताहीं हरेक ढाळ के आत्मिक वरदान दिए सै, ताके थम दुसरयां नै वचन का ज्ञान अर सुसमाचार सुणा सको। 6 जो खास काबलियत थारे ताहीं मिली सै, वा साबित करै सै, के मसीह यीशु के बारे जो सन्देस सै, वो सच्चा सै। 7 इस कारण जिब थम म्हारे प्रभु यीशु मसीह के बोहड़ण की बाट देखण लागरे सों, तो पवित्र आत्मा नै थारे ताहीं हरेक ढाळ के आत्मिक वरदान दिये सै। 8 परमेसवर थमनै आखिर ताहीं बिश्वास म्ह मजबूत करैगा, ताके थम म्हारे प्रभु यीशु मसीह के बोहड़ण के दिन म्ह बेकसूर ठहरो। 9 परमेसवर इसाए करैगा, क्यूँके जो वो कहवै सै, उसनै वो करण म्ह बिश्वास लायक सै, अर उसनै थारे ताहीं अपणे बेटे, अर म्हारे प्रभु यीशु मसीह की संगति म्ह बुलाया सै। 10 हे बिश्वासी भाईयो, जो प्रभु यीशु मसीह नै मेरे ताहीं हक दिया सै, उसके कारण मै थारे तै बिनती करूँ सूँ, के थम सारे एक-दुसरे तै सहमत रहो, थम एकता बणाए राक्खों ताके थारे म्ह फूट ना होवै, अर थम एक मत हो के आप्पस म्ह मिले रहो। 11 क्यूँके हे मेरे बिश्वासी भाईयो, खलोए के कुणबे के माणसां नै मेरे ताहीं थारे बारे म्ह बताया सै, के थारे म्ह झगड़ें होवै सै। 12 मेरे कहण का मतलब यो सै के, थारे म्ह तै कोए अपणे-आपनै पौलुस का, कोए अपुल्लोस का, कोए कैफा का, कोए मसीह का चेल्ला कहवै सै। 13 जो थम करो सों वो ठीक कोनी, के मसीह बट गया? के मै पौलुस थारे खात्तर क्रूस पै चढ़ाया गया? के थमनै मेरे नाम तै बपतिस्मा मिल्या? 14 मै परमेसवर का धन्यवाद करूँ सूँ, बिश्वासी भाई क्रिस्पुस अर गयुस नै छोड़, मन्ने थारे म्ह तै किसे ताहीं भी बपतिस्मा कोनी दिया। 15 कदे इसा ना हो के कोए थारे म्ह तै कहवै के थमनै मेरे नाम पै बपतिस्मा मिल्या सै। 16 अर हाँ, मन्ने स्तिफनास के कुणबे ताहीं भी बपतिस्मा दिया, इन्ने छोड़ मै न्ही जाण्दा के मन्ने और किसे ताहीं भी बपतिस्मा दिया। 17 क्यूँके मसीह नै मेरे ताहीं बपतिस्मा देण ताहीं न्ही, बल्के सुसमाचार सुणाण ताहीं भेज्या सै, अर मन्ने माणसां ताहीं सुसमाचार

चतुर विचार के मुताबिक कोनी सुणाया, इसा ना हो के मसीह के क्रूस पै मरण की कथा बेकार ठहरे। 18 क्यूँके क्रूस पै मसीह यीशु के मरण की कथा, नाश होण आळे माणसां के खात्तर बेकूफी सै, पर हम उद्धार पाण आळा के खात्तर परमेसवर की सामर्थ सै। 19 क्यूँके पवित्र ग्रन्थ म्ह परमेसवर नै कहाा सै, के “जो अपणे-आपने ज्ञानवान समझ सै, मै उननै दिखा दियूँगा के असलियत म्ह उनका ज्ञान बेकूफी तै भरया सै, अर वे बेकूफ सै।” 20 कित्त रहया ज्ञानी? कित्त रहया शास्त्री? कित्त रहया इस दुनिया का विवाद करण आळा? के परमेसवर नै दुनिया के ज्ञान ताहीं बेकूफी न्ही ठहराया? (aiōn g165) 21 क्यूँके परमेसवर नै यो आच्छा लाग्या के दुनिया के माणस अपणे ज्ञान के मुताबिक परमेसवर ताहीं न्ही जाण सकै, तो उसनै म्हारे जरिये सुसमाचार के प्रचार ताहीं इस्तमाल करया, ताके उन माणसां नै बचा सकै जिननै उसपै बिश्वास करया सै, पर कुछ लोगां नै इस ताहीं बेकूफी समझा। 22 यहूदी लोग ए इस ताहीं बेकूफी समझै सै, क्यूँके वे सुर्ग तै चिन्ह-चमत्कार की बातां नै ए सच मान्ने सै, अर यूनानी लोग ज्ञान की टोह म्ह रहवें सै। 23 पर हम तो उस क्रूस पै चढ़ाए होड़ मसीह का प्रचार करा सां, जो यहूदी लोगां के खात्तर ठोक्कर का कारण अर गैर यहूदियाँ के खात्तर बेकूफी सै। 24 पर जिन ताहीं परमेसवर नै बुलाया सै, के यहूदी लोग, के यूनानी लोग, योए मसीह यीशु परमेसवर का सामर्थ अर परमेसवर का ज्ञान सै। 25 क्यूँके जो परमेसवर की बेकूफी लागै सै, वो माणसां के ज्ञान तै ज्ञानवान सै, अर जो परमेसवर की कमजोरी लागै सै, वो माणसां की ताकत तै घणी ताकतवर सै। 26 हे बिश्वासी भाईयो, याद करो के थम किसे थे जिब परमेसवर नै थारे ताहीं बुलाया था, ना तो दुनिया के मुताबिक घणे ज्ञानवान, अर ना घणे सामर्थी, अर ना घणे आच्छे खानदान आळे थे। 27 बल्के परमेसवर नै दुनिया के बेकुफां ताहीं छौँट लिया सै के ज्ञानवानां ताहीं शर्मिन्दा करे, अर परमेसवर नै दुनिया के कमजोरां ताहीं छौँट लिया सै के ठाड्यां नै शर्मिन्दा करे। 28 अर परमेसवर नै उन माणसां ताहीं चुणया, जो दुनिया की निगाह म्ह नीच अर तुच्छ सै। इनके जरिये परमेसवर नै, जो घणे खास समझे जावै सै, उन ताहीं बेकार ठहरा दिया। 29 परमेसवर नै यो इस करके करया, ताके कोए प्राणी उसके स्याम्ही घमण्ड न्ही करण पावै। 30 परमेसवर के जरिये करे गये काम के नतिज्जें तै थम मसीह यीशु म्ह सो, जो परमेसवर की ओड़ तै म्हारे खात्तर ज्ञान, धार्मिकता, पवित्रता, अर छुटकारा बणगे। 31 ताके जिसा पवित्र ग्रन्थ म्ह लिख्या सै, उससे तरियां ए होवै, “जो घमण्ड करै वो प्रभु नै जो करया उसपै घमण्ड करै।”

2 हे बिश्वासी भाईयो, मै थारे धोरै बातां की चतुराई अर ना ए उत्तम ज्ञान का प्रदर्शन करण आया, बल्के मै थारे धोरै परमेसवर का सन्देस सुणाण आया था। 2 क्यूँके मन्ने यो ठान लिया था, के मै मसीह यीशु अर उसकी क्रूस की मृत्यु के अलावा, किसे और चीज के बारे म्ह थारे तै ना सुणु। 3 मै कमजोरी अर डरके गेल्या, घणा थरथराता होया थारे

गेल्या रहया। 4 अर मेरी शिक्षा, अर प्रचार म्ह ज्ञान की लुभाण आळी बात कोनी, पर पवित्र आत्मा नै सामर्थ्य रूप तै जाहिर करया सै, के जो सन्देश मन्ने थारे ताहीं सुणाया सै, वो सच्चा सै। 5 ज्यांतै के थारा बिश्वास माणसां के ज्ञान पै न्ही, पर परमेसवर की सामर्थ के आसरे हो। 6 फेर भी मै, जो बिश्वास म्ह मजबूत सै उन ताहीं, ज्ञान भरया सन्देश सुणाऊँ सूं, पर यो इस दुनिया का अर इस दुनिया के नाश होण आळे हाकिमां का ज्ञान कोनी। (aiōn g165) 7 पर जो ज्ञान हम सुणावां सां, वो परमेसवर का ज्ञान सै, जो छिप्या होया था, कोए भी उस ताहीं इब ताहीं न्ही समझ पाया था, परमेसवर नै दुनिया बणाण तै पैहले ए यो फैसला कर लिया था, के उसका ज्ञान म्हारे खात्तर महिमा लेके आवेगा। (aiōn g165) 8 परमेसवर की योजना ताहीं इस दुनिया के हाकिमां म्ह तै कोए न्ही जाण पाया, क्यूँके जै वे जाणदे तो तेजोमय प्रभु ताहीं क्रूस पै कोनी चढ़ान्दे। (aiōn g165) 9 जिसा पवित्र ग्रन्थ म्ह लिख्या सै, “जो कदे आँखां तै देख्या कोनी गया, अर कान तै सुण्या कोन्या गया, अर जो बात माणसां के चित्त म्ह कोनी चढ़ी, वे सारी बात परमेसवर नै उन खात्तर तैयार करी जो उसतै प्यार करै सै।” 10 पर परमेसवर नै उन बात्तां ताहीं अपणे पवित्र आत्मा के जरिये म्हारे पै जाहिर करया, क्यूँके पवित्र आत्मा सारी बात, बल्के परमेसवर की गहरी बात्तां नै भी जाँच्ये सै। 11 माणसां म्ह तै कौण किसे माणस की बात्तां नै जाणै सै, सिर्फ माणस की आत्मा जो उस म्ह सै? उससे तरियां ए परमेसवर की बात्तां नै भी कोए न्ही जाणदा, सिर्फ परमेसवर की आत्मा। 12 पर परमेसवर नै म्हारे ताहीं अपणा आत्मा दिया सै, अर हम इसा न्ही सोचते जो दुनिया के लोग सोच्ये सै, इस करके हम उन आशीषां नै पिच्छाण सका सां जो परमेसवर नै म्हारे ताहीं मुफ्त म्ह दी सै। 13 अर हम ये बात थारे ताहीं बतावां सां, हम माणसां के ज्ञान की सिखाई होइ बात्तां नै न्ही, पर पवित्र आत्मा की सिखाई होइ बात्तां नै आत्मिक माणसां ताहीं सिखावा सां। 14 पर शारीरिक माणस परमेसवर के आत्मा की बात अपणांदा कोनी, क्यूँके वे उसकी निगां म्ह बेकूपी की बात सै, अर ना वो उन ताहीं जाण सकै सै क्यूँके उनकी जाँच आत्मिक तरियां तै होवै सै। 15 आत्मिक माणस सारा किमे जाँच्ये सै, पर वो दुसरयां के जरिये जाँचया न्ही जान्दा। 16 यो सच सै, क्यूँके पवित्र ग्रन्थ म्ह लिख्या से, के कोए भी न्ही जाणता के प्रभु के मन म्ह के सै? पर हम बिश्वासी माणस जाणा सां के मसीह के मन म्ह के सै।

3 हे बिश्वासी भाईयो, जिब मै थारे साथ था तो थारे ताहीं आत्मिक बात न्ही सीखा पाया, जिस तरियां मै आत्मिक माणसां नै सिखाऊँ सूं, पर मन्ने थारे तै दुनियावी माणसां की तरियां बात करी, क्यूँके थम मसीह म्ह इब भी बाळक के समान सों। 2 मन्ने थारे ताहीं परमेसवर के सुसमाचार की शुरुआती शिक्षा ए सिखाई, जिस तरियां कोए इन्सान छोट्टे बाळक नै दूध पियावै सै, अर मन्ने थारे ताहीं वचन की गहरी बात न्ही सिखाई जो की रोटी की तरियां सै, क्यूँके थम इब्बे उस ताहीं अपणा न्ही सकदे। 3 क्यूँके इब ताहीं थम दुनियावी माणसां के पापी सुभाव के

मुताबिक जीवन जिओ सों। ज्यांतै के इब भी थारे म्ह जळण अर झगड़े सै, तो के थम दुनियावी माणसां की तरियां कोनी? थम उन माणसां की तरियां सों जो परमेसवर के कोनी। 4 क्यूँके जिब एक माणस कहवै सै, “मै पौलुस का चेल्ला सूं,” अर दुसरा कहवै सै, “मै अपुल्लोस का चेल्ला सूं,” तो के थम दुनियावी माणस की तरियां कोनी? 5 अपुल्लोस कौण सै? अर पौलुस कौण सै? सिर्फ सेवक, जिनके जरिये थमनै मसीह म्ह बिश्वास करया। हम सब नै वोए काम करया जो म्हारे ताहीं प्रभु नै दिया। 6 यो उस पौधे की ढाळ सै, जो मन्ने लगाया, अपुल्लोस नै सींचा, अर परमेसवर नै बढ़ाया। 7 ज्यांतै ना तो लाणआळा किमे सै अर ना सींच्यण आळा, पर परमेसवर ए सारा किमे सै जो बढ़ाण आळा सै। 8 पौधा लगाण आळा अर उस ताहीं सींच्यण आळा दोनुआ का एकके मकसद सै, पर हरेक माणस अपणी ए मेहनत के मुताबिक अपणी ए मजदूरी पावेगा। 9 क्यूँके हम परमेसवर के गैल काम करणीये सां, अर थम परमेसवर की खेती अर उस घर की ढाळ सों जिस ताहीं परमेसवर बणाण लाग रह्या सै। 10 परमेसवर नै जो वरदान मेरे ताहीं दिए सै, तो मन्ने एक अकलमंद चिगाई आळे मिस्त्री की तरियां घर की नीम थरी, अर दुसरा उसपै रद्दा धरै सै। पर हरेक माणस चौककस रहवै के वो उसपै किसा रद्दा धरै सै। 11 क्यूँके जो नीम थरी सै, वा यीशु मसीह सै, कोए दुसरी नीम कोनी धर सकदा। 12 जै सेवक परमेसवर की सच्ची शिक्षा सिखावै सै, जो परमेसवर नै उस ताहीं दी सै, तो वो उस राज मिस्त्री की ढाळ सै, जो उस नीम पै आच्छे समान तै, जुकर सोन्ना, चाँदी, बेसकिमती पत्थर के जरिये, नीम पै घर बणावै सै, अर जै वो झूठी शिक्षा नै सिखावै सै, तो वो उसकी ढाळ सै, जो लाकड़ी, घास-फूस तै नीम पै घर बणावै सै। 13 तो हरेक माणस अपणे काम नै देखवैगा के उसनै किसा काम करया सै, क्यूँके यीशु मसीह जाहिर कर देवैगा जिब वो बोहड़ के आवैगा, यो उस दिन की तरियां होगा जिब वो समान आग म्ह डाला जावैगा तो वो देखवैगा के किसनै किसा काम करया सै, फेर वो फैसला करैगा के किसनै आच्छा अर किसनै बुरा काम करया सै। 14 जिस किसे का बणाया गया घर उस नीम पै डटया रहवैगा, तो वोए उसकी मजदूरी पावेगा। 15 जै मसीह तय करै के जो काम करया सै वो सही कोनी तो मसीह उस काम करण आळे नै मजदूरी न्ही देवैगा, पर वो अनन्त जिन्दगी नै न्ही खोवैगा जो परमेसवर नै उस ताहीं दी सै। 16 के थमनै न्ही बेरा के थम परमेसवर के मन्दर सो, अर परमेसवर की आत्मा थारे म्ह वास करै सै? 17 जै कोए परमेसवर के मन्दर नै नाश करैगा, तो परमेसवर उसनै नाश करैगा, क्यूँके परमेसवर का मन्दर पवित्र सै, अर वो थम सो। 18 धोक्खे म्ह ना रहों, जै थारे म्ह तै कोए यो सोच बेट्टे के वो दुनियावी बात्तां के मुताबिक अकलमंद सै, तो ठीक तो यो होगा के वो खुद नै बेकूप बणाले ताके अकलमंद बण जावै। (aiōn g165) 19 क्यूँके इस दुनिया का ज्ञान परमेसवर की नजर म्ह बेकूपी सै, जिसा पवित्र ग्रन्थ म्ह लिख्या सै, “वो ज्ञानियाँ ताहीं उनकी श्याणपत म्ह फँसा देवै सै।” 20 अर यो भी लिख्या सै, के “प्रभु ज्ञानियाँ के विचारां नै जाणै सै,

के वो बेकार सै।” 21 ज्यांतै माणसां पै कोए घमण्ड ना करै, क्यूँके सारा किमे थारा सै। 22 के पौलुस, के अपुल्लोस, के केफा, के दुनिया, के जीवन, के मरण, के वर्तमान, के भविष्य, सारा किमे थारा सै, 23 अर थम मसीह के सो, अर मसीह परमेसवर का सै।

4 माणस हमनै मसीह के सेवक अर परमेसवर के भेदां के भण्डारी समझै, जो माणसां नै परमेसवर का भेद समझावै सै। 2 फेर उरै भण्डारी म्ह या बात देखी जावै सै, के वो बिश्वास कै जोग्गा हो। 3 पर मेरी निगांह म्ह या घणी छोटी बात सै, के थम या माणसां का कोए न्यायाधीश मननै परखै, बल्के मै खुद अपने-आप ताहीं कोनी परखदा। 4 क्यूँके मेरा मन मेरे ताहीं किसे बात म्ह कसूरवार कोनी ठहरान्दा, इस म्ह मै बेकसूर कोनी ठहरदा, पर मेरा परखण आळा प्रभु सै। 5 ज्यांतै जिब ताहीं प्रभु का आणा ना हो, कोए किसे नै परखै ना, वो माणसां के विचारां नै साफ-साफ जाहिर कर देगा, अर वो माणसां के मनां के मकसद नै दिखावैगा, फेर परमेसवर की ओड़ तै हरेक की बड़ाई होवैगी। 6 हे बिश्वासी भाईयो, मननै अपना अर अपुल्लोस का जिक्र उदाहरण के तौर पै करया सै, यो बताण खातर के मै थारे ताहीं के कहणा चाहूँ सूँ, जै थम उसपै ध्यान करो, जो पवित्र ग्रन्थ म्ह लिख्या सै, अर उसतै आगुँ ना बढ़ो, इसा ना हो के थम एक माणस का पक्ष ल्यो, अर दुसरे का अपमान करो। 7 थारे ताहीं कौण कहवै सै, के थम दुसरयां तै उत्तम हो? हर काबलियत थमनै परमेसवर की ओड़ तै मिली सै, अर सब कुछ परमेसवर के जरिये दिया गया सै, तो थमनै घमण्ड करण का कोए हक कोनी? 8 थम सोचो सों के थारे धौरै पवित्र आत्मा के सारे वरदान सै, जो माणसां ताहीं दिए जावै सै, थम यो सोच्यों सों के म्हारे बिना सहयोग के थम राजा बणगे सो, अर थम साहूकार भी बण लिए सो, पर आच्छा तो यो होंदा के थम असलियत म्ह ए राजा बणे होन्दे, अर हम भी थारे गेल्या राज करदे। 9 परमेसवर नै हम प्रेरितां ताहीं सारया तै आखरी जगहां पै राख्या सै। हम उन माणसां की तरियां सां, जिनकी मौत का हुकम हो लिया सै, क्यूँके हम सुर्गदूतां अर दुनिया के माणसां कै खातर एक तमाशा बणे सां। 10 माणस हमनै बेकूफ समझै सै, क्यूँके हम मसीह का प्रचार करया सां। थम या सोच्यों सों के थम अकलमंद सों, क्यूँके मसीह कै गैल थारा रिश्ता सै। भोत सारे माणस या सोचवै सै के प्रेरित होण का म्हारे धौरै अधिकार कोनी, पर थम घमण्ड तै कहो सों, के थारे धौरै परमेसवर की शक्ति सै। माणस म्हारा न्ही थारा आदर करै सै। 11 हम आज तक भूक्खे-प्यारसे मार खावां सां, अर पाट्टे-पुराणे लत्यां म्ह रहवां सां, अर ना ए म्हारे घर-बार सै। 12 अर अपने ए हाथ्यां तै काम करके मेहनत करा सां। माणस म्हारे ताहीं बुरा कहवै सै, हम आशीष देवां सां, वे सतावै सै, हम सहण करा सां। 13 वे बदनाम करै सै, हम प्यार तै बोल्ला सां। आज भी दुनिया के माणस म्हारा आदर कोनी करते, क्यूँके वे न्यू समझै सै के हम बेकार के माणस सां। 14 मै थमनै शर्मिन्दा करण के खातर ये बात कोनी लिखदा, मेरा मकसद यो सै के मै थमनै सुधाार क्यूँके थम मेरे उन प्यारे बाळकां की ढाळ सों, जिनतै मै

प्यार करूँ सूँ। 15 जै मसीह म्ह थारे सिखाण आळे दस हजार भी होन्दे, तोभी थारे पिता घणे कोनी, क्यूँके मसीह यीशु म्ह थारे ताहीं सुसमाचार सुणाण कै कारण मै थारा पिता बणग्या। 16 मै थारे तै बिनती करूँ सूँ के मेरे जिसा जीवन जिओ। 17 इस करके मननै तीमुथियुस ताहीं जो प्रभु म्ह मेरा प्यारा अर बिश्वास कै जोग्गा बेटा सै, थारे धौरै भेज्या सै। वो थमनै मसीह यीशु म्ह मेरा चाल-चलण याद करवावैगा, जिस तरियां के हरेक जगहां मै हरेक कलीसिया म्ह उपदेश देऊँ सूँ। 18 थारे म्ह तै घणखरे तो यो सोचवै सै, के मै थमनै दुबारा मिलण कोनी आऊँगा, इस करके वे घमण्डी होगे सै। 19 पर प्रभु नै चाह्या तो मै थारे धौरै तावळा-ए आऊँगा, अर देखूँगा के ये घमण्डी माणस सिर्फ बणावटी बात करै सै, या इनके धौरै परमेसवर की सामर्थ सै। 20 क्यूँके परमेसवर का राज्य बातां म्ह न्ही पर परमेसवर की सामर्थ के साथ जीण म्ह सै। 21 थम के चाहो सों, जो मै थारे गैल करूँ? जै थम अपना बुरा सुभाव न्ही छोड़ोगे तो मै सखताई तै थारे गैल पेश आऊँ, अर जै बुरा सुभाव छोड़ दोगे तो मै प्यार अर नरमाई तै थारे धौरै आऊँगा।

5 कई माणसां नै थारे बारे म्ह बताया सै, के कलीसिया म्ह कई माणस सै जो जारी करै सै, बल्के इसी जारी जो अबिश्वासी माणसां म्ह भी कोनी होन्दी, के एक माणस अपनी सौतेल्ली माँ गैल गलत सम्बन्ध राक्खै सै। 2 कलीसिया के माणसां नै इस बात तै दुखी अर उदास होणा चाहिए, जिननै इसा काम करया सै, उननै कलीसिया तै काढ देणा चाहिए, पर थम तो इसी बातां पै घमण्ड करो सों। 3 भलाए मै थारे तै दूर था, पर इसा मान्णो, जणु मै आत्मा म्ह थारे धौरै था, अर इसा पाप करण आळे माणस के बारे म्ह मेरा योए हुकम सै। 4 थमनै यो करणा चाहिए, के जिब थम बिश्वासी भाई कट्टे होओ सों, तो यो याद राक्खों के यीशु मसीह का अधिकार थारे धौरै सै, अर इसा मान्णो जणु मै आत्मा म्ह थारे साथ सूँ। जिब परमेसवर का सामर्थ थारे साथ हो, 5 तब वो माणस जो पाप करण लागरया सै, उस ताहीं कलीसिया तै लिकाड़ द्यो, अर उस ताहीं शैतान के हाथ म्ह सौंप द्यो। ताके वो अपने पापां खातर माफी माँग ले, अर वो आदमी माफी माँग ले सै, तो वो उस दिन बच जावैगा, जिस दिन प्रभु यीशु मसीह बोहड़के आवैगा। 6 थारा घमण्ड करणा आच्छा कोनी, के थमनै न्ही बेरा के माड़ा-सा खमीर पूरे गुन्दे होए आटे ताहीं खमीर बणा देवै सै। उस्से तरियां जै एक माणस पाप करदा रहवै तो उस ताहीं देखके और माणस भी पाप करणा शरु कर देंगे। 7 जिस तरियां यहूदी माणस फसह का त्यौहार मनाण तै पैहले, अपने घर तै खमीर काढ देवै सै, उस्से तरियां थम उस जार माणस नै अपने टोळ म्ह तै लिकाड़ द्यो, तो थम वो बिश्वासियां का टोळ बण जाओगे, जिन म्ह कोए भी जाण-बुझ के पाप करण आळा न्ही होगा, अर परमेसवर थारे मन नै भित्तर तै साफ करैगा, जै थम मसीह पै बिश्वास करोंगे, क्यूँके मसीह म्हारे खातर मरया ताके हमनै पापां तै आजाद करदे, वो उस भेड़ की ढाळ सै, जिस ताहीं यहूदी लोग फसह के त्यौहार पै बलिदान करै सै। 8 तो आओ, हम फसह का त्यौहार मनावां, ना तो पुराणे खमीर तै,

ना बुराई अर दुष्टता कै खमीर तै, बल्के खराई अर सच्चाई की अखमीरी रोटी तै। जिसका मतलब यो सै, के जिस तरियां थम बिश्वासी बणण तै पैहले जिओ थे, उस तरियां जीणा छोड़के मसीह कै पाच्छे चालणा शरु कर द्यो, ताके थारे मनां म्ह कोए बुराई ना रह पावै। 9 मन्नै अपणी पैहले की चिट्ठी म्ह यो लिख्या था, के जारी करणीया की संगति ना करियो। 10 मेरा मतलब यो कोनी, के थम जमाए इस दुनिया के जारी, लालची, अन्धेर या मूर्तिपूजा करण आळे माणसां तै कोए सम्बन्ध ना राखियो, क्यूँके इस तरियां के माणसां तै बचण खात्तर तो थमने दुनिया ए छोड़णी पड़ेगी। 11 पर मेरा कहणा यो सै के जै कोए भाई बिश्वासी कुह्लकै, जार, लालची, मूर्तिपूजा करणीये, गाळी देण आळा, दारूबाज, या अन्धेर करणीया हो, तो उसकी संगति मतना करियो, बल्के इसे माणस कै गेल्या खाणा भी ना खाईयो। 12 अबिश्वासी माणसां का न्याय भला मै क्यूँ करूँ? मन्नै दुसरयां तै के काम? पर या जिम्मेदारी थारी सै के थम उनकी बारीकी तै जाँच करो, जो कलीसिया म्ह सै। 13 जिसा के पवित्र ग्रन्थ कहवै सै, के अबिश्वासी माणसां का न्याय परमेसवर करै सै। ज्यांतै उस बुरे काम करणीये ताहीं अपणे बिचाळे तै लिकाड़ द्यो।

6 जै थारे म्ह किसे का दुसरे बिश्वासी गैल झगड़ा हो जावै, तो अपणा फैसला परमेसवर के पवित्र माणसां कै धोरे ले जाओ, ना के उस न्यायाधीश कै धोरे जो के अबिश्वासी सै। 2 के थमने बेरा कोनी के दुनिया का न्याय पवित्र माणस करैगें? ज्यांतै जिब थमने दुनिया के माणसां का न्याय करणा सै, तो के थम छोट्या तै छोट्टे झगड्या का भी फैसला करण जोगे कोनी? 3 के थमने न्ही बेरा के हम सुर्गदूतां का न्याय करागें? तो उसकी बराबरी म्ह ये दुनियावी झगड़े के सै? 4 जै थारे बीच दुनियावी झगड़े सै, तो फैसला करण खात्तर उननै ए बिठाओगे, जो कलीसिया म्ह किमे कोनी समझे जावै सै? 5 मै थमने शर्मिन्दा करण कै खात्तर न्यू कहूँ सूं। के साच्च ए थारे म्ह एक भी अकलमंद न्ही मिलदा, जो अपणे बिश्वासी भाईयाँ के बीच होए झगड़े नै सुलझा सकै? 6 पर याडै तो एक बिश्वासी भाई दुसरे बिश्वासी भाई नै कचेह्डी म्ह घसीटै सै, अर वो भी अबिश्वासी माणसां कै स्याम्ही। 7 पर सच म्ह ए थारे म्ह मुकदमे चाल्लण लागरे सै, तो थम मसीह के माणस कोनी, इसकी बजाए थम खुद ए अन्याय अर अपणा नुकसान क्यांतै न्ही सहन्दे? 8 पर थम तो खुदे अन्याय करो सों, अर नुकसान पोहोचाओ सो, अर वो भी दुसरे बिश्वासी भाईयाँ ताहीं। 9 के थमने न्ही बेरा के जुल्मी माणस परमेसवर के राज्य के वारिस न्ही होवैगें? धोक्खा ना खाओ, बेश्या कै धोरे जाणीए, मूर्ति पूजणीये, बिगान्नी लुगाई कै धोरे जाणीए, लुच्चे, माणसां कै गेल्या कुकर्म करणीये, 10 चोर, लालची, दारूबाज, गाळी देणीये अर अन्धेर करणीये परमेसवर के राज्य के वारिस न्ही होवैगें। 11 अर थारे म्ह तै कई इसेए थे, पर प्रभु यीशु मसीह कै नाम तै अर म्हारै परमेसवर के आत्मा तै थारे पाप धोए गये, अर पवित्र अर धर्मी बणे। 12 थम कह सको सों, के मै कुछ भी करण खात्तर आजाद सूं, पर मै कहूँ सूं, के सारी चीज मेरे फायदे की कोनी, जिब के मै सब कुछ कर

सकूँ सूं, पर मै किसे चीज का गुलाम कोनी। 13 थम कह सको सों, के “खाणा पेट के खात्तर, अर पेट खाणे के खात्तर सै,” यो सच सै, पर परमेसवर पेट अर खाणे नै दोनुआ ताहीं नाश करैगा। उस्से तरियां देह जारी कै खात्तर कोनी, बल्के प्रभु की महिमा खात्तर सै, अर प्रभु देह का रुखाळिया सै। 14 इस्से तरियां म्हारी देह भी महत्वपूर्ण सै, क्यूँके जिस तरियां परमेसवर नै अपणी सामर्थ तै प्रभु यीशु ताहीं जिन्दा करया, अर वो म्हारै ताहीं भी जिन्दा करैगा। 15 के थमने बेरा सै के थारी देह मसीह का अंग सै? तो के मै मसीह के अंग लेके उन ताहीं बेश्या के संग जोड़ दूँ? कदे भी न्ही। 16 के थमने न्ही बेरा के जो कोए बेश्या तै संगति करै सै, वो उसके गेल्या एक तन हो जावै सै, क्यूँके पवित्र ग्रन्थ म्ह लिख्या सै, “वे दोन्नु एक तन होवैगें।” 17 अर जो प्रभु की संगति म्ह रहवै सै, उसकी अर परमेसवर की आत्मा एक हो जावै सै। 18 जारी तै बचे रहो। और दुसरा कोए पाप म्हारे देह पै असर कोनी गैरे जितना के जारी, पर जारी करणीया अपणी ए देह कै खिलाफ पाप करै सै। 19 के थमने न्ही बेरा के थारी देह पवित्र आत्मा का मन्दर सै, जो थारे म्ह बस्या होया सै, अर थारे ताहीं परमेसवर की ओड़ तै मिल्या सै, अर थम परमेसवर के सो। 20 क्यूँके थम दाम देकै मोल लिये गये सो, ज्यांतै अपणी देह कै जरिये परमेसवर की महिमा करो।

7 उन बात्तां कै बारे म्ह जो थमने मेरे ताहीं चिट्ठी म्ह पूछी थी, के यो ठीक सै, के माणस ब्याह ना करै। 2 क्यूँके भोत सारे माणस जारी करै सै, इस करके हरेक माणस जारी तै बचण खात्तर ब्याह करले, अर धणी-बीर एक-दुसरे के प्रति वफादार हो। 3 पति अपणी पत्नी की शारीरिक इच्छा पूरी करै, अर उस्से तरियां ए पत्नी भी अपणे पति की शारीरिक इच्छा पूरी करै। 4 पत्नी का अपणी देह पै हक कोन्या पर उसके पति का हक सै, उस्से तरियां ए पति नै भी अपणी देह पै हक कोनी, पर पत्नी का सै। 5 थम एक-दुसरे तै न्यारे ना रहो, पर सिर्फ कुछ बखत खात्तर आप्स म्ह सलाह करके प्रार्थना कै खात्तर बखत लिकाड़ो, अर फेर एक साथ रहो, इसा ना हो के थारे असंयम के कारण शैतान थमने इम्तिहान म्ह फँसा ले। 6 पर मेरा यो सुझाव सै, ना के आज्ञा। 7 मेरा तो यो सुझाव सै, के जिसा मै अकेल्ला सूं, उस्से तरियां ए सारे माणस भी अकेल्ले रहै। हरेक माणस ताहीं परमेसवर की ओड़ तै एक तरियां का उपहार मिला सै, किसे ताहीं ब्याह का, अर किसे ताहीं एक्ला रहण का। 8 अविवाहितां अर बिधवायां के बारे म्ह मेरी या सलाह सै, के उनके खात्तर एक्ला रहणा ठीक सै, जिसा मै सूं। 9 पर जै वे खुद पै काबू ना राख सकै, तो ब्याह करै, क्यूँके ब्याह करणा वासना म्ह जळण तै भला सै। 10 जिनका ब्याह होगया सै, उन ताहीं मै न्ही, बल्के प्रभु यीशु हुकम देवै सै, के पत्नी अपणे पति तै तलाक ना देवै 11 जै तलाक हो भी जावै, तो पत्नी बिना दुसरा ब्याह करे रहवै, या पत्नी अपणे पति तै दुबारा मेल कर लेवै, अर पति अपणी पत्नी नै तलाक ना दे। 12 दुसरयां तै, प्रभु यीशु मसीह न्ही पर मै ए कहूँ सूं, जै किसे भाई

की पत्नी विश्वास ना राखदी हो अर उसके गेल्या रहण म्ह राज्जी हो, तो वो उस ताहीं तलाक ना देवै। 13 जिस बिरबान्नी का धणी विश्वास ना राखदा हो, अर उसके गेल्या रहण म्ह राज्जी हो, तो वा धणी नै तलाक ना देवै। 14 बिश्वासी पत्नी होण के कारण अबिश्वासी पति ताहीं भी परमेसवर अपणे ए लोग मान्ने सै, क्यूँके उसकी पत्नी बिश्वासी सै, इस्से तरियां जै बिश्वासी पति हो तो उसके कारण अबिश्वासी पत्नी ताहीं भी परमेसवर अपणे ए लोग मान्ने सै, क्यूँके उसका पति बिश्वासी सै, जै यो सच न्ही होन्दा तो थारा अबिश्वासी पति या पत्नी परमेसवर के न्ही कुहान्दे, अर थारे बाळ-बच्चे भी परमेसवर के न्ही कुहान्दे, पर इब वे परमेसवर के कुहान्दे सै। 15 पर जो माणस बिश्वास कोनी राखदा, अर जै वो तलाक देणा चाहवै, तो उस ताहीं तलाक देण द्यो, इसी दशा म्ह बिश्वासी भाई या भाण ब्याह के बन्धन तै आजाद हो जावै सै। क्यूँके परमेसवर नै म्हारे ताहीं मेळ-मिलाप के खात्तर बुलाया सै। 16 क्यूँके हे बिरबान्नी, तू के जाणे सै के तू अपणे धणी का उद्धार करा लेवैगी? अर हे भले माणस, तू के जाणे सै के तू अपणी पत्नी का उद्धार करा लेवैगी? 17 परमेसवर नै जिस ताहीं जिस दशा म्ह राख्या सै, अर जिस रूप म्ह मसीह पै बिश्वास करण खात्तर बुलाया सै, वो उस्से म्ह बणया रहवै। मै सारी कलीसियां ताहीं योए सुझाव देऊँ सूँ। 18 जो यहूदी माणस परमेसवर पै बिश्वास करै सै, उस ताहीं खतने के निशान नै हटाण की जरूरत कोनी, अर जो गैर यहूदी माणस परमेसवर पै बिश्वास करै सै, उस ताहीं खतना करवाण की जरूरत कोनी। 19 इस बात तै कोए फर्क न्ही पड़ता के किसे माणस का खतना होया सै या कोनी होया, पर सब तै जरूरी बात या सै, के वो परमेसवर के हुकमां नै मान्ने। 20 हरेक माणस मसीह बणण तै पैहले जिस हालत म्ह बुलाया गया हो, उस्से हालत म्ह रहवै। 21 जै तू गुलाम की हालत म्ह बुलाया गया सै, तो फिक्र ना करै, पर जै तू आजाद हो सके, तो तू आजाद होण की कोशिश कर। 22 क्यूँके जो दास की हालत म्ह मसीह पै बिश्वास करण खात्तर बुलाया गया सै, वो मसीह का आजाद करया होया सै। उस्से तरियां ए जो आजादी की हालत म्ह बुलाया गया सै, वो मसीह का दास सै। 23 परमेसवर नै थम दाम देकै मोल लिये हो, इस करकै थम माणसां के दास न्ही, पर परमेसवर के दास बणो। 24 मै दुबारा तै कहूँ सूँ, हे बिश्वासी भाईयो, मसीह पै बिश्वास करण तै पैहले थम जिस हालत म्ह बुलाये गये थे, विवाहित या अविवाहित उस्से हालत म्ह परमेसवर कै गेल्या रहों। 25 अविवाहितां के बारे म्ह प्रभु का कोए हुकम मन्ने कोनी मिल्या, पर प्रभु नै दया करके मेरे ताहीं बुद्धि दी सै, जिसपै भरोस्सा करया जा सके सै, अर मै थमनै सलाह देऊँ सूँ। 26 मेरी समझ म्ह यो ठीक सै के आजकाल के क्लेश के कारण, जै माणस कुवारा सै, तो वो कुवारा ए रहवै। 27 जै तेरी पत्नी सै, तो उसनै तलाक देण की कोशिश ना करै, अर जै तेरे पत्नी कोन्या, तो अपणे खात्तर उसनै टोहवै ना। 28 पर जै तू ब्याह भी करै, तो पाप कोनी, अर जै कोए कुँवारी छोरी ब्याह करै सै, तो यो कोए पाप कोनी। हालाकि शादीशुदा माणस इस

दुनिया म्ह भोत सी परेशानियाँ का सामना करैंगे, अर मै चाहूँ सूँ के थम इन परेशानियाँ म्ह ना पड़ो। 29 हे बिश्वासी भाईयो, मेरा मतलब यो सै के मसीह के आण का बखत थोड़ा ए बाक्की रह गया सै, इस करकै आज तै या चिन्ता ना करो के थारी पत्नी सै या न्ही, पर परमेसवर की सेवा म्ह लाग्गे रहों। 30 रोण आळे, आनन्द करण आळे, अर चिज्जां नै मोल लेण आळे इन चिज्जां के बारे म्ह घणा ना सोचवै, क्यूँके इन सारी बात्तां की फिक्र थमनै परमेसवर की सेवा तै भटका देवैगी। 31 जो भी इस दुनिया म्ह सै, उननै अपणे खात्तर ज्यादा कीमती ना समझों, क्यूँके दुनिया की सारी चीज नाश हो जावैंगी। 32 मेरी इच्छा या सै के थम संसारिक जिन्दगी की अभिलाषा तै मुक्त रहों। कुँवारे माणस प्रभु की सेवा करण की फिक्र म्ह रहवै सै के प्रभु ताहीं किस तरियां खुश करै। 33 पर ब्याहता माणस दुनिया की चिज्जां की फिक्र म्ह रहवै सै, के अपणी पत्नी नै किस तरियां तै खुश करै। 34 कुँवारी अर ब्याहता बिरबान्नी म्ह भी फर्क सै, कुँवारी बिरबान्नी प्रभु की सेवा की फिक्र म्ह रहवै सै, अर वा देह अर आत्मा म्ह पवित्र रहण की कोशिश कर दी रहवै सै, पर ब्याहता बिरबान्नी दो बात्तां की फिक्र म्ह रहवै सै, के अपणे पति नै किस तरियां खुश राक्खूँ, अर परमेसवर नै किस तरियां खुश राक्खूँ। 35 मै या बात थारी ए भलाई खात्तर कहूँ सूँ, ना के थमनै फसाण के मारे, बल्के ज्यातै के जिसा शोभा देवै सै, उसाए करया जावै, के थम एक चित्त होकै प्रभु की सेवा म्ह लाग्गे रहो। 36 जै किसे पिता नै यो लाग्गे के मै अपणी कुँवारी बेटी के ब्याह म्ह देर करके उसके गैल अन्याय करूँ सूँ, क्यूँके उसकी उम्र ढळण लागरी सै, तो वो वोए करै जो उसनै ठीक लाग्गे सै, वो उसनै ब्याह करण दे, यो कोए पाप कोनी। 37 पर जिस पिता नै मन म्ह यो ठान लिया सै, के वो अपणी छोरी का ब्याह कोनी करै, तो उस ताहीं कोए उसका ब्याह करण खात्तर मजबूर ना करै, यो उसका हक सै जो वो चाहवै वोए करै, अर वो अपणी छोरी नै कुवारी ए राक्ख सके सै। 38 ज्यातै जो अपणी कुवारी छोरी का ब्याह कर देवै सै, तो वो सही करै सै, अर जो ब्याह न्ही करता, वो और भी सही करै सै। 39 बिरबान्नी जिब ताहीं धणी कै गैल बंधी रहवै सै, जिब ताहीं के उसका धणी जिन्दा सै, पर जै उसका धणी मर जावै तो जिसतै चाहवै वा ब्याह कर सके सै, पर वो परमेसवर पै बिश्वास करण आळा हो। 40 पर जै वा दुबारा ब्याह ना करै, तो मेरे विचार म्ह और भी ज्यादा सुखी सै, अर मै समझूँ सूँ, के परमेसवर का आत्मा मेरी अगुवाई करै सै।

8 थारी चिट्ठियाँ म्ह मूर्तियाँ के आग्रे चढ़ाई होइ चिज्जां के खाण के बारे म्ह थमनै पूछा था। हम सारया नै इस बात के बारे म्ह कुछ ज्ञान सै। ज्ञान म्हारे म्ह घमण्ड पैदा करै सै, पर प्यार तै बढ़ोतरी होवै सै, अर प्यार म्हारे ताहीं दुसरयां की मदद करणा सिखावै सै। 2 जै कोए समझै सै के वो सब कुछ जाणै सै, तो वो इब ताहीं यो कोनी जाणता के किस तरियां जाणणा चाहिये। 3 पर जै कोए परमेसवर तै प्यार करै सै, तो परमेसवर भी उस ताहीं जाणै सै। 4 मूर्तियाँ के स्याम्ही बलि करी होई चिज्जां कै खाण कै बारे म्ह हम जाणा सां, के दुनिया म्ह कोए भी मूर्ति

सच्चा परमेसवर कोनी, क्यूँके एकैए सच्चा परमेसवर सै। 5 फेर भी धरती अर अकास पै भोत सै, जिन ताहीं लोग ईश्वर अर देवता कहवै सै, पर म्हारे खात्तर तो एकैए परमेसवर सै। यानिके पिता जिसकी ओड़ तै सारी चीज सै, अर हम उससे कै खात्तर सां। एकैए प्रभु सै, यानिके यीशु मसीह जिसके जरिये सारी चीज बणाई गई, अर हम भी उससे के जरिये जिन्दे सां। 7 पर म्हारे कुछ बिश्वासी भाईयाँ नै इब ताहीं बेरा कोनी के मूर्तियाँ म्ह कोए शक्ति कोनी। क्यूँके वे पैहले मूर्तियाँ की पूजा करै थे, जिब वे मूर्तियाँ ताहीं दी गई बलि म्ह तै खावै सै, तो गलती तै इब भी मूर्तियाँ की पूजा करण म्ह शामिल सै, अर गलती तै सोचवै सै के उनै पाप कर दिया जिब वे मूर्ति के स्याम्ही चढ़ाई चीज खा लेवै सै। 8 खाणा हमनै परमेसवर के लोवै कोनी पोहोचान्दा। खाणा तै इन्कार करण तै परमेसवर म्हारे तै खुश नही होन्दा, अर ना ए खाणा म्हारे ताहीं परमेसवर की निगाह म्ह आच्छा बणादा। 9 पर सावधान! इसा ना होवै के थारी या आजादी कदे बिश्वास म्ह कमजोर लोगां खात्तर ठोक्कर का कारण हो जावै। 10 थम जाणो साँ के मूर्त असली देवता कोनी, अर थम मूरतां के मन्दर म्ह खाओ साँ, पर जो बिश्वास म्ह कमजोर आदमी थारे ताहीं ओड़ै खान्दे देखवै सै तो वो उत्साहित होवैगा, ताके मूर्ति के स्याम्ही बलि करया गया माँस वो खावै, जिब के उस ताहीं बेरा सै के यो पाप सै, जै वो इसा काम करै सै। 11 इस तरियां तै तेरे ज्ञान के कारण वो बिश्वास म्ह कमजोर भाई जिसके खात्तर मसीह मरया, मसीह म्ह बिश्वास करणा छोड़ देवैगा। 12 इस तरियां तै बिश्वासी भाईयाँ के खिलाफ अपराध करण तै अर उनकी कमजोर अन्तरात्मा ताहीं चोट पोहोचाण तै, थम मसीह के खिलाफ अपराध करो सो। 13 इस कारण जै मूर्तियाँ ताहीं दिया गया खाणा खाण तै दुसरे बिश्वासियाँ खात्तर बिश्वास छोड़ण का कारण बणै सै, तो मै उस तरियां का खाणा कदे नही खाऊँगा ताके दुसरे बिश्वासी भाई बिश्वास करणा ना छोड़ दे। (aiōn g165)

9 जो मै चाहूँ सूँ, वो सब कुछ करण खात्तर मै आजाद सूँ, मै प्रेरित सूँ। मन्ने म्हारे प्रभु यीशु ताहीं देख्या सै, थम प्रभु म्ह मेरी मेहनत का ईनाम साँ। 2 जै दुसरे माणस या नही मानते के मै प्रभु यीशु का प्रेरित सूँ, तो भाईयो थमनै बिश्वास करणा होगा, क्यूँके मै वो सूँ, जो थारे धोरे सुसमाचार लेकै आया। थारा प्रभु यीशु मसीह म्ह बिश्वास यो बतावै सै के मै प्रेरित सूँ। 3 जो माणस मेरे प्रेरित होण पै शक करै सै, उनके खात्तर योए मेरा जवाब सै। 4 बरनबास अर मेरे खात्तर, प्रेरित होण के कारण म्हारे ताहीं यो हक सै, के हम अपने काम के खात्तर थारे तै आर्थिक मदद ले सका सां। 5 के हमनै यो हक कोनी, के किसे मसीह भाण के गेल्या ब्याह करके उस ताहीं अपने गैल सफर म्ह लेकै जावां, जिसा दुसरे प्रेरित अर प्रभु का भाई याकूब, यहूदा अर पतरस करै सै। 6 मेरे अर बरनबास कै धोरे भी यो हक सै, के हम और प्रेरितां के स्याम्ही आर्थिक मदद हासिल करां अर म्हारे ताहीं जीण खात्तर कोए काम करण की जरूरत कोनी। 7 कौण सा फौज्जी अपने खर्च तै जंग लड़ै सै? कौण अंगूर का बाग लगाकै उसका फळ नही खान्दा? कौण भेङ्गां की

रुखाळी करके उनका दूध कोनी पीन्दा? 8 मै इन बात्तां नै सिर्फ माणस होण के नाते कोनी कहन्दा। मूसा नबी के नियम-कायदे भी योए कहवै सै, क्यूँके मूसा नबी के नियम-कायदे म्ह लिख्या सै, “नाज लिकाड़ते बखत चाल्दे होए बळ्ढा का मुँह ना बाँधियो।” के परमेसवर बळ्ढां की ए फिक्र करै सै? 10 यो खास करके म्हारे खात्तर कह्या गया सै, हाँ, म्हारे खात्तर ए लिख्या गया सै, क्यूँके यो जरूरी सै, के खेत बाहण आळा अर खलिहाण म्ह, भूसी तै नाज अलग करण आळा फसल का कुछ हिस्सा पाण खात्तर तो आस राक्खै ए गा। 11 हमनै परमेसवर के सुसमाचार का प्रचार थारे बीच म्ह करया। उस माणस की ढळ जो पौधे लगावै सै, हमनै थारे भित्तर परमेसवर के सन्देश ताहीं लगाया सै। इस करके यो म्हारा हक सै, के म्हारी आर्थिक जरूरतां के खात्तर हम थारी मदद हासिल करां। 12 थमनै दुसरे माणसां की भी आर्थिक मदद करी, जिननै थारे ताहीं सुसमाचार सुणाया था, बरनबास अर मै उनतै भी ज्यादा आर्थिक मदद पाण का हक राक्खां सां, हालाकि, म्हारे म्ह तै किसे नै भी जोर कोनी दिया के थम उन चिज्जां नै द्यो जिनकी हमनै जरूरत सै। बल्के हम सब कुछ सहण खात्तर तैयार सां, ताके हम किसे ताहीं भी मसीह के बारे म्ह सुसमाचार पै बिश्वास करण म्ह अडचन पैदा ना करा। 13 के थमनै नही बेरा के जो मन्दर म्ह काम करण आळे सै, वे मन्दर म्ह तै खाणा खावै सै? पर जो वेदी पै बलि चढ़ावै सै वे बलिदानां का हिस्सा लेवै सै? 14 इससे तरियां तै प्रभु नै भी ठहराया के जो माणस सुसमाचार सुणावै सै, उनकी जिन्दगी का गुजारा उन माणसां तै होणा चाहिए जो सुसमाचार सुणै सै। 15 पर मन्ने इन म्ह तै किसे भी अधिकार का इस्तमाल कोनी करया, अर ना ए मै इस मकसद तै लिखूँ सूँ, के मेरे खात्तर इसा कुछ करया जावै। बजाये इसके, के कोए मन्ने, मेरी इस बात के गर्व तै अलग करै। इसतै आच्छा मै मर जाणा समझूँगाँ। 16 जै मै सुसमाचार सुणाऊँ, तो इस म्ह मन्ने गर्व करण का कोए हक कोनी। या तो मेरे ताहीं सौप्पी गई जिम्मेदारी सै। जै मै सुसमाचार नही सुणाऊँ, तो मेरे पै धिक्कार सै! 17 जै मै यो काम करूँ सूँ, जो मन्ने अपनी मर्जी तै चुण्या सै, तो मेरे ताहीं एक ईनाम मिलैगा, अर जै या मेरी अपनी मर्जी कोनी, पर एक जिम्मेदारी सै, जो मेरे ताहीं परमेसवर की ओड़ तै मिली सै, तो मै किसे भी ईनाम की उम्मीद नही कर सकता। 18 तो मेरी कौण सी मजदूरी सै? या मेरी खुशी सै, के बिना भुगताण के मै सुसमाचार का प्रचार करण लागरया सूँ, मेरे धोरे खर्चा मांगण का भी हक सै। 19 इसका मतलब यो कोनी के मै माणसां का कहणा मान्नु, भलाए वे लोग मेरी आर्थिक मदद करै सै, पर मै इसके खात्तर मजबूर कोनी, फेर भी मै हरेक किसे का दास बणग्या सूँ, ताके उन ताहीं मसीह के धोरे ल्या सकूँ। 20 जिब मै यहूदी नियम-कायदा नै मानण आळा था, तो मै भी उन नियम-कायदा के अधीन था, मै यहूदी माणसां के खात्तर यहूदी बण्या, ताके यहूदी माणसां नै परमेसवर के धोरे ले आऊँ। भलाए मेरे ताहीं नियम-कायदे मानण की जरूरत कोनी, फेर भी मन्ने इसा करया, ताके मै उन ताहीं मसीह के धोरे ल्या सकूँ जो नियम-कायदा के अधीन सै।

21 इस्से तरियां जिब मै गैर यहूदी माणसां कै गैल काम करूँ सूँ, तो मै एक गैर यहूदी की तरियां रहूँ सूँ, जो यहूदी नियम-कायदा नै कोनी मानते, ताके मै उन ताहीं मसीह खातर जीत सकूँ। पर मन्नै बेरा था के मै परमेसवर के नियम-कायदा के बिना न्ही रहूँ था, क्यूँके मै मसीह के नियम-कायदा के अधीन सूँ। 22 जिब मै उन माणसां के गैल सूँ जिनका बिश्वास कमजोर सै, तो मै उनकी तरियां बरताव करूँ सूँ, ताके मेरी कोशिश के जरिये कुछ माणसां का उद्धार हो जावै। 23 मै यो सब कुछ सुसमाचार के खातर करूँ सूँ ताके उन आशीषां का हिस्सेदार बण सकूँ जिनका वादा सुसमाचार म्ह करया गया सै। 24 के थमनै न्ही बेरा के दौड़ म्ह तो भाज्जै सारे ए सै, पर ईनाम एक ए ले जावै सै? इस्से तरियां, हम सब नै वो करणा चाहिए जो हम परमेसवर ताहीं खुश करण के खातर कर सका सां ताके हम उस ईनाम नै पा सका जो परमेसवर आण आळे बखत म्ह देवैगा। 25 हरेक खिलाड़ी जो प्रतियोगिता म्ह भाग लेवै सै, कठोर संयम का पालन करै सै। वे तो एक (नाशवान) नाश होण आळे मुकुट नै पाण के मकसद तै यो सब करै सै, पर हम यो सब कुछ (अविनाशी) नाश ना होण आळे मुकुट नै पाण खातर करां सां। 26 इस करके जिसा दौड़ण आळा अपने मकसद के गैल दौड़ै सै, अर जिस तरियां मुक्केबाज अपने मुक्कयां नै अपने अधीन राक्खै सै, उस्से तरियां मै भी अपनी मसीह जिन्दगी नै एक मकसद के गैल जीण लागरया सूँ। 27 मै अपनी देह नै मसीह के अधीन राक्खूँ सूँ, ताके मै अपनी बुरी इच्छा नै पूरी ना करूँ, मै जो दुसरे माणसां खातर सुसमाचार का प्रचार करण लाग रहा सूँ, अर मै खुद ईनाम के खातर अयोग्य करा हो जाऊँ।

10 हे बिश्वासी भाईयो, मै न्ही चाहन्दा के थम इस बात तै अनजाण रहो के म्हारे सारे पूर्वजां के गैल जंगल-बियाबान म्ह के होया। परमेसवर नै उन सारया की एक बाढ़ल के जरिये अगुवाई करी, जो उनके आग्गे-आग्गे चाल्लै था, अर उन ताहीं लाल समुन्दर के बिचाळे तै इस तरियां तै पार लेग्या, जिस तरियां सुखी धरती पै ले जाया गया हो। 2 मूसा नबी के पाच्छे चाल्लण के कारण, उन सारया नै बाढ़ल म्ह अर समुन्दर म्ह बपतिस्मा ले लिया था। 3 उन सारया नै वो खाणा खाया जो परमेसवर नै सुर्ग तै दिया था। 4 उननै वो पाणी पिया जो पत्थर की चट्टान तै निकड्या था, पत्थर की चट्टान की तुलना हम मसीह के गैल कर सका सां, जो उनके गैल चाल्लै था, अर उन ताहीं जीवन देवै था। 5 पर परमेसवर उन म्ह तै घणखरयां तै राज्जी कोन्या होया, ज्यातै वे जंगल-बियाबान म्ह ढेर होये। 6 ये बात म्हारे ताहीं चेतावनी के रूप म्ह दी सै, ताके हम बुरे कामां की लालसा ना करां। 7 अर ना थम मूर्ति पूजणीये बणो, जिस तरियां के उन म्ह तै कितने बणगे थे, जिसा पवित्र ग्रन्थ म्ह लिख्या सै, “लोग एक दावत म्ह खाण-पीण नै बेठ्ठे, अर फेर भोगविलास के काम करण खातर उठगे।” 8 अर ना हम जारी करा, जिसा उन म्ह तै कितन्यां नै करी, अर एक दिन म्ह तेईस हजार मरये। 9 अर ना हम प्रभु नै परखां, जिसा उन म्ह कितन्यां नै करया, अर साँपां

के जरिये मरगे। 10 अर ना थम कुड़कुड़ाओ, जिस तरियां तै उन म्ह कितने कुड़कुड़ाए, अर नाश करण आळे सुर्गदूतां के जरिये मारे गये। 11 पर ये सारी बात, जो उनपै आण पड़ी, चेतावनी की तरियां थी, वे म्हारी चेतावनी के खातर जो दुनिया के आखरी बखत म्ह रहवै सै, लिक्खी गई सै। (aiōn g165) 12 इस करके जै कोए इसा माणस सै जो कहन्दा हो, के परमेसवर पै उसका भरोस्सा अटूट सै, तो उसनै सावधान रहणा चाहिए, के वो चाणचक किसे इम्तिहान म्ह ना पड़ जावै अर वो पाप ना कर बैठे। 13 पाप करण की इच्छा पक्की हम सब के धोरे आवै सै। पर परमेसवर साच्चा अर बिश्वास लायक सै, वो थमनै सामर्थ्य तै बाहर इम्तिहान म्ह कोनी गरेगा, जो माणस के सहण तै बाहरणे सै, बल्के वो थमनै शक्ति देवैगा के थम पाप ना करो। 14 इस कारण, हे मेरे प्यारे दोस्तों, मूर्तिपूजा तै बचे रहो। 15 मै अकलमंद जाणके थारे तै कहूँ सूँ, जो मै कहूँ सूँ, उसके बारे म्ह सोच्यों के वो सही सै या गलत। 16 जिब हम उसके कटोरे म्ह तै (अंगूर का रस) पीवां सां, जिस ताहीं हम प्रभु भोज म्ह इस्तमाल करां सां, जिसके खातर हम परमेसवर का धन्यवाद करा सां, हम असलियत म्ह मसीह के लहू म्ह साझी होण लागरे सां, अर जिब हम रोटी तोड़ा सां अर इस ताहीं खावां सां, तो हम असलियत म्ह मसीह के देह म्ह साझा करण लागरे सां। 17 जिब के सिर्फ एकैए रोटी सै, जो मसीह सै, भलाए हम घणे सां, फेर भी हम एक देह बण जावां सां, क्यूँके हम सब एक रोटी म्ह तै ए खावां सां। 18 इस्राएल के माणसां के बारे म्ह सोच्यों, जिब वे सारे माणस खावै सै, जो परमेसवर ताहीं चढ़ाया जावै सै, उसतै वे परमेसवर की आराधना म्ह शामिल हो जावै सै, इस्से तरियां जो वो खाणा खावै सै, जो मूर्ति के आग्गे चढ़ाया जावै सै, तो वो भी मूर्ति की आराधना म्ह शामिल होवै सै, 19 मेरे कहण का मतलब के सै? यो सै के मूर्ति असलियत म्ह देवता सै, जिनके खातर बलिदान करे जावै सै अर के इस बलिदान की कोए अहमियत सै? 20 न्ही, बल्के जो माणस मूर्तियाँ नै बलिदान करै सै, वे परमेसवर के खातर न्ही पर ओपरी आत्मायाँ के खातर बलिदान करै सै, अर मै न्ही चाहन्दा के थम ओपरी आत्मायाँ के गैल-साझी होवो। 21 यो थारे खातर ठीक कोनी के, थम वो खाओ अर पीओ सों, जो ओपरी आत्मायाँ ताहीं चढ़ाया जावै सै, अर वो भी खाओ अर पीओ सों, जो हमनै प्रभु की मौत की याद दुवावै सै। 22 जै हम इसा करां सां, तो हम परमेसवर नै घणा गुस्सा दुवावां सां, अर हम परमेसवर तै घणे ताकतवर कोनी। 23 हम सब कुछ करण खातर आजाद सां, हम कहवां सां, हॉं, पर सब कुछ म्हारे खातर आच्छा कोनी, हम सब कुछ करण खातर आजाद सां, पर सब कुछ म्हारे बिश्वास नै कोनी बढ़ाते। 24 कोए अपनी ए भलाई नै न्ही, बल्के औरां की भलाई के बारे म्ह सोच्यों। 25 हालाकि जिब थम कस्साइयाँ धोरे माँस लेण खातर बजारां म्ह जाओ सों, तो उनतै या ना प्छोके, के यो मूर्तियाँ के आग्गे चढ़ाया गया सै या न्ही, अर इसतै थारी अन्तरात्मा भी दुखी न्ही होगी। 26 थम इस करके खा सको सों क्यूँके पवित्र ग्रन्थ कहवै सै, “क्यूँके धरती अर धरती पै जो कुछ भी सै सब कुछ प्रभु का सै।” 27 जै

अभिश्वासियाँ मह तै कोए थमनै न्योँदा देवै, अर थम खाण खात्तर जाणा चाहो, तो जो किमे थारे स्याम्ही धरया जावै वोए खा ल्यो, अर थमनै यो न्ही पूछणा चाहिए, के यो चढ़ावा सै या न्ही, ताके चढ़ावा हो तो थम खुद नै दोषी महसूस कोनी करोगे। 28 पर जै कोए थारे तै कहवै, “यो खाणा तो मूर्ति ताहीं बलि करया गया था,” तो इस ताहीं अपणी अन्तरात्मा के कारण न्ही, बल्के थमनै बताण आळे माणस की अन्तरात्मा के कारण इसनै ना खाओ। 29 मै थारी अन्तरात्मा के बारे मह न्ही, पर उस बताण आळे माणस की अन्तरात्मा बारे मह कहूँ सूँ। जै थम खाण की आजादी पै जोर देओ सों, अर दुसरे माणस नै लागै सै के यो पाप सै, तो उसका के फायदा सै? कुछ भी तो कोनी। 30 जै मै मूर्तियाँ के आगै चढ़ाई होए चीज ताहीं धन्यवाद करके खाणे मह शामिल होऊँ सूँ, तो उसके खात्तर मेरे पै दोष क्यूँ लगाया जावै सै, जिसके खाणे खात्तर मन्नै परमेसवर के प्रति धन्यवाद जाहिर करया? 31 सारी बात्तां का निचोड़ यो सै के थम चाहे खाओ, चाहे पीओ, चाहे जो किमे करो, सारा किमे परमेसवर की महिमा के खात्तर करो। 32 मै जो कुछ भी करूँ सूँ, हरेक ताहीं खुश करण की कोशिश करूँ सूँ, अपणे-आप का भला कोनी सोचदा, बल्के सबके भले के खात्तर सोचुँ सूँ, ताके वो बचाए जा सकै। उससे तरियां थम भी इस्से तरियां जिओ, ताके यहूदी, गैर यहूदी अर परमेसवर की कलीसिया के माणसां के खात्तर उद्धार पाण मह रुकावट ना बणो।

11 जिस तरियां मै मसीह के जिस्सी चाल चाल्लुँ सूँ, थम भी मेरी सी चाल चाल्लों। 2 हे विश्वासी भाईयो, मै थारी तारीफ करूँ सूँ। क्यूँके थम मेरे ताहीं हर बखत याद करो सों, अर जितनी शिक्षा मन्नै थारे ताहीं दी सै, उनका सावधानी तै पालन करते रहों। 3 पर एक बात सै जो मै चाहूँ सूँ के थम उसनै जाण ल्यो, वा या सै के हरेक माणस का सिर मसीह सै, अर बिरबान्नी का सिर उसका धणी सै, अर मसीह का सिर परमेसवर सै। 4 जिब थम कलीसिया मह कठ्ठे होओ सों, तो जो माणस सिर ढके होए प्रार्थना या भविष्यवाणी करै सै, वो मसीह का अपमान करै सै। 5 पर जो बिरबान्नी उघाड़े सिर प्रार्थना या भविष्यवाणी करै सै, इसका मतलब सै के वा अपणे धणी का अपमान करै सै, क्यूँके वा गन्जी होण के बरोबर सै। 6 जै बिरबान्नी ओढ़णी ना ओढ़ै तो बाळ भी कटवा लेवै, जै बिरबान्नी के खात्तर बाळ कटवाणा या गन्जी होणा बड़े शर्म की बात सै, तो ओढ़णी ओढ़ै। 7 हों, एक माणस नै सिर ढक्कण की जरूरत कोनी, क्यूँके परमेसवर नै उस ताहीं खुद के समान बणा दिया सै, अर उस ताहीं अपणे जिंसा सुभाव अर महिमा दी सै, पर बिरबान्नी मर्द की शोभा सै। 8 क्यूँके पैहला माणस बिरबान्नी तै न्ही होया, पर पैहली बिरबान्नी हव्वा, माणस तै होई। 9 परमेसवर नै पैहले माणस ताहीं बिरबान्नी की मदद करण खात्तर न्ही बणाया था, बल्के उसनै बिरबान्नी ताहीं बणाया ताके माणस की मदद करै। 10 अर इस बजह तै सुर्गदूतां की मौजूदगी के कारण बिरबान्नी खात्तर जरूरी सै, के अधिकार के रूप मह उसनै अपणे सिर पै कुछ ओढ़णा चाहिए। 11 फेर भी प्रभु मह ना तो बिरबान्नी माणस तै, अर ना माणस बिना बिरबान्नी तै आजाद सै।

12 भलाए परमेसवर नै पैहले इन्सान तै पैहली जनानी बणाई, अर या जनानी ए सै जो इन्सान नै जन्म देवै सै, पर सारी चीज परमेसवर तै सै। 13 थम आप ए विचार करो, के कलीसिया मह बिरबान्नी नै उघाड़े सिर परमेसवर तै प्रार्थना करणा शोभा देवै सै? 14 के सुभाव के तौर पै भी थमनै न्ही बेरा के जै माणस लाम्बे बाळ राक्खै, तो उसके खात्तर अपमान सै। 15 पर जै लुगाई लाम्बे बाळ राक्खै तो उसके खात्तर शोभा सै, क्यूँके बाळ उसकी ओढ़णी के खात्तर दिए गये सै। 16 पर जै कोए मेरे तै सहमत कोनी, तो म्हारे धौरे अर परमेसवर की कलीसिया के धौरे आराधना करण का इसके अलावा कोए और रिवाज कोनी। 17 इब जो बात मै थारे ताहीं बताऊँ सूँ, उसके खात्तर मै थारी बड़ाई कोनी करदा, ज्यांतै के थारे कठ्ठे होण तै भलाई न्ही, पर नुकसान होवै सै। 18 क्यूँके मेरे सुणण मह आया सै, के जिब थम कलीसिया मह आराधना के खात्तर कठ्ठे होवो सों, तो थारे मह फूट होवै सै, अर मै मानु सूँ के यो सच सै। 19 पर यकीनन थारे बीच बटवारा होणा चाहिए, ताके जिनके धौरे परमेसवर की मंजूरी सै, उन ताहीं पिच्छाणा जावै। 20 आखर मह थम जो एक जगहां मह कठ्ठे होवो सों, म्हारे प्रभु यीशु मसीह की मौत नै याद करण के खात्तर होओ सों, यो प्रभु-भोज खाण के खात्तर न्ही। 21 क्यूँके खाण के बखत एक-दुसरे तै पैहल्या अपणा खाणा खा लेवै सै, इस ढाळ कोए तो भूख्खा रहवै सै अर कोए मतवाला हो जावै सै। 22 के खाण-पीण के खात्तर थारे घर कोनी? या थम परमेसवर की कलीसिया का तिरस्कार अर गरीबां नै शर्मिन्दा करण पै तुले होए सों? इब मै थारे तै के कहूँ? के इस बात मह थारी बड़ाई करूँ? ना! बिलकुल न्ही। 23 मन्नै थारे ताहीं जितनी शिक्षा दी सै वोए शिक्षा सै, जो मन्नै परमेसवर की ओड़ तै मिली थी, के प्रभु यीशु जिस रात पकड़ाया गया, रोटी लेई, 24 अर परमेसवर का धन्यवाद करके उसनै तोड़ी अर कह्वा, “या मेरी देह सै, जो थारे खात्तर सै: मेरी यादगारी खात्तर न्यूप करया करो।” 25 इसे तरियां उसनै खाणे के बाद अंगूर के रस का कटोरा भी लिया अर कह्वा, “यो कटोरा मेरे लहू मह नया करार सै: जिब कदे पीओ, तो मेरी यादगारी के खात्तर न्यूप करया करो।” 26 क्यूँके जिब कदे थम या रोटी खाओ अर इस कटोरे मह तै पीओ सो, तो प्रभु की मौत नै जिब ताहीं वो न्ही आवै, प्रचार करदे रहो। 27 ज्यांतै जो कोए इस तरिकके तै प्रभु की रोटी खावै या उसके कटोरे मह तै पीवै, जिसतै मसीह का आनंद हो, तो वो प्रभु की देह अर लहू के बिरुध्द पाप करै सै। 28 ज्यांतै माणस अपणे-आप ताहीं जाँच लेवै अर इस्से तरियां तै इस रोटी मह तै खावै, अर इस कटोरे मह तै पीवै। 29 क्यूँके जो खांदे-पिंदे बखत प्रभु की देह के साथ अपणे रिश्ते नै न्ही पिच्छाणता, वो इस खाणे अर पीणे तै अपणे उप्पर दण्ड ल्यावै सै। 30 अर दण्ड की शरुआत थारे बीच हो ली सै, इस्से कारण थारे मह तै घणखरे कमजोर अर बीमार सै, अर घणखरे मर भी गये। 31 जै हम अपणे-आपनै जाँचदे तो दण्ड न्ही पांदे। 32 पर प्रभु म्हारे ताहीं दण्ड देके म्हारी ताड़ना करै सै, ज्यांतै के हम न्याय के दिन दुसरे माणसां के साथ दंडित ना करे जावां। 33 इस करके, हे विश्वासी भाईयो,

जिब थम प्रभु भोज खाण खात्तर कठ्ठे होओ सो, तो एक-दुसरे के खात्तर ठहरे रहो, ताके थम मिलकै प्रभु भोज खा सको। 34 जै कोए भूख्खा हो तो अपणे घर म्ह खा लेवै, ताके जिब थम एक साथ आओगे, तो थम सही तरियां तै बरताव करोगे, अर परमेसवर थारा न्याय कोनी करैगा। दुसरी बात्तां नै मै जिब्बे सुलझाऊंगा जिब आऊंगा।

12 हे बिश्वासी भाईयो, इब पवित्र आत्मा के जरिये दी गई उन खुबियाँ तै तालुकात राखती उन बात्तां के बारे म्ह मै न्ही चाहन्दा के थम अनजाण रहो। 2 थम जाणो सो, के प्रभु म्ह बिश्वास करण तै पैहले थम किसे थे, कोए थमनै राह दिखावै था ताके थम मूर्तियाँ की पूजा कर सको जो बोल न्ही सकदी। 3 ज्यातै मै थमनै बताणा चाहूँ सूँ, के जो कोए परमेसवर की आत्मा की अगुवाई तै बोल्लै सै, वो न्ही कहन्दा के यीशु श्रापित सै, अर ना कोए पवित्र आत्मा कै बिना कह सकै सै के यीशु प्रभु सै। 4 आत्मिक वरदान तो कई ढाळ के सै, पर या पवित्र आत्मा ए सै जो इन सबका भण्डार सै। 5 अर काम भी कई ढाळ के सै, जो हम परमेसवर खात्तर करा सां, पर हम सब एकैए परमेसवर की सेवा करा सां। 6 परमेसवर म्हारी जिन्दगी म्ह कई ढाळ के तरिककां तै काम करै सै, पर यो वोए परमेसवर सै, जो हमनै उसके काम करण की काबलियत देवै सै। 7 एक इसी काबलियत सै जो म्हारे म्ह तै हरेक ताहीं दी जावै सै, जो पवित्र आत्मा की मौजूदगी नै दिखावै सै ताके हम अपणे संगी बिश्वासियाँ की मदद कर सका। 8 परमेसवर की आत्मा एक माणस ताहीं बुद्धि तै भरा सन्देस बोल्लण की काबलियत देवै सै, अर वाए आत्मा किसे दुसरे माणस नै ज्ञान तै भरा सन्देस बोल्लण की काबलियत देवै सै। 9 वो एक माणस ताहीं मसीह म्ह मजबुती तै बिश्वास करण की काबलियत देवै सै, अर दुसरे माणस ताहीं आत्मा, बीमार लोगां नै ठीक करण की काबलियत देवै सै। 10 किसे ताहीं सामर्थ के काम करण की ताकत, अर किसे ताहीं भविष्यवाणी की, अर किसे ताहीं आत्मायाँ की परख, अर किसे ताहीं घणी ढाळ की भाषा, अर किसे ताहीं भाषायां का मतलब बताणा की काबलियत दी। 11 पर ये परमेसवर की आत्मा सै, जो सारी काबलियत का भण्डार सै, अर वो हर किसे नै बाट देवै सै, जिसा वो चाहवै सै। 12 जिस तरियां देह के भोत सारे अंग होवै सै, पर भोत सारे अंग मिलके एक देह नै बणावै सै, उस्से ढाळ मसीह देह सै, अर सब बिश्वासी उसके देह के अंग सै। 13 क्यूँके हम सब यहूदी, यूनानी, गुलाम अर आजाद, एकए देह की तरियां सां, अर परमेसवर हम सब नै पवित्र आत्मा का बपतिस्मा देवै सै, अर हम सारया नै एके तरियां का पवित्र आत्मा पाया सै। 14 देह म्ह एके अंग न्ही, पर भोत-से सै। 15 जै पैर कहवै के मै हाथ कोनी, इस करकै देह का अंग कोनी, तो के उसके इसा कहण तै वो देह का अंग कोनी? 16 अर जै कान कहवै, के मै आँख कोनी, इस करकै देह का अंग कोनी, तो के वो इस कारण देह का अंग कोनी? 17 जै साबती देह आँख होन्दी तो सुणणा किन्त तै होंदा? जै साबती देह कान ए होंदी तो सूँघणा किन्त तै होंदा? 18 पर सचमुच परमेसवर नै देह के सारे अंगा ताहीं अपणी मर्जी

के मुताबिक एक-एक करकै देह म्ह सही जगहां पै राख्या सै। 19 जै सारे अंग एके अंग होन्दे, तो देह किन्त तै होंदी? 20 बल्के अंग तो भतेरे सै, पर देह एके सै। 21 आँख हाथ तै कोनी कह सकदी, “मन्नै तेरी जरूरत कोनी,” अर ना सिर पैर तै कह सकै सै, के “मन्नै तेरी जरूरत कोनी।” 22 पर देह के कुछ अंग जो दुसरे अंगा तै कमजोर लागै सै, भोत-ए जरूरी सै। 23 अर देह के जिन अंगा नै हम कम आदर देवां सां, वे सै जिन ताहीं हम बड़ी सावधानी तै ढका सां, इस करकै उन अंगा की हम सावधानी तै हिफाजत करा सां, जिन ताहीं देख्या न्ही जा सकता, जिब के आदर के लायक अंगा नै इस खास देखभाळ की जरूरत कोनी। इस करकै परमेसवर नै देह ताहीं एक साथ राख्या सै, ताके उन अंगां ताहीं खास आदर अर देखभाळ दी जावै, जिनका महत्व कम सै। 25 ताके देह म्ह फूट ना पड़े पर देह के सारे हिस्से दुसरे अंगा की देखभाळ करै। 26 जै देह का कोए अंग दुख पावै सै, तो उसकै गैल देह के सारे अंग दुख पावै सै, अर जै एक अंग की बड़ाई होवै सै, तो उसकै गेल्या सारे अंग आनन्द मनावै सै। 27 इस्से ढाळ थम सारे मिलकै मसीह की देह सो, अर थारे म्ह तै हरेक उसके देह के कुछ हिस्सां के रूप म्ह उसके अंग साँ 28 मसीह की इस देह म्ह जो के कलीसिया सै, परमेसवर नै म्हारे ताहीं न्यारे-न्यारे ढाळ के काम करण कै खात्तर दिया, सब तै पैहल्या प्रेरितां, फेर नबी, तीसरे शिक्षक, फेर सामर्थ के काम करण आळे, फेर चंगाई देण आळे, भलाई करण आळे, अर अगुवें, अर अन्य भाषा बोल्लण की काबलियत दी। 29 के सारे प्रेरित सै? न्ही! के सारे नबी सै? न्ही! के सारे उपदेशक सै? न्ही! के सारे सामर्थ के काम करण आळे सै? न्ही! 30 के सारया नै चंगा करण का वरदान मिल्या सै? न्ही! के सारे अन्य भाषा बोल्लै सै? न्ही! 31 के सारे अन्य भाषा का मतलब बताणीये सै? न्ही! थम सबतै उपयोगी वरदानां की धुन म्ह रहो, पर मै थमनै सारया तै बढिया राह बताऊँ सूँ।

13 जै मै माणसां अर सुर्गदूतां की बोल्ली बोल्लूँ अर दुसरयां तै प्यार ना करूँ, तो मै ठनठाना होया पीत्तळ, अर झंझनाती होई झाँझ सूँ। 2 अर जै मै भविष्यवाणी कर सकूँ, अर सारे भेद अर सारी ढाळ के ज्ञान ताहीं समझूँ, अर मन्नै उरै ताहीं इतणा बिश्वास हो के मै पहाड़ां ताहीं हटा दिवूँ, पर दुसरयां तै प्यार ना करूँ, तो मै कुछ भी कोनी। 3 जै अपणा सारा धन कंगालां नै खुवा दिवूँ, या अपणी देह जळाण कै खात्तर दे दिवूँ, अर दुसरयां तै प्यार ना करूँ, तो मन्नै किमे भी फायदा कोनी। 4 जो लोग दुसरयां तै प्यार करै सै, वे पूरे धीरज अर दयालु तरिककें तै काम करै सै, वे नफरत न्ही करते, अर वे खुद की बड़ाई न्ही करते। 5 वे दुसरयां का अनादर कोनी करते, वे स्वार्थी कोनी अर ना ए तावळे नाराज होवै सै, पर आसानी तै उन माणसां ताहीं माफ करदे सै जो उनके खिलाफ बुरा बरताव करै सै। 6 जिब लोग बुरे काम करै सै तो वे खुश कोनी होन्दे, पर जिब लोग सही काम करै सै तो वे खुश होवै सै। 7 प्यार सारी बात्तां नै सह लेवै सै, अर हमेशा म्हारे हरेक हालात्तां म्ह बिश्वास करण म्ह, परमेसवर पै भरोस्सा राक्खण म्ह, अर दुख अर मुसीबतां नै

धीरज तै सहण करण म्ह म्हारी मदद करै सै। 8 प्यार सदा तक रहण आळा सै। जडै ताहीं भविष्यवाणीयाँ का सवाल सै, वे थोड़े ए बखत खात्तर सै, भाषाएँ बिना शब्द की हो जावैगी अर ज्ञान मिट जावैगा। 9 क्यूँके म्हारा ज्ञान अर म्हारी भविष्यवाणी का वरदान अधूरा सै। 10 पर जब हम सिद्धता तक पोहच जावांगे तो, वो सब, जो अधूरा सै, मिट जावैगा। 11 जब मै बाळक था, तो मै बाळकां की ढाळ बोल्लू था, बाळकां जिसे मेरी सोच थी, बाळकां जिसे समझ थी, पर जब श्याणा हो गया तो बाळकां के जिसे बात छोड़ दी। 12 इब जो हम परमेसवर के बारे में जाणा सां, वो सब शीशे म्ह धुँधळा दिखाई देण की ढाळ सै, पर बाद म्ह हम उस ताहीं आम्ही-स्याम्ही देकखांगे, इब्बे हम सब कुछ न्ही जाणते, पर बाद म्ह हम सब किमे जाण जावांगे जिस तरियां परमेसवर म्हारे ताहीं जाणै सै। 13 ये तौन्नु चीज सदा खात्तर सै, विश्वास, आस, अर प्यार पर इन म्ह सारया तै बड़ड़ा प्यार सै।

14 एक-दुसरे तै प्यार करण की कोशिश करो, अर आत्मिक वरदानां की भी धुन म्ह रहो, खास करके यो के भविष्यवाणी करो। 2 क्यूँके जो अन्य भाषा म्ह बात करै सै वो माणसां तै न्ही पर परमेसवर तै बात करै सै, ज्यांतै के उसकी बात कोए न्ही समझदा, क्यूँके वो भेद की बात पवित्र आत्मा की शक्ति तै बोल्लै सै। 3 पर जो भविष्यवाणी करै सै, वो विश्वासियाँ नै मजबूत करण की, उत्साहित करण की, अर शान्ति की बात कहवै सै। 4 जो अन्य भाषा म्ह बात करै सै, वो अपणा ए विश्वास मजबूत करै सै, पर जो भविष्यवाणी करै सै, वो कलीसिया के विश्वासियाँ के विश्वास नै मजबूत करै सै। 5 मै चाहूँ सूँ के थारे म्ह तै हरेक नै अन्य भाषायां म्ह बात करण की काबलियत मिलै, पर इसकी बजाए आच्छा तो यो सै के थमनै भविष्यवाणी की काबलियत मिलै, क्यूँके जो भविष्यवाणी करै सै, वो उस अन्य भाषा बोल्लण आळा तै, जो उसका मतलब खोल कै बताए बिना अन्य भाषा म्ह बात करै सै, उसतै आच्छा सै, क्यूँके उसका मतलब खोल कै बताये जाण पैए कलीसिया के विश्वासियाँ के विश्वास की बढ़ोतरी हो सके सै। 6 ज्यांतै, हे विश्वासी भाईयो, जै मै थारे तै अन्य भाषा म्ह बात करूँ, तो उसतै थमनै के फायदा होगा, जै इस म्ह थारे खात्तर कोए प्रकाशन, ज्ञान, भविष्यवाणी या शिक्षा की बात ना हो, तो मै इस म्ह थारा के भला करूँगा? 7 इस्से ढाळ बेजान चीज म्ह तै भी आवाज लिकडै सै, चाहे बाँसुरी हो या संगीत के साज, जै उनतै लिकडै सुरां म्ह फर्क ना हो तो यो किस तरियां बेरा लागैगा के यो कौण सा साज बजाया जाण लाग रह्या सै। 8 अर जै तुही का शब्द साफ ना हो, तो कौण लड़ई कै खात्तर तयारी करैगा? 9 इस्से तरियां जै थम अन्य भाषा म्ह बोल्लों सों, अर थारे शब्दां नै कोए समझ न्ही पावै, के थम के बोल्लण लागरे सों? तो यो तो हवा तै बात करण जिसा होगा। 10 भलाए दुनिया म्ह कितनी ए ढाळ की भाषा क्यूँ ना हों, पर हरेक भाषा का मतलब सै। 11 पर जै मै किसे भाषा का मतलब ना समझूँ, तो बोल्लण आळे की निगांह म्ह परदेशी ठहरूँगा, अर बोल्लण आळा भी मेरी निगांह म्ह परदेशी ठहरैगा। 12 ज्यांतै थम भी

जिब आत्मिक वरदानां की खोज म्ह हो, तो इस्से वरदानां की लालसा राकखों, जिसतै कलीसिया के विश्वासी माणसां का विश्वास भी मजबूत हो सके। 13 इस कारण जो अन्य भाषा बोल्लै, वो प्रार्थना करै के उसका खोल कै मतलब भी बता सके। 14 ज्यांतै जै मै अन्य भाषा म्ह प्रार्थना करूँ, तो मेरी आत्मा प्रार्थना करै सै, पर मेरी बुद्धि काम न्ही देदी। 15 इस बजह तै मै आत्मा तै भी प्रार्थना करूँगा, अर बुद्धि तै भी प्रार्थना करूँगा, मै आत्मा तै भी गाऊँगा, अर बुद्धि तै भी गाऊँगा। 16 मान ल्यो के कई आम आदमी थारे गैल परमेसवर की आराधना म्ह शामिल होवै सै, अर जब थम अपणी आत्मा के साथ परमेसवर की आराधना करण लागरे सों, अर जो थम बोल्लो सों वो उननै समझ कोनी आन्दा, तो परमेसवर का धन्यवाद करण कै बाद, उननै किस तरियां बेरा लागैगा के कद “आमीन” कहणा सै, जो थम कहण लागरे सों? 17 परमेसवर का धन्यवाद करणा थारे खात्तर अदभुत हो सके सै, पर यो दुसरयां ताहीं उनके विश्वास म्ह मजबूत न्ही बणा सकदा। 18 मै अपने परमेसवर का धन्यवाद करूँ सूँ, के मै थम सारया तै घणा अन्य भाषायां म्ह बोल्लू सूँ। 19 पर कलीसिया म्ह अन्य भाषा म्ह दस हजार बात कहण तै यो मननै और भी सही लागै सै, के दुसरयां नै सिखाण के खात्तर मै बुद्धि तै पाँच ए बात कह सकू। 20 हे विश्वासी भाईयो, इन बाततां नै समझण म्ह बाळक ना बणो, बुराई करण म्ह तो बाळक बणे रहो, पर इस तरियां के मामलां नै समझण म्ह श्याणे बणो। 21 पवित्र ग्रन्थ म्ह लिख्या सै, के प्रभु कहवै सै, “के मै अजनबियाँ के जरिये बात करूँगा, जो अन्य भाषा बोल्लैंगे, तोभी वे मेरी न्ही सुणैंगे।” 22 ज्यांतै अन्य भाषा विश्वासियाँ के खात्तर न्ही, पर अविश्वासियाँ के खात्तर निशान्नी सै, जो ये भाषा न्ही समझते, पर भविष्यवाणी अविश्वासियाँ के खात्तर न्ही, पर विश्वासियाँ के खात्तर निशान्नी सै। 23 इस करके जै कलीसिया एक जगहां कट्टी हो, अर सारे के सारे अन्य भाषा बोल्लै, जो ये भाषा न्ही समझते, या अविश्वासी माणस भीत्तर आ जावै, तो के वे थमनै बावळे न्ही कहवैंगे? 24 पर जै सारे भविष्यवाणी करण लागे, अर कोए अविश्वासी माणस या जो भविष्यवाणी नै न्ही समझते हो, भीत्तर आ जावै, तो उननै अपने पापां का अहसास होगा अर जो थम बोल्लण लागरे सों उसकी बजह तै अपने-आप ताहीं कसूरवार महसूस करैंगे। 25 अर परमेसवर का संदेश उस ताहीं उसकी बुराई या उसकी गुप्त सोच का अहसास करां देवैगा। वो महसूस करैगा के वो पापी सै, अर वो पाप करणा छोड़ देगा अर वो झुकके प्रभु की आराधना करैगा, अर मान लेवैगा के सच म्ह ए परमेसवर थारे बिचाळै सै। 26 हे विश्वासी भाईयो, सुणो के ये बात किस तरियां होणी चाहिये? जिब थम आराधना खात्तर कठे होवो सो, तो थारे म्ह तै कोए तो भजन गावै सै, कोए उपदेश देवै सै, कोए प्रभु के जरिये दिए गये प्रकाशन सै, कोए अन्य भाषा म्ह बात करै सै, कोए उसका मतलब बतावै सै। इन सारी बाततां का मकसद योए सै, के कलीसिया विश्वास म्ह मजबूत हो सके। 27 जै अन्य भाषा म्ह बात करै तो ज्यादा तै ज्यादा दो या तीन माणस बारी-बारी तै बोल्लै, अर एक माणस उन बाततां

का खेल कै मतलब भी बतावै। 28 पर जै खोल कै मलतब बताणीया ना हो, तो अन्य भाषा बोल्लण आळा कलीसिया म्ह शान्त रहवै, अर अपने मन म्ह परमेसवर तै बात करै। 29 नबियाँ म्ह तै दो या तीन बोल्लै, अर बाकी माणस उनकै वचन नै परखै। 30 जै उस बखत ओड़ै कोए बेठ्या हो जिस ताहीं ईश्वरीय प्रकाशन मिलै, तो पैहले आळा माणस चुप हो जावै अर दुसरे माणस नै बोल्लण दे। 31 थम सारे एक-एक करके भविष्यवाणी कर सको हो, ताके सारे सीखै अर सारे उत्साहित भी हो जावै। 32 अर नबियाँ की आत्मा नबियाँ के बस म्ह सै, उसके भित्त अर इतनी काबलियत सै, के वो अपनी इच्छा के मुताबिक बोल सकै सै, अर चुप भी रह सकै सै। 33 क्यूँके परमेसवर गड़बड़ी का न्ही, पर शान्ति का परमेसवर सै। यो वो नियम सै जिसका पालन परमेसवर के माणसां के सारी कलीसियाओं म्ह करया जाणा चाहिए। 34 बिरबान्नी कलीसिया की सभा म्ह चुपचाप रहवै, क्यूँके उन ताहीं बात करण का हुकम कोनी, पर अधीन रहण का हुकम सै, जिसा नियम-कायदे म्ह लिख्या भी सै। 35 जै वे किमे सिखणा चाहवै, तो घर म्ह अपने-अपणे धणी तै बुझै, क्यूँके बिरबान्नी का कलीसिया म्ह घणा बोलणा शर्म की बात सै। 36 इसा क्यूँ सै के थारे म्ह तै कुछ पैहले उपपर लिखे होए नियमां का पालन न्ही करणा चाहन्दे? के थमनै लागै सै, के थम परमेसवर का वचन देण आळे पैहले आदमी सों? 37 जै कोए माणस खुद नै नबी या आत्मिक माणस समझै, तो न्यू जाण ले के जो बात मै थमनै लिखूँ सूँ, वे प्रभु के हुकम सै। 38 जै कोए माणस इन बाततां पै बिश्वास न्ही करदा, तो थम भी उसकी बाततां पै बिश्वास ना करो, जो वो बोल्लण लागरया सै। 39 इस करके हे बिश्वासी भाईयो, भविष्यवाणी करण की धुन म्ह रहो, अर अन्य भाषा बोल्लण तै मना ना करो। 40 कलीसिया म्ह जो कुछ भी करो सों, आच्छी तरियां अर सही ढंग तै करया जावै।

15 हे बिश्वासी भाईयो, इब मै थमनै वोए सुसमाचार याद दिवाऊँ सूँ, जो पैहल्या सुण्या जा चुक्या सै, जिस सुसमाचार का थमनै बिश्वास भी करया था, अर थम उस बिश्वास म्ह बणे भी रहो। 2 जै थम सुसमाचार म्ह बिश्वास करणा जारी राक्खों सों, जो मन्ने थारे ताहीं सुणाया था तो परमेसवर थमनै सुसमाचार के जरिये बचावैगा, जै थम उस सुसमाचार पै बिश्वास करणा छोड़ दो, तो थारा मसीह पै बिश्वास करणा बेकार सै। 3 इस्से कारण मन्ने थारे ताहीं सब तै खास सन्देस बताया सै, जो मेरे ताहीं प्रभु यीशु तै मिल्या सै, वो सन्देस यो सै, के पवित्र ग्रन्थ के वचन के मुताबिक यीशु मसीह म्हारै पापां के खात्तर मारया गया, 4 गाड्या गया, अर पवित्र ग्रन्थ के मुताबिक तीसरे दिन जिन्दा भी होग्या, 5 अर उसके बाद वो पतरस ताहीं अर फेर बारहां चेल्यां नै दिख्या। 6 फेर वो पाँच सौ तै ज्यादा चेल्यां नै एक साथ दिख्या, जिन म्ह तै घणखरे तो इब ताहीं जिन्दे सै पर कई मर लिये सै। 7 इसकै बाद वो याकूब नै अर फेर सारे प्रेरितां नै भी दिख्या। 8 सब तै आखर म्ह मन्ने भी दिख्या, मेरे ताहीं प्रभु नै अदभुत तरिककें तै प्रेरित बनाया। 9 क्यूँके मै प्रेरितां म्ह सारया तै कम महत्वपूर्ण सूँ, बल्के प्रेरित बणण कै

जोग्गा भी कोनी था, क्यूँके मन्ने परमेसवर की कलीसिया के बिश्वासियां ताहीं सताया था। 10 पर मै जो कुछ भी सूँ, परमेसवर के अनुग्रह तै प्रेरित सूँ। उसका अनुग्रह जो मेरे पै होया, वो बेकार न्ही होया, पर मन्ने उन और प्रेरितां तै बाध मेहनत भी करी, तोभी या मेरी ओड़ तै न्ही होई, पर परमेसवर का अनुग्रह तै होई जो मेरे पै था। 11 ज्यांतै चाहे मै हूँ, चाहे दुसरे प्रेरित हों, हम सब नै मसीह के बारे म्ह एक जिसा प्रचार करा, अर इस्से पै थमनै बिश्वास भी करया। 12 मै थारे तै एक बात पूछूँ सूँ, जिब तै हम सारया नै यो प्रचार करया सै, के परमेसवर नै मसीह ताहीं मुर्दा म्ह तै जिन्दा करया, तो थारे म्ह तै कई क्यूँ न्ही मानते के बिश्वासी भी मरके जिवेंगे? 13 जै मेरे होया का जी उठणा सै ए कोनी, तो मसीह भी मेरे होया म्ह तै जिन्दा कोनी होया, 14 अर जै मसीह मेरे होया म्ह तै न्ही जी उठ्या, तो म्हारा प्रचार करणा बेकार सै अर थारा बिश्वास करणा भी बेकार सै। 15 इसतै भी बढ़के यो सै के हम परमेसवर के झूठे गवाह साबित होण लागरे सां, क्यूँके हमनै उनके बारे म्ह या गवाही दी सै के उननै मसीह ताहीं मेरे होया म्ह तै जिन्दा करया सै, पर जै मेरे होए वास्तव म्ह जिन्दे न्ही करे गये होन्दे तो परमेसवर नै मसीह ताहीं भी जिन्दा न्ही करया। 16 अर जै मेरे होए माणस जिन्दा न्ही होन्दे, तो मसीह भी मेरे होया म्ह तै जिन्दा कोनी होया। 17 अर जै मसीह मरया होया म्ह तै जिन्दा कोनी होया, तो थारा बिश्वास करणा बेकार सै, अर थम इब ताहीं अपने पापां म्ह जीण लागरे सो। 18 बल्के जो मसीह पै बिश्वास करणा आळे मर लिये सै, वे भी नाश होए। 19 जै हम सिर्फ इस्से जीवन म्ह मसीह तै आस राक्खां सां, ना के आण आळी दुनिया के खात्तर, तो हम सारे माणसां तै घणे अभागे सां। 20 पर सच म्ह-ए परमेसवर नै मसीह ताहीं मुर्दा म्ह तै जिन्दा करया सै, अर वो पैहला माणस सै, जो मेरे होया म्ह तै जिन्दा करया गया। 21 क्यूँके जिब एक माणस आदम कै जरिये दुनिया म्ह मौत आई, तो दुसरा माणस मसीह कै जरिये मेरे होया का दोबारा जिन्दा हो जाणा भी होया। 22 अर जिस तरियां आदम के पाप के जरिये सारे माणस मरे सै, उस्से तरियां ए मसीह नै जो करया, उसके जरिये सारे माणस मेरे होया म्ह तै जिन्दा भी करे जावेंगे। 23 पर हरेक माणस इस तरियां जिन्दा होवैगा, परमेसवर नै पैहल्या मसीह ताहीं मेरे होया म्ह तै जिन्दा करया, फेर मसीह कै आण पै परमेसवर उन लोगां नै भी जिन्दा करैगा जो मसीह के सै। 24 इसकै बाद दुनिया का अन्त होगा। उस बखत मसीह सारी प्रधानता, अर सारा हक अर सामर्थ का अन्त करके राज्य नै परमेसवर पिता के हाथ म्ह सौंप देवैगा। 25 क्यूँके जिब तक परमेसवर अपने बैरियां नै पूरी तरियां तै हरा ना देवै, तब तक मसीह का राज्य करणा जरूरी सै। 26 सारया तै आखरी बैरी जो नाश करया जावैगा, वो मौत सै। 27 पवित्र ग्रन्थ म्ह भजनकार नै लिख्या सै, के परमेसवर सब कुछ मसीह के अधीन कर देवैगा, तो यो तय सै, के परमेसवर शामिल कोनी, क्यूँके वो सै जिसनै मसीह ताहीं अधिकार दिया सै। 28 जिब सब कुछ मसीह कै अधीन हो जावैगा यानी बेटे के अधीन, तो बेटा आप भी परमेसवर के अधीन हो

जावैगा, जिसनै उस ताहीं यो अधिकार दिया था। परमेसवर ए प्रभु सै, जो सब कुछ अर हर किसे म्ह काम करै सै। 29 जै मरे होया का पुनरुत्थान कोनी, तो उस परम्परा का के मतलब सै, जिस म्ह माणस मरे होया की जगहां पै बपतिस्मा लेण लागरे सै? जै परमेसवर मरे होए माणस ताहीं जिन्दा न्ही करदा, तो माणस इस परम्परा नै क्यूँ मानण लागरे सै? 30 म्हारे खात्तर जै मुर्दा का जी उठणा सै, तो खुद ताहीं खतरां म्ह गरेणा बेकूफी सै। 31 हे बिश्वासी भाईयो, मै हर दिन मौत का सामना करूँ सूँ, यो भी सच सै, के प्रभु यीशु मसीह म्ह मन्ने थारे पै गर्व सै। 32 मै इफिसुस नगर म्ह बड़ी तै बड़ी मुसीबतां म्ह तै गुजरा सूँ, जो जंगली-जानवरां की तरियां मेरा बिरोध करै सै, तो मन्ने के फायदा होया? जै मुर्दे जिन्दे न्ही करे जावैंगे, तो हम कह सका सां, के “आओ, खावां-पीवां, क्यूँके काल तो मरणा ए सै।” 33 धोक्खा ना खाओ, “भुंडी संगति आच्छे चाल-चलण नै बिगाड़ देवै सै।” 34 अपणे सोच्यण के तरिकके नै ठीक कर ल्यो, अर पाप करणा छोड़ दो, क्यूँके कुछ इसे सै जो परमेसवर नै न्ही जाणदे। मै थमनै शर्मिन्दा करण कै खात्तर न्यू कहूँ सूँ। 35 उदाहरण के तौर पै जै कोए न्यू कहवैगा, “के परमेसवर मुर्दा नै किस तरियां तै जिवावै सै, अर उनकी देह किसी होवै सै?” 36 हे निरे बेअक्लो! जिब तू बीज नै माट्टी म्ह बोवै सै, तो वो अंकुरित कोनी होवै सै, अर जिब वो अंकुरित होवै सै तो वो बीज कोनी रहन्दा। 37 जै तू गेहूँ या कोए दुसरा बीज बोवै सै, तो तू शरु म्ह ए पौधा न्ही लगान्दा, बल्के बीज नै ए लगावै सै, जो बाद म्ह पौधा बणी सै। 38 परमेसवर जिसा चाहवै उसा आकार पौधे नै देवै सै, हरेक ढाळ के बीज का उगण का अपणा अलग ए तरिककां होवै सै। 39 दुनिया के सब प्राणियाँ की देह एक जिसी कोनी होन्दी, माणसां की देह न्यारी सै, डांगरां की न्यारी सै, पंछियाँ की देह न्यारी सै, मच्छियाँ की देह न्यारी सै। 40 अर जिस तरियां धरती पै अलग-अलग तरियां की देह सै, उससे तरियां अकास म्ह भी सूरज, चाँद अर तारे सै। अकास म्ह चिज्जां की एक अलग तरियां की खूबसूरती हो सै, अर धरती पै, की चिज्जां की खूबसूरती अलग ढाळ की हो सै। 41 सूरज का तेज न्यारा सै, चाँद का तेज न्यारा सै, अर तारा के टोळ का तेज न्यारा सै, (क्यूँके एक तारे तै दुसरे तारे कै तेज म्ह फर्क सै)। 42 तो यो मरे होए माणसां का जी उठणा भी इसाए होगा। देह जिस ताहीं वे दफणावै सै वो गळ जा सै, पर जिब यो फेर तै जी उठै सै, तो या एक इसी देह होगी जो गळै कोनी। 43 जिब म्हारी देह दफणाई जावै सै, तो वा बदसूरत अर कमजोर हो सै, पर जिब दुबारा तै जीवन मिलै सै, तो वा सुथरी अर मजबूत हो सै। 44 जिस तरियां म्हारी देह माँस अर लहू तै बणी सै, इससे तरियां इसी देह भी सै जिस ताहीं जीवन परमेसवर के आत्मा के जरिये मिलै सै, अर जो म्हारी देह माँस अर लहू तै बणी सै, उस देह म्ह बदल जावैगा, जिस ताहीं जीवन परमेसवर की आत्मा तै मिलै सै। 45 पवित्र ग्रन्थ म्ह भी लिख्या सै, के “पैहल्ला माणस, यानिके आदम जिन्दा प्राणी बणया” अर आखरी आदम जो मसीह सै, वोए सै जो हमनै अनन्त जीवन देवै सै। 46 माँस अर लहू तै बणी देह पैहल्या वजूद

म्ह आई, फेर उस देह ताहीं परमेसवर की आत्मा के जरिये जीवन मिलै सै। 47 पैहल्ला माणस धरती तै, यानिके माट्टी तै बणया होया था, दुसरा माणस जो मसीह था सुर्ग तै आया। 48 धरती पै रहण आळे लोग, धरती के पैहले माणस आदम की ढाळ माट्टी तै बणे सै, पर सुर्ग म्ह रहण आळे लोग, सुर्ग के माणस मसीह यीशु की तरियां सै। 49 हम सबका रूप आदम की ढाळ सै, जो माट्टी तै बणया सै, उससे तरियां एक दिन हमनै मसीह का रूप भी मिलैगा, जो सुर्गीय सै। 50 हे बिश्वासी भाईयो, मै चाहूँ सूँ के थम जाण ल्यो, के म्हारी देह जो लहू अर माँस तै बणी सै, इस देह के साथ हम परमेसवर के सुर्गीय राज्य म्ह न्ही रह सकदे। हम सुर्ग म्ह उस देह के साथ न्ही रह सकदे जो नाश हो जावै सै, क्यूँके ओड़े कोए मौत कोनी। 51 देक्खो, मै थारे तै एक भेद की बात बताऊँ सूँ, म्हारे म्ह तै कुछ बिश्वासी मरै कोनी, पर उनकी देह बदल जावैगी। 52 अर यो पलभर म्ह, पलक झपकदे ए जिब आखरी तुरही फूक्की जावैगी तो मुर्दे सदा रहण खात्तर जिन्दा हो जावैंगे, अर जो जिन्दा सै उनकी देह सुर्गीय देह म्ह बदल जावैगी। 53 क्यूँके यो जरूरी सै, ताके म्हारी या नाशवान देह अविनाशी देह म्ह बदल जावै, अर या मरणहार देह कदे ना मरण आळी देह म्ह बदल जावै। 54 जिब इसा होवै सै, तो जो परमेसवर नै पवित्र ग्रन्थ म्ह लिख्या सै, वो पूरा हो जावैगा, “मौत पूरी तरियां तै हार जावैगी अर वजूद म्ह कोनी रहवैगी। 55 हे मौत, तेरी जीत कित्त रही? हे मौत, तेरा डंक कित्त रहया?” (Hades 986) 56 पाप वो डंक सै जो मौत नै लेकै आवै सै, अर नियम-कायदे पाप नै शक्ति देवै सै। 57 पर परमेसवर का धन्यवाद हो, जो म्हारे प्रभु यीशु मसीह के जरिये हमनै पाप अर मौत पै जयवन्त करै सै। 58 ज्याते हे मेरे प्यारे भाईयो, मजबूत अर पक्के रहो, अर प्रभु के काम म्ह सारी हाण बढ़ते जाओ, क्यूँके थम जाणो सो के थारी मेहनत प्रभु म्ह बेकार न्ही सै।

16 इब यरुशलेम नगर म्ह परमेसवर के पवित्र माणसां के खात्तर कट्टे करे गये उस चन्दे के बारे म्ह, जिसा हुकम मन्ने गलातिया परदेस की सारी कलीसियां ताहीं दिया, उसाए थम भी करो। 2 हप्तै के पैहल्ले दिन थारे म्ह तै हरेक, अपणी आमदणी कै मुताबिक कुछ धन अपणे धौरै अलग धरो, ताके मेरे आण पै थमनै चन्दा कट्टा करणा न्ही पड़ै। 3 अर जिब मै ओड़े होऊँगा, तो उन माणसां ताहीं दान लेण खात्तर यरुशलेम भेज्जूंगा जिन ताहीं थमनै भरोस्सेमंद समझा सै, मै उन बिश्वासियाँ के हाथ एक चिट्ठी भी भेज्जूंगा ताके ओड़े के बिश्वासी भी उन ताहीं जाण सकै। 4 जै मेरा भी जाणा जरूरी होया, तो वे मेरे गेल्या जावैंगे। 5 पर मन्ने पैहले मकिदुनिया परदेस जाणा सै, फेर मै मकिदुनिया परदेस तै होके थारे धौरै आऊँगा। 6 पर हो सकै सै, के थारे धौरै ए लम्बे बखत ताहीं ठैहर जाऊँ, अर पूरा जाड्डा थारे धौरै रहूँ, फेर जिस सफर पै मन्ने जाणा हो उसपै थम मन्ने भेज दियो। 7 जै या परमेसवर की इच्छा सै, तो मै थारे धौरै बाद म्ह, घणे दिनां खात्तर आऊँगा, बजाए इसके के इब मै थोड़े दिनां खात्तर, थारे धौरै आऊँ। 8 पर मै पिन्तेकुस्त त्यौहार तक इफिसुस नगर म्ह रहूँगा, 9 क्यूँके याड़े भोत सारे लोग सै, जो

परमेसवर के वचन के बारे में सुनाणा चाहवै सै, अर मेरा याड़े रहणा जरूरी सै, हालाकि याड़े मसीह के भोत बिरोधी सै। 10 जिब तीमुथियुस कुरिन्थुस नगर म्ह आ जावै सै, तो उसके गैल सम्मानपूर्वक बरताव करियो, क्यूँके वो मेरी तरियां प्रभु का काम करै सै। 11 ज्यांतै कोए उसनै तुच्छ न्ही जाणै, पर जो सफर खातर जरूरी चीज सै उसनै दे दिओ, ताके वो मेरे धोरै आ जावै, क्यूँके मै उसकी बाट देखूँ सूँ, के वो बिश्वासी भाईयाँ के गैल आवै। 12 बिश्वासी भाई अपुल्लोस तै मन्नै घणी बिनती करी सै, ताके वो थारे धोरै और दुसरे बिश्वासी भाईयाँ के गेल्या आ जावै, पर वो इस सफर के खातर तैयार कोनी, पर जिब सही बखत होगा तो वो थारे धोरै आ जावैगा। 13 चौक्कस रहो, बिश्वास म्ह डटे रहो, निडर बणे रहों, बिश्वास म्ह मजबूत बणो। 14 जो किमे करो सो प्यार तै करो। 15 हे बिश्वासी भाईयो, थम स्तिफनास के कुणबे नै जाणो सो के वे अखाया परदेस के पैहले बिश्वासी सै, अर पवित्र माणसां की सेवा के खातर त्यार रहवै सै। 16 ज्यांतै मै थारे तै बिनती करूँ सूँ, के इस्यां के अधीन रहो, बल्के हरेक के जो इस काम म्ह कड़ी मेहनती करै सै, अर जो सच्ची भगति के साथ सेवा करै सै। 17 मै स्तिफनास अर फूरतूनातुस अर अखड़कुस के आण तै राज्जी सूँ, क्यूँके वो मेरी मदद करण लागरे सै, जो थम न्ही कर पाए। 18 उननै मेरी अर थारी आत्मा ताहीं चैन दिया सै, इस करके इसे माणसां का आदर करो। 19 आसिया की कलीसियाओं की ओड़ तै थारे ताहीं नमस्कार, अक्विला अर उसकी घरआळी, प्रिसकिल्ला का अर उनके घर की कलीसिया का भी, थारे ताहीं प्रभु म्ह दिल तै नमस्कार। 20 सारे बिश्वासी भाईयाँ का थारे ताहीं नमस्कार। आप्स म्ह एक-दुसरे ताहीं गळे मिलके प्यार तै नमस्कार करो। 21 मुझ पौलुस का थारे ताहीं अपणे हाथ तै यो नमस्कार लिखूँ सूँ। 22 जै कोए प्रभु तै प्यार न्ही राक्खै तो वो श्रापित होवै। हे म्हारे प्रभु आ! 23 प्रभु यीशु का अनुग्रह थारे पै होन्दा रहवै। 24 मै उन सारया तै प्यार करूँ सूँ, जिनका मसीह यीशु के साथ रिश्ता सै। आमीन।

2 कुरिन्थियों

1 या चिट्ठी पौलुस अर म्हारे बिश्वासी भाई तीमुथियुस की ओड़ तै सै, मै पौलुस परमेसवर की इच्छा तै मसीह यीशु का प्रेरित सूं, उस कलीसिया कै नाम जो कुरिन्थुस नगर म्ह सै; अर साब्ले अखाया परदेस के सारे पवित्र माणसां के नाम। 2 हम प्रार्थना करा सां, के पिता परमेसवर अर प्रभु यीशु मसीह की ओड़ तै थारे ताहीं अनुग्रह अर शान्ति मिलदी रहवै। 3 म्हारे प्रभु यीशु मसीह के पिता अर परमेसवर का धन्यवाद होवै, जो दया का पिता, अर जो हमेशा तसल्ली देवै सै। 4 परमेसवर म्हारे सारे दुखां म्ह तसल्ली देवै सै, ताके हम उस तसल्ली कै कारण जो परमेसवर म्हारै ताहीं देवै सै, उन ताहीं भी तसल्ली दे सका, जो इस तरियां के दुखां म्ह हो। 5 क्यूँके जिस तरियां मसीह म्ह हमनै घणे दुख होवै सै, उससे तरियां ए मसीह के जरिये हमनै घणी तसल्ली भी होवै सै। 6 जै हम दुख पावां सां, तो या थारी तसल्ली अर उद्धार कै खात्तर, क्यूँके परमेसवर म्हारे ताहीं तसल्ली देवै सै, तो वो थमनै भी तसल्ली देगा ताके थम धीरज कै गेल्या उन दुखां ताहीं सह लेओ सो, जिन नै हम भी सहवां सां। 7 अर म्हारी आस थारे बारे म्ह पक्की सै, क्यूँके हमनै बेरा सै, के थम जिस तरियां तै म्हारे दुखां म्ह साइड़ी सों, उससे तरियां तै थम म्हारी तसल्ली म्ह भी साइड़ी सों। 8 हे बिश्वासी भाईयो, हम चाहवां सां, के थम म्हारै उन दुखां नै जाणो, जो आसिया परदेस म्ह म्हारै पै पड्या, हम इसे भारया बोझ तै दबगे थे, वो बोझ म्हारे सहण तै बाहर था, उरै ताहीं के हमनै जिन्दा रहण की आस छोड़ दी थी। 9 बल्के हमनै अपने मन म्ह समझ लिया था, के म्हारे ताहीं मार दिया जावैगा, अर हम अपने-आप पै भरोस्सा ना राक्खां, बल्के परमेसवर पै भरोस्सा राक्खां, जो मरे होया नै जिन्दा करै सै। 10 उससे नै म्हारै ताहीं इसी बड्डी मुसीबत तै बचाया, अर बचावैगा, अर उसपै हमनै भरोस्सा सै, अर वो आगै भी म्हारे ताहीं बचान्दा रहवैगा। 11 जिस तरियां थम प्रार्थना कै जरिये म्हारी मदद करो सों, उन आशीषां के खात्तर जो भोत सारे माणसां की प्रार्थना की बजह तै हमनै मिली सै, उसके कारण भोत-से माणस म्हारी ओड़ तै परमेसवर का धन्यवाद करै सै। 12 क्यूँके म्हारी अन्तरात्मा शुद्ध होण के कारण हम घमण्ड करा सां, अर दुनिया म्ह अर खास करके थारे बिच्चाळे, म्हारा चाल-चलण जो परमेसवर की ओड़ तै सै, वो पवित्रता अर सच्चाई सुधा था, ना के दुनियावी ज्ञान तै, पर परमेसवर के अनुग्रह के साथ था। 13 क्यूँके मन्ने अपनी चिट्ठियाँ म्ह हमेशा साफ-साफ लिख्या सै, ताके जिब थम उन चिट्ठियाँ नै पढ़ों तो आसान्नी तै समझ सकों, पर इब भी थम उन ताहीं ठीक तै नही समझ पाते, मन्ने आस सै के एक दिन जिब प्रभु यीशु बोहड़ के आवैगा, तो थम इन ताहीं पूरी तरियां समझ ल्योगे। तब हम थारे गर्व का कारण बणागे, अर थम भी म्हारै खात्तर गर्व का कारण बणागे। 15 मन्ने भरोस्सा सै, के थम मेरी बातान् नै पूरी तरियां तै समझोगे सों, इस करके मै पैहल्या थारे धोरै आणा चाहूँ था, ताके मेरे दुबारा आण तै थमनै दुगणी आशीष मिलै।

16 मेरी योजना या थी, के मै थारे धोरै तै होके मकिदुनिया परदेस म्ह जाऊँ, अर दुबारा मकिदुनिया परदेस तै थारे धोरै आऊँ; अर मै उम्मीद करूँ सूं, के थम मन्ने यहूदिया परदेस के सफर खात्तर जरूरत की चीज देके मेरी मदद करोगे। 17 थम मेरे तै पूछ सकों सों, के मन्ने अपनी योजना क्यूँ बदली। थम के सोचवों सों, के मन्ने या योजना लापरवाही तै बणाई, या फेर मै दुनिया के माणसां की तरियां सूं? जिनके जुबान पै तो हॉ हो सै, अर मन म्ह ना हो सै। 18 जिसा परमेसवर बिश्वास जोगा सै, उससे तरियां म्हारी बात भी बिश्वास जोगी सै। 19 क्यूँके परमेसवर का बेटा यीशु मसीह जिसका म्हारै जरिये यानिके म्हारे अर सिलवानुस अर तीमुथियुस के जरिये थारे बिचाळे प्रचार होया, उस मसीह यीशु म्ह “हाँ” अर “ना” दोन्नु नही हो सकदे। पर उस म्ह “हाँ” ए “हाँ” होई। 20 क्यूँके परमेसवर के सारे वादे मसीह यीशु म्ह पूरे होए सै। ज्यांतै हम आमीन बोल्ला सां यानी “हाँ”, ताके म्हारै जरिये परमेसवर की महिमा होवै। 21 परमेसवर ए सै, जो हमनै थारे गेल्या मसीह म्ह मजबूत करै सै, परमेसवर नै म्हारे पै अपनी मोहर लगाके बयान्ने के रूप म्ह अपना पवित्र आत्मा म्हारे मन म्ह बसाके म्हारे ताहीं चुणया सै। 23 परमेसवर मेरी इस सच्चाई का गवाह सै के मै दुबारा कुरिन्थुस नगर म्ह ज्यांतै कोनी आया, के मै थमनै दुख देणा कोनी चाहूँ था। 24 इसका मतलब यो कोनी के हम बिश्वास कै बारे म्ह थारे पै हक जताणा चाहवां सां; पर थारे आनन्द म्ह साइड़ी सां, क्यूँके थम बिश्वास ए तै डटे रहो सो।

2 मन्ने अपने मन म्ह न्यू ठान लिया था, के दुबारा थारे धोरै ओड़ै आके थमनै दुख ना देऊँ। 2 क्यूँके जै मै थमनै उदास करूँ, तो थारे अलावा मन्ने आनन्द देण आळा कोए कोनी रह्या, सिर्फ थमे सों, जिस ताहीं मन्ने उदास करया। 3 अर मन्ने याए बात थारे तै ज्यांतै लिक्खी के कदे इसा ना हो के मेरे आण पै, जिनतै मन्ने आनन्द मिलणा चाहिये, मै उनतै उदास होऊँ; क्यूँके थम सारया पै मन्ने इस बात का भरोस्सा सै, के जो मेरा आनन्द सै, वोए थम सारया का भी सै। 4 बडे क्लेश अर दुखी मन तै मन्ने घणेए आँसू बहा-बहाके थारे ताहीं चिट्ठी लिखी, ज्यांतै नही के थम उदास होवो पर ज्यांतै के थम उस घणे प्यार नै जाण ल्यो, जो मन्ने थारे तै सै। 5 अर जै किसे नै उदास करया सै, तो मेरे ताहीं ए नही बल्के थोड़ा-थोड़ा थारे सारया ताहीं उदास करया सै, अर मै उसकी गलतियाँ के बारे म्ह इसतै ज्यादा कुछ और नही कहणा चाहन्दा। 6 इसे माणस कै खात्तर या सजा जो सारे बिश्वासी भाईयाँ नै उस ताहीं देई सै, वा भतेरी सै। 7 ज्यांतै इसतै भला यो सै, के उसका अपराध माफ करो अर उस ताहीं उत्साहित करो, इसा ना हो के वो माणस घणी उदासी म्ह डूब जावै। 8 इस कारण मै थारे तै बिनती करूँ सूं के उस ताहीं अपने प्यार का सबूत द्यो। 9 क्यूँके मन्ने यो ज्यांतै भी लिख्या था के थमनै परख ल्यूँ के थम मेरी सारी बातान् नै मानण नै त्यार सो के नही। 10 जिस ताहीं थम किसे बाबत माफ करो सो, उस ताहीं मै भी माफ करूँ सूं, क्यूँके जिस बात के बारे मन्ने उस ताहीं माफ करया सै, जै वो सच म्ह माफी लायक था, तो मन्ने मसीह ताहीं हाजिर जाणके उस ताहीं थारे

खात्तर माफ करया सै। 11 ताके शैतान का म्हारै पै दाँव ना चाल्लै। क्यूँके हम उसके बुरे इराद्यां तै अनजाण कोनी। 12 जिब मै मसीह का सुसमाचार सुणाण नै त्रोआस नगर म्ह आया, अर प्रभु नै मेरे ताहीं वचन सुणाण खात्तर एक राह खोल दिया। 13 अपणे बिश्वासी भाई तीतुस ताहीं ओड़े ना पाके, मेरे मन नै चैन कोनी मिल्या, ज्यातै बिश्वासी भाईयाँ तै बिदा होके मै मकिदुनिया परदेस म्ह बोहड़ गया। 14 पर परमेसवर का धन्यवाद हो, जो मसीह के साथ म्हारी संगति होण के कारण हमनै जीत के उत्सव म्ह लिये फिरै सै, इब परमेसवर म्हारे ताहीं खसबूदार इत्र की ढाळ मसीह का ज्ञान फैलाण खात्तर हरेक जगहां इस्तमाल करै सै। 15 हम परमेसवर के खात्तर मसीह के जरिये, जळाई गई उस धूप की खस्बू की ढाळ सां, जो उद्धार पाण आळे अर नाश होण आळे दोनुआ के खात्तर सै, यो परमेसवर का सुसमाचार सै, अर सारे माणसां धोरै फैल्लण लागरया सै। 16 कितन्याँ के खात्तर तो मरण के कारण मौत की गन्ध, अर कितन्याँ के खात्तर जिन्दगी के कारण जिन्दगी की खस्बू सां। कोए भी माणस इस काम नै न्ही कर सकता। 17 हम उन बरगे कोनी जो परमेसवर के वचन नै पईसा खात्तर प्रचार करै सै; पर यो जाण सां के परमेसवर नै म्हारे ताहीं भेज्या सै अर मन की सच्चाई तै हम उसका वचन आज्ञाकारिता अर मसीह अधिकार तै सुणावां सां, यो जाणके के परमेसवर म्हारे ताहीं देखै सै।

3 के हम दुबारा अपणी बड़ाई करण लाग्गे? या हमनै और माणसां की ढाळ सिफारिश की चिट्ठियाँ थारे धोरै ल्याण की या थारे तै लेण की जरूरत सै? 2 थम म्हारे खात्तर एक चिट्ठी की ढाळ सां, जो म्हारै खात्तर सिफारिश करै सै, अर म्हारे दिलां पै लिक्खी होई सै, उस ताहीं सारे माणस पढ़ सकै, अर म्हारे भले काम्मां नै पिच्छाण सकै। 3 यो तो साफ दिक्खे सै के थम मसीह की चिट्ठी के समान सां, जो मसीह की ओड़ तै सै, जो म्हारी सेवकाई का फळ सै, अर जो स्याही तै पत्थर की पटियाँ पै न्ही, पर जिन्दे परमेसवर की आत्मा तै दिल की माँस रूपी पटियाँ पै लिक्खी सै। 4 हम इस करके कहवां सां, के हम मसीह के जरिये परमेसवर पै भरोस्सा करा सां। 5 हम यो न्ही कहन्दे के म्हारी कुछ करण की काबलियत खुद तै सै, पर वो काबलियत परमेसवर की ओड़ तै सै। 6 जिसनै म्हारै ताहीं नये करार के सेवक होण के लायक भी बणाया, मूसा के नियम-कायदा के सेवक न्ही, बल्के पवित्र आत्मा के सेवक सां; क्यूँके मूसा के नियम-कायदे ना मानण ते मौत आवे सै, पर पवित्र आत्मा जिन्दगी देवै सै। 7 मूसा नबी के नियम-कायदे जो पत्थर की पटियाँ पै लिखे गये थे, तब परमेसवर की महिमा ओड़ै जाहिर होई थी, उस कारण भोत बखत ताहीं इस्राएल के माणस मूसा नबी का चेहरा भी कोनी देखण पाए थे, क्यूँके उसका चेहरा तेजोमय था, उसके चेहरे का तेज ज्यादा बखत ताहीं कोनी रह सका, इस करके मूसा नबी ताहीं जो नियम-कायदे दिए गये थे, वे मौत नै लेके आवे थे। तो पवित्र आत्मा का काम जो नये करार के मुताबिक सै, वो और भी तेजोमय होवेगा। 9 क्यूँके जिब माणसां नै कसूरवार बणाण आळा

पुराणा करार तेजोमय था, तो जो माणसां नै धर्मी बणाण आळा नया करार सै और भी तेजोमय होवेगा। 10 अर जो तेज पुराणे करार तै आवै था, उसका तेज जो इब नये करार तै आवै सै, उसके आगै कुछ भी कोनी। 11 क्यूँके जो तेज मूसा नबी के नियम-कायदा म्ह था, जिब वो जो घटदा जावे था, तोभी वो तेजोमय था, तो उस नये करार का तेज जो स्थिर सै, वो और भी तेजोमय होवेगा। 12 ज्यातै इसी आस राखके हम हिम्मत के गेल्या बोल्लां सां। 13 हम मूसा नबी की ढाळ न्ही, जिसनै अपणे मुँह पै पड़दा गेरया था। ताके इस्राएली माणस उस घटणआळे तेज के अन्त नै ना देख पावै। 14 पर इस्राएल के माणसां की अकल खराब होगी, क्यूँके आज ताहीं पुराणा नियम पढ़ते बखत उनके दिलां पै वोए पड़दा पड्या रहवै सै, पर वो पड़दा मसीह पै बिश्वास करण तै ए उठ जावै सै। 15 आज ताहीं जिब कदे भी मूसा नबी की किताब पढ़ी जावै सै, तो उन ताहीं पूरी तरियां समझ म्ह कोनी आन्दी। 16 पर जिब कदे वो यीशु मसीह पै बिश्वास करैगें, तो वो पड़दा उठ जावैगा। 17 प्रभु तो आत्मा सै: अर जित्त किते परमेसवर का आत्मा सै, ओड़ै नियम-कायदे तै आजादी सै। 18 हम परमेसवर की महिमा इस तरियां देख्वां सां, जिस तरियां शीशे म्ह अपणा मुँह, उस मुँह के आगै पड़दा कोनी, परमेसवर आत्मा सै। अर वो हमनै अपणे तेजस्वी स्वरूप म्ह थोड़ा-थोड़ा करके बदलता जावां सै।

4 ज्यातै जिब म्हारै पै इसी दया होई के हमनै या परमेसवर के वचन प्रचार करण की सेवा मिली, तो हम हिम्मत न्ही हारते। 2 हमनै शर्मनाक अर गुप्त काम्मां ताहीं छोड़ दिया, अर ना चतुराई करते, अर ना परमेसवर के वचन नै तोड़-मरोड़ के पेश करा सां। पर परमेसवर के वचन की सच्चाई नै माणसां के स्याम्ही जाहिर करां सां, ताके हरेक माणस परमेसवर के स्याम्ही या गवाही दे सके सै, के यो सच सै। 3 पर जै म्हारै सुसमाचार नै कोए समझ न्ही पावै, तो यो नाश होण आळा ए के खात्तर गुप्त सै। 4 इस दुनिया के ईश्वर शैतान नै उन अबिश्वासियाँ की अकल ताहीं, आँधी कर दिया सै, ताके उस चाँदणे नै जो मसीह के तेजोमय सुसमाचार तै आवै सै, उस ताहीं देख ना सकै। जो दिखावे सै के परमेसवर किसा सै। (aiōn g165) 5 क्यूँके हम खुद नै न्ही, पर मसीह यीशु नै प्रचार करा सां, के मसीह यीशु ए प्रभु सै। अर अपणे बारै म्ह न्यू कहवां सां, के हम यीशु के कारण थारे सेवक सां। 6 ज्यातै के परमेसवर नै कह्वा, “अन्धकार म्ह तै चाँदणा चमके,” अर परमेसवर म्हारै दिलां म्ह चाँदणा की तरियां समझ दे, ताके हम परमेसवर की महिमा नै समझ सका, जो यीशु मसीह म्ह सै। 7 हम माट्टी के बासणा की तरियां सां, जिस म्ह धन भरया सै, या घणी सामर्थ्य म्हारी न्ही, बल्के परमेसवर की सै। 8 हम चौगरदे तै कळेश तो भोग्गां सां, पर संकट म्ह न्ही पड़दे, म्हारै धोरै उपाय तो कोनी, पर निराश न्ही होन्दे। 9 सताए तो जावां सां, पर छोड़्ते न्ही जान्दे; गिराए तो जावां सां, पर नाश न्ही होन्दे। 10 हम हर बखत मौत के खतरे म्ह रहवां सां, जिस तरियां यीशु म्हारे खात्तर मरया गया, ताके हम दुसरे माणसां नै म्हारे उन काम्मां के जरिये दिखा सका

के यीशु म्हारे म्ह बसे सै। 11 क्यूँके हम जिन्दे जी सारी हाण यीशु के कारण मौत खतरे म्ह रहवां सां, ताके मसीह यीशु का जीवन म्हारी मरण आळी देह म्ह जाहिर होवै। 12 इस करके हम मौत के खतरे म्ह रहवां सां, इसका नतिज्जा यो होगा के थमनै अनन्त जीवन मिलेगा। 13 पर हम तो प्रचार करते रहवांगे क्यूँके म्हारा बिश्वास उस भजनकार की ढाळ सै, जिसनै भजन संहिता म्ह कह्ला, “मै परमेसवर पै बिश्वास करूँ सूँ,” इस खात्तर बोल्लू सौ। 14 इस करके हमनै बेरा सै के जिसनै प्रभु यीशु ताहीं मुर्दा म्ह तै जिन्दा करया, वोए परमेसवर हमनै भी यीशु म्ह जिन्दा करेगा, अर थारे गेल्या हमनै भी अपणी मौजूदगी म्ह ले जावेगा। 15 क्यूँके सारे दुख हमनै सहे, ताके भोत सारे लोग जाण सकै के परमेसवर कितना करुणामय सै, अर परमेसवर की महिमा कै खात्तर ज्यादा तै ज्यादा लोग उसका धन्यवाद करै। 16 ज्यातै हम हिम्मत न्ही हारते; हालाके म्हारी देह नाश होन्दी जावै सै, तोभी म्हारी अन्तरात्मा हर रोज नई होन्दी जावै सै। 17 क्यूँके म्हारी मौजूदा परेशानियाँ भोत छोट्टी सै, अर वो लम्बे बखत ताहीं कोनी रहवेगी। क्यूँके ये अनन्त महिमा का कारण बणैगी, जो म्हारे सोचण तै भी बड़ी सै। (aiōnios g166) 18 अर हम तो देख्खी होई चिज्जां ताहीं न्ही पर अनदेख्खी चिज्जां नै देख्खे रहवां सां; क्यूँके देख्खी होई चीज माडे-से दिन की सै, पर अनदेख्खी चीज सारी हाण बणी रहवै सै। (aiōnios g166)

5 क्यूँके हमनै बेरा सै के पलभर का शारीरिक देह सरीखा घर जो हमनै मिल्या सै, जो नाश करया जावेगा, तो हमनै परमेसवर के कान्ही तै सुर्ग पै एक इसा घर मिलेगा, जो हाथ्यां तै बणया होया न्ही, पर सारी हाण खात्तर टिकाऊ सै। (aiōnios g166) 2 इस देह म्ह तो हम कराहवा अर बट्टी लालसा राक्खां सां, ताके अपणे सुर्गीय देह नै पैहर ल्या 3 क्यूँके सुर्गीय देह पैहरण तै हम उघाड़े न्ही पाए जावेंगे। 4 अर हम शारीरिक देह सरीखे घर म्ह रहन्दे होए बोझ तै दबे रोन्दे-पिटते रहवां सां, क्यूँके हम इसनै छोड़णा न्ही चाहन्दे, पर हम चाहवां सां के परमेसवर हमनै सुर्गीय देह देवै, ताके शारीरिक देह नाश होण कै बाद हमनै अनन्त राज्य म्ह सुर्गीय देह मिल जावै। 5 जिसनै म्हारे ताहीं जिस सुर्गीय देह के खात्तर त्यार करया सै, वो परमेसवर सै, जिसनै म्हारे ताहीं ब्याने म्ह पवित्र आत्मा भी दिया सै। 6 आखर म्ह हम सारी हाण होसला राक्खां सां, अर या जाणां सां के जिब ताहीं हम देह म्ह रहवां सां, तब तक प्रभु के सुर्ग तै न्यारे सां, जो सुर्ग म्ह सै। 7 हम प्रभु यीशु पै बिश्वास करण तै जिवां सां, ना के उस ताहीं देख्खण तै। 8 ज्यातै हम होसला राक्खां सां, अर हम मरण के बाद, देह तै न्यारे होके प्रभु के गेल्या रहणा हम और भी घणा बढ़िया समझां सां। 9 इस कारण म्हारे मन की इच्छा या सै, चाहे हम सुर्ग म्ह परमेसवर के गैल रहवां, या धरती पै रहवां, पर हम उसनै भान्दे रहवां। 10 क्यूँके जरूरी सै के हम सब मसीह के न्याय आसन के स्याम्ही खड़े होवां, ताके हरेक माणस अपणे-अपणे आच्छे-भुन्डे काम्मां का बदला पावै, जो उसनै शारीरिक देह के जरिये करे सै। 11 ज्यातै प्रभु का भय मानकै हम माणसां ताहीं न्यू समझावां सां, के वे

इस सच्चाई पै बिश्वास करै, अर परमेसवर जाणै सै के हम कौण सां, अर मै उम्मीद करूँ सूँ, के थम भी अपणी अन्तरात्मा म्ह हमनै आच्छी तरियां जाण ल्यो। 12 हम फेर भी अपणी बड़ाई थारे स्याम्ही कोनी करदे, बल्के हम अपणे बारे म्ह थारे ताहीं गर्व करण का मौक्का देवां सां, के थम उननै जवाब दे सको, जो अपणे मन की बजाये बाहरी रूप पै घमण्ड करै सै। 13 जै कोए कहवै के हम पागल सां, तो परमेसवर कै खात्तर, अर जै श्याणे सा तो थारे खात्तर सां। 14 क्यूँके मसीह का प्यार हमनै मजबूर कर देवै सै। ज्यातै के हम न्यू समझां सां, के जिब एक माणस सारया कै खात्तर मरया तो सारे माणस मरगे। 15 अर मसीह इस कारण सारे माणसां खात्तर मरया ताके जो जिन्दे सै, वे आगै तै अपणे खात्तर न्ही जीवै, पर मसीह कै खात्तर जीवै, जो उनके खात्तर मरया अर दुबारा जिन्दा होग्या। 16 इस करके इब हमनै माणसां ताहीं दुनियावी नजरिये तै देख्खणा छोड़ दिया सै। हालाके एक बखत था, जिब हमनै मसीह ताहीं भी दुनियावी नजरिये तै देख्खा था, पर इब न्ही, क्यूँके इब हम उस ताहीं जाणगे सां। 17 जै कोए मसीह म्ह बिश्वास करै सै, तो वो नयी जिन्दगी पा लेवै सै। पुराणा सुभाव चल्या जावै सै, अर नया सुभाव आ जावै सै। 18 ये सारी बात परमेसवर की ओड़ तै सै, जिसनै मसीह कै जरिये अपणे गेल्या म्हारा मेळ-मिलाप कर लिया सै, अर मेळ-मिलाप की सेवकाई का काम म्हारे ताहीं सौंप दिया सै। 19 यानिके परमेसवर नै मसीह म्ह होके अपणे गेल्या दुनिया का मेळ-मिलाप कर लिया, अर माणसां के पापां का दोष उनपै न्ही लाया, अर याए बात मेळ-मिलाप का सन्देस सै, जो परमेसवर नै म्हारे ताहीं सौंप दिया सै। 20 ज्यातै, हम मसीह के राजदूत सां। परमेसवर म्हारे जरिये माणसां तै बिनती करण लाग रहया सै। हम मसीह की ओड़ तै थारे तै बिनती करा सां, के परमेसवर कै गेल्या मेळ-मिलाप कर ल्यो। 21 मसीह जो पाप तै अनजाण था, उस्से ताहीं परमेसवर नै म्हारे खात्तर पापी ठहराया, ताके हम परमेसवर की नजर म्ह धर्मा बण जावां, क्यूँके यीशु मसीह नै म्हारे पापां का दण्ड अपणे उप्पर ले लिया।

6 हम जो परमेसवर के गैल काम करणीये सां, या बिनती करां सां, के उसका अनुग्रह जो थारे पै होया, उसनै बेकार ना जाण द्यो। 2 क्यूँके पवित्र ग्रन्थ म्ह परमेसवर नै कह्ला सै, “सही बखत पै मनै तेरी सुण ली, अर उद्धार के दिन मनै तेरी मदद करी।” सुणो, इब्बे वो सही बखत सै; अर आज ए वो उद्धार का दिन सै। 3 हम परमेसवर के गैल काम करणीया के कारण, हम किसे बात म्ह ठोक्कर खाण का कोए भी मौक्का कोनी देन्दे, ताके म्हारी सेवा पै कोए दोष ना आवै। 4 इस करके हम सारे हालातां म्ह खुद ताहीं परमेसवर के सच्चे सेवक के समान पेश करां सां, जिसा धीरज तै दुख सहण म्ह, गरीबी म्ह, हर बखत संकट सहण म्ह, 5 अर कोड़े खाण म्ह, कैद होण म्ह, रोळे-रब्दयां म्ह, मेहनत म्ह, जागदे रहण म्ह, ब्रत करण म्ह, 6 पवित्रता म्ह, ज्ञान म्ह, धीरज म्ह, करुणा तै, पवित्र आत्मा तै, 7 सच्चे प्यार म्ह, सच के वचन म्ह, परमेसवर की सामर्थ्य म्ह, हम धार्मिकता के हथियारां नै सोळे हाथ तै

लड़ण खात्तर अर ओळे नै बचाव खात्तर इस्तमाल करां सां। 8 जिब माणस हमनै आच्छे या बुरे माणस कहवै, जिब वे म्हारी बड़ाई करै या अर बेजती करै, तो हम भकाण आळे जिसे लाग्गा सां, तोभी सच्चे सां। 9 कई माणस हमनै अनजाणा के बरगे समझै सै, तोभी हम मशहुर सां, मरे होए बरगे दिक्खां सां पर देख्खो जिन्दे सां, मार खाण आळा के बरगे सां पर जी तै कोनी मारे जान्दे। 10 म्हारा पै भी दुख का बखत आवै सै, पर हम सारी हाण आनन्दित रहवां सां, हम खुद तो कंगालां की तरियां सां, पर घणखरयां नै आत्मिक रूप तै साहूकार बणा देवां सां, हम इसे सा जिस ढाळ म्हारै धोरै किमे कोनी, तोभी सारा किमे सै, येए सारी बात हमनै परमेसवर का सच्चा सेवक बणण म्ह मदद करै सै। 11 हे कुरिन्थियों नगर के बिश्वासियों, हमनै खुलकै थारे तै बात करी सै, हम पूरे मन तै थारे तै प्यार करां सां। 12 म्हारै मन म्ह थारे खात्तर प्यार कम न्ही होन्दा, पर थारा प्यार म्हारे खात्तर कम होग्या। 13 पर मै अपणे बाळक जाणकै थारे तै कहूँ सूँ, के थम भी उसके बदले पूरे मन तै म्हारे तै प्यार करो। 14 अबिश्वासियाँ कै गैल साझीदार ना बणो, क्यूँके धार्मिकता अर अधर्म का मेलजोल कोनी। या चॉदणे अर अन्धकार की संगति कोनी होन्दी। 15 अर मसीह का शैतान के गैल कोए रिश्ता कोनी होन्दा, या बिश्वासी कै गेल्या अबिश्वासी का कोए नात्ता कोनी। 16 अर परमेसवर कै मन्दर म्ह मूर्तियाँ का काम कोनी। क्यूँके हम तो जिन्दे परमेसवर के मन्दर सां, जिसा परमेसवर नै पवित्र ग्रन्थ म्ह कहा, “मै अपणे माणसां कै गैल रहूँगा, अर उन म्ह हान्ड्या-फिरया करूँगा, अर मै उनका परमेसवर होऊँगा, अर वे मेरे माणस होवेंगे।” 17 ज्यातै प्रभु अपणे वचनां के जरिये कहवै सै, “उन माणसां के बिचाळै तै लिक्डो जो परमेसवर ताहीं न्ही मानते, अर न्यारे रहो, अर अशुद्ध चिज्जां तै कोए रिश्ता ना राक्खों, तो मै थमनै अपणाऊँगा। 18 अर मै थारा पिता होऊँगा, अर थम मेरे बेटे अर बेटियाँ होओगे। यो सर्वशक्तिमान प्रभु का वचन सै।”

7 हे प्यारे बिश्वासी भाईयो, जिब हमनै वो वादा मिल्या सै, ताके हम परमेसवर की ऊलाद कुहावां, तो आओ, हम अपणी देह अर आत्मा नै गंदा करण आळे सारे बुरे काम छोड़ द्या, अर परमेसवर का भय मानते होए पूरी रीति तै अपणे-आपनै पवित्र करण की कोशिश करां। 2 थम म्हारे तै पूरे मन तै प्यार करो। हमनै ना किसे पै जुल्म करया, ना किसे गैल अन्याय करया, अर ना किसे ताहीं ठग्या सै। 3 मै थमनै कसूरवार ठहराण कै खात्तर न्यू न्ही कहन्दा। क्यूँके मै पैहल्याए तै कह चुक्या सूँ, के हम थारे ताहीं पूरे मन तै प्यार करां सां, अर हम थारे गेल्या जीण-मरण कै खात्तर भी त्यार सां। 4 मै थारे तै घणे बिश्वास कै गेल्या बोल्लण लागरया सूँ, मन्ने थारे पै घणा गर्व सै, मै बड़ा उत्साहित सूँ। अपणे सारे क्लेश म्ह, मै आनन्द तै घणा भरपूर रहूँ सूँ। 5 त्रोआस नगर तै जिब हम मकिदुनिया परदेस म्ह आये, फेर भी म्हारी देह नै चैन कोनी मिल्या, पर हम चौगरदे तै क्लेश पावां थे, बाहरणै लड़ाई-झगड़े थे, म्हारे मन म्ह डरावणी बात थी। 6 तोभी दुखियाँ ताहीं तसल्ली देणआळे

परमेसवर नै तीतुस कै आण तै म्हारे ताहीं उत्साहित करया। 7 ना सिर्फ उसके आण तै, पर उस उत्साह के जरिये भी, जो तीतुस नै थारे म्ह पाया, उसनै थारी लालसा, थारे दुख, अर मेरे खात्तर थारी धुन की खबर म्हारै ताहीं सुणायी, जिसतै मन्ने और भी खुशी होई। 8 मै पसताऊ कोनी, के मन्ने थारे ताहीं चिट्ठी लिखी, हालाकि मन्ने अपणी चिट्ठी तै थारे ताहीं दुखी करया, मै पैहल्या तो पछताया, जिब मन्ने देखा के थम मेरी चिट्ठी तै थोड़े बखत खात्तर तो उदास होए साँ। 9 पर इब मै खुश सूँ, ज्यातै न्ही के मन्ने थारे ताहीं दुख पोंहचाया, बल्के ज्यातै के थमनै उस दुख कै कारण पाप करणा छोड़ दिया, क्यूँके थम दुखी थे, जिसा परमेसवर चाहवै था, के म्हारी ओड़ तै थमनै किसे बात का नुकसान ना पोहोचै। 10 क्यूँके परमेसवर की ओड़ तै मिलण आळा दुख, पापां नै छोड़ण का कारण बणै सै, जिसका नतिज्जा छुटकारा सै, उस तरियां के दुख का पछतावा कोनी होन्दा। पर दुनिया तै मिलण आळा दुख अनन्त मौत का कारण बणै सै। 11 इस करके सुणो, परमेसवर की ओड़ तै मिलण आळे दुख तै थम कितने गुणवाण बण गये, थारे म्ह कितना उत्साह, जबाबदारी, रिस, भय, लालसा, धुन अर बदला लेण का विचार छोड़णा, थमनै सारी तरियां तै न्यू साबित कर दिया सै, के थमनै इन सारी बातां म्ह कोए कमी कोनी छोड़्ही। 12 फेर मन्ने पैहले जो थारे धोरै वो चिट्ठी लिखी थी, वा ना तो उसके कारण लिखी, जिसनै नाइंसाफी करी, अर ना उसके कारण जिसके साथ नाइंसाफी करी गई, पर ज्यातै के थारा जोश जो म्हारै खात्तर सै, वो परमेसवर कै स्याम्ही थारे पै जाहिर हो जावै। 13 ज्यातै हमनै तसल्ली मिली, म्हारी तसल्ली तो तीतुस की खुशी के कारण सै, म्हारे ताहीं और भी घणी खुशी होई क्यूँके उसका मन थारे कारण और भी ज्यादा खुशमिसाज होग्या सै। 14 क्यूँके जै मन्ने उसके स्याम्ही थारे बारे म्ह कुछ गर्व दिखाया, तो मै शर्मिन्दा कोनी होया, पर जिसा हमनै थारे तै सारी बात सच-सच कह दी थी, उससे तरियां ए म्हारा गर्व दिखाणा तीतुस कै स्याम्ही भी सच्चा लिक्ड्या। 15 जिब तीतुस ताहीं थम सारया के आज्ञाकारी होण की बात याद आवै सै, अर किस ढाळ थम डरदे अर काम्बदे होए उसतै मिले, तो उसका प्यार थारे खात्तर और भी बधता जावै सै। 16 मन्ने घणी खुशी हो सै, क्यूँके मन्ने हरेक बात म्ह थारे पै पूरा भरोस्सा सै।

8 इब हे बिश्वासी भाईयो, हम थमनै परमेसवर के उस अनुग्रह की खबर देवां सां, जो मकिदुनिया परदेस की कलीसिया के बिश्वासियाँ पै होया सै। 2 उनकी परख बड़ी मुसीबतां म्ह होवै सै, अर घणी गरीब होण पै भी खुशी अर खुल्ले दिल तै दुसरे बिश्वासियाँ की मदद करी। 3 उनके बारे म्ह मेरी या गवाही सै, के उननै जितना दे सकै थे दिया, बल्के उसतै भी ज्यादा बढ़कै दिया। 4 उननै भोत ज्यादा बिनती करी के यो दान उन बिश्वासी भाईयाँ म्ह बाट्या जावै जो यरुशलेम नगर म्ह सै। 5 उननै म्हारी सोच तै भी बढ़कै करया, उननै पैहल्या काम यो करया, के उननै अपणे-आप ताहीं परमेसवर के खात्तर अर फेर म्हारे खात्तर अपणे-आप ताहीं भी दे दिया, जिसा के परमेसवर चाहवै था के वो इसा करै।

6 ज्यांतै हमनै तीतुस तै बिनती करी, के जिस तरियां उसनै पैहल्या इस दान देण के काम की शुरुआत करी थी, उससे तरियां ए वो इस सराहनीय काम ताहीं थारे बिचाळे पूरा भी करै ले। 7 ज्यांतै जिसा थम हरेक बात म्ह यानिके बिश्वास, वचन प्रचार करण म्ह, ज्ञान अर सारी ढाळ की कोशिश म्ह, अर उस प्यार म्ह जो म्हारै तै करो सो, बढ़दे जाओ सो, उससे तरियां ए गरीब बिश्वासियाँ खात्तर दान देण म्ह भी बढ़ते जाओ। 8 मै थमनै कोए हुकम कोनी देंदा, मै सिर्फ बाकियाँ के उत्साह तै थारे प्यार की सच्चाई नै परखण लागरया सूं। 9 थम म्हारै प्रभु यीशु मसीह के अनुग्रह नै जाणो सो, के वो धनी होके भी थारे खात्तर कंगाल बण गया, ताके उसके कंगाल हो जाण तै थम धनी हो जाओ। 10 पिच्छली साल थमनै दान दिया बल्के दान देण की इच्छा म्ह आगै भी थे, इस बारें म्ह मै थमनै एक सलाह देणा चाहूँ सूं, के दान देण का सब तै बढ़िया तरिकका के से? 11 जो काम थमनै शुरु करया सै, उस ताहीं पूरा भी करो। इस काम के खतम होण तक, इसे तरियां उत्साहित बणे रहों, जिस तरियां उसकी योजना तैयार करते बखत थे। इस काम नै अपणी पूंजी अर काबलियत के मुताबिक पूरा भी करो, जो इस बखत थारे धोरे सै। 12 जै किसे की दान देण की इच्छा हो, तो जो कुछ उसके धोरे सै, उससे के मुताबिक उसका दान लिया जावैगा, ना के उसके मुताबिक जो उसके धोरे कोनी। 13 म्हारा मतलब यो कोनी के दुसरयां की भलाई करण तै थम खुद दुख सहो, म्हारा मकसद सिर्फ सब के साथ एक जिसा बरताव करो। 14 इस बखत तो थारी बढ़ोतरी उनकी जरूरत पूरी करण के खात्तर भोत सै, कदे यो भी हो सकै सै, के थमनै खुद नै जरूरत पड़े अर वे अपणी बढ़ोतरी म्ह तै थारी मदद करै फेर दोन्नु पक्ष बरोबर हो जावेंगे। 15 जिसा के पवित्र ग्रंथ म्ह लिख्या सै, “जिसनै घणा कट्टा करया उसनै कुछ भी घणा न्ही पाया। अर जिसनै घाट कट्टा करया उसनै कुछ कमी कोनी होई।” 16 परमेसवर का धन्यवाद होवै, जिसनै थारे खात्तर वाए चिंता तीतुस के मन म्ह दे दी। 17 जब हमनै उस ताहीं थारे धोरे आण खात्तर बिनती करी, तो उसनै म्हारी बिनती मान ली, अर घणा उत्साहित होके वो अपणी मर्जी तै थारे धोरे चल्या गया। 18 हमनै उसके गेल्या उस बिश्वासी भाई ताहीं भी भेज्या सै, जिसका नाम सुसमाचार फैलाण के बारें म्ह सारी कलीसिया म्ह फैल्या होया सै। 19 अर इतणाए न्ही, पर वो कलीसिया के माणसां के जरिये ठहराया भी गया, ताके इस दान के काम के खात्तर म्हारै गेल्या जावै। हम दान देण की या सेवा यरुशलेम के बिश्वासियाँ ताहीं ज्यांतै करा सां के प्रभु की महिमा अर सेवा करण म्ह म्हारै मन की तयारी जाहिर हो जावै। 20 हम इस बात म्ह चौक्कस रहवां सां के खुल्ले दिल तै दान देण की सेवा के इस काम के बारें म्ह जो हम करा सां, कोए म्हारै पै दोष ना लाण पावै। 21 क्यूँके जो बात सिर्फ प्रभु ए के स्याम्ही न्ही, पर माणसां के स्याम्ही भी भली सै हम उननै आच्छी तरियां तै करां सां। 22 हमनै उसके गेल्या अपणे एक और बिश्वासी भाई ताहीं भी भेज्या सै, जिस ताहीं हमनै बार-बार परख के घणी बातां म्ह हौसलै आळा पाया सै; पर इब थारे पै उसनै

घणा भरोस्सा सै, इस कारण वो और भी घणा हौसलै आळा सै। 23 जै कोए तीतुस के बारे म्ह बुझै, तो वो मेरा मित्तर अर थारे खात्तर मैरे गैल काम करणीया सै, अर जै कोए म्हारै बिश्वासी भाईयाँ के बारे म्ह बुझै, तो वे कलीसियाओं के भेज्जे होए अर मसीह नै महिमा देण आळे सै। 24 इस करके कलीसियाओं के बिश्वासियाँ स्याम्ही अपणे प्यार नै जाहिर करण के जरिये साबित करो, के म्हारा थारे बारें म्ह गर्व करणा साच्चा सै।

9 मन्ने इब उन पवित्र माणसां नै जो यरुशलेम म्ह रहवै सै, उन ताहीं दान देण की सेवकाई के बारे म्ह लिखण की जरूरत कोनी। 2 क्यूँके मदद करण की थारी मन की लालसा नै मै पैहले तै ए जाणू सूं, जिसके कारण मै थारे बारे म्ह मकिदुनिया कलीसिया के बिश्वासी भाईयाँ के स्याम्ही गर्व करूँ सूं, के थम अखाया परदेस के माणस एक साल पैहल्या तै दान देण खात्तर त्यार थे, अर थारे जोश नै घणखरे मकिदुनिया परदेस के बिश्वासियाँ ताहीं भी दान देण खात्तर उत्साहित करया सै। 3 पर मै थारे धोरे तीतुस अर दो बिश्वासी भाईयाँ नै भेज्जू सूं, के हमनै जो गर्व थारे बारे म्ह दिखाया, वो इस बात म्ह बेकार ना ठहरै; पर जिसा मन्ने कह्वा उसाए थम यरुशलेम के बिश्वासी भाईयाँ नै दान देण खात्तर त्यार रहो। 4 इसा ना हो के जब मकिदुनिया के कुछ बिश्वासी भाई मैरे गेल्या आवै अर वो थमनै दान देण खात्तर त्यार न्ही पावै, तो हो सकै सै, के हम थारे पै भरोस्से करण के कारण शर्मिन्दा होवां, पर थम म्हारै तै भी ज्यादा शर्मिन्दा होओगे। 5 ज्यांतै मन्ने बिश्वासी भाईयाँ तै या बिनती करणा जरूरी समझया के वे पैहल्या तै थारे धोरे जावै, अर जो दान देण का वादा थमनै करया था, उसका इन्तजाम कर ल्यो, जो थमनै कंजूसी तै न्ही पर खुल्ले दिल तै देण खात्तर कह्वा। 6 पर बात या सै, जो थोड़ा-सा बोवै सै, वो थोड़ा-सा काट्टेगा भी, अर जो घणा बोवै सै, वो घणा काट्टेगा। 7 हरेक माणस जिसा मन म्ह सोचै उसाए दान करै, ना कुढ़-कुढ़ के अर मन म्ह दाब तै, क्यूँके परमेसवर राज्जी होके देण आळे तै प्यार करै सै। 8 परमेसवर इस योग्य सै, के वो थारे ताहीं भोत-ए घणा अनुग्रह दे, ताके सब कुछ थमनै हर बात म्ह हर बखत पर्याप्त मात्रा म्ह मिलता रहवै, अर हरेक भले काम के खात्तर थारे धोरे भोत घणा होवै। 9 जिसा पवित्र ग्रन्थ म्ह लिख्या सै, “परमेसवर जरूरतमंदां नै खुल्ले दिल तै देवै सै, उसकी धार्मिकता सारी हाण बणी रहवै सै।” (aiōn g165) 10 परमेसवर ए सै जो किसानां नै बीज अर खाण खात्तर रोटी देवै सै। इस तरियां परमेसवर हमेशा थारे खात्तर धन देवैगा, ताके थम उन माणसां की मदद कर सकों जिन ताहीं धन की जरूरत सै। 11 थम हरेक तरियां तै आशीष पाओ, ताके थम खुल्ले दिल तै दे सकों, अर जब थारा दान गरीब माणसां म्ह बाट्या जावै तो वे सारे परमेसवर का धन्यवाद करै। 12 क्यूँके इस दान की सेवकाई तै ना सिर्फ पवित्र माणसां की जरूरत पूरी होवै सै, पर भोत-से लोग भी दिल तै परमेसवर का धन्यवाद करै सै। 13 क्यूँके इस दान की सेवकाई नै सबूत मानके, वे परमेसवर की

महिमा करेंगे, क्योंकि थमने मसीह के सुसमाचार के हुकम नै मानके उस ताहीं अपनाया सै, अर गरीब बिश्वासियाँ की मदद खुल्ले दिल तै करी सै। 14 अर वे थारे खात्तर परमेसवर तै प्रार्थना करै सै। वे थारे तै प्यार करै सै, क्योंकि वे जाणै सै, के परमेसवर नै थारे पै बड़ा अनुग्रह करया सै। 15 परमेसवर का उसके उस दान के खात्तर धन्यवाद हो। जिस ताहीं हम ब्यान नही कर सकदे।

10 मै पौलस, थारे ताहीं मसीह की दयालुता अर नम्रता के साथ बिनती करूँ सूँ, हालाके मन्ने अहसास सै के थमने इसा लागे सै, के आम्ने-साम्ने बात करण म्ह डरपोक सूँ, अर सिर्फ चिट्ठी लिखके शिक्षा देण म्ह ए साहसी सूँ। 2 मै थारे तै या बिनती करूँ सूँ, के जब मै थारे धोरे आऊँ तो मन्ने उन माणसां तै कड़ाई तै बात ना करणी पड़े, जो ये सोचै सै के हम दुनियावी तौर तरिककां के मुताबिक चाल्लण आळे सां। 3 हालाके हम इस दुनिया म्ह रहवां सां, पर हम इस दुनिया के बाकी माणसां की ढाळ लड़े-झगड़ते कोनी। 4 हम इन्सानी विचारां अर झूठी बहसबाजी नै नाश करण खात्तर दुनियावी हथियारां का नही पर परमेसवर के ताकतवर हथियारां का इस्तमाल करां सां। 5 हम इन्सानी बहस-बाजी की बजह तै आण आळी हरेक रुकावट नै दूर कर देवां सां, जो माणसां नै परमेसवर तै दूर राखै सै, हम उनकी बिद्रोही भावना नै कैद करके मसीह का आज्ञाकारी बणा देवां सां, 6 अर जब वे पूरी रीति तै मसीह के हुकम नै मानण आळे बण जावै सै, तो हम मसीह यीशु के हुकम नै ना मानण आळा ताहीं दण्ड देवां सां। 7 थम बाहरी दिखावट पै ध्यान देओ सां। जै किसे माणस नै खुद पै यो भरोस्सा हो के वो मसीह यीशु का सै, तो वो यो भी जाण ले के जिसा वो मसीह यीशु का सै, उस्से तरियां हम भी मसीह यीशु के सां। 8 क्योंकि जै मै उस हक के बारे म्ह और भी गर्व करूँ, जो प्रभु नै थारे बिश्वास ताहीं घटाण खात्तर नही पर थारे बिश्वास नै बढ़ाण खात्तर म्हारे ताहीं दिया सै, तो मै शर्मिन्दा नही होऊँगा। 9 मै अपनी चिट्ठियाँ के जरिये थमने डराण की कोशिश नही करदा। 10 क्योंकि थारे म्ह तै कई माणस कहवै सै, “की मेरी सारी चिट्ठी तो भोत कठोर अर असरदार सै; पर जब मै आम्ने-साम्ने मिलूँ सूँ, तो मै कमजोर अर बोल्लण म्ह बेकार लागूँ सूँ।” 11 जो इसा कहवै सै, वो न्यू समझ लेवै के जिसा पीठ पाच्छै चिट्ठियाँ म्ह म्हारे सन्देस सै, उस्से तरियां ए थारे स्याम्ही म्हारे काम भी होवेंगे। 12 क्योंकि म्हारे म्ह या हिम्मत कोनी के हम अपने-आपनै उन म्ह गिणया अर मिलावां, जो अपनी बड़ाई खुद करै सै, अर अपने-आप ताहीं आप्पस म्ह नाप-तौलके एक-दुसरे तै बरोबरी करके बेकूफ ठहरावै सै। 13 हम तो उस काम की हद तै बाहरणै घमण्ड कदे भी नही करागें, जो काम परमेसवर नै म्हारे ताहीं दिया सै, पर उस्से हद तक जो परमेसवर नै म्हारे खात्तर ठहरा दी सै, अर उस म्ह थम भी आगे सो, अर उन काम्मां की हद म्ह ए घमण्ड करागें। 14 जब हम पैहली बार थारे धोरे पोहचे तो हम घमण्ड करण म्ह उस हद नै नही लांघे जित्त परमेसवर नै म्हारे ताहीं काम करण खात्तर ठहराया था। उसनै म्हारे ताहीं थारे इलाके म्ह काम

करण खात्तर ठहराया था, अर हम थारे ताहीं मसीह का सुसमाचार सुणाण आळे पैहले माणस सां। 15 अर हम हद तै बाहरणै दुसरयां की मेहनत पै घमण्ड नही करदे; पर हमने आस सै के ज्यों-ज्यों थारा बिश्वास बधता जावेगा त्यों-त्यों हम अपनी हद के मुताबिक थारे कारण और भी माणसां ताहीं मसीह का सुसमाचार सुणा पावागें। 16 ताके हम थारी इलाके की हद तै परै दूर-दूर जगहां म्ह भी माणसां ताहीं सुसमाचार सुणावां, अर न्यू नही के हम दुसरयां की हद के भीत्तर बणे बणाए काम्मां पै घमण्ड करा। 17 पर जिसा के पवित्र ग्रन्थ म्ह लिख्या सै, जै कोए घमण्ड करै, तो वो प्रभु पै घमण्ड करै। 18 क्योंकि जो अपनी बड़ाई करै सै वो नही, पर जिसकी बड़ाई प्रभु करै सै, वोए प्रभु की निगाह म्ह सही कुहावै सै।

11 थम उन माणसां की सह ल्यो सां जो अपनी खुद की बड़ाई करते रहवै सै, इस करके मै सोचूँ सूँ, के थम मेरी भी सह ल्योगे जै मै थोड़ा सां बेकुफां के जिसा बरताव करूँ, हाँ, मेरी सह भी ल्यो सो। 2 क्योंकि मै थारे तै प्यार करूँ सूँ, अर थारा ख्याल भी राखूँ सूँ, जिसा परमेसवर राखै सै। थम एक पवित्र कुवारी के समान सां, जिसकी सगाई मन्ने सिर्फ मसीह यीशु तै करण की, अर उस्से ताहीं सौंपण का वादा करया सै। 3 पर मै डरूँ सूँ के जिस तरियां तै साँप नै अपनी श्याणपत तै पैहली बिरबान्नी हव्वा ताहीं भकाया, उस्से तरियां ए थारे मन उस सीधार्ई अर पवित्रता तै जो मसीह के साथ चालण तै आवै सै, उसतै कदे बहक नही जाओ। 4 जै कोए थारे धोरे आके किसे दुसरे यीशु का प्रचार करै, जिसका प्रचार हमने नही करया; या कोए और आत्मा थमनै मिलै, जो पैहल्या ना मिला था; या और कोए सुसमाचार सुणावै, जिस ताहीं थमने पैहल्या नही मान्या था, तो थम इसनै खुशी तै स्वीकार कर लेते। 5 मै तो समझूँ सूँ के मै किसे बात म्ह बड़े तै बड़े प्रेरितां तै घाट नही सूँ। 6 जै मै बोल्लण मै अनाड़ी सूँ, तो भी मन्ने सुसमाचार अर मसीह का ज्ञान सै। मन्ने थारे ताहीं जो भी ज्ञान सिखाया सै, वो ज्ञान मन्ने थारे ताहीं साबित करके दिखाया सै। 7 इस करके मन्ने थारे खात्तर परमेसवर के सुसमाचार का प्रचार मुफ्त म्ह करया, के थारे ताहीं ऊँच्चा करण के मकसद तै मेरा खुद ताहीं नरम बणा लेणा मेरा अपराध था? 8 मन्ने दुसरी कलीसिया तै दान कट्टा करया, ताके मै हर कीमत पै थारी मदद कर सकूँ, थम इस ताहीं चोरी करणा ना कहों। 9 अर जब मै थारे गेल्या था, अर मेरे ताहीं पईसा की कमी होई, तो मन्ने किसे पै बोझ नही गेरया, क्योंकि बिश्वासी भाईयाँ नै मकिदुनिया परदेस तै आके मेरी जरूरत नै पूरा करया, अर मन्ने हरेक बात म्ह अपने-आप ताहीं थारे पै बोझ बणण तै रोक्का, अर रोक्के रहूँगा। 10 जै मसीह की सच्चाई मेरे म्ह सै, तो अखाया परदेस म्ह कोए मन्ने इस घमण्ड तै नही रोकेगा। 11 मन्ने थारे तै पईसा नही लिया, क्योंकि इस खात्तर नही, के मै थारे तै प्यार कोनी करदा? परमेसवर नै न्यू बेरा सै, के मै थारे तै प्यार करूँ सूँ। 12 मै थारे तै आर्थिक मदद कोनी ल्यु, ताके मै उन माणसां नै घमण्ड करण तै रोक सकूँ, जो या कहवै सै के हम भी परमेसवर की सेवा करां सां, जिसी थम

करो सों। 13 क्योंकि इसे माणस झूठे प्रेरित, अर छळ तै काम करण आळे सै, अर मसीह के प्रेरित होण का झूठा दावा करे सै। 14 या किमे अचम्भे की बात कोनी क्योंकि शैतान खुद भी ज्योतिर्मय सुगंदूत का रूप धारण करे सै। 15 इस करके जै उसके सेवक भी धर्म के सेवकां का सा रूप धरे, तो कोए बड़ी बात कोनी, पर उनका अन्त उनकै काम्मां कै मुताबिक होवैगा। 16 मै फेर कहूँ सूँ के, कोए मन्ने बेकूफ ना समझै, नही तो बेकूफ ए सोचकै मेरी सह ल्यो, ताके माड़ा-सा मै भी घमण्ड कर सकूँ। 17 बेथड़क कहे होडी मेरी बात प्रभु की ओड़ तै कोनी, ये तो एक बेकूफ की घमण्ड म्ह कहे होडी बात सै। 18 जिब के घणखरे माणस तो अपने दुनियावी जीवन पै घमण्ड करे सै, तो मै भी घमण्ड करूँगा। 19 थम तो श्याणे होकै खुशी तै बेकूफ की सह लेओ सों। 20 क्योंकि जिब थमनै कोए गुलाम बणा लेवै सै, या जो भी थारे धारे सै सब ले लेवै सै, या फँसा लेवै सै, या अपने-आपनै बड़्या बणावै सै, या थारे मुँह पै थप्पड़ मारे सै, तो थम सह लेओ सो। 21 के थम न्यू सोच्यों सों, के मन्ने शर्मिन्दा होणा पड़ैगा क्योंकि मन्ने यो काम कोनी करया। पर जिस किसे बात म्ह कोए हिम्मत करे सै, मै बेकूफी तै कहूँ सूँ, तो मै भी हिम्मत करूँ सूँ। 22 के वे इब्रानी सै? मै भी इब्रानी सूँ। के वे इस्राएली सै? मै भी इस्राएली सूँ। के वे अब्राहम के वंशज सै? मै भी अब्राहम का वंशज सूँ। 23 के वैए मसीह के सेवक सै--मै बेकूफ कै तरियां कहूँ सूँ--मै उनतै बाध सूँ! मन्ने उनतै घणी मेहनत करी सै, उनतै घणा बार-बार कैदी बण्या सूँ, अनगणित बार पिट्या गया सूँ, कई बार मेरी जान संकट म्ह पड़ी। 24 पाँच बर मन्ने यहूदी अगुवां के हाथ तै उन्तालीस कोड़े खाए। 25 तीन बर मन्ने बैत खाई, एक बर मेरे पै पत्थर बरसाए गये; तीन बर जहाज, जिसपै मै चढ़या था, टूट गए; एक दिन अर एक रात मन्ने समुन्दर म्ह काट्या। 26 बार-बार मन्ने सफर करणा पड्या। कदे नदियाँ के, कदे डाकुआं के, कदे अपने देशवासियाँ के, कदे नगरां के, जात आळा तै, कदे गैर यहूदियाँ तै, कदे जंगलां के कदे समुन्दरां के, कदे झूठे बिश्वासी भाईयाँ के बिचाळे जोख्मां म्ह रहया। 27 मन्ने कई रात जाग के, भूख्खा-तिसाया रहकै, जाड्डे म्ह; उघाड़ा रह के, करड़ी मेहनत करी अर भोत सी मुसीबत सहण करी सै। 28 इन सारी मुसीबतां के अलावा रोज मेरे पै सारी कलीसियां की भलाई अर फिक्र का बोझ बण्या रहवै सै। 29 जिब कोए कलीसियां म्ह कमजोर हो सै, तो मै अपने-आपनै कमजोर महसूस करूँ सूँ, मै दुखी हो जाऊँ सूँ, जिब कोए किसे तै पाप करवावै सै। 30 जै घमण्ड करणा जरूरी सै, तो मै अपनी कमजोरी की बातां पै घमण्ड करूँगा। 31 परमेसवर, जो यीशु का पिता सै, वो सदा धन्य सै, वो जाणै सै के मै झूठ नही बोल्दा। (aiōn g165) 32 जिब मै दमिशक नगर म्ह था, तो अरितास राजा के राज्यपाल नै मेरे ताहीं कैदी बणाण के मकसद तै नगर म्ह पैहरा बिठा दिया था। 33 अर मै टोकरे म्ह बैठकै खिड़की म्ह तै होकै भीत पै तै तारया गया, अर उसके हाथ तै बच लिंकड्या।

12 ऊतो घमण्ड करणा मेरे खात्तर ठीक कोनी तोभी करणा पड़ै सै; ज्यातै मै प्रभु के दिए होए दर्शनां अर प्रकाशनां का जिक्र करूँगा। 2 मै मसीह म्ह एक माणस नै जाणूँ सूँ; जिसनै चौदहा साल हो लिए, मै नही जाणदा के वो माणस देह म्ह था, या फेर आत्मा म्ह था, सिर्फ परमेसवर ए जाणै सै, इसा माणस सबतै ऊँच्ये सुर्ग म्ह ठा लिया गया। 3 मै उससे बात नै दोहराऊँ सूँ, मै नही जाणदा, के इसा होया था या फेर यो एक दर्शन था, परमेसवर ए जाणै सै। 4 के वो सुर्गलोक पै ठा लिया गया, अर ओड़ै उसनै इसी अदभुत बात सुणी, जिनका जिक्र करणा किसे भी माणस के बस का कोनी, वे बात दुसरे माणसां ताहीं बताणा मना सै। 5 इसे माणस पै तो मै घमण्ड करूँगा, पर अपने पै अपनी कमजोरियाँ नै छोड़, अपने बारे म्ह घमण्ड नही करूँगा। 6 क्योंकि जै मै घमण्ड करणा चाहूँ भी तो बेकूफ नही बणुगाँ, क्योंकि सच बोलूँगा; मै अपनी बड़ाई नही करणा चाहन्दा, इसा ना होवै के जिसा कोए मन्ने देखवै सै या मन्ने सुणै सै, मन्ने उसतै बाध समझै। 7 मेरे ताहीं परमेसवर नै जो अदभुत बात दिखाई सै, उन ताहीं देखकै मै घमण्ड म्ह ना जाऊँ, इस करके मेरी देह म्ह काणडा चुभाया, यानिके शैतान का एक दूत मेरे घुस्से मारे ताके मै फूल नही जाऊँ। 8 इसके बारे म्ह मन्ने प्रभु तै तीन बर बिनती करी के मेरे तै यो दूर हो जावै। 9 पर उसनै मेरे तै कह्या, “मेरा अनुग्रह तेरे खात्तर भोत सै, क्योंकि मेरी सामर्थ कमजोरी म्ह सिध्द होवै सै।” ज्यातै मै घणा राज्जी होकै अपनी कमजोरी पै घमण्ड करूँगा के मसीह की सामर्थ मेरे पै छाया कर दी रहवै। 10 इस कारण मै मसीह कै खात्तर कमजोरियाँ म्ह, अर बुराईयाँ म्ह, गरीबी म्ह, अर रोळयां म्ह, अर संकटां म्ह राज्जी सूँ; क्योंकि जिब मै कमजोर होऊँ सूँ, तभी मै मसीह की शक्ति म्ह मजबूत होऊँ सूँ। 11 मै बेकूफ तो बण्या, पर थमनै ए मन्ने न्यू करण कै खात्तर मजबूर करया। थमनै तो मेरी बड़ाई करणी चाहिये थी, क्योंकि ऊतो मै किमे भी कोनी, तोभी उन बड्या तै बड़े प्रेरितां तै किसे बात म्ह घाट कोनी सूँ। 12 सच्चे प्रेरित के लक्खण भी थारे बिचाळे सारे ढाल के धीरज सुधा निशान्नां, अर अनोक्खे काम्मां, अर सामर्थ के काम्मां तै दिखाए गये। 13 थम कौण-सी बात म्ह दुसरी कलीसियां तै घाट थे, सिर्फ इस म्ह के मन्ने थारे पै आर्थिक बोझ कोनी गेरया। मेरा यो अपराध माफ करो। 14 देख्खो, मै तीसरी बर थारे धारे आण नै त्यार सूँ, अर मै थारे तै कोए मदद नही ल्यूँगा, क्योंकि मै थारी सम्पत्ति नही बल्के थमनै ए चाहूँ सूँ। क्योंकि बाळकां नै माँ-बाप कै खात्तर धन कठ्ठा नही करणा चाहिये, पर माँ-बाप नै बाळकां कै खात्तर धन कठ्ठा करणा चाहिये। 15 थारी आत्मा के भले खात्तर मै पक्का अपना सब कुछ खर्च करण खात्तर तैयार सूँ, बल्के आप भी खर्च हो जाऊँगा। मै थारे तै प्यार करूँ सूँ, पर थम मेरे तै भोत कम प्यार करो सों। 16 कुछ भी हो, मै थारे पै बोझ कोनी बण्या। फेर भी कोए नै कोए मेरे पै यो दोष जरूर लगा सके सै, के मन्ने श्याणपत तै थारे ताहीं धोक्खा देकै फँसा लिया। 17 मन्ने ना ए तो तीतुस अर ना ए किसे और के जरिये अपने खात्तर थारे तै पईसे लिये। 18 मन्ने तीतुस ताहीं समझाके उसके गेल्या उस भाई

ताहीं भेज्या। के तीतुस नै छळ करके थारे तै किमे लिया? के म्हारा सुभाव एक ए तरियां तै प्रेरित का न्ही था? के हम उनकी ए लीक पै न्ही चाल्ले? 19 थम इब भी योए समझरे सों, के हम थारे स्याम्ही बदले म्ह जवाब देण लागरे सां। हम तो परमेसवर नै हाजर जाणकै मसीह म्ह बोल्लां सां, हे प्यारे बिश्वासी भाईयो, हम ये सारी बात थमनै बिश्वास म्ह मजबूत करण खात्तर कहां सां। 20 क्यूँके मन्ने इस बात का डर सै, कदे इसा ना हो के मै आकै जिसा चाहूँ सूँ, उसाए थमनै पाऊँ; अर मन्ने भी जिसा न्ही चाहो सो उसाए पाओ; मन्ने इस बात का डर सै के ओड़ै झगड़ा, जळण, छो, उदासी, बिरोध, चुगली, घमण्ड अर बखेड़े ना हों; 21 कदे इसा ना हो के जिब मै दुबारा आऊँ, तो मेरा परमेसवर मेरे ताहीं अपमानित करै। अर मन्ने घणखरयां खात्तर फेर दुखी होणा पड़ै, जिन नै पैहल्या पाप करया था। अर भुन्दे काम अर जारी अर लुचपण के कारण पाप करणा न्ही छोड्या।

13 पवित्र ग्रन्थ म्ह लिख्या सै, के दो या तीन गवाहां कै मुँह तै हरेक बात सच साबित हो जावै सै। जिब मै दुसरी बार थारे तै मिलण आया था, तो मन्ने उन माणसां ताहीं चेतावनी देई, जो पैहल्या तै पाप करण लागरे थे। इब मन्ने दुसरी बार चिट्ठी लिख के थारे ताहीं अर दुसरे बाकी माणसां तै भी चेतावनी देकै कह्या के वे पाप ना करै। इब मै तीसरी बार थारे धारे आण आळा सूँ, अर जै इब भी उन माणसां नै पाप करणा न्ही छोड्या सै, तो कोए भी उननै परमेसवर के दण्ड तै बचा न्ही पावैगा। 3 मन्ने थारे तै कह्या सै, के उन ताहीं दण्ड मिलैगा पर फेर थम सबूत चाहों सों, के ये बात मै मसीह के जरिये बोल्लू सूँ। अर जिब मसीह थारे ताहीं सुधारैगा तो थारे खात्तर कमजोर न्ही पर थारे बीच म्ह सामर्थी होगा। 4 वो कमजोर होते होए क्रूस पै चढ़ाया तो गया, तोभी परमेसवर की सामर्थ तै जिन्दा होया। हम भी तो मसीह के समान कमजोर सां, पर थारे खात्तर परमेसवर की सामर्थ तै हम उसके साथ जीवांगें। 5 अपणे-आप ताहीं परखो, के बिश्वास म्ह सच्चे सां के न्ही। जै थम अपणे-आपनै सच्चा पाओ, तो थम इस बात नै जाण ल्योगे, के यीशु मसीह थारे म्ह वास करै सै। अर जै मसीह थारे म्ह वास न्ही करदा तो थम अपणे परखे जाण म्ह हारगे सों। 6 पर मेरी आस सै के थम या जाण ल्यो, के थम अपणे परखे जाण म्ह न्ही हारे। 7 भलाए थारे म्ह तै कईयाँ नै यो लागै सै के हम सच्चे प्रेरित कोनी। फेर भी हम अपणे परमेसवर तै या प्रार्थना करा सां के थम कोए बुराई ना करो, बल्के भलाई करो। 8 जै हम सच्चाई के बिरोध म्ह हम कुछ भी न्ही कर सकदे। हम सच के पक्षधर ए रह सकां सै। 9 जिब हम कमजोर सां अर थम ठाड़े सों, तो हम राज्जी होवां सां, अर या प्रार्थना भी करा सां, के थम बिश्वास म्ह सिध्द हो जाओ। 10 इस करके मै थारे तै दूर रहके ये सारी बात लिखूँ सूँ, के ओड़ै आण पै, मन्ने प्रभु के जरिये दिए गये हक तै मन्ने थारे ताहीं दण्ड देणा ना पड़ै, क्यूँके मै इस हक ताहीं थारे बिश्वास ताहीं मजबूत करण खात्तर इस्तमाल करणा चाहूँ सूँ, ना के थारे बिश्वास नै कमजोर करण खात्तर। 11 हे बिश्वासी भाईयो, आखर म्ह मै थारे तै कहणा चाहूँ सूँ, के आनन्दित

रहों, सिध्द बणदे जाओ, अर एक-दुसरे नै उत्साहित करो, एक ए मन रहों, मिल-जुल के रहों। अर प्यार अर शान्ति का देण आळा परमेसवर थारे गेल्या होवैगा। 12 आप्पस म्ह एक-दुसरे तै गळे मिलकै प्यार तै नमस्कार करो। 13 सारे पवित्र माणस थारे ताहीं नमस्कार कहवै सै। 14 प्रभु यीशु मसीह का अनुग्रह अर परमेसवर का प्यार अर पवित्र आत्मा का साइझापण थारे सारया कै गैल होंदा रहवै।

गलातियों

1 या चिट्ठी मुझ पौलुस की ओड़ तै सै, मै प्रेरित होण के खात्तर बुलाया गया सूं। मेरा प्रेरित होणा किसे माणस या माणसां की ओड़ तै न्ही बल्के यीशु मसीह के जरिये होया सै, जिस ताहीं पिता परमेसवर नै मेरे होए म्ह तै जिवाया। 2 या चिट्ठी गलातिया परदेस की कलीसियाओं के खात्तर, उन सारे विश्वासी भाईयाँ की ओड़ तै सै, जो मैरे गेल्या सै। 3 मै प्रार्थना करूँ सूं, के परमेसवर पिता अर म्हारे प्रभु यीशु मसीह की ओड़ तै थमनै अनुग्रह अर शान्ति मिल्दी रहवै। 4 म्हारे परमेसवर अर पिता की मर्जी के मुताबिक मसीह यीशु नै अपने-आप ताहीं म्हारे पापां के कारण बलिदान कर दिया ताके हम आज की दुनिया के माणसां के बुरे असर तै बचे रहवां। (aiōn g165) 5 परमेसवर का गुणगान अर बड़ाई युगायुग होंदी रहवै। आमीन। (aiōn g165) 6 मन्ने अचम्भा होवे सै के परमेसवर नै थारे ताहीं मसीह के अनुग्रह तै बुलाया उसतै थम इतनी तावळे भटक के अलग ए तरियां के सुसमाचार पै विश्वास करण लागे। 7 सच्चा सुसमाचार एके सै, जो के मसीह का सै, पर बात या सै, के कुछ लोग इसे सै जो मसीह के सुसमाचार नै बदलना चाहवै सै, अर थमनै भरमाणा चाहवै सै। 8 पर जै म्हारे म्ह तै, या सुर्ग तै उतरया होया कोए सुर्गदूत भी उस सुसमाचार नै छोड़ जो हमनै थारे ताहीं सुणाया सै, कोए अलग सुसमाचार थारे ताहीं सुणावै, तो परमेसवर उस ताहीं श्राप देगा। 9 जिसा हमनै पैहल्या कह्या सै, उसाए मै इब फेर कहुँ सूं के उस सुसमाचार नै छोड़ जिस ताहीं थमनै मान्या सै, जै कोए अलग सुसमाचार सुणावै सै, तो श्रापित हो। 10 मै माणसां नै खुश करण की कोशिश न्ही करदा, पर परमेसवर नै खुश करण की कोशिश करूँ सूं, जै मै इब लग माणसां नै खुश करदा रहन्दा तो मसीह का दास न्ही होंदा। 11 हे विश्वासी भाईयो, मै थमनै बता द्यु सूं, के जो सुसमाचार मन्ने सुणाया सै, वो माणस के जरिये बणाया गया कोन्या। 12 क्यूँके वो मन्ने मेरे पूर्वजां, की ओड़ तै न्ही पोंहच्या, अर ना माणसां के जरिये सिखाया गया, पर यीशु मसीह नै सुसमाचार समझण म्ह मेरी मदद करी। 13 थमनै सुणा होगा के यहूदी पंथ म्ह जो मेरा चाल-चलण था वो किसा था, मै परमेसवर की कलीसिया के विश्वासियाँ ताहीं घणा काल अर उन ताहीं नाश करण की कोशिश करया करूँ था। 14 अर मै यहूदी मत म्ह अपने पूर्वजां की शिक्षा का अध्यन करण अर उन ताहीं मानण म्ह अपने हम उग्र के यहूदियाँ म्ह भोत उत्सुक था। 15 पर परमेसवर की जब इच्छा होई के वो मेरे पै अपने बेटे नै जाहिर करै के मै गैर यहूदियाँ म्ह उसका सुसमाचार सुणाऊँ, उसनै मेरे ताहीं मेरी माँ की कोख म्ह ए चुण लिया, अर अपने अनुग्रह तै मेरे ताहीं बुला लिया था। तो मन्ने किसे की राय कोनी ली, 17 अर ना यरुशलेम म्ह उनके धोरे गया जो मैरे तै पैहल्या प्रेरित चुणे गये थे, पर जिब्बे अरब देश म्ह चल्या गया अर फेर ओड़ै तै दमिशक नगर म्ह बोहड़ गया। 18 फेर तीन साल के पाछै मै पतरस जो प्रेरित सै उसतै मिलण खात्तर यरुशलेम गया, अर उसके धोरे

पन्द्रह दिन तैई रह्या। 19 पर मै प्रभु यीशु मसीह के भाई याकूब नै छोड़ और किसे प्रेरित तै न्ही मिल्या। 20 परमेसवर मेरा गवाह सै के मन्ने थारे ताहीं जो लिच्छ्या सै उस म्ह कुछ भी झूठ कोनी। 21 उन प्रेरितां के मिलण के बाद मै सीरिया अर किलिकिया के परदेसां म्ह आया। 22 पर यहूदिया परदेस की कलीसियां के विश्वासी भाईयाँ नै जो मसीह म्ह विश्वास करै थे, उननै मेरा मुँह कदे न्ही देख्या था, 23 पर न्यूप सुणया करै थे के एक बखत था जो हमनै सताण आळा था, इब वोए उस विश्वास का सुसमाचार सुणावै सै जिसनै पैहल्या नाश करै था। 24 अर वे मैरे बारे म्ह परमेसवर की बड़ाई लगातार करै थे।

2 चौदहा साल के पाछै मै बरनबास के गेल्या फेर यरुशलेम नगर म्ह गया, अर तीतुस नै भी गेल्या लेग्या। 2 मै इस खात्तर ओड़ै गया क्यूँके परमेसवर नै मेरे ताहीं ओड़ै जाण खात्तर कह्या था, अर जब मै ओड़ै था तो मै कलीसिया के अगुवां तै एकान्त म्ह मिला, अर उस सुसमाचार के बारे म्ह उन ताहीं बताया, जो मै गैर यहूदियाँ म्ह प्रचार करूँ सूं, ताके इसा ना हो के जो मन्ने पैहले अर जो इब भी करण लागरया सूं, उसका कोए नतिज्जा ना लिकड़ै। 3 पर तीतुस जो मेरा संगी साथी सै अर जो यूनानी सै, उसका कदे खतना कोनी होया पर कलीसिया के अगुवां नै जो यरुशलेम म्ह सै उस ताहीं अपना लिया, अर उननै उस ताहीं खतना करण खात्तर मजबूर कोनी करया। 4 तो या बात एक समस्या बणगी, उन झूठे भाईयाँ के कारण होया जो चोरी तै घुस आये थे, के उस आजादी का जो मसीह यीशु म्ह हमनै मिली सै, भेद लेके हमनै यहूदी नियम-कायदा के दुबारा तै दास बणा दे। 5 उनके साथ एक पल भी हमनै सहमत होणा न्ही चाह्या, ताके थम सुसमाचार की सच्चाई के मुताबिक जिन्दगी जिओ। 6 उन कलीसिया के अगुवां ताहीं जो यरुशलेम नगर म्ह थे, उननै मेरे ताहीं मजबूर कोनी करया, के मै अपने सन्देस नै बदलु, जो मै थमनै सिखाऊँ सूं। इसतै कोए फर्क कोनी पड़ता, के वो अगुवें मेरे खात्तर के सै, क्यूँके परमेसवर बाहरी रूप नै देखके न्याय न्ही करदा। 7 पर इसके उल्ट जिब उन अगुवां नै देख्या के परमेसवर नै पतरस ताहीं हक दे राख्या सै, वो के यहूदी माणसां ताहीं सुसमाचार सुणावै, उससे तरियां गैर यहूदियाँ के खात्तर मेरे ताहीं भी सुसमाचार सुणाणा सौप्या गया। 8 (क्यूँके जिसनै पतरस तै यहूदी माणसां म्ह प्रेरिताई का काम बड़े असरदार ढंग तै करवाया, उससे नै मैरे तै भी गैर यहूदियाँ म्ह असरदार काम करवाया), 9 जो लोग कलीसिया के खम्भे समझे जावै थे, यानी याकूब, पतरस, अर यहून्ना, उननै अनुग्रह का वो वरदान पिच्छाणा जो मेरे ताहीं मिला सै। उननै मैरे ताहीं अर बरनबास ताहीं अपना साथी समझके म्हारे ताहीं खास सहभागी बणा लिया। वे इस बात खात्तर सहमत होगे के हम गैर यहूदियाँ के धोरे जावै, अर वे यहूदियाँ के धोरे जावै। 10 उननै म्हारे तै सिर्फ याए बिनती करी के हम यरुशलेम के गरीब विश्वासी भाईयाँ की मदद करां, अर इससे काम नै करण की मै खुद भी कोशिश करूँ था। 11 एक दिन जिब पतरस अन्ताकिया नगर म्ह आया, तो मन्ने विश्वासी भाईयाँ के स्याम्ही उस

ताहीं फटकारा, क्योंकि जो वो काम करै था वो गलत था। 12 वो पैहले गैर यहूदियाँ के गैल खाया-पिया करै था, जिब कुछ बिश्वासी जो याकूब नै यरुशलैम नगर म्ह भेज्जे थे, तो उसनै अपणे-आप ताहीं गैर यहूदियाँ तै अलग कर लिया, अर उनकै गैल खाणा-पीणा छोड़ दिया अर उसनै यहूदी माणसां के डरकै मारे इसा करया, क्योंकि वे चाहवै थे, के गैर यहूदियाँ का भी खतना हो। 13 पतरस के गेल्या बाकी बचे यहूदी माणस भी उसके कपट म्ह शामिल होगे, अर उन म्ह बरनबास भी शामिल था। 14 पर जिब मन्ने देख्या के उनका सुभाव सुसमाचार की सच्चाई के मुताबिक कोनी, तो मन्ने सारे बिश्वासी भाईयाँ के स्याम्ही पतरस तै कह्या, “जिब तू यहूदी होके गैर यहूदियाँ की तरियां चाल्लै से अर यहूदी माणसां की तरियां कोनी चाल्दा, तो तू गैर यहूदियाँ नै यहूदी माणसां की तरियां चालण खात्तर क्यूँ कहवै सै।” 15 हम तो जन्म तै यहूदी सां, अर पापी गैर यहूदियाँ म्ह तै कोन्या। 16 हम यहूदी बिश्वासी यो जाणा सां, के माणस मूसा नबी के नियम-कायदा तै न्ही, पर यीशु मसीह पै बिश्वास करण के जरिये परमेसवर की नजर म्ह धर्मी बणै सै, इस खात्तर हमनै खुद भी प्रभु यीशु मसीह पै बिश्वास करया, ताके हम नियम-कायदा तै न्ही, पर यीशु मसीह पै बिश्वास करण तै परमेसवर की नजर म्ह धर्मी बणा, क्यूँके के मूसा नबी के नियम-कायदा तै कोए माणस धर्मी न्ही बणैगा। 17 हम जो मसीह के जरिये परमेसवर की नजर म्ह धर्मी बणणा चांहा सां, बल्के इसकै के हम मूसा नबी के नियम-कायदा नै मानण के जरिये, तो कुछ यहूदी हमनै पापी समझै सै (क्यूँके इब हम यहूदी नियम-कायदा नै कोनी मानते) तो के इसका मतलब यीशु मसीह नै म्हारे तै पाप करवाया, न्ही बिलकुल न्ही! 18 पर मै सचमुच म्ह पाप करूँ सँ जै मै उन कामां नै करूँ सँ, जिन ताहीं मन्ने छोड़ दिया था जिसा के माणस परमेसवर की नजर म्ह धर्मी बणणा चाहवै, मूसा नबी के नियम-कायदा के मानण के जरिये। 19 मै जाणू सँ, के मूसा नबी के नियम-कायदा के मानण तै मै धर्मी न्ही बण सकता, तो मै सोचू सँ, के मै नियम-कायदा के खात्तर मर जाऊँ ताके परमेसवर के खात्तर मै सदा जिन्दा रहूँ। 20 यो इसा सै, के मान्नी जिसा मै मसीह के गैल क्रूस पै मारया गया, अर इब मै जिन्दा न्ही रह्या, पर मसीह मेरै म्ह जीवै सै, अर इब जो मै जीण लागरया सँ, तो सिर्फ परमेसवर के बेट्टे पै बिश्वास करण के जरिये जिसनै मेरै तै इतणा प्यार करया के मेरै खात्तर अपनी जान दे दी। 21 मै परमेसवर के अनुग्रह नै बेकार न्ही बतान्दा, क्यूँके जै नियम-कायदे धार्मिकता का कारण होन्दे तो मसीह का जान देणा बेकार हो जान्दा।

3 हे बिना अकल के गलातिवासियो! किसनै थारे ताहीं बहका दिया सै? मन्ने थारे ताहीं समझाया सै के यीशु मसीह के क्रूस पै जान देण के जरिये उसनै के हासिल करया! 2 मेरै ताहीं एक बात बताओ के थमनै पवित्र आत्मा, मूसा नबी के नियम-कायदा के मानण तै पाया था या बिश्वास की खबर तै जो हमनै थारे ताहीं सुणाई थी? 3 के थम इसे बेअक्ल के सों के थमनै नई जिन्दीगी पवित्र आत्मा के जरिये शरु करी पर इब थम अपनी जिन्दीगी का अन्त अपनी ताकत तै करणा चाहो

सों? 4 जिब थम बिश्वासी बणे तो थमनै भोत दुख ठाया, मै उम्मीद करूँ सँ के थमनै बेकार म्ह ए वो दुख न्ही ठाया। 5 परमेसवर थमनै पवित्र आत्मा भरपूरी तै देवै सै, अर जो थारे म्ह सामर्थ के काम करै सै, के वो मूसा नबी के नियम-कायदा के मानण तै या मसीह के सुसमाचार पै बिश्वास करण तै इसा करै सै? 6 अब्राहम के बारें म्ह पवित्र ग्रन्थ या कहवै सै, “अब्राहम नै तो परमेसवर पै बिश्वास करया अर उसकी बजह तै परमेसवर नै उस ताहीं धर्मी बणा दिया।” 7 तो यो जाण ल्यो के जो अब्राहम की तरियां बिश्वास करण आळे सै, वेए अब्राहम के वंशज कुहावेंगे। 8 अर परमेसवर नै पवित्र ग्रन्थ म्ह पैहल्या तै ए यो कह्या, के वो गैर यहूदियाँ नै बिश्वास के जरिये धर्मी बणावैगा, परमेसवर नै भोत पैहले तै ए अब्राहम ताहीं यो सुसमाचार सुणा दिया था, के “तेरे म्ह तै सारी जात आशीष पावैंगे।” 9 जितने मसीह पै बिश्वास करण आळे सै, वे अपने बिश्वास के कारण वोए आशीष पावेंगे जो अब्राहम नै पाई थी। 10 इस करके जितने माणस मूसा नबी के नियम-कायदा नै मानके परमेसवर की नजर म्ह धर्मी बणण की सोचवै सै, वे सारे परमेसवर की ओड़ तै श्रापित सै, क्यूँके पवित्र ग्रन्थ म्ह लिख्या सै, “वो श्रापित सै, क्यूँके कोए भी माणस हर पल नियम-कायदा की किताब म्ह लिखी होई सारी बात्तां नै निभा न्ही सकदा।” 11 पर या बात साफ सै, के मूसा नबी के नियम-कायदा के मानण के जरिये परमेसवर की नजर म्ह कोए भी धर्मी न्ही बणदा, क्यूँके पवित्र ग्रन्थ कहवै सै, के “जो मसीह पै बिश्वास करैगा, परमेसवर उसनै ए धर्मी बणावैगा।” 12 पर मूसा नबी के नियम-कायदा नै मानके जीणा अर परमेसवर पै बिश्वास करके जीणा एक जिसा कोनी, जिसा पवित्र ग्रन्थ म्ह लिख्या सै पर “जो इन सारी बात्तां नै मान्नेगा, वो उनके कारण जिन्दा रहैगा।” 13 हम सारे परमेसवर के श्राप के लायक थे, क्यूँके हम उसके नियम-कायदा नै पूरी तरियां न्ही मानते, तोभी मसीह म्हारे ताहीं उस श्राप तै छुड़ावै सै, जो नियम-कायदा के जरिये आवै सै। जिब मसीह क्रूस पै मारया गया, तो उसनै अपने उप्पर वो श्राप ले लिया, जिसा के पवित्र ग्रन्थ म्ह लिख्या सै, के “श्रापित सै वो जो क्रूस पै लटकाया जावै सै।” 14 मसीह नै यो इस करके करया, ताके जिसका वादा परमेसवर नै अब्राहम तै करया था, वो आशीष मसीह यीशु पै बिश्वास करण तै गैर यहूदियाँ तक पोहच सकै, अर हम मसीह म्ह बिश्वास के जरिये उस पवित्र आत्मा नै पा लेवां, जिसका देण का वादा उसनै म्हारे तै करया सै। 15 हे बिश्वासी भाईयो, मै रोज की जिन्दीगी का उदाहरण देके थमनै समझाऊँ सँ, जिब दो आदमी कोए करार करै सै अर उस ताहीं पक्का करै सै, तो ना कोए उसनै घटा सकै सै अर ना उस म्ह किमे बढ़ा सकै सै। 16 इस तरियां परमेसवर नै वादा अब्राहम अर उसके वंश तै करया था। पवित्र ग्रन्थ न्यू कोनी कहवै, के तेरी “वंशां नै,” जिसका मतलब भोत सारे माणस, पर यो एक माणस के बारें म्ह कहवै सै “तेरे वंश नै” अर वो मसीह सै। 17 मेरै कहण का मतलब यो सै, के परमेसवर नै अब्राहम के गैल करार करण के चार सौ तीस साल के बाद मूसा नबी के नियम-कायदे दिए,

जो उस करार नै ना तो तोड़ पाए, अर ना उसके वादे नै टाळ पाए। 18 परमेसवर माणसां नै इस बजह तै आशीष कोनी देवे, के वे मूसा नबी के नियम-कायदा नै मान्ने, बल्के वो इस करके देवे सै, क्यूँके इसका देण का परमेसवर नै वादा करया था, अर अब्राहम ताहीं भी ये आशीष इस करके मिली थी। 19 जिव फेर नियम-कायदे क्यूँ दिये गये? नियम-कायदे इस खात्तर दिए गये ताके लोग जाण सकै के पाप के सै। मूसा नबी के नियम-कायदे तब तक रहणे थे, जिव तक अब्राहम की पीढ़ी म्ह तै जिसका परमेसवर नै वादा करया था के वो आ ना जावै। मूसा नबी ताहीं नियम-कायदे सुगंदूतां कै जरिये दिए गये थे अर मूसा नबी लोगां के बीच एक बिचौलिया बणया। 20 परमेसवर नै अब्राहम तै वादा करया था इस करके बिचौलिया की जरूरत कोनी थी। 21 तो के मूसा नबी के नियम-कायदे परमेसवर के वादे कै बिरोध म्ह सै? न्ही बिल्कुल न्ही! क्यूँके जै इसे नियम-कायदे सै, जो परमेसवर की नजर म्ह हमनै धर्मी बणावै, तो सदा का जीवन मूसा नबी के नियम-कायदा के मानण तै हम पा सकां सां। 22 पर पवित्र ग्रन्थ हमनै बतावै सै के हम सब पापी सां, ताके परमेसवर उन माणसां नै जो यीशु मसीह पै बिश्वास करै सै वो दे सकै जिसका उसनै उसका वादा करया सै। 23 पर इसतै पैहल्या के लोग प्रभु यीशु मसीह पै बिश्वास करै हम यहूदी कैद म्ह थे, नियम-कायदे म्हारी रुखाळी करै थे। हम कैद म्ह जिव ताहीं रहे जिव के मसीह कौण सै अर हम उस म्ह बिश्वास करते रहवां। 24 नियम-कायदे म्हारे ताहीं इस खात्तर दिए गये, ताके मसीह के आण तक वो म्हारी अगुवाई कर सकै अर म्हारे ताहीं सम्भावळ सकै, ताके हम मसीह पै बिश्वास करण के जरिये परमेसवर की नजर म्ह धर्मी बणा। 25 जिव हमनै मसीह यीशु पै भरोस्सा करया सै तो नियम-कायदा की अगुवाई अर मदद की जरूरत कोनी। 26 थम सारे मसीह यीशु पै बिश्वास करण के कारण परमेसवर की ऊलाद सों। 27 अर थारे म्ह तै जितना नै मसीह के नाम म्ह बपतिस्मा लिया सै, उनै नई जिन्दगी पा ली सै। 28 इब मसीह म्ह यहूदी अर गैर यहूदी म्ह कोए फर्क न्ही रह्या, अर ना नौक्कर ना आजाद म्ह, ना लोग अर लुगाई म्ह कोए फर्क रह्या, क्यूँके थम सारे मसीह यीशु म्ह एक सों। 29 अर जै थम मसीह के सों तो अब्राहम के वंश अर वादे के मुताबिक वारिस भी सों।

4 मै थमनै एक उदाहरण देके समझाऊँ सूँ, के बेट्टा पिता की सम्पत्ति का वारिस होगा, जिव ताहीं वो बाळक सै, वो एक दास की तरियां सै, इब ताहीं उसका सम्पत्ति पै कोए हक कोनी पर आण आळे बखत म्ह वो पिता की सम्पत्ति का माल्लिक होवैगा। 2 पर जिव ताहीं बेट्टे की सही उम्र न्ही हो अर सारी सम्पत्ति का माल्लिक ना बण जावै सै, वो रुखवाळियाँ अर भण्डारीयाँ कै बस म्ह रहवै सै। 3 उस्से तरियां जिव हम मसीह नै न्ही जाणा थे, तो दुनिया की रीति-रिवाजां अर नियम-कायदा के गुलाम थे। 4 पर जिव सही बखत आया तो परमेसवर नै अपना बेट्टा इस दुनिया म्ह भेज्या, अर एक बीरबानी नै उस ताहीं जन्म दिया, वो यहूदी माणसां म्ह पैदा होया अर उसनै मूसा के नियम-कायदा

ताहीं मान्या। 5 ताके हमनै छुड़ाले जो हम मूसा नबी के नियम-कायदा के अधीन सां, अर हमनै उसकी ऊलाद होण का हक मिल्या। 6 इब थम उसकी ऊलाद सों, इस करके परमेसवर नै अपने बेट्टे की आत्मा नै म्हारे दिलां म्ह भेज्या सै, जो आत्मा परमेसवर ताहीं “हे अब्बा, हे पिता” कहके नै बुलावै सै। 7 इस करके तू इब नौक्कर कोनी, पर उसकी ऊलाद सै, अर परमेसवर वो सारी चीज थमनै देवैगा जिसनै उसका वादा थारे ताहीं देण का करया सै। 8 जिव थम परमेसवर नै न्ही जाणो थे तो उस बखत थम उसके गुलाम थे, जो असलियत म्ह परमेसवर सै ए कोनी। 9 इब थारा रिश्ता परमेसवर कै गैल सै, उसनै म्हारे ताहीं अपना बेट्टा होण खात्तर बुलाया सै, तो उन कमजोर अर निकम्मी पुराणी शिक्षाओं के गुलाम बणण खात्तर क्यूँ उसकी ओड़ जाओ सों, के थम दुबारा उनके गुलाम होणा चाहो सों? 10 थम गैर यहूदी बिश्वासी लोग दिन, महिन्ना, सही बखत अर साल्लां नै मान्ने सों, जो मूसा नबी के नियम-कायदा के मुताबिक सै। 11 मै थारे बारे म्ह डरूँ सूँ, जो थम करो सों, कदे इसा ना हो के जो मेहनत मन्ने थारे खात्तर करी सै वा बेकार हो जावै। 12 हे बिश्वासी भाईयो, मै थारे तै बिनती करूँ सूँ, के अपने-आपने मूसा नबी के नियम-कायदा तै आजाद करो, क्यूँके मै भी मूसा नबी के नियम-कायदा तै आजाद होग्या सूँ, जिस तरियां थम गैर यहूदी होण तै नियम-कायदा तै आजाद हो, थमनै मेरे साथ बुरा बरताव न्ही करया। 13 थमनै याद होगा के मन्ने पैहलम पहल देह के बीमारी कै कारण थारे ताहीं सुसमाचार सुणाया। 14 मेरी बीमारी थारे खात्तर मुसीबत थी, फेर भी थमनै ना तो मेरे तै नफरत करी, अर ना ए मेरे ताहीं तुच्छ जाणया, पर परमेसवर के सुगंदूत बल्के खुद मसीह यीशु के समान मेरे ताहीं अपनाया 15 थम खुश थे, पर इब थारी खुशी कित्त गई? मै थारा गवाह सूँ के थम मेरे खात्तर सब कुछ कुरबान कर सको थे, बल्के अपना आँख भी लिकाड़के मन्ने दे देन्दे। 16 तो के थारे तै सच बोलण के कारण मै थारा बैरी बणग्या सूँ? 17 वे थमनै अपने पक्ष म्ह करणा तो चाहवै सै, पर भले मकसद तै न्ही, बल्के उनका मतलब तो थारे ताहीं मेरे तै न्यारा पाड़ना सै ताके थम उनके ए चेल्लें बण जाओ। 18 सदा ए आच्छे मकसद कै खात्तर उत्साही होणा आच्छा सै अर सिर्फ उस्से बखत न्ही, जिव मै थारे गेल्या रहूँ सूँ। 19 हे मेरे बाळकों, जिस तरियां एक औरत बच्चा होण कै बखत जो दर्द सहवै सै उस्से तरियां मै भी थारे खात्तर दर्द सहूँ सूँ मै जिव ताहीं दर्द म्ह रहूँगा जिव ताहीं थम मसीह म्ह सिध्द ना हो जाओ। 20 जी तो इसा करै सै, के इस बखत मै थारे धोरे होन्दा अर प्यार तै थारे ताहीं समझान्दा, क्यूँके मेरी समझ म्ह कोनी आन्दा के मै थमनै के कहूँ। 21 थम जो मूसा नबी के नियम-कायदा कै अधीन होणा चाहवै सों, मेरी बात्तां पै ध्यान द्यो, मै बताऊँ सूँ के मूसा नबी के नियम-कायदा की किताब म्ह के लिख्या सै? 22 पवित्र ग्रन्थ म्ह यो लिख्या सै, के अब्राहम कै दो छोरे होए, उसका एक छोरा हाजिरा नाम की नौकराणी तै पैदा होया अर दुसरा सारा तै पैदा होया जो उसकी ब्याहता थी। 23 पर जो नौकराणी तै पैदा होया था वो एक

साधारण बच्चा था जो शरीर की इच्छा तै पैदा होया, अर जो उसकी ब्याहता बीरबानी तै पैदा होया, वो परमेसवर के वादे के मुताबिक पैदा होया जो उसने अब्राहम तै करया था। 24 इन बात्तां तै हमनै या सीख मिलै सै, ये बीरबानी मान्नो दो करार सै। करार जो परमेसवर नै सीनै पहाड़ पै इस्राएली माणसां तै जो करया था वो हाजिरा की तरियां सै। 25 अर हाजिरा मान्नो अरब देश का सीनै पहाड़ सै, अर वो आज के यरुशलेम नगर की तरियां सै जडै के माणस मूसा के नियम-कायदा के समान सै। 26 पर सुर्गीय यरुशलेम अब्राहम की बिरबानी सारा के समान सै, अर उसके बाळक गुलाम कोनी, यो यरुशलेम बिश्वासीयाँ के खात्तर माँ की तरियां सै। 27 जिसा यशायाह नै पवित्र ग्रन्थ म्ह लिख्या सै, “हे बाँझ बिरबानी, तू जो बाळक पैदा न्ही कर सकदी, आनन्दित हो, तू जो प्रसव-पीड़ा तै अनजाण सै, ऊँची आवाज म्ह जयजयकार कर, क्यूँके छोड़ी होई की ऊलाद सुहागण की ऊलाद तै भी घणी सै।” 28 हे बिश्वासी भाईयो, थम इसहाक की तरियां हो क्यूँके थारा जन्म परमेसवर के वादे के मुताबिक होया सै जो उसने अब्राहम तै करया सै। 29 अर जिसा उस बखत शरीर की इच्छा के मुताबिक जन्मा होया बेटा परमेसवर की आत्मा के शक्ति के मुताबिक जन्मे होए बेटे नै सतावै था, उस्से तरियां हम भी उन माणसां तै सताये जावां सां, जो यो चाहवै सै के परमेसवर की नजर म्ह धर्मा बणण खात्तर मूसा नबी के नियम-कायदा नै मानना जरूरी सै। 30 पर पवित्र ग्रन्थ कहवै सै, के “नौकराणी अर उसके बेटे नै लिकाड़ दे, क्यूँके वो ब्याहता बिरबानी के बेटे के गैल कदे भी पिता की सम्पत्ति का वारिस न्ही होगा।” 31 इस करके हे बिश्वासी भाईयो, हम नौकराणी की ऊलाद कोनी जो के मूसा नबी के नियम-कायदे सै, बल्के ब्याहता बिरबानी की ऊलाद सां जो के बिश्वास सै।

5 मसीह नै म्हारे ताहीं मूसा नबी के नियम-कायदा तै आजाद कर दिया सै, इस करके अपनी आजादी बणा के राख्यो, अर मूसा के नियम-कायदा नै मानण खात्तर कोए थमनै गुलाम ना बणावै। 2 सुणो! मै, पौलुस, थारे तै कहुँ सूं के जै खतना करावोगे, तो मसीह तै थमनै किमे फायदा न्ही होगा। 3 फेर भी मै एक खतना कारण आळे नै बता यु सूं, के उसनै सारे नियम-कायदे मानने पडैगें। 4 थम जो नियम-कायदा के जरिये धर्मा बणणा चाहो सों, तो फेर थमनै यीशु मसीह तै रिश्ता तोड़ लिया सै, अर थमनै अपने-आप ताहीं उस दया तै अलग कर लिया सै जिसके जरिये परमेसवर थमनै बचा सकै सै। 5 मै यो इस खात्तर कहुँ सूं, क्यूँके हमनै पवित्र आत्मा की ओड़ तै पूरा भरोस्सा सै, के परमेसवर यीशु मसीह पै बिश्वास करण के कारण हमनै धर्मा बणावेगा। 6 जै थम यीशु मसीह नै मानण आळे सों, तो उसतै कोए फर्क कोनी पड़ता के थारा खतना होया सै के न्ही होया, पर जरूरी यो सै, के हम मसीह पै बिश्वास करां, अर परमेसवर अर माणसां प्रति प्यार राख्वा। 7 थम मसीह पै बिश्वास करण म्ह बढ़ण लागरे थे, पर इब थमनै सच्चाई मानण तै कोए रोक न्ही ले। 8 इसी सीख परमेसवर की ओड़ तै न्ही आन्दी जो

थमनै अपनी ऊलाद होण खात्तर बुलावै सै। 9 सीख जो सच्ची न्ही सै वो इस कहावत की तरियां सै, थोड़ा-सा खमीर सारे गूँधे होए चून नै खमीर बणा दे सै। 10 पर मै परमेसवर पै भरोस्सा राख्खूँ सूं, के वो थमनै झूठी अर भरमाण आळी सीख तै बचाये राख्खैगा, पर जो थमनै भरमा दे सै चाहे वो कोए भी क्यूँ ना हो परमेसवर तै दण्ड पावेगा। 11 हे बिश्वासी भाईयो, थम जाणो सों के मै यो प्रचार करूँ सूं, के खतना करवाणा जरूरी कोनी, इस करके यहूदी माणस मेरे ताहीं सारी हाण सतावै सै, जै मै क्रूस नै छोड़के खतना का प्रचार करूँ तो उसतै यहूदी माणस मेरे ताहीं कोनी सतावैगें। 12 भला होंदा जो थमनै डामाडोल करै सै, वे अपने-आपनै नपुंसक बणा लेवै। 13 हे बिश्वासी भाईयो, थम आजाद होण के खात्तर परमेसवर के जरिये बुलाए गये सों, इस खात्तर थमनै मूसा नबी के नियम-कायदा ताहीं माणण की जरूरत कोनी, पर इसा ना होवै के थम इसनै बुरी लालसा पूरी करण का जरिया बणा ल्यो, पर हरेक के गैल प्यार करो अर सेवा करो। 14 क्यूँके सारे नियम-कायदे इस एक बात म्ह पूरे हो ज्या सै, “तू अपने पड़ोसी तै अपने जिसा प्यार कर।” 15 पर जै थम एक-दुसरे नै जानवरां की ढाळ पाड़ खाओ सों, तो चौकस रहो, के थम एक-दुसरे नै नाश ना कर दियो। 16 पर मै कहुँ सूं, पवित्र आत्मा नै थारे जीवन म्ह अगुवाई करण द्यो, ताके थम अपनी बुरी आदत्तां नै (लालसा) नै पूरी ना कर सकों। 17 देह की बुरी लालसा पवित्र आत्मा के बिरोध म्ह, अर पवित्र आत्मा देह की बुरी लालसा के बिरोध म्ह लड़दी रहवै सै। इस कारण जो भले काम थम करणा चाहो सों वो न्ही कर पान्दे। 18 जै थम आत्मा की अगुवाई म्ह चाल्लों सों, तो थम मूसा के नियम-कायदा के अधीन न्ही सों। 19 देह के काम तो दिक्खै सै, यानी के जारी, भुन्डे काम, लुचपण, 20 मूर्तिपूजा, टोणा, बैर, गुस्सा, बिरोध, फूट विधर्म, 21 डाह, मतवालापण, रासलीला अर इनके जिसे और काम सै, इनके बारे म्ह मै थारे तै पैहल्या कह यु सूं जिसा पैहल्या कह्या था, के इसे-इसे काम करणीये परमेसवर के राज्य के वारिस न्ही होंगे। 22 पर आत्मा का फळ प्यार, आनन्द, शांति, धीरज, करुणा, भलाई, बिश्वास, 23 नम्रता, अर संयम सै, इसे-इसे काम्मां के बिरोध म्ह कोए भी नियम-कायदे कोनी। 24 अर जो मसीह यीशु म्ह सै उननै देह की बुरी लालसाओं ताहीं क्रूस पै चढ़ा दिया सै। 25 क्यूँके पवित्र आत्मा नै म्हारे ताहीं नई जिन्दगी दी सै, इस खात्तर पवित्र आत्मा नै जिन्दगी के हरेक क्षेत्र म्ह अगुवाई करण द्यो। 26 हम घमण्डी होके ना एक-दुसरे नै छेड़ा, अर ना एक-दुसरे तै जळण करा।

6 हे बिश्वासी भाईयो, जै कोए माणस किसे पाप या कसूर म्ह पकड्या भी जावै, तो थम जो पवित्र आत्मा के चलाए चाल्लों सों, उसनै नरमाई के गेल्या धर्म की राह पै उल्टा ल्यावण म्ह उसकी मदद करो, अर अपना भी ध्यान राख्खों के थम भी इसे इम्तिहान म्ह ना पड़ जाओ। 2 म्हारे म्ह तै जै कोए भी मुसीबत म्ह हो, तो हमनै एक-दुसरे की मदद करणी चाहिए, अर इस तरियां हम मसीह के नियम-कायदा नै मानना सां। 3 क्यूँके जै कोए अपने-आपनै नै बड़ा समझै सै, तो अपने-आपनै

धोक्खा देण लाग रहया सै। 4 हरेक माणस अपणे काम्मां नै परख ले, उसके काम आच्छे सै तो वो अपणे-आपने पै घमण्ड कर सकै सै, अर उसनै अपणे काम की बराबरी किसे दुसरे के काम गैल न्ही करणी चाहिए। 5 म्हारे म्ह तै हरेक माणस अपणे सुभाव के खात्तर जिम्मेदार सै। 6 यो जरूरी सै के जो माणस परमेसवर के वचनां नै सिखावै सै, तो उसकी संसारिक चिज्जां की जरूरत सीखण आळे तै पूरी हो होणी चाहिए। 7 अपणे-आप ताहीं धोक्खा ना द्यो, कोए माणस यो ना सोचै के वो परमेसवर नै धोक्खा दे सकै सै। 8 क्यूँके जो माणस इसे काम करै सै उसका बुरा सुभाव उसके खात्तर मौत लेकै आवै सै, पर जो माणस परमेसवर की इच्छा पूरी करै सै, तो उसका आत्मा उसनै अनन्त जीवन देवै सै। (aiōnios g166) 9 हम भले काम करण का होसला ना छोड्डा, क्यूँके जै हम हिम्मत ना छोड्डा तो परमेसवर के बखत पै कटनी काटैगें। 10 इस करके जडै ताहीं मौक्का मिलै हम सारा के गेल्या भलाई करा, खास करके बिश्वासी भाईयाँ के गैल। 11 मन्नै बड़े-बड़े अक्षरां म्ह थारे तैई अपणे हाथ तै लिख्या सै। 12 इस कारण के यहूदी लोग थमनै अपणावै, अर वे थारा खतना करवाण के खात्तर मजबूर करै सै, ताके लोग उन ताहीं इस बात का प्रचार करण खात्तर सतावै ना, के परमेसवर माणसां ताहीं जिब्बे बचावैगा जिब वे बिश्वास करैगें के मसीह क्रूस पै मरा। 13 क्यूँके खतना कारण आळे खुद तो मूसा नबी के नियम-कायदा पै न्ही चाल्दे, वो थारा इस खात्तर खतना करणा चाहवै सै ताके और यहूदियाँ के स्याम्ही घमण्ड कर सकै, के थारा खतना उनकी बजह तै होया सै। 14 खुद के खात्तर, मै, किसे बात पै घमण्ड कोनी करणा चाहूँ, पर यीशु मसीह के क्रूस पै जान देण के कारण, मै घमण्ड करणा चाहूँ सूँ, अर जो उसनै करया उस बजह तै दुनियावी चिज्जां का मेरे उप्पर कोए हक कोनी रह्या, अर इब मेरी दुनियावी चिज्जां म्ह कोए दिलचस्पी कोनी। 15 क्यूँके ना खतना अर ना बिना खतना कुछ सै, जो जरूरी बण चुके सै, जो जरूरी सै वो यो सै के परमेसवर हमनै पवित्र आत्मा के जरिये नया इन्सान बणा दे। 16 परमेसवर अपणी शान्ति अर आशीष उन सारया नै देवैगा, जो उसके हुकम नै मान्ने सै। वे परमेसवर के माणस सै। 17 आगै तै मन्नै कोए दुख ना दे, क्यूँके जो मेरे देह पै जख्मां के दाग सै वो ये दिखावै सै के मै यीशु का दास सूँ। 18 हे बिश्वासी भाईयो, म्हारे प्रभु यीशु मसीह का अनुग्रह थारी आत्मा के गेल्या रहवै। आमीन।

इफिसियों

1 या चिट्ठी पौलुस की ओड़ तै सै, जो परमेसवर की इच्छा तै यीशु मसीह का प्रेरित सै, मै या चिट्ठी उन पवित्र अर मसीह यीशु म्ह बिश्वासी माणसां के नाम लिखूँ सूँ, जो इफिसुस नगर म्ह रहवै सै। 2 मै प्रार्थना करूँ सूँ, के म्हारे पिता परमेसवर अर प्रभु यीशु मसीह की ओड़ तै थारे ताहीं अनुग्रह अर शान्ति मिलदी रहवै। 3 म्हारे परमेसवर अर प्रभु यीशु मसीह के पिता का धन्यवाद हो के उसनै म्हारे ताहीं मसीह म्ह आत्मिक रूप तै हरेक तरियां तै, उन आशीषां के जरिये आशिषित करया जो सुर्ग तै आवै सै। 4 परमेसवर नै धरती अर अकास बणाण तै पैहले ए उसनै मसीह म्ह म्हारे ताहीं चुण लिया, ताके हम इसकी निगांह म्ह पवित्र अर बेकसूर होवां। 5 अर प्यार म्ह उसनै अपनी भले मकसद मुताबिक म्हारे ताहीं अपने खात्तर पैहले तै ठहराया के यीशु मसीह के जरिये हम उसकी गोद ली होई ऊलाद हो। 6 तो आओ हम परमेसवर के अदभुत अनुग्रह की महिमा करा, अर यो इस खात्तर होया सै क्यूँके म्हारा रिश्ता उसके बेटे के गैल सै, जिसतै वो प्यार करे सै। 7 यीशु मसीह के लहू बहाए जाण के कारण हम छुड़ाए गये, जिसका मतलब यो सै के म्हारे सारे पाप माफ होए। परमेसवर के भोत अनुग्रह के मुताबिक मसीह म्ह उसके लहू के जरिये छुटकारा यानी पापां तै माफी मिलै सै। 8 परमेसवर नै सारी बुद्धि अर ज्ञान तै म्हारे पै भोत-ए घणी दया करी। 9 परमेसवर नै अपनी इच्छा का भेद म्हारे पै भले मकसद के मुताबिक जाहिर करया, जिस ताहीं उसनै खुद मसीह म्ह स्थापित करया। 10 अर परमेसवर की योजना के मुताबिक, तय करे गए बखत पै, जो किमे सुर्ग अर धरती पै सै, वो सारा किमे मसीह के हाथ म्ह सौंपैगा। 11 परमेसवर नै मसीह म्ह हम यहूदी माणसां ताहीं भी अपने माणस होण खात्तर छोट लिया सै, क्यूँके शरू तै ए उसकी या योजना थी, उसनै यो सब कुछ अपनी इच्छा अर योजना के मुताबिक करया। 12 यो उसनै इस खात्तर करया जिसतै के हम यहूदियां ताहीं जो पैहले माणस सै, जो मसीह पै आस राखवै सै, अर उसकी महिमा की बड़ाई के कारण बणा। 13 अर योए थारे गैल भी होया के थमनै सच्चाई का वचन सुणया, अर वो सुसमाचार यो सै, के थमनै वो किस तरियां बचा सके सै, जिब थम मसीह पै बिश्वास करो सों तो परमेसवर थमनै वादे के मुताबिक पवित्र आत्मा देवै सै, यो दिखान खात्तर के थम परमेसवर के माणस सों। 14 क्यूँके परमेसवर नै म्हारे ताहीं पवित्र आत्मा दिया सै, तो हम यो जाणा सां के परमेसवर म्हारे ताहीं और भी आच्छी चीज देवैगा, जिसका उसनै वादा करया सै, अर यो उस बखत होगा जिब परमेसवर अपने माणसां नै पूरी तरियां तै छुड़ावैगा, उसके अदभुत अनुग्रह की बड़ाई होवै। 15 इस कारण, जिब तै मन्नै भी प्रभु यीशु मसीह म्ह थारे बिश्वास अर पवित्र माणसां के प्रति थारे प्यार के बारें म्ह सुणया, तो मै परमेसवर का सदा धन्यवाद करूँ सूँ, अर अपनी प्रार्थना म्ह थमनै हमेशा याद राखूँ सूँ। 17 मै प्रार्थना करूँ सूँ, के महिमामय परमेसवर जो के म्हारे प्रभु यीशु मसीह

का पिता सै, वो थारे ताहीं आत्मिक समझ अर ज्ञान देवै, ताके थम परमेसवर नै पूरी तरियां जाण सकों। 18 मै या भी प्रार्थना करूँ सूँ, के वो सच्चाई जाणण म्ह थारी मदद करे के थम जाण सकों के परमेसवर के जरिये बुलाये जाण की आस के सै, अर थम जाण सकों के इतनी बड़ी अर महान् आशीष अपने पवित्र माणसां खात्तर राख राखी सै। 19 मै चाहूँ सूँ के थम उसनै जाण सको, के उस महान् परमेसवर नै यीशु मसीह पै बिश्वास करण आळे खात्तर जो शक्ति राख राखी सै, या वाए बड़ी शक्ति सै। 20 जिसनै मसीह ताहीं मरे होया म्ह तै जिवाया अर सुर्ग म्ह अपनी सोळी ओड़ बैठाया। 21 सारी ढाळ की प्रधानता, हक, सामर्थ, प्रभुता के उप्पर राज करैगा जो इस लोक म्ह सै, अर आण आळे लोक म्ह भी राज करैगा। (aiōn g165) 22 परमेसवर नै सारा किमे उसके पायां तळे कर दिया, अर उसनै कलीसिया की भलाई खात्तर सब किमे उसके हाथ्यां म्ह सौप दिया। 23 कलीसिया मसीह की देह सै, अर उसतै भरपूर सै, वो अपनी मौजूदगी तै हरेक चीज अर हरेक जगहां नै भरै सै।

2 पुराणे बखत म्ह थारे धोरे नई जिन्दगी कोनी थी, थम अपने बुरे काम्मां अर पापां के कारण मरे होए माणसां के समान थे। 2 थम उस बखत दुनिया की रीति-रिवाज के मुताबिक, बुरी आत्मायाँ के सरदार जो अकास म्ह सै, उसके मुताबिक चाल्लों थे, जो इब भी उनके मनां म्ह काम करे सै, जो परमेसवर का हुकम न्ही मानते। (aiōn g165) 3 इन म्ह हम भी सारे के सारे पैहले अपनी देह की लालसाओं म्ह दिन बितावा थे, अर देह अर मन की मर्जियाँ नै पूरी करा थे, अर और माणसां की ढाळ सुभाव तै ए छो की ऊलाद थे। 4 पर परमेसवर नै जो दया का धनी सै, अपने उस घणे प्यार के कारण जिसतै उसनै म्हारे तै प्यार करया। 5 अपने पुराणे जीवन म्ह पापां के कारण हम मरे होए थे तो परमेसवर नै जिस तरियां यीशु मसीह ताहीं जिन्दा करया, हमनै भी आत्मिक रूप तै जिन्दा करैगा, अर सुर्गीयां जगहां म्ह मसीह के गेल्या बिठावैगा, अर परमेसवर के अनुग्रह तै ए थारा उद्धार होया सै। 7 परमेसवर नै यो इस खात्तर करया के अपनी दया तै जो मसीह यीशु म्ह म्हारे पै सै, आण आळे दिनां म्ह दिखा सके, के उसका अनुग्रह कितना बड़ा सै, हम जो मसीह म्ह सां, उसनै म्हारे पै भी अनुग्रह दिखाया। (aiōn g165) 8 जिब थमनै परमेसवर पै बिश्वास करया तो उसनै अपने अनुग्रह के जरिये थारा उद्धार करया सै, थारा उद्धार थारी ओड़ तै न्ही, बल्के परमेसवर ओड़ तै दान सै। 9 यो इस करके न्ही होया के थमनै कोए भला काम करया सै, अर थम उसपै घमण्ड करो। 10 क्यूँके हम उसके बणाए होए सां, अर मसीह यीशु म्ह उन भले काम्मां के खात्तर रचे गये जिन ताहीं परमेसवर नै पैहले तै म्हारे करण के खात्तर तैयार करया। 11 इस कारण थम याद राखवै के थम जन्म तै गैर यहूदी सों, अर यहूदी लोग थारा मजाक उड़ावै सै, के थारा खतना कोनी होया, पर उनका खतना होया सै, इस खात्तर वे परमेसवर के लोग सै। पर उननै खतना अपनी देह का करवाया सै मन का कोनी करवाया। 12 थम उस बखत मसीह ताहीं कोनी जाणो थे, अर थम परमेसवर के चुणे होए इस्राएली माणस कोनी थे, अर वादे के

करार के भी साइड्री कोनी थे, जो उसने अपने माणसां तै बाँधी थी, अर बिना आस अर दुनिया म्ह बिना ईश्वर के थे। 13 पर पैहले जो थम, परमेसवर तै दूर थे, परमेसवर नै थारे ताहीं मसीह यीशु के लहू बहाण के जरिये धोरे बुला लिये सों। 14 मसीह नै हम यहूदी अर थम गैर यहूदी माणसां म्ह शान्ति बणाई सै, पुराणे बखत म्ह यो लागै था के यहूदी अर गैर यहूदी माणसां म्ह एक दीवार सै, वो एक-दुसरे तै नफरत करै थे, पर मसीह नै वा दीवार ढा दी सै, अर दोन्नु दलां ताहीं एक कर दिया सै। 15 उसने अपनी मौत के जरिये मूसा के नियम-कायदा ताहीं रद कर दिया, ताके वो यहूदी अर गैर यहूदी माणसां म्ह शान्ति लैके आवै, अर इसके जरिये वो अपने-आप म्ह यहूदी अर गैर यहूदी की जगहां एक नई जात बणा दे। 16 उसने क्रूस पै अपनी जाण देके यहूदी-अर गैर यहूदी माणसां म्ह बैर का नाश करके एक देह बणाके परमेसवर तै मिला दिया। 17 मसीह नै आके थम गैर यहूदी जो उसतै दूर थे, अर थम यहूदी माणस जो परमेसवर के लोवै थे, दोनुआ ताहीं मेळ-मिलाप का सुसमाचार सुणाया। 18 क्यूँके मसीह म्ह ए हम सब उस एक पवित्र आत्मा कै जरिये ए पिता के धोरै पोहच सका सां। 19 इस करके थम गैर यहूदी इब विदेशी अर मुसाफिर कोनी रहे, पर पवित्र माणसां के साथी देशी अर परमेसवर के कुण्बे के होंगे सों। 20 थम उस घर की तरियां सों जिसकी नीम प्रेरित अर नबी सै, अर जिसके कोणे का पत्थर मसीह यीशु आप सै। 21 मसीह ए सै जिसनै घर ताहीं टिकाके राख्या सै, अर उसतै प्रभु के खात्तर एक पवित्र मन्दर बणदा जावै सै। 22 क्यूँके थम मसीह म्ह सों, इस खात्तर थम गैर यहूदी बिश्वासी परमेसवर के माणसां गैल एक होंगे, ताके थम वो घर बणदे जाओ जिस म्ह परमेसवर रहवै सै।

3 इस कारण मै पौलुस थारे खात्तर कैद म्ह सूँ, क्यूँके मै थम गैर यहूदी माणसां नै सुसमाचार सुणाके मसीह यीशु की सेवा करूँ सूँ। 2 पक्का थमनै सुण्या होगा के परमेसवर नै अपने अनुग्रह तै थारे ताहीं सुसमाचार की खबर सुणाण की जिम्मेदारी मेरे ताहीं दी सै। 3 परमेसवर की गुप्त योजना घणे लम्बे बखत तै छुपी होई थी, पर परमेसवर नै इस ताहीं मेरे उप्पर जाहिर करया, मै इस चिट्ठी के जरिये परमेसवर के उस गुप्त भेद नै थारे ताहीं समझाणा चाहूँ सूँ। 4 जिन थम मेरी चिट्ठी नै पढ़ोगे तो थम जाण पाओगे, के मै मसीह के उस भेद के बारे म्ह कितनी आच्छी तरियां जाणू सूँ। 5 पुराणे बखत म्ह परमेसवर नै इस भेद ताहीं माणसां के उप्पर जाहिर कोनी करया, पर इब उसने उस भेद ताहीं पवित्र आत्मा कै जरिये, अपने पवित्र प्रेरितां अर नबियाँ पै जाहिर करया। 6 अर वो भेद यो सै के मसीह यीशु म्ह सुसमाचार कै जरिये गैर यहूदी वाए विरासत हासिल करै, जो यहूदी माणसां कै धोरै सै, अर एकैए देह के अंग अर परमेसवर के वादे के साइड्री सै। 7 परमेसवर के अनुग्रह अर बड़ी सामर्थ के जरिये मेरे ताहीं सुसमाचार सुणाण का काम मिला सै। 8 मेरे पै जो सारे पवित्र माणसां म्ह तै, छोट्टे तै भी छोट्टा सूँ, यो अनुग्रह होया के मै गैर यहूदियाँ नै मसीह का सुसमाचार सुणाऊँ, अर लोग्गां नै परमेसवर की योजना ताहीं समझण म्ह मदद करूँ। 9 अर

हरेक माणसां ताहीं समझा सकूँ के उसने उस योजना ताहीं जो उसने पैहले तै सोच्यी थी, किस तरियां पूरी करी, या योजना पैहले तै जाहिर कोनी होई थी क्यूँके परमेसवर जो सारी चिज्जां नै रचणियाँ सै, उस ताहीं छिपाए राख्या। (aiōn g165) 10 ताके इब कलीसिया कै जरिये, परमेसवर का बेसुमार ज्ञान आसमान के उन प्रधानां अर अधिकारियां पै जाहिर करया जावै। 11 परमेसवर नै दुनिया बणाण तै पैहले या योजना बणाई थी, जिस ताहीं उसने म्हारे प्रभु यीशु मसीह के जरिये पूरा करया। (aiōn g165) 12 क्यूँके म्हारा मसीह पै बिश्वास सै, अर उसके कारण परमेसवर की मौजूदगी म्ह हिम्मत अर भरोसे के गेल्या परमेसवर के लोवै आ सका सां। 13 इस करके मै बिनती करूँ सूँ के जो क्लेश थारे खात्तर मन्ने होवै सै, उनके कारण हिम्मत ना छोड़ो, क्यूँके हम पिता परमेसवर के धोरै जा सका सां। 14 मै इससे कारण उस पिता परमेसवर के आगै घुटेने टेक कै प्रार्थना करूँ सूँ। 15 वोए सै जो सुर्ग अर धरती पै, हरेक वंश का पिता सै। 16 मै प्रार्थना करूँ सूँ, के परमेसवर अपनी महिमा के असीमित धन के मुताबिक थारे पै अनुग्रह करै, ताके थम उसकी पवित्र आत्मा तै अपने भीतरी माणसपण म्ह सामर्थ पाके शक्तिशाली होन्दे जाओ। 17 अर बिश्वास कै जरिये मसीह म्हारे मन म्ह बसै, ताके थम प्यार म्ह मजबूत होके बणे रहों, अर सारे पवित्र माणसां कै गेल्या आच्छी ढाळ समझण की ताकत पाओ, के उसके प्यार की चौड़ाई, लम्बाई, अर ऊँचाई, अर गहराई कितनी सै। 19 मै प्रार्थना करूँ सूँ, के थम मसीह के उस प्यार नै जाण सको जो ज्ञान तै परे सै, ताके थारा सुभाव परमेसवर के सुभाव जिसा हो जावै। 20 परमेसवर ताकतवर सै, अर वो म्हारी बिनती अर समझ तै भी घणा काम कर सकै सै, उस सामर्थ के मुताबिक जो म्हारे म्ह काम करै सै। 21 कलीसिया म्ह अर मसीह यीशु म्ह उसकी बड़ाई पीढ़ी तै पीढ़ी तैई युगानुयुग होंदी रहे। आमीन। (aiōn g165)

4 मै प्रभु की सेवा करण के कारण कैद म्ह सूँ, अर थारे तै बिनती करूँ सूँ, के जिस बुलाहट तै परमेसवर नै थारे ताहीं बुलाया सै, उससे तरियां जीवन बिताओ। 2 यानी सारी दीनता अर नम्रता गैल, धीरज धरके प्यार तै एक-दुसरे नै सह ल्यो। 3 इसा करण की भरपूर कोशिश करो, के थम रळ-मिलके रह सकों, क्यूँके परमेसवर की आत्मा के जरिये थम एक ए होण खात्तर बुलाए गये सों। 4 हम सारे बिश्वासी, देह के अंगां की ढाळ सां, अर सारया नै एकैए पवित्र आत्मा पाई सै, उससे ढाळ जिन परमेसवर नै थारे ताहीं अपने माणस होण खात्तर बुलाया था, तो थारे ताहीं एक उम्मीद दी गई थी। 5 सिर्फ एके प्रभु सै, एके बिश्वास सै, हम सारया नै यीशु के नाम म्ह बपतिस्मा पाया सै, 6 सिर्फ एके परमेसवर सै जो सारे माणसां का पिता सै, जो सब के उप्पर राज करै सै, अर हम सब के जरिये काम करै सै, अर हम सारया के म्ह रहवै सै। 7 पर मसीह नै हम सारया ताहीं उसके काम करण खात्तर न्यारे-न्यारे ढाळ की खास काबलियत देई सै। 8 इस करके पवित्र-ग्रन्थ मसीह के बारे म्ह कहवै सै, “वो ऊँचे पै चढ़ा अर कैदियाँ नै बाँधले गया, अर

माणसां ताहीं आत्मिक दान दिए।” 9 उसकै ऊँचे पै चढ़ण का, के मतलब हो सके सै, सिवाए इसके के वो अधोलोक म्ह भी उतर गया। 10 अर जो उतर गया, यो वोए सै, जो सुर्ग म्ह सारे तै ऊँचे पद पै पोहच गया, जिसतै के उसका राज सारे ब्रह्माण्ड म्ह फैल जावै। 11 यो मसीह सै जो म्हारे ताहीं वरदान देवै सै, उसनै कईयाँ तै प्रेरित, अर कईयाँ तै नबी, कईयाँ तै सुसमाचार सुणाण आळे, कईयाँ तै सेवक अर शिक्षक नियुक्त करया, इनकी जिम्मेदारी या सै के ये और दुसरे माणसां नै सीखा के परमेसवर का काम करवा सकै, अर कलीसिया जो मसीह की देह सै उस ताहीं मजबूत कर सकै। 13 यो तब तक होन्दा रहवैगा जब तक के हम अपणे विश्वास, अर परमेसवर के बेटे के बारे म्ह अपणी समझ म्ह एक ना हो जावां, फेर हम सिध्द बणागे जिस तरियां मसीह सिध्द सै, अर हम पूरी तरियां तै उसके जिसे बण जावांगे। 14 मसीह म्ह बढ़ण अर सिध्द होण के कारण, हम बाळकां के जिसा बरताव ना करां, हम उस किस्ती की ढाळ ना बणा, जिसनै झाल आगै-पाछै, अर हवा आस्सै-पास्सै उछाळै सै। इसका मतलब यो सै, के चलाक, अर ठग माणस अपणी झूठी शिक्षा के जरिये हमनै धोक्खा न्ही देण पावै। 15 बल्के सच नै प्यार तै बोल्लों, अर सारी बात्तां म्ह मसीह यीशु की तरियां सिध्द बणां, जो के म्हारा सिर सै। 16 हम सारे जो मसीह म्ह विश्वास करां सां, हम उसकी देह के अंग की तरियां सां, जिस तरियां एक माणस की देह, जोड़ा के जरिये एक साथ जुड़ी हो सै अर जब देह का हर हिस्सा आच्छी तरियां काम करै सै, तो देह का विकास होके मजबूत बणे सै, इससे तरियां म्हारे म्ह तै जै कोए मसीह का काम करै सै, जो मसीह नै म्हारे ताहीं दिया सै, तो हम भी मजबूत अर सिध्द होवां सां, अर हम एक-दुसरे तै ज्यादा प्यार करां सां। 17 इस करके परमेसवर नै जो अधिकार मेरे ताहीं दिया सै, उसकी बजह तै मै न्यू कहूँ सूँ, के जिसा अबिश्वासी माणस अपणे मन की बेकार की रीति-रिवाजां म्ह अपना जीवन जीवै सै, थम आज तै इसा जीवन ना जिओ। 18 क्यूँके वे समझ न्ही पाण लागरे, के उस अज्ञानता के कारण, अर उनके मन की कठोरता के कारण, जो उन म्ह सै, वे परमेसवर के उस जीवन तै न्यारे करे गए सै जो परमेसवर देवै सै। 19 वे बुरे काम की बजह तै अपणी गलती महसूस न्ही करते अर उननै अपणे-आप ताहीं बुरे काम्मां खात्तर सौप दिया सै, वे सारी ढाळ के भुन्डे काम लगातार करते जावै सै। 20 पर थमनै मसीह की शिक्षायां म्ह इसे काम करणे न्ही सीखे। 21 बल्के जो थमनै यीशु मसीह के बारे म्ह सुणया अर जो थारे शिक्षकां नै सिखाया, वोए उसकी ओड़ तै सच्चा सन्देश सै। 22 अर थारे शिक्षकां नै थारे बुरे काम अर बुरा सुभाव छोड़णा सिखाया सै, थारी बुरी लालसायां नै थारा जीवन नाश कर दिया। 23 थम पवित्र आत्मा नै थारे सुभाव अर सोच्यण के तरिकेनै नै बदलण द्यो। 24 परमेसवर नै थारे ताहीं एक नया सुभाव दिया सै, जो के उसके अपणे सुभाव की तरियां सै, इस करके इस नये सुभाव के मुताबिक बरताव करो। असलियत म्ह धर्मी अर पवित्र बणो। 25 इस कारण झूठ बोलणा छोड़के हरेक अपणे पड़ोसी तै सच बोल्लै, क्यूँके

हम आप्स म्ह हम एक ही देह के अंग सां। 26 जै थारे ताहीं गुस्सा आ भी जावै तो उस गुस्से म्ह पाप ना करियो, अर सूरज ढळण तै पैहल्या थारा गुस्सा भी न्ही रहणा चाहिए। 27 अर अपणे-आप ताहीं शैतान नै परखण का मौक्का ना द्यो। 28 चोरी करण आळा फेर चोरी ना करै, बल्के मेहनत करके अपणी कमाई के जरिये दुसरे माणसां की भी मदद कर सकै, जो जरूरत मन्द हो। 29 कोए भी गलत बात थारे मुँह तै ना लिंकडै, पर जरूरत के मुताबिक वोए लिंकडै जो दुसरयां के विश्वास की बढ़ोतरी के खात्तर हो, ताके वा बात जो थारे मुँह तै लिंकडै सै वा सुणण आळा नै उत्साहित कर सकै। 30 परमेसवर के पवित्र आत्मा नै दुखी ना करो, जो उसनै थारे ताहीं दिया सै, जो पक्का छुटकारे के दिन थमनै बचा सकै सै। 31 इस करके सारी ढाळ की कड़वाहट, प्रकोप, गुस्सा, झगड़ा, अर बुराई, सारे बैरभाव नै अपणी जिन्दगी तै लिकाड़ द्यो। 32 एक-दुसरे पै दयालु अर करुणामय हो, अर जिसा परमेसवर नै मसीह म्ह थारे कसूर माफ करे, उससे तरियां थम भी एक-दुसरे के कसूर माफ करो।

5 थम परमेसवर के बाळक सों, जिनतै वो प्यार करै सै, इस करके उसकी ढाळ बणण की कोशिश करो। 2 दुसरयां तै प्यार करण आळी जिन्दगी जिओ, जिस तरियां मसीह जिया, जिसनै थारे तै प्यार करया अर म्हारे पापां नै मिटाण खात्तर अपणे-आप ताहीं कुरबान कर दिया, अर परमेसवर उसकी कुरबानी तै खुश था, क्यूँके वा कुरबानी परमेसवर के खात्तर खसबूदार भेट के समान थी। 3 जिसा पवित्र माणसां के लायक सै, उसाए थारे म्ह जारी अर किसे ढाळ के अशुद्ध काम या लोभ का जिक्र तैई ना हो, 4 अर ना बेशर्मी, ना मूर्खता की बातचीत, ना मजाक की, क्यूँके ये बात शोभा न्ही देंदी, बल्के थारे मुँह तै परमेसवर का ए धन्यवाद सुणया जावै। 5 क्यूँके थम यो आच्छी तरियां तै जाणो सों, के कोए भी जार, दुराचारी, या लोभी माणस जो मूर्तिपूजकां के समान सै, ये मसीह अर परमेसवर के राज्य के भागी न्ही हो सकदे। 6 कोए थमनै धोक्खा ना देवै के परमेसवर पाप करण आळे माणसां नै दण्ड कोनी देवै, क्यूँके परमेसवर का छो हुकम ना मानण आळे पै भड़के सै। 7 इस करके थम उनके पापी काम्मां म्ह उनके साझीदार ना होओं। 8 क्यूँके थम तो पैहल्या उन माणसां की ढाळ थे जो अन्धकार म्ह थे, पर इब थम परमेसवर के लोग बणगे सों, इस करके थम इब चाँदणे म्ह सों, तो इब थमनै उन माणसां की ढाळ जीणा चाहिए जो चाँदणे म्ह सै। 9 क्यूँके जै माणस चाँदणे म्ह सै तो उसका सुभाव आच्छा अर धर्मी सै, अर उसपै विश्वास करया जा सकै सै। 10 अर यो परखो के प्रभु नै के आच्छा लागै सै। 11 थम उनके बुरे काम्मां म्ह उनके साझीदार ना होओं, बल्के लोग्गां नै बताओ के ये काम बुरे सै। 12 क्यूँके उनके गुप्त काम्मां का जिक्र भी शर्म की बात सै। 13 जब बुरे लोग थारा आच्छा सुभाव देक्खै सै तो उनका बुरा सुभाव जाहिर हो जावै सै, उसकी बजह तै वो अपना बुरा सुभाव छोड़ दे सै, अर थारे जिसे आच्छे बण जावै सै। 14 इस कारण एक कहावत सै के “हे सोण आळे जाग! अर मुर्दा म्ह तै

जी उठ! ताके मसीह थारे पै अपना चान्दणा चमकावै।” 15 इस करके ध्यान तै देखखों, के किसा जीवन जीण लागरे सों। बेअक्ला की तरियां न्ही पर अकलमंद की तरियां जिओ। 16 मोक्के नै घणा कीमती समझों, क्यूँके दिन बुरे सै। 17 इस कारण बेअक्ल ना होओं, पर ध्यान तै समझो के प्रभु की मर्जी के सै। 18 मदिरा पी कै मतवाले ना बणो, क्यूँके इसतै लुचपण होवै सै, पर पवित्र आत्मा तै भरदे जाओ। 19 जिब थम पवित्र आत्मा के कहे म्ह चाल्लोंगे तो ये काम करोगे, जिब थम कठ्टे होओगे तो आप्पस म्ह परमेसवर के भजन, उसकी जै-जै कार अर आत्मिक गीत गाया करोगे, अर अपने-अपणे मन म्ह प्रभु के आगै गान्दे अर कीर्तन करदे रहो। 20 अर सदा सारी बातों के खात्तर म्हारे प्रभु यीशु मसीह के नाम तै परमेसवर पिता का धन्यवाद करते रहो। 21 मसीह के प्रति श्रद्धा-भक्ति राखण के कारण एक-दुसरे कै अधीन रहो। 22 हे पत्नियाँ, अपने-अपणे पति कै इस ढाळ अधीन रहो जिस ढाळ प्रभु के अधीन रहो सों। 23 क्यूँके पति तो पत्नी का सिर सै, जिस ढाळ मसीह कलीसिया का सिर सै, अर कलीसिया मसीह की देह सै अर उद्धारकर्ता भी सै। 24 पर जिस ढाळ कलीसिया मसीह कै अधीन सै, उससे तरियां पत्नियाँ भी हर बात म्ह अपने-अपणे पति कै अधीन रहै। 25 हे पतियाँ, अपनी-अपनी पत्नियाँ तै प्यार राखखो, जिसा मसीह नै भी कलीसिया तै प्यार करके उसके खात्तर अपनी जान दे दी। 26 ताके वो कलीसिया (बिश्वासी लोग्गों) ताहीं वचन तै नाहण के जरिये पापां तै शुद्ध करै, अर पवित्र बणावै। 27 वो अपनी कलीसिया खात्तर मरया ताके वो अपने माणसां नै सिध्द बणाके अपनी हजुरी म्ह ल्या सकै, जिस म्ह ना कलंक, ना झुरी, ना कोए और इसी चीज हो बल्के पवित्र अर बेकसूर हो। 28 इस तरियां सही सै के पति अपनी-अपनी पत्नी तै अपनी देह कै समान प्यार राखखै। जो अपनी पत्नी तै प्यार करै सै। वो अपने-आप तै प्यार करै सै। 29 क्यूँके किसे नै कदे अपने देह तै बैर न्ही करया बल्के वो उसका पालन-पोषण करै सै, जिसा मसीह भी कलीसिया कै गैल करै सै। 30 इस करके के हम मसीह की देह के अंग के समान सां। 31 जिसा के पवित्रग्रन्थ म्ह लिखया सै, “इस कारण माणस अपने माँ बाप नै छोड़के अपनी पत्नी तै मिल्या रहैगा, अर वे दोनु एक देह होंगे।” 32 यो भेद तो बड़ड़ा सै, पर मै याड़े मसीह अर कलीसिया के बारे म्ह कहूँ सूँ। 33 पर थारे म्ह तै हरेक अपनी पत्नी तै अपने समान प्यार करै, अर पत्नी भी अपने पति का डर मान्ने।

6 पवित्र ग्रन्थ कहवै सै, के “अपणे माँ बाप का आदर कर, तो तेरा भला होगा अर इस धरती पै तेरी उम्र भी लम्बी होवैगी।” अर यो परमेसवर की ओड़ तै दिया गया पैहला हुकम सै, जिसके गैल वादा भी सै। हे बाळकां आळो, यो थारे खात्तर सही सै, के थम जो परमेसवर पै बिश्वास करो सों, तो अपने माँ-बाप का कहणा मान्ने। 4 हे बाळकां आळो, अपने बाळकां नै गुस्सा ना दुवाओ, पर शिक्षा अर चेतावनी देंदे होए उनका पालन-पोषण करो। 5 हे नौकरों, जो माणस इस दुनिया म्ह थारे मालिक सै, उनका हुकम डरदे अर आपते होए मान्ने, जिस मन तै

थम मसीह का हुकम मान्ने सों। 6 माणसां नै खुश करण आळा कै समान दिखावटी सेवा ना करो, पर थम मसीह के दास सों, इस करके थम पूरे मन तै वो काम करो जो परमेसवर चाहवै सै। 7 अर उस सेवा नै माणसां की न्ही, पर प्रभु की सेवा जाणके सच्चे मन तै करो। 8 क्यूँके थम जाणो सों के जो कोए जिसा आच्छा काम करैगा, चाहे दास हो चाहे आजाद माणस, प्रभु तै उसका फळ पावैगा। 9 हे मालिकों, थम भी थमकी देणा छोड़के नौकरां गैल उसाए व्यवहार करो, क्यूँके थम जाणो सों के उनका अर थारा दोनुआ का मालिक सुर्ग म्ह सै, अर वो किसे का पक्षपात न्ही करदा। 10 इस करके मै कहूँ सूँ के थम प्रभु म्ह आत्मिक रूप तै शक्तिशाली बणो। 11 परमेसवर के सारे हथियार बाँध ल्यो ताके थम शैतान की चालां के स्याम्ही खड़े रह सको। 12 क्यूँके म्हारा यो आत्मिक युध्द माणसां तै कोनी, पर प्रधानां, अधिकारियां, अर इस संसार के अन्धकार के हाकिमां अर दुष्टता की आत्मिक सेनाओं तै सै, जो अकास म्ह सै। (aiōn g165) 13 इस करके परमेसवर के सारे हथियार बाँध ल्यो ताके जिब बुरे दिन आवै तो उनका सामना कर सको, अर सब कुछ करण म्ह मजबुती तै डटे रह सको। 14 इस करके परमेसवर की सच्चाई के मुताबिक जिओ, यो इस तरियां सै, जिसा एक सिपाही का बेल्ट तै अपनी कमर कसणा, अर धार्मिकता की झिलम पैहर ल्यो जो थारे आच्छे सुभाव नै दिखावै सै, जो थमनै शैतान के हमले तै बचावैगा। 15 जिस तरियां एक सिपाही युध्द लड़ण कै खात्तर पैरां म्ह जूते पैहरै सै, उससे तरियां थम भी परमेसवर के साथ शान्ति के सुसमाचार के जरिये, शैतान तै लड़ण खात्तर तयार हो जाओ। 16 अर इन बातों के होन्दे होए जिस तरियां सिपाही, ढाल तै अपने-आपनै दुश्मन के तीरां तै बचावै सै, उससे तरियां मसीह म्ह पक्का बिश्वास करो ताके थम शैतान के हमलां तै खुद नै बचा सको। 17 जिस तरियां सिपाही युध्द म्ह अपने सिर नै बचाण खात्तर टोप पैहरै सै, उससे तरियां परमेसवर की ओड़ तै मिल्या उद्धार भी म्हारा टोप सै, जो थमनै शैतान के हमलां तै बचावैगा, अर जिस तरियां सिपाही युध्द म्ह तलवार तै अपने-आपनै बचावै सै, अर थम भी आत्मा की तलवार, जो परमेसवर का वचन सै, ले ल्यो, अर शैतान तै खुद नै बचा ल्यो। 18 हरेक बखत अर हरेक ढाळ तै पवित्र आत्मा की अगुवाई म्ह प्रार्थना अर बिनती करते रहों, इस करके जागते रहों अर सारे पवित्र माणसां खात्तर लगातार बिनती करते रहों। 19 अर थम मैरे खात्तर भी प्रार्थना करो, ताके मेरे बोल्लण के बखत इसे शब्द दिये जावै के मै हिम्मत कै गैल सुसमाचार का भेद बता सकूँ। 20 इससे खात्तर मै बेल्लां तै जकड़ा होया राजदूत के समान सेवा करण लाग रहया सूँ, प्रार्थना करो के जिस तरियां मन्ने बोलणा चाहिए, उससे ढाळ बेधड़क होके सुसमाचार का प्रचार कर सकूँ। 21 तुखिकुस जो प्रभु म्ह मेरा प्यारा भाई अर बिश्वास लायक सेवक सै, वो थारे ताहीं मेरे सारे हालात अर सारी बातों के बारे म्ह बता देवैगा। 22 उस ताहीं मन्ने थारे थारे इससे खात्तर भेज्या सै के थम म्हारी दशा नै जाणो, अर वो थारे मनां नै होसला दे। 23 परमेसवर पिता अर प्रभु यीशु मसीह की ओड़ तै बिश्वासी भाईयाँ

नै शान्ति अर बिश्वास गैल प्यार मिलै। 24 उन सारा पै अनुग्रह होंदा रहवै,
जो म्हारै प्रभु यीशु मसीह तै कदे ना खतम होण आळा प्यार करै सै।

फिलिपियों

1 या चिट्ठी पौलुस अर तीमुथियुस की ओड़ तै सै, जो यीशु मसीह के दास सै, मै पौलुस कलीसिया के सारे पवित्र माणसां, अगुवां, अर सेवकां के नाम जो प्रभु यीशु मसीह म्ह होकै फिलिपी नगर म्ह रहवै सै। 2 हम प्रार्थना करां सां के म्हारे पिता परमेसवर अर प्रभु यीशु मसीह की ओड़ तै थारे ताहीं अनुग्रह अर शान्ति मिलदी रहवै। 3 मै जिब-जिब थमनै याद करहूँ सू, तब-तब अपणे परमेसवर का धन्यवाद करहूँ सू, 4 अर खुशी के गैल अपणी हरेक प्रार्थना म्ह थारे सारया खात्तर हमेशा परमेसवर तै मदद की बिनती करहूँ सू। 5 इस करके के पैहले दिन तै जिब थमनै सुसमाचार पै विश्वास करया, तब तै आज तक थम यीशु मसीह के प्यार के बारे म्ह सुसमाचार फैलाण म्ह म्हारे साथ रहबे सों। 6 मनै इस बात का भरोस्सा सै, के परमेसवर जिसनै थारे म्ह आच्छा काम शरु करया सै, वोए उसनै जिब यीशु मसीह बोहड़ के आवेगा तब तक पूरा करेगा। 7 सही सै ताके मै थारे सारया खात्तर इसाए विचार करहूँ। क्यूँके थारे खात्तर मेरे मन म्ह खास जगहां सै, इब मै कैद म्ह सू, अर सुसमाचार की सच्चाई नै साबित अर बचाव करण म्ह लागरया सू, तो थम सब मेरे गैल परमेसवर के अनुग्रह म्ह साझीदार सों। 8 इस म्ह परमेसवर मेरा गवाह सै, के मै मसीह यीशु की तरियां लगाव करके, थारे सारया की मिलण की लालसा करहूँ सू। 9 मै या प्रार्थना करहूँ सू, के थारा प्यार वास्तविक ज्ञान अर अन्तरात्मा म्ह और भी बढ़ता जावै। 10 ताके थम आच्छी तै आच्छी बात नै चुण सकों, अर मसीह के बोहड़ण तक हरेक बुराई तै बचे रहों, अर ठोक्कर ना खाओ। 11 अर उस धार्मिकता के काम नै जो यीशु मसीह के जरिये होवै सै, भरपूर होन्दे जाओ जिसतै परमेसवर की महिमा अर बड़ाई होंदी रहवै। 12 हे विश्वासी भाईयो, मै चाहूँ सू के थम यो जाण ल्यो, के जो मेरे पै बित्या सै, उसतै भोत सारे माणसां नै सुसमाचार पै विश्वास करया सै। 13 उरै ताहीं के महाराजा के राजभवन की सारी पलटन अर बाकी सारे माणस यो जाणगे सै, के मै कैद म्ह सू, क्यूँके मै मसीह का दास सू। 14 अर प्रभु म्ह जो विश्वासी भाई सै, उन म्ह तै घणखरे मेरे कैद होण के कारण, साहस के गैल परमेसवर का वचन बिना डरे सुणावै सै। 15 कुछ लोग तो जळण अर झगड़े के कारण मसीह के सुसमाचार के बारे म्ह सुणावै सै, अर कई माणस भली इच्छा तै, ताके मेरे वचन फैलाण म्ह मदद कर सकै। 16 भली इच्छा तै प्रचार करण आळे प्यार तै प्रचार करै सै, क्यूँके वो जाणै सै, के मै सुसमाचार के बचाव के खात्तर जेळ म्ह बन्द सू। 17 कई माणस तो जळण अर बिरोध के कारण मसीह का प्रचार करै सै, यो सोचके के मेरी कैद म्ह मेरे खात्तर और क्लेश पैदा कर सकै। 18 तो के होया? सिर्फ यो के हर ढाळ तै, बुरी इच्छा तै चाहे सच्चाई तै, मसीह के वचन का प्रचार हरेक जगहां करया जाण लागरया सै, अर मै इसतै आनन्दित सू अर आनन्दित रहूँगा भी। 19 क्यूँके मै जाणु सू, के थारी बिनती के जरिये, अर पवित्र आत्मा जो यीशु मसीह की ओड़ तै आया सै, इसका प्रतिफल जो मेरे विश्वास

म्ह बणे रहण अर कैद तै लिंकडण का कारण होगा। 20 मै तो याए मन तै लालसा अर आस राक्खूँ सू, के मै किसे बात म्ह शर्मिन्दा ना होऊँ, पर साहस के साथ परमेसवर का वचन सुणा सकूँ, जिसा पैहले मनै सुणया था, चाहे मै जिन्दा रहूँ या मरु, मसीह की बड़ाई मेरी देह के जरिये होन्दी रहवै। 21 क्यूँके मेरे खात्तर जिन्दा रहणा मसीह सै, अर मर जाणा और भी आच्छा सै, क्यूँके मै मसीह के धारे चला जाऊँगा। 22 पर जै देह तै जिन्दा रहणा ए परमेसवर के काम के खात्तर फायदेमन्द सै, तो मै नही जाणदा के किसनै चुणु। 23 क्यूँके मै उळझन म्ह सू, के मै के करहूँ, जी तो करै सै, के मै दुनिया छोड़के मसीह के धारे चला जाऊँ, क्यूँके यो घणाए आच्छा सै, 24 पर देह म्ह रहणा थारे कारण और भी जरूरी सै, ताके मै थारी मदद कर सकूँ। 25 इस करके के मनै इसका भरोस्सा सै। मै जाणु सू के मै जिन्दा रहूँगा, बल्के सारा के गेल्या रहूँगा, जिसतै थमनै विश्वास म्ह मजबूत कर सकूँ, अर उस म्ह आनन्दित रहों। 26 जिब मै थारे धारे बोहड़ के आऊँगा तो यीशु मसीह जो मेरे जरिये काम करण लागरया सै, उसपै थम गर्व कर सकों सों। 27 सिर्फ इतणा करो, के थारा चाल चलण मसीह के सुसमाचार के लायक हो जावै। चाहे मै आके थमनै देक्खूँ, चाहे ना भी आऊँ, तोभी थारे बारे म्ह योए सुणु, के थारा एक ए मकसद हो, अर एक मन होके विश्वास तै जो सुसमाचार तै आवै सै, उसके खात्तर मेहनत करते रहों। 28 अर किसे बात म्ह बिरोधियाँ तै भय ना खाओ। उनकै खात्तर विनाश का, अर थारे खात्तर उद्धार का साफ सबूत सै, अर यो परमेसवर की ओड़ तै सै। 29 क्यूँके मसीह के कारण थारे पै या अनुग्रह होया के ना केवल उसपै विश्वास करो पर उसके खात्तर दुख भी ठाओ, 30 अर थमनै उसीए मेहनत परमेसवर के खात्तर करणी सै, जिसी थमनै मेरे ताहीं पैहले फिलिपी नगर म्ह करते देख्या सै, अर इब भी सुणो सों के मै उसाए करहूँ सू।

2 थम यीशु मसीह के कारण उत्साहित हो, अर जो उसका प्यार थारे खात्तर सै, वो थमनै शान्ति देवै सै, क्यूँके पवित्र आत्मा के गैल थारी संगति सै, अर मसीह की करुणा अर दया थारे पै सै। 2 तो मेरा यो आनन्द पूरा करो के एक मन रहों, अर एके प्यार, एके चित्त, अर एके मनसा राक्खों। 3 मतलबीपण या झूठी बड़ाई के खात्तर कुछ ना करो, पर दीनता तै एक-दुसरे नै अपणे तै घणा आदर मान द्यो। 4 हरेक अपणे ए हित की नही, बल्के दुसरयां के हित की भी चिंता करै। 5 जिसा मसीह यीशु का सुभाव था उसाए तेरा भी सुभाव हो। 6 यीशु, परमेसवर के समान होके भी होके भी परमेसवर के बराबर होण नै अपणे बस म्ह राक्खण की चीज ना समझा। 7 बल्के अपना सारा सुर्गिया हक छोड़ दिया, अर दास का रूप धारण करते होए माणस की समानता म्ह होग्या। 8 अर माणस के रूप म्ह जाहिर होके अपणे-आपनै दीन करया, अर परमेसवर का आज्ञाकारी रहया अर याडै तक के अपराधियाँ की तरियां मौत, हों क्रूस की मौत भी सह ली। 9 इस कारण परमेसवर नै उस ताहीं ऊँची उपाधि दी, अर उसनै वो नाम दिया जो सारे नाम्मां म्ह ऊँचा सै, 10 के जो सुर्ग म्ह अर धरती पै धरती के नीचे सै, वे सारी

यीशु के नाम की बड़ाई करे, 11 अर परमेसवर पिता की महिमा के खात्तर हरेक इन्सान मान ले के यीशु मसीह ए प्रभु सै। 12 इस करके हे मेरे प्यारे विश्वासी भाईयो, जिस ढाळ थम सदा तै हुकम मानते आये सों, उसाए इब भी ना सिर्फ मेरे गैल रहंदे होए, पर खास करके इब मेरे दूर रहण पै, भी परमेसवर तै डरदे अर कापते होए अपणे उद्धार के काम नै पूरा करो। 13 क्यूँके परमेसवर थारे म्ह काम करण लागरया सै, अर वोए थमनै अपणी इच्छा अर सामर्थ देवै सै, वो काम करो जो उसनै पसन्द सै। 14 सारे काम बिना कुडकड़ाए अर बिना विवाद कै करया करो, 15 ताके थम परमेसवर की उलाद की तरियां इस दुनिया के बुरे अर मतलबी माणसां के बीच म्ह पवित्र अर बेदाग जीवन जी सकों। दुनिया के माणसां के बीच म्ह थम जीवन का वचन लिये होए, आसमान के तारां के समान चमकों। 16 जिन मसीह बोहड़ै तो मन्ने गर्व करण का कारण हो, ताके मेरी कोशिश अर मेरी मेहनत करणा बेकार ना होवै। 17 जिन मन्ने थारे ताहीं वचन सुणाया, तो थमनै यीशु मसीह पै विश्वास करया, अर अपणा जीवन भी सेवा खात्तर प्रभु ताहीं बलिदान दिया। इस करके मै प्रभु खात्तर मर भी जाऊँ, तोभी थारे साथ खुश अर आनन्दित सूँ। 18 उससे तरियां थम भी आनन्दित होओ, अर मेरे गैल आनन्द करो। 19 मन्ने प्रभु यीशु मसीह म्ह आस सै, के मै तीमुथियुस नै थारे धोरे तावळा-ए भेजूगाँ, ताके थारे हाल नै जाणकै, मै उत्साहित होऊँ। 20 क्यूँके मेरे धोरे तीमुथियुस के जिसा सुभाव आळा माणस और कोए न्ही सै जो शुद्ध मन तै थारी चिंता करै। 21 क्यूँके सारे अपणे स्वार्थ की खोज म्ह रहवै सै, परमेसवर के काम्मां खात्तर न्ही। 22 पर थम जाणो सों, के तीमुथियुस तो विश्वास लायक अर आच्छे सुभाव का सै, जिसा बेट्टा पिता कै गेल्या रहवै सै, उसाए उसनै सुसमाचार कै फैलाण म्ह मेरे गैल मेहनत करी। 23 इस करके मन्ने आस सै, के ज्यो ही मन्ने बेरा लाग्गैगा के मेरा के हाल होगा, त्यों ही मै उसनै तावळी सी भेज देऊँगाँ। 24 अर मन्ने प्रभु म्ह भरोस्सा सै, के मै आप भी तावळा आऊँगा। 25 मन्ने इपफ्रुदीतुस नै थारे धोरे भेजणा जरूरी समझा, जो मेरा भाई अर सहकर्मी साथी योध्दा, अर जरूरतां म्ह मेरी मदद करण आळा थारी ओड़ तै भेज्जा गया दूत सै। 26 क्यूँके उसका मन थारे सारया म्ह लाग्या रह्या था, अर वो बेचैन रहवै था क्यूँके थमनै उसकी बीमारी का हाल सुण्या था। 27 पक्का वो बीमार तो होग्या था, उरै ताहीं वो मरण पै था, पर परमेसवर नै उस ताहीं मरण न्ही दिया, अर सिर्फ उससे पै न्ही पर मेरे पै भी दया करी, ताके मन्ने दुख पै दुख ना हो। 28 इस करके मन्ने उस ताहीं भेजण का और भी जल्न करया, के तू उसतै फेर मिलके आनन्दित हो जा, अर मेरी भी चिन्ता घट जावै। 29 इस करके तू प्रभु म्ह उसतै घणे आनन्द कै गैल मिलये, अर इसा का आदर करया करिये। 30 क्यूँके वो मसीह कै काम खात्तर अपणी जान जोखिम म्ह गेर के मौत कै धोरे आ गया था। ताके वो मेरी मदद कर सकै जिस काम नै थम कर न्ही पाये, क्यूँके थम दूर थे।

3 इस करके हे मेरे विश्वासी भाईयो, प्रभु म्ह आनन्दित रहों। वेए बात थारे ताहीं बारबार लिखण म्ह मन्ने तो कोए दिक्कत कोनी होन्दी, पर ये बात थमनै इस्से झूठे शिक्षाकां तै बचाके राखखैगी। 2 उन बुरे माणसां तै चौक्कस रहों जो कुत्यां कै समान सै, अर जो कहवै सै, के उद्धार पाण खात्तर खतना करणा जरूरी सै। 3 हम्मे परमेसवर के सच्चे लोग सां, जो पवित्र आत्मा की अगुवाई म्ह आराधना करा सां, अर मसीह यीशु पै घमण्ड करा सां, पर अपणे उन काम्मां के जरिये न्ही जो हम शरीर तै करा सां। 4 पर मै तो शारीरिक काम्मां पै घमण्ड राखख सकू सूँ। जै किसे और का शारीरिक काम्मां पै घमण्ड राखखण का विचार हो, तो मै उसतै भी बढके राखख सकू सूँ। 5 परमेसवर के हुकम के मुताबिक जन्म के आठवे दिन मेरा खतना होया, मै जन्म तै इसाएली अर बिन्यामीन के गोत्र का सूँ, मेरे माँ-बाप इब्रानी थे, इस करके मै भी इब्रानी सूँ, अर (मूसा नबी के) नियम-कायदा नै मानण के कारण मै फरीसी भी था। 6 उत्साह कै बारे म्ह जै कहो तो कलीसिया का सतावण आळा, अर सारे यहूदी नियम-कायदा नै मानण आळा था, इस करके लोग मन्ने धर्मी मान्ने थे। 7 पर जिन बात्तां नै मै लाभ की समझू था, उन ताहीं मन्ने मसीह यीशु कै कारण नुकसान समझ लिया सै। 8 बल्के अपणे प्रभु मसीह यीशु नै आच्छी तरियां जाणण के महत्व कै आगँ, मै बाक्की की सारी बात्तां नै बेकार समझू सूँ। जिसके कारण मन्ने उन सारी चिज्जां ताहीं छोड़ दिया सै, अर उननै कूड़ा समझू सूँ। ताके मै मसीह नै आच्छी तरियां जाण सकू। 9 अर मै उसका कहलाऊँ, इब मेरी अपणी धार्मिकता वा कोनी जो नियम-कायदा के पुगाण तै आवै सै, बल्के मेरी धार्मिकता वा सै जो सिर्फ परमेसवर की ओड़ तै मसीह पै मेरे विश्वास करण के कारण आवै सै। 10 मै चाहूँ सूँ, के मसीह नै जाण ल्यु। अर मै उसके पुनरुत्थान के सामर्थ्य नै अनुभव करूँ, अर उसके गैल दुखां म्ह साझीदार हो के मसीह की मृत्यु की समानता नै पा सकू। 11 ताके मै भी मेरे होए माणसां म्ह तै जी उठण आळा म्ह शामिल हो जाऊँ। 12 इसका यो मतलब कोनी के मन्ने यो सारा काम करया सै, या मै सिध्द हो लिया सूँ, मै आगँ बढण की कोशिश करते जाण लागरया सूँ, ताके मन्ने वो मिल जावै, जिसके खात्तर मसीह यीशु नै मेरे ताहीं चुण्या सै। 13 हे मेरे विश्वासी भाईयो, मेरे विचार तै मै इस ताहीं इब तक पा न्ही सका सूँ, पर हाँ, मै यो जरूर करण लागरया सूँ, क्यूँके जो बात हो ली सै, मै उननै भूलके जो आगँ होण आळा सै उसके खात्तर मेहनत करण लागरया सूँ। 14 मै निशान्ने की ओड़ भाज्या चाल्या ज्या सूँ ताके वो ईनाम पाऊँ, अर वो ईनाम यो सै के परमेसवर मन्ने सुर्ग म्ह बुलाण लागरया सै क्यूँके मसीह यीशु मेरे खात्तर मरया। 15 म्हारे म्ह तै जितने आत्मिक रूप तै सिध्द सै, जो इसा विचार राखखै सै, अर जै किसे बात म्ह थारा ए विचार न्ही हो, तो परमेसवर उस ताहीं भी थारे पै जाहिर कर देगा। 16 इस करके हमनै सच के मुताबिक चालणा सै, जो परमेसवर नै म्हारे पै जाहिर करया। 17 हे मेरे विश्वासी भाईयो, थारा सुभाव मेरे जिसा हो, अर उन माणसां ताहीं पिच्छाणो, जिनका सुभाव

मेरे जिसा सै, अर उनकी तरियां जिन्दगी जिओ। 18 क्यूँके घणेए इसी चाल चाल्ले सै, जिनका जिक्क मन्ने थारे ताहीं बार-बार करया सै, अर इब भी रो-रोके कहुँ सूँ के उनका सुभाव यो दिखावे सै, के वे मसीह के क्रूस पै मरण के सन्देश का बिरोध करै सै। 19 उनका अंत विनाश सै, वो अपनी शारीरिक इच्छा नै ए पूरी करणा चाहवै सै, अर वे अपनी शर्म के काम जो वे करै सै, उनपै घमण्ड करै सै, अर दुनियावी चिज्जां के बारें म्ह सोचते रहवै सै। 20 पर म्हारा देश सुर्ग म्ह सै, अर हम एक उद्धारकर्ता प्रभु यीशु मसीह के ओड़े तै आण की बेसबरी तै बाट देखण लाग रहे सां। 21 वो अपनी शक्ति के असर के मुताबिक जिसके जरिये वो सारी चिज्जां नै अपने बस म्ह कर सके सै, म्हारी दीन-हीन देह का रूप बदलके, अपनी देह के अनुकूल बना देगा।

4 हे मेरे विश्वासी भाईयो, मै थारे ताहीं भोत प्यार करुँ सूँ, मन्ने थारे तै मिलण की बड़ी इच्छा सै। थम मेरा आनन्द अर मुकुट हो, मजबुत्ती तै विश्वास करो, अर प्रभु के हुकम नै मानते रहों। 2 मै यूओदिया नै भी समझाऊँ सूँ, अर सुन्तुखे नै भी, के थम आप्पस म्ह एक-दुसरे तै बहस मत करो। 3 हे मेरे सच्चे सहकर्मी, मै तेरे तै भी बिनती करुँ सूँ के तू उन बिरबानियाँ की लड़ाई बन्द करवाण म्ह मदद कर, क्यूँके उननै मेरै गैल सुसमाचार फैलाण म्ह, क्लेमैंस अर मेरै और सहकर्मीयाँ गैल मेहनत करी, जिनके नाम जीवन की किताब म्ह लिखे होए सै। 4 प्रभु म्ह सदा आनन्दित रहों, मै फेर करुँ सूँ, आनन्दित रहों। 5 थारी कोमलता सारे माणसां पै जाहिर हो। प्रभु का आणा लोवे सै, 6 किसे भी बात की चिंता ना करो, पर हर हालात म्ह थारे निवेदन, प्रार्थना, बिनती अर धन्यवाद के गैल परमेसवर के आगै पेश करै जावै। 7 फेर परमेसवर की शान्ति, जो माणस की समझ तै परै सै, थारे मन अर विचारां नै मसीह यीशु म्ह सुरक्षित राक्खेगी। 8 इस करके हे विश्वासी भाईयो, जो बात सच सै, जो बात आदरणीय, जो धर्मी सै, पवित्र सुहावनी अर जो-जो बात बड़ाई लायक सै, यानी जो भी सद्गुण अर प्रशंसा की बात सै उनपै ए मन लगाया करो। 9 जो बात थमनै मेरै तै सुणी, मेरे म्ह देखी, सीखी, अर पाई सै, उननै मान्या करो, फेर शान्ति का परमेसवर थारे गैल रहैगा। 10 मै प्रभु मै घणा आनन्दित सूँ के जिब इतने दिनां के पाछे थारी चिंता मेरे बारें म्ह फेर जागगी सै, पक्का थारे शरुआत म्ह भी इसका विचार था, पर थमनै मौक्का न्ही मिला। 11 क्यूँके मेरे धोरै वो कोनी जो मन्ने चाहिए, पर मन्ने यो सिख्या सै के मै जिन हालातां म्ह मै सूँ, उरसे म्ह सब्र करुँ। 12 मन्ने कंगाली अर भरपूरी म्ह रहणा सीख लिया सै, हरेक हालातां अर हरेक बात म्ह मन्ने तृप्त अर भूक्खा रहणा, बढणा अर घटणा सीख लिया सै। 13 मसीह मन्ने सामर्थ देवै सै उस म्ह मै सब कुछ कर सकूँ सूँ। 14 तोभी थमनै भला करया के मेरे क्लेश म्ह मेरे साड़ीदार होए। 15 हे फिलिप्पी नगर के माणसों, थम आप भी जाणो सों के सुसमाचार के शरुआत म्ह, जिब मै मकिदुनिया परदेस तै बिदा होया, जब थारे अलावा किसे कलीसिया के विश्वासी नै लेण देण के बारें म्ह मेरी मदद न्ही करी। 16 इसे ढाळ थिससलुनीके नगर म्ह मेरी जरूरतां नै

पूरा करण म्ह थमनै दो बार रपिये भेजके मेरी मदद करी। 17 मै यो न्ही लिखता, के मै दान चाहूँ सूँ पर मै चाहूँ सूँ के थारे दान के बदले थमनै आशीष मिलै। 18 मेरै धोरै सब कुछ सै, बल्के भोत घणाए सै, जो चीज थमनै इपफ्रुदीतुस के हाथ तै भेजी थी उननै पाके मै तृप्त होग्या सूँ, थारे दान तो मनमोहक सुगन्धित भेट की तरियां सै, अर उस बलिदान की तरियां सै, जो याजक परमेसवर नै चढ़ावै सै, अर वे उसनै भावै सै। 19 म्हारा पिता परमेसवर, अपने अपार धन के मुताबिक जो महिमा समेत मसीह यीशु म्ह थारी हरेक जरूरत नै पूरी करेगा। 20 म्हारै परमेसवर अर पिता की बड़ाई युगानुयुग होंदी रहवै। आमीन। (aiōn g165) 21 यीशु मसीह म्ह सभी पवित्र माणसां नै, मेरी ओड़ तै नमस्कार कहो। जो विश्वासी भाई मेरै गैल सै वे थारे ताहीं नमस्कार कहवै सै। 22 सारे पवित्र माणस, जो मेरे साथ सै, अर खास करके वे माणस जो कैसर के घराने तै विश्वासी बणे सै, थारे ताहीं नमस्कार कहवै सै। 23 म्हारै यीशु मसीह का अनुग्रह थारी आत्मा के गैल रहवै।

कुलुस्सियों

1 या चिट्ठी पौलुस अर म्हारे बिश्वासी भाई तीमुथियुस की ओड़ तै सै, जो परमेसवर की इच्छा तै मसीह यीशु का प्रेरित सै। 2 मसीह म्ह उन पवित्र अर बिश्वासी भाईयाँ के नाम जो कुलुस्से नगर म्ह रहवै सै: म्हारा पिता परमेसवर थारे ताहीं अनुग्रह अर शान्ति देंदा रहवै। 3 जिब हम थारे खात्तर बिनती करां सां, तो हम अपने प्रभु यीशु मसीह के पिता, यानी परमेसवर का धन्यवाद करा सां। 4 क्यूँके हमनै सुण्या सै के यीशु मसीह पै थारा बिश्वास सै, अर सारे पवित्र माणसां तै थम प्यार करो सों। 5 जो बिश्वास अर प्यार इन बिश्वासी भाईयाँ कै धोरे सै, वो उस आस की बजह तै ए सै, जो थारे खात्तर सुर्ग म्ह धरी सै, जिसका वर्णन थमनै पैहले तै सुण राख्या सै। जिब माणस थारे धोरे आए अर यीशु मसीह का सुसमाचार थारे ताहीं सुणाया, जो के परमेसवर का वचन सै। 6 जो थारे धोरे पोहचा सै, अर जिसा दुनिया म्ह यो नतिज्जा ल्याण लागरया सै अर दुनिया म्ह हरेक जगहां फैलण लागरया सै, उस्से तरियां जिस दिन तै थमनै उस ताहीं सुण्या अर या सच्चाई आच्छी तरियां समझी के परमेसवर मुफ्त म्ह उन माणसां का पाप माफ करै सै जो यीशु पै बिश्वास करै सै। थारे म्ह भी इसाए करै सै। 7 उस्से की शिक्षा थमनै म्हारे गैल काम करणीये प्यारे इपफ्रास तै पाई, जो म्हारे खात्तर मसीह का बिश्वास लायक दास सै। 8 उस्से नै म्हारे ताहीं पवित्र आत्मा के प्यार के बारे म्ह बताया सै, जो परमेसवर नै म्हारे ताहीं दिया सै। 9 इस करके जिस दिन तै हमनै यो सुण्या सै, हम भी थारे खात्तर सदा प्रार्थना करां सां। के थम परमेसवर का आत्मा थारे ताहीं आत्मिक ज्ञान अर समझ देवै, ताके थम उसकी इच्छा नै समझ सको। 10 थारा बरताव इसा होणा चाहिए जिसा परमेसवर के माणसां का हो सै, ताके थम परमेसवर नै हरेक काम म्ह खुश कर सको, ताके थम सारी हाण भले काम करते रहों अर थम परमेसवर की पिच्छाण म्ह बढ़ते जाओ। 11 उसकी महिमा की शक्ति कै मुताबिक सारी ढाळ की सामर्थ तै शक्तिशाली होन्दे जाओ, ताके थम खुशी अर धीरज के गैल दुखां नै सह सको। 12 अर पिता परमेसवर का धन्यवाद करते रहो, जिसनै थारे ताहीं इस लायक बनाया के थम उसके राज्य म्ह साझीदार हो सको, जो उसनै अपने माणसां खात्तर सुर्ग म्ह तैयार करया सै। 13 उस्से नै म्हारे ताहीं शैतान की सामर्थ तै छुड़ाके अपने प्यारे बेटे कै राज्य म्ह दाखल करया, 14 जिसतै अपने बेटे की कुरबान्नी के जरिये म्हारे ताहीं छुटकारा दिया, यानी पापां की माफी। 15 परमेसवर नै कोए न्ही देख सकता, पर जिब उसका बेटा यीशु मसीह इन्सान की देह धारण करके इस धरती पै आया तो हम उसनै जाण पाए के परमेसवर किसा सै, वो बिलकुल उसके समान सै। 16 क्यूँके मसीह नै परमेसवर के साथ मिलके सारी चिज्जां की सृष्टि करी, सुर्ग की हो या धरती की, देखी या अनदेखी, के सिंहासन, के प्रभुताएँ, के प्रधानताएँ, के हक, सारी चीज उस्से कै जरिये अर उस्से खात्तर बनाई गई। 17 सारी चिज्जां के बणण तै पैहला मसीह था, अर सारी चीज उस्से म्ह

मिलके काम करै सै। 18 मसीह की देह कलीसिया नै चलावै सै, जिस तरियां सिर पूरे देह नै चलावै सै, यानी मसीह कलीसिया का सिर सै, वोए शरूआत सै, अर मरे होया म्ह तै जी उठण आळा म्ह जेद्दा सै, ताके सारी बातां म्ह वोए प्रधान बणै। 19 क्यूँके पिता परमेसवर की खुशी इस्से म्ह सै के मसीह म्ह परमेसवर की सारी भरपूरी रहवै। 20 अर उसके क्रूस पै बहे होए लहू कै जरिये मेळ-मिलाप करके, परमेसवर नै अपने बेटे ताहीं भेज्जा, जिसनै अपना लहू बहाया अर अपनी जाण दे दी। परमेसवर नै यो इस खात्तर करया ताके उसका अर सारी चिज्जां तै दुबारा मेळ हो सकै। इस तरियां तै उसनै अपने बीच अर सारी चीज जो सुर्ग म्ह सै या अर सारी चीज जो धरती पै सै शान्ति की स्थापना करी। 21 थम जो पैहले पराये थे अर बुरे काम्मां के कारण मन तै बैरी थे। 22 परमेसवर नै इब अपने बेटे ताहीं इन्सान बनाके भेज्जा ताके वो क्रूस पै मारया ज्या, जिसकी बजह तै थारा भी मेळ करवाया ताके थमनै अपने आगै पवित्र अर बिना कलंक अर बेकसूर बनाके खड्या करै। 23 जै थम मसीह म्ह बिश्वास करो सों, अर थारा बिश्वास उस घर की तरियां हो जो मजबूत नीम पै खड्या सै, अर उस सुसमाचार की आस नै ना छोड़ो, जिस ताहीं थमनै सुण्या सै, जिसका प्रचार दुनिया के माणसां म्ह करया गया सै, उसका मै, पौलुस, वचन का सुणण आळा बणया। 24 मै उन दुखां के कारण आनन्दित सूँ, जो थारे खात्तर ठाऊँ सूँ अर मसीह के कळेश की कमी उसकी देह के खात्तर, यानी कलीसिया के खात्तर, अपने गात म्ह पूरी करूँ सूँ, 25 इस्से कलीसिया के खात्तर मै थारे खात्तर परमेसवर के जरिये सौंपी गई सेवा के मुताबिक दास चुण्या गया के मै परमेसवर के आदेश नै पूरी तरियां प्रचार करूँ। 26 यानी उस राज नै जो बखत अर पीढ़ियाँ तै गुप्त रह्या, पर इब उसके उन पवित्र माणसां पै दिख्या सै। (aiōn g165) 27 परमेसवर चाहवै सै के मसीह के धन अर महिमा नै गैर यहूदियाँ के माणस जाणै सै, अर वो राज यो सै के मसीह थारे म्ह रहवै सै, यो थमनै परमेसवर की महिमा नै साँझा करण की आस देवै सै। 28 इस खात्तर हम दुसरयां नै मसीह के बारे म्ह बतावां सां, अर हरेक आदमी नै चेतावनी देवा सां अर परमेसवर के दिए गए ज्ञान तै हरेक आदमी नै सिखावा सां, हरेक आदमी नै मसीह म्ह सिध्द करके परमेसवर के स्याम्ही पेश करणा चाहवां सां। 29 इस्से ताहीं पूरा करण खात्तर मै भोत मेहनत अर कष्ट सहू सूँ। उस सामर्थ के जरिये जो मसीह देवै सै अर जो मेरे म्ह काम करण लागरया सै।

2 मै चाहूँ सूँ के थम जाण ल्यो के थारे अर उनकै खात्तर जो लौदीकिया नगर म्ह सै अर उन सारया खात्तर जिनतै मै न्ही मिला, मै उनकै खात्तर किसी मेहनत करूँ सूँ। 2 मै इस खात्तर मेहनत करूँ सूँ ताके मै उनके बिश्वास नै मजबूत कर सकूँ। थारा एक-दुसरे के खात्तर प्यार थारे ताहीं आप्पस म्ह बाँधके राक्खै, मै चाहूँ सूँ के उननै पूरा भरोस्सा हो क्यूँके उन ताहीं परमेसवर की गुप्त योजना की पूरी समझ सै, जो के मसीह सै ए। 3 परमेसवर ए सै जो बुद्धि अर ज्ञान की समझ देवै सै जो छिपे होए खजान्ने की ढाळ सै। 4 यो मै इस करके कहूँ सूँ के कोए

आदमी थमनै झूठी शिक्षा तै ना भरमावै। 5 हालाकि मै थारे तै दूर सूं, तोभी मै थारे बारे म्ह सोचता रहूँ सूं, अर जिसा थमनै जीणा चाहिए उसा जीवन अर थारे मजबूत बिश्वास नै देखके जो मसीह म्ह सै, मै राज्जी होऊँ सूं। 6 इस करके जिस तरियां थमनै मसीह यीशु ताहीं प्रभु करके मान लिया सै, उससे तरियां उस ताहीं मानते रहे। 7 थारा मसीह पै बिश्वास उस जमीन म्ह लगाये गये पेड़ की तरियां हो, जिसकी जड़ गहरी अर मजबूत हो सै। बिश्वास म्ह मजबूत होन्दे जाओ, जिसा के थारे ताहीं सिखाया गया सै, अर सदा परमेसवर का धन्यवाद करते रहे। 8 इस कारण हम मानवीय शिक्षा का पालन न्ही करणा चाहन्दे, ताके कोए थमनै उस बेकार ज्ञान अर धोक्खे कै जरिये अपने बस म्ह ना करले, जो माणसां के रिवाज अर दुनियावी शिक्षा के मुताबिक तो सै, पर मसीह के मुताबिक कोनी। 9 थारे ताहीं ये लोग धोक्खा ना देण पावै, जिब के मसीह नै मानव रूप धारण करया पर वो पूरी तरियां तै परमेसवर था। 10 अर हरेक शक्ति अर प्रधानता पै उसका अधिकार सै। जै थम मसीह के कहलाओ हो, तो थमनै किसे चीज की कमी कोनी। 11 जिब थम मसीह म्ह बिश्वास करो सों, तो थारा माणसां के जरिये खतना कोनी करया जान्दा, पर मसीह के जरिये करया जावै सै, जो के खुद ताहीं पापमय सुभाव तै दूर करणा सै। 12 जिब थारा बपतिस्मा होया (यो थारा पापमय सुभाव दिखावै सै) तो थम मसीह की तरियां गाड़े गये, अर जिसा मसीह जिवाया गया, अर उससे तरियां थम भी जिन्दा करे गए (नये सुभाव तै)। यो इस खात्तर होया क्यूँकि थम बिश्वास करो सों, के परमेसवर नै मसीह ताहीं अपनी शक्ति तै मुर्दा म्ह तै जिवाया। 13 थम जो अपने कसूर अर अपने पापमय सुभाव तै आजाद न्ही थे, परमेसवर नै थारे ताहीं भी मसीह के गैल जिवाया, अर म्हारे सारे कसूर माफ कर दिए। 14 अर इसा लागै सै जिसा परमेसवर नै म्हारे पापां का वो लेख मिटा दिया, जो म्हारे खिलाफ इल्जाम नै बतावै थे। जिब मसीह ताहीं क्रूस पै कील्लां तै जकड़ा गया तो उसनै उस लेख ताहीं पूरी तरियां हटा दिया। 15 अर उसनै प्रधानता अर अधिकारां ताहीं हरा कै उनका खुल्लमखुल्ला तमाशा बणाया अर क्रूस के जरिये उनपै जयजयकार की आवाज सुणाई। 16 इस करके थमनै कोए धोक्खा ना देवै, अर ना कोए थमनै खाण-पीण या त्वौहार, नये चाँद अर आराम के दिन के बारे म्ह परखै। 17 क्यूँके ये सारी आण आळी बात्तां की छाया सै, पर मूल चीज मसीह की सै। 18 कोए आदमी झूठी विनम्रता अर सुगंदूतां की पूजा करा कै थारे ताहीं दौड़ के ईनाम तै राख ना दे। इसा आदमी देखी होड़ बात्तां म्ह लागया रहवै सै अर अपनी शरीरिक समझ पै बेकार फुल्लै सै, 19 उसनै बिश्वास अर मसीह का सच्चा सन्देस सिखाणा छोड़ दिया सै, जो के देह म्ह सिर की तरियां सै। जिस तरियां एक सिर देह नै निर्देश देवै सै, उससे तरियां मसीह अपने लोगमां ताहीं निर्देश देवै के वे एक साथ अर एक जुट रहवै जिस तरियां देह के जोड़ अर नस देह नै पकड़े सै, अर यो बढे सै, जिस तरियां परमेसवर उन ताहीं बढाणा चाहवै सै। 20 जिब के थम मसीह के गैल दुनिया की पुराणी शिक्षा की ओड़ तै

मरगे सों, तो फेर क्यूँ उनकी तरियां जो दुनिया के सै जीवन बिताओ सों? थम इसी विधियाँ के बस म्ह क्यूँ रहों सों, 21 के ना तो “इसनै छुड़ये,” ना “उस ताहीं खाके देखिये,” अर ना उसकै हाथ लगाईये? 22 ये सारी चीज काम म्ह लांदे-लांदे नाश हो जावैगी, क्यूँके ये माणस के हुकम अर शिक्षा के मुताबिक सै। 23 ये तीन नियम बुद्धिमानी का राह दिखावै सै, जो ये सै, खुद ताहीं परमेसवर के प्रति समर्पित करणा, झूठी विनम्रता अर अपनी देह के गैल कठोरता तै बरताव करणा। पर माणस इन विधियाँ नै मान्ने सै, तोभी पापमय सुभाव नै न्ही छोड़ पान्दा।

3 यो इसा सै, के मान्ने जणु परमेसवर नै थारे ताहीं मुर्दा म्ह तै जिवा दिया हो, जिस तरियां उसनै मसीह ताहीं मुर्दा म्ह तै जिवाया, तो सुर्गीय चिज्जां की खोज म्ह रहों, जइ मसीह परमेसवर कै साथ महिामय जगहां म्ह बेठ्या होया सै। 2 धरती पै की न्ही पर सुर्गीय चिज्जां पै ध्यान लगाओ, 3 क्यूँके यो इसा सै थम तो मर गये जिब मसीह मारा गया अर थारा जीवन मसीह के गैल परमेसवर म्ह छिप्या होया सै। 4 जिब मसीह जो म्हारा जीवन सै, बोहड़ के आवैगा, तो थम भी उसके गैल दिखोगे अर उसकी महिमा म्ह शामिल होओगे। 5 इस करके अपने उन बुरे काममां नै छोड़ द्यो जो थारे पापमय सुभाव का कारण बणै सै, जो धरती पै सै, यानी जारी, अशुद्धता, दुष्कामना, बुरी लालसा अर लालची ना बणो यो मूर्तिपूजा कै बराबर सै। 6 क्यूँके माणस ये बुरे काम करै सै, इस कारण परमेसवर उन ताहीं बड्हा दण्ड देवैगा। 7 अर थम भी, जिब इन बुराईयाँ म्ह जीवन बिताओ थे, तो इन बुरी लालसा कै मुताबिक जिओ भी थे। 8 पर इब थम भी इन सारया नै, यानी छो रोष, बैरभाव, बुराई अर मुँह तै गाळी बकणा ये सारी बात छोड़ द्यो। 9 एक-दुसरे तै झूठ ना बोल्लो, क्यूँके थमनै बुरा सुभाव अर बुरे काम छोड़ दिये सै। 10 अर इब थमनै नये सुभाव ताहीं धारण कर लिया सै, यो नया सुभाव ज्यादा तै ज्यादा म्हारे रचण आळे कै मुताबिक बणण लागरया सै, ताके हम उसनै आच्छी तरियां जाण पावां। 11 इस नई जिन्दगी म्ह कोए फर्क कोनी पड़ता चाहे यूनानी हो या यहूदी हो, खतना हो या खतनारहित हो, जंगळी हो या असभ्य हो, दास हो या आजाद हो, पर मसीह ए सै, जो सब तै खास सै अर वो हम सब म्ह बसै सै। 12 क्यूँके परमेसवर नै थारे ताहीं पवित्र माणस बणण खात्तर चुण्या सै, अर वो थारे ताहीं प्यार करै सै, इस करके बड़ी करुणा, भलाई, दीनता, नम्रता, अर सहनशीलता नै धारण करो। 13 अर जै किसे नै किसे पै दोष लगाण का कोए कारण हो, तो एक-दुसरे की सह ल्यो अर एक-दुसरे के कसूर माफ करो, जिस तरियां प्रभु नै थारे कसूर माफ करे, उससे तरियां थम भी करो। 14 इन सारा तै बढके थम जो काम कर सकों सों, वो यो सै, के थम एक-दुसरे तै प्यार करो, प्यार ही सै जो म्हारे ताहीं एक-दुसरे के गैल एकता म्ह जोड़े राखवै सै। 15 जो शान्ति मसीह देवै सै, वा थारे दिलां पै राज करैगी, क्यूँके थम सारे एक देह के अंग सों, इस करके थारे ताहीं एक-दुसरे के साथ शान्ति तै रहण कै खात्तर बुलाया गया सै, अर थम सदा उसका धन्यवाद करदे रहों। 16 हर बखत मसीह के वचन कै

उपपर ध्यान करते रहवों ताके थारा सोचणा अर काम करणा उसके मुताबिक हो, अर सिध्द ज्ञानसुधा एक-दुसरे नै सिखाओ अर समझाओ, अर अपणे-अपणे मन म्ह धन्यवाद कै गैल परमेसवर कै खात्तर भजन अर जै-जै कार अर आत्मिक गीत गाओ। 17 वचन म्ह या काम म्ह जो किमे भी करो, सारा प्रभु यीशु मसीह कै नाम तै करो, अर उसके जरिये परमेसवर पिता का धन्यवाद करो। 18 हे पत्नियों, जिसा प्रभु म्ह सही सै, उसाए अपणे-अपणे धणी कै अधीन रहो। 19 हे पतियों, अपणी-अपणी घरआळी तै प्यार राक्खो, अर उनके गैल नरमाई तै पेश आओ। 20 हे बाळकों, सारी बातों म्ह अपणे-अपणे माँ बाप के हुकम नै मान्णो, क्यूँके प्रभु इसते खुश होवे सै। 21 हे बाळकां आळो, अपणे बाळकां नै तंग ना करो, इसा ना होके वे परेशान हो जावै। 22 हे सेवको, जो इस दुनिया म्ह थारे माल्लिक सै, सारी बातों म्ह उनके हुकम का पालन करो, माणसां नै राज्जी करण आळा कै समान दिखाण कै खात्तर न्ही, पर मन की सीधाई अर परमेसवर कै डर तै। 23 जो किमे थम करो सों, पूरे मन तै करो, यो समझकै के माणसां कै खात्तर न्ही पर प्रभु कै खात्तर करो सों, 24 याद राक्खों परमेसवर थमनै ईनाम देवैगा, या फेर वो थमनै आशीष म्ह साझीदार करैगा जो उसनै अपणे माणसां कै खात्तर राक्खी सै, क्यूँके थम मसीह यीशु की सेवा करो सो। 25 जो बुरा काम करै सै, परमेसवर हरेक ताहीं उसकी बुराई का उसनै दण्ड देवैगा, क्यूँके परमेसवर किसे कै गैल पक्षपात कोनी करदा।

4 हे मालिकों, अपणे-अपणे नौकरां कै गैल न्याय अर एक सा बरताव करो, या समझकै के सुर्ग म्ह थारा भी एक माल्लिक सै। 2 प्रार्थना म्ह लागे रहो, अर जबि प्रार्थना करो तो सावधान रहियो अर परमेसवर का धन्यवाद हमेशा करते रहो। 3 अर उसके गैल ए गैल म्हारे खात्तर भी प्रार्थना करते रहो के परमेसवर म्हारे खात्तर वचन सुणाण का इसा द्वार खोल दे, के हम मसीह कै उस भेद का वर्णन कर सकां जिसकै कारण मै कैद म्ह सूँ, 4 प्रार्थना करो के मै स्पष्ट रूप तै अर खुल्ले तौर पै मसीह के भेद नै बता पाऊँ। 5 अबिश्वासी के गैल जबि बात करो तो उस मौक्के का सही इस्तमाल करो। 6 थारा बोलणा सदा अनुग्रह समेत सलोना हो ताके थमनै हरेक माणस ताहीं बढिया ढाळ तै जवाब देणा आ जावै। 7 प्यारे बिश्वासी भाईयो अर बिश्वास लायक दास तुखिकुस, जो प्रभु म्ह मेरे गैल दास सै, वो थमनै सारी बात बता देगा। 8 उस ताहीं मन्ने इस खात्तर थारे धोरे भेज्जा, ताके थमनै म्हारे हाल का बेरा पाट जावै अर वो थमनै उत्साहित करैगा। 9 उसके गैल मन्ने उनेसिमस ताहीं भी भेज्जा सै, जो बिश्वास लायक अर प्रिय बिश्वासी भाई सै, अर वो भी थारे ए नगर का सै, ये थमनै याड़े की सारी बात बता देंगे। 10 मेरे गैल कैदी अरिस्तर्खुस अर मरकुस की ओड़ तै थमनै नमस्कार, मरकुस जो बरनबास का चचेरा भाई सै, जिसके बारें म्ह थमनै चिट्ठी मिली सै, के जै वो थारे धोरे आवै, तो उसतै आच्छी ढाळ बरताव करियो। 11 अर यीशु जो यूस्तुस कुहावै सै, थारे ताहीं नमस्कार कहवै सै। यहूदी बिश्वासियों म्ह तै सिर्फ ये तीन माणस सै, जो परमेसवर कै राज्य कै खात्तर मेरे गैल

काम करणीये अर मेरे उत्साहित होण का कारण सै। 12 इपफ्रास, जो थारे नगर का सै, अर मसीह यीशु का दास सै, थारे तै नमस्कार कहवै सै। वो सदा थारे खात्तर मन लगाकै प्रार्थना करै सै, अर परमेसवर तै सदा बिनती करै सै, के परमेसवर थमनै मजबूत अर सिध्द बणावै, अर थमनै पूरा भरोस्सा हो के थम परमेसवर की इच्छा का पालन करो सों। 13 मै उसका गवाह सूँ, कै वो थारे खात्तर अर लौदीकिया अर हियरपुलिस नगर के माणसां कै खात्तर बड़ी मेहनत करदा रहवै सै। 14 म्हारे प्रिय वैद लूका अर देमास का थारे ताहीं नमस्कार। 15 लौदीकिया नगर के बिश्वासी भाईयाँ नै, अर नुमफास अर उनके घर की कलीसिया नै नमस्कार कहियो। 16 जबि या चिट्ठी थम पढ़ ल्यो तो इसा करियो के लौदीकिया की कलीसिया म्ह भी या पढ़ी जावै, अर वा चिट्ठी जो लौदीकिया तै आवै उसनै थम भी पढ़ईयो। 17 अर अरखिप्पुस तै कहियो के जो सेवा प्रभु म्ह तेरे ताहीं सौप्यी गयी सै, पक्का इरादा करो के उस सेवकाई नै पूरा कर सको। 18 मै (पौलुस) अपणे हाथ्यां तै थमनै नमस्कार लिखूँ सूँ। याद राखियो के मै कैद म्ह सूँ, अर मेरे खात्तर प्रार्थना करो। परमेसवर का अनुग्रह थारे पै होंदा रहवै। आमीन।

1 थिस्सलुनीकियों

1 या चिट्ठी पौलुस अर सिलवानुस अर तीमुथियुस की ओड़ तै थिस्सलुनीकियों नगर की कलीसिया के उन बिश्वासियों के नाम लिखी सै, जो परमेसवर पिता अर प्रभु यीशु मसीह म्ह सै। परमेसवर का अनुग्रह अर शान्ति थारे ताहीं मिल्दी रहवै। 2 हम अपनी प्रार्थनायां म्ह थारे ताहीं याद करदे अर सारी हाण थम सारया कै बारै म्ह परमेसवर का धन्यवाद करा सां। 3 अर अपने परमेसवर अर पिता कै स्याम्ही जो काम बिश्वास तै करे, अर बिश्वासियों खातर इतने प्यार तै मेहनत करी, अर प्रभु यीशु मसीह के बोहड़ण की आस के कारण बड़ी धीरजता तै दुखां नै सहन्दे होए, सारी हाण थमने याद करा सां। 4 हे बिश्वासी भाईयो, अर परमेसवर के प्यारे माणसां हम जाणा सां, के परमेसवर नै थारे ताहीं अपने माणस होण खातर छाट्या सै। 5 क्यूँके म्हारा सुसमाचार जो यीशु मसीह के बारे म्ह था, थारे धोरे ना सिर्फ बात्तां तै ए न्ही बल्के पवित्र आत्मा की सामर्थ अर बड़े पक्के सबूत कै गैल पोंहच्या सै; जिसा थमने बेरा सै, के थारे कल्याण खातर थारे म्ह म्हारा बरताव किंसा था। 6 थारे उप्पर बड़े क्लेश थे, पर थमने पवित्र आत्मा के जरिये दिए गये आनन्द कै गेल्या सुसमाचार ताहीं मान लिया, थमने म्हारी अर प्रभु यीशु की तरियां बरताव कराया। 7 उरै ताहीं के मकिदुनिया परदेस अर अखाया परदेस के सारे बिश्वासियों कै खातर थम बढ़िया मिसाल बणै। 8 क्यूँके थारे उरै तै ना सिर्फ मकिदुनिया परदेस अर अखाया परदेस म्ह प्रभु का वचन सुणाया गया, पर थारे बिश्वास की जो परमेसवर पै सै, हरेक जगहां जित्त भी हम गये, तो हमने माणसां तै थारे बिश्वास के बारे म्ह सुण्या, इस करके हमने माणसां ताहीं थारे बारे म्ह बताण की जरूरत ए कोनी। 9 क्यूँके वे आप ए म्हारे बारे म्ह बतावै सै, के जब हम थारे धोरे आये, तो थमने म्हारा स्वागत किंसा ढाळ कराया; अर थम किंसा ढाळ मूर्तियाँ तै दूर होके, परमेसवर की ओड़ मुड़ गये, ताके जिन्दे अर सच्चे परमेसवर की सेवा करो। 10 अर परमेसवर के बेटे यीशु की सुर्ग तै बोहड़ के आण की बाट देखदे होए, जिस ताहीं परमेसवर ने मरे होयां म्ह तै जिन्दा करया, जो म्हारे ताहीं आण आळे न्याय तै बचावै सै।

2 हे बिश्वासी भाईयो, थमने आप्के बेरा सै, के म्हारा थारे धोरे आणा कितना फायदेमन्द था, 2 बल्के थमने खुद नै ए बेरा सै, के पैहल्या हमने फिलिप्पी नगर म्ह दुख ठाया, के म्हारा नगर के माणसां नै सख्त बिरोध करया, अर परमेसवर नै म्हारे तै इसी हिम्मत देई, के हम परमेसवर का सुसमाचार घणे बिरोध होण के बावजूद भी थमने सुणावां। 3 क्यूँके म्हारा उपदेश ना भ्रम तै सै, अर ना गलत इरादे तै, अर ना छळ कै गैल सै; 4 पर परमेसवर नै म्हारे ताहीं लायक समझकै सुसमाचार सौंप्या, इस करके हम माणसां नै न्ही, पर जो म्हारे मनां नै जांचण आळे परमेसवर ताहीं राज्जी करण खातर उपदेश देवा सां। 5 थमने बेरा सै, परमेसवर गवाह सै, के हमने कदे चापलूसी की बात कोनी करी, अर ना ए लोभ के खातर हमने कोए इसा काम करया, अर ना

कुछ थारे तै छुपाया। 6 तोभी हम माणसां तै आदर कोनी चाहवां थे, अर ना थारे तै, ना और किसे तै, हालाकि हम मसीह के प्रेरित होण के कारण थारी मदद पाणा म्हारा हक था। 7 पर जिस तरियां माँ अपने बाळकां का पालन-पोषण करै सै, उससे तरियां ए हमने भी थारे बिचाळे रहकै नरमाई दिखाई सै; 8 एक माँ की तरियां ए हम थारी चाहना करदे होए, ना सिर्फ परमेसवर का सुसमाचार, पर अपना-अपणा प्राण भी थारे ताहीं देण नै त्यार थे, क्यूँके के हम थारे तै भोत प्यारे करां सां। 9 हे बिश्वासी भाईयो, म्हारी कड़ी मेहनत नै याद राक्खो, हमने ज्यातै दिन-रात काम-धन्धा करदे होए, परमेसवर का सुसमाचार प्रचार करया, के थारे म्ह तै किसे पै बोझ ना बण जावां। 10 थम अर परमेसवर भी इस बात के गवाह सां, के सारे बिश्वासी भाईयो कै गैल म्हारा सुभाव कितना सच्चा, धर्मा अर बेकसूर था। 11 थमने बेरा सै के जिसा पिता अपने बाळकां कै गेल्या बरताव करै सै, उससे तरियां ए हम भी थारे म्ह तै हरेक ताहीं उपदेश देन्दे, अर शान्ति देन्दे, अर समझावां थे 12 के थम इसा जीवन जिओ, जिसा परमेसवर चाहवै सै, जो थमने अपने राज्य अर महिमा म्ह बुलावै सै। 13 ज्यातै हम भी परमेसवर का धन्यवाद सारी हाण करा सां के जब म्हारे जरिये परमेसवर के सुसमाचार का वचन थमने सुण्या, तो थमने उस ताहीं माणसां का न्ही पर परमेसवर का वचन समझकै अपनाया; अर सच म्ह यो परमेसवर का वचन सै भी, अर यो सुसमाचार थारे म्ह काम करण लागरया सै, जो यीशु पै थम बिश्वास करो सो। 14 ज्यातै थम, हे बिश्वासी भाईयो, परमेसवर की उस कलीसियाओं कै स्याम्ही दुख सहण लागे जो यहूदिया परदेस म्ह सै, अर मसीह यीशु पै बिश्वास राक्खे सै, क्यूँके थमने भी अपने माणसां तै उसाए दुख पाया, जिसा उननै अपने यहूदी माणसां तै पाया था। 15 जिन नै प्रभु यीशु ताहीं अर नबियां ताहीं मार दिया अर म्हारे ताहीं भी सताया, अर परमेसवर उनतै राज्जी कोनी, अर वे सारे माणसां का बिरोध करै सै। 16 अर वे दुसरी जात्तां म्ह उनके उद्धार कै खातर बात करण तै हमने रोक्के सै, अर वे पाप पै पाप करते जावै सै, जिब ताहीं के परमेसवर उननै दण्ड ना दे दे; अर इब परमेसवर उननै बड़ा भरी दण्ड देण आळा सै। 17 हे बिश्वासी भाईयो, जिब हम थोड़े बखत खातर थारे धोरे न्ही थे, पर हम सदा थारे बारे म्ह ए सोच्चा थे, तो हमने और भी बड़ी लालसा तै थारे ताहीं मिलण की अर देखण की कोशिश करी। 18 ज्यातै हमने (यानिके मुझ पौलुस नै) एक बर न्ही बल्के दो या तीन बार आण की कोशिश करी, पर शैतान हमने रोक्के रहया। 19 भला! म्हारी आस, खुशी या बड़ाई का ताज कौण सै? वो थमे होओगे जिब यीशु बोहड़ के आवैगें? 20 म्हारी बड़ाई अर खुशी थमे सो।

3 आखिर जिब हम थारे तै दूर ना रह पाए, तो मै पौलुस अर सीलास नै यो तय करया के एथेंस नगर म्ह एकले रह जावां। 2 अर हमने तीमुथियुस ताहीं जो मसीह कै सुसमाचार म्ह म्हारा भाई, अर परमेसवर का सेवक सै, इस करके भेज्या, के वो थारे ताहीं मसीह के बिश्वास म्ह मजबूत अर उत्साहित करै। 3 ताके कोए इन क्लेशां के कारण डगमगा

न्ही जावै; क्यूँके थम जाणो सो, के म्हारे ताहीं परमेसवर नै इसे तरियां सताये जाण खात्तर छाट्ठा सै। 4 क्यूँके पैहल्या भी, जिब हम थारे साथ थे, तो थारे तै कह्या करा थे, के म्हारे ताहीं सताया जावैगा, अर इसाए होया सै, अर थम जाणो भी सो। 5 इस कारण जिब मेरै तै और न्ही रहया गया, तो थारे बिश्वास का हाल जाणण के खात्तर मन्ने तीमुथियुस ताहीं भेज्या, मन्ने डर था, के परखण आळे शैतान नै थारे ताहीं परख्या ना हो, अर म्हारी मेहनत बेकार ना होगी हो। 6 पर इब्बे तीमुथियुस नै जो थारे धोरै तै म्हारे उरै आके थारे बिश्वास अर प्यार का सुसमाचार सुणाया अर इस बात ताहीं भी सुणाया, के थम सारी हाण प्यार कै गेल्या म्हारे ताहीं याद करो सो, अर म्हारे देखण की चाहना राक्खो सो, जिसा हम भी थमनै देखण की। 7 हे बिश्वासी भाईयो, हम अपणी सारे दुख अर क्ळेश म्ह उत्साहित सां, क्यूँके हमनै थारे बिश्वास के बारै म्ह सुण्या के थम इब भी यीशु मसीह के बिश्वास म्ह मजबूत सों। 8 क्यूँके इब जै थम प्रभु म्ह मजबूत हो तो हम जिन्दे सां। 9 अर थारे बारै म्ह जो खुशी हमनै मिली से, उसकी बजह तै हम परमेसवर का धन्यवाद किस तरियां तै करा? 10 हम दिन-रात घणीए प्रार्थना करदे रहवां सां, के थमनै दुबारा देख्वां, अर थारे मसीह पै मजबूती तै बिश्वास करण म्ह मदद करा। 11 हम प्रार्थना करां सां, के म्हारा परमेसवर अर पिता आप ए अर म्हारा प्रभु यीशु, थारे ताहीं पोहचने म्ह म्हारी मदद करै। 12 हम प्रार्थना करां, के जिसा हम थारे तै प्यार करां सां; उस्से तरियां ए थारा प्यार भी आप्स म्ह, अर सारे माणसां कै गेल्या बधे, अर परमेसवर थारे प्यार म्ह बढ़ोती करदा जावै। 13 हम प्रार्थना करां सां, के वो थारे मनां नै इसा मजबूत करै, के जिब म्हारा प्रभु यीशु अपणे सारे पवित्र लोगां कै गैल बोहड़ के आवै, तो वे म्हारे परमेसवर अर पिता कै स्याम्ही पवित्रता म्ह बेकसूर ठहरै।

4 हे बिश्वासी भाईयो, हम थारे तै बिनती करा सां, अर थारे तै प्रभु यीशु म्ह समझावां सां, के इसे जिओ के, परमेसवर ताहीं हम राज्जी करणा आळे बण सकां, जिसा हमनै थारे तै सिखाया सै, थम इस्से तरियां जीण लागरे थे, अर थमनै उत्साहित करां सां के और भी ज्यादा इसा करते रहों। 2 क्यूँके थमनै बेरा सै के हमनै प्रभु यीशु के हक तै थारे ताहीं कौण-कौण से आदेश दिये सै। 3 परमेसवर की मर्जी या सै के थम पवित्र बणो: अर जारी ना करो, 4 थारे म्ह तै हरेक माणस अपणी देह नै काबू करणा जाणे क्यूँके थारी देह पवित्र अर सम्मान जोग्गी रहवै। 5 यो काम अभिलाषा तै न्ही, ना उन जात्तां कै तरियां, जो परमेसवर नै न्ही जाणदी, 6 ताके इस बात म्ह कोए अपणे बिश्वासी भाई के विरुध्द पाप ना करै, अर ना इसा मौक्का देख्खे के वो पाप करै, क्यूँके प्रभु यीशु उसनै दण्ड देवैगा, जो इसे काम करै सै; जिसा के हमनै पैहल्याए थारे तै कह्या अर चिताया भी था। 7 क्यूँके परमेसवर नै म्हारे ताहीं अपवित्र जीवन जीण खात्तर न्ही, पर पवित्र जीवन जीण खात्तर बुलाया सै। 8 इस करके जो इन हुकमां नै न्ही मानता, वो माणस नै न्ही, पर परमेसवर नै तुच्छ जाणै सै, जो अपणा पवित्र आत्मा थारे ताहीं देवे सै। 9 पर

बिश्वासी भाई-चारे के प्यार के बारै म्ह यो जरूरी न्ही, के मै थारे धोरै कुछ लिक्खूँ, क्यूँके आप्स म्ह प्यार राखणा थमनै आप ए परमेसवर तै सिखाया सै; 10 थमनै पैहले ए अपणे बिश्वासी भाईयाँ के प्यार ताहीं दिखाया सै, जो हर जगहां सारे मकिदुनिया परदेस म्ह सै। पर हे बिश्वासी भाईयो, हम थारे तै बिनती करां सां, के थम और भी बढ़ते जाओ। 11 अर जिसी हमनै थारे ताहीं हुकम दिया सै, के शान्ति तै जीवन जिओ अर दुसरे माणसां की बात्तां म्ह दखल ना दो, अर अपणे-अपणे हाथ्यां तै कमाण की कोशिश करो। 12 ताके अबिश्वासी माणस देख्खे, के थारा रोज का जीवन किसा सै, अर थारे बरताव नै देख्खे थारा आदर करै, अर अपणी जरूरत के खात्तर थम किसे के मोहताज ना रहो। 13 हे बिश्वासी भाईयो, हम न्ही चाहन्दे के थम उनके बारै म्ह जो मर लिये सै, अनजाण रहो; इसा ना हो के थम दुसरयां की तरियां दुख करो जिन नै आस कोनी, के वो मरके जिन्दा होवैगा। 14 क्यूँके जै हम बिश्वास करा सां के यीशु मरया अर जिन्दा भी उठ्चा, तो उस्से तरियां ए परमेसवर उननै भी जो यीशु पै बिश्वास करते होए मरे सै, उन ताहीं भी वापिस ले आवैगा। 15 क्यूँके हम प्रभु यीशु कै वचन कै मुताबिक थारे तै न्यू कहां सां के हम जो जिन्दे सां अर प्रभु के दुबारा आण ताहीं बचे रहवांगें, तो पक्के उनतै पैहले प्रभु तै न्ही मिलेगे जो मौत की नींद सो गये सै। 16 क्यूँके प्रभु यीशु आप ए सुर्ग तै उतरैगा; अर लोग उस बखत उसकी ललकार सुणैगें, अर प्रधान दूत का बोल नै भी सुणैगें, अर सुर्गदूतां जरिये परमेसवर की तुरही फूँकी जावैगी; अर जो बिश्वासी लोग मसीह म्ह मरे सै, वे पैहल्या जी उठैगें। 17 फेर हम जो जिन्दे अर बचे होड़े सां, उनके गेल्या बादळां पै ठा लिए जावांगें, ताके आसमान म्ह प्रभु यीशु तै मिला; अर इस तरियां तै हम हमेशा कै खात्तर प्रभु के गेल्या रहवांगें। 18 इस तरियां इन बात्तां तै एक-दुसरे ताहीं तसल्ली दिया करो।

5 पर हे बिश्वासी भाईयो, इसकी कोए जरूरत कोनी, के हम यीशु के दोबारा आण के बखत अर काल्लां कै बारै म्ह थारे धोरै कुछ लिखां। 2 क्यूँके थम जाणो सों, के परमेसवर के आण का दिन, उस चोर की तरियां होगा, जो रात नै चोरी करण आवै सै, अर थमनै बेरा भी कोनी लाग्गी के चोर कद आवैगा। 3 जिब माणस कहन्दे होंगे, “राज्जी-खुशी सां, अर किमे डर कोनी,” तो उनपै चाणचक विनाश आण पड़ेगा, जिस ढाळ गर्भवती बच्चा जनन के दुख तै बच न्ही सकदी, उस्से तरियां वो भी बच न्ही पावेंगें। 4 पर हे बिश्वासी भाईयो, थम तो अन्धकार के काम्मां तै अनजाण न्ही सो, के प्रभु के आण का दिन थारे पै चोर की ढाळ आ पड़े। 5 क्यूँके थम सारे चाँदणे की ऊलाद अर दिन की ऊलाद सो; हम ना रात के सां, ना अन्धकार के सां। 6 ज्यातै हम अबिश्वासी माणसां की तरियां सोन्दे ना रहवां, पर जागदे अर चौकन्ने रहवां। 7 क्यूँके जो सोवें सै, वे रात ए नै सोवें सै, अर जो मतवाले होवै सै वे रात ए नै मतवाले होवै सै। 8 पर हम जो दिन के सां, बिश्वास अर प्यार की झिलम पैहर के अर उद्धार की आस का टोप पैहर के होशियार रहवां। 9 क्यूँके परमेसवर नै म्हारे ताहीं छो के खात्तर न्ही, पर ज्यातै ठहराया सै, के हम अपणे प्रभु

यीशु मसीह के जरिये उद्धार पावां। 10 वो म्हारे खात्तर इस कारण मरया, के हम चाहे जिन्दा हों, चाहे मर लिये हों, सारे मिलके उससे कै गेल्या जिवां। 11 इस कारण एक-दुसरे ताहीं तसल्ली द्यो अर एक-दुसरे ताहीं बिश्वास म्ह मजबूत करो, जिसा के थम करो भी सो। 12 हे बिश्वासी भाईयो, हम थारे तै बिनती करा सां, के जो थारे म्ह मेहनत करै सै, अर प्रभु म्ह थारे अगुवें सै, अर थमनै शिक्षा देवें सै, उनका आदर करो। 13 अर उनके काम्मां के कारण प्यार कै गेल्या उन ताहीं घणाए आदर कै जोग्गा समझो। आप्पस म्ह मेळ-मिलाप तै रहो। 14 हे बिश्वासी भाईयो, हम थारे तै बिनती करां सां के जो आलसी सै, उन ताहीं समझाओ, डरपोकां ताहीं हिम्मत द्यो, कमजोरां ताहीं सम्भाळो, सारया की ओड़ सहनशीलता दिखाओ। 15 सावधान रहों! कोए किसे तै बुराई कै बदले बुराई ना करै; पर सारी हाण भलाई करण खात्तर तयार रहवै, आप्पस म्ह एक-दुसरे खात्तर आच्छे काम करो, अर दुसरयां खात्तर भी। 16 सारी हाण राज्जी रहो। 17 लगातार प्रार्थना म्ह लागे रहो। 18 हरेक हालात म्ह धन्यवाद करो; क्यँके थारे खात्तर मसीह यीशु म्ह परमेसवर की याए मर्जी सै। 19 पवित्र आत्मा ताहीं माणसां के जीवन म्ह काम करण तै ना रोक्को। 20 परमेसवर के जरिये जो भविष्यवाणीयाँ माणसां ताहीं बताई गई सै उननै तुच्छ ना जाणो। 21 इन सारी बाततां ताहीं परखो; जो आच्छी सै उसनै थाम्बे राक्खो। 22 सारी ढाळ की बुराई तै बचे रहो। 23 शान्ति देण आळा परमेसवर आप ए थमनै पूरी तरियां तै पवित्र करै; अर थारी आत्मा अर प्राण अर देह म्हारे प्रभु यीशु मसीह कै बोहडण ताहीं पूरे-पूरे अर बेकसूर सुरक्षित रहवें। 24 थारा बुलाण आळा साच्चा सै, अर वो इसाए करेगा। 25 हे बिश्वासी भाईयो, म्हारे खात्तर प्रार्थना करो। 26 आप्पस म्ह एक-दुसरे ताहीं गळे मिलके मसीह के प्यार म्ह नमस्कार करो। 27 मै थारे ताहीं प्रभु की हुकम देऊँ सूँ के या चिट्ठी सारे बिश्वासी भाईयाँ नै पढ़कै सुणाई जावै। 28 म्हारे प्रभु यीशु मसीह का अनुग्रह थारे पै होदा रहवै।

2 थिस्सलुनीकियों

1 या चिट्ठी हम पौलुस, सिलवानुस अर तीमुथियुस की ओड़ तै थिस्सलुनीकियों नगर की कलीसिया के बिश्वासियों तार्हीं लिखां सां, जो म्हारै पिता परमेसवर अर प्रभु यीशु मसीह के सै। 2 म्हारै पिता परमेसवर अर प्रभु यीशु मसीह की ओड़ तै थमनै अनुग्रह अर शान्ति मिलदी रहवै। 3 हे बिश्वासी भाईयो, थारे बारै म्ह हमनै हरेक बखत परमेसवर का धन्यवाद करणा चाहिये, अर यो सही भी सै ज्यातै के थारा बिश्वास यीशु मसीह म्ह घणा बढ़ा जावै सै, अर थारा एक-दुसरे के खात्तर आपस म्ह प्यार घणाए बढ़ता जावै। 4 इस करके हम परमेसवर की कलीसिया के बिश्वासियों के बारै म्ह गर्व करा सां, के जितने थम इम्तिहान अर मुसीबतां तै गुजरो सों, थम उननै धीरज तै सहण लागरे सों, अर थम फेर भी यीशु मसीह पै बिश्वास राक्खों सों। 5 अर परमेसवर इन दुखां का इस्तमाल अपणे न्याय तार्हीं दिखाण अर थारे तार्हीं अपणे राज्य के लायक बणाण खात्तर करैगा, जिस खात्तर थम दुख भी ठाओ सो। 6 क्यूँके परमेसवर हमेशा सही न्याय करै सै, ताके जो थमनै दुख देवें सै, उननै बदले म्ह वो दुख देवै। 7 अर थमनै वो इस दुख तै राहत देवैगा, जो थम इब उठाण लागरे सों, अर म्हारे तार्हीं भी राहत दे, यो उस बखत होगा जिब प्रभु यीशु अपणे सामर्थी सुर्गदूतां के गैल, धधकती होई आग म्ह सुर्ग तै आवैगा। 8 अर जो परमेसवर नै नही पिच्छाणदे, अर जो म्हारे प्रभु यीशु के बारें म्ह सुसमाचार तार्हीं नही मानते उनतै वो बदला लेवैगा। 9 वे परमेसवर तै हमेशा खात्तर अलग हो जावेंगे अर उसकी महिमामय शक्ति म्ह शामिल नही हो पावेंगे अर वे अनन्त विनाश का दण्ड पावेंगे। (aiōnios g166) 10 यो उस दिन होवैगा, जिब प्रभु यीशु मसीह बोहड़के आवैगा, ताके वो उन माणसां तै महिमा पावै जो उसके कहलवै सै, उन माणसां तै सम्मानित करया जावैगा जो उसपै बिश्वास करै सै, अर उस दिन थम भी उनकी तारीफ करण आळा म्ह तै एक होओगे, क्यूँके थमनै उसपै बिश्वास करा, जो हमनै थारे तार्हीं बताया। 11 ज्यातै हम सारी हाण थारे बारै म्ह प्रार्थना भी करा सां, के म्हारा परमेसवर थारे तार्हीं इसा करण म्ह काबिल बणावैगा, जिसके खात्तर उसनै म्हारे तार्हीं बुलाया सै, अर वो थारी हरेक भली इच्छा नै सामर्थी रूप तै पूरा करै, अर हर उस काम नै पूरा करा जो थम बिश्वास तै करो सों। 12 इस तरियां म्हारे प्रभु यीशु मसीह का नाम थारे जरिये महिमा पावैगा, यो सब कुछ म्हारे परमेसवर अर प्रभु यीशु मसीह के अनुग्रह तै होवैगा।

2 हे बिश्वासी भाईयो, इब हम अपणे प्रभु यीशु मसीह के बोहड़ण, अर जिब हम कठ्ठे होके उसतै मिलगें तो उस दिन के बारें म्ह थारे तार्हीं बताणा चाहूँ सूं। 2 थम किसे भविष्यवाणी या किसे उपदेश या किसे चिट्ठी नै म्हारी ओड़ तै लिखी होई मानके चाणचक बोखळा ना जाइयो, अर ना ए अपणे-आप म्ह घबराईयो के परमेसवर का दिन पैहले ए आ लिया सै। 3 किसे ढाळ तै भी किसे के थोक्खे म्ह ना आइयो, क्यूँके प्रभु यीशु के आण तै पैहले इसा बखत आवैगा, जिब भोत सारे लोग

परमेसवर के बिरोधी हो जावेंगे, अर वो अधर्मी माणस यानिके विनाश का बेट्टा दिखाई देवैगा, जिस तार्हीं परमेसवर सदा खात्तर खतम कर देवैगा। 4 वो अधर्मी माणस परमेसवर अर उन दुसरी चिज्जां का बिरोध करैगा। जिनकी लोग भगति करै, वो दावा करैगा के वो उनतै भी घणा बड़ा सै, उरै तार्हीं के वो परमेसवर के मन्दर म्ह बैठके अपणे-आप तार्हीं ईश्वर बतावैगा। 5 के थमनै याद कोनी के जिब मै थारे धोरे था, तो थारे तै ये बात कह्या करूँ था? 6 वो जो अधर्मी माणस इब तार्हीं दिख्या नही सै, क्यूँके इसा कुछ तो सै जिसनै उस तार्हीं रोक राख्या सै, पक्का थम जाणो सों, के वो के सै। इस करके जिब परमेसवर का बखत आवैगा तो वो अधर्मी माणस दिख जावैगा। 7 अर उस अधर्मी माणस की शक्ति पैहले तै गुप्त रूप तै इस दुनिया म्ह काम करण लागरी सै, पर वो सै जो उस शक्ति नै रोक्कण लागरया सै, अर जिब तार्हीं वो दूर ना हो जावै तब तक वो इस तार्हीं रोकणा जारी राक्खैगा। 8 फेर वो अधर्मी माणस दिख जावैगा, पर बाद म्ह जिब प्रभु यीशु आवैगा तो वो अपणे मुँह की फूँक तै अधर्मी माणस तार्हीं मार देवैगा, अर अपणे आगमन के तेज तै भस्म करैगा। 9 वो अधर्मी माणस शैतान की शक्ति गैल आवैगा, वो सारे ढाळ के झूठे चमत्कार, अर अचम्भे के काम करैगा, जो हमनै यो सोच्यण के खात्तर मजबूर करैगा के योए परमेसवर सै जो इननै करण लागरया सै। 10 वो सारी ढाळ के बुरे तरिकके अपणावैगा उन माणसां खात्तर जो अनन्त विनाश के राह की ओड़ जावै सै, क्यूँके उननै सच्चाई पै बिश्वास कोनी करया जिसतै उनका उद्धार हों सके सै। 11 इस्से कारण परमेसवर उन माणसां म्ह एक भटकाण आळी शक्ति नै भेज्जै सै, जो उन तार्हीं सच्चाई तै दूर ले जावैगी, ताके वे झूठ पै बिश्वास करै। 12 परमेसवर उन सब का न्याय करैगा जिननै सच्चे सन्देस (यीशु मसीह के बारें म्ह) बिश्वास कोनी करया, अर जिननै अधर्म के काम्मां तै प्यार करया। 13 हे बिश्वासी भाईयो, उरै थारे खात्तर परमेसवर के स्याम्ही म्हारा हमेशा धन्यवाद देणा सही सै, थम प्रभु के प्यारे सों, क्यूँके परमेसवर नै थारे तार्हीं दुनिया की शरूआत तै ए उद्धार के खात्तर चुण लिया सै। ताके वो थमनै पवित्र आत्मा के काम के जरिये पवित्र बणावै, अर यीशु मसीह के सच्चे सुसमाचार पै बिश्वास करण के जरिये थमनै बचाले। 14 म्हारे सुसमाचार के जरिये उसनै थारे तार्हीं बचाण खात्तर बुलाया सै, ताके थम उसकी महिमा म्ह हिस्सा ले सको, जो परमेसवर नै म्हारे प्रभु यीशु मसीह तार्हीं दी सै। 15 ज्यातै हे बिश्वासी भाईयो, मजबूत रहो, अर जो-जो शिक्षा थमनै चाहे वचन या चिट्ठी के जरिये म्हारे जरिये सीक्खी सै, उननै थाम्बे राक्खो। 16 हम प्रार्थना करां सां के खुद म्हारा प्रभु यीशु मसीह, अर म्हारा पिता परमेसवर, जिसनै म्हारे तै प्यार करया अर अनुग्रह तै अनन्त शान्ति अर घणी बढ़िया उम्मीद देई सै, (aiōnios g166) 17 थारे मनां म्ह शान्ति दे अर थमनै हरेक आच्छे काम अर वचन म्ह मजबूत करै।

3 इस करके, हे बिश्वासी भाईयो, म्हारै खात्तर प्रार्थना करया करो के प्रभु के बारें म्ह सन्देस भोत तावळा दुसरी जगहां म्ह भी सुणाया जा

सकै, अर लोग उसपै बिश्वास करैगें जिसा थम बिश्वास करो सों। 2 या भी प्रार्थना करया करो के परमेसवर हमनै बैरी अर बुरे माणसां के जरिये दिए जाण आळे नुकसान तै भी बचावै, क्यूँके भोत-से लोग सुसमाचार पै बिश्वास कोनी करते। 3 पर प्रभु भरोस्सेमंद सै, वो थमनै अन्दरूनी रूप तै मजबूत करैगा अर उसकी रक्षा करैगा, ताके बुराई, शैतान थमनै नुकसान ना पंहुचा सकै। 4 हमनै प्रभु म्ह थारे उप्पर भरोस्सा सै हमनै जो कुछ थारे ताहीं करण खात्तर कह्या सै थम उसाए करण लागरे सों अर करते भी रहोगे। 5 हम प्रार्थना करा सां के प्रभु यीशु थमनै यो समझण के काबिल बणावै के परमेसवर थमनै कितना प्यार करै सै, अर धीरज राखणा सिखावै जिसा मसीह राक्खे सै। 6 हे बिश्वासी भाईयो, प्रभु यीशु मसीह नै जो हक म्हारे ताहीं दिया सै, उसके कारण हम थमनै हुक्म देवां सां, के थम हरेक इसे बिश्वासी भाई तै न्यारे रहो जो कोए काम न्ही करदा, अर जो शिक्षा उसने म्हारै तै पाई उसकै मुताबिक न्ही करदा। 7 क्यूँके थम सारे अपणे-आपनै आच्छी तरियां जाणो सों, के थमनै उरसे तरियां जीणा चाहिए जिस तरियां हम जिवां सां, क्यूँके जिब हम थारे बिचाळै रहण लागरे थे, तो हम आलसी कोनी थे। 8 अर किसे की रोटी मुफ्त म्ह कोनी खाई, मेहनत अर कष्ट तै दिन-रात काम-थन्धा करा थे, ताके हम अपणी जरूरतां खात्तर थारे भरोस्से ना रह्यां। 9 हालाकि थारे तै आर्थिक मदद पाण का म्हारा हक बणै सै, फेर भी हम कड़ी मेहनत करा सां, पर ज्यातै के अपणे-आप ताहीं थारे खात्तर आच्छा नमूना बणावां ताके थम भी म्हारै जिसा जीवन जिओ। 10 क्यूँके जिब हम थारे धोरै थे, तब भी योए कह्या करा थे, के जै कोए काम करणा ना चाहवै तो उसका खाण का भी हक कोनी। 11 हम सुणां सां के कुछ माणस थारे बिचाळै सुस्त सै अर वे कोए काम न्ही करदे, पर दुसरयां के काम म्ह रुकावट करै सै, अर उन ताहीं भी काम करण तै रोक्कै सै। 12 प्रभु यीशु मसीह नै म्हारे ताहीं हक दिया सै, अर हम थमनै भी समझावां सां, के चुपचाप काम करके अपणी ए कमाई तै रोटी खाया कर। 13 पर हे बिश्वासी भाईयो, थम खुद वो काम करण तै पाच्छे ना हटियो, जो सही अर भले सै। 14 जै कोए म्हारी इस चिट्ठी म्ह दी गई हिदायत नै कोनी मान्ने तो सब जाण ल्यो के वो कौण सै, अर उसकी संगति ना करो, जिसतै वो शर्मिन्दा होवै। 15 तोभी उस ताहीं दुश्मन मतना समझो, पर बिश्वासी भाई जाणके समझाओ। 16 मै प्रार्थना करूँ सूँ, के प्रभु जो शान्ति का चोवा सै आप ए थारे ताहीं सारी हाण अर हरेक तरियां तै शान्ति देवै। प्रभु थम सारया के साथ रहवै। 17 मै, पौलुस, अपणे हाथ तै नमस्कार लिक्खूँ सूँ। इरसे तरियां तै मै अपणी सारी चिट्ठियाँ के अन्त म्ह न्युए लिक्खूँ सूँ ताके थम जाण ल्यो के ये मेरी ओड़ तै सै। 18 मै प्रार्थना करूँ सूँ, के म्हारे प्रभु यीशु मसीह का अनुग्रह थम सारया पै होंदा रहवै।

1 तीमथियुस

1 या चिट्ठी पौलुस की ओड़ तै सै, जो यीशु मसीह का प्रेरित सै, अर परमेसवर जो म्हारा उद्धारकर्ता सै, अर यीशु मसीह जो म्हारी आस सै, उसनै मेरे ताहीं प्रेरित होण खात्तर बुलाया सै। 2 मै या चिट्ठी तीमथियुस नै लिखूँ सूं, मसीह पै बिश्वास करण के नाते तू मेरे आत्मिक बेटे की तरियां सै, मै प्रार्थना करूँ सूं, के पिता परमेसवर, अर म्हारे प्रभु मसीह यीशु की ओड़ तै तन्नै अनुग्रह, दया अर शान्ति मिलदी रहवै। 3 जिसा के तू तीमथियुस जाणै सै, इफिसुस नगर म्ह कई माणस सै जो झूठी शिक्षा देवै सै, वे माणसां ताहीं लगातार झूठी कहाणियाँ अर पूर्वजां की लम्बी वंशालियाँ नै सिखावै सै, जिसा के मन्ने मकिदुनिया जान्दे बखत तेरे तै कहा था, के इफिसुस नगर म्ह रहके उन ताहीं कह के इसी शिक्षा ना देवै, जिब वे इसी शिक्षा देवै सै, तो माणसां म्ह विवाद पैदा होवै सै, इसका नतिज्जा यो सै के ये शिक्षक परमेसवर का काम न्ही करते जो परमेसवर नै उन ताहीं दिया सै, यो तो सिर्फ मसीह पै बिश्वास करण के जरिये करया जा सके सै। 5 योए म्हारे हुकम का मकसद सै, के थम सच्चे मन, शुद्ध अन्तरात्मा अर सच्चे बिश्वास तै एक-दुसरे के गेल्या बिना कपट के प्यार करो। 6 झूठे शिक्षकां नै इन सारी चिज्जां ताहीं छोड़ दिया सै, अर सिर्फ बेकार की चिज्जां पै बातचीत करै सै। 7 अर वकील तो बणणा चाहवै सै, पर जो बात कहवै अर जिन ताहीं मजबूती तै बोल्लै सै, उन ताहीं समझदे भी कोनी। 8 हम जाणा सां के मूसा के नियम-कायदा नै जै सही तरिके तै सिखावै तो वो भला सै। 9 हम यो जाणा सां, के मूसा नबी के नियम-कायदे धर्मी माणस के खात्तर कोनी, पर उन माणसां खात्तर सै जो परमेसवर के नियम-कायदा नै अणदेखा करै सै, अर उन ताहीं मानते कोनी, अर उन माणसां खात्तर जो परमेसवर की आराधना कोनी करते, अर जो सारी हाण पाप करते रहवै सै, जो माणस दुष्ट सै, अर परमेसवर का आदर कोनी करते, अर जो अपणे माँ-बाप नै, अर दुसरयां नै मार देवै सै। 10 जारी करणीये, माणसां गैल कुकर्म करणीये, माणस नै बेचण आळे, झूठ बोल्लण आळे, झूठी कसम खाण आळे, अर इनके अलावा खरे उपदेश के सारे बिरोधियाँ के खात्तर बणाई गई सै। 11 या सही शिक्षा उस सुसमाचार पै आधारित सै, जो के धन्य परमेसवर की महिमा के बारे म्ह सै, जिसकी मेरे ताहीं प्रचार करण की जिम्मेदारी दी गई सै। 12 मै अपने प्रभु मसीह यीशु का जिसनै मेरे ताहीं सामर्थ दी सै, धन्यवाद करूँ सूं, के उसनै मेरे ताहीं बिश्वास जोग्गा समझके अपणी सेवा के खात्तर चुण्या। 13 बिश्वास करण तै पैहले, मै बुराई करण आळा, सताण आळा, अर अन्धे करण आळा था, तोभी मेरे पै दया होई, क्यूँके यीशु मसीह पै बिश्वास करण तै पैहले मन्ने अबिश्वास अर बिना सोच्के-समझे ये काम करे थे। 14 अर परमेसवर का अनुग्रह मेरे पै भोत-ए घणा होया, उसनै मेरे ताहीं बिश्वास अर प्यार दिया, क्यूँके मै मसीह यीशु म्ह सूं। 15 या बात साच्ची अर हरेक तरियां तै मानण जोग्गी सै, के मसीह यीशु पापियाँ का उद्धार

करण खात्तर दुनिया म्ह आया, जिन म्ह सारया तै बड़ड़ा पापी मै सूं। 16 परमेसवर नै अपणी दया मेरे पै दिखाई, उसनै यो इस कारण करया ताके मुझ माणस के जरिये, जिसनै दुसरे माणसां तै ज्यादा बुरे काम करे सै, मसीह यीशु दिखा सकै सै, के वो मेरे खात्तर कितना धीरज राक्खे सै, या उन माणसां खात्तर एक मिसाल सै जो बाद म्ह उसपै बिश्वास करैगें, अर वे अनन्त जीवन पावैगें। (aiōnios g166) 17 इब राजा जो सदा खात्तर जिन्दा सै, उस अविनाशी, अनदेक्खे, एकमात्र परमेसवर का आदर अर उसकी महिमा युगानुयुग होंदी रहवै। आमीन। (aiōn g165) 18 हे बेटे तीमथियुस, मै यो हुकम सौंप सूं, जो उन भविष्यवाणीयाँ के मुताबिक सै, जो पैहल्या तेरे बारे म्ह करी गई थी, उनके मुताबिक एक सिपाही की तरियां आच्छी लड़ाई नै लड़ता रह। 19 थम मसीह पै लगातार बिश्वास करते रहो, ताके थारी अन्तरात्मा साफ रहवै, कई माणसां नै अपणी साफ अन्तरात्मा ताहीं त्याग दिया सै, अर उनकी मसीह पै बिश्वास करण की काबलियत भी खतम होगी सै, अर इब वे बिश्वास भी कोनी करते। 20 उन म्ह हुमिनयुस अर सिकन्दर भी शामिल सै, जिन ताहीं मन्ने शैतान की बुरी शक्तियाँ के हाथ सौंप दिया सै, ताके वे परमेसवर की बुराई करणा छोड़ दे।

2 इब मै सारया तै पैहल्या यो आग्रह करूँ सूं, के बिनती, प्रार्थना, निवेदन, अर धन्यवाद सारे माणसां के खात्तर करे जावै। 2 राजयां अर सारे ऊँच्चे ओढ़ा आळा के खात्तर ज्यांतै ताके वो हमनै आराम अर चैन के गेल्या सारी भगति अर गम्भीरता तै जीवन बिताण देवै। 3 इसी प्रार्थना सही सै अर म्हारे परमेसवर उद्धारकर्ता नै आच्छी लागै सै। 4 वो चाहवै सै के हरेक इन्सान सच्चाई के ज्ञान नै समझ ले अर वे बच जावै। 5 क्यूँके परमेसवर एके सै, अर परमेसवर अर माणसां के बीच म्ह भी एक ए बिचोल्ला सै, जो मसीह यीशु सै, जो मानव रूप धारण करके आया। 6 मसीह नै अपणे-आप ताहीं बलिदान कर दिया, ताके लोग्गां नै पाप अर मौत की शक्ति तै आजाद करै। मसीह की मौत के जरिये, परमेसवर नै यो सबूत दिया के सही बखत पै सब लोग बच जावै। 7 इस कारण तै परमेसवर नै मेरे ताहीं सुसमाचार का प्रचारक अर प्रेरित चुण्या सै, उसनै मेरे ताहीं गैर यहूदियाँ ताहीं बिश्वास अर सच्चाई का सन्देश सुणाण आळा बणाया सै, मै झूठ न्ही बोल्ला, सच कहूँ सूं। 8 ज्यांतै मै चाहूँ सूं, के हरेक जगहां सभाओं म्ह माणस जो पवित्र जिन्दगी जीवै सै, वे हाथ्यां नै ठाके बिना छो अर विवाद के परमेसवर तै प्रार्थना करै। 9 इस्से तरियां मै चाहूँ सूं के मसीह बिरबानियाँ नै भी सही तरियां के लते पैहरणे चाहिए, जो के सादे हो, ना के भड़कीले। ना के खूबसूरती तै बाळ गूँथणा, ना सोन्ने, मोतियाँ अर घणे महँगे लत्यां तै अपणे-आपनै सवारणा। 10 पर इसके बजाए वो लोग्गां की भलाई करै, जो उननै खूबसूरत बणावै सै, क्यूँके परमेसवर की भगति करण आळी बिरबानियाँ के खात्तर योए सही सै। 11 जिब कोए, बिश्वासियाँ ताहीं सिखाण लागरया हो तो, बिरबानियाँ नै चुपचाप रहके पूरी शान्ति तै सिखाणा चाहिये। 12 मै बिरबानियाँ ताहीं मर्दा नै सिखाण या उसपै

हावी होण की इजाजत कोनी देंदा, जिब थम आराधना म्ह मिलो हो, तो बिरबानियाँ नै चुप रहणा चाहिए। 13 मै इस करके कहुँ सूँ, क्यूँके पैहल्या आदम, उसके पाछै हवा बणाई गई। 14 आदम साँप के जरिये भकाया न्ही गया, पर बिरबान्नी भकाई म्ह आकै कसूरवार होई। 15 तोभी बिरबान्नी बाळक पैदा करण के जरिये उद्धार पावैगीं, जै वा मसीह पै विश्वास करै, दुसरे तै प्यार, अर पवित्र अर सही बरताव करै।

3 या बात सच्ची सै, के जो कलीसिया का अगुवां बणणा चाहवै सै, तो वो भले काम की चाह करै सै। 2 यो जरूरी सै के अगुवां नै बेकसूर, अर एक ए बिरबान्नी का धणी, संयमी, सुशील, सभ्य, मेहमान का आदर-सत्कार करणीया, अर सिखाण म्ह सही होणा चाहिए। 3 दारूबाज या मारपीट करण आळा ना हो, बल्के नरम हो, अर ना रोळा करण आळा, अर ना धन का लोभभी हो। 4 अपने घर का सही इन्तजाम करण आळा हो, अर उसनै अपने बाळ-बच्चां ताहीं हरेक काम म्ह आदरपूर्वक उनका कहणा मानना सिखाणा चाहिए। 5 जिब कोए अपने घर का ए इन्तजाम करणा ना जाणदा हो, तो परमेसवर की कलीसिया की रुखाळी किस ढाळ करैगा? 6 वो नया विश्वासी ना हो, इसा ना हो के घमण्ड करके शैतान की तरियां सजा भुगतै। 7 अर कलीसिया के बाहर के माणसां म्ह भी वो सम्मान लायक हो, ताके वो बदनामी अर शैतान कै फंदे म्ह ना फँस जावै। 8 उससे तरियां ए कलीसिया के सेवकां नै भी गम्भीर होणा चाहिये, दोगली बात करण आळा, दारूबाज अर नीच कमाई का लोभभी ना हो। 9 उनकै धोरे साफ अन्तरात्मा हो, क्यूँके वे मानते रहवैंगे, के परमेसवर नै जो शिक्षाएँ जाहिर करी वे सच सै। 10 अर ये इन सारी बातां म्ह पैहले परखे जावै, फेर जै बेकसूर लिंकडै तो सेवक का काम करै। 11 इससे तरियां तै बिरबानियाँ नै भी गम्भीर होणा चाहिये, दोष लाण आळी ना हों, पर सचेत अर सारी बातां म्ह विश्वास जोगी हों। 12 कलीसिया का सेवक एक ए बिरबान्नी का धणी हों अर बाळ-बच्चां अर अपने घरां का आच्छा इन्तजाम करणा जाणदे हों। 13 क्यूँके जो कलीसिया के सेवक का काम आच्छी ढाळ तै कर सके सै, वो माणसां म्ह सम्मान लायक होगा, पर मसीह यीशु म्ह अपने विश्वास के बारे म्ह वो बड़ी दिलेरी तै बोल्लण आळा हो। 14 मै तेरे धोरे तावळा आण की आस करते होए भी, ये बात तेरे तै ज्यातै लिक्खूँ सूँ, 15 ताके जै मेरै ओड़े आण म्ह देर हो भी जावै, तो मै चाहुँ सूँ, थम इस बात नै जाण ल्यो, के परमेसवर का परिवार जो के एक कलीसिया सै, उस म्ह हमनै एक-दुसरे तै किसा बरताव करणा चाहिए। जिन्दे परमेसवर की कलीसिया के माणस सच्चाई की शिक्षा की नीम अर खम्बे की तरियां सै। 16 हम दावे के साथ कह सका सां, के परमेसवर नै जो शिक्षाएँ जाहिर करी सै, वो पूरी तरियां तै सच सै, यानी, वो जो देह म्ह जाहिर होया, वो पवित्र आत्मा के जरिये परमेसवर का बेटा साबित होया, अर उस ताहीं सुर्गदूतां नै देख्या, दुनिया के माणसां नै उसपै विश्वास करया, दुसरी जातां म्ह उसका प्रचार होया, अर महिमा म्ह उपपर ठाया गया।

4 पर पवित्र आत्मा साफ तौर पै कहवै सै, के अन्त के दिनां म्ह कुछ लोग मसीह शिक्षा ताहीं मानना छोड़ देवैंगे, वो ओपरी आत्मायाँ ताहीं अपना लेवैंगे जो उन ताहीं भटका देवैगी, अर वो उस झूठी शिक्षा पै मन लगावैंगे जो ओपरी आत्मा की ओड़ तै सै। 2 वे पाखण्डी झूठे लोग सै जो झूठी शिक्षा सिखावै सै, उनकी अन्तरात्मा, जो सही या गलत के बीच का फैसला करै सै, वा मर चुकी सै, जिस तरियां के एक गरम लोहे नै अन्तरात्मा ताहीं जळा दिया हो। 3 ये झूठे लोग सिखावै सै, के ब्याह करणा अर कई चीज जो खाण-पीण की सै, वे गलत सै, पर परमेसवर नै इन खाण-पीण की चिज्जां ताहीं विश्वासियाँ खात्तर बणाया सै, जो सच्ची शिक्षा नै जाणे सै के परमेसवर की बणाई हरेक चीज आच्छी सै, कोए भी चीज नकारन की कोनी, जै उस ताहीं धन्यवाद देकै खावै। 5 क्यूँके परमेसवर के वचन अर प्रार्थना कै जरिये सब कबूल हो जावै सै। 6 जै तू लगातार विश्वासी भाई-भाणा नै याद दुआन्दा रहवै, के जो मन्ने निर्देश दिए सै, अर तू जो विश्वास अर आच्छे शिक्षा के सन्देस के जरिये मजबूत बणाया गया सै, जिसका तन्ने पालन करया सै, तो तू यीशु मसीह का एक आच्छा सेवक सै। 7 सांसारिक अर मनघडन्त कहानियाँ तै दूर रहों, अर थम अपने-आपनै ईश्वरीय जीवन जीण खात्तर अनुशासित कर ल्यो। 8 क्यूँके देह की कसरत तै माड़ा सा फायदा होवै सै, पर भगति सारी बातां कै खात्तर फैयदेमन्द सै, क्यूँके यो इस धरती पै जिन्दा रहन्दे होए अर मरण कै बाद भी एक ईनाम का वादा सै। 9 या बात सच्ची अर हरेक ढाळ तै मानण जोगी सै। 10 क्यूँके हम मेहनत अर कोशिश इस्से खात्तर करा सां के म्हारी आस उस जिन्दे परमेसवर पै सै, जो सारे माणसां अर खास करके अपने विश्वासियाँ का उद्धार करणीया सै। 11 विश्वासियाँ नै ये बात करणा अर उननै मानना सीखा। 12 छोट्टी उम्र के कारण कोए तन्ने तुच्छ ना समझै पर वचन, अर चाल-चलण, अर प्यार, अर विश्वास, अर पवित्रता म्ह विश्वासियाँ कै खात्तर बढ़िया नमूना बण जा। 13 जिब ताहीं मै न्ही जाऊँ, जिब तक बखत लिकाड़के पवित्र ग्रन्थ विश्वासियाँ ताहीं पढ़कै सुणा, अर उन ताहीं उत्साहित अर वचन सिखाण म्ह लग्या रह। 14 उस आत्मिक वरदान कै बारे म्ह, जो तेरे म्ह सै, अर भविष्यवाणी कै जरिये कलीसिया के अगुवां के हाथ धरदे बखत तन्ने मिल्या था, निश्चिन्त मतना रह। 15 इन बातां नै सोचदा रह अर इन्नै म्ह अपना ध्यान लाये रह, ताके तेरी बढ़ोतरी सारया पै दिख जावै। 16 यो ध्यान राक्खों के थम किस तरियां जिन्दगी जिओ सों, अर के सिखाओ सों। इन बातां पै स्थिर रह, क्यूँके इसा करदा रहवैगा तो तू अपने अर अपने सुणण आळा कै खात्तर भी उद्धार का कारण होगा।

5 किसे बूढ़े ताहीं छो म्ह ना धमका, पर उस ताहीं अपना बाप जाणके समझा दे, अर जवानां नै अपना भाई जाणके समझा दे। 2 बूढ़ी बिरबानियाँ नै माँ जाणके, अर जवान बिरबानियाँ नै पूरी पवित्रता तै भाण मानके समझा दे। 3 उन बिधवा बिरबानियाँ का, जिनकी देखभाळ करणीया कोए कोनी उनका आदर कर। 4 जै किसे बिधवा के बाळक

या नास्ती-पोते हों, तो वे सब तै पैहल्या अपणे ए कुणबे कै प्रति अपणे फर्ज नै पूरा करके परमेसवर का भगत बणणा सीखे, अर अपणे माँ-बाप के उपकारां का फळ दे, क्यूँके यो परमेसवर नै भावै सै। 5 जो सच म्ह ए बिधवा सै, अर उसका मदद करण आळा कोए न्ही, वा परमेसवर पै आस राख्वै सै, अर दिन-रात बिनती अर प्रार्थना म्ह लाग्गी रहवै सै। 6 पर जो बिधवा भोगविलास म्ह पड़गी, वा जिन्दे जी मरगी सै। 7 इन बात्तां का भी हुकम दिया कर ताके कोए उनपै दोष ना लगा सकै। 8 पर जै कोए अपणे रिश्तेदारां की अर खास करके अपणे कुणबे की फिक्र ना करै, तो वो बिश्वास तै मुकर गया सै अर अबिश्वासी तै भी बुरा बण गया सै। 9 उससे बिधवा का नाम लिख्या जावै जो साठ साल तै उप्पर की हो, अर जो एके धणी की बिश्वास लायक रही हों। 10 अर भले काम म्ह आच्छी नाम्मी रही हो, जिसनै बाळकां का पालन-पोषण, मेहमानां की सेवा, परमेसवर के माणसां की सेवा, दुखियाँ की मदद करी हो, अर हरेक भले काम म्ह मन लगाया हो। 11 पर जवान बिधवा बिरबानियाँ के नाम ना लिखिए, क्यूँके जिब उनकी शारीरिक अभिलाषा मसीह की सेवा करण तै बढ़के हो जावै सै, तो वा ब्याह करणा चाहवें सै। 12 दुबारे ब्याह करके, वे खुद कसूरवार बणौगी, क्यूँके उननै अपणे पैहल्ले वादे ताहीं जो के ब्याह ना करण का था, उस ताहीं तोड़ दिया सै। 13 इसकै गेल्या ए गेल्या वे घर-घर हाँड के आलसी होणा सिक्खें सै, अर सिर्फ आलसी न्ही पर बकबक कर दी रहै सै, अर दुसरयां के काम म्ह भी दखल देती रहवै सै, अर चुगली कर दी रहवै सै। 14 ज्यांतै मै न्यू चाहूँ सूँ के जवान बिधवां ब्याह करै, अर बाळक जाँमै अर घर-बार सम्भाळे, अर किसे बिरोधी नै बदनाम करण का मौक्का ना देवें। 15 मै इस करके कहुँ सूँ, के उन म्ह तै कईयाँ नै प्रभु का कहणा मानना छोड़ दिया सै, अर शैतान कै पाच्छे चालणा शरु कर दिया सै। 16 जै किसे बिश्वासी परिवार म्ह कोए बिधवां हों, तो वैए उनकी मदद करै के कलीसिया पै बोझ ना हो, ताके कलीसिया उनकी मदद कर सकै जो साच्च्य बिधवां सै। 17 कोए भी कलीसिया का अगुवां जो अपना काम आच्छी तरियां करै सै उस ताहीं बड़ा सम्मान अर पर्याप्त वेतन पाण के लायक मान्या जाणा चाहिए, खासकर जो लोग परमेसवर के सन्देश नै पढ़ाण अर प्रचार करण म्ह कड़ी मेहनत करै सै। 18 क्यूँके पवित्र ग्रन्थ म्ह लिख्या सै, “नाज लिकाड़ण आळे बळध का मुँह ना बाँधिये,” क्यूँके “मजदूर अपनी मजदूरी का हकदार सै।” 19 किसे भी कलीसिया के अगुवै के बिरुद्ध दो या तीन गवाह के बिना कोए भी उसनै दोषी ना मान्णो। 20 पाप करण आळा नै सारया कै स्याम्ही समझा दे, ताके बाक्की के बिश्वासी भी डरै। 21 परमेसवर, अर मसीह यीशु अर छोट्टे होड़ सुर्गदूतां नै मौजूद जाणके मै तन्नै हुकम देऊँ सूँ, के बिना भेदभाव के तू इन हुकमां नै पूरा कर, अर सब के गैल एक जिसा बरताव कर। 22 किसे ताहीं जल्दबाजी म्ह अगुवां ना बणाईये, अर जै तू इसा करै सै, तो उसका जिम्मेदार भी तू खुद होवैगा, तू यो तय करके मै कोए पाप न्ही करूँगा। 23 आण आळे बखत म्ह सिर्फ पाणी ए का पीण आळा ना रह,

पर अपणे पेट के अर अपणे बार-बार बीमार होण के कारण माड़ा-माड़ा अंगूर का रस भी काम म्ह लयाया कर। 24 मै कहुँ सूँ, के किसे ताहीं जल्दबाजी म्ह अगुवां ना बणाईये, क्यूँके कई लोग सब के स्याम्ही पाप करै सै, इसतै पैहले के उनका न्याय हो, बिश्वासियाँ के स्याम्ही वे पापी बण चुके सै, दुसरे माणसां के पाप दिखाई न्ही देन्दे, पर पाच्छे नजर आवै सै। 25 उससे तरियां तै जिब माणस आच्छे काम करै सै तो दुसरे माणस उसके काम्मां नै देखखै सै, अर जै इब न्ही दिखदे तो बाद म्ह वे दिख जावै सै।

6 जितने बिश्वासी गुलाम सै, वे अपणे-अपणे माल्लिक का आदर करै, ताके दुसरे लोग परमेसवर की अर म्हारी शिक्षा की बुराई ना करै। 2 जिनके माल्लिक बिश्वासी सै, वे अपणे माल्लिकां का अपमान ना करै, यो जाणके के इब तो वे उनके बिश्वासी भाई सै, बल्के वे उनकी सेवा और भी ज्यादा मन तै करै, क्यूँके वे जो सेवा तै फायदा ठाण लागरे सै, अर उननै वे मसीह म्ह अपणे भाईयाँ की तरियां प्यार करै, इन बात्तां का उपदेश देँदा रह, अर उन ताहीं मानण खात्तर भी उत्साहित करदा रह। 3 जै कोए झूठी शिक्षा देवै सै अर खरी शिक्षा नै न्ही मानता, यानिके म्हारै प्रभु यीशु मसीह की शिक्षा अर हुकम नै जिसतै परमेसवर नै महिमा मिलै सै। 4 तो वो घमण्डी सै, अर किमे न्ही जाण्दा, बल्के इसा माणस फालतू के मुद्दे अर शब्दां के बारे म्ह बहस करणा चाहवै सै, जिसतै जळण, अर झगड़े, अर बुराई की बात, भुन्डे-भुन्डे शक, 5 अर उन माणसां म्ह बेकार रगड़े-झगड़े पैदा होवै सै, जिनकी अकल खराब हो जा सै, अर वे सच तै दूर हो गये सै, जो समझै सै, के परमेसवर की सेवा करणा कमाई का साधन सै। 6 पर यो म्हारे खात्तर भला सै, के हम वो करा जिसतै परमेसवर खुश होवै सै, अर उससे म्ह सबर करा जो वो म्हारे ताहीं देवै सै। 7 क्यूँके ना हम दुनिया म्ह किमे ल्याए सां, अर ना किमे लेके जा सकां सां। 8 जै म्हारे धोरे खाण अर पैहरण नै हो, तो इन्ने म्ह सबर करणा चाहिये। 9 पर जो साहूकार होणा चाहवें सै, वे हर तरियां के पाप करण के जरिये धोक्खे म्ह पड़े सै, वे एक जानवर की तरियां जाळ म्ह फँस जावै सै, वे उन चिज्जां नै करणा चाहवै सै जो उनकै खात्तर बेकूफी अर खतरनाक सै अर येए इच्छे उनके नाश का कारण बण जावै सै। 10 क्यूँके रपियाँ का लोभ सारे ढाळ की बुराई की जड़ सै, जिसनै पाण की कोशिश करदे होए घणखरयां नै मसीह की शिक्षा पै बिश्वास करणा बन्द कर दिया सै, क्यूँके वे भोत पईसा चाहवै थे, अर उननै अपणे-आप ताहीं कई ढाळ के दुखां तै छलनी कर लिया सै। 11 पर हे तीमुथियुस, परमेसवर के जन, तू इन बात्तां तै भाज, अर धर्म, बिश्वास, प्यार, धीरज, अर नम्रता के पाच्छे चाल। 12 एक आच्छे सिपाही की तरियां जो हार न्ही मानता, परमेसवर पै बिश्वास करणा अर उसका कहणा मानना ना छोड़े अर उस अनन्त जीवन नै पा ले, जिसकै खात्तर तू बुलाया गया सै, अर भोत सारे माणसां के स्याम्ही तन्नै मान लिया सै, के तू मसीह पै बिश्वास करै सै। (aiōnios g166) 13 मै तेरे ताहीं परमेसवर नै, जो सब नै जीवन दे सै, अर मसीह यीशु नै गवाह मानके

जिसने पुन्तियुस पिलातुस के स्याम्ही अपने बारे में बड़ी हिम्मत तै सच बोल्या, यो निर्देश देऊँ सँ, 14 के जो परमेसवर नै तेरे ताहीं हुकम दिये सै, उन सब ताहीं दिल तै मान, ताके कोए भी तन्नै प्रभु यीशु मसीह के बोहड़ण तक गलत काम म्ह दोषी ना बता सकै। 15 परमेसवर जो एकमात्र राजा सै, वोए महिमा कै लायक सै, जो राजयां का राजा, अर प्रभुओ का प्रभु सै, वो मसीह ताहीं सही बखत पै जाहिर करैगा। 16 वोए सै जो सदा खातर जिन्दा सै, अर वो उस चमकदार रोशनी म्ह रहवै सै, जिसके धारे कोए न्ही आ सकदा, अर ना उस ताहीं किसे माणस नै देख्या अर ना कदे देख सकै सै। उसकी प्रतिष्ठा अर राज्य युगानुयुग रहवैगा। आमीन। (aiōnios g166) 17 इस दुनिया के साहूकारां नै आज्ञा दे, के वे घमण्डी ना हों अर अपने धन पै भरोस्सा ना राक्खै, जो के थोड़े दिन का सै, पर परमेसवर पै भरोस्सा राक्खै, जो उदारता तै सब कुछ देवै सै, जो हमनै चाहिए, ताके हम उसका आनन्द उठा सका। (aiōn g165) 18 वे भलाई करै, अर भले काम्मां म्ह धनी बणै, अर उदार अर मदद करण म्ह तयार हों। 19 जै वे इसा करै सै, तो इसा लागै सै, के वे सुर्ग म्ह अपनी सम्पत्ति जमा करण लागरे सै, जो असलियत म्ह खू न्ही सकदी, अर उस ताहीं सच्चा जीवन भी दिया जावैगा, जिसका मतलब सै सदा का जीवन। 20 हे तीमुथियुस, वो सब कुछ करण म्ह सावधान रह, जो परमेसवर नै तेरे ताहीं दिया सै, अर अभगति, बेकूफी भरी बात, अर उस झूठी शिक्षा तै जो सच्ची शिक्षा के बिरोध म्ह सै, जिन ताहीं वे ज्ञान की बात कहवै सै, उनतै दूर रह। 21 कई माणसां नै इस झूठे ज्ञान ताहीं अपणालिया सै, अर कहवै सै, के हमनै ज्ञान सै, इसा करण तै वे सच्ची शिक्षा तै दूर हगे सै, मै प्रार्थना करूँ सँ, के परमेसवर का अनुग्रह उनपै भी अर थारे पै भी होन्दा रहवै।

2 तीमुथियुस

1 या चिट्ठी मुझ पौलुस की ओड़ तै सै, परमेसवर नै मेरे ताहीं मसीह यीशु का प्रेरित होण खातर चुण्या सै, ताके मै यो सन्देश प्रचार कर सकू, के परमेसवर नै अनन्त जीवन देण का वादा करया सै, जो यीशु मसीह पै बिश्वास करण तै मिलै सै। 2 मै तीमुथियुस ताहीं या चिट्ठी लिखूँ सूँ, जिसतै मै प्यार करूँ सूँ, अर मै प्रार्थना करूँ सूँ, के पिता परमेसवर अर म्हारे प्रभु मसीह यीशु की ओड़ तै तन्नै अनुग्रह, दया अर शान्ति मिलदी रहवै। 3 मै परमेसवर का धन्यवाद करूँ सूँ, जिसकी आराधना मै साफ अन्तरात्मा तै उससे ढाळ करूँ सूँ, जिस तरियां मेरे पूर्वज करै थे, मै अपनी प्रार्थनायां म्ह तन्नै दिन रात याद करूँ सूँ। 4 मन्नै याद सै के जब मन्नै थारे ताहीं छोड़के जाणा पड्या था, तो थम मेरे खातर किस तरियां रोए थे। मै दिन-रात तेरे तै मिलण की लालसा राखूँ सूँ, ताके आनन्द तै भर जाऊँ। 5 मन्नै तेरी माँ यूनिके का खरा बिश्वास भी याद सै, अर तेरी नानी लोइस का भी इसाए बिश्वास था, अर मन्नै पक्का बिश्वास सै के थारा भी बिश्वास उसाए होगा सै। 6 इससे कारण मै तन्नै याद दुवाऊँ सूँ के तू परमेसवर के उस वरदान नै जो मेरे हाथ धरण के जरिये तन्नै मिल्या सै प्रज्वलित करदे। 7 क्यूँके परमेसवर नै म्हारे ताहीं डरपोक न्ही बणाया, बल्के उसका आत्मा म्हारे मन मजबूत बणावै सै, जो म्हारे ताहीं दुसरयां तै प्यार करण म्ह मदद करै सै, अर म्हारे ताहीं अपने-आप पै काबू राखणा सिखावै सै। 8 इस कारण म्हारे प्रभु यीशु मसीह के बारे म्ह लोग्गां ताहीं बताण म्ह शर्मिन्दा मत होओ, अर शर्मिन्दा होणा भी न्ही चाहिए, क्यूँके मै उसकी सेवा करण के कारण जेळ म्ह सूँ, इसके बजाये थमने उस शक्ति का इस्तमाल करणा चाहिए जो परमेसवर थमनै देवै सै, अर सुसमाचार के खातर मेरे गेल्या दुख नै सह ल्यो। 9 परमेसवर नै म्हारा उद्धार करया सै, अर म्हारे ताहीं पवित्र जीवन जीण खातर बुलाया सै। उसनै म्हारे ताहीं इस कारण कोनी चुण्या के हमनै आच्छे काम करे सै, बल्के अपनी अनुग्रह अर इच्छा के मुताबिक चुण्या सै। उसनै यीशु मसीह ताहीं भेजके म्हारे उप्पर अनुग्रह दिखण की योजना दुनिया बणाण तै पैहले ए बणा ली थी। (aiōnios g166) 10 पर इब म्हारे उद्धारकर्ता मसीह यीशु जाहिर होए, अर अपनी करुणा दिखाई, जिसनै मौत की शक्ति ताहीं हरा दिया अर म्हारे ताहीं सुसमाचार के जरिये दिखाया के अनन्त जीवन का एक ए रास्ता सै। 11 जिसके खातर परमेसवर नै मेरे ताहीं प्रचारक, प्रेरित, अर उपदेशक भी बणाया। 12 इस कारण मै जेळ म्ह इन दुखां नै भी सहूँ सूँ, पर सरमान्दा कोनी, क्यूँके मै मसीह नै जाणु सूँ, जिसपै मन्नै बिश्वास करया सै, अर मन्नै पक्का बिश्वास सै के मसीह मेरी उस धरोहर की रक्षा जिब तक करदा रहवैगा जिब तक के वो आ ना ले, क्यूँके वो भरोसेमंद सै। 13 जो खरी बात तन्नै मेरे तै सुणी सै, उन ताहीं उस बिश्वास अर प्यार के गैल, जो मसीह यीशु म्ह सै, अपना बढ़िया नमूना बणाके राख। 14 अर उस धरोहर की रक्षा करो जो पवित्र आत्मा के जरिये थारे ताहीं सौप्या

गया सै, जो म्हारे भित्त रहवै सै। 15 तन्नै बेरा सै के आसिया परदेस के भोत-से बिश्वासी भाईयाँ नै मेरे ताहीं छोड़ दिया सै, जिन म्ह फूगिलुस अर हिरमुगिनेस भी शामिल सै। 16 उनेसिफुरुस कै कुण्बे पै प्रभु दया करै, क्यूँके वो कई बार मेरे धोरे आया अर उसनै मेरे ताहीं उत्साहित करया अर जेळ म्ह भी मेरे तै मिलण खातर आण म्ह शर्मिन्दागी महसूस कोनी करी। 17 पर जिब वो रोम नगर म्ह आया, तो उसनै मेरे ताहीं हरेक जगहां ढूँढ्या, अर ढूँढ के मेरे तै मिल्या। 18 (प्रभु करै के उस दिन उसपै प्रभु की दया हो)। जिब मै इफिसुस नगर म्ह था, तो उसनै वो सब कुछ मेरे खातर करया जिसनै थम भी जाणो सों।

2 ज्यांते हे मेरे बेटे तीमुथियुस, तू उस अनुग्रह म्ह जो मसीह यीशु म्ह सै, मजबूत हो जा। 2 थमनै मेरे ताहीं कई माणसां के स्याम्ही मसीह की शिक्षा के बारे म्ह सन्देश सिखान्दे देख्या होगा। इस करके मै चाहूँ सूँ, के थम उन दुसरे बिश्वासियाँ ताहीं भी वोए सन्देश सिखाओ जिन माणसां पै थम भरोसा करो सों, जो दुसरयां नै भी वोए सन्देश सीखा सके। 3 इससे तरियां एक सैनिक धीरज तै लड़ाई के मैदान म्ह सारे दुख सहवै सै, थमनै भी सारे दुख सहण करणे पड़ैगें, जिसा हम मसीह यीशु खातर सहवां सां। 4 जिब कोए सैनिक लड़ाई पै जावै सै, तो उसका काम अपने-आपने दुनियादारी के काम्मां म्ह फसाणा कोनी बल्के उसका काम अपने भर्ती करण आळे नै खुश करणा सै। 5 जै दौड़ म्ह दौड़ण आळा सही तरीके तै न्ही दौड़ता तो वो ईनाम न्ही पा सकदा। 6 जो किसान मेहनत करै सै, फसल के पैहले हिस्से पै हक उसका सै। 7 या सोच्चों के ये उदाहरण हमनै के सिखाणा चाहवै सै, परमेसवर इन सारी बात्तां नै समझण म्ह थारी मदद करै। 8 यीशु मसीह नै याद राख, जो दाऊद की पीढ़ी तै पैदा होया अर जिस ताहीं परमेसवर नै मेरे होया म्ह तै जिन्दा करया, अर वोए सुसमाचार सै जिसका हम प्रचार करां सां। 9 क्यूँके मै सुसमाचार सुणाऊँ सूँ, जिसके खातर मै भुन्डे काम करणीये की ढाळ दुख ठाऊँ सूँ, उरै ताहीं के कैद भी सूँ, पर कोए भी चीज परमेसवर का सुसमाचार प्रचार करण तै लोग्गां नै रोक न्ही सकदी। 10 इस कारण मै छोट होए माणसां के खातर सब कुछ सहूँ सूँ, ताके वे भी यीशु मसीह पै बिश्वास करके बच सके अर अनन्त महिमा नै हासिल कर पावें। (aiōnios g166) 11 या बात साच्ची सै, के जै हम मसीह के गेल्या मरगे सां, तो उसके गेल्या जीवांगें भी। 12 जै हम उसके खातर दुख सहन्दे रहवांगें, तो उसके गेल्या राज भी करांगें, जै हम इन्कार करां, के हम उसनै न्ही जाणते, तो वो भी कह देवैगा, के वो भी हमनै न्ही जाणता। 13 जै हम बिश्वासघाती भी हों, तोभी वो भरोसेमन्द बणा रहवै सै, क्यूँके वो हमेशा अपने सुभाव के मुताबिक काम कर करै सै। 14 बिश्वासियाँ नै ये बात समझा दे, अर प्रभु की मौजूदगी म्ह समझा दे, के शब्दां पै बहस-बाजी ना करया करै, जिसतै कुछ फायदा कोनी होन्दा, क्यूँके यो उन माणसां के उस बिश्वास नै नुकसान पुहचा सके सै जो उननै सुणै सै। 15 अपने-आपने परमेसवर का अपनाण जोग्गा अर इसा काम करण आळा बणाण की कोशिश कर, जो शर्मिन्दा न्ही होण पावै,

अर जो सच के वचन नै सही ढाळ तै समझा सकै। 16 पर दुनियावी अर बेकार की बाततां तै दूर रह, क्यूँके जो लोग दुनियावी अर बेकार की बाततां म्ह शामिल होवै सै, वे परमेसवर तै और घणे दूर हो जावै सै। 17 उनकी बातें सड़े घांव की ढाळ फैलदी जावैगी, जो दुसरयां के बिश्वास नै कमजोर कर देंगी जो उन बाततां नै सुणै सै, अर हुमिनयुस अर फिलेतुस उनकी तरियां ए सै। 18 उननै सच्चाई पै बिश्वास करणा बन्द कर दिया सै, वे कहवै सै के परमेसवर नै पैहले ए मरे होए बिश्वासियाँ ताहीं अनन्त जीवन के खात्तर जिन्दा करया था, इस करके वे कुछ बिश्वासियाँ ताहीं कहवै सै, के मसीह पै बिश्वास ना करो। 19 परमेसवर के लोग इसी नीम की ढाळ सै जो हालदी कोनी, अर उस नीम पै या छाप लागरी सै: “प्रभु अपणे माणसां ताहीं पिच्छाणै सै,” अर “जो कोए प्रभु का नाम लेवै सै, उसनै बुराई करणा छोड़ देणा चाहिए।” 20 एक बड़े घर म्ह ना सिर्फ सोन्ने-चाँदी ए के, पर काठ अर माट्टी के बासण भी होवै सै, कुछ खास मौकके, अर कुछ रोज के खात्तर इस्तमाल करे जावै सै। 21 इससे तरियां जै कोए बिश्वासी अपणे-आपनै नै इन बुरी चिज्जां तै दूर कर लेवैगा, तो वो माल्लिक के उस उपयोगी बासण की तरियां होवैगा, जो खास मौकका पै इस्तमाल करया जावै सै, वो पवित्र बण जावैगा, अर वो माल्लिक के जरिये हरेक भले काम के खात्तर इस्तमाल करया जावैगा। 22 जवान्नी की अभिलाषाओं तै दूर भाज्जो, अर उनकी संगति म्ह रहों जो धार्मिकता, बिश्वास, प्यार, अर शान्ति का सुभाव राखवै सै, जो साफ मन तै परमेसवर नै पुकारै सै। 23 पर बेकूफी अर अज्ञानता के बहस तै दूर रह, क्यूँके तन्नै बेरा सै के इनतै झगड़े पैदा होवै सै। 24 प्रभु के दास नै झगड़ालू न्ही होणा चाहिये, पर वो सब के गेल्या नरम अर शिक्षा म्ह निपुण अर सहनशील हो। 25 वो बिरोधियाँ नै नम्रता तै समझावै, के बेरा परमेसवर उननै इसा मन देवै के वे पाप करणा छोड़ दे ताके वे भी सच नै पिच्छाणै। 26 अर ये लोग आच्छी तरियां फेर तै सोच्यण अर शैतान के धोक्खे तै बचण के लायक हो जावैगें, अर यो धोक्खा एक फंदे के तरियां सै। शैतान नै उन ताहीं इस खात्तर पकड्या सै, ताके जो वो चाहवै सै वो उनतै करवा सकै।

3 मै इब के कहुँ सू, उन बाततां पै ध्यान दे अन्त के दिनां म्ह कष्ट का बखत भी आवैगा। 2 क्यूँके माणस स्वार्थी, लोभ्भी, डिंगमार, अभिमानी, बुराई करण आळे, माँ-बाप का हुकम टाळण आळे, अहसान-फरमोस, अपवित्र, 3 निर्दयी, माफ ना करण आळे, दोष लाण आळे, असंयमी, कठोर, भले के बैरी, 4 बिश्वासघाती, ढीठ, घमण्डी, अर परमेसवर के न्ही बल्के सुखविलास ए के चाहणआळे होंगें। 5 वे भगति का भेष तो धरेंगें, पर वे उस शक्ति नै अपनावै कोनी, जो उननै ईश्वरीय बणा सकै सै, इसा तै परै रहियो। 6 इन्हे म्ह तै वे माणस सै जो घरां म्ह दवे पाँ बड़ जावै सै, अर उन लुगाईयाँ ताहीं बस म्ह कर लेवें सै, जो पापां तै दबी अर हरेक ढाळ की अभिलाषायां के बस म्ह हो सै। 7 अर वे हमेशा नई बात सिखदी तो रहवें सै, पर सच की पिच्छाण तक कदे न्ही

पोहोचदी। 8 जिस तरियां यत्रेस अर यम्ब्रेस नै मूसा नबी का बिरोध करया था, उससे तरियां ए ये भी सच का बिरोध करै सै, ये इसे माणस सै, जिनकी बुद्धि भ्रष्ट होगी सै अर वे बिश्वास के बारे म्ह निकम्मे सै। 9 उनकी कामयाबी थोड़े बखत की थी, क्यूँके जिस तरियां माणसां नै मान लिया के यत्रेस अर यम्ब्रेस बेकूफ थे, अर हर कोए यो स्वीकार कर लेगा के वे बेकूफ सै। 10 पर तन्नै उपदेश, चाल-चलण, मनसा, बिश्वास, सहनशीलता, प्यार, धीरज, अर सताए जाण, अर दुख ठाण म्ह मेरा साथ दिया, अर इसे दुखां म्ह भी जो अन्ताक्रिया नगर अर इकुनियुम अर लुस्त्रा नगरां म्ह मेरे पै आण पड़े थे, अर दुसरे दुखां म्ह भी जो मन्ने ठाए सै, पर प्रभु नै मेरे ताहीं उन सारया तै छुटा लिया। 12 पर जितने मसीह यीशु म्ह भगति के गेल्या जीवन बिताणा चाहवें सै वे सारे सताए जावेंगे। 13 पर दुष्ट अर भकाण आळे बिगड़दे चले जावेंगे, वे दुसरयां नै धोक्खा देवेंगें, अर खुद दुसरयां तै धोक्खा खावेंगें। 14 थमनै बिश्वास करते रहणा चाहिए जो हमनै थारे ताहीं सिखाया सै, क्यूँके थम हमनै जाणो सों, अर म्हारे पै भरोस्सा कर सको सों जिननै थारे ताहीं ये बातें सिखाई सै। 15 जिन थम छोट्टे बाळक थे, जिन तै ए थमनै अपणे पवित्र ग्रन्थां म्ह सिख्या सै, जो थारे ताहीं या समझण म्ह मदद करे के जिन थम मसीह यीशु म्ह बिश्वास करो सों तो परमेसवर थमनै बचावै सै। 16 साब्ता पवित्र ग्रन्थ परमेसवर की प्रेरणा तै रचया गया, अर म्हारे ताहीं सिखाण खात्तर उपयोगी सै, के सच के सै, अर म्हारे ताहीं यो महसूस करण खात्तर के म्हारी जिन्दगी म्ह के गलत सै। यो म्हारी गलतियाँ नै सुधारे, जिन हम गलत होवां सां, अर वोए करणा सिखावै सै जो सही सै। 17 ताके परमेसवर का जन हरेक भले काम करण खात्तर तयार अर सिध्द बण जावै।

4 जिन मसीह यीशु राजा के रूप म्ह शासन करण खात्तर आवैगा, तो वो उन जिन्दे अर मरे होए माणसां का न्याय करैगा जो मर चुके सै, तो गवाह के रूप म्ह परमेसवर अर मसीह के साथ, मै ईमानदारी के साथ थारे तै आग्रह करूँ सू। 2 के तू परमेसवर के वचन का प्रचार कर, परमेसवर के वचन ताहीं सुणाण खात्तर सदा तैयार रह, चाहे लोग इस ताहीं सुणाणा चाहवै या ना चाहवै, ताके थम माणसां नै दिखा सको, के जो उननै करया सै, वो गलत करया सै, अर उनके पापां खात्तर उन ताहीं डाट सको, पर थम माणसां नै उत्साहित भी करो जिन थम उननै बड़े धीरज तै सिखाओ सों। 3 क्यूँके इसा बखत आवैगा जिन माणस खरयां उपदेश न्ही सह सकेंगें, पर अपनाए ए इच्छा पूरी करैगें अर वे अपणे खात्तर कई उपदेशक कठ्ठे करैगें जो उपदेश वे सुणाणा चाहवै सै उन ताहीं वे बतावेंगें। 4 अर वे सच्चाई नै अनदेखा कर देवेंगें, अर झूठी कथा-कहाँनियाँ पै मन लगावेंगें। 5 थमनै हरेक बखत अपणे-आप पै काब्बू राखणा चाहिए, दुख ठा, सुसमाचार प्रचार का काम कर, अर परमेसवर के जरिये दी गई सेवा नै पूरी कर। 6 जै वे मन्ने मार भी देवेंगें, तो मेरी जिन्दगी परमेसवर ताहीं चढ़ाई गई एक भेट की तरियां होगी।

इस दुनिया ताहीं छोड़ण का इब मेरा बखत आ लिया सै। 7 मन्नै मसीह की सेवा करण खात्तर कड़ी मेहनत करी सै, मन्नै अपणी दौड़ पूरी कर ली सै, मन्नै आखरी तक उसपै विश्वास करया। 8 आण आळे बखत म्ह प्रभु मेरे ताहीं मुकुट देवैगा, जो के धार्मिकता का मुकुट सै, वो जो सच्चा न्याय करै सै, अर मन्नै वो ईनाम देवैगा जिब बोहड़ के आवैगा बल्के मेरे ताहीं ए न्ही उन सब ताहीं भी देवैगा, जो उसके दुबारा आण की बाट बड़ी आस तै देखण लागरे सै। 9 मेरे धोरै तावळा आण की कोशिश कर। 10 क्यूँके देमास नै इस दुनिया की चिज्जां तै प्यार करया सै, अर मेरे ताहीं छोड़ दिया सै, अर वो थिस्सलुनीके नगर म्ह चल्या गया सै। क्रेसकेंस, गलातिया नगर की ओड़ चल्या गया अर तीतुस दलमतिया परदेस कान्ही चल्या गया सै। (aiōn g165) 11 सिर्फ लुका मेरे गैल सै। मरकुस नै लेकै चल्या आ, क्यूँके वो मेरे काम करण म्ह मेरी मदद करैगा। 12 तुखिकुस ताहीं मन्नै इफिसुस नगर म्ह भेज्या सै। 13 जो चोल्ला, मै, त्रोआस नगर म्ह करपुस के घर छोड़ आया सूँ, जिब तू आवै तो उस ताहीं अर उस किताब ताहीं भी लेदे आईये, खास करके चर्मपत्रों नै। 14 सिकन्दर ठठेरे नै मेरा बड़ा नुकसान करया सै, प्रभु उस ताहीं उसके काम्मां के मुताबिक बदला देवैगा। 15 तू भी उसतै चौकन्ना रह, क्यूँके उसनै म्हारी शिक्षायां का घणाए बिरोध करया सै। 16 पैहली बार मै खुद नै बचाण खात्तर अदालत गया, कोए भी मेरे गैल न्ही था, पर सब नै मेरे ताहीं छोड़ दिया, परमेसवर इस बात का दण्ड उननै ना देवै, मै प्रार्थना करूँ सूँ, मेरे ताहीं छोड़ण के कारण उन ताहीं परमेसवर माफ करदे। 17 पर मेरे गैल मेरा प्रभु मददगार रहया, मेरे जरिये सन्देस की घोषणा पूरी तरियां सम्पन्न हो जावै अर उरे जितने भी गैर यहूदी लोग मौजूद सै, ये बात सुण ले, के उसनै मेरे ताहीं मौत के मुँह म्ह तै छुड़ाया। 18 अर प्रभु मन्नै हरेक भुन्डे काम तै छुड़ावैगा, अर वो अपणे सुर्गीय राज्य म्ह सही-सलामत ले जावैगा। उस्से की महिमा युगानुयुग होन्दी रहवै। आमीन। (aiōn g165) 19 प्रिसकिल्ला अर उसका धणी अक्विला अर उनेसिफुरुस के कुणबे नै मेरी ओड़ तै नमस्कार। 20 इरास्तुस कुरिन्थुस नगर म्ह रह गया, अर त्रुफिमस ताहीं मन्नै मीलेतुस नगर म्ह बीमार छोड्या सै। 21 जाड्डे तै पैहल्या चले आण की कोशिश कर। यूबूलुस, अर पूर्देस, अर लीनुस अर क्लौदीया, अर सारे विश्वासी भाईयाँ की ओड़ तै तन्नै नमस्कार। 22 मै प्रार्थना करूँ सूँ, के प्रभु तेरी आत्मा के गैल रहवै। थारे पै अनुग्रह होंदा रहवै।

तीतुस

1 या चिट्ठी मुझ पौलुस की ओड़ तै सै, जो परमेसवर का दास अर यीशु मसीह का प्रेरित सै, मै इस करकै भेज्जा गया सूं ताके उन माणसां के बिश्वास नै स्थापित कर सकूँ जिन ताहीं परमेसवर नै चुण्या सै, अर उन ताहीं सीखा सकूँ के वो उस सच्चाई नै जाण सकै, जो उन ताहीं दिखा सकै के पवित्र जिन्दगी किस तरियां जीणी सै। 2 वे हमेशा के खात्तर परमेसवर के साथ रहण की आस करै सै, क्यूँके परमेसवर, जो कदे झूठ न्ही बोल्दा, उसनै दुनिया बणाण तै पैहले वादा करया था के उसके लोग हमेशा खात्तर जिन्दा रहवैगें। (aiōnios g166) 3 अर ठीक बखत पै परमेसवर नै यो सुसमाचार म्हारे पै जाहिर करया, अर हमनै यो सुसमाचार सारया ताहीं सुणाया। परमेसवर जो म्हारा उद्धारकर्ता सै, उसनै मेरे ताहीं या जिम्मेदारी दी सै, अर अपना काम करण खात्तर मेरे ताहीं उसनै हुकम दिया सै। 4 मै या चिट्ठी तीतुस नै लिखूँ सूं, मसीह पै बिश्वास करण के नाते तू मेरे आत्मिक बेटे की तरियां सै, मै प्रार्थना करूँ सूं, के पिता परमेसवर, अर म्हारे उद्धारकर्ता प्रभु मसीह यीशु की ओड़ तै तन्नै अनुग्रह, दया अर शान्ति मिलदी रहवै। 5 मै इस करकै तन्नै क्रेते टापू म्ह छोड़ आया था, ताके तू ओड़ै उस काम नै खतम कर सकै जो अधूरा रहया था, अर मेरै हुकम कै मुताबिक उस टापू के हरेक नगर म्ह कलीसिया के अगुवां नै तैयार कर सकै, जिसा मन्नै कह्या सै। 6 अगुवां बेकसूर अर एके पत्नी का पति हो, जिनके बाळक बिश्वासी हो, अर उन म्ह लुचपण अर निरंकुशता का दोष ना हो। 7 क्यूँके अगुवां, नै परमेसवर का भण्डारी होण के कारण बेकसूर होणा चाहिए, ना जिद्दी, ना गुसेल, ना पियक्कड़, ना मारपीट करण आळा, ना नीच कमाई का लोभी हो, 8 पर मेहमान का आदर करण आळा, भलाई का चाहू आळा, अपणे-आप्ये म्ह रहण आळा, न्यायकारी, पवित्र अर अपणे मन नै काबू राखण आळा हो। 9 वो यीशु मसीह के सन्देस के बारे म्ह मजबुती तै बिश्वास करदा हो, जो हमनै थारे ताहीं सिखाया सै, अर वो दुसरयां ताहीं उत्साहित कर सकै, ताके वे सही शिक्षा का पालन कर सकै, अर उन ताहीं भी समझा सकै जो सही शिक्षा का बिरोध करै सै। 10 क्यूँके भोत-से माणस सही शिक्षा के बिरुध्द खड़े होवैगें, जो बेकार की बात सिखावे सै अर जो दुसरयां ताहीं धोक्खा देवै सै, उन म्ह तै कुछ लोग यहूदी सै जो बिश्वासी बणगे सै। 11 इन माणसां ताहीं सिखाण का मौक्का न्ही देणा चाहिए, क्यूँके वे इसी शिक्षा देवे सै जो उन ताहीं देणी न्ही चाहिए, अर ये पूरे घराने का बिश्वास खतम कर देवै सै, अर वे यो इस खात्तर करै सै ताके उन ताहीं पईसे मिल सकै। 12 उन म्ह तै एक जण्ये नै, जो उनका नबी सै, कह्या सै, “क्रेते नगर का माणस जिस ताहीं वे नबी मान्ने सै उसनै क्रेती के माणस के बारे म्ह कह्या, के ये सदा झूठ बोल्लै सै, ये जंगली-जानवरां की तरियां बरताव करै सै, ये आलसी होवै सै अर ये भोत पेटू सै।” 13 या बात क्रेती माणसां के बारे म्ह सच सै, इस करकै उननै सखताई तै चेतावनी दिया कर, के वे

यीशु मसीह की सच्ची शिक्षा पै बिश्वास करै। 14 अर यहूदिया की कथा कहानियां अर माणसां के हुकम पै मन ना लगावे, जो सच तै भटक जावै सै। 15 वे माणस जिनके मन म्ह कोए पाप कोनी, उनके खात्तर सारी चीज शुद्ध सै, पर उन माणसां खात्तर जो बुरे सै, अर जो मसीह यीशु पै बिश्वास कोनी करते, उन खात्तर कोए भी चीज शुद्ध कोनी, वे हर बखत बुरे काम करै सै, क्यूँके उनका मन पूरी तरियां अशुद्ध हो लिया सै। 16 ये झूठे शिक्षक कहवै सै, के हम परमेसवर नै जाणा सां, पर उनके काम दिक्खै सै, के वो परमेसवर ताहीं न्ही जाणते क्यूँके वे घृणित अर हुकम ना मानण आळे सै, अर किसे आच्छे काम कै लायक कोन्या।

2 पर तीतुस तेरे खात्तर योए सही सै के तू बिश्वासियां ताहीं वोए सीखा जो सच्ची शिक्षा कै मुताबिक हो। 2 यानी के बूढ़े माणस शान्त गम्भीर अर संयमी हो, अर उनका बिश्वास, प्यार अर धीरज पक्का हो। 3 इस ढाळ बूढ़ी बिरबानियां का बरताव इसा हो के परमेसवर नै महिमा मिलै, वे लाच्छण लगाण आळी अर पियक्कड़ न्ही हो, पर आच्छी बात सिखाण आळी हो। 4 जवान बिरबानियां नै तीतुस तै न्ही बल्के बूढ़ी बिरबानियां तै निर्देश पाणा चाहिए, ताके वो उन ताहीं सीखा सकै किस तरियां अपणे धणी अर बाळकां तै प्यार करै। 5 अर वे मन पै काबू राखण आळी, पतिव्रता, घर का कामकाज सम्भाळण आळी, भली अर अपणे-अपणे धणी कै प्रति बिश्वास लायक हो, ताके कोए परमेसवर के वचन की बुराई ना कर सकै। 6 इसे तरियां जवान माणसां नै भी समझाया कर, के वे खराई तै चाल्लण आळे हो। 7 हरेक काम म्ह तू अपणे आच्छे बरताव तै दुसरयां खात्तर एक मिसाल बण जा, जिब तू बिश्वासियां ताहीं परमेसवर के बारे म्ह सिखावे सै, तो उन ताहीं आच्छे मकसद तै सीखा, अर इसा सीखा ताके लोग तेरा आदर कर सकै। 8 तेरी शिक्षाओं म्ह हमेशा सच्चाई हो, जिसकी आलोचना ना हो सकै, जिसतै बिरोधी नै म्हारे म्ह कोए दोष लगाण का मौक्का ना मिलै अर वो खुद पै शर्मिन्दा हो जावै। 9 नौकरां नै समझा के अपणे-अपणे माल्लिक के कह्ये म्ह रहवै, अर सारी बात्तां म्ह उसनै राज्जी राक्खै, अर उल्ट के जवाब ना दे। 10 चोरी चलाकी ना करो, अर हमेशा यो दिक्खै के वो बिश्वास लायक सै, अर थारे आच्छे सुभाव नै देखकै, वे भी म्हारे उद्धारकर्ता परमेसवर की शिक्षा ताहीं सुणणा चाहवैगें। 11 परमेसवर नै अपना अनुग्रह इस बात म्ह जाहिर करया के उसनै मसीह यीशु ताहीं म्हारा उद्धारकर्ता बणाके भेज दिया, ताके हरेक माणस बचाए जा सकै। 12 अपणी दया के कारण परमेसवर म्हारे ताहीं सिखावे सै, के हम उन तरिककां तै बरताव करणा बन्द कर द्या, जो उस ताहीं खुश न्ही कर सकदे, अर इसी लालसा ना राक्खा जिसी अबिश्वासी लोग राक्खै सै, पर बुध्दिमानी अर धार्मिकता तै बरताव करां, अर इसा बरताव करा जो परमेसवर नै पसन्द हो, जिब तक हम दुनिया म्ह रहवां। (aiōn g165) 13 हम इस तरिकके तै बरताव करा, जिसा के हम उस अदभुत दिन की बात देखदे हो, जिसकी हम आस राक्खां सां, यो वो दिन सै जिब यीशु मसीह जो म्हारा परमेसवर अर उद्धारकर्ता सै बड़ी महिमा म्ह इस दुनिया म्ह

बोहड़ के आवैगा। 14 इस मसीह यीशु नै अपणे-आप ताहीं म्हारे पापां खात्तर बलिदान कर दिया, ताके हम सारे पापां तै आजाद हो जावां, अर म्हारे ताहीं शुद्ध करया ताके हम उसके अपणे खास माणस बण जावां, जो भले काम करण की बड़ी इच्छा राखै सै। 15 पूरे अधिकार कै गैल इन सारी बाततां की शिक्षा देते होए लोगगां नै समझा अर उत्साहित करदा रह, अर कोए तन्नै तुच्छ न्ही जाणण पावै।

3 बिश्वासियाँ नै याद दुआ के हाकिमां अर अधिकारियां का आदर कर, अर उनका हुकम मान्ने, अर दुसरयां का भला करदे रहो। 2 किसे नै बदनाम ना करै, अर ना झगड़ालू बणै, पर दुसरे माणसां के खात्तर दया दिखाण आळे बणो, अर सारे माणसां के गैल बड़ी नरमाई के गैल रहवै। 3 क्यूँके हम भी पैहल्या बेअक्ल, परमेसवर का हुकम ना मानण आळे, भ्रम म्ह पड़े होए अर न्यारी-न्यारी ढाळ की बुरी अभिलाषा अर सुखभोगण की गुलामी म्ह, अर बैरभाव अर माणसां के प्रति जळण करण म्ह जीवन बिताण लागरे थे, हम घृणा के लायक माणस थे, अर हर कोए म्हारे तै घृणा करै था, अर हम भी उनतै घृणा करा थे। 4 पर फेरभी परमेसवर जो म्हारा उद्धारकर्ता सै उसनै अपणी दया अर प्यार हम माणसां पै दिखाया। 5 उसनै म्हारे ताहीं पापां के दण्ड तै बचाया, अर यो धार्मिक काम्मां के जरिये न्ही होया जो हमनै खुद करे, पर उसनै म्हारे पै दया करी। उसनै म्हारे ताहीं पवित्र आत्मा देण के जरिये बचाया, जो म्हारे पापां नै माफ करै सै, अर हमनै नई जिन्दगी अर नया सुभाव देवै सै। 6 परमेसवर नै मुफ्त म्ह पवित्र आत्मा दिया ताके वो म्हारे म्ह सामर्थी रूप तै काम करै क्यूँके मसीह यीशु म्हारे पापां खात्तर मरया अर म्हारा उद्धारकर्ता बण गया। 7 ताके हम अनन्त जीवन की आस राख सका, जिसका परमेसवर नै अपणे माणसां ताहीं देण का वादा करया सै, अर हमनै उसपै पूरा भरोस्सा सै, क्यूँके वो अपणी करुणा के मुताबिक म्हारे ताहीं धर्मी बणावै सै। (aiōnios g166) 8 या बात सच सै, अर मै चाहूँ सूं के तू इन बाततां के बारे म्ह मजबूती तै बोल्लै इस करके के जिननै परमेसवर पै बिश्वास करया सै, वे भले काम करण खात्तर हमेशा ध्यान लगावेंगे। ये बात भली अर माणसां के फायदे की सै। 9 पर बेवकूफी के विवादों, पीढियाँ, बिरोध अर झगड़ा तै जो मूसा नबी के नियम-कायदा के बारे म्ह हो, इनतै बचा रह, क्यूँके वे फायदेमन्द कोनी बल्के बेकार सै। 10 तू उन माणसां नै एक दो बार समझा जो कलीसिया म्ह फूट गेरे सै, अर उन ताहीं इसा करण तै मना कर, उसकै बाद उनपै और बखत बरबाद ना करै। 11 तन्नै पक्का बेरा सै, के इस ढाळ का माणस भटक गया सै, अर अपणे काम्मां के जरिये दोषी ठहराया जावैगा। 12 जिब मै तेरे धोरे अरतिमास या तुखिकुस नै भेज्जूं तो मेरे धोरे निकुपुलिस नगर आण की कोशिश करिये, क्यूँके मन्नै ओड़ैए जाह्वा लिकाड़ण का मन बणाया सै। 13 जेनास वकील अर अपुल्लोस जै सफर खात्तर आगै जावै, तो जो मदद थम उनकी कर सको तो वा जरूर करियो। 14 इतणाए न्ही बल्के तू बिश्वासियाँ नै यो सीखा, के वो अपना ध्यान कड़ी मेहनत करण म्ह लगावै, ताके उन

माणसां खात्तर जिनके धोरे सै कोनी उनकी जरूरत पूरी हो सकै, अर वे एक आच्छे मकसद के साथ जिन्दगी जी सकै। 15 मेरे सारे साथियाँ की ओड़ तै तेरे ताहीं नमस्कार। जो बिश्वास के कारण म्हारे तै प्यार करै सै, उननै भी नमस्कार। थारे सारया पै परमेसवर का अनुग्रह होंदा रहवै।

फिलेमोन

1 या चिट्ठी मुझ पौलुस, की ओड़ तै सै, जो मसीह यीशु का कैदी सै। हे फिलेमोन, मेरी अर बिश्वासी भाई तीमुथियुस की ओड़ तै तन्नै नमस्कार। तू म्हारा प्यारा मित्र अर मसीह के काम करण म्ह म्हारा साइड़ीदार सै। 2 मै भाण अफफिया, अर अरखिप्पुस तार्हीं जो परमेसवर की सेवा एक सिपाही की तरियां करण लागरया सै, अर उस कलीसिया नै भी लिखूँ सूँ, जो फिलेमोन के घर म्ह कठी हो सै। 3 मै प्रार्थना करूँ सूँ, के म्हारे पिता परमेसवर अर प्रभु यीशु मसीह की ओड़ तै थमनै अनुग्रह अर शान्ति मिलती रहवै। 4 मै जिब भी थारे खात्तर प्रार्थना करूँ सूँ, तो मै सारी हाण थारे खात्तर परमेसवर का धन्यवाद करूँ सूँ। 5 मै प्रभु यीशु मसीह पै थारे बिश्वास अर परमेसवर के पवित्र माणसां के प्रति प्यार के बारे म्ह सुणदा रूँ सूँ। 6 मै प्रार्थना करूँ सूँ, के जो बिश्वासियाँ गैल थारी साइड़ेदारी सै, उन भली चिज्जां के जाणण के जरिये जो परमेसवर नै म्हारे तार्हीं दी सै, वा और घणी बढ़ती जावै। अर या म्हारे मसीह की महिमा खात्तर हो। 7 क्यूँके हे बिश्वासी भाईयो, मै भोत खुश सूँ, अर मेरे प्रति थारे प्यार तै मै घणा उत्साहित सूँ, अर इस कारण पवित्र माणसां नै घणी खुशी मिली सै। 8 जो हक मेरे तार्हीं मसीह नै दिया सै, उसकी बजह तै मै थमनै हुकम दे सकूँ सूँ, के थमनै के करण की जरूरत सै, पर मै इसा कोनी करूँ, मै पौलुस, बुजुर्ग माणस होण के नाते अर मसीह यीशु का कैदी होण के कारण थारे तै प्यार तै बिनती करूँ सूँ। 10 मेरी बिनती या सै के उनेसिमुस जो मेरे बाळक की तरियां सै, वो मसीह म्ह मेरा आत्मिक बेटा जिब बणया जिब मै कैद म्ह था, थम उसपै दया करियो। 11 वो तो पैहला तेरे किमे काम का ना था, पर इब तेरे अर मेरे दोनुआ के खात्तर बड़े काम का सै। 12 उरसे नै यानी जो मेरे दिल का टुकड़ा सै, मै तेरे धोरे भेज्जू सूँ। 13 उसनै मै अपणे ए धोरे राखणा चाहूँ था, ताके वो तेरी जगहां मेरी मदद कर सके, जिब के मै मसीह का सुसमाचार सुणाण के खात्तर कैद म्ह सूँ। 14 पर मन्नै तेरी इच्छा बगैर कुछ भी न्ही करणा चाह्या। मै चाहूँ था के तू मेरी मदद मजबूरी म्ह न्ही पर खुद की इच्छा तै खुशी तै करै। 15 हो सकै सै के परमेसवर नै उनेसिमुस तार्हीं, तेरे तै इस करके थोड़े बखत खात्तर दूर जाण का मौक्का दिया, ताके वो मसीह पै बिश्वास कर सके, अर उसकी बजह तै तू सदा खात्तर उसनै पा लेवै। (aiōnios g166) 16 पर इब वो तेरा दास ए कोनी बल्के दास तै भी बढ़कै, यानी बिश्वासी भाई सै। मै उसतै भोत प्यार करूँ सूँ, पर इब तू मेरे तै भी ज्यादा उसतै प्यार कर, दास की तरियां न्ही, पर बिश्वासी भाई की तरियां। 17 इस करके जै तू मन्नै अपणा साइड़ीदार समझै सै, तो उनेसिमुस जिब थारे धोरे बोहड़ के आवेगा, तो उसनै प्यार तै अपणा लियो, जिस तरियां थम मन्नै अपणाओ सों। 18 जै उसनै तेरा कुछ भी नुकसान करया सै, या उसपै तेरा कुछ कर्ज सै, तो आकै दे दियुँगा। 19 मै पौलुस अपणे हाथ तै लिखूँ सूँ, के उसका कर्जा मै आप दे दियुँगा, तू खुद जाणै सै, जै मै

तेरी मदद न्ही करदा, तो तन्नै नई जिन्दगी न्ही मिलती, इस करके तू जिन्दगी भर मेरा कर्जदार सै। 20 हे मेरे प्यारे भाई, मेरे खात्तर योए कर क्यूँके हम बिश्वासी भाई सां, अर तेरे इसा करण तै मै मसीह म्ह उत्साहित हो जाऊँगा। 21 मै तेरे पै भरोस्सा करके तेरे तै लिखूँ सूँ, अर या जाणु सूँ के जो कुछ मै कहूँ सूँ, तू उसतै घणा बढ़कै करैगा। 22 अर या भी कै मेरे खात्तर रुकण की जगहां तैयार राकखै। मन्नै उम्मीद सै, के परमेसवर थारी प्रार्थनायां का जवाब देवैगा, अर मै थारे धोरे आकै थमनै देख पाऊँगा। 23 इपफ्रास, जो मेरे गैल जेळ म्ह कैद सै, क्यूँके वो यीशु मसीह की सेवा करै सै थारे तार्हीं नमस्कार कहवै सै। 24 अर मरकुस, अरिस्तर्बुस, देमास अर लूका जो मेरे गैल परमेसवर का काम करणीये सै, इनका भी तेरे तार्हीं नमस्कार। 25 मै प्रार्थना करूँ सूँ, के म्हारे प्रभु यीशु मसीह का अनुग्रह थारे साथ होंदा रहवै। आमीन।

इब्रानियों

1 पैहल्ले युग म्ह परमेसवर नै म्हारे पूर्वजां तै भोत बार अर अलग-अलग ढाळ तै नबियाँ के जरिये बात करी। 2 पर इन आखरी के दिनां म्ह म्हारे तै, अपणे बेटे के जरिये बात करी। परमेसवर नै सारी सृष्टि की रचना अपणे बेटे के जरिये करी अर उसने उस ताहीं सारी चिज्जां का वारिस बणाया। (aiōn g165) 3 बेट्टा ए परमेसवर की महिमा का चाँदणा सै अर उस म्ह हम देख्खां सां, के वो किसा सै, अर सारी चिज्जां नै अपणे शक्तिशाली हुकम तै सम्भाळै सै। वो माणसां के पापां की माफी का कारण बणया, अर ऊँच्या जगहां पै महिमामय कै सोळी ओड़ जा बेठ्या, 4 इसा करण तै सुर्गदूतां तै उतनाए बढिया ठैहराया, जितना उसनै बड़े ओद्दे का उसका पद सुर्गदूतां तै ऊँच्या ठैहराया। 5 क्यूँके परमेसवर नै कदे किसे सुर्गदूत तै न्ही कह्या, के “तू मेरा बेट्टा सै, आज मै घोषणा करूँ सूँ के, तू मेरा बेट्टा सै” अर सुर्गदूतां म्ह तै उसनै कद किसे तै कह्या, के “मै उसका पिता होऊँगा, अर वो मेरा बेट्टा होवैगा?” 6 अर जब परमेसवर नै अपणे जेठे बेट्टे ताहीं इस दुनिया म्ह भेज्या, तो कहवै सै, “परमेसवर के सारे सुर्गदूत उस ताहीं मोध्थे मुँह पड़के प्रणाम करै।” 7 अर सुर्गदूतां के बारे म्ह न्यू कहवै सै, “वो अपणे सुर्गदूतां ताहीं हवा, अर अपणे सेवकां नै भडकदी होई आग बणावै सै।” 8 पर बेट्टे के बारे म्ह कहवै सै, “हे परमेसवर, उसका राज युगायुग रहवैगा, तेरे राज्य का राजदण्ड न्याय का राजदण्ड सै। (aiōn g165) 9 तन्नै धर्म तै प्यार अर अधर्म तै बैर राख्या, इस कारण परमेसवर, तेरे परमेसवर नै, तेरे साथियाँ तै बढके हर्षरूपी तेल तै तेरा अभिषेक करया।” 10 अर यो के, “हे प्रभु, शरूआत म्ह तन्नै धरती अर जो कुछ अकास म्ह सै उन ताहीं बणाया, अर सुर्ग तेरे हाथ्थां की कारीगरी सै। 11 वे तो नाश हो जावैगे, पर तू सदा खात्तर जिन्दा रहवैगा, अर वे सारे लत्ते की ढाळ पुराणे हो जावैगे, 12 अर तू उन ताहीं चादर की तरियां लपेटेगा, अर वे लत्ते की ढाळ बदल जावैगे पर तू कदे न्ही बदलैगा, अर तू सदा खात्तर जिन्दा रहवैगा।” 13 अर सुर्गदूतां म्ह तै उसनै किसतै कद कह्या, “तू मेरे सोळी ओड़ बैठ, यानी के तू हक की जगहां पै बैठ। जब ताहीं के मै तेरे बैरियाँ नै पूरी तरियां तै हरा ना हूँ?” 14 के वे सारे परमेसवर की सेवा-पाणी करण आळी आत्मा कोनी, जो उद्धार पाण आळा के खात्तर मदद करण नै भेजी जावै सै?

2 इस करके म्हारे ताहीं जो कुछ सिखाया गया था उसका पालन करण खात्तर हमनै और सावधान रहणा चाहिए। तब हम सच्चाई तै दूर न्ही जावांगे। 2 क्यूँके जो वचन सुर्गदूतां के जरिये कह्या गया था। जब वो सच साबित होया अर हरेक अपराध अर हुकम ना मानण का परमेसवर नै उन ताहीं दण्ड दिया। 3 तो हम माणस इसे महान् उद्धार नै अणदेखा करके किस तरियां बच सकां सां? इस महान् उद्धार की पैहली बार प्रभु यीशु नै घोषणा करी थी, अर जिन चेल्यां नै उस ताहीं सुणया, तो चेल्यां नै म्हारे ताहीं साबित करके दिखा दिया के यो सच सै। 4 अर गेल्या ए

परमेसवर भी अपनी मर्जी के मुताबिक चमत्कार, अर अनोक्खे काम्मां, अर कई ढाळ के सामर्थ के काम्मां, अर पवित्र आत्मा के वरदान्नां के बांडण के जरिये इन बातां नै सच साबित करदा रहया। 5 उसनै उस आण आळी दुनिया ताहीं जिसका जिक्र हम करण लागरे सां, सुर्गदूतां के अधीन न्ही करया, पर अपणे बेट्टे के अधीन कर दिया। 6 पवित्र ग्रन्थ म्ह किते, किसे नै परमेसवर तै यो कह्या सै, के “माणस के सै के तू उसकी सुधि लैवै सै? या माणस का बेट्टा के सै, के तू उसकी फिक्र करै सै? 7 तन्नै उस ताहीं सुर्गदूतां तै थोड़ा ए कम महत्वपूर्ण बणाया, तन्नै उस ताहीं राजा की तरियां महिमा अर सम्मान दिया, अर सब किमे उसके अधीन कर दी। 8 तन्नै उस ताहीं सारी चिज्जां पै हक दिया।” इसा लागै सै के परमेसवर नै सारा कुछ उसके अधीन कर दिया सै, उरै ताहीं के कुछ भी न्ही बचा जो उसके अधीन ना हो, पर हम देख सका सां, के सारी चिज्जेँ उसके अधीन म्ह न्ही। 9 पर हम यो देख्खां सां, के यीशु ताहीं कुछ बखत खात्तर सुर्गदूतां तै कम करया गया था, ताके परमेसवर के अनुग्रह तै वो हरेक किसे खात्तर मर सकै, क्यूँके उसनै दुख ठाया अर मर गया, इस करके परमेसवर नै उस ताहीं महिमा अर सम्मान दिया। 10 परमेसवर नै जो कुछ भी बणाया सै, वो सारा अपणे खात्तर सै, अर उस ताहीं योए आच्छा लाग्या के जब वो भोत सारे माणसां ताहीं अपनी महिमा म्ह साँझा करै, तो यीशु मसीह जो उनका उद्धारकर्ता सै, उसके दुख ठाण कै जरिये उन ताहीं सिध्द बना लैवैगा। 11 क्यूँके जो माणसां नै उनके पाप तै साफ करै सै, अर जिन माणसां के पाप साफ होण लागरे सै, दोन्नु एक ए पिता परमेसवर की ऊलाद सै, इस्से कारण वो उनने भाई-भाण कहण तै कोनी सरमान्दा। 12 अर वो (मसीह) परमेसवर तै कहवै सै, “मै अपणे भाईयाँ ताहीं बताऊँगा के तन्नै मेरे खात्तर कितने भले काम करे सै, अर जब आराधना करण खात्तर मण्डली म्ह कठ्ठे होंगे तो मै तेरी महिमा करूँगा।” 13 अर वो दुबारा कहवै सै, के मै उन माणसां के साथ सूँ, “जो परमेसवर नै मेरे ताहीं दिए सै।” 14 ज्यातै जब के परमेसवर के बच्चे सै, जो के माँस अर लहू तै बणे सै, अर उसका बेट्टा (यीशु मसीह) भी इन्सान बणया, इस करके वो एक इन्सान के रूप म्ह ए मर सकै था, अर सिर्फ मरण तै ए वो शैतान की शक्ति नै तोड़ सकै था, जिसके धोरै मौत की शक्ति थी। 15 अर इस तरियां यीशु नै उन सारे माणसां ताहीं मुक्त कर दिया जो हर बखत गुलाम्मां की तरियां जीवै थे, अर वे मरण तै उरै थे। 16 क्यूँके मसीह यीशु तो सुर्गदूतां ताहीं न्ही बल्के अब्राहम की पीढ़ी नै सम्भाळै सै। 17 इस कारण उस ताहीं चाहिये था, के वो हर बातां म्ह बिश्वासी भाईयाँ की तरियां बणै, ताके वो परमेसवर का महायाजक बण सकै, जो दयालु अर बिश्वास जोगगा सै, अर वो माणसां के पापां की माफी खात्तर खुद नै बलिदान कर सकै। 18 क्यूँके यीशु का इम्तिहान हो लिया अर उसनै खुद दुख ठाया सै, इस करके वो इम्तिहान म्ह पड़े होए माणसां की मदद कर सकै सै।

3 ज्यांतै हे विश्वासी भाईयो, थम जो परमेसवर के कुहाओ सों, सुर्ग म्ह साइझी होण खात्तर बुलाये गये सों, यीशु पै ध्यान द्यो, जो म्हारे खात्तर परमेसवर की ओड़ तै भेज्जा गया प्रेरित अर महायाजक सै, जिसपै हम बिश्वास करा सां। 2 यीशु परमेसवर कै प्रति वफादार था, जिस ताहीं उसने नियुक्त करया था, जिसा मूसा नबी नै भी वफादारी तै पूरा काम करया जो भी परमेसवर नै उस ताहीं करण खात्तर कह्वा था। 3 जिसा के घर बणाण आळ्हे माणस नै घर तै बढ्कै सम्मान मिलै सै। इस्से तरियां यीशु मूसा नबी तै घणा सम्मान जोग्गा सै। क्यूँके हरेक घर का कोए ना कोए बणाण आळा होवै सै, पर जिसनै सारा किमे बणाया वो परमेसवर सै। 5 मूसा नबी तो परमेसवर के घर के माणसां खात्तर सेवक की तरियां बिश्वास जोग्गा रहया। के जो मूसा नबी नै करया था, वो दिखावै सै के परमेसवर आण आळा बखत म्ह के करण आळा सै। 6 पर परमेसवर के कुणबे म्ह मसीह, तो एक बेटे के रूप म्ह बिश्वास लायक सै, अर उस आस म्ह बिश्वास नै बणाए राख्वै सै, तो हमे उसका कुणबा सां। 7 जिसा परमेसवर अपने पवित्र आत्मा के जरिये कहवै सै, “जै आज थम परमेसवर की आवाज सुणो, 8 “तो अपने मन ताहीं कठोर ना करो, जिसा के छो दुवाण के बखत अर इम्तिहान के दिन जंगळ म्ह थारे पूर्वजां नै करया था। 9 थारे पूर्वजां नै चाळीस साल तक मेरे महान् काम देख्खण कै बाद भी चुनौती देन्दे होए मेरे ताहीं परख्खा था। 10 इस कारण मै उस बखत के माणसां तै गुस्सा रहया, अर कह्वा, “उननै मेरे पाच्छै चालणा न्ही चाह्वा, अर इसा करण तै इन्कार कर दिया जो मन्ने उन ताहीं करण का आदेश दिया था।” 11 फेर मन्ने छो म्ह आके कसम खाके कह्वा, के “उस आराम की जगहां म्ह थम बड़ण न्ही पाओगे, जित्त मै उननै आराम देऊंगा।” 12 हे विश्वासी भाईयो, चौक्कस रहो के थारे म्ह इसा बुरा अर अबिश्वासी मन ना हो, जिसतै थम जिन्दे परमेसवर तै दूर हो जाओ। 13 जिब भी थम पवित्र ग्रन्थ नै यो कहते सुणो, “आज का दिन” तो एक-दुसरे नै उत्साहित करते रहो, इसा ना हो पाप थारे ताहीं थोक्खा देवै, अर थम परमेसवर कै खिलाफ जिद्दी हो जाओ। 14 क्यूँके जै हम अन्त तक मजबुती कै साथ अपने शरूआती बिश्वास नै थाम्मे राख्खां सां, तो हम मसीह के साइझीदार बण जावां सां। 15 जिसा पवित्र ग्रन्थ कहवै सै, “जै आज थम परमेसवर का शब्द सुणो, तो अपने मनां नै कठोर ना करो, जिसा के छो दुवाण के बखत थारे पूर्वजां नै करया था।” 16 कौण थे वे माणस जिननै परमेसवर की आवाज सुणकै भी उस ताहीं छो दुवाया? ये वे माणस थे जिन ताहीं मूसा नबी मिस देश तै बाहर लेके गया था। 17 चाळीस साल तक परमेसवर ताहीं इन माणसां नै गुस्सा दुवाया, ये इस्राएल के माणस थे, जिननै मरुस्थल म्ह पाप करया अर वे मरगे, अर उनकी लाश जंगळ म्ह पड़ी रहीं? 18 अर जिब परमेसवर नै कसम खाई के “वे उस आराम की जगहां म्ह कदे न्ही बड़ पावेंगे, जित्त मै उननै आराम देऊंगा।” वो वास्तव म्ह उन माणसां के बारे म्ह बात करै था जिननै उसका बिरोध करया था। 19 इस बात तै हमनै यो बेरा लाग्या सै, के वे अपने अबिश्वास कै कारण बड़ न्ही सके।

4 इस करके परमेसवर नै म्हारे ताहीं वादा करया सै, के हम आराम की जगहां पै जावेंगे, क्यूँके आराम की जगहां म्ह बड़ण का वादा इब भी सै, तो हमनै भोत सावधान रहणा चाहिए, इसा ना हो के थारे म्ह तै कोए माणस आराम की जगहां जाण म्ह नाकामयाब हो जा, जिस ताहीं देण का वादा परमेसवर नै म्हारे ताहीं करया सै। 2 जिस तरियां हमनै यीशु मसीह के बारे म्ह सुसमाचार सुणया, अर उन इस्राएल के माणसां नै भी जिन नै आराम की जगहां म्ह बड़ण के बारे म्ह सुसमाचार सुणया पर उननै उस सुसमाचार पै बिश्वास न्ही करया, इस कारण उनके खात्तर संदेश बेकार ठेहराया। 3 पर म्हारे ताहीं जो परमेसवर नै कह्वा सै, हम उसपै भरोस्सा करां सां, अर हम आराम की जगहां म्ह बडांगे। जिसा औरां खात्तर परमेसवर नै कह्वा सै, “मन्ने अपने छो म्ह कसम खाई के वे मेरी आराम की जगहां म्ह बड़ण न्ही पावेंगे।” फेर भी उसके काम दुनिया के बणाण तै पैहल्याए पूरे हो लिए थे। 4 क्यूँके सातमै दिन कै बारे म्ह परमेसवर नै पवित्र ग्रन्थ म्ह न्यू कह्वा सै, “परमेसवर नै सातमै दिन अपने सारे काम्मां ताहीं निपटा कै बिश्राम करया।” 5 हमनै यो भी पढ़या के उसनै बाद म्ह कह्वा, के “वे मेरे आराम की जगहां म्ह बड़ण न्ही पावेंगे।” 6 इस्राएल के वे माणस जिन ताहीं सुसमाचार सुणाया गया था, वो आराम की जगहां म्ह बड़ण म्ह नाकामयाब रहे, क्यूँके उननै परमेसवर के हुकम ताहीं कोनी मान्या था, पर उस आराम की जगहां म्ह जाण का इब भी मौक्का सै। 7 ज्यांतै उसनै आराम की जगहां म्ह बड़ण का एक और मौक्का तय करया, अर वो मौक्का आज सै। म्हारे पूर्वजां के बिद्रोह के कई साल्लां बाद, दाऊद के मुँह तै यो कह्वा था, “जै आज थम उसकी आवाज सुणो, तो उस ताहीं सुणके इन्कार ना करो।” 8 हम यो भी जाणा सां के परमेसवर नै जो आराम की जगहां का वादा करया सै, वो कनान देश कोनी, जिसपै यहोशू नै म्हारे पूर्वजां की अगुवाई करी थी, जै यो कनान देश होन्दा, तो परमेसवर नै बाद म्ह यो न्ही कह्वा होगा, के एक और मौक्का सै। 9 यो भी हो सकै सै, के परमेसवर के माणसां नै इस तरियां के तरिककें तै आराम करणा पडै, जिस तरियां तै परमेसवर नै दुनिया बणाण के सातवे दिन आराम करया था। 10 क्यूँके जो उसके आराम की जगहां म्ह बड़या सै, उसनै भी परमेसवर की ढाळ अपने काम पूरे करके बिश्राम करया सै। 11 इस करके हम उस आराम की जगहां म्ह बड़ण की कोशिश बड़ी मेहनत के साथ करा, ताके कोए भी उन माणसां की तरियां ना बणे जिननै परमेसवर के हुकम ताहीं मानण तै इन्कार कर दिया, फेर हम उसकी आराम की जगहां म्ह बड़ण पावांगे। 12 क्यूँके परमेसवर का वचन जिन्दा, अर प्रभावशाली सै, अर वो एक दोधारी तलवार तै भी घणा पैना सै। वो प्राण अर आत्मा ताहीं, अर गाँठ-गाँठ अर गुदे-गुदे ताहीं न्यारा करके आराम-पार पाड़ दे सै अर मन की भावनायां अर विचारां ताहीं परख ले सै। 13 जिस ताहीं लेखा देणा सै, उसकी नजर तै कोए भी प्राणी छुप्या कोनी। सारी चीज उसके स्याम्ही साफ अर खुली होइ सै। 14 ज्यांतै जिब म्हारा इसा बड़्वा महायाजक सै, जो सुर्ग म्ह चल्या गया सै, यानिके परमेसवर का बेट्टा

यीशु, तो आओ, हम विश्वास मह पक्के बणे रहवां जो हमनै सारे माणसां के आगमै स्वीकार करया सै। 15 क्यूँके म्हारा यो महायाजक जो यीशु मसीह सै, म्हारी हरेक कमजोरियाँ नै जाणे सै, बल्के वो सारी बात्तां मह म्हारै तरियां परख्या तो गया, फेर भी निष्पाप लिकइया। 16 इस करकै आओ, हम परमेसवर के स्याम्ही बिना डर के जावां जो करुणा तै भरा होया सै, फेर परमेसवर म्हारै पै दया करैगा, अर जिब हमनै मदद की जरूरत होगी तो वो म्हारी मदद करैगा।

5 परमेसवर इस्राएल के माणसां मह तै एक महायाजक ताहीं चुणै सै, अर वो महायाजक ताहीं नियुक्त करै सै, ताके वो उसकी सेवा भेट चढ़ाके, अर माणसां के पापां की माफी कै खात्तर बलि चढ़ाके कर सकै। 2 वो बेअक्ले अर भूले भटक्यां कै गेल्या नर्मी तै बरताव कर सकै सै, ज्यातै वो आप भी कमजोरी तै धिरया सै। 3 उसके खात्तर एक महायाजक के रूप मह अपने अर माणसां कै पापां नै दूर करण खात्तर बलि चढ़ाणा जरूरी सै। 4 कोए भी इन्सान अपने-आपनै तै महायाजक होण का पद न्ही ले सकता। एक माणस सिर्फ महायाजक जिब्बे बण सकै सै, जिब परमेसवर उस ताहीं याजक होण कै खात्तर बुलावै सै, जिस तरियां हारून ताहीं परमेसवर नै पैहला महायाजक होण खात्तर बुलाया था। 5 उससे तरियां ए मसीह नै भी खुद ताहीं महायाजक बणाके खुद का सम्मान करण का फैसला कोनी करया, परमेसवर नै उस ताहीं यो सम्मान दिया जिब उसने कह्या, के “तू मेरा बेटा सै, आज मनै ए तेरे ताहीं पैदा करया सै।” 6 एक और जगहां परमेसवर उस ताहीं दुबारा कहवै सै, “तू मलिकिसिदक की रीत पै सारी हाण खात्तर याजक सै।” (aiōn g165) 7 जिब यीशु इस दुनिया मह रहवै था, तो ठाडू शब्दां तै रुक्का मार-मारकै अर आँसू बहा-बहाके परमेसवर तै प्रार्थनाएँ अर बिनती करी, जो उस ताहीं मौत तै बचा सकै था, अर आदरपूर्ण समर्पण के कारण परमेसवर नै उसकी सुण ली। 8 परमेसवर का बेटा होण पै भी मसीह यीशु नै दुख ठा-ठाकै भी उसका हुकम मानना सिख्या। 9 फेर सिध्द हो जाणके बाद वो खुद उन सब खात्तर, जो उसके हुकमां नै मानणीयां कै खात्तर अनन्त काल के उद्धार का कारण बणगया। (aiōnios g166) 10 अर उस ताहीं परमेसवर की ओड़ तै मलिकिसिदक की रीत पै महायाजक का पद मिल्या। 11 इसकै बारे मह हमनै घणीए बात कहणी सै, पर उनके बारे मह खुलकै जिक्र करणा मुशकल सै, क्यूँके थम परमेसवर के वचन के बारे मह जाणण खात्तर आलसी होगे सों। 12 बखत कै विचार तै तो थमनै शिक्षा देण आळा बण जाणा चाहिए था, पर थमनै तो इब भी इसे माणस की जरूरत सै, जो थारे ताहीं नये सिरे तै परमेसवर की शिक्षा की शुरुआती बात ए सिखावै, थम तो इब्बे भी उन छोट्टे बाळक की ढाळ सों, जिन ताहीं दूध चाहिए, पर भारी खाणा न्ही। 13 याद राक्खों जो माणस इब भी वचन की शुरुआती शिक्षा नै सीखण लागरे सै, वे न्ही जाणदे, के परमेसवर धर्मी बणण के बारे मह के कहवै सै, वो दूध पीन्दे बाळक की तरियां सै। 14 पर जिस माणस की तुलना श्याणे

माणस तै करी जा सै, जो ठीक तै खाण चबा-चबा कै खा सकै सै, वो यो माणस सै जिसका विश्वास पक्का सै अर जो खरी शिक्षा नै समझ सकै सै, उसनै आच्छे अर बुरे की पिच्छाण करणा सीखा लिया सै।

6 इस करकै जिब म्हारे ताहीं मसीह के बारे मह शरु मह सिखाया गया था, तो आओ हम उन ताहीं छोड़ के खरी शिक्षा पै चर्चा करण खात्तर आगमै बढदे जावां। शरुआती शिक्षा जिसा पाप तै भरे काम तै जो मौत नै लेके आवै सै, परमेसवर पै विश्वास करण नै नीम की तरियां ना धरो, 2 अर बपतिस्मा अर हाथ धरण, अर मरे होया के जिन्दा उठण, अर आखरी न्याय की शिक्षा रूपी नीम दुबारा ना बणावां। (aiōnios g166) 3 जै परमेसवर नै चाह्या तो मै थमनै खरी शिक्षा दिऊँगा। 4 क्यूँके जो माणस अपने विश्वास नै खो दे सै, तो उन ताहीं फेर तै पश्चाताप करण कै खात्तर उलटा न्ही ल्याया जा सकता। एक बार उननै परमेसवर की सच्चाई नै जाणा अर सुर्ग तै वरदानां ताहीं पाया, अर बाकियाँ की तरियां पवित्र आत्मा भी पाया। 5 अर उननै अनुभव करया था के परमेसवर का वचन आच्छा सै, अर वे परमेसवर की आण आळी शक्ति का अनुभव कर चुके थे। (aiōn g165) 6 उननै फेर तै उल्टा ल्याण का कोए तरिकका कोन्या, क्यूँके वे परमेसवर के बेटे ताहीं अपने खात्तर दुबारा क्रूस पै चढ़ावें सै, अर सबके स्याम्ही उसपै कलंक लगावै सै। 7 जिन माणसां नै आच्छी शिक्षा मिलै सै, वे उस जमीन की तरियां सै, जित्त बारिस होन्दी ए रहवै सै, जै जमीन बढ़िया सै, तो या किसान खात्तर बढ़िया फसल देवै सै, अर उसपै परमेसवर की आशीष होवै सै। 8 पर दुसरे माणस उस जमीन की तरियां सै जो काण्डे अर खरपतवार उगावै सै तो या बेकार सै। उस ताहीं परमेसवर के जरिये श्राप दिये जाण का खतरा सै, अर वो आग तै नाश हो जावैगा। 9 हे प्यारे भाईयो, भलाए हम इस ढाळ की बात करण लागरे सां, पर हम असलियत मह विश्वास न्ही करते के यो थारे खात्तर लागू होवै सै। हमनै विश्वास सै के थम बढ़िया चिज्जां खात्तर बणाये गये सों, जो उद्धार कै साथ आवै सै। 10 जिसा के थमनै आच्छे काम करे सै, अर इब थम परमेसवर के नाम मह बिश्वासी भाईयाँ कै खात्तर प्यार तै, सेवा के काम करण लागरे सों, इसकी बजह तै परमेसवर थारे ताहीं भुल्लैगा न्ही, क्यूँके वो धर्मी सै। 11 आलसी ना बणो। पर कड़ी मेहनत करण आळा की तरियां थमनै इन प्रेमपूर्वक काममां ताहीं जारी राखणा चाहिए, ताके परमेसवर के वादे पाण खात्तर थारी आस पक्की हो। 13 जिब परमेसवर नै अब्राहम तै करार करया, तो तब खुद परमेसवर तै बड़ड़ा कोए और न्ही था, जिसकी कसम ली जा सकै, इस करकै अपनी खुद की कसम लेन्दे होए परमेसवर नै अब्राहम तै कह्या, 14 “मै सचमुच तेरे ताहीं घणा आशीष दिऊँगा, अर तेरे वंशां नै अनगिणत बणा दिऊँगा।” 15 अब्राहम नै भोत धीरज धरण कै बाद वादा का ईनाम मिल्या। 16 माणस तो अपने तै किसे बड़े का नाम लेके कसम खाया करै सै, अर उन मह कसम के जरिये बात का फैसला होवै सै, अर सारा विवाद खतम हो जावै सै। 17 योए कारण था, के परमेसवर नै भी कसम खाई थी। इस बात तै वो उन

माणसां नै साफ तरियां तै दिखाणा चाहवै था, के वो जो भी वादा करै सै, उस ताहीं वो पूरा करै सै। 18 तो उरै दो बात सै उसका वादा अर उसकी कसम जो कदे बदल नही सकदे अर जिनके बारै म्ह परमेसवर कदे झूठ कोनी बोल सकता। इस करके हम जो परमेसवर कै धोरै बचण आये सां अर जो आस उसनै म्हारे ताहीं दी सै उस ताहीं थाम्मे होए घणे उत्साहित सां। 19 जिस तरियां किस्ती ताहीं लंगर तै बाँधया जावै सै, जो किस्ती नै पकड़के राक्खै सै, इस्से तरियां तै आस म्हारी जिन्दगी नै मजबूत अर टिकाए राक्खै सै, अर म्हारी आस यीशु सै, वो परमेसवर कै धोरै सुरग म्ह पवित्र मन्दर म्ह परदे कै पाच्छे पोहचा सै। 20 जित्त यीशु नै मलिकिसिदक की रीत पै सारे हाण के बखत का महायाजक बणके, म्हारे खात्तर अगुवां के रूप म्ह दाखल होया सै। (aiōn g165)

7 यो मलिकिसिदक शालेम नगर का राजा अर परमप्रधान परमेसवर का याजक था, उनके नाम का मतलब “राजा” सै जो नियम कै साथ न्याय करै सै, शालेम के राजा का मतलब सै “शान्ति का राजा।” 2 पवित्र ग्रन्थ म्ह उसके माँ-बाप, उसके पूर्वज, या उसकी मौत या जन्म के बारे म्ह, कुछ भी नही लिख्या गया सै। वो हमेशा खात्तर एक याजक सै। इस करके वो परमेसवर के बेटे की तरियां सै। 3 जित्त अब्राहम नै चार राजां की हत्या कर दी थी, तो मलिकिसिदक नै उसतै मुलाकात करी, अर उस ताहीं आशीर्वाद दिया। अब्राहम नै युध्द म्ह जीत हासिल करी, अर सारी चिज्जां का दसमां हिस्सा भी दिया। 4 इब इसपै ध्यान करो के वो किसा महान् था जिस ताहीं पूर्वज अब्राहम नै दुश्मनां की लूट के बढ़िया तै बढ़िया माळ का दसमां हिस्सा दिया। 5 मूसा नबी के नियम-कायदे बतावै सै के लेवी के वंशज जो याजक का पद पावै सै, उननै इस्राएल के माणसां तै दसमां हिस्सा लेणा चाहिए, यानिके उसके खुद के माणस तै, पर वे याजक अर दुसरे बिश्वासी भाईयाँ की तरियां सै, क्यूँके वे सब अब्राहम के वंश के सै। 6 पर इसनै, जो लेवी-वंशी भी नही था, अब्राहम तै दसमां हिस्सा लिया, फेर भी अब्राहम वो था जिसके धोरै परमेसवर का वादा था, फेर भी मलिकिसिदक नै उस ताहीं आशीर्वाद दिया। 7 इस म्ह कोए शक कोनी के जो आशीर्वाद देवै सै, वो उस माणस तै बड्डा हो सै जिस ताहीं आशीर्वाद देवै सै। 8 उरै तो याजक दसमां हिस्सा लेवै सै, भलाए वो सिर्फ एक माणस सै, जो जीवै सै अर फेर मर जावै सै, पर मलिकिसिदक, जिसनै अब्राहम तै दसमां हिस्सा लिया, वो इब भी जिन्दा सै, जिसा के पवित्र ग्रन्थ कहवै सै। 9 के जित्त अब्राहम नै मलिकिसिदक ताहीं दसमां हिस्सा दिया, जित्त ताहीं लेवी माणसां का जन्म अब्राहम के वंश म्ह नही होया था। पर इब भी उसके वंश होण के कारण, यो इस तरियां सै के लेवी नै खुद ही अब्राहम के जरिये मलिकिसिदक ताहीं दसमां हिस्सा दिया। 10 क्यूँके जिस बखत मलिकिसिदक उसके पिता तै मिल्या, उस बखत वो अपने पिता की देह म्ह था। 11 माणसां ताहीं जिन याजकां के आधार पै नियम-कायदे दिए गये थे, जो हारून के परिवार का अर लेवी के गोत्र का था, पर ये याजक सिध्द नही बण सकै। इस करके यो जरूरी था, के एक और याजक

आवै, जो हारून जिसा नही, पर मलिकिसिदक जिसा हो। 12 क्यूँके इब एक्के तरियां का याजक कोनी, तो नियम-कायदे का भी बदलना जरूरी सै। 13 क्यूँके हम मसीह के बारे म्ह ये बात करण लागरे सां, जो एक अलग गोत्र तै थे। उस जनजाति म्ह तै किसे नै भी वेदी पै एक याजक के रूप म्ह सेवा नही करी, 14 सब जाणै सै, के म्हारा प्रभु यीशु यहूदा के गोत्र म्ह तै पैदा होया सै, मूसा नबी नै यहूदा के किसी भी वंशज के बारे म्ह नही बताया, जो यहूदा के याजक बणगे अर यहूदा का कोए वंशज कदे याजक नही बणा। 15 इब हम और भी आच्छी तरियां तै समझा सां, जित्त मलिकिसिदक के तरियां एक और याजक पैदा होण आळा था, जो के यीशु मसीह सै। 16 यीशु का याजक बणणा, नियम-कायदा नै पुगाण पै, या लेवी के वंश म्ह तै पैदा होण पै आधारित कोनी। पर वो अपने अविनाशी जीवन की शक्ति के कारण याजक बणग्या। 17 क्यूँके उसके बारे म्ह पवित्र ग्रन्थ कहवै सै, “तू मलिकिसिदक की रीत पै युगानुयुग याजक सै।” (aiōn g165) 18 इस करके, पैहलडी आज़ा कमजोर अर बेअसर होण के कारण बदलगी। 19 (ज्यांते के नियम-कायदे नै किसे बात ताहीं सिध्द कोन्या करया), अर उसकी जगहां पै एक बेहतर उम्मीद सै, जो के यीशु मसीह सै, जिसके जरिये हम परमेसवर कै लोवै जा सकां सां। 20 जित्त यीशु मसीह ताहीं परमेसवर नै याजक बणा दिया तो परमेसवर नै कसम खाई। 21 क्यूँके लेवी के वंश तो बिना कसम याजक बणाए गये, पर यीशु मसीह बिना कसम के परमेसवर की ओड़ तै नियुक्त करया गया, जिसनै उसके बारे म्ह कहा, “प्रभु नै कसम खाई, अर उसतै फेर ना पछतावेगा के तू युगानुयुग याजक सै।” (aiōn g165) 22 इस करके यीशु नै म्हारे ताहीं परमेसवर के गैल सब तै आच्छे करार का वादा करै सै। 23 यीशु के याजक होण का एक और फायदा सै, पैहले तो घणी बड्डी गिणती म्ह याजक बणदे आये, क्यूँके हरेक याजक की मौत के साथ उसकी सेवा खतम हो जावै थी। 24 यीशु युगानुयुग जिन्दा रहवै सै, इस कारण उसके याजक का पद कोए नही ले सकता। (aiōn g165) 25 इस्से खात्तर जो यीशु कै जरिये परमेसवर कै धोरै आवै सै, वो उनका पूरा-पूरा उद्धार कर सकै सै, क्यूँके वो उनके खात्तर बिनती करण ताहीं सारी हाण जिन्दा सै। 26 इसाए महायाजक म्हारी जरूरतां नै पूरा कर सकै सै, जो पवित्र, अर बेकसूर, शुद्ध, अर पापमुक्त हो, अर सुरग तै भी जिस ताहीं ऊँचा करया होया हो। 27 जो महायाजक हारून के वंश तै सै, उसनै जरूरत कोनी के हरेक दिन पैहलया अपने पापां कै खात्तर बलिदान चढ़ावै, क्यूँके यीशु नै अपने-आप ताहीं बलिदान चढ़ाके उसनै एक ए बर म्ह पूरा कर दिया। 28 क्यूँके नियम-कायदे तो कमजोर माणसां ताहीं महायाजक नियुक्त करै सै, पर कसम जो नियम-कायदा के बाद आवै सै, उस बेटे नै नियुक्त करै सै जो युगानुयुग कै खात्तर सिध्द महायाजक सै। (aiōn g165)

8 इब जो बात हम कहण लागरे सां उन म्ह तै सारया तै बड्डी बात या सै म्हारे धोरै इस तरियां का महायाजक सै, जो सुरग पै महामहीम के सिंहासन कै सोळी ओड़ सै, 2 म्हारा महायाजक सब तै घणी पवित्र

जगहां अर उस सच्चे तम्बू (सुर्ग म्ह) काम करै सै, जो के माणसां के जरिये न्ही, परमेसवर के जरिये बणाया गया सै। 3 क्यूँके हरेक महायाजक पापां की माफी के खातर बलिदान अर भेंट चढ़ावै सै, इस कारण जरूरी सै के म्हारे महायाजक मसीह यीशु के धारे भी चढ़ाण खातर किमे हो। 4 जै वो धरती पै होंदा तो कदे भी याजक न्ही होंदा, ज्यांतै के मूसा के नियम-कायदे के मुताबिक भेंट चढ़ाण खातर याजक सै। 5 वे सुर्ग म्ह की चिज्जां के नकल अर छाया की सेवा करै सै, जिसा जिब मूसा नबी तम्बू बणाण पै था, तो उस ताहीं या चेतावनी मिली, “लखा, जो नमूना तेरे ताहीं पहाड़ पै दिखाया गया था, उसके मुताबिक सारा किमे बणाणा।” 6 पर जो काम यीशु ताहीं दिया गया सै, वो दुसरे याजकां तै दिए गये काम तै ज्यादा बाध सै, क्यूँके वो जिस करार का बिचौलिया सै, वो पुराणे करार तै बढ़िया सै, अर बढ़िया चिज्जां की कसमां पै आधारित सै। 7 क्यूँके जै वो पैहलड़ा करार बेकसूर होन्दा, तो दुसरे करार के खातर मौक्का ना टोहया जान्दा। 8 पर प्रभु उनपै दोष लाके कहवै सै, “प्रभु कहवै सै, लखाओ, वे दिन आवै सै के मै इस्राएल के माणसां के गेल्या, अर यहूदा के माणसां के गेल्या नया करार करूंगा। 9 यो उस करार की तरियां न्ही होवैगा, जिसा मन्ने उनके पूर्वजां के गेल्या उस बखत करया था, जिब मन्ने उनका हाथ मिस्र देश तै लिकाड़ ल्याण खातर पकडया था, क्यूँके प्रभु कहवै सै, के वे मेरे करार के बिश्वासी न्ही रहे, ज्यांतै मन्ने उनतै मुँह फेर लिया। 10 फेर प्रभु कहवै सै, के जो करार मै आण आळे दिनां म्ह इस्राएल के माणसां के गेल्या करूंगा, वो यो सै के मै अपने नियमां नै उनके मनां म्ह गेरूंगा, मै उन ताहीं अपने नियमां के बारे म्ह उननै याद दुआऊँगा, अर मै उनका परमेसवर ठहरूंगा अर वे मेरे माणस ठहरैगें। 11 अर हरेक अपने यहूदी भाई ताहीं अर अपने सगे-सम्बन्धी ताहीं या शिक्षा न्ही देवैगा, के तू प्रभु ताहीं पिच्छाण, क्यूँके छोट्टे माणसां तै लेके बड़े माणसां ताहीं सारे मन्ने जाण लेवैगें। 12 मै उनकी दुष्टता की ओड़ दया करूंगा, अर उनके पापां नै दुबारा याद कोनी करूंगा।” 13 परमेसवर नै इस ताहीं नया करार कह्या, इस करके उसनै पैहलड़े करार ताहीं पुराणा ठहरा दिया, जो चीज पुराणी अर घिसी होई सै उसका मिट जाणा जरूरी सै।

9 इब, उस पैहलड़े करार म्ह भी सेवा के नियम थे, अर इसी पवित्र जगहां थी, जो इस दुनिया की थी। 2 यानी के एक तम्बू बणाया गया जिस म्ह दो कमरे थे, पैहले कमरे म्ह दीवट, मेज अर मेज के उपर भेंट की चढ़ाई होई रोतियाँ थी, अर वा पवित्र जगहां कुहावै सै। 3 ओड़ै एक परदा था उस परदे के पाच्छे दुसरा कमरा था, जो परमपवित्र जगहां कुहावै सै। 4 उस दुसरे कमरे म्ह सोन्ने की धूपदानी, अर चौगरदेकै सोन्ने तै मन्ढया होया करार का सन्दूक था, अर उस म्ह मन्ना तै भरया होया सोने का मर्तबान भी था, अर हारुन की छड़ी जिस म्ह फूल फळ आ गये थे, अर करार की पत्थर की पटियाँ भी थी। 5 इसकै अलावा सन्दूक के उपर दोन्नु ओड़ तेजोमय करुब थे, जो प्रायश्चित के ढक्कण जिस ताहीं प्रायश्चित के दिन पापबलि के लहू तै छिड़क दिया जावै था।

इनका एक-एक करके जिक्र करण का इब्बै बखत न्ही सै। 6 ये चीज इस तरियां तै धरी गई थी। उस पैहलड़े कमरे म्ह परमेसवर की आराधना करण के खातर याजक हरेक दिन पैहले कमरे म्ह जाया करै था। 7 पर दुसरे कमरे म्ह यानी घणी पवित्र जगहां म्ह, सिर्फ महायाजक साल भर म्ह एक ए बर जावै सै, अर बलिदान के जानवर का लहू लिये जाया करै था, जिस ताहीं वो अपने खातर अर माणसां की भूल-चूक म्ह करया पापां खातर भेंट चढ़ावै सै। 8 इसतै पवित्र आत्मा योए दिखावै सै, के पुराणे करार के मुताबिक दुसरा कमरा यानी घणी पवित्र जगहां जो सुर्ग म्ह सै, जित्त परमेसवर रहवै था, ओड़ तक पुहचण का रास्ता बन्द था। 9 यो तम्बू आज के दिन का एक उदाहरण सै, जिस म्ह याजक भेंट अर बलिदान चढ़ावै सै, जिब माणस बलिदान की भेंट लेकै आवै थे, तो उनकी अन्तरात्मा समझ न्ही पावै थी, के इब उसके पाप माफ होए सै या न्ही। 10 क्यूँके ये उपहार अर बलिदान सिर्फ खाण-पीण की चिज्जां, अर कई ढाळ की शुद्ध करण की शारीरिक विधियाँ, तब तक थी, जिब तक परमेसवर कोए नई विधि न्ही देता। 11 पर जिब मसीह म्हारा महायाजक बणके आया, तो अपने साथ बढ़िया-बढ़िया चीज लेके आया जो इब भी मौजूद सै, जिब वो दिख्या तो वो परमेसवर की मौजूदगी म्ह चला गया, यो तम्बू हाथ का बणाया होया कोनी यानिके इस सृष्टि का कोनी। 12 जिब मसीह तम्बू म्ह चला गया तो वो सब खातर सब तै पवित्र जगहां म्ह दाखल होया, उसनै बलिदान के रूप म्ह बकरयां अर बाछड़याँ का लहू न्ही लिया, बल्के उसनै अपना लहू लिया, ताके हम अनन्त छुटकारा पा सकै। (aiōnios g166) 13 क्यूँके जै मूसा नबी के नियम-कायदा के मुताबिक जिब बकरयां अर बळथां का लहू अर बाछड़े की राख का अपवित्र माणसां पै छिड़के जाण की विधि के मुताबिक, अशुद्धता दूर हो जावै सै। 14 तो मसीह का बेकसूर लहू जो म्हारी अन्तरात्मा नै, म्हारे पाप, जो म्हारी मौत की बजह बणै सै, उनतै शुद्ध करै सै, ताके हम जिन्दे परमेसवर की आराधना कर सका। पवित्र आत्मा की शक्ति के जरिये मसीह नै म्हारे ताहीं अपने पापां खातर एक सम्पूर्ण बलिदान के रूप म्ह परमेसवर ताहीं अपने-आप ताहीं दे दिया। (aiōnios g166) 15 इस कारण मसीह परमेसवर अर माणसां के बीच म्ह नये करार का बिचोल्ला सै, ताके जो माणस परमेसवर के जरिये बुलाये गये सै, वो सनातन आशीषे पा सकै, जिसका परमेसवर नै वादा करया सै, क्यूँके पैहलड़े करार के अधीन रहन्दे होए जितने माणसां नै पाप करया, उन ताहीं छुड़ाण खातर यीशु नै अपनी जान दे दी। (aiōnios g166) 16 करार एक वसियत के समान हो सै। एक वसियत के नियम नै लागू करण खातर यो साबित करणा जरूरी होवै सै, के जिसनै वा वसियत बणाई हो, वो मर चुक्या हो। 17 क्यूँके एक वसियत जिब्बे लागू हो सकै सै, जिब उसके बणाण आळा की मौत होगी हो। वो जिब तक लागू न्ही होन्दी जिब ताहीं उसका बणाण आळा जिन्दा हो। 18 इस कारण पैहलड़ा करार का नियम जानवरां के लहू ताहीं बहाए जाण पै लागू होवै था। 19 क्यूँके जिब मूसा नबी सारे माणसां नै नियम-

कायदे का हरेक हुकम सुणा चुक्या तो उसनै बकरयां अर बाछड़याँ का लहू लेकै, पाणी म्ह मिला लिया अर लाल ऊन अर जूफा (झाड़ी) की छड़ी के गेल्या, उस नियम-कायदे की किताब अर सारे माणसां पै छिड़क दिया 20 अर कह्या, “के यो लहू परमेसवर के साथ करे गये करार नै पक्का करै सै, जिसका हुकम परमेसवर नै थारे खात्तर दिया सै।” 21 अर इस्से तरियां तै उसनै तम्बू अर सेवा के सारे समान पै लहू छिड़क्या, जित्त सारे माणस आराधना करण लागरे थे। 22 सच तो यो सै के नियम-कायदे के मुताबिक आमतौर पै सारी चीज लहू के जरिये शुद्ध करी जावै सै, मसीह नै जो लहू बहाया उसके बगैर पापां की माफी कोन्या। 23 यो जरूरी सै के तम्बू अर उसकी सारी चीज, जो सुर्ग की चिज्जां का हुबहू सै, इन जानवरां का लहू सै, जो शुद्ध करया जा, पर सुर्ग की चीज नै शुद्ध करण के खात्तर बढ़िया बलिदानां की जरूरत थी। 24 क्यूँके मसीह जिस पवित्र जगहां म्ह दाखल होया, वो माणसां के हाथ की बणाई होई न्ही थी, वो असली तम्बू की सिर्फ एक नकल सै, बल्के वो सीध्या सुर्ग गया अर इब म्हारी मदद करण खात्तर परमेसवर के साथ सै। 25 वो सुर्ग म्ह इस करके दाखल होया के माणसां के पापां के कारण बारबार अपणे-आपनै बलिदान करै, जिस तरियां महायाजक हरेक साल दुसरे का लहू लिए पवित्र जगहां म्ह दाखल होया करै था, 26 जै इसा करणा जरूरी था तो दुनिया की शरूआत तै लेकै इब तक उसनै बार-बार दुख ठाणा पड़दा, पर इब युग के आखरी म्ह वो एक ए बर जाहिर होया सै, ताके अपणे क्रूस पै बलिदान के जरिये पाप ताहीं दूर कर देवै। (aiōn g165) 27 अर जिस तरियां माणसां के खात्तर एक बर मरणा अर उसके पाछे न्याय का होणा तय सै, 28 उस्से तरियां ए मसीह भी माणसां के पापां की माफी खात्तर एक बर धरती पै आया अर सूळी पै अपणी जान दे दी, अर जो माणस उसकी बोहड़ण की बाट देखवै सै, उनके उद्धार के खात्तर दुसरी बर बिना पाप उठाए होए दिखेगा।

10 मूसा नबी के नियम-कायदे, आण आळी असली चिज्जां की छाया सै, पर ये वो आळी असली चीज कोनी, ज्यांतै नियम-कायदा की विधि के मुताबिक बलिदानां के जरिये जो हरेक साल हर बार चढ़ाए जावै सै, बलिदान चढ़ाण आळा, कदे भी माणसां नै पूरी तरियां तै शुद्ध न्ही कर सकदा। 2 जै बलिदानां के जरिये माणस पूरी तरियां शुद्ध हो जावै, तो उनका चढ़ाणा बन्द क्यांतै न्ही हो जान्दा? बलिदान करण आळा, आराधना करण आळा अर सेवा करण आळे एक ए बर शुद्ध हो जान्दे, तो उनका बलिदान चढ़ाण पै भी उनका मन उन ताहीं क्यूँ कहवै सै, के वे पापी सै। 3 उनके जरिये चढ़ाया गया बलिदान उन ताहीं हर साल यो याद दुआवे सै, के उननै पाप करया सै। 4 क्यूँके या अनहोणी बात सै, के बळ्थां अर बकरयां का लहू माणसां के पापां नै माफ करै। 5 इस्से कारण जिब मसीह इस दुनिया म्ह आया तो उसनै परमेसवर तै कह्या, “बलिदान अर भेंट तन्नै कोनी चाही, पर मेरै खात्तर एक देह त्यार करी सै। 6 बलिदान के रूप म्ह चढ़ाये गये जानवरां की

भेंट अर पाप के खात्तर चढ़ाये गये बलिदान तै तू खुश कोनी होया। 7 फेर मसीह नै कह्या, ‘लखा, परमेसवर मै तेरी इच्छा पूरी करण खात्तर आ गया सूं, जिसा पवित्र ग्रन्थ मेरै बारै म्ह कहवै सै।’” 8 पैहले तो मसीह कहवै सै, “बलिदान के रूप म्ह चढ़ाये गये जानवरां की भेंट अर पाप के खात्तर चढ़ाया गया बलिदान कोनी मांग्या, अर ना ए उन भेटां तै तू खुश होया।” हालाकि ये बलिदान तो नियम-कायदे के मुताबिक चढ़ाए जावै सै। 9 फेर मसीह यो भी कहवै सै, “लखा, मै तेरी इच्छा पूरी करण आ गया सूं।” इस करके पापां की माफी के पैहले तरिककें ताहीं, जो नियम-कायदा के मुताबिक थे, उननै हटा के नये तरिककें तै जो मेरे लहू के जरिये माफ होवै सै, उन ताहीं लागू करूँ। 10 परमेसवर याए चाहवै था, के हम मसीह यीशु की देह के एके बार बलिदान चढ़ाए जाणके जरिये पवित्र करे जावां। 11 पैहले करार के मुताबिक हरेक याजक वेदी के स्याम्ही खड़े होके रोज सेवा करै सै, अर एक ए ढाळ के बलिदान नै, जो पापां नै कदे भी दूर न्ही कर सकदे, बार-बार चढ़ावै सै। 12 पर मसीह जो म्हारा बड़ा याजक सै, उसनै माणसां के पापां के खात्तर एक ए बलिदान के रूप म्ह, परमेसवर के स्याम्ही सदा के खात्तर अपणे-आप ताहीं चढ़ा दिया, अर परमेसवर के सोळी ओड़ महिमायम जगहां म्ह पै जा बेठ्या, 13 अर उस्से बखत तै मसीह इस बात की बाट देखण लागरया सै, के कद परमेसवर उसके बैरियाँ नै पूरी तरियां तै हरावेगा। 14 क्यूँके क्रूस पै बलिदान के जरिये, परमेसवर नै जिन माणसां ताहीं पवित्र करया, उन ताहीं सदा खात्तर सिध्द कर दिया सै। 15 अर पवित्र आत्मा भी हमनै यीशु के बलिदान के बारे म्ह याए गवाही देवै सै, के यो सच सै, अर म्हारे ताहीं यो बतावै सै के परमेसवर नै इस बलिदान के बारे म्ह के कह्या सै। 16 “प्रभु कहवै सै, के जो नया करार, मै आण आळे दिनां म्ह, उनतै कर्हंगा, वो यो सै, के मै अपणे नियम उन ताहीं याद दुआऊँ, अर नियमां नै मानण म्ह उनकी मदद करूँगा।” 17 फेर यो भी कहवै सै, “मै उनके पापां नै अर उनके अधर्म के कामां नै दुबारा याद कोनी करूँगा।” 18 अर जिब पापां की माफी होगी तो पापां खात्तर बलिदान चढ़ाण की कोए जरूरत कोनी। 19 ज्यांतै हे बिश्वासी भाईयो, यीशु के सलीब पै लहू बहाण के जरिये हम पिता के धोरे बिना डरे घणी पवित्र जगहां म्ह जा सका सां। 20 इस करके हे बिश्वासी भाईयो, परमेसवर के परिवार म्ह म्हारे खात्तर एक सबतै उत्तम याजक निर्धारित सै, यीशु के सलीब पै लहू बहाण के जरिये म्हारे खात्तर एक नया अर जिन्दगी देण आळा राह खोल दिया सै। जिस ताहीं उसनै उस पड़दे, यानिके अपणी देह के बलिदान के जरिये म्हारे ताहीं घणी पवित्र जगहां म्ह जाण का साहस होया सै। 22 तो आओ, हम सचे मन अर पूरे बिश्वास के गेल्या, अर अपणी अन्तरात्मा ताहीं पापां तै मुक्त करण खात्तर अर सच्चे मन तै, देह ताहीं शुद्ध पाणी तै धोके, परमेसवर के लोवै जांवा। 23 अर इब हम बिना किसे शक के अपणी उस आस म्ह मजबूत रहवां, जिस ताहीं हमनै मान्या सै, क्यूँके जिसनै वादा करया सै, वो बिश्वास जोगगा सै। 24 अर हम यो भी खास ध्यान राख्वां के हम आप्स म्ह प्यार, अर भले कामां

मह उकसाण के खात्तर हम एक-दुसरे की फिक्र करते रहवां। 25 अर हम आराधना सभायां मह लगातार कठ्ठे होण मह सुस्त ना हो जावां, जिसा के भोत-से तो सुस्त हो भी लिये सै, पर एक-दुसरे नै उत्साहित करते रहों, जिसा के थम जाणो सों, के यीशु का आण का बखत लोवै सै। 26 क्यूँके मसीह नै जाणण के बाद जै हम जाण-बुझकै पाप करदे रहवां, तो पापां की माफी खात्तर फेर कोए बलिदान बाकी न्ही बचा। 27 तो हॉं, परमेसवर के न्याय का दिन आवैगा, अर वो अपने बिरोधियां नै नाश कर देवैगा, अर ये सारी बात होण आळी सै। 28 जो माणस मूसा नबी के नियम-कायदा के मुताबिक दो या तीन माणसां की गवाही पै, बिना दया के मार दिया जावै सै, 29 तो सोच ल्यो के वो माणस और भी भारया दण्ड के जोगगा ठहरैगा, जिसनै परमेसवर के बेटे की कदर न्ही जाणी अर मसीह के लहू ताहीं अपवित्र जाणया, जो उस ताहीं शुद्ध करै सै, अर उस पवित्र आत्मा का अपमान करै सै, जो हमनै अनुग्रह देवै सै। 30 क्यूँके हम उसनै जाणा सा, जिसनै कह्या सै, “बदला लेणा मेरा काम सै, मै ए बदला दिवुँगा।” अर फेर यो भी कह्या के “प्रभु अपने माणसां का न्याय करैगा।” 31 जिन्दे परमेसवर के हाथ्यां मह पड़णा भयानक (डरावणी) बात सै। 32 पर उन पाच्छले दिनां नै याद करो, जिब थमनै पैहली बार मसीह पै बिश्वास करया अर परमेसवर के खात्तर दुख ठाण मह पाच्छे न्ही हटे। 33 कदे-कदे तो माणसां नै सब के स्याम्ही थारी बुराई करी अर थारे ताहीं मारा पिट्या भी, अर थमनै उन माणसां के गैल भी दुख सहया जो इसे दुख ठावै सै। 34 क्यूँके जो लोग कैद मह थे, उनके दुख मह भी थम दुखी होए, अर अबिश्वासी नै थारी सम्पत्ति ताहीं भी लूट ली, तो थम लुटण खात्तर भी तैयार होगे, न्यू जाणके के थारे गेल्या एक और भी सारया तै बढ़िया अर सारी हाण ठहरण आळी सम्पत्ति सै। 35 ज्यांतै अपने दुख मह भी बिश्वास मह बणे रहों क्यूँके उसका ईनाम बड़्ठा सै। 36 क्यूँके थारा धीरज धरणा जरूरी सै, ताके थम परमेसवर की इच्छा नै पूरी करके वो पा सको जो परमेसवर नै थारे तै वादा करया सै। 37 “क्यूँके पवित्र ग्रन्थ मह लिख्या सै, घणाए थोड़ा बखत रहग्या सै, जिब के आण आळा आवैगा अर वार न्ही करैगा। 38 पर मेरे धर्मी माणस बिश्वास तै जिन्दा रहवैगे, जै वो बिश्वास तै पाच्छे हट जावै तो मेरा मन उसतै राज्जी कोनी होवैगा।” 39 पर हम बिश्वास तै हटण आळे कोनी के नाश हो जावै पर परमेसवर पै बिश्वास करण आळे सां ताके हम अनन्त मौत तै बचाए जावां।

11 जो माणस परमेसवर मह बिश्वास करै सै, वो ये बात आच्छी तरियां जाणै सै, के परमेसवर वे चीज उन ताहीं जरूर देवैगा, जिसकी आस वे राक्खे सै। उननै पूरा बिश्वास सै, के जो चीज उननै इब्बे न्ही देख्खी, वो असलियत मह सै। 2 म्हारे पूर्वजां नै परमेसवर मह इस तरियां बिश्वास करया था, इस करके परमेसवर उनतै खुश थे। 3 बिश्वास तै ए हम जाणा सां, के सृष्टि परमेसवर के वचन तै बणी सै। हम या भी जाणै सां, के जो चीज हम देख सका सां, वे अनदेख्खी चिज्जां मह तै बणी सै। (aiōn g165) 4 बिश्वास तै ए आदम के बेटे हाबिल नै, अपने बड़े भाई

कैन तै घणा बढ़िया बलिदान परमेसवर के खात्तर चढ़ाया, अर उस बलिदान के जरिये परमेसवर नै गवाही दी, के हाबिल एक धर्मी जन सै, क्यूँके परमेसवर उसकी भेंट तै खुश था, इब हाबिल मर लिया सै, अर हमनै उसके जरिये परमेसवर पै बिश्वास करणा सिख्या सै। 5 हनोक के बिश्वास के जरिये परमेसवर नै उस ताहीं जिन्दा ए सुर्ग पै उठा लिया, इस बजह तै इब ताहीं किसे नै उसकी लाश न्ही मिली, सुर्ग मह जाण तै पैहले उसनै परमेसवर ताहीं खुश करया था, जिसा के परमेसवर का पवित्र ग्रन्थ बतावै सै। 6 माणस परमेसवर नै खुश कर सके सै, जै वे उसपै बिश्वास करै तो। क्यूँके परमेसवर के धौरे आणआळे माणस नै बिश्वास करणा चाहिये के वो परमेसवर सै, अर वो पूरी सच्चाई तै अपने तोह आळे नै ईनाम देवै सै। 7 बिश्वास ए तै नूह नै परमेसवर के जरिये बाढ़ की चेतावनी पाकै, जिस ताहीं उसनै देख्या भी कोनी था। परमेसवर का डर मानते होए, अपने कुण्बे नै बचाण के खात्तर उसनै जहाज बनाया, नूह के बिश्वास के कारण उसनै उस बखत के माणसां ताहीं जिननै बिश्वास न्ही करया था, उन ताहीं दोषी ठहराया, अर वो डूबके मरगे। नूह नै परमेसवर पै बिश्वास करया था, इस करके परमेसवर नै उस ताहीं धर्मी ठहराया था। 8 जिब परमेसवर नै अब्राहम ताहीं किते जाण खात्तर बुलाया था, तो उसनै बिश्वास तै ए परमेसवर के हुकम ताहीं मानकै, एक इसी जगहां लिकड़ गया, जो जगहां परमेसवर अब्राहम ताहीं उसकी जायदाद के तौर पै देण आळा था, पर वो या कोनी जाणै था के वो कित्त जावै सै, अर वो फेर भी चला गया। 9 बिश्वास ए तै जिस देश ताहीं परमेसवर नै देण का वादा करया था, ओड़ अब्राहम नै एक परदेशी की तरियां रहकै अपने बेटे इसहाक अर अपने पोत्ते याकूब सुधा तम्बुआ मह बसेरा करया, जो उसके गेल्या उससे वादे के वारिस थे। 10 क्यूँके वो उस नगर की जो सुर्ग मह सै, अर जिसकी नीम पक्की सै, उसकी बाट देख्खे था, जिसका रचण आळा अर बणाण आळा परमेसवर सै। 11 यो सिर्फ बिश्वास ए सै, जिसके जरिये अब्राहम बाप बण सका, हालाकि अब्राहम भोत बूढ़ा था, अर उसकी पत्नी सारा भी बाळक न्ही पैदा कर सकै थी, परमेसवर वो जरूर करै सै, जो उन ताहीं वादा करया था। 12 जिब अब्राहम इतणा बूढ़ा होग्या था, के मरण आळा ए था, तो अकास मह सुर्ग के तारां अर समुन्दर के किनारे की बाळू की तरियां उसके अनगिणत वंश पैदा होए। 13 ये सारे माणस जिननै परमेसवर पै बिश्वास करया था, वे उन चिज्जां नै पाए बिना मरगे, जिसका परमेसवर नै उन खात्तर वादा करया था। वादा करी होई चीज न्ही पाई, पर उननै अपने मन मह देखके राज्जी होए अर मान लिया के हम धरती पै परदेशी अर बाहर के सां। 14 ये उन माणसां के बारे मह सै, जो कहवै सै के वे इस दुनिया मह अजनबी सै, वे दिखावै सै के अपने देश की टोह मह सै। 15 अर जिस देश तै वे लिकड़ आये थे, जै उसके बारे मह सोचते तो वे उल्टा जा सकै था। 16 पर वे एक घणा बढ़िया यानिके सुर्गीय देश के चाहण आळे सै, इससे खात्तर परमेसवर उनका परमेसवर कुह्णण मह खुशी महसूस करै सै, क्यूँके उसनै उनके खात्तर

एक नगर त्यार करया सै। 17 बिश्वास ए तै अब्राहम नै, परखे जाणकै बखत म्ह, अपने बेटे इसहाक ताहीं बलिदान चढ़ाया, उससे नै परमेसवर के वादा ताहीं पाया, क्यूँके वो अपने इकलौते बेटे की बलि देण खातर भी तैयार होग्या था। 18 अर जिसतै न्यू कह्या गया था, “इसहाक तै तेरा वंश कुहावैगा,” वोए अपने एकलौते बेटे ताहीं बलिदान चढ़ाण लाग्या। 19 क्यूँके उसनै मान लिया, के परमेसवर सामर्थी सै के इसहाक ताहीं मरे होया म्ह तै जिन्दा कर सकै सै। यो इसाए था के उननै इसहाक ताहीं मौत के मुँह तै उल्टा पा लिया हो, उदाहरण की रीत पै वो उस ताहीं फेर मिल्या। 20 बिश्वास ए तै इसहाक नै अपने दो बेटे याकूब अर एसाव ताहीं आण आळी बाततां के बारे म्ह आशीर्वाद दिया। 21 बिश्वास ए तै याकूब नै मरदे बखत यूसुफ के दोन्नु बेट्याँ म्ह तै एक-एक ताहीं आशीर्वाद दिया, अर अपनी लाठी का सहारा लैके प्रभु की आराधना करी। 22 बिश्वास ए तै यूसुफ नै, जिब वो मरण पै था, तो आत्मबिश्वास तै कह्या, के इस्राएल के माणस मिस्र देश छोड़ देंगे, हुकम देकै जिब वो मिस्र देश छोड़ के जान्दे, तो उसकी हाडियाँ ले जान्दे। 23 तब मिस्र के राजा नै यो हुकम दिया था के सारे इस्राएली छोरे पैदा होण पै मारे जावेंगे, तो बिश्वास के कारण ए तै मूसा नबी के माँ-बाप नै उस ताहीं, पैदा होए पाछै तीन महिन्ने ताहीं ल्हकोए राख्या, क्यूँके उननै देख्या के बाळक भोत सुथरा सै, अर वे राजा के हुकम मानण तै डरे कोनी थे। 24 मिस्र देश के फिरौन की बेट्री नै मूसा ताहीं अपना लिया था, जिब मूसा बड़ा होया, बिश्वास तै वो न्ही चाहवै था, के माणस उस ताहीं राजकुमारी के बेटे के रूप म्ह बुलावै। 25 ज्यातै के उस ताहीं पाप म्ह माड़े-से दिन के सुख भोगण तै परमेसवर के माणसां के गेल्या दुख भोगणा घणा बढ़िया लाग्या। 26 उसनै मसीह के कारण बदनाम होण ताहीं मिस्र देश के भण्डार तै बड़ड़ा धन समझया, क्यूँके वो जो करण लागरया था, उस ताहीं वो जाणे था, के सुर्ग म्ह उसका ईनाम मिलैगा। 27 बिश्वास ए तै राजा के छो तै ना डरकै उसनै मिस्र देश ताहीं छोड़ दिया, क्यूँके वो समझ गया था, के उसनै इस्रा लाग्या, के मान्नी उसनै परमेसवर ताहीं देख लिया हो, जो अदृश्य सै। 28 बिश्वास ए तै मूसा नबी नै फसह अर लहू छिड़कण का तरीका मान्या, जिसतै के जेट्टा का विनाशक दूत इस्राएलियाँ के जेट्टे बेट्टा पै हाथ न्ही गरे। 29 बिश्वास ए तै इस्राएल के माणस लाल समुन्दर के पार इसे उतरगे, जिस तरियाँ सूक्खी धरती पर तै, अर जिब मिस्र देश नै उससे तरियाँ ए करणा चाह्या तो समुन्दर उल्टा अपनी जगहां पै आ गया अर बाढ़ आ गयी अर सब डूब मरे। 30 क्यूँके इस्राएल के माणस परमेसवर पै बिश्वास करै थे, इस करकै वे यरीहो नगर की चारदीवारी के च्यारु ओड़ सात दिनां तक लगातार चालते रहे, तो चारदीवारी पड़गी। 31 बिश्वास ए तै राहाब बेश्या परमेसवर का हुकम ना मानण आळा कै गेल्या नाश न्ही होई, उसनै इस्राएली जासूसां का स्वागत करया जो यरीहो नगर नै छुप के देखण आये थे। 32 इब और के कहुँ? क्यूँके बखत कोनी रहया के गिदोन का, अर बाराक का अर शिमशोन का, अर यिफतह जिसा माणसां के बारें म्ह, अर दाऊद अर

शमूल का, अर नबियाँ का जिक्र करुँ। 33 इसे बिश्वास कै जरिये राज्य जीते, धर्म के काम करे, वादा करी होई चीज पाई, शेर उन ताहीं खा न्ही सका। 34 आग की ज्वाला ताहीं शीळा करया, तलवार की धार तै बच लिक्के, एक बार कमजोर होण पै फेर तै ठाड्डे बना दिया, वे लड़ाई म्ह वीर लिक्के, उननै अपने दुश्मनां की पलटन ताहीं खदेड़ दिया। 35 लुगाईयाँ नै अपने मरे होया ताहीं दुबारा जिन्दा पाया, कितने तो मार खादे-खादे मरगे अर वे अपना बिश्वास न्ही छोड़णा चाहवै थे, ताके वे जेळ तै रिहा करे जा सकै, ज्यातै के घणे मरण के बाद फेर तै जिन्दा हो जावै, अर वे एक बढ़िया जिन्दगी पा सकै। 36 घणखरयाँ नै मखौल म्ह उड़ाया गया, अर कई नै कोड़े खाणे पड़े, बल्के कई नै बेलां ते जुड़कै, जेळ म्ह गेरया गया। 37 कईयाँ पै पत्थर बरसाए गए, आरै तै चीरे गये, कईयाँ ताहीं तलवार तै मौत के घाट उतार दिया गया, वे गरीब थे, उन ताहीं यातनाए भी दी गई, अर उनके गैल बुरा व्यवहार करया गया, वे भेट्टां अर बकरियाँ की खाल ओढ़ के आस्रै-पास्रै भटकदे रहे। 38 अर जंगळां, अर पहाड़ां, अर गुफायां म्ह, अर धरती की दरारां म्ह भटकदे हाँडें। या बुरी दुनिया इन बिश्वासियाँ जोगी कोनी थी। 39 बिश्वास ए कै जरिये इन सारया कै बारे म्ह परमेसवर नै उनके तारीफ करी सै, तोभी वादा करी होई उस चीज नै वो पा न्ही सकै जो परमेसवर नै उन ताहीं वादा करया था। 40 क्यूँके परमेसवर कै धोरे सिर्फ उनके खातर न्ही, बल्के म्हारै खातर भी एक घणी बढ़िया तरकीब सै, परमेसवर उन ताहीं सिध्द बनाणा चाहवै सै, पर सिर्फ म्हारै साथ मिलकै।

12 इस बजह तै जिब घणखरे माणसां के बिश्वास की गवाही जो उनकी जिन्दगी म्ह सै, म्हारे बारें म्ह बड़े बाढ़ळ की तरियां घेरे होए सै, तो आओ, हरेक रोकणआळी चीज अर उलझाण आळे पाप ताहीं दूर करके, अर राह पै हमनै चालणा सै, धीरज तै चाल्ला। 2 अर बिश्वास के कर्ता अर सिध्द करण आळे यीशु की ओड़ लखान्दे रहवां, उस आनन्द के खातर जो बिश्वास म्ह मिलण आळा था, शर्म की कुछ परवाह न्ही करकै क्रूस का दुख सहया, अर परमेसवर कै सिंहासन कै सोळी ओड़ महिमामय जगहां जा बेठ्या। 3 यीशु के उदाहरण कै बारें म्ह सोचो, जिसनै अपने बिरोध म्ह पापियाँ का इतणा बिरोध सह लिया ताके थम निराश होकै हिम्मत ना छोड़्यो। 4 पाप के बिरुध्द अपने संघर्ष म्ह थमनै उसतै इसी मुठभेड़ न्ही करी के थारा लहू बह्या हो, 5 अर थम उस उपदेश ताहीं, जो थारे ताहीं बेट्टा की तरियां दिया जावै सै, भूल गये सो: “हे मेरे बेटे, प्रभु की ताड़ना नै हल्की बात ना जाण, अर जिब वो तन्नै घुड़कै तो हिम्मत ना छोड्डे। 6 क्यूँके प्रभु जिसतै प्यार करै सै, उसकी ताड़ना भी करै सै, अर जिस ताहीं बेट्टा बना लेवै सै, उसके कोड़े भी मारे सै, ताके अपने बाळकां नै सुधार सकै।” 7 थम दुख नै पिता की ताड़ना समझकै सह ल्यो, परमेसवर थारे ताहीं बेट्टा जाणकै थारे गेल्या सलूक करै सै वो कौण सा बेट्टा सै, जिसकी ताड़ना पिता न्ही करदा? 8 जै वा ताड़ना जिसकै सब भागी होवै सै, अर थारी कोनी होई, तो थम परमेसवर की ऊलाद कोनी। 9 फेर जिब के म्हारा शारीरिक पिता भी

म्हारी ताड़ना करया करै था अर हमनै उसका आदर-मान करया, तो यो और भी जरूरी सै के अपणी आत्मायाँ के पिता के ओड़ तै अनुशासन स्वीकार करा सां, ताके म्हारे धौरै अनन्त जीवन हो। 10 म्हारे धन्यवादी पिता तो, अपणी समझकै मुताबिक थोड़े-से बखत के खात्तर म्हारी ताड़ना करै सै, पर वो तो म्हारे फैयदे के खात्तर करै सै, के हम भी उसके समान पवित्र बण जावां। 11 इस बखत ताड़ना दी जावै सै, उस बखत ताड़ना आच्छी कोनी लागै, बल्के वा दुख की बात दिखाई देवै सै। तोभी जो उस ताहीं सहन्दे-सहन्दे पक्के होंगे सै, बाद म्ह उननै चैन कै गेल्या धर्म का ईनाम मिलै सै। 12 इन सारी बातां के कारण सब मजबूत बणो अर उत्साहित होओ, 13 अर अपणे पायां के खात्तर सीध्दी राही बणाओ के लंगड़ा भटक ना जावै पर भला-चंगा हो जावै। 14 सारया तै मेळ-मिलाप राक्खो, अर पवित्र होण खात्तर हरेक ढाळ की कोशिश म्ह रहों, जिसकै बिना कोए प्रभु ताहीं कदे भी न्ही देखैगा। 15 सावधान रहो, इसा ना हो के कोए परमेसवर कै अनुग्रह तै दूर रह जावै या कोए कड़वी जड़ फूटकै दर्द देवै, अर उसकै जरिये घणखरे माणस परमेसवर के सच्चे रास्ते तै भटक जावै सै। 16 इसा ना हो के कोए माणस जार, या अब्राहम के पोत्ते एसाव की तरियां उस म्ह कोए बुराई ना होवै, क्यूँके वो जेट्टा बेट्टा था, उसनै खास उत्तराधिकारी होण का हक था, पर उसनै अपणे जन्म सिध्द होण के पद का सम्मान न्ही करया, इस करकै उसनै अपणे छोट्टे भाई याकूब ताहीं एक बर के खाणे कै बदले म्ह अपणा जन्म सिध्द होण का पद बेच दिया। 17 थमनै बेरा सै के बाद म्ह जिब उसनै आशीष पाणी चाही तो उस ताहीं मना कर दिया गया, अर आँसू बहा-बहाकै आशीष के मांगण पै भी वो पैहले जो कुछ भी करया था, उस ताहीं बदलण खात्तर कुछ भी न्ही कर सका। 18 थम आग की लपटे, अन्हरे, काळी घटा जिसा असली पहाड़ पै न्ही आये सों, जिसा के इस्राएल के माणस सीनै पहाड़ पै आये थे, जिब परमेसवर नै उन ताहीं अपणे नियम दिए थे। 19 थम तुरही की आवाज कै धौरै कोनी सों, अर बोल्लण आळे के इसे शब्द कै धौरै न्ही आए, जिसकै सुनणआळे तै बिनती करी के इब म्हारै तै और बात ना करी जावै। 20 उननै इसा इस करकै कहा, क्यूँके वे इस हुकम नै बर्दाश न्ही कर सकै, के परमेसवर नै उनतै कहा था, “जै कोए पशु भी पहाड़ ताहीं छुवै तो उसपै पत्थर बरसाये जावै।” 21 अर वो दर्शन इसा डरावणा था के मूसा नबी नै भी कहा, “मै घणा डरूँ अर काप्पू सूँ।” 22 पर थम सियोन कै पहाड़ पै आये सों, जित्त सुगीय यरूशलेम सै, जो जिन्दे परमेसवर का नगर सै, उसके धौरै अर लाखों सुर्गदूत खुशी उत्सव मनावै सै। 23 थम उन परमेसवर के खास बाळकां की सभा अर कलीसिया म्ह आये सों, जिनके नाम सुर्ग म्ह लिक्खे होए सै, परमेसवर कै धौरै जो सब का न्यायी सै, सुर्ग म्ह धर्मी माणसां की आत्मायाँ खात्तर जो इब सिध्द करे गये सै। 24 थम यीशु कै धौरै आए सों, जो परमेसवर अर माणसां के बीच म्ह करार बणाया, अर छिड़काव का लहू जो माफी के बारें म्ह बोल्लै सै, ना के न्याय के बारें म्ह, जो हाबिल कै लहू तै घणी बढ़िया

बात कहवै सै। 25 सावधान रहो, परमेसवर के हुकम मान्नी, जो थारे तै बात करण लागरया सै, क्यूँके इस्राएल के माणस जिब धरती पै मूसा नबी की चेतावनी पाके बच पाए, क्यूँके उननै मूसा नबी की बात कोनी मान्नी थी, तो हम सुर्ग पै तै चेतावनी देण आळे परमेसवर तै मुँह मोड़के उसके छो तै किस तरियां बच सकांगें? 26 जिब परमेसवर सीनै पहाड़ पै तै बोल्या, तो उसके शब्द नै धरती ताहीं भी हला दिया, पर इब उसनै यो वादा करा सै, “एक बर फेर मै ना सिर्फ धरती ताहीं बल्के अकास ताहीं भी हला देऊँगा।” 27 अर यो बोल “एक बर फेर” इस बात ताहीं दिखावै सै के बणाई होई चीज हलाई, अर हटा दी जावैगी, ताके जो चीज हलाई न्ही जान्दी, वे पक्की तरियां बणी रहवें। 28 हमनै जो राज्य मिला सै वो न्ही हिलाया जा सकता, इस कारण हमनै उसका धन्यवादी होणा चाहिए, जिसके जरिये हम भगति, अर भय सुधा परमेसवर की इसी आराधना कर सकां सां जिसतै वो राज्जी होवै सै, 29 क्यूँके म्हारा परमेसवर राख करण आळी आग सै।

13 एक-दुसरे तै भाण-भाई की तरियां प्यार करो। 2 अजनबी की भी सेवा पाणी करो, क्यूँके इसके जरिये कई माणसां नै अनजाणे म्ह सुर्गदूतां का आदर-मान करया सै। 3 कैदियाँ का इस ढाळ बेरा लेओ के मान्नी उनके गैल थम भी कैद सो, अर जिन ताहीं पीड़ित करया जावै सै, जिसा के थम अपणी देह म्ह दर्द महसूस करो सों। 4 ब्याह सारया म्ह आदर की बात समझी जावै, अर ब्याह होण के बाद एक-दुसरे के प्रति वफादार रहों, क्यूँके परमेसवर जार, अर बिगान्नी लुगाई कै धौरै जाणीयां का न्याय करैगा। 5 अपणी जिन्दगी नै धन के लालच तै मुक्त राक्खों, अर जो थारे धौरै सै उससे पै सन्तोष करो, क्यूँके उसनै आप्णे ए कहा सै, “मै तन्नै कदे भी न्ही छोड़ूँगा, अर ना कदे भी त्यागूँगा।” 6 ज्यातै हम बिना डरे कहां सां, “प्रभु मेरा मददगार सै, मै न्ही डरूँगा, माणस मेरा के करै सकै सै।” 7 जो थारे अगुवें थे, अर जिन नै थारे ताहीं परमेसवर का वचन सुणाया सै, उननै याद राक्खो, अर गौर करो के किस तरियां जीणा अर मरणा सै, परमेसवर म्ह एके तरियां का बिश्वास दिखाओ जो उननै दिखाया। 8 यीशु मसीह काल अर आज अर युगानुयुग एक सै, वो कदे न्ही बदलता। (aiōn g165) 9 क्यूँके यीशु मसीह कदे न्ही बदलता, इस करकै थम नई अर अलग शिक्षा ना अपणाओ। क्यूँके थारे मनां खात्तर आच्छा सै, के वे अनुग्रह के जरिये मजबूत बणें, ना के उन खाण-पीण आळी चिज्जां के जरिये, उन माणसां नै कोए फायदा न्ही होन्दा जो इसे काम करै सै। 10 म्हारै धौरै एक वेदी सै जिस म्ह तै तम्बू के याजक नै खाण का कोए हक कोनी, जो तम्बू की सेवा करै सै। 11 क्यूँके पैहले करार के मुताबिक हर साल जिन जानवरों का लहू महायाजक पापबलि कै खात्तर घणी पवित्र जगहां म्ह पापां की माफी खात्तर ले जावै सै, उनकी देह छावणी के बाहरणै जळाई जावै सै। 12 इस्से के कारण, यीशु नै भी माणसां ताहीं अपणे ए लहू के जरिये पवित्र करण के खात्तर यरूशलेम नगर के बाहरणै दुख सहया अर मारा गया। 13 आओ हम यहूदी नियम-कायदा नै छोड़के यीशु म्ह बिश्वास

करां, अर उसके साथ दुख ठावां। 14 क्यूँके इस दुनिया म्ह म्हारा कोए स्थाई घर कोनी, बल्के हम एक आण आळे नगर की टोह म्ह सां। 15 इस करके हम प्रभु यीशु के जरिये हम अपणे होठ्ठां तै परमेसवर की स्तुति करणा जारी राक्खां, वो म्हारा बलिदान सै, यानिके उन होंठा का फळ जो उसकै नाम का अंगीकार करै सै, परमेसवर ताहीं सारी हाण चढ़ाया करै। 16 भलाई करणा अर उदारता दिखाणा ना भूलो, क्यूँके परमेसवर इसे बलिदानां तै राज्जी होवै सै। 17 अपणे अगुवां का हुकम मान्ना अर उनके अधीन रहो, क्यूँके वे थमनै देख्खण लागरे सै, ताके थम भटक ना जाओ, अर उन ताहीं अपणी सेवा के बारें म्ह परमेसवर ताहीं लेखा देणा सै, वे यो काम राज्जी होकै करै, यो काम उदास्सी के साथ कोनी करणा, क्यूँके इस हालत म्ह थमनै किमे फायदा कोनी। 18 म्हारै खात्तर प्रार्थना करदे रहो, क्यूँके हमनै भरोस्सा सै के म्हारी अन्तरात्मा शुद्ध सै: हम हर बखत भले काम करणा चाहवां सां। 19 प्रार्थना करण के खात्तर मै थमनै और भी समझाऊँ सूँ के मै तावळा थारे धोरै दुबारा आ सकूँ। 20 अर इब शान्तिदाता परमेसवर, जिसनै म्हारै प्रभु यीशु ताहीं मुर्दा म्ह तै जिन्दा करया, वो थारे ताहीं सब कुछ दे, जो उसकी इच्छा पूरी करण खात्तर चाहिये सै, परमेसवर यीशु मसीह की शक्ति के जरिये वो सब थारे म्ह पूरा करै, जो उस ताहीं खुशी दे सकै सै, यीशु मसीह भेड्डां का महान् रूखाळा सै, उसनै अपणे लहू के जरिये सदा के करार नै स्थापित करया सै, (aiōnios g166) 21 उस ताहीं सदा महिमा मिलती रहवै। आमीन। (aiōn g165) 22 हे विश्वासी भाईयो, मै थारे तै बिनती करूँ सूँ, के उत्साहित करण आळे इन सन्देशां ताहीं धीरज तै सह ल्यो, क्यूँके मन्नै थारे ताहीं थोड़े-से शब्दां म्ह लिख्या सै। 23 थमनै यो बेरा लाग्या हो के तीमुथियुस, म्हारा भाई जेळ की कैद तै छुटग्या सै, अर जै वो तावळा आ गया तो मै उसकै गेल्या थारे तै भेंट करूँगा। 24 अपणे सारे अगुवां अर सारे पवित्र माणसां ताहीं नमस्कार कहो। इटली देश के विश्वासी थमनै नमस्कार कहवै सै। 25 थम सारया पै परमेसवर का अनुग्रह होंदा रहवै। आमीन।

याकूब

1 मैं याकूब, परमेसवर अर प्रभु यीशु मसीह का दास सूँ, मेरी ओड़ तै थम सारया नै मेरा नमस्कार। मैं या चिट्ठी इस्राएल के उन यहूदी मसीह बिश्वासियाँ नै लिखूँ सूँ, जिनके बाराह गोत्र सारी दुनिया म्ह तितर-बितर होकै रहण लागरे सै। 2 हे मेरे बिश्वासी भाईयो, जिब थम कई ढाळ की मुसीबतां का सामना करो सो, तो इसनै पूरे आनन्द की बात समझो, 3 क्यूँके थम जाणो सों, के थारे बिश्वास के परखे जाण तै धीरज बढ़े सै। 4 हरेक बात म्ह धीरज धरणा सीखों, ताके थम आत्मिकता म्ह पूरे सिध्द हो जाओ, अर थारे म्ह किसे बात की कमी ना रहवै। 5 पर थारे म्ह तै जै किसे नै बुद्धि की कमी सै, तो परमेसवर तै माँगै, जो बिना उल्लाणा दिये, सारया नै बड़ी उदारता तै देवै सै, अर उस ताहीं दी जावैगी। 6 पर वो बिना शंका के बिश्वास तै माँगै, अर कुछ शक ना करै, क्यूँके शक करण आळा माणस टिक्या न्ही रहन्दा जो समुन्दर की उस लैहर की तरियां सै जो हवा के चाल्लण तै उच्छळै सै। 7 शक करण आळा माणस या बात बिल्कुल ना सोचवै, के उसनै प्रभु तै कुछ मिलेगा, 8 वो माणस दोगला सै अर अपणी किसे बात म्ह टिकता कोनी। 9 जो बिश्वासी भाई गरीब सै, उननै खुश होणा चाहिए, क्यूँके परमेसवर उनकी इज्जत करै सै, 10 अर धनवान अपणे ऊँच्ये पद पै घमण्ड ना करै, क्यूँके वो घास कै फूल की ढाळ सूख जावैगा। 11 सूरज लिकड़दे ए घणा घाम पड़े सै, अर घास नै सुक्खा देवै सै, अर उसका फूल झड़ जावै सै, अर उसकी खूबसूरती जान्दी रहै सै। इस ढाळ धनवान भी अपणे काम करदे-करदे माट्टी म्ह मिल ज्या जावैगा। 12 धन्य सै वो माणस जो परखे जाण पै खरे उतरै सै, क्यूँके परखे जाणके बाद ए जीवन का वो मुकुट पावेंगें, जिसका वादा परमेसवर नै उन माणसां तै करया सै, जो परमेसवर तै प्यार करै सै। 13 जिब किसे की परख हो सै, तो वो या ना कहवै के परमेसवर मनै परखण लागरया सै, क्यूँके परमेसवर बुरी बातां की परख म्ह कोनी पड़ता, अर ना वो किसे की परख आप करै सै। 14 पर हरेक माणस अपणी ए लालसा म्ह पड़के अर फँसके परख्या ज्या सै। 15 जिब बुरी इच्छा भोत घणी बढ़ ज्या सै, तो पाप नै जन्म देवै सै, अर पाप जिब भोत घणा बढ़ जावै सै, तो अनन्त मौत नै जन्म देवै सै। 16 हे मेरे प्यारे बिश्वासी भाईयो, धोक्खे म्ह ना रहों। 17 क्यूँके हरेक आच्छा वरदान अर हरेक उत्तम दान परमेसवर की ओड़ तै ए सै, जो सिध्द सै, जिसनै आसमान की ज्योतियाँ बणाई सै, अर वो इनकी छाया की तरियां कदे बदलता कोनी। 18 उसनै अपणी ए इच्छा तै, म्हारै ताहीं सच के वचन कै जरिये जन्म दिया, ताके हम उसकी बणाई होई रचना म्ह सब तै खास हो, जिस तरियां किसान खात्तर फसल का पैहला हिस्सा नाज होवै सै। 19 हे मेरे प्यारे बिश्वासी भाईयो, या बात थम जाण ल्यो, हरेक माणस सुणण कै खात्तर तैयार अर बोल्लण म्ह उतावळा ना हो, अर अपणे छो नै काबू म्ह करण आळा हो। 20 क्यूँके माणस जिब छो म्ह हो सै तो वो धार्मिकता के काम न्ही कर सकता, जो परमेसवर

उसतै करवाणा चाहवै सै। 21 इस करके सारे मन की गंदगी अर नफरत नै दूर करके, परमेसवर के उस वचन नै नम्रता तै मान ल्यो, जो मन म्ह बोया गया सै, अर जो थारे प्राणा का उद्धार कर सकै सै। 22 पर परमेसवर के वचन पै चाल्लण आळे बणो, अर सिर्फ सुणण आळे ए न्ही, जो अपणे-आपनै धोक्खा देवे सै। 23 क्यूँके जो कोए परमेसवर के वचन का सुणण आळा हो, अर उसपै चाल्लण आळा ना हो, तो वो उस माणस कै समान सै, जो अपणा मुँह शीशे म्ह देखवै सै। 24 इस करके के वो अपणे-आपनै देखके चाल्या जावै सै, पर जिब्बे भूल जावै सै, के मैं किसा था। 25 पर जो माणस ध्यान तै परमेसवर के सिध्द नियम-कायदा नै पढ़ता रहवै सै, जो हरेक माणसां नै पापां तै आजादी देवे सै, परमेसवर उसनै आशीर्वाद देवैगा, क्यूँके वो सुणके भूलता कोनी, पर उसाए करै सै। 26 जै कोए अपणे-आपनै परमेसवर का भगत समझै, अर अपणी जीभ पै लगाम ना लगावै, पर अपणे मन नै धोक्खा दे, तो उसकी भगति बेकार सै। 27 म्हारे पिता परमेसवर की नजर म्ह सच्ची अर शुद्ध भगति या सै, के अनास्थां अर विधवाया के क्लेश म्ह उसकी सुधि ले, अर अपणे-आपनै दुनिया तै बेदाग राखवै।

2 हे मेरे बिश्वासी भाईयो, थम म्हारे महिमामय प्रभु यीशु मसीह के चेल्लें सों, इस करके थारे म्ह भेद-भाव की भावना ना हो। 2 जै एक माणस सोन्ने के छल्ले अर सुथरे लत्ते पहरे होए थारी मण्डली म्ह आवै, अर एक कंगाल भी मैल्ले कुचले लत्ते पहरे होए आवै, 3 अर थम उस सुथरे लत्ते आळे नै इज्जत देकै कहो, “तू ओड़ै खास जगहां बैठ,” अर उस कंगाल तै कहो, “तू ओड़ै खड्या रहै,” या “मेरे पायां धोरे बैठ।” 4 तो के थमनै भेद-भाव कोनी करया, अर बुरे विचार तै न्याय करण आळे न्ही बणो? 5 हे मेरे प्यारे बिश्वासी भाईयो, सुणो। के परमेसवर नै इस दुनिया के कंगालां ताहीं न्ही छाट्या, के बिश्वास म्ह धनी हो जाओ, अर उस राज्य के अधिकारी हो जाओ, जिसका वादा उसनै उनतै करया सै, जो उसतै प्यार करै सै? 6 पर थमनै उस कंगाल की बेजती करी सै। के धनी माणस ए थारे पै जुल्म न्ही करदे, अर के वे थमनै कोट-कचेहड़ी म्ह न्ही घसीट-घसीट कै ले जान्दे? 7 ये वे धनी माणस ए सै, जो प्रभु यीशु के महिमामय नाम की, जिसके थम कहवाओ सों, बेजती करै सै। 8 तोभी जै थम पवित्र ग्रन्थ के इस वचन कै मुताबिक के “तू अपणे पड़ोसी तै अपणे समान प्यार कर” साच्ये उस राजसी नियम नै पूरा करो सों, तो आच्छा ए करो सों। 9 पर जै थम भेद-भाव करो सों तो पाप करो सों, अर मूसा के नियम-कायदे थमनै कसूरवार बतावै सै। 10 क्यूँके जो कोए मूसा के सारे नियम-कायदे नै पुगावै सै, पर एके बात म्ह चूक जावै, तो वो सारी बातां म्ह कसूरवार बण लिया सै। 11 इस करके के जिसनै यो कह्या, “तू जारी ना करिये” उससे नै यो भी कह्या, “तू हत्या ना करिये,” इस करके जै तन्नै जारी तो कोनी करी, पर हत्या करी सै, तोभी तू नियम-कायदा का तोड़ण आळा बणग्या। 12 इस करके थारी कथनी अर करणी उनके समान हो, जिनका न्याय उस नियम-कायदा कै मुताबिक करया जावैगा, जो म्हारे ताहीं आजादी देवै सै। 13 क्यूँके

जिसने दया नहीं करी, उसका न्याय बिना दया के होगा: जै थम दुसरयां पै दया नहीं करते, तो न्याय के दिन परमेसवर भी थारे पै दया कोनी करेगा। 14 हे मेरे विश्वासी भाईयो, जै कोए कहवै के मै प्रभु यीशु मसीह पै विश्वास करूँ सूँ, पर वो उसके मुताबिक आच्छे काम नहीं करता हो, तो इसते के फायदा? के इसा विश्वास उसका उद्धार कर सकै सै? 15 जै कोए विश्वासी भाई या भाण जिनके धौरे पैहरण खात्तर भी लत्ते ना हो, अर उननै रोज खाण नै भी ना मिलता हो, 16 मान ल्यो थारे म्ह तै कोए उनतै कहवै, “ठीक-ठाक जाओ, थम गरम लत्ते पैहरो अर छिके रहों,” पर जो चीज देह खात्तर जरूरी सै, वा उनतै ना देवै, तो के फायदा? 17 उस्से तरियां विश्वास भी, जै आच्छे कर्म सुधा ना हो, तो अपणे सुभाव म्ह मरया होया सै। 18 बल्के कोए या कह सकै सै, “तन्नै विश्वास सै, अर मै कर्म करूँ सूँ।” तू अपना विश्वास मन्नै आच्छे कर्म बिना तो दिखां, अर मै अपना विश्वास तन्नै अपणे कर्मा के जरिये दिखाऊँगा। 19 तन्नै विश्वास सै, के एके परमेसवर सै, तू आच्छा करै सै। ओपरी आत्मा भी विश्वास करै सै, अर डर तै थरथर काप्पै सै। 20 पर हे बिना अकल के माणस, के तू यो भी नहीं जाणदा के बिना आच्छे कर्म विश्वास बेकार सै? 21 म्हारे पूर्वज अब्राहम नै अपणे बेटे इसहाक ताहीं (बलि खात्तर) वेदी पै चढ़ाया, तो वो आच्छे कर्मा तै धर्मा ठहरया गया। 22 थमनै देख लिया के उसके काम के गैल विश्वास नै मिलके असर करया, अर आच्छे काम के कारण उसका विश्वास सिध्द होगया। 23 अर पवित्र ग्रन्थ का यो वचन पूरा होया: “के अब्राहम नै परमेसवर का विश्वास करया,” अर इस खात्तर धर्मा बण गया, अर वो परमेसवर का साथी कुहाया। 24 इस ढाळ थमनै देख लिया, के माणस सिर्फ विश्वास तै ए न्ही, पर भले कर्मा तै भी धर्मा मान्ना जावै सै। 25 उस्से तरियां राहाब बेशया भी, जिब उसनै जासूसों ताहीं अपणे घर म्ह शरण दी अर दुसरे राह तै बिदा करया, तो आच्छे कर्मा तै वा धर्मा बणी। 26 जिस तरियां देह आत्मा बिना मरी होई सै, उस्से तरियां विश्वास भी आच्छे कर्म बिना मरया होया सै।

3 हे मेरे विश्वासी भाईयो, थारे म्ह तै कलीसिया म्ह घणे उपदेशक ना बणै, क्यूँके थम जाणो सों के हम जो उपदेशक सां, म्हारा न्याय दुसरयां तै भी घणा सख्ताई तै करया जावैगा। 2 हम सब घणीए बार चूक जावां सा, पर जो कोए मुँह तै गलत बात न्ही बोलता, वोए तो सिध्द माणस सै, अर वोए सारी देह पै भी लगाम लगा सकै सै। 3 जिब हम बस म्ह करण खात्तर घोड्या के मुँह पै लगाम लगावा सां, तो हम उस घोड़े नै भी काबू कर सकां सां। 4 चाहे हवा कितनी भी तेज क्यूँ ना हो, एक छोट्टी सी पतवार तै, एक माँझी एक बड़े जहाज नै भी मोड़ सकै सै। 5 उस्से तरियां जीभ भी एक छोट्टा सा अंग सै, अर वा बड़ी-बड़ी बात करण की डींग मारै सै। देखखों, छोट्टी सी चिंगारी तै कितने बड़े बण म्ह आग लाग ज्या सै। 6 हाँ, जीभ एक आग के समान सै, या म्हारे देह का एक इसा खतरनाक हिस्सा सै, जो माणस तै अधर्म के काम करवा देवै सै, अर उसकी पूरी जिन्दगी नै बरबाद कर देवै सै, या म्हारे जीवन नै नरक की आग के समान खतम कर सकै सै। (Geenna g1067) 7 हेरके

ढाळ के जंगली पशु, पंछी, रेंगण आळे जन्तु, अर पाणी के जीव, तो माणस के बस म्ह हो सकै सै, अर बस म्ह हो भी गये। 8 पर जीभ नै कोए भी बस म्ह न्ही कर सकता, या एक इसी खतरनाक बला सै, जो कदे रुकती कोन्या, जो साँप के समान, जहर तै भरी होई सै। 9 जीभ तै ए हम पिता परमेसवर अर प्रभु की बड़ाई करा सां, अर इस्से तै जो परमेसवर के रूप म्ह बणाये गये माणसां नै श्राप देवां सां। 10 एके मुँह तै आशीष अर श्राप दोनु लिकड़ै सै। हे मेरे विश्वासी भाईयो, इसा न्ही होणा चाहिए। 11 धरती के एके चोवै तै मिठा अर खारा पाणी दोनु न्ही लिकड़ सकदे। 12 हे मेरे विश्वासी भाईयो, के अंजीर के पेड़ म्ह जैतून, या अंगूर की डाळी म्ह अंजीर लाग सकै सै? उस्से तरियां खारे चोवै तै मिठा पाणी न्ही लिकड़ सकता। 13 जै थम समझदार अर परमेसवर की बात्तां नै समझण आळे माणस सों, तो इस बात नै नरमाई अर समझदारी तै एक आच्छा जीवन जी के, साबित करो। 14 पर जै थारे मन म्ह घणी जळण अर मतलबीपण सै, तो अपणे ज्ञान का ज्यादा दिखावा ना करो, क्यूँके इसा करण तै थम सच नै छुपाओ सों। 15 इसा ज्ञान परमेसवर की ओड़ तै न्ही, बल्के वो ज्ञान दुनियावी, शारीरिक अर शैतान की ओड़ तै सै। 16 क्यूँके जड़े जळण अर मतलबीपण होवै सै, ओड़े बखेड़ा अर हरेक ढाळ के बुरे काम भी होवै सै। 17 पर जो ज्ञान परमेसवर देवै सै, वो पैहला तो पवित्र होवै सै, फेर शांतिप्रिय, सहनशील, विनम्र, खियास राक्खण आळा, भले काम अर दया तै भरया होया परोपकारी अर बिना भेद-भाव का, अर बिना कपट का होवै सै। 18 मेळ-मिलाप करण आळा, किसान की तरियां सै, जो शान्ति का बीज बोवै सै, अर धार्मिकता की फसल काटै सै।

4 थारे म्ह लड़ाई झगड़े का कारण के सै? के थारे भित्तर उन बुरी लालसा तै न्ही, जो थारे म्ह लड़ै-भीड़ै सै? 2 थम लालसा राक्खो सों, पर थमनै मिलता कोनी, ज्यातै थम हत्या करण का भी इरादा राक्खों सों। थम जळण करो सों, अर कुछ पान्दे कोनी, इस करके थम लड़ो अर झगड़ो सों। थमनै इस करके न्ही मिलदा क्यूँके थम परमेसवर तै माँगते कोनी। 3 हालाकि थम माँगो सों, फेर भी थमनै मिलता कोनी, क्यूँके भुंडी इच्छा तै माँगो सों, ताके अपणे ऐसो-आराम म्ह उड़ा घो। 4 हे बेईमान माणसों, के थम न्ही जाणते, दुनिया की चिज्जां तै प्यार करणा, परमेसवर तै बैर करणा सै। इस करके जो कोए संसार का साथी बणणा चाहवै सै, वो अपणे-आपनै परमेसवर का बैरी बणावै सै। 5 के थम पवित्र ग्रन्थ म्ह लिखी होई इस बात नै बेकार समझों सों, जिस म्ह लिख्या सै, “जिस पवित्र आत्मा ताहीं परमेसवर नै म्हारे भित्तर बसाया सै, वो बड़ी लालसा करै सै, के हम परमेसवर तै प्यार करां।” 6 पर परमेसवर तो और भी अनुग्रह करै सै, ताके हम बुरी इच्छा तै लड़ सकां, इस कारण पवित्र शास्त्र म्ह यो लिख्या सै, “परमेसवर घमण्ड करण आळा का बिरोध करै सै, पर दीन माणसां पै अनुग्रह करै सै।” 7 इस करके परमेसवर के अधीन हो जाओ, अर शैतान का बिरोध करो, तो वो थारे धौरे तै भाग ज्यागा। 8 परमेसवर के धौरे आओ तो वो भी थारे धौरे

आवैगा। हे पापियों, अपने जीवन तै पाप दूर करो, अर हे दोगले माणसों अपने मन नै पवित्र करो। 9 अपने पापां के कारण दुखी होओ, अर शोक करो, रोओ। थारी हाँसी शोक म्ह अर थारा आनन्द उदासी म्ह बदल जावै। 10 प्रभु कै स्याम्ही नरम बणो तो वो थमनै आदर मान देवैगा। 11 हे विश्वासी भाईयो, एक-दुसरे की बदनामी ना करया करो। जो अपने विश्वासी भाई की बदनामी करै सै या उसपै दोष लगावै सै, वो मूसा के नियम-कायदा का बिरोध करै सै, अर जै तू मूसा के नियम-कायदा का बिरोध करै सै, तो तू नियम-कायदा पै चाल्लण आळा कोनी, पर उसपै न्याय करण आळा बणग्या। 12 मूसा के नियम-कायदे देण आळा अर न्याय करण आळा एके सै, जो परमेसवर सै, जो बचाण अर नाश करण म्ह दोनुआ का हक राक्खै सै, पर तन्नै किसे पै इल्लाम लगाण का कोए हक कोनी। 13 थम जो या कहो सों, “आज या तड़कै हम किसे और नगर म्ह जाके ओड़े एक साल बितावागें, अर व्यापार करके फायदा कमावागें।” 14 पर थम यो न्ही जाणदे के कल के होवैगा? सुण तो ल्यो, थारा जीवन सै ए के? थम तो धुंध की तरियां सों, जो थोड़ी देर दिक्खै सै फेर खू ज्या सै। 15 इसकी बजाए थमनै या कहणा चाहिए, “जै प्रभु चाहवै तो हम जिन्दा रहवागें, अर यो काम भी करागें।” 16 पर इब थम अपने-आप पै घमण्ड करो सों, यो घमण्ड पाप सै। 17 इस करके जो कोए भलाई करणा जाणै सै, अर कोनी करदा, उसके खात्तर यो पाप सै।

5 हे साहूकारों, सुण तो ल्यो, थम अपने आण आळे दुखां पै किल्की मारके रोओ। 2 थारा धन खराब होग्या अर थारे लत्ता नै कीड़े खाँगे सै। 3 थारे सोन्ने चाँदी की कोए किम्मत कोनी रही, जिस सोन्ना चाँदी ताहीं थमनै कट्टा करया सै, वाए थारी गवाही देंगे, अर थारी देह नै राख कर देगी। थमनै अन्त के युग म्ह धन कट्टा करया सै। 4 देक्खों जिन मजदूरानें नै थारे खेत काट्टे, उनकी वा मजदूरी जो थमनै धोक्खा देके राखली सै। वे मजदूर चिल्लावै सै, अर उनकी दुहाई सेनाओं के प्रभु के कान्ना तक पहुँच ग्यी सै। 5 थम धरती पै ऐसो-आराम म्ह लागे रहे, अर बड़ड़ा ए सुख भोग्या, अर इसा करते-करते थम जानवरां की तरियां बणगे सों, जिन ताहीं काट्टण तै पैहले मोट्टा ताजा करया जावै सै, उससे तरियां थम न्ही जाणते के थम भी अपने-आप ताहीं परमेसवर की सजा खात्तर तैयार करण लागे सों। 6 जो धर्मी जन थारा सामना न्ही कर सकै थे, थमनै उन ताहीं कसूरवार बणाके मार दिया। 7 इस करके हे विश्वासी भाईयो, प्रभु के आण तक धीरज धरो। जिस तरियां जमीदार धरती की कीमती फसल की आस धरके पैहली अर आखरी बारिस होण तक धीरज धरे सै। 8 थम भी धीरज धरो, अर अपनी आस नै ना खोओ, क्यूँके प्रभु का आणा लोवै सै। 9 हे विश्वासी भाईयो, एक-दुसरे पै कुड़कुड़ाओ ना, न्ही तो परमेसवर भी थमनै दण्ड देवैगा, क्यूँके लखाओ, न्याय करण आळा आण खात्तर घणा लोवै सै। 10 हे विश्वासी भाईयो, जिन नबियाँ नै प्रभु के नाम तै बात करी, उननै दुख उठाण अर धीरज धरण का एक आदर्श समझों। 11 हम धीरज धरण आळे नै धन्य

कहां सां। थमनै अय्यूब नामक माणस कै धीरज कै बारें म्ह तो सुण्या ए सै, अर किस तरियां प्रभु नै उस ताहीं प्रतिफळ दिया, जिसतै थमनै प्रभु ताहीं जाण भी लिया के किस तरियां प्रभु करुणा अर दया करै सै। 12 पर हे मेरे विश्वासी भाईयो, सारा तै बड्डी बात या सै कै कसम ना खाईयो, ना सुर्ग की, ना धरती की, ना किसे और चीज की, पर थारी बात हाँ की हाँ ना की ना हो, ताके परमेसवर थमनै दण्ड ना देवै। 13 जै थारे म्ह तै कोए दुखी सै, तो वो प्रार्थना करै। जै आनन्दित सै, तो परमेसवर की बड़ाई के भजन गावै। 14 जै थारे म्ह तै कोए रोगी सै, तो कलीसिया के अंगुवां नै बुलावै, अर वे प्रभु के नाम तै उसपै तेल मल के उसके खात्तर प्रार्थना करे, 15 अर विश्वास की प्रार्थना के जरिये रोगी बच ज्यागा अर प्रभु उस ताहीं ठीक करैगा, अर उसनै जै पाप भी करे हो, तो उनकी भी माफी हो ज्यागी। 16 इस करके थम एक-दुसरे कै बिरुध किये गये, अपने-अपणे पापां नै मान ल्यो, अर एक-दुसरे खात्तर प्रार्थना करो, जिसतै ठीक हो जाओ: धर्मी जन की प्रार्थना कै असर तै सब कुछ हो सकै सै। 17 एलिय्याह नबी भी तो म्हारै समान दुख-सुख भोगी माणस था, अर उसनै मन लगाके प्रार्थना करी, के मिह ना बरसै, अर साढ़े तीन साल तक धरती पै मिह कोनी बरसा। 18 फेर उसनै प्रार्थना करी, तो अकास तै बरसा होई, अर धरती पै फसल भी होई। 19 हे मेरे विश्वासी भाईयो, जै थारे म्ह तै कोए सच की राह तै भटक जावै अर दुसरा कोए उसनै बोहड़ के उस राह पै ले आवै सै, 20 तो वो यो सच जाण लेवै के जो कोए भटके होए पापी नै पाप छोड़ण म्ह उसकी मदद करैगा, पाप छोड़ण आळे के अनेक पाप माफ हो जावेंगे अर उसकी जिन्दगी अनन्त मृत्यु तै बचावैगा।

1 पतरस

1 या चिट्ठी पतरस की ओड़ तै सै, जो यीशु मसीह का प्रेरित सै, मै या चिट्ठी परमेसवर के चुणे होए माणसां के खात्तर लिखण लागरया सूं, जो परदेशी होकै पुन्तुस, गलातिया, कप्पदूकिया, आसिया अर बिथुनिया परदेसां म्ह तित्तर-बितर होकै रहवै सै। 2 परमेसवर पिता नै थारे ताहीं अपणे माणस बणाण खात्तर, भोत पैहले चुण लिया था, ताके थमनै पवित्र आत्मा के काम के जरिये पवित्र बणावै, यो उसनै इस खात्तर करया ताके थम यीशु मसीह का कहणा मान्नी, अर उसके लहू तै शुद्ध हो जाओ। हम प्रार्थना करा सां के परमेसवर थमनै अनुग्रह अर शान्ति भोत-ए घणी दे। 3 म्हारे मसीह यीशु के पिता अर परमेसवर का धन्यवाद हो, जिसनै म्हारे पै बड़ी दया करके म्हारे ताहीं नई जिन्दगी दी सै, क्यूँके परमेसवर नै यीशु मसीह ताहीं मुर्दा म्ह तै जिन्दा करया, उसनै म्हारे ताहीं बड़े बिश्वास के साथ जीण के लायक बणाया, ताके हम उन चिज्जां की आस राक्खां जिसका देण का उसनै वादा करया सै। 4 हम उस वसियत नै जो परमेसवर नै म्हारे खात्तर तैयार करी सै, उस ताहीं लेण की हम बाट देक्खां सां, उसनै म्हारे खात्तर उस ताहीं सुर्ग म्ह राख्या सै, जित्त वा कदे गळ न्ही सकदी, खराब न्ही हो सकदी, अर नाश न्ही हो सकदी। 5 परमेसवर नै अपणी महान शक्ति तै थारे ताहीं सम्भाळ के राख्या सै, क्यूँके थम मसीह पै बिश्वास करो सों, जिस दिन मसीह बोहड़के आवैगा, उस दिन तक मसीह थमनै सम्भाळ के राक्खैगा, फेर थम जाणोगे के परमेसवर नै थारे ताहीं पाप अर मौत तै बचा के राख्या सै। 6 थमनै इन सारी बातां तै खुश होणा चाहिए भलाए थम कुछ बखत खात्तर कई ढाळ की मुसीबतां के कारण दुखी सो। 7 ये मुसीबत इस्से खात्तर आवै सै, ताके देख्या जा सकै, के परमेसवर पै थारा पक्का बिश्वास सै के न्ही। थारा मसीह यीशु पै बिश्वास करणा सोन्ने तै भी घणा कीमती सै, जिस तरियां नाशवान सोन्ना आग म्ह परख्या अर शुद्ध करया जावै सै, उस्से तरियां जै थारा बिश्वास घणी मुसीबतां म्ह भी बणया रहवै सै, तो जिब प्रभु यीशु मसीह बोहड़ के आवैगें तो थारे ताहीं बड़ाई महिमा अर आदर मिलैगा। 8 थमनै मसीह ताहीं कदे न्ही देख्या, उसतै थम बिब देक्खे प्यार करो सो, अर इब तो उसपै बिब देक्खे भी बिश्वास करके इसे राज्जी अर मग्न होवो सो, जिस ताहीं बताण खात्तर म्हारे धोरै शब्द कोनी। 9 थम इस खात्तर खुश सों, क्यूँके परमेसवर नै थारे ताहीं पाप की सजा तै बचा लिया सै, अर योए मसीह पै बिश्वास करण का ईनाम सै। 10 इस्से उद्धार के बारे म्ह उन नबियाँ नै घणी खोज अर जाँच-पड़ताळ करी, जिननै उस अनुग्रह के बारे म्ह, जो थारे पै होण आळा था, भविष्यवाणी करी थी। 11 मसीह का आत्मा जो उन म्ह था अर उन ताहीं बताण लागरया था, के मसीह किसा दुख ठावैगा अर उसके पाछे उस बारे म्ह उस ताहीं महिमा मिलैगी, इस कारण उननै यो बेरा पाड़ण खात्तर उसकी खोज करी, मसीह कौण होवैगा, अर यो कद होवैगा। 12 पर परमेसवर नै इन नबियाँ ताहीं बताया था, के यो सन्देश उन खात्तर न्ही बल्के थारे खात्तर सै,

यो सन्देश मसीह यीशु के बारे म्ह खुशखबरी सै, जिसके बारे म्ह थम इब सुणो सों। परमेसवर नै सुर्ग तै पवित्र आत्मा ताहीं भेज्या ताके वो माणसां नै सुसमाचार सुणाण म्ह मदद कर सकै, यो इतणा अदभुत सै, के सुर्गदूत भी इन चिज्जां नै होन्दे होए देखणा चाहवै सै। 13 इस खात्तर गौर तै सोच्चों के थम के करण आळे सों, अर अपणे-आप पै काबू राक्खों अर परमेसवर तै उद्धार पाण का भरोस्सा राक्खों जो अनुग्रह तै मिलै सै, अर वो थमनै जिब देवैगा जिब मसीह यीशु सुर्ग तै बोहड़के आवैगा। 14 परमेसवर के आज्ञाकारी बणो जिस तरियां आच्छे बाळक अपणे पिता का हुकम मान्ने सै, अर पुराणी जिन्दगी के मुताबिक मत जिओ, जिब थम बुरी लालसा नै पूरी करो थे। 15 पर जिसा थारा बुलाण आळा पवित्र सै, उस्से तरियां ए थम भी अपणे सारे चाल-चलण म्ह पवित्र बणो। 16 क्यूँके पवित्र ग्रन्थ म्ह लिख्या सै, “पवित्र बणो, क्यूँके मै पवित्र सूं।” 17 अर जिब के थम हे पिता कहके परमेसवर तै प्रार्थना करो सो, जो बिना पक्षपात, हरेक के काम के मुताबिक न्याय करै सै, तो इब जो थम, जिब इस धरती पै परदेशियाँ की तरियां जीण लागरे सों, तो थम उसके प्रति बड़े आदर रखते होए अपणी जिन्दगी जीणी चाहिए। 18 क्यूँके थमनै बेरा सै, के थारा निकम्मा चाल-चलण जो बाप-दादां तै चल्या आवै सै, उस बेकार जिन्दगी तै थम बचगे सों, अर थारा छुटकारा चाँदी-सोन्ने यानिके नाश होण आळी चिज्जां के जरिये न्ही होया। 19 पर बेकसूर अर बेदाग मेम्ने, यानिके मसीह के कीमती लहू के जरिये होया। 20 दुनिया बणाण तै पैहल्याए परमेसवर नै मसीह यीशु ताहीं उद्धारकर्ता करके चुण लिया था, पर इब वो इन आखरी दिनां म्ह इस खात्तर आया के थारी मदद कर सकै। 21 जो मसीह नै करया उसकी बजह तै थम परमेसवर पै बिश्वास करो सो, अर अपणी आस अर बिश्वास परमेसवर पै राक्खो सो, क्यूँके उसनै मसीह ताहीं मुर्दा म्ह तै जिन्दा करया, अर उस ताहीं बड़ी महिमा दी। 22 क्यूँके थम सच मानण के जरिये शुद्ध करे गये सों, इस खात्तर थमनै बिश्वासी भाईयाँ तै सच्चे दिल तै प्यार करणा चाहिए, अर तन-मन लाके एक-दुसरे तै प्यार करो। 23 थम एक-दुसरे तै इस खात्तर प्यार करो, क्यूँके थमनै परमेसवर तै नई जिन्दगी पाई सै, थमनै या जिन्दगी उसतै न्ही पाई जो नाशवान सै, पर उसतै पाई सै जो सदा के खात्तर सै। या नई जिन्दगी हमनै परमेसवर के वचन तै मिली सै, जो जीवित अर सदा रहण आळा सै। (aiōn g165) 24 क्यूँके पवित्र ग्रन्थ यो कहवै सै, “हरेक जीव घास के बरगा सै, अर उनकी शोभा जंगळी फूल्लां के समान सै। घास सूख जावै सै, अर फूल झड़ जावै सै। 25 पर प्रभु का वचन युगानुयुग स्थिर रहवैगा।” यो वोए सुसमाचार का वचन सै जो थारे ताहीं सुणाया गया था। (aiōn g165)

2 इस करके सारी ढाळ का बैरभाव अर छळ अर कपट अर जळण अर बुराई नै दूर करके, 2 नये जन्मे बच्चे की तरियां जो हमेशा माँ के निर्मल दूध की लालसा करै सै, उस्से तरियां थम भी परमेसवर के वचन ताहीं सुणण की लालसा करो, ताके थारा परमेसवर पै बिश्वास मजबूत हो सकै, अर थारा उद्धार हो जावै। 3 क्यूँके पवित्र ग्रन्थ कहवै सै, के

थमनै चख कै जाण लिया सै के प्रभु कितना भला सै। 4 थम प्रभु यीशु मसीह कै धोरे आए हो, वो उस खास पत्थर की ढाळ सै जो नीम म्ह लगाया जावै सै, पर वो जिन्दा पत्थर सै। भोत सारे माणसां नै उस ताहीं त्याग दिया, पर परमेसवर नै उस ताहीं चुणया, अर उस ताहीं कीमती बणाया, अर थम जो बिश्वासी लोग प्रभु यीशु कै धोरे आए हो, ताके थम भी उसके जरिये जिन्दे पत्थरां की ढाळ हो जाओ, जो परमेसवर की आत्मिक आराधना का घर बणण म्ह काम आ सकै। 5 उसनै थारे ताहीं भी पवित्र याजक बणाया, जिस तरियां याजक परमेसवर ताहीं भेट चढ़ावै सै, उससे तरियां थम भी अपने दिल नै भेट के रूप म्ह चढ़ा द्यो, अर याए भेट परमेसवर नै आच्छी लागै सै, क्यूँके थम यीशु मसीह के कहलाओ सों। 6 यो उससे तरियां सै, जिसा परमेसवर पवित्र ग्रन्थ म्ह कहवै सै: “देखों, मनै किसे ताहीं यरुशलैम नगर म्ह कोणे के पत्थर की तरियां राख्या सै, वो उस पत्थर की तरियां सै, जो नीम पै धरया जावै सै, अर जो कोए उसपै बिश्वास करैगा, वो किसे तरियां तै शर्मिन्दा कोनी होवैगा।” 7 यो पत्थर थारे खात्तर कीमती सै, जो मसीह यीशु पै बिश्वास करो सों, पर पवित्र ग्रन्थ उन माणसां के बारे म्ह जो बिश्वास न्ही करदे कहवै सै, “जिस पत्थर ताहीं राजमिस्त्रियाँ नै निकम्मा ठहराया था, वोए कोणे का पत्थर हो गया।”, 8 पवित्र ग्रन्थ यो भी कहवै सै, के “इस पत्थर तै लोगां के ठोक्कर लागैगी, या वा चट्टान सै जिसतै लोग ठोक्कर खाकै गिर जावेंगे,” वे इस खात्तर गिरै सै, क्यूँके उननै परमेसवर के वचन पै बिश्वास कोनी करया, परमेसवर नै उन खात्तर याए योजना बणाई सै। 9 पर थारे म्ह इसा ना हो, क्यूँके थम परमेसवर के चुणे होए माणस सो, थम परमेसवर के याजक सों, जो के राजा सै, थम परमेसवर के समर्पित माणस सों, अर थम जो परमेसवर के कुहावै सों, उसनै थारे ताहीं अन्धकार म्ह तै रोशनी म्ह बुलाया सै, ताके थम परमेसवर के उन अनोक्खे कामां के बारे म्ह माणसां ताहीं बता सको। 10 पैहले थम परमेसवर के माणस न्ही थे, पर इब परमेसवर के माणस सो, पैहले थम परमेसवर की दया नै कोनी जाणो थे, पर इब जाणो सों, क्यूँके उसनै अपनी दया पैहल्या तै थारे ताहीं दिखाई सै। 11 हे प्यारे बिश्वासी भाईयो, मै थारे तै बिनती करूँ सूँ, के थम अपने-आपनै दुनिया म्ह परदेशी अर मुसाफर जाणके उन दुनियावी अभिलाषायां तै जो आत्मा तै युध्द करै सै, बचे रहो। 12 वे लोग जो परमेसवर पै बिश्वास न्ही करदे, वे भी थारे आस्सै-पास्सै ए रहवै सै, अर वे भी कह सकै सै, के थम बुरा काम करण लागरे हो। थमनै इसी आच्छी जिन्दगी जीणी चाहिए, ताके वो थारे भले कामां नै देखके परमेसवर की महिमा उस दिन कर सकै जिब मसीह बोहड़ के आवैगा। 13 प्रभु नै महिमा देण खात्तर थम उन सारे माणसां का हुकम मान्ने जो इस दुनिया के शासक सै, जिस तरियां राजा, जो के सब पै प्रधान शासक सै। 14 अर राज्यपालों के भी अधीन रहों, क्यूँके राजा उन बुरे काम करणीया नै दण्ड देण अर आच्छे काम करणीया नै सम्मानित करण खात्तर इस्तमाल करै सै। 15 परमेसवर चाहवै सै के थम भले काम करो ताके थम उन बेकूफ माणसां नै जो

परमेसवर नै न्ही जाणदे, अर थारे पै झुठ्ठे दोष लगावै सै, उन ताहीं रोक सको। 16 थारे खात्तर भी इसा कोए कोनी जो थारे ताहीं रोक सकै, जो थम करणा चाहवो सों, क्यूँके यीशु मसीह के जरिये थम आजाद करे गये सों, पर इस बात नै थम बुरे काम करण का बहाना ना बणाओ, पर अपने कामां के जरिये दिखाओ के थम परमेसवर के सच्चे दास सों। 17 सब का आदर करो, बिश्वासी भाईयाँ तै प्यार करो, परमेसवर तै डरो, राजा का आदर करो 18 हे सेवको थम जो घर म्ह काम करो सों, अर बिश्वासी भी सों, अपने मालिकां का कहणा मान्ने अर सदा उनका आदर करो, हरेक ढाळ के मालिक के साथ इसाए बरताव करो, चाहे वो भले हो, नम्र हो, या फेर चाहे वे बुरे हो। 19 क्यूँके जै हम दुख ठान्दे, फेर भी जिब म्हारी कोए गलती भी ना हो, तोभी हम इस खात्तर सह लेवां सां, क्यूँके हमनै बेरा सै, के परमेसवर सब कुछ जाणै सै, परमेसवर इसतै ए खुश होवै सै। 20 क्यूँके जै थमनै अपराध करके घूँसे खाए, अर धीरज राख्या, तो इस म्ह के बड़ाई की बात सै? पर जै भला काम करके दुख ठाया हो अर धीरज राख्या हो, तो यो परमेसवर नै भावै सै। 21 अर थम इससे कै खात्तर बुलाए भी गये सो, क्यूँके मसीह भी थारे खात्तर दुख ठाके थारे ताहीं एक बढ़िया नमूना दे गया सै, ताके थम भी उसके नक्शे-कदम पै चाल्लों। 22 पवित्र ग्रन्थ म्ह मसीह के बारे म्ह न्यूँ लिख्या सै, के “ना तो उसनै पाप करया अर ना उसके मुँह तै छळ-कपट की कोए बात लिक्डी।” 23 वो गाळी सुणके गाळी कोनी देवै था, अर दुख ठाके किसे ताहीं भी धमकी कोनी देवै था, पर अपने-आप ताहीं परमेसवर के हाथ म्ह सोंप दिया, जो धार्मिकता तै न्याय करै सै। 24 वो आप ए म्हारे पापां नै अपनी देह पै लिये होए क्रूस पै चढ़ गया, जिसतै हम पापां के खात्तर मरके धार्मिकता कै खात्तर जीवन बितावां, उससे कै मार खाण तै थम चंगे होए। 25 क्यूँके थम पैहल्या भटकी होड़ भेङ्गां कै बरगे थे, पर इब अपने जीवन के रूखाळे अर पाळी कै धोरे बोहड़ आए सों।

3 हे बिरबानियों, थम भी अपने धणी के अधीन रहो, अर जै थारे पिता परमेसवर के वचन पै बिश्वास करण तै मना करै सै, तो जिस तरियां थम उनतै बरताव करो सों, उसकी बजह तै थारे बिना कहे वे बिश्वास करैंगे, वो मसीह पै जिब बिश्वास करैंगे, जिब वो थारा शुद्ध अर भक्तिमय जीवन नै देखेंगे। 3 बाहरली की खूबसूरती के बारे म्ह चिन्ता ना करै, जिस तरियां खूबसूरती तै बाळ गूँथणा, मँगे गहणे, या सुथरे लतें पैहरण। 4 पर थारा भीतरी माणसपण, नम्रता अर दीनता जिसे अविनाशी गुणा तै सजा हो, क्यूँके परमेसवर की निगां म्ह इसका मोल बड़ड़ा सै। 5 पैहल्ले बखत म्ह पवित्र बिरबान्नी भी, जो परमेसवर पै बिश्वास अर आस राक्खे थी, वे अपने-आपनै नै इससे तरियां तै सिंगारे थी, अर अपने-अपणे धणी का हुकम मान्ने थी। 6 जिस तरियां सारा अब्राहम के हुकम म्ह रहवै थी, अर उसनै स्वामी कद्दा करै थी। इससे ढाळ थम भी जै दुसरयां की भलाई करो, अर थमनै किसे बात का डर ना हो, तो थम सारा की बेटियाँ की तरियां होओगी। 7 इससे तरियां ए हे पतियों, थम अपनी पत्नियाँ के साथ मेळ-मिलाप कै साथ रहों, अर

सोचों के उनकी मदद किस तरियां करी जा सकें सै, थमनै यो बेरा होणा चाहिए के बिरबानी थारे तै कमजोर सै, इस करकै थमनै उनका आदर करणा चाहिए, क्यूँके थम दोन्नु उस वरदान के साझेदार सों, जिसा के परमेसवर नै थारे ताहीं दिया सै, जो के अनन्त जीवन सै, यो इस खात्तर करो ताके जिब थम परमेसवर तै प्रार्थना करो तो वो थारी सुणै। 8 आखरी म्ह मै कहणा चाहूँ सुं, के थम एक मन हो जाओ, एक-दुसरे तै भाई-भाण की तरियां प्यार करो, एक-दुसरे के बाबत दयालु रहो, अर नरम बणो। 9 बुराई के बदले बुराई ना करो अर ना गाळी के बदले गाळी द्यो, पर इसकै उल्ट आशीष ए द्यो, क्यूँके परमेसवर नै थारे ताहीं इस खात्तर बणाया सै, के थम दुसरयां के खात्तर आशीष बण सको, जै थम इसा करोगे, तो परमेसवर थारे ताहीं भी आशीष देवैगा। 10 क्यूँके पवित्र ग्रन्थ कहवै सै, के “जै कोए इन्सान जिन्दगी का आनन्द ठाणा चाहवै सै, अर आच्छे दिन देखणा चाहवै सै, तो वो ध्यान राक्खे के बुरी बातें अर जो बात सच न्ही उन ताहीं ना बोल्लो। 11 जो बुरे काम सै, उन ताहीं करणा छोड़ दे, इसकी बजाए वो भले काम करै, अर एक-दुसरे के साथ शान्ति तै रहण का पूरा जतन करै। 12 क्यूँके प्रभु की आँख धर्मियाँ पै लागी रहवै सै, अर उसके कान उनकी बिनती की ओड़ लागे रहवै सै, पर प्रभु बुराई करण आळे तै दूर रहवै सै।” 13 जै थम सदा भले काम करो तो कोए थमनै नुकसान न्ही पहुहा सकदा। 14 जै थम धार्मिकता के कारण दुख भी ठाओ, तो थम धन्य सो, पर माणसां के डरण तै ना डरो, अर ना घबराओ, 15 पर अपणे-अपणे मन म्ह मसीह के प्रति आदर राक्खों, अर उस ताहीं अपना प्रभु जाणो। जो कोए थारे तै थारी आस के बारे म्ह बुड़झै, जो हम विश्वासियाँ की सै, तो उस ताहीं जवाब देण के खात्तर सारी हाण त्यार रहो, पर नम्रता अर आदर के गैल उस ताहीं जवाब द्यो। जो सही सै वोए करो, जै माणस थारे बारे म्ह बुरा बोल्लै सै, तो वो खुद शर्मिन्दा होवेंगे, जिब वो थारे आच्छे चाल-चलण नै देखवेंगे, क्यूँके मसीह के गैल थारा गहरा रिश्ता सै। 17 कई बार परमेसवर म्हारे ताहीं दुख अर मुसीबतां तै गुजारे सै, भलाए हम भला काम करदे हो, पर यो म्हारे खात्तर आच्छा सै, बजाए इसके के हम बुरे कामां के कारण दुख अर मुसीबत ठावां। 18 मसीह नै भी म्हारे पापां खात्तर एके बार अपनी जान दे दी, यानी के एक धर्मी नै सारे अधर्मियाँ खात्तर दुख ठाया, ताके वो थमनै परमेसवर तक ले जावै, उसकी शारीरिक मौत तो होई पर परमेसवर की आत्मा के जरिये वो जिन्दा करया गया। 19 तब उसकी आत्मा नै उन आत्मायाँ ताहीं सुसमाचार सुणाया, अर प्रचार करया जो उस जगहां पै परमेसवर के जरिये कैद करी गई थी, जित्त मेरे होए लोगां की आत्मा रहवै सै। 20 ये वो आत्मा सै, जिनने परमेसवर का भोत पैहले कहणा न्ही मान्या। जिब नूह जहाज बणाण लागरया था, तो परमेसवर धीरज तै देखण लागरया था, के ये लोग माफी माँगै सै के न्ही, पर पाणी नै पूरी दुनिया ताहीं नाश करया सिर्फ आठ माणस जो जहाज म्ह बचे थे। 21 उस्से पाणी का उदाहरण भी, यानिके बपतिस्मा, यीशु मसीह के जी उठण के जरिये, इब थमनै बचावै सै, इसतै देह का

मैल दूर करण का मतलब न्ही सै, पर शुद्ध अन्तरात्मा तै परमेसवर के पाच्छे हो जाणा सै। 22 वो सुर्ग पै जाके परमेसवर के सोळी ओड़ बैठ गया, अर सुर्गदूत अर अधिकारी अर सामर्थी उसके अधीन करे गये सै।

4 इस करकै मसीह नै दुख ठाया जिब उसनै देह रूप धारण करया, थारा भी रविया उस्से तरियां दुख उठाण का होणा चाहिए, जिसा उसका था, क्यूँके जै थमनै मसीह खात्तर दुख ठाण की सोच ली सै, तो थमनै पाप ना करण की भी सोच ली सै, ताके आगै तै कदे थम पाप ना करो। 2 उस कारण वो इन्सान अपनी बाकी की जिन्दगी, इस दुनिया म्ह पापमय अभिलाषायां नै पूरी करण के खात्तर न्ही इस्तमाल करदा, पर वो, वो करै सै जो परमेसवर उस ताहीं करण के खात्तर कहवै सै। 3 पैहले थमनै भोत सारा बखत वो काम करण म्ह बेकार कर दिया जिस म्ह गैर बिश्वासी खुशी मनावै सै, जिस तरियां लुचपण की बुरी अभिलाषाओ, मतवाळापण, लीलाक्रीड़ा, दारु-बाजी, जारी अर घृणित मूर्तिपूजा जिसे कामां तै परमेसवर नफरत करै सै। 4 इस कारण थारे पुराणे मित्तर अचम्भा करै सै, के थम इसे अंधाधुंध लुचपण म्ह उनका साथ न्ही देदे, अर वे इब थमनै गाळी देवै सै। 5 पर वे उसनै जो जिन्दयां अर मेरे होए माणसां का न्याय करण नै त्यार सै, लेक्खा देवेंगे। 6 योए कारण सै के सुसमाचार उन माणसां ताहीं सुणाया गया, जो इब मर चुके सै, हालाकि वे सब माणसां की तरियां मरण के जोगे ए थे, इब वे आत्मा म्ह परमेसवर के साथ हमेशा के खात्तर रहवै सै। 7 सारी बातां का अन्त तावळा होणआळा सै, इस करकै सावधान रह अर शान्त मन राख ताके तू प्रार्थना कर सकै। 8 सारया म्ह बढ़िया बात या सै के एक-दुसरे तै घणा प्यार करो, क्यूँके जै थम माणसां तै प्यार करोगे तो थम उन ताहीं माफ करण खात्तर तैयार रहोगे, जो थारा बुरा करै सै। 9 बिना कुड़कुड़ाए एक-दुसरे की मेहमान-नवाजी करो। 10 हरेक इन्सान ताहीं परमेसवर के जरिये काबलियत मिली सै अर वो उस काबलियत नै दुसरे लोगां की मदद करण खात्तर इस्तमाल करै, वो परमेसवर के आच्छे सेवक की तरियां उसके अनुग्रह के जरिये दिए गए वरदानां का बढ़िया इस्तमाल करै। 11 जै थारे धीरे प्रचार करण का वरदान सै, तो थमनै परमेसवर के वचन का प्रचार करणा चाहिए, जै थारे धीरे दुसरयां की मदद करण का वरदान सै, तो उस शक्ति तै करो जो परमेसवर नै थारे ताहीं दी सै, फेर जो भी काम करोगे, यीशु मसीह के जरिये परमेसवर नै महिमा मिलैगी, सारी महिमा अर सामर्थ युगानुयुग उस्से का सै। आमीन। (aiōn g165) 12 हे प्यारे बिश्वासी भाईयो, उन दुखां के खात्तर अचम्भा ना करो जो थम सहण लागरे सों, क्यूँके थम मसीह के कुहाओ सों, ये चीज इस खात्तर होण लागरी सै, क्यूँके सचमुच थम यीशु पै बिश्वास करो सों, तो इसा ना समझो के अनोक्खी बात थारे ए गैल होण लागरी सै। 13 इस बात खात्तर खुश होओ, के थम मसीह के दुख म्ह साझेदारी हो सके, उस बजह तै जिब मसीह बोहड़ के आवैगा, अपनी महिमा लोगां नै दिखाण खात्तर, तो थम खुशी तै भर जाओगे। 14 फेर जै मसीह के नाम के खात्तर थारी बुराई करी जावै सै तो थम धन्य सो,

क्यूँके परमेसवर की महिमामय आत्मा सै जो थारे म्ह रहवै सै। 15 जै दुख ठाओ सों, तो यो दुख खूनी, चोर, किसे बुरे काम, या किसे और के काम म्ह दखलंदाजी करण के कारण न्ही होणा चाहिए। 16 पर जै मसीह होण के कारण दुख पावै, तो शर्मिन्दा ना होइयो, पर इस बात के खात्तर परमेसवर की महिमा करो, क्यूँके थम उसके कुहाओ सों। 17 क्यूँके वो बखत आण पोंहच्या सै, के पैहल्या परमेसवर के माणसां का न्याय करया जावैगा, अर जिब के न्याय की शरूआत म्हारै ए तै होगी, तो उनका के अन्त होगा जो परमेसवर के सुसमाचार नै न्ही मानते? 18 जिसा पवित्र ग्रन्थ कतवै सै, के “जै धर्मी माणस ए मुश्किल तै उद्धार पावैगा, तो भगतिहीन अर पापी का के ठिकाणा?” 19 ज्यांतै जो परमेसवर की मर्जी के मुताबिक दुख ठावै सै, उननै परमेसवर पै सदा विश्वास करते रहणा चाहिए, जिसनै उन ताहीं बनाया सै। परमेसवर नै जो भी वादा करया सै, उस ताहीं वो हमेशा पूरा करै सै, इस खात्तर हमनै हमेशा भलाई करदे रहणा चाहिए।

5 थारे म्ह जो कलीसिया के अगुवें सै, मै थारे ताहीं कुछ बताणा चाहूँ सूँ, क्यूँके मै थारी तरियां बुजुर्ग सूँ, मन्नै खुद वे दुख देखे सै, जो मसीह नै भोत पैहले सहे सै, जिब वो बोहड़ के आवैगा तो मै भी उसकी महिमा म्ह शामिल होऊँगा। 2 जिस तरियां एक पाळी भेड्या की रुखाळी करै सै, उससे तरियां थमनै भी उन लोगां की रुखाळी करणी चाहिए, जिन ताहीं परमेसवर नै थारे ताहीं सौप्या सै, अर यो मजबूरी म्ह न्ही पर खुद की इच्छा तै राज्जी होकै करो, क्यूँके परमेसवर यो चाहवै सै के थम इसाए करो, पर इसा काम पईसा के खात्तर न्ही पर परमेसवर अर माणसां की सेवा करण खात्तर करो। 3 उन माणसां पै हक ना जमाओ, जो थारे ताहीं सौंपे गये सै, पर उनकै खात्तर बढ़िया मिसाल बणो। 4 जिब प्रभु यीशु मसीह जो के पाळीयाँ का प्रधान बोहड़ के आवैगा, तो थारे ताहीं वो महिमा का मुकुट दिया जावैगा जिसकी चमक कदे न्ही जावैगी। 5 इस्से ढाळ हे जवान्नों, थम भी कलीसिया के अगुवां का कहणा मान्नों, बल्के थम सारे के सारे दीनता तै एक-दुसरे की सेवा करते रहो, क्यूँके हम पवित्र ग्रन्थ म्ह पढ़ा सां, के “परमेसवर घमण्डियाँ का बिरोध करै सै, पर दीन पै अनुग्रह करै सै।” 6 इस करके परमेसवर के स्याम्ही दीन बणो, जो थमनै बचा सकै, ताके वो थमनै सही बखत आण पै बढ़ा सकै। 7 अपणी सारी चिन्ता परमेसवर ताहीं दे द्यो, क्यूँके उसनै थारा ध्यान सै। 8 सावधान रहो, अर जागदे रहो, क्यूँके थारा बिरोधी शैतान गरजनआळे शेर की ढाळ इस टाह म्ह रहवै सै, के किसनै पाड़ खावै, ताके थम परमेसवर की राह ना चाल सको। 9 विश्वास म्ह मजबूत होकै, अर न्यू जाणकै उसका सामना करो, के थारे भोत-से विश्वासी भाई जो दुनिया म्ह इसेए दुख सहण लागरे सै। 10 इब परमेसवर जो सारे अनुग्रह का दात्ता सै, जिसनै थारे ताहीं मसीह म्ह अपणी अनन्त महिमा के खात्तर बुलाया, थारे कुछ बखत तक दुख ठाण के पाच्छै आप ए थमनै सिध्द अर स्थिर अर मजबूत करैगा। (aiōnios g166) 11 उससे का साम्राज्य युगानुयुग रहवै। आमीन। (aiōn g165) 12 मन्नै या छोटी चिट्ठी

लिखकै सिलवानुस के हाथ थारे थारे भेजी सै, जिस ताहीं मै मसीह म्ह विश्वास जोगगा भाई समझूँ सूँ, मेरे लिखण का यो मकसद सै के मै थारे ताहीं उत्साहित कर सकूँ, अर थारे ताहीं विश्वास दिला सकूँ, के जो थम अनुभव करण लागरे सों, वो असलियत म्ह परमेसवर की करुणा का हिस्सा सै, थम उस कृपा म्ह बणे रहों। 13 जो विश्वासी बेबीलोन नगर म्ह सै, उन ताहीं भी परमेसवर नै चुण्या सै, जिस तरियां थारे ताहीं चुण्या, उनका अर मरकुस जो मेरे बेटे की तरियां सै, उसका थारे ताहीं नमस्कार। 14 आप्पस म्ह एक-दुसरे ताहीं गळे मिलकै प्यार तै नमस्कार करो। थम सारया ताहीं, जो मसीह म्ह हो, थमनै शान्ति मिलदी रहवै।

2 पतरस

1 या चिट्ठी शमौन पतरस की ओड़ तै सै, जो यीशु मसीह का दास अर प्रेरित सै, उन माणसां के नाम सै, जिन नै म्हारे परमेसवर अर उद्धारकर्ता यीशु मसीह की धार्मिकता के जरिये म्हारी तरियां बेसकिमती बिश्वास पाया सै। 2 मै प्रार्थना करूँ सूँ, के परमेसवर थारे ताहीं ज्यादा तै ज्यादा अनुग्रह अर शान्ति दे, जिस तरियां थम परमेसवर के ज्ञान अर म्हारे प्रभु यीशु मसीह म्ह बड़ण लागे सों। 3 परमेसवर जिसनै अपणी शक्ति के जरिये म्हारे ताहीं वो सब दिया सै, जो हमनै भगतिमय जिन्दगी जीण खात्तर चाहिए, यो इस खात्तर मुमकिन सै, क्यूँके हम परमेसवर नै जाणा सां, अर उसनै अपणी महिमा अर सद्गुणा के मुताबिक अपणे माणस होण खात्तर बुलाया सै। 4 अर उसकी महिमा अर भलाई के कारण उसनै म्हारे ताहीं बड़े महान अर कीमती वादे करे सै, ताके इनके जरिये थम इस दुनिया की बुरी लालसा तै बच जाओ, जिन ताहीं वे लोग करणा चाहवै सै, जो मसीह पै बिश्वास नही करदे, पर थम ईश्वरीय सुभाव के गैल-साइड्री हो जाओ। 5 इस कारण थम सिर्फ मसीह पै बिश्वास करण आळे नही, पर हमेशा दुसरयां की भलाई करण म्ह लागै रहों, अर सिर्फ भलाई ए नही बल्के बुद्धिमानी तै बरताव करण आळे भी बणो। 6 थम सिर्फ बुद्धिमानी तै ए बरताव करण आळे नही बल्के अपणे-आप पै काबू राक्खण आळे भी बणो, अर अपणे-आप पै काबू राक्खण आळे ए नही बल्के दुखां नै धीरज तै सहण आळे भी बणो, अर दुखां नै धीरज तै सहण आळे ए नही बल्के भगति म्ह जिन्दगी बिताण आळे भी बणो। 7 ना सिर्फ थम परमेसवर नै भावण आळी जिन्दगी जिओ, बल्के बिश्वासियाँ तै भी अपणे परिवार के माणस की तरियां प्यार करो, एक-दुसरे ताहीं अपणे परिवार के माणस की तरियां प्यार करण आळे ए नही बल्के सब नै प्यार करण आळे भी बणो। 8 जै थारे म्ह ये गुण मौजूद सै अर जै थारे म्ह इनकी बढ़ोतरी होण लागरी सै तो इनके कारण थम म्हारे प्रभु यीशु मसीह के सम्पूर्ण ज्ञान म्ह ना तो निकम्मे अर ना बिना फळ के होओगे। 9 जै कोए इन्सान इसी जिन्दगी नही बितान्दा, तो वो उस इन्सान की तरियां सै, जो सही तै नही देख पान्दा, अर वो आन्धा सै। वो भूल जावै सै के परमेसवर नै उसके पाप माफ कर दिये, जो उसनै मसीह पै बिश्वास करण तै पैहले करे सै। 10 इस कारण हे बिश्वासी भाईयो, आच्छा करण की कोशिश करदे रहों, ताके थम अपणे-आपनै अर दुसरे माणसां नै दिखा सको, के परमेसवर नै थारे ताहीं चुणया सै, अर बुलाया सै। जै थम इसाए करदे रहों, तो थम कदे भी परमेसवर तै अलग नही होओगे। 11 बल्के इस तरियां तै थम म्हारे प्रभु अर उद्धारकर्ता यीशु मसीह के अनन्त राज्य म्ह बड़े आदर के गैल बड़ण पाओगे। (aiōnios g166) 12 ज्यांतै हालाकि थम ये बात जाणो सो, अर जो सच्चा वचन थारे ताहीं मिल्या सै उस म्ह बणे रहो सो, तोभी मै थारे ताहीं ये बात याद दुवाण खात्तर सारी हाण त्यार रहूँगा। 13 मै यो जाणु सूँ के जब तक मै जिन्दा सूँ, यो सही सै, के मै उन बात्तां के बारे म्ह थारे तै बात करदा रहूँ, ताके

थम इन बात्तां नै कदे भूल ना जाओ। 14 क्यूँके मै जाणु सूँ के मै तावळा मरण आळा सूँ, अर प्रभु यीशु मसीह नै मेरे ताहीं इस बारे म्ह बता दिया सै। 15 ज्यांतै मै इसी कोशिश करूँगा, के मेरे इस दुनिया तै जाये पाछै, थम इन सारी बात्तां नै सारी हाण याद कर सको। 16 क्यूँके जब हमनै थारे ताहीं, अपणे प्रभु यीशु मसीह की सामर्थ अर बोहड़ण की खबर दी थी, तो हमनै श्याणपत तै गद्दी होई कहाँनियाँ का सहारा कोनी लिया, बल्के हमनै आप ए उसके प्रताप ताहीं देख्या था। 17 क्यूँके जब उसनै परमेसवर पिता तै आदर अर महिमा पाई जो के प्रतापमय महिमा सै, हमनै उस ताहीं यो कहन्दे सुणा, “यो मेरा प्यारा बेटा सै, जिसतै मै राज्जी सूँ।” फेर हम उसके गेल्या पवित्र पहाड़ पै थे, अर सुर्ग तै योए बोल आन्दे सुणया। 18 हम जाणा सां के जो वचन नबियाँ नै मसीह के बारे म्ह लिख्या सै, वो सच सै, थम इन वचनां नै गौर तै सुणो, जिस तरियां अन्धकार म्ह दीवै का चाँदणा, माणसां नै राह दिखावै सै, उससे तरियां ये वचन भी सच्चाई नै जाणण म्ह थारी मदद करैगें, थम इन वचनां नै ध्यान तै सुणते रहो, जब तक के यीशु मसीह बोहड़के ना आ जावै। उसका आणा एक नये दिन की सुबह की तरियां सै, जो उजाळा लेके आवै सै, अर वो सुबह के तारे की तरियां होगा। उस बखत उसका चाँदणा थारे मन म्ह चमकैगा, अर परमेसवर नै साफ तौर पै थारे पै जाहिर करैगा। 20 पर सबतै पैहले यो जाण ल्यो के पवित्र ग्रन्थ की कोए भी भविष्यवाणी, खुद नबियाँ का अपणा विचार कोनी 21 क्यूँके कोए भी भविष्यवाणी माणस की मर्जी तै कदे नही होई, पर भगतजन पवित्र आत्मा के जरिये उभारे जाके परमेसवर की ओड़ तै बोल्लै थे।

2 जिस तरियां इसाएली माणसां म्ह झूठे नबी थे, उससे ढाळ थारे म्ह भी झूठे शिक्षक होंगे, वे थारे ताहीं चुपके तै झूठी शिक्षा सिखावेंगे, जिसकी बजह तै लोग मसीह पै बिश्वास नही करैगें, वे झूठे शिक्षक मसीह ताहीं अपणा प्रभु नही मानैगें, जिसनै उन ताहीं मोल लिया सै, अर पाप की शक्ति तै आजाद करया सै, इस तरियां वे चाणचक अपणे-आप ताहीं नाश कर लेवेंगें। 2 घणखरे जो कहवेंगें के हम बिश्वासी सां, वे उनकी ढाळ लुचपण के सुभाव नै अपणावेंगे, अर उनके कारण जो लोग बिश्वासी कोनी सच के राह की बुराई करैगें। 3 ये शिक्षक लालची होंगे, अर थारे तै धन पाण कै खात्तर मनघडन्त कहाँनी सुणाकै थारे ताहीं थोक्खा देवेंगें, परमेसवर नै भोत पैहले फैसला ले लिया था, के वो उन ताहीं दण्ड देवैगा, अर वो यो करण आळा सै, वो सच म्ह उन ताहीं नाश करण आळा सै। 4 क्यूँके जब परमेसवर नै उन सुर्गदूतां ताहीं जिननै पाप करया था, उन ताहीं माफ नही करया, पर उन ताहीं नरक म्ह भेजकै अँधेरे कुण्डां म्ह गेर दिया ताके न्याय के दिन ताहीं कैदी रहवै। (Tartarōō g5020) 5 थम यो भी जाणो सों, के जो लोग भोत पैहले जिन्दा थे, उन म्ह परमेसवर का भय नही था, परमेसवर नै उनकी बुराईयाँ ताहीं नजरअंदाज कोनी करया, जो उननै करी थी, पर उन ताहीं बाढ़ के जरिये नाश कर दिया, उन म्ह तै परमेसवर नै आठ माणसां ताहीं बचाया जिस म्ह नूह भी था, जिसनै धार्मिकता का प्रचार करया। 6 थम यो भी जाणो

सों, के जो लोग भोत पैहल्या सदोम अर अमोरा के नगर म्ह रहवै थे, परमेसवर ने उन ताहीं भी दण्ड दिया, क्यूँके उननै भोत बुरे काम करे थे, अर उन ताहीं आग म्ह भस्म करके राख बणा दिया। इसा करण के जरिये उसनै दिखा दिया, के उन माणसां का के होगा जो उसका कहणा न्ही मानते। 7 सदोम नगर का नाश करण तै पैहले उसनै, लूत जो के एक धर्मी माणस था, उस ताहीं उस नगर तै लिकाड़के उस ताहीं बचा लिया। लूत दुखी था क्यूँके सदोम नगर के लोग परमेसवर का कोए भी हुकम कोनी मान्ने थे, अर वे भोत बुरे काम करै थे। 8 वो उन बुरे माणसां के बीच म्ह रहवै था, अर हरेक दिन उनके बुरे कामां नै देखखै था जो वे करै थे, अर बुरी बातां नै सुणै था जो वे बोल्लै थे, अर ये सारी बात उस ताहीं दुखी करै थी, क्यूँके वो धर्मी माणस था। 9 वे सारी बात जो परमेसवर नै पुराणे बखत म्ह करी सै, वे ये दिखावै सै, के परमेसवर पवित्र माणसां नै मुसीबतां तै किस तरियां बचावै सै, अर न्याय होण के दिन तक बुरे माणसां नै लगातार दण्ड दिया जावै। 10 परमेसवर बुरे माणसां नै दण्ड देवैगा, खास करके उन झूठे शिक्षकां नै जो अशुद्ध अभिलाषायां कै पाच्छै देह के मुताबिक चाल्दे, अर प्रभुता नै तुच्छ जाणै सै। वे ढीठ, अर जिद्दी सै, अर सुर्गीय चिज्जां के बारें म्ह आच्छा-भुंदा कहण तै न्ही डरदे। 11 तोभी सुर्गदूत जो झूठे शिक्षकां तै अर सामर्थ म्ह उनतै बड़े सै, प्रभु कै स्याम्ही जिब उन झूठे शिक्षकां पै दोष लगावै सै तो वे अपमानजनक बात कहकै उनकी बुराई न्ही करदे। 12 पर ये झूठे शिक्षक जंगली-जानवरां की तरियां सै, ये जानवर न्ही जाणते के किस तरियां सोचणा सै, अर उनका मकसद पकड़े जाणा अर मरणा सै। ये लोग भी वोए काम करै सै जो इनके मन म्ह आवै सै, अर उन चिज्जां के बारें म्ह बुराई करै सै, जिसके बारें म्ह वे न्ही समझते, वे नाश हो जावैंगे। 13 दुसरयां का बुरा करण कै बदले उन्हे का बुरा होवैगा। उननै दिन-दोफारी म्ह भोग-विलास करणा आच्छा लागै सै। ये थारे पै कलंक अर दोष सै, जिब वे थारे गेल्या प्रीति भोज म्ह शामिल होवै सै, तो अपने छलावे का आनन्द ले सै। 14 वो हरेक जनानी नै देखकै उसके साथ जारी करणा चाहवै सै, अर पाप करण का मौक्का टोहवै सै, ये उन माणसां ताहीं धोक्खा देवै सै जो परमेसवर पै पक्का बिश्वास कोनी राखदे, अर उन ताहीं पाप करण खात्तर उकसावै सै, उनकी सदा बढ़दी रहण आळी लालसा के कारण परमेसवर उन ताहीं दण्ड देवैगा। 15 उननै वो करणा छोड़ दिया सै, जो सही सै, अर उननै बओरे के बेटे बिलाम की तरियां बुरे काम करणे शुरु कर दिए, जो उसनै भोत पैहले करे थे, क्यूँके उसनै बुरे कामां तै पईसा कमाण्णा चाह्वा। 16 पर परमेसवर नै बिलाम नबी की गधी के जरिये उस ताहीं डांटा-फटकारा जो बुरे काम वो करण जावै था, हालाकि गधी जो बोल न्ही सकै थी, उसनै बिलाम नबी तै इन्सान की वाणी म्ह बात करी, जिब वो राजा तै मिलण जाण लागरया था, तो गधी नै बिलाम नबी ताहीं उसके बावळेण तै रोक्का। 17 ये झूठे शिक्षक उस बेकार पाणी के चौबे की तरियां सै जो सुख लिया सै, अर ये उस बादळ की तरियां भी सै जिस ताहीं बारिस तै पैहले हवा उड़ा ले जावै सै, परमेसवर नै उन खात्तर,

अनन्त अन्धकार म्ह जगहाँ राक्खी सै। (questioned) 18 जिब वे माणसां नै सिखावै सै तो वो बेकार के अर घमण्डी शब्दां नै इस्तमाल करै सै, वे माणसां नै समझावै सै के वो बुरे काम कर सकै सै जो उनकी देह करणा चाहवै सै, अर उन माणसां तै भी दुबारा धोक्खें तै पाप करवाणा चाहवै सै, जो बुरी जिन्दगी तै बाळ-बाळ बचे सै। 19 ये झूठे शिक्षक माणसां ताहीं कहवै सै के थम सारे काम करण खात्तर आजाद सों, जो थम करणा चाहों सों, पर वो खुद गुलाम की तरियां सै, क्यूँके उनका पापी सुभाव उन ताहीं बुरे काम करवावै सै, थम हर उस चीज के गुलाम सों जो थमनै काबू करै सै। 20 माणस इस दुनिया की बुराईयां तै भाज्जै सै जिब वो मसीह यीशु नै अपना उद्धारकर्ता मान लेवै सै, पर वे फेर तै बुरे काम करण लागै सै, अर वे बुरी चीज उन ताहीं काबू म्ह राक्खै सै, इब उनकी दशा जो के मसीह नै छोड़ देण तै सै, वो पैहल्डी दशा तै भी भुंड़ी सै, जिब उननै मसीह पै बिश्वास करया था। 21 मेंरे कहण का मतलब यो सै, के परमेसवर उन माणसां ताहीं घणा दण्ड देवैगा जो मसीह ताहीं छोड़ देवै सै, उन माणसां तै ज्यादा जो उस ताहीं कदे न्ही अपनादे, उन खात्तर यो ठीक होन्दा के वो कदे न्ही जाणते के धार्मिकता का जीवन किस तरियां जीणा सै, उन ताहीं बेरा सै के सही के सै, पर वो परमेसवर के हुकम नै कोनी मानते जो हम प्रेरितां नै उन ताहीं सिखाये सै। 22 उनपै ये दो कहावत सही बेट्टे सै, के कुत्ता अपना उलटी नै चाट्टे सै, अर नुहाई होई सुरी कीचड़ म्ह लोट्टण कै खात्तर फेर चली जावै सै।

3 हे प्यारे बिश्वासी भाईयो, इब मै थारे ताहीं दुसरी चिट्ठी लिक्खूँ सूँ, अर मै दोन्नु चिट्ठियाँ म्ह थारे ताहीं कुछ चीज याद दुआ के थमनै सही ढंग तै सोच्यण खात्तर उत्साहित करण की कोशिश करण लागरया सूँ, जो थमनै पैहले तै सीख ली सै। 2 मै यो इस करके करण लागरया सूँ, क्यूँके मै थमनै उन नबियाँ के शब्द याद दुवाणा चाहूँ सूँ, जो उननै भोत पैहले कहे अर प्रभु यीशु मसीह जो म्हारा उद्धारकर्ता सै, उसकी शिक्षा जो थमनै उन प्रेरितां तै सीखी जो थारे धोरे आए थे। 3 यो जाण ल्यो के आखरी के दिनां म्ह मसीह के आण तै पैहल्या भोत-से इसे माणस होवैंगे जो थारा मजाक उड़ावैंगे, क्यूँके थम बिश्वास करो सों के मसीह बोहड़ के आवैगा, अर वे बुरे तै बुरा काम करैंगे जो उन ताहीं खुश करै सै। 4 अर कहवैंगे, “उसके आण का वादा किन्त गया? क्यूँके जिब तै उनके पूर्वज सो ग्ये सै, सारा किमे उससे तरियां ए सै जिस तरियां सृष्टि की शुरुआत तै था?” 5 वो इस करके कहवैंगे क्यूँके वो भूलणा चाहवै सै, के परमेसवर के वचन के जरिये अकास पुराणे बखत तै विद्यमान सै। उसनै धरती ताहीं भी पाणी म्ह तै बणाया अर पाणी तै न्यारा करया। 6 यो उनके मजाक का ए नतिज्जा था, के बाद म्ह उसनै एक बड़ी बाढ़ के जरिये इस दुनिया ताहीं पाणी म्ह डूबो के नाश कर दिया। 7 पर परमेसवर नै इब के बखत का अकास अर धरती उससे वचन के जरिये ज्यातै राख राक्खे सै, के जळाए जावै, अर ये भगतिहीन माणसां के न्याय अर नाश होण के दिन ताहीं इसेए धरे रहवैंगे। 8 हे प्यारे बिश्वासी भाईयो, या बात थारे तै लुक्की ना रहवै के प्रभु के उरै एक दिन हजार

साल कै बराबर सै, अर हजार साल एक दिन कै बराबर सै, उसके खात्तर दोन्नु एक्के सै। 9 प्रभु अपणे वादे कै बारै म्ह वार न्ही करदा, जिसे देर कुछ माणस समझै सै, पर थारे बारै म्ह धीरज धरै सै, अर न्ही चाहन्दा के कोए नाश हो, बल्के यो, के सारया ताहीं मन पलटन का मौक्का मिलै। 10 पर मसीह जरुर बोहड़ के आवैगा, उस दिन अकास म्ह बड़ा गरजण होगा अर अकास गायब हो जावैगा, जो कुछ अकास म्ह सै जिस तरियां सूरज, चाँद अर तारे ये सब आग म्ह पूरी तरियां जळ जावेंगे, उस दिन परमेसवर सब जाहिर करैगा, अर इस दुनिया म्ह होण लागरे सारे काम्मां का भी न्याय करैगा। 11 जिव के ये सारी चीज इस तरियां तै पिंघळ के खतम होण आळी सै, तो थारे ताहीं पवित्र चाल-चलण अर भगति म्ह किस ढाळ का माणस होणा चाहिये, 12 जिव थम उस दिन की बात देखो सों जिव परमेसवर इस दुनिया का न्याय करण आवैगा, तो उस दिन ताहीं तावळा ल्याण खात्तर पूरी कोशिश करो, उस दिन आग अकास ताहीं जळा कै भस्म कर देवैगी अर जो कुछ अकास म्ह सै उस ताहीं गर्मी पिंघळा देवैगी। 13 पर उसके वादे के मुताबिक हम एक नये अकास अर नयी धरती की आस देख्खां सां, जिस म्ह परमेसवर की धार्मिकता वास करैगी। 14 जिव के थम इन बात्तां नै पूरा होण की बात देखो सों तो थम इसी जिन्दगी जिओ जो परमेसवर नै पसन्द सै यानी थम एक-दुसरे के साथ शान्ति तै उसके स्याम्ही बेदाग अर बेकसूर रहो। 15 यो जाण ल्यो के, क्यूँ म्हारा प्रभु धीरजवान सै? क्यूँके वो माणसां नै कुछ और बखत देणा चाहवै सै, ताके वो पाप करणा छोड़ दे, अर वो उन ताहीं बचा सकै, जिव म्हारा संगी विश्वासी भाई पौलुस जिसतै हम प्यार करां सां, उसनै परमेसवर के ज्ञान के जरिये थारे ताहीं लिख्या सै, उसनै भी थारे ताहीं येए बात बताई सै, जो मन्नै थारे ताहीं बताई सै। 16 उस्से तरियां ए उसनै अपणी सारी चिट्टियाँ म्ह भी जो विश्वासियाँ ताहीं लिखी सै इन बात्तां का जिक्र करया सै, जिन म्ह कुछ बात इसी सै जिनका समझणा ओक्खा सै, अर अनपढ़ अर चंचल माणस उनके मतलबां नै गलत तरिककें तै बतावै सै जिसा वो पवित्र ग्रन्थ की दुसरे वचनां का गलत मतलब लिकाड़ै सै, इसा करके वो परमेसवर नै मजबूर करै ताके वो उन ताहीं नाश करदे। 17 ज्यांतै हे प्यारे विश्वासी भाईयो, थम जाणो सों, के ये सारी बात होवैगी, तो ध्यान राक्खों के जो लोग परमेसवर का हुकम ताहीं न्ही मानते वो झूठ के जरिये थारे ताहीं बहका ना दे, अर उन बात्तां के बारें म्ह शक करण लागरे सों, जिनपै पैहले विश्वास करो थे। 18 पर म्हारे प्रभु अर उद्धारकर्ता यीशु मसीह के अनुग्रह अर ज्ञान की पहचान म्ह बढ़दे जाओ। उस्से की महिमा इब भी हो, अर युगानुयुग होन्दी रहवै। आमीन। (aiōn g165)

1 यूहन्ना

1 हम उस जीवन देण आळे वचन के बारे म्हा लिखण लागरे सां, जो शरु तै था, जिस तार्हीं हमनै सुणया, अर जिस तार्हीं हमनै अपणी आँखां तै देखा, बल्के जिस तार्हीं हमनै ध्यान तै देखा अर हाथ्यां तै छुआ। 2 (यो जीवन दुनिया म्हा आया अर हमनै इस तार्हीं देखा, अर हम उसके गवाह सां, अर थमनै उस अनन्त जीवन की खबर देवां सां, जो पिता के गैल था अर म्हाऱै पै जाहिर होया)। (aiōnios g166) 3 जो किमे हमनै यीशु मसीह के बारे म्हा देखा अर सुणया सै उसकी खबर थमनै भी देवा सां, इस करकै के थम भी म्हाऱै गैल संगति करो; अर म्हाऱी या संगति पिता अर उसके बेट्टे यीशु मसीह के गैल सै। 4 अर ये बात हम इस करकै लिखा सां ताके थम खुशी तै भर जाओ। 5 जो खबर हमनै यीशु मसीह तै सुणी अर थमनै सुणावां सां, वो या सै के परमेसवर चाँदणे के समान पवित्र सै, अर उस म्हा कुछ भी अन्धकार के समान कोए बुराई कोनी। 6 जै हम कहवां, के परमेसवर के गैल म्हाऱी संगति सै पर फेर भी अन्धकार म्हा चाल्लां, तो हम झूठे सां अर सच की राह पै कोनी चाल्दे; 7 पर जिसा परमेसवर चाँदणे के समान सै, उसेए हम भी चान्दणा म्हा चाल्लां, तो एक-दुसरे तै संगति राक्खा सां, अर उसके बेट्टे यीशु मसीह का लहू हमनै सारे पाप तै शुद्ध करै सै। 8 जै हम कहवां के म्हाऱै म्हा कोए भी पाप कोनी, तो अपणे-आपनै धोक्खा देवा सां, अर म्हाऱै म्हा सच्चाई कोनी। 9 जै हम अपणे पाप नै परमेसवर के स्याम्ही मान ल्या, तो वो म्हाऱे पाप नै माफ करण म्हा भरोसेमन्द अर धर्मी सै, अर वो हमनै सारे अधर्म तै शुद्ध करै सै। 10 जै हम कहवां के हमनै पाप न्ही करया, तो परमेसवर नै झूठा बणावा सां, अर हम उसके वचन के मुताबिक जीवन कोनी जिन्दे।

2 हे मेरे प्यारे बाळकों, मै ये बात थारे तार्हीं इस करकै लिखूँ सूँ, के थम पाप ना करो; अर जै कोए पाप करै, तो परमेसवर पिता के धोरे म्हाऱा एक मददगार सै, यीशु मसीह जो धर्मी सै, जो म्हाऱे पापां की माफी खात्तर पिता तै बिनती करै सै। 2 यीशु मसीह ए म्हाऱे पापां के खात्तर प्रायश्चित्त बलि सै, अर सिर्फ म्हाऱे ए न्ही बल्के सारी दुनिया के माणसां के पापां खात्तर भी। 3 जै हम परमेसवर के हुकम का पालन करांगे, उस्से तै हमनै बेरा लागैगा के हम उस तार्हीं जाणागे सां। 4 जो कोए या कहवै सै, “मै उसनै जाण गया सूँ” अर उसके हुकम नै न्ही मानता, यो वो माणस झूठा सै, उस म्हा सच कोन्या; 5 पर जो कोए परमेसवर के वचन नै मान्ने सै, उस म्हा सचमुच परमेसवर का प्यार सिध्द होया सै, परमेसवर म्हा म्हाऱे बणे रहण का सबूत योए सै, इस्से तै हम जाणा सां के हम उस म्हा सां। 6 जो कोए या कहवै सै के मै मसीह यीशु म्हा बण्या रहूँ सूँ, तो उसके खात्तर जरूरी सै, के जिसा मसीह यीशु जिया उसाए वो भी जीवै। 7 हे प्यारे विश्वासी भाईयो, मै थमनै कोए नया हुकम न्ही, पर वोए पुराणा हुकम लिखूँ सूँ, जो शरु तै था, यो वाए हुकम सै, जिस तार्हीं थमनै मसीह म्हा विश्वास करते बखत सुणया था। 8

फेर भी मै थमनै नया हुकम लिखूँ सूँ, उस हुकम की सच्चाई मसीह म्हा थी, अर वाए थारे म्हा भी सै; क्यूँके अन्धकार मिटता जावै सै, अर सच का चान्दणा इब चमकण लाग्या सै। 9 जो कोए या कहवै सै, के मै चाँदणे म्हा रहूँ सूँ, पर अपणे विश्वासी भाई तै बैर राक्खै सै, तो वो इब तार्हीं अन्धकार म्हा ए रहण लागरया सै। 10 जो कोए अपणे विश्वासी भाई तै प्यार करै सै, वो चान्दणा म्हा रहवै सै, अर उस म्हा इसा कुछ कोनी के दुसरयां नै पाप करवावै। 11 पर जो कोए अपणे विश्वासी भाई तै बैर राक्खै सै, वो अन्धकार म्हा रहवै सै अर अन्धेरे म्हा चाल्ले सै, अर न्ही जाणदा के कित्त जावै सै, क्यूँके अन्धकार नै उसकी आँख आँधी कर दी सै। 12 हे बाळकों, मै थमनै इस करकै लिखूँ सूँ के यीशु के नाम तै थारे पाप माफ होए सै। 13 हे बुजुर्गों, मै थमनै इस करकै लिखूँ सूँ के जो शरु तै सै, थम उसनै जाणो सों। हे गबरूओ, मै थमनै इस करकै लिखूँ सूँ के थमनै उस शैतान पै जीत पाई सै। हे लड़को, मन्ने थारे तार्हीं इस करकै लिखा सै के थम पिता परमेसवर नै जाणगे सों। 14 हे बुजुर्गों, मन्ने थारे तार्हीं इस करकै लिखा सै, के जो शरु तै सै, थम पिता परमेसवर नै जाणगे सों। हे गाबरूओ, मन्ने थारे तार्हीं इस करकै लिखा सै, के थम ताकतवर बणो, अर परमेसवर का वचन थारे म्हा बणा रहवै सै, अर थमनै उस शैतान पै जीत पाई सै। 15 थम ना तो दुनिया तै अर ना दुनियावी चिज्जां तै प्यार राक्खो। जै कोए दुनिया तै प्यार राक्खै सै, तो उस म्हा पिता परमेसवर का प्यार कोन्या। 16 क्यूँके जो किमे दुनिया म्हा सै, यानी देह की अभिलाषा, आँखां की अभिलाषा अर रोजी रोटी का घमण्ड, वो पिता परमेसवर की ओड़ तै कोनी पर दुनिया की ए ओड़ तै सै। 17 दुनिया अर उसकी अभिलाषा दोनु मिटते ज्या सै, पर जो परमेसवर की मर्जा पै चाल्ले सै वो सदा बण्या रहवैगा। (aiōn g165) 18 हे बाळकों, यो मसीह के आण का आखरी बखत सै; अर जिसा थमनै सुणया सै, के मसीह का बिरोधी भी आण आळा सै, उसके मुताबिक इब भी घणेए मसीह बिरोधी उठ खड़े होए सै; इस्तै हम जाणगे सां, के यो आखरी बखत सै। 19 मसीह बिरोधी लिकड़ै तो म्हाऱी कलीसिया म्हा ए तै सै, पर वे म्हाऱे थे ए कोनी; जै वे म्हाऱे होन्दे, तो हमनै छोड़ के ना जान्दे; उनका म्हाऱे तार्हीं छोड़ के जाणा ए यो साबित करै सै, के उन म्हा तै कोए भी म्हाऱा कोनी था। 20 पर थारे तार्हीं तो पवित्र आत्मा मसीह के जरिये मिला सै, इस करकै थम सारी सच्चाई नै जाणो सों। 21 मन्ने थारे तार्हीं इस करकै न्ही लिखा, के थम सच्चाई नै न्ही जाणदे, पर इस करकै के थम उस तार्हीं जाणो सों, क्यूँके कोए भी झूठ, सच की ओड़ तै कोनी लिकड़ता। 22 झूठा कौण सै? सिर्फ वो जो यीशु नै मसीह होण तै नाटै सै; अर मसीह का बिरोधी वोए सै, जो पिता परमेसवर का अर बेट्टे का इन्कार करै सै। 23 जो कोए बेट्टे नै (मानण) तै नाटै सै उसके धोरे पिता परमेसवर भी कोनी जो बेट्टे नै मान ले सै, उसके धोरे पिता परमेसवर भी सै। 24 जो संदेश थमनै शरु तै सुणया सै, जिब थमनै मसीह पै विश्वास करया, जै वो थारे म्हा बण्या रहवै, तो थम भी बेट्टे म्हा अर पिता परमेसवर म्हा बणै रहोगे। 25 परमेसवर नै म्हाऱे तै वादा करया

सै, के वो हमने अनन्त जीवन देवैगा। (aiōnios g166) 26 मै थारे ताहीं उन माणसां के बारे म्ह चेतावनी देऊ सूं, जो थमने झूठी शिक्षा तै भरमावे सै; 27 अर थारे म्ह पवित्र आत्मा जो मसीह की ओड़ तै मिला सै, वो थारे म्ह रहवै सै; इस करके यो जरूरी कोनी, के कोए थमने उस सच्चाई के बारे म्ह सिखावे, बल्के पवित्र आत्मा थारे ताहीं उन बातां की सारी सच्चाई बतावे सै, अर पवित्र आत्मा जो थारे ताहीं सिखावैगा, वो बिल्कुल सच सै, अर थारे तै झूठ कोनी बोल्लैगा, इस करके मसीह म्ह बणे रहो, जिसा थारे ताहीं पवित्र आत्मा नै सिखाया सै। 28 हे बाळकों, मसीह म्ह बणे रहो, के जिब वो दुबारा आवैगा, तो म्हारी हिम्मत बणी रहवै, ताके मसीह के आण पै उसके स्याम्ही शर्मिन्दा ना होआ। 29 जै थम जाणो सों, के मसीह धर्मी सै, अर जो कोए धर्म का काम करै सै, वो परमेसवर की ऊलाद सै।

3 सोच्चों तो सही के पिता परमेसवर नै म्हारे तै किसा प्यार करया, के हम पिता परमेसवर की ऊलाद कुहवाए; अर हम सां भी। पर इस कारण दुनिया के माणस हमनै कोनी जाणते, के हम परमेसवर की ऊलाद सां, क्यूँके वे पिता परमेसवर नै भी कोनी जाणते। 2 हे मेरे प्यारे बिश्वासी भाईयो, इब हम परमेसवर की ऊलाद सां अर इब ताहीं यो तय न्ही होया, के आण आळे बखत म्ह हम के बणांगे! इतणा जाणा सां के जिब यीशु मसीह आवैगा तो हम उसके समान होवांगे, क्यूँके हम मसीह नै उसेए दिक्खांगे जिसा वो सै। 3 अर जो कोए मसीह पै या आस राक्खै सै, वो अपने-आपने उसाए पवित्र करै सै, जिसा वो पवित्र सै। 4 जो कोए बार-बार पाप करै सै, वो नियम-कायदा का बिरोध करै सै। अर हुकम ना मानना ए पाप सै। 5 थम जाणो सों के मसीह इस खात्तर आया, ताके पाप नै दूर करै; अर उसके म्ह कोए भी पाप कोनी। 6 जो कोए उस म्ह बणया रहै सै, वो बार-बार पाप न्ही करदा: जो कोए बार-बार पाप करै सै, वे कोनी जाणते के मसीह कौण सै, अर ना ए उसके गैल कोए उनका रिश्ता सै। 7 हे बाळकों, किसे के बहकावै म्ह ना आइयो। जो धर्म के काम करै सै, वोए मसीह के समान धर्मी सै। 8 जो कोए पाप करदा रहवै सै, वो शैतान की ओड़ तै सै, क्यूँके शैतान शरु तै ए पाप करदा आया सै। परमेसवर का बेटा इस खात्तर आया के शैतान के काम्मां का नाश करै। 9 जो परमेसवर की ऊलाद सै, वो बार-बार पाप न्ही करदा; क्यूँके मसीह का सुभाव उस म्ह बणया रहवै सै, अर वो पाप कर ए न्ही सकता, क्यूँके वो परमेसवर की ऊलाद सै। 10 परमेसवर की अर शैतान की ऊलाद की पिच्छाण इस्से तै हो ज्या सै: कोए भी माणस, जिसका जीवन धार्मिकता का कोनी, वो परमेसवर की ओड़ तै कोनी, अर ना ए वो, जिसनै अपने भाई तै प्यार न्ही करया। 11 जो खबर थमनै शरु तै सुणी, वो या सै के हम एक-दुसरे तै प्यार करां; 12 अर आदम के बेटे कैन की ढाळ ना बणो, जो उस शैतान की ओड़ तै था, अर जिसनै अपने भाई ताहीं मार दिया। अर उस ताहीं क्यूँ मारया? क्यूँके उसके खुद के काम बुरे थे, अर उसके भाई के काम धर्म

के थे। 13 हे बिश्वासी भाईयो, जै दुनिया के माणस थारे तै बैर करै सै तो अचम्भा ना करो। 14 हम जाणा सां, के हम मौत के मुँह तै लिंकड़के जीवन म्ह दाखल होवा सां; क्यूँके हम बिश्वासी भाईयाँ तै प्यार राक्खा सां। जो प्यार न्ही राखदा वो मृत्यु के सिक्न्जे म्ह रहवै सै। 15 जो कोए अपने बिश्वासी भाई तै बैर राक्खै सै, वो हत्यारा सै; अर थम जाणो सों के हत्यारे म्ह अनन्त जीवन न्ही रहन्दा। (aiōnios g166) 16 प्यार के सै? इस्से तै हमनै जाण लिया के यीशु मसीह नै म्हारे खात्तर अपनी जान दे दी; इस करके हमने भी अपने बिश्वासी भाईयाँ के खात्तर जान देणी चाहिए। 17 पर जिस किसे के धारे दुनिया की दौलत हो अर वो अपने बिश्वासी भाई नै कंगाल देखके उसपै तरस ना खावे, तो उस म्ह परमेसवर का प्यार किस तरियां बणया रहै सके सै? 18 हे प्यारे बाळकों, म्हारे बोल्लण तै ए न्ही, पर काम अर सच्चाई म्ह भी म्हारा प्यार दिखणा चाहिए। 19 जिब हम दुसरयां तै प्यार करां सां, तो हम जाण लेवां सां, के हम सच के सां; अर जिस बात म्ह म्हारा मन हमनै दोष देवै सै, उसके बारे म्ह हम परमेसवर के आगै अपने-अपने मन नै होसला दे सकां सां; 20 जै बुरे काम की बजह तै म्हारा मन हमनै दोषी बणावे तोभी हम परमेसवर के स्याम्ही जा सकां सां, क्यूँके परमेसवर म्हारे मन तै बड़ा अर सब कुछ जाणण आळा सै। 21 हे प्यारे बिश्वासी भाईयो, जै म्हारा मन हमनै दोष ना दे, तो हमनै परमेसवर के आगै जाण म्ह होसला मिलै सै। 22 अर जो कुछ हम परमेसवर तै माँगणा सां, वो हमनै उसतै मिलै सै, क्यूँके हम उसके हुकम नै मानना सां अर जो उसनै आच्छा लागै सै, वोए हम करा सां। 23 उसका हुकम यो सै के हम उसके बेटे यीशु मसीह पै बिश्वास करा, अर जिसा उसनै म्हारे ताहीं हुकम दिया सै उससे के मुताबिक हम आप्स म्ह प्यार करां। 24 जो परमेसवर के हुकम नै मानै सै, वो परमेसवर म्ह वास करे सै, अर वो उन म्ह वास करे सै: अर इस्से तै, हम जाणा सां, के वो म्हारे म्ह रहवै सै उस पवित्र आत्मा के जरिये जो उसनै म्हारे ताहीं दिया सै।

4 हे प्यारे बिश्वासी भाईयो, हरेक आत्मा का बिश्वास ना करो, बल्के आत्मायाँ नै परखो के वो परमेसवर की ओड़ तै सै के न्ही; क्यूँके घणखरे झूठे नबी दुनिया म्ह उठ खड़े होए सै। 2 परमेसवर की आत्मा थम इस रीति तै पिच्छाण सको सों: जो आत्मा मान ले सै के यीशु मसीह देह धारण करके आया सै, वो परमेसवर की ओड़ तै सै। 3 अर जो आत्मा यीशु नै न्ही मानती, वो परमेसवर की ओड़ तै न्ही सै; अर वोए तो मसीह के बिरोधी की आत्मा सै, जिसका जिक्क थमने सुणया सै के वो आण आळा सै, अर इब भी दुनिया म्ह सै। 4 हे प्यारे बाळकों, थम परमेसवर के लोग सों, अर थमनै झूठे नबियाँ पै जीत पाई सै; क्यूँके पवित्र आत्मा जो थारे म्ह बसै सै, वो शैतान तै बड़ड़ा सै, जो इस दुनिया म्ह सै। 5 झूठे नबी दुनिया के लोग सै, इस कारण वे दुनिया की बात बोल्लै सै, अर लोग उनकी सुणो सै। 6 हम परमेसवर के लोग सां। जो परमेसवर नै जाणै सै, वो म्हारी सुणै सै; जो परमेसवर नै न्ही जाणता वो म्हारी न्ही सुणदा। इस ढाळ हम सच की आत्मा अर भ्रम की आत्मा नै

पिच्छाण लेवां सां। 7 हे प्यारे बिश्वासी भाईयो, हम आप्पस म्ह प्यार करां; क्यूँके प्यार परमेसवर की ऊलाद तै सै, जो कोए प्यार करै सै, वो परमेसवर की ऊलाद सै, अर वो परमेसवर नै जाणै सै। 8 जो दुसरयां तै प्यार न्ही करते, वो परमेसवर नै न्ही जाण्दा, क्यूँके परमेसवर प्यार सै। 9 जो प्यार परमेसवर म्हारै तै करै सै, वो इसतै जाहिर होया के परमेसवर नै अपणे इकलौते बेट्टे ताहीं दुनिया म्ह भेज्जा सै, ताके हम उसके जरिये सच्चे जीवन नै पावां। 10 प्यार वो न्ही जो हमनै परमेसवर तै करया सै, बल्के प्यार वो सै जो उसनै म्हारै तै करया, के म्हारे पापां के प्रायश्चित के खात्तर अपणे बेट्टे ताहीं भेज्जा। 11 हे प्यारे बिश्वासी भाईयो, जिब परमेसवर नै म्हारै ताहीं इसा प्यार करया, तो हमनै भी आप्पस म्ह प्यार करणा चाहिए। 12 परमेसवर ताहीं भी किसे नै न्ही देख्वा; जै हम आप्पस म्ह प्यार करां, तो परमेसवर म्हारै म्ह बसा रहवै सै अर उसका प्यार म्हारै म्ह सिध्द होग्या। 13 इस्से तै हम जाणा सां के हम उस म्ह बणे रहा सां, अर वो म्हारै म्ह; क्यूँके उसनै अपणे पवित्र आत्मा म्ह तै म्हारै ताहीं दिया सै। 14 हमनै देख भी लिया अर गवाही देवा सां के पिता परमेसवर नै बेट्टे ताहीं दुनिया का उद्धारकर्ता बणाके भेज्जा सै। 15 जो कोए या मान ले सै के यीशु परमेसवर का बेट्टा सै, परमेसवर उस माणस म्ह वास करै सै, अर वो परमेसवर म्ह। 16 हम जाणगे सां, अर हमनै बिश्वास सै के परमेसवर म्हारै तै प्यार करै सै। परमेसवर प्यार सै, अर जो प्यार म्ह बणया रहवै सै, वो परमेसवर म्ह वास करै सै, अर परमेसवर उस म्ह वास करै सै। 17 इस्से तै प्यार म्हारै म्ह सिध्द होया, के न्याय के दिन हमनै यो होसला मिलै, के परमेसवर हमनै दण्ड न्ही देगा। जिसा मसीह दुनिया म्ह रहन्दे होए परमेसवर म्ह वास करै था, उसाए हम भी परमेसवर म्ह वास करां सां। 18 प्यार म्ह डर न्ही होंदा, बल्के सिध्द प्यार डर नै दूर करदे सै; क्यूँके डर का सम्बन्ध दण्ड तै होवै सै, अर जो डरै सै वो प्यार म्ह सिध्द न्ही होया। 19 हम इस करके प्यार करा सां, के पैहले उसनै म्हारै तै प्यार करया। 20 जै कोए कहवै, “मै परमेसवर तै प्यार करूँ सूँ” पर अपणे बिश्वासी भाई तै बैर राख्खे तो वो झूठा सै; क्यूँके जो अपणे बिश्वासी भाई तै जिस ताहीं उसनै देख्वा सै प्यार न्ही कर सकता, तो वो परमेसवर तै भी जिस ताहीं उसनै न्ही देख्वा प्यार न्ही कर सकता। 21 परमेसवर तै हमनै यो हुकम मिल्या सै, के जो कोए परमेसवर तै प्यार राख्खे सै वो अपणे भाई तै भी प्यार राख्खे।

5 जिसका यो बिश्वास सै, के यीशु ही मसीह सै, वो परमेसवर पिता की ऊलाद सै; अर जो कोए परमेसवर तै प्यार करै सै, वो उसके माणसां तै भी प्यार करैगा। 2 जिब हम परमेसवर तै प्यार करां सां अर उसके हुकम नै मान्ना सां, तो इस्से तै हम जाणा सां, के हम परमेसवर अर उसके माणसां तै प्यार करां सां। 3 परमेसवर तै प्यार करण का मतलब यो सै के हम उसके हुकमां नै मान्ने; अर उसके हुकम मुश्किल कोन्या। 4 क्यूँके जो परमेसवर पिता की ऊलाद सै, उसनै दुनिया पै जीत हासिल करी सै; अर वा जीत दुनिया ताहीं हरा देवै सै, वो म्हारा बिश्वास ए सै। 5 दुनिया पै जीत पावैण आळा कौण सै? सिर्फ वो जिसका यो बिश्वास सै

के यीशु ए परमेसवर का बेट्टा सै। 6 मसीह यीशु ए सै, जिसनै बपतिस्मा लिया अर म्हारे खात्तर सूळी पै अपना लहू भी बहाया। 7 गवाही देण आळे तीन सै। 8 आत्मा, पाणी अर लहू; ये तीन्नु एके बात पै सहमत सै। 9 जिब हम माणसां की गवाही मान ल्यां सां, तो परमेसवर की गवाही तो उसतै बढ़के सै; अर परमेसवर की गवाही या सै के उसनै अपणे बेट्टे के बारे म्ह गवाही दी सै। 10 जो परमेसवर कै बेट्टे पै बिश्वास करै सै, वो अपणे मन म्ह ए बिश्वास राख्खे सै। जिसनै परमेसवर पै बिश्वास न्ही करया उसनै परमेसवर ताहीं झूठा बताया, क्यूँके उसनै उस गवाही पै बिश्वास न्ही करया जो परमेसवर नै अपणे बेट्टे के बारे म्ह दी सै। 11 अर वा गवाही या सै के परमेसवर के बेट्टे के जरिये हमनै अनन्त जीवन पाया सै, अर यो जीवन उसके बेट्टे म्ह सै। (aiōnios g166) 12 उसके बेट्टे तै म्हारा गहरा रिश्ता सै, उसके धौरै अनन्त जीवन सै; अर जिसका परमेसवर के बेट्टे तै रिश्ता कोनी, उसके धौरै अनन्त जीवन भी कोनी। 13 मै या चिट्ठी थारे ताहीं लिखूँ सूँ, जो परमेसवर कै बेट्टे के नाम पै बिश्वास करो सां, ताके थम जाणगे के अनन्त जीवन थारा सै। (aiōnios g166) 14 हमनै परमेसवर कै स्याम्ही यो होसला मिलै सै, वो होसला यो सै, के जो हम उसकी इच्छा के मुताबिक माँगसां, तो वो म्हारी सुणै सै। 15 जिब हम जाणा सां, के जो कुछ परमेसवर तै मांग्या सै, वो म्हारी सुणै सै, तो यो भी जाणा सां, के जो कुछ हमनै परमेसवर तै मांग्या, वो पाया सै। 16 जै कोए अपणे बिश्वासी भाई नै इसा पाप करते देख्खे, जिसका नतिज्जा मौत ना हो, तो बिनती करै, अर परमेसवर उस ताहीं उन खात्तर, जिन नै इसा पाप करया सै, जिसका कारण मौत ना हो, जीवन देगा। जिस पाप का नतिज्जा मृत्यु सै; मै इसके बारे म्ह बिनती करण खात्तर न्ही कहन्दा 17 सारी ढाळ के बुरे काम तो पाप सै, पर इसा पाप भी सै जिसका नतिज्जा मृत्यु कोनी। 18 हम जाणा सां, के जो कोए परमेसवर ऊलाद सै, वो बार-बार पाप न्ही करते; क्यूँके परमेसवर का बेट्टा यीशु मसीह उसनै पाप तै बचाई राख्खेगा, अर शैतान उसनै छू भी न्ही पांदा। 19 हम जाणा सां, के हम परमेसवर तै सां, अर सारी दुनिया उस शैतान कै बस म्ह पड़ी सै। 20 हम यो भी जाणा सां, के परमेसवर का बेट्टा यीशु मसीह आ ग्या सै, उसनै म्हारे ताहीं उस सच्चे परमेसवर नै पिच्छाणण की समझ दी सै; के म्हारा परमेसवर का करीबी रिश्ता सै, क्यूँके म्हारा उसके बेट्टे कै गेल्या करीबी रिश्ता सै। सच्चा परमेसवर अर अनन्त जीवन योए सै। (aiōnios g166) 21 हे बाळकों हरेक उस चीज तै दूर रहों जो थमनै परमेसवर तै दूर करै सै।

2 यूहन्ना

1 या चिट्ठी मुझ यूहन्ना की ओड़ तै सै, जो कलीसिया का अगुवां सै, मै उस परमेसवर के जरिये चुणी गई बिरबानी अर उसके बाळकां के नाम या चिट्ठी लिखण लागरया सूं, जिनतै मै सच्चा प्यार करूं सूं, अर सिर्फ मै ए न्ही बल्के वे सारे भी प्यार करै सै, जो सच्चाई नै जाणै सै। 2 हम थारे तै प्यार करा सां, क्यूँके सच्ची शिक्षा म्हारे म्ह रहवै सै, अर म्हारे साथ सदा रहवैगी। (aiōn g165) 3 परमेसवर पिता, अर उसके बेटे यीशु मसीह की ओड़ तै अनुग्रह, दया, शान्ति, ये सब उनके साथ रहवैगी, जो इस सच्चाई नै मान्ने सै, अर एक-दुसरे तै प्यार करै सै। 4 मै घणा राज्जी होया के मन्ने तेरे कई बाळकां ताहीं उस हुकम कै मुताबिक, जो म्हारै पिता की ओड़ तै मिल्या था, सच पै चाल्दे होए पाया। 5 इब हे नारी, मै तेरे तै बिनती करूं सूं, के हमनै एक-दुसरे तै प्यार करणा चाहिए, यो कोए नया हुकम कोनी, बल्के यो वो हुकम सै जिसनै हम उस बखत तै जाणा सां, जिब हमनै मसीह कै पाछै चालणा शरु करया था। 6 अर सच्चा प्यार यो सै, के हम परमेसवर के हुकमां कै मुताबिक चाल्लां, जिस दिन तै थमनै मसीह कै पाछै चालणा शरु करया था, उस दिन तै थम जाणो सों, के परमेसवर नै म्हारे ताहीं हुकम दिया सै, के हम सदा एक-दुसरे तै प्यार करा। 7 मै ज्यांतै कहूं सूं, क्यूँके भोत-से लोग झुट्टी शिक्षा तै दुसरयां नै धोक्खा देण आळे, इस दुनिया म्ह अलग-अलग जगहां तै लिकड़ आए सै, वे कहवै सै, के मसीह इस दुनिया म्ह इन्सान का रूप धारण करकै न्ही आया, जै कोए माणस ये बात कहवै सै तो वो माणस यीशु मसीह का बिरोधी सै, वो दुसरयां ताहीं भरमाण आळा सै। 8 थमनै चौक्कस रहणा चाहिए, के ये लोग थमनै धोक्खा न्ही देण पावै, ताके परमेसवर की सेवा करण म्ह जो मेहनत थमनै करी सै, वा बेकार ना जावै, पर परमेसवर थारी उस मेहनत का थमनै ईनाम देवैगा। 9 जै कोए माणस, मसीह नै जो शिक्षाएँ दी सै उसका पालन न्ही करदा, अर अपणी ओड़ तै उन शिक्षा म्ह कुछ और जोडै सै, तो उसकी परमेसवर कै गैल साझेदारी कोनी, पर जो कोए उसकी दी गई शिक्षा का पालन करदा रह सै, उसकी पिता परमेसवर अर उसके बेटे यीशु मसीह कै गैल साझेदारी सै। 10 जै कोए थारे धारे आवै अर वा शिक्षा दे जो मसीह की शिक्षा तै न्यारी सै, तो उस ताहीं थम ना तो घर म्ह आण द्यो अर ना नमस्कार करो। 11 क्यूँके जो कोए इसे माणस नै नमस्कार करै सै, वो उसके भुन्डे काम्मां म्ह साइझी होवै सै। 12 मन्ने घणीए बात थारे ताहीं बताणी सै, पर मै उन बात्तां नै इस चिट्ठी म्ह लिखणा कोनी चाहन्दा, अर उम्मीद सै के मै थारे धारे आऊँगा, अर आम्ही-स्याम्ही थारे तै बात करूँगा, अर फेर हम आच्छी ढाळ खुशी मनावंगे। 13 परमेसवर के जरिये चुणी गई बेब्बे के बाळकां का, थारे ताहीं नमस्कार।

3 यूहन्ना

1 या चिट्ठी मुझ यूहन्ना की ओड़ तै, जो कलीसिया का अगुवां सै, प्यारे मित्तर गयुस के नाम सै, जिसतै मै सच्चा प्यार करूँ सँ। 2 हे प्यारे मित्तर, मेरी या प्रार्थना सै, के जिसा तू आत्मिक बढ़ोतरी करण लाग रहा सै, उस्से तरियां तू सारी बात्तां म्ह बढ़ोतरी करै अर भला चंगा रहवै। 3 क्यूँके जिब कुछ बिश्वासी भाईयाँ नै आणकै मेरे ताहीं बताया के तू ईमानदारी तै परमेसवर की सच्ची राह पै चाल्लण लागरया सै, तो मै भोत-ए राज्जी होया। 4 मन्नै इसतै बढ़कै किसे और बात की खुशी कोनी के जिब मै सुणु सँ, के वे लोग जो मेरे बाळकां की तरियां सै, वे परमेसवर की सच्ची राह पै चाल्लण लागरे सै। 5 हे प्यारे मित्तर, तू म्हारे बिश्वासी भाईयाँ की मदद के खात्तर ईमानदारी तै भोत कुछ करण लागरया सै, तन्नै उनकी भी मदद करी जिन ताहीं तू न्ही जाणदा। 6 जिनकी तन्नै मदद करी थी, उन म्ह तै कई माणसां नै, उरै की कलीसिया के बिश्वासी भाईयाँ ताहीं बताया, के तू अपणे बिश्वासी भाईयाँ तै कितना प्यार करै सै, इब मै थमनै कहुँ सँ के तू इसे माणसां की हमेशा मदद करदा रहै, जिब वे दुसरी जगहां सफर खात्तर जावै सै, क्यूँके योए परमेसवर नै आच्छा लाग्गै सै। 7 क्यूँके ये लोग हरेक जगहां सफर करै सै, ताके मसीह का वचन सुणा सकै, अर गैर यहूदियाँ तै कुछ मदद न्ही लेंदे। 8 इस करके हमनै अपणे घर म्ह, इसे माणसां का स्वागत करके उनकी सेवा-पाणी करणी चाहिए, अर उनकी हरेक जरूरत पूरी करणी चाहिए, ताके हम माणसां म्ह सच्चा सन्देश फैलाण म्ह उनके साइड़ीदार हो सका। 9 मन्नै पैहले थारी कलीसिया के बिश्वासियाँ ताहीं एक चिट्ठी लिखी थी, पर दियुत्रिफेस नै मेरी हिदायत मानण तै इन्कार कर दिया क्यूँके वो खुद हमेशा कलीसिया का अगुवां बणणा चाहवै था। 10 इस करके जिब मै आऊँगा तो, थारे स्याम्ही उसके जरिये करे गये सारी बात्तां नै स्पष्ट कर देऊँगा, यानी सारे बुरे-बुरे शब्दां का इस्तमाल करदे होए जो उसनै म्हारे पै दोष लगाए, इतणाए न्ही बल्के वो ना ए तो किसे शिक्षक ताहीं स्वीकार करै सै, अर ना ए कलीसिया के किसे बिश्वासी ताहीं इसा करण देवै सै, जो स्वीकार करणा चाहवै सै, उन ताहीं वो कलीसिया तै बाहर कर देवै सै। 11 हे प्यारे मित्तर, बुराई करण आळे न्ही, पर भलाई करण आळे बणो। जो भलाई करै सै, वो परमेसवर की ओड़ तै सै, पर जो बुराई करै सै, वो परमेसवर ताहीं कोनी जाणदा। 12 कलीसिया म्ह हर कोए कहवै सै, के देमेत्रियुस एक आच्छा माणस सै, क्यूँके उसका बरताव परमेसवर के सच्चे सन्देश के मुताबिक सै, अर तू भी जाणै सै के जो हम कहवा सां वो सच सै। 13 मन्नै तेरे ताहीं भोत कुछ बताणा तो था, पर मै उन बात्तां नै इस चिट्ठी म्ह लिखणा कोनी चाहन्दा। 14 पर मन्नै उम्मीद सै, के तेरे तै तावळा-ए मिलूँगा, फेर हम आम्ही-स्याम्ही बात करागें। मै प्रार्थना करूँ सँ, के परमेसवर थमनै शान्ति देवै। ओड़ै के मित्तरां तै नाम ले-लेकै म्हारी ओड़ तै नमस्कार कह दिये।

यहूदा

1 या चिट्ठी मुझ यहूदा की ओड़ तै सै, मै, मसीह यीशु का दास अर याकूब का छोटा भाई सूं। मै या चिट्ठी उन माणसां ताहीं लिखण लागरया सूं, जिन ताहीं परमेसवर नै अपणे पै बिश्वास करण खात्तर बुलाया सै। पिता परमेसवर थारे तै प्यार करै सै, अर मसीह यीशु म्ह थारे ताहीं सुरक्षित राख्वै सै। 2 मै प्रार्थना करूँ सूं, के परमेसवर थारे ताहीं दया, शान्ति अर प्यार भोत-ए घणा देवै। 3 हे प्यारे बिश्वासी भाईयो, जिब मै उस नई जिन्दगी के बारे म्ह लिखण म्ह घणी मेहनत करण लागरया था, जो म्हारे ताहीं मसीह यीशु के जरिये परमेसवर तै मिलै सै, अर जिस म्ह हम सब साझीदार सां। तो मनै महसूस होया के मै इस चिट्ठी के जरिये थमनै उत्साहित करूँ, ताके थम अपणे बिश्वास की बढ़ोतरी खात्तर और भी मेहनत करो, परमेसवर नै यो बिश्वास सारे माणसां ताहीं सदा खात्तर एके बार दे दिया सै, अर यो बदल्या नही जा सकदा। 4 क्यूँके परमेसवर का कहणा ना मानण आळे भोत-से झूठी शिक्षा देण आळे लोग चुपचाप म्हारे बिना जाणे म्हारे म्ह आ मिले सै, ये वो लोग सै जिनके बारे म्ह परमेसवर नै सदियाँ पैहले पवित्र ग्रन्थ म्ह कह्वा था, के उन ताहीं परमेसवर दण्ड देवैगा। वे परमेसवर के अनुग्रह के सन्देस नै बिगाड़ के उस ताहीं भोग-विलास म्ह बदल देवै सै। यीशु मसीह जो म्हारा एकमात्र मालिक अर प्रभु सै, वे उसका इन्कार करै सै। 5 हालाकि थमनै सारी बात्तां का बेरा सै, फेर भी मै थमनै वे बात याद दुवाणा चाहूँ सूं, जिब प्रभु नै इस्राएली माणसां ताहीं मिस्र देश की गुलामी तै छुड़ाया था, तो उसके बाद उन म्ह बिश्वास ना करणीया का प्रभु नै जंगल-बियाबान म्ह नाश कर दिया। 6 यो भी याद राख्वे के परमेसवर नै उन सुर्गदूतां ताहीं भी दण्ड दिया, जिननै अपनी प्रभुता बणाए नही राख्खी, बल्के अपनी खुद की रहण की जगहां जो के सुर्ग थी छोड़ दी, परमेसवर नै उन ताहीं भी भीषण दिन के न्याय खात्तर अन्धेरे म्ह, जो सदा काल के खात्तर सै, बेल्लां तै बाँधके राख्वा सै, जिन ताहीं कोए तोड़ नही सकदा। (aiidios g126) 7 उस्से तरियां उन माणसां के बारे म्ह जो सदोम अर अमोरा नगर अर उसके लोवे-धोवे के नगर के माणसां कै गैल के बणी थी। वे माणस जार होगे थे, अर अप्राकृतिक यौन-सम्बन्धां के पाच्छे लागे थे, तो परमेसवर नै उन ताहीं आग तै भस्म कर दिया, जो उनके गैल होया वा दुसरयां खात्तर चेतावनी सै, क्यूँके वे भी अनन्त आग के जरिये दण्ड पावेंगे। (aiönios g166) 8 इन बात्तां के बारे म्ह बेरा होन्दे होए, परमेसवर का कहणा ना मानण आळे लोग इस्से तरियां तै पाप करै सै, उनका कहणा सै, के वे दर्शन देख्वै सै, वे अपनी-अपणी देह नै अशुद्ध करै सै, अर वे परमेसवर की प्रभुता नै अस्वीकार करै सै, अर सुर्गदूतां की बुराई करै सै। 9 पर परमेसवर के प्रधान सुर्गदूत मीकाईल नै, जिब शैतान तै मूसा नबी की लाश कै बारे म्ह वाद-विवाद करया, तो मीकाईल सुर्गदूत नै भी उसतै आच्छा-भुंडा कहके खोत लागण की हिम्मत कोनी करी, पर सिर्फ इतणाए कह्वा, के

“प्रभु तन्नै फटकारै।” 10 पर परमेसवर का कहणा ना मानण आळे ये लोग उन बात्तां की आलोचना बुरे शब्दां तै करै सै, जिन ताहीं वे जाणदे ए कोनी, अर जिन बात्तां नै वे जाणे सै, उन ताहीं वे बिना सोच्चे-समझे जंगली-जानवरां की तरियां करै सै, इसे काम्मां खात्तर परमेसवर उन ताहीं दण्ड देवैगा। 11 धिक्कार सै उनपै! जो कैन की तरियां बुरी जिन्दगी जीवै सै, जिसनै अपणे भाई का खून इस करके करया था, क्यूँके परमेसवर नै उसकी भेट स्वीकार कोनी करी, अर उसके भाई की कर ली थी, अर वो उस बिलाम की तरियां सै, जिसनै परमेसवर के माणसां ताहीं पाप करण खात्तर उकसाया, ताके वो धन ले सके जिसकी पेशकस उस ताहीं करी गई थी, अर जो कोरह की ढाळ मूसा नबी के अधिकार का बिरोध करण के कारण नाश होगे। 12 जिब थम परमेसवर के प्यार नै, याद करण कै खात्तर प्रीति भोज म्ह कठ्ठे होओ सों, तो वे भी थारे म्ह शामिल हो जावै सै, तब वे उस समुन्दर म्ह लुक्की होए पत्थर की चट्टान की तरियां सै, जो थारे ताहीं डूबे सके सै। वे उस पाळी की तरियां सै जो सिर्फ अपना पेट भरै सै, अर वे बिना पाणी के बादल सै, जिन ताहीं हवा उड़ा ले जावै सै, वे पतझड़ के इसे दरखत सै, जिन म्ह कदे फळ कोनी लागदे, अर ये जड़ तै उखड़गे सै। 13 ये समुन्दर की तेज झाल के हिलोरे सै, जो अपनी गंदगी का झाग उछाळे सै, ये लोग शर्मनाक काम करै सै, ये उन राह तै भटके होए तारां की ढाळ सै, जो किसे नै सही राह नही दिखा सकदे, जिनके खात्तर परमेसवर नै सदा खात्तर घोर अन्धकार की जगहां तय कर राख्खी सै, जड़ै वो सदा खात्तर रहवेंगे। (aiön g165) 14 हनोक नै भी जो आदम की सातवीं पीढ़ी म्ह तै था, इन माणसां के बाबत या भविष्यवाणी करी थी, “देख्वे, प्रभु अपणे लाखं पवित्र सुर्गदूतां कै गेल्या आवैगा, 15 तो उन सब माणसां का न्याय करैगा, अर बुरे माणसां नै उनके बुरे काम्मां का अर दुष्ट माणसां नै जिननै परमेसवर के बिरोध म्ह कड़वे शब्द इस्तमाल करे थे, उन ताहीं कसूरवार ठहरावैगा।” 16 ये तो बेसबरे, बड़बड़ाण आळे, अर अपनी मर्जिया के मुताबिक लगातार बुरे काम करै सै, अर अपणे मुँद तै घमण्ड की बात बोल्लै सै, वे अपणे फायदे के खात्तर चापलूसी की बात करै सै। 17 पर हे प्यारे भाईयो, थम इन बात्तां नै याद राख्खो, जो म्हारे प्रभु यीशु मसीह के प्रेरित भोत पैहल्याए कहगे सै। 18 वे थमनै कह्वा करै थे, “के प्रभु यीशु मसीह के बोहड़ण तै पैहले इसे माणस भी होवेंगे जो प्रभु का मजाक उड़ावेंगे, वे इसे माणस सै, जो अपनी बुरी अभिलाषायां के मुताबिक जिन्दगी जिवेंगे।” 19 ये वे माणस सै, जो थारे म्ह फूट गेरे सै, अर जिन म्ह पवित्र आत्मा नही सै उनकी बुरी अभिलाषा, उन ताहीं अपणे बस म्ह राख्वै सै। 20 हे प्यारे बिश्वासी भाईयो, थम लगातार एक-दुसरे की बढ़ोतरी करते जाओ, अर आप्स म्ह एक-दुसरे नै सच्ची शिक्षा जिसपै थम बिश्वास करो सों, उसतै उत्साहित करदे रहों, अर जिस तरियां पवित्र आत्मा थारे ताहीं अगुवाई करै सै थम प्रार्थना करदे रहों। 21 थमनै यो जाणके जीवन जीणा चाहिए, के परमेसवर थारे तै प्यार करै सै, अर थम उस दिन की बाट देखदे रहो जिस दिन म्हारा

प्रभु यीशु मसीह बोहड़के आवैगा ताके थमनै अनन्त जीवन मिलै, क्यूँके उसनै म्हारे पै दया करी सै। (aiōnios g166) 22 उन माणसां पै दया करो जिनका बिश्वास डामाडोल होरया सै। 23 घणखरे माणसां नै न्याय की आग तै झपट्टा मारकै लिकाड़ो, अर दुसरे माणसां के प्रति दयालु रहों, पर इसकै साथ चौक्कस भी रहों, उस लत्ते तै भी नफरत करो जो पाप तै भरे काम्मां तै कलंकित हो गया सै। 24 वो एकमात्र सच्चा परमेसवर सै, जो थमनै ठोक्कर खाण तै बचा सकै सै, अर वो थमनै बेकसूर अर मगन करकै अपणे महिमा म्ह अपणे स्याम्ही खड्या करैगा। जो प्रभु यीशु मसीह नै म्हारे खात्तर करया, उसकै जरिये परमेसवर नै म्हारे ताहीं बचाया सै। 25 म्हारा प्रभु यीशु मसीह माणसां म्ह, परमेसवर की तारीफ करण का कारण बणा, ताके वो पिच्छाण सकै, के शरुआत तै, इब अर सदा कै खात्तर शक्ति अर अधिकार उस्से का सै। आमीन। (aiōn g165)

प्रकाशित वाक्य

1 परमेश्वर ने यीशु मसीह ताहीं वो गुप्त बातें दिखाई जो भोत तावळी होण आळी सै, ताके वो अपने दाससां पै इन बातां नै जाहिर करै, उसके बाद मसीह नै सुर्गदूत भेज्या, ताके अपने दास यूहन्ना ताहीं ये बात दिखावै। 2 यूहन्ना नै वो सब कुछ लिख लिया, जो उस ताहीं दिखाया गया था, यानी वो वचन जो परमेश्वर की ओड़ तै आया था, अर जो कुछ भी मसीह यीशु नै कह्या था। 3 धन्य सै वे जो इस भविष्यवाणी के वचन नै पढ़ै सै, अर वे जो सुणै सै अर इस म्ह लिक्खी होई बातां नै मान्ने सै, क्यूँके ये बात तावळी होण आळी सै। 4 ये चिट्ठियाँ यूहन्ना की ओड़ तै आसिया परदेस की सात कलीसियाओं के नाम सै। परमेश्वर पिता की ओड़ तै थमनै अनुग्रह अर शान्ति मिलै, जो सै, अर जो था, अर जो आण आळा सै, अर इन सात आत्मायाँ की ओड़ तै जो उसके सिंहासन के स्याम्ही सै। 5 अर यीशु मसीह जो बिश्वास जोगगा गवाह अर मरे होया म्ह तै जी उठण आळा म्ह तै जेठ्ठा अर धरती के राजयां का हाकिम सै, उसकी की ओड़ तै थारे ताहीं अनुग्रह अर शान्ति मिल्दी रहवै। वो म्हारै तै प्यार करै सै, अर उसनै अपने लहू के जरिये म्हारै ताहीं पाप तै छुटाया सै। 6 उसनै म्हारे ताहीं वे माणस बना दिये सै, जिनका परमेश्वर राजा सै, अर उसनै म्हारे ताहीं परमेश्वर जो उसका पिता सै, उसका याजक बना दिया सै, उससे की महिमा अर पराक्रम युगानुयुग रहवै। आमीन। (aiōn g165) 7 लखाओ, वो बादळां के गेल्या आण आळा सै, अर हरेक आँख उसनै देखेगी, बल्के जिननै उस ताहीं बेधा था, वे भी उस ताहीं देखेंगे, अर धरती के सारे कुल उसके कारण छात्ती पीट्टेंगे, जिब उस ताहीं देखेंगे। हाँ। आमीन। 8 प्रभु परमेश्वर यो कहवै सै, के वो जो सै, अर जो था, अर जो आण आळा सै, जो सब तै शक्तिशाली सै, “मै अल्फा अर ओमेगा सू।” 9 मै यूहन्ना, जो थारा बिश्वासी भाई अर मसीह के खातर दुख सहण म्ह अर परमेश्वर के राज्य म्ह, अर धीरज तै दुख सहण म्ह साइझी सू, जो दुख उन माणसां पै आया सै, जिनका उसके साथ रिश्ता सै, मै पतमुस नाम के टापू पै भेज दिया गया, क्यूँके मन्ने परमेश्वर के वचन का प्रचार करया था, अर मसीह यीशु के सच्चे सन्देश ताहीं सुणाया था। 10 प्रभु के दिन, पवित्र आत्मा मेरे पै आ गया, अर मन्ने अपने पाछे तुरही बरगा बड़ड़ा शब्द सुणया। 11 उसनै उसतै कह्या, के “जो कुछ तू देखे सै, उसनै किताब म्ह लिखके सातु कलीसियाओं के धोरै भेजदे, जो इन नगरां म्ह सै, यानिके इफिसुस, स्मरना, पिरगमुन, थुआतीरा, सरदीस, फिलदिलफिया, अर लौदीकिया ताहीं।” 12 फेर मन्ने उस ताहीं, जो मेरे तै बोल्लण लागरया था, देखखण के खातर अपना मुँह फेरया, अर पाछे घूमके मन्ने सोन्ने की सात दीवट देखकी, 13 अर उन दीवटां के बिचाळे माणस के बेटे के बरगा एक आदमी देख्या, जो पायां ताहीं के लते पहरे, अर छात्ती पै सोन्ने का पटुका बाँधे होइ था। 14 उसके सिर के बाळ धोळी ऊन बल्के बर्फ की ढाळ जमा धोळे थे, अर उसकी आँख आग की तरियां धधकण लागरी

थी। 15 अर उसके पैर भट्टी म्ह तपा के चमकाए होए पीत्तळ के जिसे थे, अर उसका बोल घणे पाणी के गरजण जिसा था। 16 वो अपने सोळे हाथ म्ह सात तारे लिए होइ था, अर उसके मुँह म्ह तै पैन्नी दोधारी तलवार लिक्कई थी। उसका मुँह इस ढाळ बढे था, जिस ढाळ सूरज करड़ी धूप के बखत चमके सै। 17 जिब मन्ने उस ताहीं देख्या, तो उसके पायां पै मुर्दा की ढाळ पड़ग्या। उसनै मेरे पै अपना सोळा हाथ, धरके कह्या, “मतना डरै, मै पैहल्ड़ा अर आखरी अर जिन्दा सू।” 18 मै मरग्या था, अर इब देख मै युगानुयुग जीऊँ सू, अर मौत अर पाताळ लोक की ताळी मेरे धोरै सै। (aiōn g165, Hadēs g86) 19 इस करके जो बात तन्ने देखकी सै अर जो बात होण लागरी सै अर जो बात इसके पाछे होण आळी सै, उन सारियां नै लिख ले। 20 इब मै उन सात तारां का भेद जिन ताहीं तन्ने मेरे सोळे हाथ म्ह देख्या था अर उन सोन्ने की दीवटां का भेद तन्ने बताऊँ सू, वे सात तारे सातु कलीसियाओं के धोरै भेज्जे गये सुर्गदूत सै, अर वे सात दीवट, सात कलीसिया सै।

2 उसनै मेरे ताहीं यो भी कह्या के इफिसुस नगर की कलीसिया के सुर्गदूत नै न्यू लिख के, “जो सातु तारे अपने सोळे हाथ म्ह लिए होइ सै, अर सोन्ने की सातु दीवटां के बिचाळे हाँडे सै, वो न्यू कहवै सै” 2 के मै तेरे काम, अर मेहनत, अर तेरा धीरज जाणु सू, अर मै जाणु सू, के तू बुरे माणसां की शिक्षा नै सह नही सकदा, अर जो अपने-आपनै प्रेरित कहवै सै, अर सै नही, उन ताहीं तन्ने परख के झूठा पाया। 3 अर तू धीरज थरे सै, अर मेरे नाम के खातर दुख ठा-ठाके भी तन्ने मेरी सेवा करणा नही छोड्या। 4 पर मन्ने तेरे खिलाफ म्ह न्यू कहणा सै, के तेरे म्ह वो प्यार नही रह्या जो तू पैहले मेरे तै करै था। 5 यो याद कर के तन्ने शरु म्ह मेरे तै किसा प्यार करया था, अर इब उसा प्यार नही करदा, तू पाप करणा छोड़ दे, अर जिसा तन्ने शरु म्ह मेरे तै प्यार करया था उसाए प्यार कर, अर जै तू पाप करणा नही छोड़ेगा, तो मै तेरे धोरै आके तेरी दीवट नै उस जगहां तै हटा दियुँगा। 6 पर हाँ, तेरे म्ह या बात तो सै, के तू नीकुलइयो के काम्मां तै नफरत करै सै, जिनतै मै भी नफरत करूँ सू। 7 जिसके कान हाँ, वो ध्यान तै सुण ले, के परमेश्वर का आत्मा कलीसिया तै के कहवै सै: वे लोग जो बुराई की ताकत पै जीत पावै सै, मै जीवन के दरखत म्ह तै जो जीवन देवै सै, जो सुर्गलोक म्ह सै, उस ताहीं उस फळ म्ह तै खाण नै दियुँगा। 8 अर उसनै मेरे ताहीं स्मरना नगर की कलीसिया के सुर्गदूत ताहीं यो लिखण खातर कह्या, के, जो पैहल्ड़ा अर आखरी सै, जो मर लिया था अर इब जिन्दा होगया सै, वो न्यू कहवै सै के, 9 मै तेरे क्लेश अर गरीबी नै जाणु सू, (पर तू साहूकर सै), अर जो माणस अपने-आप ताहीं यहूदी कहवै सै, अर सै नही, पर वो शैतान के झुण्ड म्ह तै सै, मै उनकी बुराई नै भी जाणु सू। 10 जो दुख तन्ने झेलणे हाँगे, उनतै मत घबरा, क्यूँके देखखो, शैतान अपने माणसां के जरिये थारे म्ह तै कितन्याँ ताहीं जेळखाने म्ह गेरैगा, ताके थम परखे जाओ, अर थारे ताहीं दस दिन तक क्लेश ठाणा पड़ेगा। जान देण तक बिश्वासी रह, तो मै थारी जीत के कारण ईनाम के तौर पै थमनै अनन्त

जिन्दगी देखूंगा। 11 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै, वे लोग जो बुराई की ताकत पै जीत पावै सै, उसनै दुसरी मौत तै नुकसान कोनी होवैगा। 12 अर उसनै मेरे ताहीं पिरगमुन नगर की कलीसिया के सुर्गदूत ताहीं यो लिखण खात्तर कहा, के, “जिसके धोरे दोधारी अर पैन्नी तलवार सै, वो न्यू कहवै सै” 13 के मन्ने न्यू तो बेरा सै, तू ओड़ै रहवै सै जित्त शैतान का राज सै, अर मेरे नाम पै स्थिर रहवै सै, अर मेरे पै विश्वास करण तै उन दिनां म्ह भी पाच्छे न्ही हट्या जिन म्ह मेरा विश्वास जोगगा गवाह अन्तिपास, तेरे नगर म्ह उस जगहं पै मारया गया जित्त शैतान रहवै सै। 14 पर मन्ने तेरे खिलाफ म्ह न्यू कहणा सै, थम उन माणसां का बिरोध कोनी करदे, जो पुराणे जमाने के नबी बिलाम की तरियां झूठी शिक्षा सिखावै सै, बिलाम नै राजा बालाक ताहीं यो सिखाया, के इस्राएल के माणसां तै पाप करवाण कै खात्तर के करणा चाहिए, के वे इम्तिहान म्ह पड़े, अर पाप कर बैठे। उसनै उन ताहीं मूर्तियाँ के आगै चढ़ाई होइ चिज्जां ताहीं खाणा अर अनैतिक जिन्दगी जीणा सिखाया। 15 उरसे तरियां-ए तेरे उरै कितने तो इसे सै, जो नीकुलइयों की शिक्षा नै मान्नै सै। 16 इस करके पाप करणा छोड़ दे, न्ही तो मै तेरे धोरे तावळा-ए आऊँगा, अर झूठी शिक्षा देण आळे उन माणसां के खिलाफ अपणे मुँह तै लिकड़ण आळी उस तलवार तै लडूँगा, जो के मेरा वचन सै। 17 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै, वे लोग जो बुराई की ताकतां पै जीत पावै सै, उस ताहीं मै गुप्त मन्ना म्ह तै दियुँगा, अर उस ताहीं एक धोळा पत्थर भी दियुँगा, अर उस पत्थर पै एक नाम लिख्या होया होगा, जिस ताहीं उसके पाण आळे कै सिवाए और कोए न्ही जाणैगा। 18 अर उसनै मेरे ताहीं थुआतीरा नगर की कलीसिया के सुर्गदूत ताहीं यो लिखण खात्तर कहा, के, मै परमेसवर का बेटा, जिसकी आँख आग की ज्वाला की तरियां, अर जिसके पैर बढिया पीतळ के जिसे सै, न्यू कहूँ सूँ के 19 मै तेरे काम, तेरे प्यार, विश्वास, सेवा, अर धीरज नै जाणु सूँ, अर न्यू भी जाणु सूँ के तेरे पाच्छले काम पैहलड़ा तै बढके सै, जिब तन्ने मेरे पै विश्वास करया था। 20 पर मन्ने तेरे खिलाफ न्यू कहणा सै, के तू उस जनानी इजेबेल नै रहण देवे सै, जो अपणे-आपनै नबी कहवै सै, अर मेरे दास्सां नै जारी करण, अर मूर्तियाँ के आगै चढ़ाई होइ चीज नै खाणा सिखाके भकावै सै। 21 मन्ने उस ताहीं पाप छोड़ण का मौक्का दिया, पर वा अपणे जारीपणे के पाप नै छोड़णा कोनी चाहन्दी। 22 मै उस ताहीं बीमार कर दियुँगा। अर जो उसके गेल्या जारी करै सै, जै वे भी उसके बरगे काम्मां नै जो वा करै सै करणा न्ही छोड़ेंगे, तो उननै मै भारया दण्ड दियुँगा। 23 अर मै उसके चेल्यां नै मार दियुँगा, अर फेर सारी कलीसिया नै बेरा पाट जावैगा, के हृदय अर मन जाँचण आळा मै ए सूँ, अर मै थारे म्ह तै हरेक नै उसके काम्मां के मुताबिक बदला देखूंगा। 24 पर थम जो थुआतीरा के बाकी लोग जिननै इस झूठी शिक्षा ताहीं न्ही मान्या, अर उन बातां नै जिन नै शैतान की गहरी बात कहवै सै,

उन म्ह भाग न्ही लेते, मै न्यू कहूँ सूँ, के मै थारे ताहीं और हुकम कोनी दियुँगा, पर मै जिब तक ना आ जाऊँ मेरे पै मजबुती तै विश्वास करते रहों। 25 पर हाँ, जो थारे धोरे सै उसनै मेरे आण तक थाम्बे रहो। 26 वे लोग जो बुराई की ताकतां पै जीत पावै सै, अर मेरे काम्मां के मुताबिक आखरी ताहीं करदा रहवै, मै उसनै देश-देश के माणसां पै राज करण का हक देखूंगा। 27 मै उसनै भी राज करण का वोए हक देखूंगा जो मेरे पिता नै मेरे ताहीं दिया सै, वो उनपै बिना दया के राज करैगा, अर वो उन ताहीं चकणाचूर कर देवैगा, जिस ढाळ कुम्हार के माटी के बासण चकणाचूर हो जावै सै। अर मन्ने भी इसाए हक अपणे पिता तै मिल्या सै। 28 अर मै उसनै भोर का तारा देखूंगा। 29 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै।

3 उसनै मेरे ताहीं यो भी कहा के सरदीस नगर की कलीसिया के सुर्गदूत नै लिख, के “जिसके धोरे परमेसवर की सात आत्मा अर सात तारे सै, वो न्यू कहवै सै,” के मै तेरे काम्मां नै जाणु सूँ, के तू मेरा विश्वास लायक विश्वासी तो कुहवै सै, पर असल म्ह तन्ने मेरा कहणा मानना छोड़ दिया सै। 2 इस करके सावधान हो जा, अर अपणे विश्वास नै जो मेरे पै सै उसनै मजबूत कर, क्यूँके तेरे म्ह थोड़ा-सा ए विश्वास बाक्की सै, ताके तेरा बचा होइ विश्वास भी ना जान्दा रहवै, मै जाणु सूँ के तेरे काम अधूरे सै, पर तेरे काम्मां तै, जो तू करण लागरया सै परमेसवर खुश कोनी। 3 इस करके याद कर, के तन्ने किस तरियां तै शिक्षा पाई अर सुणी थी, अर उस म्ह बणया रह, अर पाप करणा छोड़ दे। जै तू जागदा न्ही रहवैगा, तो मै चोर की ढाळ आ जाऊँगा अर तन्ने कदे भी न्ही बेरा पाटूँगा, के मै किस बखत तेरे पै आण पडूँगा। 4 पर हाँ, तेरे धोरे सरदीस म्ह कुछ लोग सै, जो पाप के जरिये अशुद्ध कोनी होए, वे धोळे लत्ते पहरे होइ मेरे गेल हाँडेंगे क्यूँके वे इस लायक सै। 5 वे लोग जो बुराई की ताकत पै जीत पावै सै, उस ताहीं इस्से ढाळ धोळे लत्ते पहिराए जावेंगे, अर मै उसका नाम जीवन की किताब म्ह तै किसे तरियां तै भी न्ही काटूँगा, पर उसका नाम अपणे पिता अर उसके सुर्गदूतां तै स्याम्ही मान ल्युँगा के ये मेरे लोग सै। 6 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै। 7 अर उसनै मेरे ताहीं यो भी कहा सै, के फिलदिलफिया नगर की कलीसिया के सुर्गदूत नै न्यू लिख के जो कहवै सै, मै पवित्र अर सच्चा सूँ, अर मेरे धोरे वा ताळी सै, जो राजा दाऊद की सै, जिब मै ताळी लेके दरबाजा खोल्लू सूँ तो उसनै कोए बन्द न्ही कर सकता, जिब मै ताळी लेके दरबाजा बन्द करूँ सूँ, तो उसनै कोए खोल न्ही सकता, वो तेरे तै न्यू कहवै सै के, 8 मन्ने तेरे काम्मां का बेरा सै, देख, मै जाणु सूँ के तेरे म्ह भोत कम काबलियत सै, पर तन्ने वा बात मान्नी सै जिसके बारें म्ह मन्ने तेरे ताहीं कहा था, अर तन्ने इस बात का इन्कार न्ही करया के तू मेरे पै विश्वास करै सै, इस करके मन्ने एक दरबाजा खोल्या सै, जिसनै कोए बन्द न्ही कर सकदा। 9 देख, जो शैतान के झुण्ड म्ह तै सै, अर खुद नै यहूदी कहवै सै, पर सै न्ही, बल्के झूठ बोल्ले सै, देख,

मै इसा करूंगा, के वे आके तेरे पायां म्ह मोध्धे पड़ैंगे, अर न्यू जाण लेवैंगे, के मन्ने तेरे तै प्यार करया सै। 10 क्यूँके जिब तेरे ताहीं सताया जाण लागरया था, तो तन्ने मेरे वचन ताहीं धीरज तै पुगाया सै, उसकी बजह तै मै भी तन्ने इम्तिहान के उस बखत म्ह बचा के राक्खूंगा, जो धरती पै रहण आळे माणसां नै परखण के खातर साबती दुनिया पै आण आळा सै। 11 मै तावळा-ए आण आळा सू, अपने बिश्वास म्ह मजबूत बणो, ताके कोए थमने थारा ईनाम लेण तै रोक ना पावै। 12 वे लोग जो बुराई की ताकत पै जीत पावै सै, उन ताहीं मै अपने परमेसवर के मन्दर म्ह खम्बा बणाऊंगा, वो फेर कदे बाहरणै न्ही लिक्डेंगे, अर मै अपने परमेसवर का नाम, अर अपने परमेसवर के नगर, यानिके नये यरुशलेम का नाम, जो मेरे परमेसवर की ओड़ तै सुर्ग पै तै उतरण आळा सै, अर अपना नया नाम उसपै लिखूंगा। 13 जिसके कान हों, ध्यान तै सुण ले के परमेसवर का आत्मा कलीसिया तै के कहवै सै। 14 अर उसने मेरे ताहीं यो भी कहा सै, के “लौदीकिया नगर की कलीसिया के सुर्गदूत नै न्यू लिख” के, जो आमीन, अर बिश्वास जोगगा, अर सच्चा गवाह सै, अर परमेसवर की सृष्टि का खास कारण सै, वो न्यू कहवै सै। 15 के मै तेरे कामां नै जाणु सू के तू उस पाणी की ढाळ सै, जो ना तो शीळा सै अर ना तात्ता, आच्छा था के तू इन म्ह तै एक होन्दा 16 क्यूँके तू गुणगुणा सै, अर ना शीळा अर ना तात्ता, मै तन्ने अपने मुँह म्ह तै उगळण पै सू। 17 तू जो कहवै सै, के मै धनी सू, अर धनवान होगया सू, अर मन्ने किसे चीज का घाटा न्ही, अर न्यू न्ही जाण्दा, के तू निरभाग, नीच, कंगाल, आन्धा, अर उघाड़ा सै। 18 इस करके मै तन्ने राय दियुं सू, के आग म्ह त्याया होड़ सोन्ना मेरे तै मोल ले, के तू साहकार हो जावै, अर धोळा लत्ता ले-ले के पहर के तन्ने अपने उघाड़ेणण पै शर्म न्ही आवै, अर अपनी आँखां म्ह लाण के खातर सुरमा ले, के तू देखण लागौ। 19 मै जिस-जिसतै प्यार राक्खूँ सू, उन सारया ताहीं उल्हाणा अर ताड़ना दियुं सू, इस करके हिम्मत राख, अर पाप करणा छोड़ दे। 20 देख, मै दरबाजे पै खड्या होया खटखटाऊँ सू, जै कोए मेरा बोल सुणके दरबाजा खोल्लैगा, तो मै उसके धोरे भित्तर आके उसके गेल्या खाणा खाऊँगा, अर वो मेरे गेल्या। 21 जो जीत पावै, मै उस ताहीं अपने गेल्या अपने सिंहासन पै बिठाऊँगा, जिसा मै भी जीत पाके, अपने पिता के गेल्या उसके सिंहासन पै बैठ गया। 22 जिसके कान हों, वो ध्यान तै सुण लैवै के परमेसवर का आत्मा कलीसिया तै के कहवै सै।

4 इन बात्तां के पाच्छे जो मन्ने निगांह करी, तो के देखूँ सू, के सुर्ग म्ह एक दरबाजा खुल्या होया सै, अर ओड़ कोए था जो मेरे तै बात करण लागरया था, अर जो बात करण लागरया था, वो वोए था जिसनै मेरे तै पैहले बात करी थी, अर जिसकी आवाज तुरही के शब्द की तरियां थी, अर उसनै मेरे तै कहा, के “उरै ऊपरान आ ज्या, अर मै वे बात तन्ने दिखाऊँगा, जिनका इन बात्तां के पाच्छे पूरा होणा जरूरी सै।” 2 अर जिबे पवित्र आत्मा मेरे पै आ गया, अर मै के देखूँ सू, के एक सिंहासन सुर्ग म्ह सै, अर उस सिंहासन पै कोए बैठ्या सै। 3 अर जो उसपै बैठ्या

सै, उसकी चमक सूर्यकान्त मणि अर माणिक्य पत्थर के समान थी, अर उस सिंहासन के चौरगदेके मेघ-धनुष था, उसकी चमक पन्ने के समान की थी। 4 अर उस सिंहासन के चौरगदेके चौबीस सिंहासन सै, अर इन सिंहासनां पै चौबीस बुजुर्ग धोळे लते पदरे होड़ बैठे सै, अर उनके सिरां पै सोन्ने के ताज सै। 5 अर उस सिंहासन म्ह तै बिजळी चमकण की अर गरजण की आवाज आण लागरी थी, अर सिंहासन के स्याम्ही आग के सात दिवें जळण लागरे सै, जो के परमेसवर की सात आत्मा सै। 6 अर उस सिंहासन के स्याम्ही पारस था जो के समुंदर जिसा चौड़ा था, अर शीशे जिसा साफ था, सिंहासन के बिचाळै अर सिंहासन के चौरगदेके चार प्राणी सै, जिनके आग्ने-पाच्छे आँखें-आँख सै। 7 पैहला प्राणी शेर के बरगा सै, अर दुसरा प्राणी का मुँह बळध के बरगा सै, तीसरे प्राणी का मुँह माणस के बरगा सै, अर चौथा प्राणी उड़दे होड़ उकाब के बरगा सै। 8 अर च्यार प्राणियाँ के छः, छः पंख सै, उनके उपपर अर हरेक जगहां ए आँख थी, बल्के पंखां के तळै भी, अर वे दिन-रात बिना आराम करे न्यू कहवै सै, के पवित्र, पवित्र, पवित्र प्रभु परमेसवर, जो सब तै शक्तिशाली था, अर जो था, जो सै, अर जो आण आळा सै। 9 अर जिब वे प्राणी उसकी जो सिंहासन पै बैठ्या सै, अर जो युगानुयुग जीवै सै, महिमा अर आदर अर धन्यवाद करैंगे, (aiōn g165) 10 फेर सब चौबीस बुजुर्ग सिंहासन पै बैठण आळे के स्याम्ही पड़ जावेंगे, अर उस ताहीं जो युगानुयुग जीवै सै प्रणाम करैंगे, अर अपने-अपने ताज सिंहासन के स्याम्ही न्यू कहन्दे होए धर देवैंगे। (aiōn g165) 11 “हे म्हारे प्रभु अर परमेसवर, तू-ए महिमा, अर आदर, अर सामर्थ के जोगगा सै, क्यूँके तन्ने ए सारी चिज्जां ताहीं बणाया अर वे तेरी-ए मर्जी तै थी अर रची गई।”

5 अर जो सिंहासन पै बैठ्या था, मन्ने उसके सोळे हाथ म्ह एक किताब देख्खी, जो भित्तर अर बाहरणै लिक्खी होड़ अर वा सात मोंहर लाके बन्द करी गई थी। 2 फेर मन्ने एक शक्तिशाली सुर्गदूत ताहीं देख्या, जो जोर तै बोलण लागरया था, के इस किताब के खोल्लण अर उसकी मोंहर तोड़ण के जोगगा कौण सै? 3 पर ना सुर्ग म्ह, ना धरती पै, ना धरती के तळै कोए उस किताब नै खोल्लण या उस ताहीं पढ़ण लायक कोए कोनी लिक्डया। 4 अर मै फूट-फूटके रोण लाग्या, क्यूँके उस किताब ताहीं खोल्लण, या उस ताहीं पढ़ण लायक कोए न्ही मिल्या। 5 फेर उन बुजुर्गां म्ह तै एक नै मेरे तै कहा, मतना रोवै, लखा, यहूदा के गोत्र का वो शेर, जो दाऊद का मूल सै, उस किताब नै खोल्लण अर उसकी सात्तु मोंहर तोड़ण के खातर जयवन्त होया सै। 6 फेर मन्ने उस सिंहासन अर च्यार प्राणियाँ अर उन बुजुर्गां के बिच्चाळे, मान्नी एक मारया होड़ मेम्ना खड्या देख्या जो पैहले मर गया था, पर इब वो जिन्दा होगया सै, उसके सात साँग अर सात आँख थी, ये परमेसवर की सात्तु आत्मा सै, जो साबती धरती पै भेज्जी गई सै। 7 उसनै आके उसके सोळे हाथ तै जो सिंहासन पै बैठ्या था, वा किताब ले ली, 8 अर जिब उसनै किताब ले ली, तो वे च्यार प्राणी अर सब चौबीस बुजुर्ग उस मेम्ने के स्याम्ही झुकगे, अर हरेक हाथ म्ह वीणा अर धूप तै भरे

होड़ सोन्ने के कटोरे थे, ये तो पवित्र माणसां की प्रार्थना सै। 9 अर वे यो नया गीत गाण लागे, के तू इस किताब कै लेण, अर उसकी मोहरां नै खोल्लण जोगगा सै, क्यूँके तन्नै मरकै अपने लहू तै हरेक कुल, अर भाषा, अर माणस, अर जात म्ह तै परमेसवर कै खात्तर माणसां ताहीं मोल लिया सै। 10 अर उन ताहीं म्हारे परमेसवर कै खात्तर एक राज्य अर याजक बणाया, ताके वो परमेसवर की सेवा करै, अर वे धरती पै राज्य करै सै। 11 अर जिब मन्नै देखा, तो उस सिंहासन अर उन प्राणियाँ अर उन बुजुर्गा के चौरादेके अनगिणत सुर्गदूतां का बोल सुणया, जिनकी गिणती लाकखां अर करोड़ां की थी। 12 अर वे ऊँची आवाज म्ह गाण लागे थे, के मारया होया मेम्ना ए सामर्थ, धन, ज्ञान, ताकत, आदर, महिमा, अर धन्यवाद कै लायक सै। 13 फेर मन्नै सुर्ग म्ह, धरती पै, अर धरती कै तळै, अर समुन्दर की सारी बणाई होड़ चिज्जां नै, अर सारा किमे, जो उन म्ह सै, उन ताहीं न्यू कहन्दे सुणया, के “जो सिंहासन पै बैठ्या सै, उसका, अर मेम्ने का धन्यवाद हो, मेम्ना ए सामर्थ, धन, ज्ञान, ताकत, आदर, महिमा के लायक सै, अर उसका राज्य, युगानुयुग रहवै।” (aiōn g165) 14 अर च्यारु प्राणियाँ नै आमीन कह्या, अर बुजुर्गा नै झुककै प्रणाम करया।

6 फेर मन्नै देखा, के मेम्ने नै उन सात्तु मोहरां म्ह तै एक ताहीं खोल्या, अर उन च्यारु प्राणियाँ म्ह तै एक का गरजण जिसा शब्द सुणया, के आ जाओ। 2 अर मन्नै निगांह करी, अर देखखो, मन्नै एक धोळा घोड़ा दिख्या, अर उसका सवार धनुष लिए होड़ सै, अर उस ताहीं एक ताज पहिराया गया, अर वो सुर्ग तै चाल्या अर धरती पै लिकड़ा, जो पैहले तै ए जीत चुका सै, अर फेर तै वो जीत जावैगा। 3 अर जिब मेम्ने नै दुसरी मोंहर खोल्ली, तो मन्नै दुसरे प्राणी ताहीं न्यू कहन्दे सुणया, के आ। 4 फेर एकदम तै एक और घोड़ा लिकड़या, जो लाल रंग का था, उसके सवार ताहीं यो हक दिया गया, के धरती पै तै मेळ-मिलाप ठा ले, ताके माणस एक-दुसरे नै मारै, अर उस ताहीं एक बड्डी तलवार दी गई थी। 5 अर जिब उसनै तीसरी मोंहर खोल्ली, तो मन्नै तीसरे प्राणी ताहीं न्यू कहन्दे सुणया, के “आ” अर मन्नै निगांह करी, अर देखखो, मन्नै एक काळे घोड़े ताहीं लिकड़दे देखा, अर उसके सवार कै हाथ म्ह एक ताखड़ी सै। 6 अर मन्नै उन च्यारु प्राणियाँ कै बिचाळै तै एक शब्द न्यू कहन्दे सुणया, के एक दीनार एक दिन की मजदूरी भोत सै, एक किलो गेहूँ, या तीन किलो जौ लेण खात्तर, पर तेल अर अंगूर के रस की किम्मत ना बदलिये। 7 अर जिब मेम्ने नै चौथी मोंहर खोल्ली, तो मन्नै चौथे प्राणी का बोल न्यू कहन्दे सुणया, के आ। 8 अर मन्नै निगांह करी, अर देखखो, एक पीळा-सा घोड़ा सै, अर उसके सवार का नाम मौत सै: अर अधोलोक उसके पाच्छै-पाच्छै आण लागरया था, अर उन ताहीं धरती पै रहण आळे चार माणस (या एक चौथाई माणसां) म्ह तै एक-एक ताहीं मारण का हक मिल्या, उननै तलवार, भूख, बीमारी, अर धरती के जंगली-जानवरां कै जरिये माणसां ताहीं मार दिया। (Hadēs g86) 9 अर जिब मेम्ने नै पाँचवी मोंहर खोल्ली, तो मन्नै वेदी कै तळै

उनके प्राणां ताहीं देखा, जो परमेसवर कै वचन कै कारण, अर उसपै बिश्वास करण के कारण मारे गये थे। 10 अर उसनै जोर तै रुक्का मारकै परमेसवर तै कह्या, हे माल्लिक, हे पवित्र, अर सच्चे प्रभु, तू इतनी बाट क्यूँ देखण लागरया सै, उन बुरे माणसां ताहीं दण्ड देण खात्तर, जो इस धरती पै रहण लागरे सै? हम तरे तै बिनती करां सां, के तू उन माणसां तै बदला ले, जिननै म्हारे ताहीं जान तै मार दिया सै। 11 अर उन म्ह तै हरेक ताहीं धोळे लत्ते दैके, परमेसवर नै उनतै कह्या, के और थोड़ी-दर ताहीं आराम करो, जिब ताहीं के थारे संगी दास, अर बिश्वासी भाई, जो थारी तरियां मरण आळे सै, उनकी भी गिणती पूरी ना हो लेवै। 12 जिब मेम्ने नै छटी मोंहर खोल्ली, तो मन्नै देखा, के एक बड़्हा हाल्लण होया, अर सूरज का रंग मोट्टे काळे काम्बळ की ढाळ काळा पड़ग्या, अर पूरा चाँद लहू जिसा लाल होग्या। 13 अर अकास के तारे धरती पै इस ढाळ पड़गे जिस तरियां आँधी तै हालकै अजीर कै दरखत म्ह तै काच्चे फळ झड़ै सै। 14 आसमान पाटग्या अर एक किताब की ढाळ सुकड ग्या था, अर हरेक पहाड़, अर टापू, अपणी-अपणी जगहां तै हटगे। 15 अर इसका नतिज्जां यो होया के, धरती के राजा, प्रधान, सरदार, साहूकार, अर सामर्थी माणस, हरेक गुलाम, अर हरेक आजाद माणस, पहाड़ां की खोह म्ह, अर चट्टानां म्ह जा लुत्के। 16 अर पहाड़ां, अर चट्टानां तै कहण लागे, के “म्हारे ताहीं लट्को ल्यो, अर म्हारे ताहीं उसके मुँह तै जो सिंहासन पै बैठ्या सै, अर मेम्ने कै प्रकोप तै लट्को ल्यो। 17 क्यूँके उनके प्रकोप के भयानक दिन जिब परमेसवर अर मेम्ना उन सारया का न्याय करैगा तो कोए भी उननै दण्ड तै बचा न्ही पावैगा।”

7 उसके पाच्छै मन्नै दुनिया कै च्यारु कुणयां पै चार सुर्गदूत खड़े देखे, उन सुर्गदूतां नै परमेसवर तै यो हक मिल्या था, के वे दुनिया के माणसां ताहीं मरी तै मारै, चाहे वे धरती पै हो या समुन्दर पै हो, उननै हवा ताहीं धरती के च्यारु कुणयां पै तै रोक राख्या था, ताके हवा धरती, समुन्दर, या किसी भी जंगल तै ना गुजरे, 2 अर मन्नै एक और सुर्गदूत ताहीं पूरब दिशा की ओड़ आन्दे देखा, उसके हाथ म्ह परमेसवर की ओड़ तै एक मोंहर थी, जो युगानुयुग जिन्दा सै, उस सुर्गदूत नै ऊँची आवाज म्ह दुसरे चार सुर्गदूतां तै यो कह्या। 3 जिब ताहीं हम अपने परमेसवर के दास्सां कै माथ्थे पै मोंहर न्ही ला देवां, जद ताहीं धरती अर समुन्दर अर दरखां ताहीं नुकसान ना पोहोचाईयो। 4 अर जिब सुर्गदूतां नै मोंहर लगा ली, तो किसै नै मेरे ताहीं बताया के एक लाख चवाळीस हजार पै मोंहर लगा दी गई सै, ये सारे लोग इस्राएल के बारहां गोत्र म्ह तै सै। 5 यहूदा के गोत्र म्ह तै बारहा हजार पै मोंहर दी गई, रुबेन के गोत्र म्ह तै बारहा हजार पै, गाद के गोत्र म्ह तै बारहा हजार पै। 6 अशेर के गोत्र म्ह तै बारहा हजार पै, नप्ताली के गोत्र म्ह तै बारहा हजार पै, मनशिशह के गोत्र म्ह तै बारहा हजार पै। 7 शमीन के गोत्र म्ह तै बारहा हजार पै, लेवी के गोत्र म्ह तै बारहा हजार पै, इस्राकार के गोत्र म्ह तै बारहा हजार पै। 8 जबूलून के गोत्र म्ह तै बारहा हजार पै, यूसुफ के गोत्र

मह तै बारहा हजार पै अर बिन्यामीन के गोत्र मह तै बारहा हजार पै मोंहर दी गई। 9 इसके पाच्छे मन्ने निगाह करी, अर देखखो, हरेक जात, अर कुल, अर माणस अर भाषा मह तै एक इसी बड़ी भीड़, जिस ताहीं कोए गिण न्ही सके था धोळें लते पैहरे, अर अपने हाथ्थां मह खजूर की डाळी लिए होए सिंहासन के स्याम्ही अर मेम्ने के स्याम्ही खड़ी सै। 10 अर जोर तै रुक्का मारके कहवै सै, के उद्धार म्हारे परमेसवर जो सिंहासन पै विराजमान सै, अर मेम्ने की ओड़ तै आवै सै। 11 अर सारे सुर्गदूत, उस सिंहासन, बुजुर्गा अर च्यारु प्राणियाँ के चौरदेके खड़े सै, फेर वे सिंहासन के स्याम्ही मुँह के बळ पड़गे, अर परमेसवर ताहीं प्रणाम करके कह्वा, म्हारे परमेसवर की बड़ाई, 12 महिमा, ज्ञान, धन्यवाद, आदर, सामर्थ, अर ताकत युगानुयुग बणी रहवै। आमीन। (aiōn g165) 13 इसपै बुजुर्गा मह तै एक नै मैरे तै कह्वा, के तू जाणै सै, के या धोळी पोशाक पैहरे होए कौण सै? अर किन्त तै आये सै? 14 मन्ने उसतै कह्वा, “हे माल्लिक, तन्नै ए बेरा सै।” उसनै मैरे तै कह्वा, “ये वे सै, जो उस बड़े क्लेश मह तै लिक्ड़के आये सै, इन्नै अपने-अपने लते मेम्ने के लहू मह धोकै धोळे करे सै।” 15 इससे कारण वे परमेसवर के सिंहासन के स्याम्ही खड़े सै, अर परमेसवर के घर मह दिन-रात उसकी सेवा करै सै, अर जो सिंहासन पै बैठ्या सै, वो उन मह रहवैगा अर उन ताहीं बचावैगा। 16 वे इब ना तो कदे भूक्खे होवैंगे अर ना तिसाए, अर ना तो सूरज की गर्मी उन ताहीं झुलसावैगी अर ना कोए दुसरी गर्मी। 17 क्यूँके जो मेम्ना सिंहासन के बिचाळै सै वो उनकी रुखाळी करैगा, अर उन ताहीं जीवन रूपी पाणी के चोवै के धौरै ले जाया करैगा, अर परमेसवर उनकी आँखां तै सारे आँसू पुंज देवैगा।

8 अर जब मेम्ने नै सातमी मोंहर खोल्ली, तो सुर्ग मह आध्धे घंटे ताहीं सन्नाटा छा गया। 2 अर मन्ने उन सात्तु सुर्गदूतां ताहीं जो परमेसवर के स्याम्ही खड़े रहवै सै, देख्या, अर उन ताहीं सात तुरही दी गई। 3 फेर एक और सुर्गदूत सोन्ने का धूपदान लिए होड़ आया, अर वेदी के लोवै खड्या होया, अर उस ताहीं भोत सारी धूप दी गई, ताके वो उस ताहीं सारे पवित्र माणसां की प्रार्थना के साथ उस सोन्ने की वेदी पै भेट चढ़ावै जो सिंहासन के स्याम्ही सै। 4 अर सुर्गदूतां के हाथ मह लिये होए उस धूपदान का धुम्मा, पवित्र माणसां की प्रार्थना के साथ परमेसवर के धौरै उप्पर पोहच गया। 5 अर सुर्गदूत नै धूपदान लेकै उस मह वेदी की आग भरी, अर उस ताहीं धरती पै गेर दी, अर गरजण गडगड़ाहट, बिजली चमकी अर हाल्लण होण लाग्या। 6 फेर वे सात्तु सुर्गदूत जिनके धौरै सात तुरही थी, उन ताहीं फुककण खात्तर त्यार होए। 7 पैहले सुर्गदूत नै तुरही फूक्की, अर लहू तै मिले होड़ ओळे अर आग पैदा होई, अर धरती पै गेरी गई, अर धरती का एक तिहाई हिस्सा जळग्या, अर दरखतां का तीसरा हिस्सा जळग्या, अर सारी हरी घास भी जळगी। 8 जब दुसरे सुर्गदूत नै तुरही फूक्की, तो मान्नो आग जिसा जळदा होया एक बड़ड़ा पहाड़ समुन्दर मह गेरया गया, अर समुन्दर का एक तिहाई हिस्सा लहू मह होग्या। 9 अर समुन्दर की एक तिहाई बणाई होड़ चीज जो जिन्दी

थी मरगी, अर जहाज के तीसरे हिस्से का नाश होग्या। 10 अर तीसरे सुर्गदूत नै तुरही फूक्की, अर एक बड़ड़ा तारा जो मशाल की ढाळ जळै था, सुर्ग तै टूट्या, अर नदियाँ के तीसरे हिस्से पै, अर पाणी के चोवां पै आण पड्या। 11 उस तारे का नाम नागदौना सै, अर एक तिहाई हिस्से का पाणी नागदौना बरगा कड़वा होग्या, अर घणखरे माणस उस पाणी के कड़वे हो जाण तै मरगे। 12 अर चौथे सुर्गदूत नै तुरही फूक्की, अर सूरज का एक तिहाई हिस्सा, अर चाँद का एक तिहाई हिस्सा अर तारां के एक तिहाई हिस्से पै आपफत आई, ताके उनका एक तिहाई हिस्सा अन्धैरे मह डूब जावै, अर दिन के एक तिहाई हिस्से मह चाँदणा न्ही रहया, अर उससे तरियां एक तिहाई रात भी बिना चाँदणे की हो गई। 13 जब मन्ने फेर देख्या, तो अकास के बिचाळै एक उकाब ताहीं उड़दे अर ऊँच्चे शब्द तै न्यू कहन्दे सुण्या, “उन तीन सुर्गदूतां की तुरही के शब्दां के कारण, जिनका फूकणा इब्बे बाक्की सै, धरती के बासिन्द्यां पै धिक्कार सै, धिक्कार, धिक्कार।”

9 जब पाँचमै सुर्गदूत नै तुरही फूक्की, तो मन्ने सुर्ग तै धरती पै एक तारा पड़दा होड़ देख्या, अर उस तारे ताहीं घणे अथाह कुण्ड की ताळी दी गई। (Abyssos g12) 2 अर उसनै घणे अथाह कुण्ड ताहीं खोल्या, अर कुण्ड मह तै बड़ी भट्टी जिसा धुम्मा उठ्या, अर कुण्ड के धुम्मे तै सूरज अर आसमान मह अन्धेरा छाग्या। (Abyssos g12) 3 अर उस धुम्मे मह भोत सारी टिट्टी लिक्ड़ी अर वे सारी धरती पै फेलगी, अर उन ताहीं बिच्छुआ की तरियां माणसां के लड़ण की शक्ति दी गई। 4 अर उनतै कह्वा गया, के ना धरती की घास ताहीं, ना किसे हरियाली ताहीं, ना किसे दरखत ताहीं नुकसान पोहोचाओ, सिर्फ उन माणसां ताहीं नुकसान पोहोचाओ, जिनके माथ्थे पै परमेसवर की मोंहर कोनी। 5 अर उनकी जान लेण का तो न्ही, पर पाँच महिन्ना तक माणसां ताहीं दर्द देण का हक दिया गया, अर उनका दर्द इसा था, जिसा बिच्छु के डंक मारण तै माणस का होवै सै। 6 उन पाँच महिन्ना मह माणस मरण के तरिकके टोहवैंगे, वे मरणा तो चाहवैंगे, पर वे मर न्ही पावैंगे। 7 अर उन टिट्टियाँ के आकार लड़ाई के खात्तर त्यार करे होए घोड्या के जिसे थे, अर उनके सिरां पै मान्नो सोन्ने के ताज थे, अर उनके मुँह माणसां बरगे थे। 8 अर उनके बाळ लुगाईयाँ के जिसे, अर दाँत शेरों के जिसे थे। 9 अर उनका शरीर मान्नो लोहे के कवच तै ढक्या होया था, अर उनके पंखां का शब्द इसा था जिसा रथां अर भोत-से घोड्या का जो लड़ाई मह भाज्जे सै। 10 अर उनकी पूछ अर डंक बिच्छुआ के समान थी, अर उन ताहीं पाँच महिन्ना तक माणसां नै दुख पोहोचाण की जो सामर्थ थी, वा उनकी पुन्झां मह थी। 11 घणे अथाह कुण्ड का दूत उनपै राजा था, उसका नाम इब्रानी मह अबद्दोन, अर यूनानी मह अपुल्लयोन सै। (Abyssos g12) 12 पाँच महिन्ना बाद वा बिपदा खतम हो जावैगी, लखाओ इब इनके पाच्छे दो बिपदा और आण आळी सै। 13 अर जब छटमै सुर्गदूत नै तुरही फूक्की तो जो सोन्ने की वेदी परमेसवर के स्याम्ही सै उसके सीनां मह तै मन्ने इसा शब्द सुण्या। 14 मान्नो कोए छटमै सुर्गदूत तै जिसके धौरै

तुरही थी कहण लागरया सै, के “उन चार सुर्गदूतां नै जो बड्डी नदी फरात के धोरै बन्धे होइ सै, खोल दे।” 15 अर वे च्यारु सुर्गदूत जो उस घड़ी, दिन, महिन्ने, या साल के खात्तर एक तिहाई माणसां नै मारण खात्तर छोड़ दिए गये थे। 16 उननै भोत बड़े घुड़सवारां की पलटन ताहीं कठा करया जिनकी गिणती बीस करोड़ सै। 17 अर मननै अपणे दर्शन म्ह घोड़े अर उसके इसे सवार दिक्खे, उनके धोरै कवच था जो लाल, गहरा नीला अर गन्धक की तरियां पीछा था, अर उन घोड्या के सिर शेर के सिर बरगे थे, अर उनके मुँह तै आग, अर धुम्मा, अर गन्धक लिक्कड़े थी। 18 इन तीन्नु महामारियाँ तै, यानिके आग, अर धुम्मा, अर गन्धक तै जो उसके मुँह तै लिक्कड़े थी, एक तिहाई माणस मारे गये। 19 क्यूँके उन घोड्या की ताकत उनके मुँह, अर उनकी पुन्झड़ां म्ह थी, ज्यांतै के उनकी पुन्झड़ां साँपां जिसे थी, अर उन पुन्झड़ां के सिर भी थे, अर इन्हे तै वे दर्द देवें थे। 20 अर बाकी माणस जो उन महामारियाँ तै नही मरे थे, उननै अपणे बुरे काम करणे नही छोड़े, जो के ये थे भुंडी ओपरी आत्मायाँ की, अर सोन्ने, चान्दी, पीत्तळ, पत्थर, अर काठ की मूर्तियाँ की पूजा करणा, जो ना देख, ना सुण, ना चाल सकै सै। 21 अर ना ए उननै खून करणा, जादू-टोणा, जारी, अर चोरी करणा छोड्या।

10 फेर मननै एक और शक्तिशाली सुर्गदूत ताहीं सुर्ग तै उतरदे देख्या, जिसनै बाइळां ताहीं लत्यां के समान धारण करया होया था, उसके सिर पै मेघ-धनुष था, अर उसका मुँह सूरज जिसा अर उसके पाँ आग के खम्भे बरगे थे। 2 उननै अपना सोळा पाँ समुन्दर पै, अर ओळा पाँ धरती पै धरया, अर उसके हाथ म्ह एक छोटी सी खुली होइ किताब थी, । 3 अर इतनी जोर तै चिल्लया, जिस ढाळ शेर गरजै सै, अर जब वो चिल्लावे था तो गरजण के सात शब्द सुणाई दिए, जिननै मै समझ नही पाया। 4 अर जब सात्तु गरजण के शब्द सुणाई दे लिए, तो मै लिखण पै था, अर मननै सुर्ग तै यो शब्द सुणया, के जो बात गरजण के उन सात शब्दां तै सुणी सै, उननै ल्हकोए राख, अर लिखै ना। 5 अर जिस सुर्गदूत ताहीं मननै समुन्दर अर धरती पै खड़े होइ देख्या था, उसनै अपना सोळा हाथ कसम खाण खात्तर सुर्ग के कान्ही ठाया। 6 अर जो युगानुयुग जिन्दा रहवैगा, अर जिसनै सुर्ग अर उस म्ह बसी होई चिज्जां ताहीं, अर धरती अर उस म्ह बसी होई चिज्जां ताहीं, अर समुन्दर उस म्ह बसी होई चिज्जां ताहीं बणाया सै, उस्से की कसम खाके बोल्या, “इब तो और वार नही होगी।” (aiōn g165) 7 जब सातमै सुर्गदूत का तुरही फूक्कण का बखत होगा, तो परमेसवर की योजना पूरी हो जावैगी, जिस ताहीं उसनै अपणे नबियाँ ताहीं बताया, जो उसकी सेवा करै सै, पर वो योजना दुसरे माणसां पै जाहिर कोनी करी थी। 8 अर जिस शब्द करण आळे ताहीं मननै सुर्ग तै बोलदे सुणया था, वो फेर मेरे गेल्या बात करण लाग्या, के जा, जो सुर्गदूत समुन्दर अर धरती पै खड्या सै, उसके हाथ म्ह की खुली होइ किताब ले ले। 9 अर मननै सुर्गदूत के धोरै जाके कह्या, “या छोटी किताब मननै दे, अर उसनै मेरे तै कह्या, ‘ले इसनै खाले,’ या तेरे मुँह म्ह शहद जिसे मिठ्ठी लागैगी, पर या तेरा पेट कड़वा

कर देगी।” 10 ज्यांतै मै वा छोटी किताब उस सुर्गदूत के हाथ म्ह तै लेके खाग्या, वा मेरे मुँह म्ह शहद जिसे मिठ्ठी तो लागी, पर जब मै उसनै खाग्या, तो मेरा पेट कड़वा होग्या। 11 फेर मेरे तै न्यू कह्या गया, “तनै घणेए माणसां, जात्तां, भाषा अर राजयां के बारे म्ह फेर तै भविष्यवाणी करणी होगी।”

11 फेर मेरे ताहीं नापण के खात्तर एक सरकण्डा दिया, जो नापण के यन्त्र जिसा था, अर किसे नै मेरे तै कह्या, “उठ, परमेसवर के मन्दर अर वेदी ताहीं नाप ले, अर उस म्ह आराधना करण आळा की गिणती करले। 2 अर मन्दर के बाहर का आँगण छोड़दे, उसनै मतना नाप, क्यूँके वो गैर यहूदियाँ ताहीं दिया गया सै, अर वे पवित्र नगर नै बियाळीस महिन्ने ताहीं रौंदैगी। 3 अर मै अपणे दो गवाहां ताहीं यो हक देऊँगा, के टाट ओढ़ होए एक हजार दो सौ साठ दिन ताहीं भविष्यवाणी करै।” 4 ये वैए जैतून के दो दरखत अर दो दीवट की तरियां सै, जो धरती के प्रभु के स्याम्ही खड़े रहवें सै। 5 अर जै कोए उननै नुकसान पोहचावे सै, तो उनके मुँह तै आग लिक्कड़े उनके बैरियाँ ताहीं भस्म करे सै, अर जै कोए उन ताहीं नुकसान पोहोचाणा चाहवैगा, तो जरूर इस्से ढाळ मारया जावैगा। 6 परमेसवर नै उन ताहीं हक दिया सै, के उनकी भविष्यवाणी के दिनां म्ह अकास तै मिह नही बरसै, अर उननै यो भी हक सै, के जब-जब वे चाहवें जद-जद वे पाणी नै लहू म्ह बदल दे, अर धरती पै हरेक ढाळ की बिपदा ल्यावै। 7 अर जब वे अपनी गवाही दे लेवेंगे, तो वो पशु जो घणे अथाह कुण्ड म्ह तै लिक्कड़ेगा, उनतै लड़के उन ताहीं जितैगा अर मार देवैगा। (Abyssos g12) 8 अर उनकी लाश उस बड़े नगर के चौक म्ह पड़ी रहवैगी, जित्त उनका प्रभु भी क्रूस पै चढ़ाया गया था, जो आत्मिक तौर तै सदोम अर मिस्र देश कुहावे सै। 9 अर सारे माणस, सारे कुल, सारी भाषा, अर सारी जात्तां के लोग उनकी लाश साढ़े तीन दिन ताहीं देखदे रहवेंगे, अर उनकी लाश कन्न म्ह धरण नही देवेंगे। 10 अर धरती के बासिन्दे, उनके मरण तै राज्जी अर मग्न होवेंगे, अर एक-दुसरे के धोरै तोपफे भेजजैंगे, क्यूँके इन दोनु नबियाँ नै धरती के बासिन्दयां ताहीं भोत सताया था 11 अर साढ़े तीन दिन के पाच्छे परमेसवर के कान्ही तै जीवन का साँस उन म्ह आ गया, अर वे अपणे पायां के बळ खड़े होग्ये, अर उनके देखण आळे डरगे। 12 अर उननै सुर्ग तै एक बड़ड़ा बोल सुणाई दिया, के उरै ऊपरान आओ, न्यू सुण वे बाइळां पै सवार होके अपणे बैरियाँ के देखदे-देखदे सुर्ग पै चढ़गे। 13 फेर उस्से बखत एक बड़ड़ा भूकम्प यरुशलम नगर म्ह होया, अर नगर का दसमां हिस्सा पड़ग्या, अर उस भूकम्प तै सात हजार माणस मरगे अर बाक्की बचे होइ माणस डरगे, अर सुर्ग के परमेसवर की महिमा करी। 14 दुसरी बिपदा बीत ली, देक्खो, तीसरी बिपदा तावळी आण आळी सै। 15 अर जब सातमै सुर्गदूत नै तुरही फूक्की, तो सुर्ग म्ह इस बारे म्ह बड़े-बड़े शब्द होण लागगे, के “दुनिया का राज्य म्हारे प्रभु का, अर उसके मसीह का होग्या सै, अर वो युगानुयुग राज्य करैगा।” (aiōn g165) 16 अर सब चौबीस बुजुर्ग जो परमेसवर के स्याम्ही अपणे-अपणे

सिंहासन पै बेठे थे, मुँह कै बळ मोध्धे पड़के परमेसवर की आराधना करेंगें। 17 न्यू कहण लागे, “के हे सर्वशक्तिमान प्रभु परमेसवर, जो सै, अर जो था, हम तेरा धन्यवाद करा सां, के तन्नै अपणी बड्डी सामर्थ के काम तै धरती पै राज करणा शुरु करया। 18 अर दुसरी जात्तां कै छो उठ्या, अर तेरा प्रकोप आण पड्या अर वो बखत आण पोंहच्या सै, के मरे होया का न्याय करया जावै, अर तेरे दास नबियाँ अर पवित्र माणसां ताहीं अर उन छोटे-बड़ा ताहीं जो तेरे नाम तै डरै सै, वो तेरी महिमा करै, अर धरती पै जो माणस दुसरे माणसां नै बिगाड़े सै, उन ताहीं नाश करा जावै।” 19 फेर परमेसवर का जो मन्दर सुर्ग म्ह सै वो खोल्या गया, अर उसके मन्दर म्ह उसका करार का सन्दूक दिख्या, बिजळियाँ, शब्द, गरजण अर भूकम्प होए अर बड़े ओले पड़े।

12 फेर इन बात्तां कै बाद सुर्ग पै एक बड़ड़ा निशान दिख्या, यानिके एक जनानी जो सूरज नै ओढ़े होइ थी, अर चाँद उसके पायां कै तळै था, अर उसके सिर पै बारहा तारां का ताज था। 2 अर वा गर्भवती थी, अर किल्की मारै थी, क्यूँके जापै का दर्द उसके होण लाग्या था, अर वा बाळक जाम्मण कै दर्द म्ह थी। 3 अर एक और निशान सुर्ग पै दिख्या, अर देखो, एक भोत बड़ड़ा लाल अजगर था जिसके सात सिर अर दस सींग थे, अर उसके सिरां पै सात राजमुकुट थे। 4 अर उसकी पुन्झड़ नै अकास के एक तिहाई हिस्से के तारे खिंचके धरती पै गेर दिए, अर वो अजगर उस जनानी के स्याम्ही जो जच्चा थी, खड्या होया, के जिब वा बाळक जणै तो उसके बाळक नै निगळ जावै। 5 अर उसके छोरा होया जो लोहे का राजदंड लिए होइ, सारी जात्तां पै राज करण पै था, अर उसका बाळक चाणचक परमेसवर कै धोरै, अर उसके सिंहासन कै धोरै ठा कै पोहोचा दिया गया। 6 अर वा जनानी उस बण म्ह भाजगी, जित्त परमेसवर की ओइ तै उसके खातर एक जगहां त्यार करी गई थी, ताके ओइ एक हजार दो सौ साठ दिन ताहीं उसकी देखभाळ अर उसका पालन-पोषण करया जावै। 7 फेर सुर्ग पै लड़ाई होई, मीकाईल अर उसके सुर्गदूत अजगर तै लड़ण नै लिक्ड़े, अर अजगर अर उसके दूत उसतै लड़े। 8 पर अजगर हार गया अर सुर्ग तै लिकाड़ दिया गया, अर सुर्ग म्ह उनके खातर फेर जगहां कोनी रही। 9 अर वो बड़ा अजगर यानिके वोए पुराणा साँप, जो इब्लीस अर शैतान कुहावै सै, अर साबती दुनिया नै भकाण आळा सै, धरती पै गेर दिया गया, अर उसके दूत उसके गैल गेर दिए गए। 10 फेर मन्नै सुर्ग पै तै यो बड़ड़ा शब्द आन्दे होइ सुणया, के इब म्हारा परमेसवर माणसां ताहीं बचा लेवैगा, अर वो अपणी शक्ति का इस्तमाल करैगा, अर राजा की तरियां राज करैगा, इब उसका मसीह दुनिया पै अपणा हक जतावैगा, क्यूँके शैतान परमेसवर की हजुरी म्ह खड़ा होकै, जो दिन रात उसके दास्सां पै दोष लाया करै था, वो सुर्ग तै गिरा दिया गया सै। 11 म्हारे विश्वासियाँ नै शैतान ताहीं हराया सै, अर वे मेम्ने कै लहू कै कारण, अर अपणी गवाही कै वचन कै कारण, उसपै जीते, अर उननै अपणे जी ताहीं प्यारा न्ही जाणया, उरै ताहीं कै मौत भी सहण कर ली। 12 ज्यांतै, हे सुर्ग, अर उस म्ह रहण

आळो आनन्दित होओ, अर हे धरती, अर समुन्दर म्ह रहण आळो, थारे पै धिक्कार सै! क्यूँके शैतान घणे छो कै गेल्या थारे धोरै उतर आया सै, क्यूँके वो जाणै सै, के उसका थोड़ा-ए बखत और बच रया सै। 13 अर जिब अजगर नै देख्या, के मै धरती पै गेर दिया गया सूँ, तो उस जनानी ताहीं जिन नै बेट्टा पैदा करया था, उसका पिच्छा करया। 14 अर उस जनानी ताहीं बड़े उकाब के दो पंख दिए गये, के अजगर कै स्याम्ही तै उड़ कै बण म्ह उस जगहां पोहच जावै, जित्त उसकी एक बखत, अर समयों, अर आध्धे बखत ताहीं देख-रेख करी जावै। 15 अर अजगर नै उस जनानी कै पाछै अपणे मुँह तै नदी की तरियां पाणी बहाया, के उसनै नदी तै बहा दे। 16 पर धरती नै उस जनानी की मदद करी, अर अपणा मुँह खोल कै उस नदी ताहीं जो अजगर नै अपणे मुँह तै बहाई थी, पी लिया। 17 फेर अजगर नै जनानी पै गुस्सा करया, अर उसके वंशजां ताहीं, जो परमेसवर के हुकम नै मान्नै सै, अर यीशु की गवाही देण पै अटल सै, उनतै लड़ण नै गया।

13 अर वो समुन्दर कै बालू पै जा खड्या होया। अर मन्नै एक पशु ताहीं समुन्दर म्ह तै लिक्ड़े होइ देख्या, जिसके दस सींग अर सात सिर थे, उसके सीनां पै दस राजमुकुट अर उसके सिरां पै परमेसवर की बुराई के नाम लिक्खे होइ थे। 2 अर जो पशु मन्नै देख्या, वो चित्तै बरगा था, अर उसके पाँ भाल्लू जिसे, अर मुँह शेर कै बरगा था, अर उस अजगर नै अपणी सामर्थ, अर अपणा सिंहासन, अर बड़ड़ा हक, उस ताहीं दे दिया। 3 अर मन्नै उसके सिरां म्ह तै एक पै इसा जानलेवा घाव लाग्या होइ देख्या, मान्नो वो मरण पै सै, फेर उसका जानलेवा घाव ठीक होग्या, अर साबती धरती के माणस हैरान होगे अर उस पशु के भगत बण जावेंगे। 4 अर उननै अजगर की पूजा करी, क्यूँके उसनै पशु ताहीं अपणा हक दे दिया था, अर न्यू कहकै पशु की भी पूजा करी, के इस पशु के बरगा कौण सै? कौण उसतै लड़ सकै सै? 5 उस ताहीं डींग मारण अर परमेसवर की बुराई करण का हक अर बियाळीस महिन्ने ताहीं राज करण की इजाजत दी गई। 6 पशु नै, परमेसवर अर उसके नाम, उसके रहण की जगहां यानी सुर्ग अर उन सब की, जो सुर्ग म्ह रहवै सै, उनकी बुराई करणा शुरु कर दिया। 7 अर उस ताहीं न्यू हक दिया गया, के पवित्र माणसां तै लड़ै, अर उनपै जीत पावै, अर उस ताहीं हरेक कुल, अर माणस, अर भाषा, अर जात पै हक दिया गया। 8 अर धरती पै रहण आळे वे सारे उस पशु की पूजा करेंगें। मतलब जिनका दुनिया की शुरुआत के बाद के वे सारे माणस जिनके नाम उस मेम्ने की जीवन की किताब म्ह लिक्खे न्ही गये सै। मेम्ना वोए सै जो मारया गया सै। 9 जिसके कान हों वो ध्यान तै सुणै। 10 जिस ताहीं कैद म्ह पड़णा सै, वो कैद म्ह पड़ैगा, जो तलवार तै मारैगा, जरूरी सै के वो तलवार तै मारया जावैगा। पवित्र माणसां का धीरज दुख ठाण अर उसपै विश्वास करण म्ह सै। 11 फेर मन्नै एक और पशु ताहीं धरती म्ह तै लिक्ड़दे देख्या, उसके मेम्ने की ढाळ दो सींग थे, अर वो अजगर की ढाळ बोल्लै था। 12 अर यो उस पैहल्ले पशु का सारा हक उसके स्याम्ही काम

म्ह ल्यावै था, अर धरती अर उसके बासिन्द्यां तै उस पैहल्डे पशु की जिसका जानलेवा घाव ठीक होग्या था, पूजा करै था। 13 अर वो बड़े-बड़े निशान दिखावै था, उरै ताहीं के माणसां के देखते-देखते सुर्ग तै धरती पै आग बरसा देवै था। 14 अर उन चमत्कारां के कारण जिन ताहीं उस पशु के स्याम्ही दिखाण का हक उस ताहीं दिया था, वो धरती के बासिन्द्यां ताहीं इस तरियां भकावै था, के धरती के बासिन्द्यां तै कहवै था, के जिस पशु के तलवार लागरी थी, वो जिन्दा होग्या सै, उसकी मूर्ति बनाओ। 15 अर उस ताहीं उस पशु की मूर्ति म्ह जी घाल्लण का हक दिया गया, के पशु की मूर्ति बोल्लण लागै, अर जितने माणस उस पशु की मूर्ति की पूजा न्ही करै, उन ताहीं मरवा देवै। 16 अर उसने छोटे, बड़े, साहूकार, कंगाल, आजाद, गुलाम सारया के सोलै हाथ या उनके माथ्यै पै छाप लगावाण खात्तर उन ताहीं मजबूर कर दिया। 17 के उस ताहीं छोड़ जिसपै छाप यानिके उस पशु का नाम, या उसके नाम का अंक हो, अर कोए लेण-देण न्ही कर सकै। 18 ज्ञान इस्से म्ह सै: जिस म्ह अकल हो वो इस पशु का अंक जोड़ ले, क्यूँके वो माणस का अंक सै, अर उसका अंक छः सौ छियासठ सै।

14 पर उसके बाद मन्ने कुछ और भी देखा, वो मेम्ना सिय्योन पहाड़ पै खड्या सै, अर उसके गेल्या एक लाख चवाळीस हजार माणस सै, जिनके माथ्यै पै उसका अर उसके पिता का नाम लिख्या होड़ सै। 2 अर सुर्ग तै मन्ने एक इसा शब्द सुणाई दिया, जो पाणी की घणी धारा अर बड़े गरजण जिसा शब्द था, अर जो शब्द मन्ने सुणया, वो इसा था, मान्नो वीणा बजाण आळै वीणा बजान्दे हों। 3 अर वे सिंहासन के स्याम्ही अर च्यारु प्राणियाँ अर बुजुर्गा के स्याम्ही मान्नो, एक नया गीत गाण लागरे थे, अर उन एक लाख चवाळीस हजार माणसां ताहीं छोड़ जो धरती पै तै छुड़ाए गये थे, कोए वो गीत न्ही सीख सकै था। 4 ये वे सै, जो जनानियाँ के गेल्या अशुद्ध न्ही होए, पर कुवारे सै। ये वेए सै, के जित्त किते मेम्ना जावै सै, वे उसके पाछै हो लेवें सै। जिस तरियां लोग अपनी फसल म्ह तै पैहला फळ परमेसवर ताहीं चढ़ावै सै, उससे तरियां वो भी परमेसवर अर मेम्ने खात्तर पैहले फळ के रूप म्ह चढ़ाए गए सै। 5 अर उनके मुँह तै झूठ न्ही लिक्डया था, वे बेकसूर सै। 6 फेर मन्ने एक और सुर्गदूत ताहीं अकास के बिचाळै उड़दे होड़ देख्या जिसके धोरै धरती पै के बासिन्द्यां की हरेक जात, अर कुल, अर भाषा, अर माणसां ताहीं सुणाण के खात्तर घणा सनातन सुसमाचार था। (aiōnios g166) 7 अर उसने ऊँच्ची आवाज म्ह कहा, “परमेसवर तै डरो, अर उसकी महिमा करो, क्यूँके उसके न्याय करण का बखत आण पोंहच्या सै, अर उसकी आराधना करो, जिसने सुर्ग अर धरती अर समुन्दर अर पाणी के सोते बनाए।” 8 फेर इसके पाछै एक और दुसरा सुर्गदूत न्यू कहन्दा होड़ आया, के पड़ग्या, वो बड़्ठा बेबीलोन नगर पड़ग्या जिसने अपनी जारी की कोपमय मदिरा सारी जात्तां ताहीं पिलाई सै। 9 फेर इनके पाछै एक और सुर्गदूत जोर तै न्यू कहन्दा होड़ आया, के जो कोए उस पशु अर उसकी मूर्ति की पूजा करै, अर अपने माथ्यै या अपने हाथ पै

उसकी छाप ले। 10 तो वो परमेसवर के प्रकोप की निरी मदिरा जो उसके खुन्दक के कटोरै म्ह घाल्ली गई सै, पीवगा अर पवित्र सुर्गदूतां के स्याम्ही, अर मेम्ने के स्याम्ही आग अर गन्धक की पीड़ा म्ह पड़ेगा। 11 अर उनकी पीड़ा का धुम्मा युगानुयुग उठदा रहवैगा, अर जो उस पशु अर उसकी मूर्ति की पूजा करै सै, अर जो उसके नाम की छाप लेवें सै, उन ताहीं दिन-रात चैन न्ही मिलेगा। (aiōn g165) 12 पवित्र माणसां का धीरज इस्से म्ह सै, के धीरज तै दुख सहन्दे रहवै अर अन्त ताहीं मजबूत बणके परमेसवर के हुकमां नै मान्ने, अर यीशु पै विश्वास राक्खें। 13 फेर मन्ने सुर्ग तै यो शब्द सुणया, के लिख, जो मुर्दे प्रभु म्ह मरै सै, वे इब तै धन्य सै, आत्मा कहवै सै, हॉ, क्यूँके वे अपनी मैहनतां तै आराम पावें, अर उनके काम उनके गेल्या हो लेवें। 14 अर मन्ने निगांह करी, अर देख्यो, एक धोळा बादळ सै, अर उस बादळ पै माणस के बेटे बरगा कोए बेठ्या सै, जिसके सिर पै सोन्ने का ताज अर हाथ म्ह तेज दराती सै। 15 फेर एक और सुर्गदूत नै मन्दर म्ह तै लिक्डके, उसतै जो बादळ पै बेठ्या था, जोर तै रुक्का मारके कहा, “के अपनी दराती ल्याके लामणी कर, क्यूँके लामणी का बखत आण पोंहच्या सै, ज्यांतै के धरती की खेत्ती पक ली सै।” 16 इस करके जो बादळ पै बेठ्या था, उसने धरती पै अपनी दराती लाई, अर धरती की लामणी करी गई। 17 फेर एक और सुर्गदूत उस मन्दर म्ह तै लिक्डया, जो सुर्ग म्ह सै, अर उसके धोरै भी तेज दराती थी। 18 फेर एक और सुर्गदूत जिस ताहीं आग पै हक था, वेदी म्ह तै लिक्डया, अर जिसके धोरै तेज दराती थी, उसतै जोर तै बोल्या, “अपणी तेज दराती ल्याके धरती की दाखलता के गुच्छे काट ले, क्यूँके उसकी दाख पक ली सै।” 19 अर उस सुर्गदूत नै धरती पै अपनी दराती लाई, अर धरती की दाखलता का फळ काटके, अपने परमेसवर के प्रकोप के बड़े रस के कुण्ड म्ह घाल दिया। 20 अर नगर के बाहरणै उस रसकुण्ड म्ह अंगूर रँदि गये, अर रसकुण्ड म्ह तै इतणा लहू लिक्डया के वो नदी म्ह तबदील होग्या, जो के तीन सौ किलो मीटर लम्बी अर इतनी गहरी थी, के उस म्ह घोड़े भी समा जावै।

15 फेर इसके बाद मन्ने सुर्ग म्ह एक और बड़्ठा अर अदभुत निशान देखा, यानिके सात सुर्गदूत जिनके धोरै सात आखरी बिपदा थी, क्यूँके उनके खतम हो जाण पै परमेसवर के प्रकोप का अंत सै। 2 फेर मन्ने इसा लाग्या जणु मान्नो मै एक काँच के समुन्दर नै देखण लागरया सूँ, जिस म्ह आग मिली होई थी, मन्ने इस समुन्दर के किनारे पै उन माणस ताहीं खड़े देख्या, जिनने उस बड़े पशु ताहीं हराया था, क्यूँके उनने उसकी मूर्ति की आराधना करण तै अर उसके नाम की मोहर लगाण तै भी मना कर दिया था, उन माणसां के हाथ म्ह परमेसवर के जरिये दी गई वीणा थी। 3 वे परमेसवर के दास मूसा नबी का गीत, अर मेम्ने का गीत गा-गाके कहवै थे, “हे सर्वशक्तिमान प्रभु परमेसवर, तेरे काम महान्, अर अनोक्खे सै, हे युग-युग के राजा, तेरी चाल सही अर सच्ची सै।” 4 “हे प्रभु, कौण तेरे तै न्ही डरैगा अर तेरे नाम की महिमा न्ही करैगा? क्यूँके सिर्फ तू ए पवित्र सै। सारी जात आकै तेरे स्याम्ही

मोध्ये पड़के प्रणाम करैगी, क्यूँके तेरे न्याय के काम दिखगे सै।” 5 जिन माणसां नै गाणा बन्द कर दिया, तो मन्ने सुर्ग म्ह मन्दर ताहीं खुल्या होया देख्या, जो के परमेसवर के तम्बू की तरियां था। 6 अर वे सातु सुर्गदूत जिनके धोरे सातु बिपदा थी, शुद्ध अर चमकदी होई मलमल के लते पहरे होइ, छाती पै सुनहरे परणे बाँधे होइ मन्दर तै लिकड़े। 7 अर उन च्यारु प्राणियाँ म्ह तै एक नै उन सात सुर्गदूतां ताहीं परमेसवर के, जो युगानुयुग जीवै सै, प्रकोप तै भरे होइ सात सोन्ने के कटोरे दिए। (aiōn g165) 8 अर परमेसवर की महिमा अर उसकी सामर्थ के कारण मन्दर धुम्मे तै भर गया, अर जिन तक उन सातु सुर्गदूतां की सातु बिपदा खतम न्ही होई तब तक कोए मन्दर म्ह न्ही जा सक्या।

16 फेर मन्ने मन्दर म्ह किसे ताहीं जोर तै उन सातु सुर्गदूतां तै न्यू कहन्दे सुण्या के जाओ, परमेसवर कै प्रकोप के सातु कटोरयां ताहीं धरती पै उंडेल घों। 2 इस करके पैहलड़े सुर्गदूत नै जाके अपना कटोरा धरती पै उंडेल दिया, अर उन माणसां का जिनपै पशु की छाप थी, अर जो उसकी मूर्ति की पूजा करै थे, उनके एक तरियां तै बुरा अर दुख देण आळा फोड़ा लिकड़या। 3 अर दुसरे सुर्गदूत नै अपना कटोरा समुन्दर पै उंडेल दिया, अर वो मरे होए माणसां के लहू जिसा होग्या, अर समुन्दर म्ह रहण आळा हरेक प्राणी मर गया। 4 अर तीसरे सुर्गदूत नै अपना कटोरा नदियाँ, अर पाणी के चोवां पै उंडेल दिया, अर वो लहू बणग्या। 5 फेर मन्ने पाणी के अधिकारी सुर्गदूत ताहीं न्यू कहन्दे सुण्या, के हे पवित्र, जो सै, अर जो था, तू न्यायी सै, अर तन्ने यो न्याय करया। 6 क्यूँके उननै पवित्र माणसां, अर नबियाँ का लहू बहाया था, इस करके तन्ने उनतै लहू पियाया, क्यूँके वे इससे जोगे सै। 7 दुबारा मन्ने वेदी तै यो शब्द सुण्या, के हाँ! हे सर्वशक्तिमान प्रभु परमेसवर, तेरे फैसले सही अर सच्चे सै। 8 अर चौथे सुर्गदूत नै अपना कटोरा सूरज पै उंडेल दिया, तो सूरज ताहीं यो हक दिया गया के वो माणसां नै अपना गर्मी तै झुलसा दे। 9 अर माणस घणी तपण तै झुलसगे, अर वे परमेसवर कै नाम की, जिन ताहीं इन मुसीबतां पै हक सै, उस ताहीं श्राप देण लागे, अर ना ए पाप करणा छोड्या, ना उसकी महिमा करी। 10 अर पाँचमै सुर्गदूत नै अपना कटोरा उस पशु कै सिंहासन पै उंडेल दिया अर उसके राज्य पै अन्धेरा छाग्या, अर माणस दर्द के मारे अपनी-अपनी जीभ चबाण लागे। 11 अर अपने दर्द अर फोड़यां के कारण सुर्ग कै परमेसवर की बुराई करी, अर अपने-अपने बुरे काम्मां ताहीं करणा न्ही छोड्या। 12 अर छठमै सुर्गदूत नै अपना कटोरा बड्डी नदी फरात पै उंडेल दिया, अर उसका पाणी सूख गया, ताके पूरब दिशा के राजयां के खात्तर राह त्यार हो जावै। 13 अर मन्ने उस अजगर कै मुँह म्ह तै, अर उस पशु कै मुँह म्ह तै, अर उस झूठे नबी के मुँह म्ह तै तीन भुंडी ओपरी आत्मायाँ ताहीं मेंढकां के रूप म्ह लिकड़दे देख्या। 14 ये चमत्कार दिखाण आळी भोत सी भुंडी ओपरी आत्मा सै, जो साबती दुनिया के राजयां के धोरे तै लिकड़के ज्यांतै जावै सै, के उन ताहीं सर्वशक्तिमान परमेसवर के उस बड़े दिन की लड़ाई कै खात्तर कट्टे करै। 15 अर देखखों, मेरा आणा

एक चोर की ढाळ होगा जो चुपके तै आवै सै, धन्य वो सै, जो जागदा रहवै सै, अर अपने लत्यां की चौकसी करै सै, के उघाड़ा कोनी हाँडे, अर माणस उसका उघाड़ापण ना देख पावै। 16 अर उन भुंडी ओपरी आत्मायाँ नै सारे राजा ताहीं उस जगहां कट्टा करया, जो इब्रानी म्ह हरमिगिदोन कुहावै सै। 17 अर सातमै सुर्गदूत नै अपना कटोरा हवा पै उंडेल दिया, अर मन्दर के सिंहासन तै यो बड़ड़ा शब्द होया, के, हो चुक्या। 18 फेर बिजलियाँ, अर शब्द, अर गरजण होए, अर एक इसा बड़ड़ा हाल्लण होया, के जिन तै माणस धरती पै बणाया गया, जद तै इसा बड़ड़ा हाल्लण कदे न्ही होया था। 19 अर उस बड़े नगर के तीन टुकड़े होगे, अर देश-देश के नगर पड़गे, क्यूँके परमेसवर नै बेबीलोन नगर के माणसां ताहीं दण्ड देण का अपना वादा पूरा करया, अर यो इसा होगा जिसा मान्नों के वो अपने छो की जळण की मदिरा उननै प्याणा। 20 अर हरेक टापू अपनी जगहां तै टळ ग्या, अर पहाड़ां का बेरा न्ही पाटया। 21 अकास तै माणसां पै मण-मण के बड़े ओळे पड़े, अर इस करके के या बिपदा घणीए भारया थी, लोगां नै ओळयां की बिपदा कै कारण परमेसवर की बुराई करी।

17 अर जिन सात सुर्गदूतां के धोरे वे सात कटोरे थे, उन म्ह तै एक नै आके मेरे तै न्यू कह्या, के उरे आ, मै तन्ने उस बेश्या का दण्ड दिखाऊँ, जो घणेए पाणी पै बेठ्ठी सै। 2 जिसके गेल्या धरती के राजयां नै जारी करी, अर धरती के बासिन्दे उसकी जारी की मदिरा तै मतवाले होगे थे। 3 फेर सुर्गदूत मेरी आत्मा नै एक जंगल-बियाबान म्ह लेग्या, ओड़ै मन्ने एक जनानी ताहीं लाल रंग के एक पशु पै बेठ्ठे देख्या, वो पशु परमेसवर की बुराई करण आळे शब्दां तै ढक्या होइ था, अर इसके सात सिर अर दस सींग थे। 4 या जनानी बैजनी, अर लाल रंग के लते पैहर-री थी, अर सोन्ने अर घणी कीमती मणियाँ अर मोतियाँ के गहणा तै सजी होइ थी, अर उसके हाथ्यां म्ह एक सोन्ने का कटोरा था जो अश्लीलता की घृणित चिज्जां तै अर उसकी जारी की भुंडी चिज्जां तै भरया होइ था। 5 अर उसके माथ्रै पै एक रहस्यमय नाम लिख्या था, “बड़ड़ा बेबीलोन धरती की बेश्यायाँ अर घृणित चिज्जां की माँ, अर सारी अश्लीलता नै जन्म देण आळी।” 6 अर मन्ने उस जनानी ताहीं पवित्र माणसां कै लहू अर यीशु के गवाहां कै लहू पीण म्ह मतवाली देख्या अर उस ताहीं देखके मै हैरान होग्या। 7 उस सुर्गदूत नै मेरे तै कह्या, “तू क्यांतै हैरान होया?” मै इस जनानी, अर उस पशु का, जिसपै वा चढ़री सै, अर जिसके सात सिर अर दस सींग सै, उसका तेरे ताहीं भेद बताऊँ सूँ। 8 जो पशु तन्ने देख्या सै, यो पैहलया तो था, पर इब न्ही सै, अर घणे अथाह कुण्ड तै लिकड़के विनाश म्ह पड़गा, अर धरती के बासिन्दे जिनके नाम दुनिया के बणण के बखत तै जीवन की किताब म्ह लिक्खे न्ही गये सै, इस पशु की या हाल्लत देखके अचम्भा करैगें, के पैहलया था, अर इब कोनी, पर यो दुबारा आवेगा। (Abysos g12) 9 यो समझाण के खात्तर के एक ज्ञान्नी मन जरूरी सै: वे सातु सिर सात पहाड़ सै, जिनपै वा जनानी बेठ्ठी सै। 10 अर वे सात राजा भी सै, पाँच तो मर

लिये सै, अर एक बाक्की सै, अर एक इब ताहीं आया कोनी, अर जिब आवैगा, तो कुछ बखत ताहीं उसका रहणा भी जरूरी सै। 11 अर जो पशु पैहल्या था, अर इब न्ही, वो खुद आठमां राजा सै, अर उन सातुआ मह तै सै, जिसका विनाश तय सै। 12 अर जो दस सींग तन्नै देखे सै, वे दस राजे सै, जिननै इब ताहीं राज्य न्ही मिल्या, पर उस पशु कै गेल्या थोड़े-से बखत खातर राजयां बरगा हक दिया जावैगा। 13 ये सारे एक मन होवेंगे, वे अपणी-अपणी सामर्थ अर हक उस पशु ताहीं देवेंगे। 14 ये मेम्ने गैल लड़ेंगे, अर मेम्ना उनतै जीत जावैगा, क्यूँके वो प्रभुओं का प्रभु, अर राजयां का राजा सै: अर जो बुलाए होइ, चुणे होइ, अर बिश्वासी उसके गैल सै, वे भी जीत पावेंगे। 15 फेर उसनै मेरे तै कह्या, के जो पाणी तन्नै देख्या, जिनपै बेश्या बेठी सै, वो देश, माणस, जाति, अर भाषा सै। 16 अर जो दस सींग तन्नै देखे, वे अर पशु उस बेश्या तै बैर राक्खेंगे, अर उस ताहीं लाचार अर उधाड़ी कर देवेंगे, अर उसका माँस खा जावेंगे, अर उस ताहीं आग मह जळा देवेंगे। 17 वा जनानी, जिसनै तू देखे सै, वो बड़ड़ा नगर सै, जो धरती के राजयां पै राज करै सै। ये सब बात उसके गैल होवेंगी, क्यूँके यो परमेसवर ही सै, जो अपणे मकसद नै पूरा करण खातर उनके मन नै उकसावैगा, ताके वे उसकी मनसा पूरी करै, योए कारण सै के वो अपणा हक पशु ताहीं राज करण खातर दे देंगे, जिब तक के परमेसवर नै जो कह्या सै वो पूरा ना हो ले।

18 इसके बाद मन्नै एक और सुर्गदूत ताहीं सुर्ग तै उतरदे देख्या, जिसकै धोरे बड़ड़ा अधिकार था, अर धरती उसके तेज तै चमक गयी। 2 उसनै जोर तै रुक्का मारके कह्या, पड़ग्या, बड़ड़ा बेबीलोन नगर पड़ग्या सै, अर भुंड़ी ओपरी आत्मायाँ का घर, हरेक भुंड़ी आत्मा का बसेरा, एक अशुद्ध अर घृणित पंछी का बसेरा होग्या। 3 यो इस कारण होवैगा क्यूँके बेबीलोन नगर उस बिरबान्नी की तरियां सै, जिसकी जारी की डरावणी मदिरा के कारण सारी जात पड़गी सै, अर धरती के राजयां नै उसके गेल्या जारी करी सै, अर धरती के व्यापारी उसके भोग-विलास के धन के कारण साहूकार होए सै। 4 फेर मन्नै सुर्ग तै किसे और का बोल सुण्या, के हे मेरे माणसों, उस मह तै लिक्ड़ आओ, के थम उसके पापां मह साइझी न्ही होओ, अर उसकी मुसीबतां मह तै कोए मुसीबत थारे पै ना आण पड़ै। 5 क्यूँके उसके पाप सुर्ग ताहीं पोंहोचगे सै, अर उसके अधर्म परमेसवर नै याद आये सै। 6 जिसा उसनै थारे ताहीं दिया सै, उस्से तरियां ए उस ताहीं भी भर द्यो, अर उसके काम्मां के मुताबिक उस ताहीं दो गुणा बदला द्यो, जिस कटोरे मह उसनै भर दिया था उस्से मह उसके खातर दो गुणा भर द्यो। 7 जितनी उसनै अपणी बड़ाई करी अर सुख-विलास कर्या, थम भी उसनै उतनाए दुख अर दर्द द्यो, क्यूँके वा अपणे मन मह कहवै सै, मै राणी के सामान बण बेठी सूं, मै बिधवा कोनी, अर ना ए कदे बिलाप करूँगी। 8 इस करके एक ए दिन उसके अंहकार के कारण उसपै बिप्या आण पड़ैगी, यानिके मौत, दुख, अकाळ, अर वा आग मह भस्म कर दी जावैगी, क्यूँके उसका न्याय करण आळा प्रभु परमेसवर शक्तिशाळी सै। 9 अर धरती के राजा जिननै

उसकै गेल्या जारी, अर भोगविलास कर्या, जिब उसकै जळण का धुम्मा देखेंगे, तो उसके खातर रोवेंगे, अर छात्ती पीटेंगे। 10 अर उसके दर्द के डर नै याद करके दूर खड़े होके कहवेंगे, हाय! हाय! हे बड़े नगर, बेबीलोन, हे शक्तिशाली नगर, थोड़ी-ए देर मह तेरे पै दण्ड आ लवैगा। 11 अर धरती के व्यापारी उसके खातर रोवेंगे अर कळपेंगे, क्यूँके इब कोए उनकी ये चीज मोल लेण आळा कोन्या रह्या। 12 उन धोरे भोत सारी चीज थी यानिके सोन्ना, चान्दी, रत्न, मोत्ती, अर मलमल, बैजनी, रेशमी, लाल रंग लत्ते, अर हरेक ढाळ की खसबूदार लाकड़ी, अर हाथी दाँत की हरेक ढाळ की चीज, घणी कीमती लाकड़ी, पीत्तळ, लोहा, अर संगमरमर के सारे ढाळ के बरतन। 13 अर दालचीनी, मसाले, धूप, गन्धरस, लोबान, अंगूर का रस, तेल, मैदा, गेहूँ, गऊँ, बळध, भेड़, बकरियाँ, घोड़े, रथ, गुलाम, अर माणसां के प्राण का कोए खरीदार कोनी रह्या। 14 व्यापारी उस ताहीं कहवेंगे, के जिन चिज्जां की तन्नै इच्छा करी थी, इब वा कोनी रही, अर एशो-आराम अर शोहरत की चीज तेरे तै दूर होई सै, अर वे कदे भी न्ही मिलैगी। 15 इन चिज्जां के व्यापारी जो उसके जरिये साहूकार होगे थे, उसके दर्द के डर नै याद करके दूर खड़े होके रोन्दे अर कळपदे होए कहवेंगे, 16 “हाय! हाय! यो बड़ड़ा नगर जो मलमल, अर बैजनी, अर लाल रंग के लत्ते पहरे था, अर सोन्ने, अर रत्नां, अर मोतियाँ तै सज्या था, 17 थोड़ी-ए देर मह उसका इसा सारा धन नाश होग्या, अर हरेक माँड़ी, अर पाणी मह सफर करणीया, किस्ती चलाणीए, अर जितने समुन्दर तै कमावें सै, सारे दूर खड़े होके।” 18 अर उस नगर के जळण का धुम्मा देखे होए रुक्का मारके कहवेंगे, “कौण सा नगर इस बड़े नगर के जिसा सै?” 19 अर अपणे-अपणे सिरां पै धूळ गरैंगे, अर रोन्दे होए अर कळपदे होए किल्ली मार-मारके कहवेंगे, के, हाय! हाय! यो बड़ड़ा नगर जिसकी सम्पत्ति के जरिये समुन्दर के सारे जहाज आळे साहूकार होगे थे, इब थोड़ी-ए देर मह तू उजड़ ग्या। 20 हे थम जो सुर्ग मह रहण आळे, अर हे पवित्र माणसों, प्रेरितों, अर नबियों, जो उसके गैल होया सै, इस कारण थम खुशी मनाओ, क्यूँके परमेसवर नै बेबीलोन नगर ताहीं दण्ड देके उसतै थारा बदला लिया सै। 21 फेर एक ताकतवर सुर्गदूत नै बड्डी चाक्की के पाट जिसा पत्थर ठाया, अर न्यू कहके समुन्दर मह बगा दिया, के, “बड़ड़ा नगर बेबीलोन इस्से ढाळ घणी ताकत तै गिराया जावैगा, अर फेर कदे भी उसका बेरा न्ही पाटैगा। 22 अर बेबीलोन नगर मह गायक, वीणा बजाण आळे, बाँसुरी बजाण आळे, अर तुरही फूंकण आळा का शब्द फेर कदे भी तन्नै सुणाई न्ही देवैगा, अर किसे काम का भी कोए कारीगर तन्नै कदे न्ही मिलैगा, अर चाक्की के चाल्लण का शब्द फेर कदे भी तन्नै न्ही सुणैगा। 23 अर दीवे का चाँदणा फेर कदे भी तेरे मह न्ही चमकैगा, अर बन्दड़ा-बन्दड़ी का शब्द फेर कदे भी तन्नै सुणाई न्ही देवैगा, क्यूँके तेरे व्यापारी धरती के प्रधान थे, अर तेरे जादू-टूणे तै सारी जात भकाई गई थी। 24 परमेसवर बेबीलोन नगर ताहीं इस कारण सजा

देवैगा, क्यूँके नबियाँ, पवित्र माणसां, अर धरती पै सारे घात करे होया का लहू उरसे म्ह पाया गया सै।”

19 इसके बाद मन्ने सुर्ग म्ह मान्नी भीड़ तार्हीं जोर तै न्यू कहन्दे सुण्या, के, हालेलूय्याह! उद्धार, महिमा, अर सामर्थ, म्हारे परमेसवर ए की सै। 2 क्यूँके उसका न्याय सच्चा अर सही सै, ज्यांतै के उसनै उस बड्डी बेश्या का जो अपणी जारी तै धरती के माणसां तै पाप करवाण लागरी थी, परमेसवर नै उस तार्हीं दण्ड देकै अपणे दास्सां के लहू का बदला लिया सै। 3 फेर दुसरी बर उनैने कह्या, हालेलूय्याह! अर बेबीलोन नगर के जळण का धुम्मा युगानुयुग उठदा रहवैगा। (aiōn g165) 4 सब चौबीस बुजुर्ग अर च्यार प्राणियाँ नै झुकके परमेसवर तार्हीं प्रणाम करया, जो सिंहासन पै बेठ्या था, अर कह्या, “आमीन! हालेलूय्याह!” 5 अर सिंहासन म्ह तै मन्ने एक आवाज सुणाई दी, के, हे म्हारे परमेसवर तै सारे डरण आळे दासों, के छोटे, के बडे, थम सारे उसकी जै-जै कार करो। 6 फेर मन्ने बड्डी भीड़ का शोर सुणाई दिया, यो भोत घणे पाणी अर जबरदस्त गड़गड़ाहट बरगा शब्द था, हालेलूय्याह! प्रभु म्हारा परमेसवर, सर्वशक्तिमान राज्य करै सै। 7 आओ, हम खुश अर मग्न होवां, अर उसकी जै-जै कार करा, क्यूँके मेम्ने का ब्याह आण पोहोचा, अर उसकी बन्दड़ी नै अपणे-आप तार्हीं त्यार कर लिया सै। 8 अर उस तार्हीं शुद्ध अर चमकदार सुथरे मलमल नै पैहरण का हक दिया गया, क्यूँके उस सुथरे मलमल का मतलब पवित्र माणसां के धर्म के काम सै। 9 अर सुर्गदूत नै मेरै तै कह्या, न्यू लिख, के, धन्य वे सै, जो मेम्ने के ब्याह के भोज म्ह न्योदे गये सै, फेर उसनै मेरै तै कह्या, ये परमेसवर की कही गई सच्ची बात सै। 10 अर मै उसनै पूज्जण के खात्तर उसके पायां के म्ह पड़ग्या, उसनै मेरै तै कह्या, “देख, इसा मतना करै, मै तेरे अर तेरे भाईयां की तरियां ए दास सूं, जो यीशु की गवाही देण पै अटल सै, परमेसवर नै ए पूज, क्यूँके यीशु की गवाही भविष्यवाणी की आत्मा सै।” 11 फेर मन्ने सुर्ग तार्हीं खुल्या होइ देखा, अर के देखूँ सूं, के एक धोळा घोड़ा सै, अर उसपै एक सवार सै, जो विश्वास जोगा, अर सच्चा कुहावै सै, अर वो धर्म के साथ न्याय अर लड़ाई करै सै। 12 उसकी आँख आग की लपट की तरियां थी, अर उसके सिर पै भोत-से मुकुट थे, अर उसके माथ्थे पै एक नाम लिख्या था, जिस तार्हीं उसनै छोड़ और कोए न्ही जाणै था। 13 अर उसनै लहू म्ह डबोया होइ बाणा पैहरे राख्या था, अर उसका नाम परमेसवर का वचन था। 14 अर सुर्ग की पलटन धोळे घोड्या पै चढ़के अर धोळा अर शुद्ध मलमल के लत्ते पैहरे होइ उसके पाच्छे-पाच्छे चाल्लण लागरी थी। 15 अर हरेक देश के माणसां तार्हीं मारण के खात्तर, उसके मुँह तै एक पैन्ही तलवार लिकड़े थी, अर वो लोहवै का राजदण्ड लिए होइ उनपै राज करैगा, अर वो सर्वशक्तिमान परमेसवर के छो की जलन की मदिरा के कुण्ड म्ह अंगूरां नै रौदैगा। 16 अर उसके लत्ते अर जाँघ पै यो नाम लिख्या था, राजयां का राजा अर प्रभुओं का प्रभु। 17 फेर मन्ने एक सुर्गदूत तार्हीं सूरज पै खड्या देखा, अर उसनै जोर तै रुक्का मारके अकास म्ह उड़ण आळे सारे पछियाँ तै

कह्या, “आओ, परमेसवर के बड़े भोज के खात्तर कठ्ठे हो जाओ। 18 ताके थम राजा, प्रधान, ताकतवर माणसां का, घोड्या का, उनके सवारां का, अर सारे ढाल के आजाद, गुलाम, छोटे, बडे, सारे माणसां का माँस खा सको।” 19 फेर मन्ने उस पशु जो समुन्दर म्ह तै लिकड्या था, धरती के राजयां अर उनकी पलटन तार्हीं उस धोळे घोड़े के सवार, अर उसकी पलटन तै लड़ण के खात्तर कठ्ठे देखा। 20 अर वो पशु अर उसके गेल्या वो झूठा नबी पकड्या गया, जिसनै उसके स्याम्ही इसे चमत्कार दिखाए थे, जिनके जरिये उसनै उन तार्हीं भकाया, जिन नै उस पशु की छाप ली थी, अर जो उसकी मूर्ति की पूजा करै थे, ये दोन्नु जिन्दे जी उस आग की झील म्ह जो गन्धक तै जळै सै, गरे गये। (Limnē Pyr g3041 g4442) 21 बाक्की लोग उस घोड़े की तलवार तै, जो उसके मुँह तै लिकड़े थी, मार दिए गये, अर सारे पंछी उनके माँस तै छिकगे।

20 फेर मन्ने एक सुर्गदूत तार्हीं सुर्ग तै उतरदे देखा, जिसके हाथ म्ह अथाह कुण्ड की ताळी, अर एक बड्डी बेल थी। (Abyssos g12) 2 अर उसनै उस अजगर, यानिके पुराणे साँप तार्हीं, जो इब्लीस अर शैतान सै, पकड़के हजार साल के खात्तर बाँध दिया। 3 अर उस तार्हीं अथाह कुण्ड म्ह गेर के मूंद दिया, अर उसपै मोहर ला दी, ताके वो हजार साल के पूरे होण तक देश-देश के माणसां तार्हीं दुबारा न्ही भका सकै, यो सब होण के बाद यो जरूरी सै, के थोड़ी देर खात्तर वो दुबारा खोल्या जावैगा। (Abyssos g12) 4 फेर मन्ने सिंहासनां पै कई माणसां तार्हीं बेठे देखा, अर उन तार्हीं न्याय करण का हक दिया गया, अर फेर मन्ने उन माणसां की आत्मा तार्हीं भी देखा, जिनके सिर यीशु की गवाही देण अर परमेसवर के वचन के कारण धड़ तै अलग करे गये थे। उननै उस पशु अर उसकी मूर्ति की पूजा कोनी करी थी, अर ना उसकी छाप अपणे माथ्थे अर हाथ्यां पै ली थी, वे जिन्दा होके मसीह के गेल्या हजार साल तार्हीं राज करदे रहे। 5 जिब तक ये हजार साल पूरे न्ही होए तब तक बाकी मरे होए जिन्दा न्ही होए, यो तो पैहला पुनरुत्थान सै। 6 धन्य अर पवित्र सै वो माणस, जो इस पैहल्ले पुनरुत्थान म्ह शामिल होवैगा, इस्यां पै दुसरी मौत का किमे भी हक कोन्या, पर वे परमेसवर अर मसीह के याजक होंगे, अर उसके गैल हजार साल तार्हीं राज्य करेंगे। 7 अर जिब हजार साल पूरे हो लेंगे, तो शैतान कैद तै छोड़ दिया जावैगा। 8 अर उन जात्तां तार्हीं जो धरती के चौगरदेकै होंगी, यानिके गोग अर मगोग जिनकी गिणती समुन्दर की बाळू के बराबर होगी, उन तार्हीं भकाके, कठ्ठे करके लड़ाई करण खात्तर लिकड़ेगा। 9 वे साबती धरती पै फैल जावेंगी, अर पवित्र माणसां की छावणी अर प्यारे नगर नै घेर लेवेंगी, पर सुर्ग म्ह परमेसवर की आग उतरके उसकी सारी पलटन तार्हीं भस्म कर देवैगी। 10 अर उनका भकाण आळा शैतान आग अर गन्धक की उस झील म्ह गेर दिया, जिस म्ह वो पशु अर झूठा नबी भी होगा, अर वे दिन-रात युगानुयुग दर्द तै तड़पदे रहवेंगे। (aiōn g165, Limnē Pyr g3041 g4442) 11 फेर मन्ने एक बड़्ड़ा धोळा सिंहासन अर उसपै


बेट्टे होए परमेसवर ताहीं देख्या, जिसकै स्याम्ही तै धरती अर अकास भाजगे, अर उसके बाद वे दिखाई नही दिए। 12 फेर मन्ने छोट्टे-बड़े सारे मरे होया ताहीं परमेसवर के सिंहासन के स्याम्ही खड़े होए देख्या, अर किताबें खोल्ली गई, अर फेर एक और किताब खोल्ली गई, यानिके जीवन की किताब। मरे होया का न्याय उनके काम्मां के मुताबिक करया गया, जिनका बयान इन किताबां म्ह लिख्या होइ था। 13 अर समुन्दर नै उन मरे होए माणसां ताहीं उगळ दिया, जो उस म्ह थे, अर मौत अर अधोलोक नै भी उन मरे होए माणसां ताहीं उगळ दिया, जो उस म्ह थे, अर हरेक का न्याय उनके काम्मां के मुताबिक करया गया। (Hadēs g86) 14 मौत अर अधोलोक भी आग की झील म्ह गरे गये, या आग की झील ए दुसरी मौत सै। (Hadēs g86, Limnē Pyr g3041 g4442) 15 अर जिस किसे का नाम जीवन की किताब म्ह लिख्या होया नही मिल्या, वो आग की झील म्ह गेर दिया गया। (Limnē Pyr g3041 g4442)

21 फेर मन्ने नये अकास अर नयी धरती ताहीं देख्या, क्यूँके पैहला अकास अर पैहली धरती खतम हो ली थी, अर समुन्दर भी नही रहया। 2 फेर मन्ने पवित्र नगर नये यरुशलेम ताहीं सुर्ग पै तै, परमेसवर कै धोरे तै उतरदे देख्या, अर वो नगर उस बन्दड़ी की तरियां था, जो अपणे बन्दड़े खात्तर सिंगार करके सिंगरी हो सै। 3 फेर मन्ने सिंहासन म्ह तै किसे ताहीं जोर तै न्यू कहन्दे सुण्या, के, देख, आज तै ए परमेसवर का डेरा माणसां के बिचाळे होवैया, वो उनके गेल्या वास करेगा, अर वे उसके माणस होंगे, अर परमेसवर खुद उनके गेल्या रहवैया, अर वो उनका परमेसवर होगा। 4 अर वो उनकी आँखां तै सारे आँसू पुंज देवैया, अर इसके बाद ना मौत, ना दुख, ना बिलाप, अर ना दर्द रहवैया, क्यूँके पुराणी बात बीत ली सै। 5 अर जो सिंहासन पै बैठ्या था, उसनै कह्या, के देख, इब मै नई सृष्टि की रचना करण लागरया सूं, फेर उसनै कह्या, के लिख ले, क्यूँके जो कुछ कह्या जाण लागरया सै, जो मै कहण लागरया सूं, तू उसपै बिश्वास कर सकै सै, क्यूँके यो पक्का होवैया। 6 फेर उसनै मेरे तै कह्या, “सब कुछ पूरा होगया सै, मै अल्फा अर ओमेगा, आदि अर अन्त सूं। जो तिसाए सै मै उन ताहीं उस पाणी के चोवै म्ह तै जो अनन्त जिन्दगी देवै सै उस ताहीं मुफ्त म्ह प्याऊँगा। 7 जो बुराई की ताकतां पै जीत पावै, वोए ये सारी आशीष मेरे तै पावैया, अर मै उसका परमेसवर होऊँगा, अर वो मेरा बेट्टा होगा। 8 पर डरपोक, अबिश्वासी, घिनौणे, हत्यारे, जार, जादू-टूणे करणीये, मूर्ति पूजणीये, अर सारे झूठे माणसां का भाग उस झील म्ह मिलैया, जो आग अर गन्धक तै जळदी रहवै सै, या दुसरी मौत सै।” (Limnē Pyr g3041 g4442) 9 फेर जिन सात सुर्गदूत कै धोरे आखरी सात मुसीबातां तै भरे होइ कटोरे थे, उन म्ह तै एक मेरे धोरे आया, अर मेरे गेल्या बात करके कह्या, “उरै आ मै तन्नै बन्दड़ी यानिके मेन्ने की घरआळी दिखाऊँगा।” 10 अर वो मन्ने आत्मा म्ह, एक बड़े अर ऊँच्चे पहाड़ पै लेग्या, अर पवित्र नगर यरुशलेम ताहीं सुर्ग पै तै परमेसवर कै धोरे उतरदे दिखाया। 11 परमेसवर की महिमा उस म्ह थी, अर उसकी चमक बेसकिमती पत्थर पारस कै समान अर पन्ने की ढाळ

सुथरी थी। 12 अर उसकी चारदीवारी घणी ऊँच्ची थी, अर उसके बारहा फाटक अर फाटकां पै बारहा सुर्गदूत थे, अर उनपै इस्राएलियाँ के बारहा गोत्रां के नाम लिक्खे थे। 13 पूरब कान्ही तीन फाटक, उत्तर कान्ही तीन फाटक, दक्खिन कान्ही तीन फाटक, अर पश्चिम कान्ही तीन फाटक थे। 14 अर नगर की चारदीवारी की बारहा नीम थी, अर उनपै मेन्ने के बारहा प्रेरितां के बारहा नाम लिक्खे होइ थे। 15 अर जो सुर्गदूत मेरै गेल्या बात करण लागरया था, उसके धोरे नगर, उसके फाटकां अर उसकी चारदीवारी ताहीं नाप्पण कै खात्तर एक सोन्ने का सरकण्डा दिया गया था। 16 अर वो नगर चकोर बस्या होइ था, अर उसकी लम्बाई अर चौड़ाई एक सी थी, अर उसनै उस सरकण्डे तै नगर ताहीं नाप्या, तो साढे सात सौ कोस का लिक्क्या, उसकी लम्बाई, चौड़ाई, अर ऊँचाई एक सी थी। 17 अर उसनै उसकी चारदीवारी ताहीं माणस के, यानिके सुर्गदूत के नाप तै नाप्या, तो छियासठ मीटर लिक्क्या। 18 अर उसकी चारदीवारी म्ह पन्ने जड़े थे, अर नगर इसे शुद्ध सोन्ने का था, जो कती शीशे बरगा साफ था। 19 अर उस नगर की नीम हरेक ढाळ के घणे महँगे पत्थरां तै सजाई होइ थी, पैहलड़ी नीम पन्ने की थी, दुसरी नीलमणि की, तीसरी लालड़ी की, चौथी मरकत की। 20 पाँचमी गोमेदक की, छटी माणिक्य की, सातमी पीतमणि की, आठमी पेरोज की, नौम्मी पुखराज की, दसमी लहसनिए की, ग्यारमी धूपकान्त की, बाहरमी याकूत की। 21 अर बारहों फाटक, बारहा मोतियाँ के थे, एक-एक फाटक, एक-एक मोत्ती का बण्या होइ था, अर नगर की सड़क साफ-सुथरे काँच के जिसे शुद्ध सोन्ने की थी। 22 अर मन्ने उस म्ह कोए मन्दर नही देख्या, क्यूँके सर्वशक्तिमान प्रभु परमेसवर, अर मेन्ना उसका मन्दर सै। 23 अर उस नगर म्ह सूरज अर चाँद के चाँदणे की जरूरत कोनी, क्यूँके परमेसवर कै तेज तै उस म्ह चाँदणा होरया सै, अर मेन्ना उसका दीवा सै। 24 अर हरेक देश के माणस उसके चाँदणे म्ह चाल्लै-फिरेंगे, अर धरती के राजा अपणी शानों-शोकत उस म्ह ल्यावेंगे। 25 अर उसके फाटक दिन म्ह कदे भी नही मूदे जावेंगे, अर ओड़ै रात नही होगी। 26 अर हरेक देश के माणस अपणी शानों-शोकत उस म्ह ल्यावेंगे। 27 पर उस नगर म्ह कोए अशुद्ध चीज, या घृणित काम करण आळा, या झूठ का गढ़नआळा किसे भी तरियां तै उस म्ह दाखल नही हो पावैया, पर सिर्फ वे लोग दाखल होवेंगे जिनके नाम मेन्ने की जीवन की किताब म्ह लिक्खे सै।

22 फेर सुर्गदूत नै मेरे ताहीं पाणी दिखाया जो जीवन देण आळा पाणी कहलावै सै, अर वो पाणी शीशे की तरियां साफ था, अर उसका चोवां परमेसवर का सिंहासन सै, जो के मेन्ने का भी सिंहासन सै। 2 वो नदी नगर के बीचों बीच सड़क के बिचाळे बहवै थी। अर नदी के इस पार, अर उस पार, उसके दोन्नु किनारां पै जीवन का दरखत था, जो जीवन देवै सै, उस म्ह बारहा ढाळ के फळ लागै थे, अर वो हरेक महिन्ने फळ ल्यावै था, अर उस दरखत के पत्त्यां तै हरेक देश के माणस चंगे होवै थे। 3 अर फेर कोए श्राप नही होगा। परमेसवर अर मेन्ने का सिंहासन उस नगर म्ह होगा, अर उसके दास उसकी सेवा

करेंगे। 4 अर वे परमेसवर ताहीं आम्ही-स्याम्ही देखेंगे, अर परमेसवर का नाम उनके माथ्यां पे लिख्या होया होगा। 5 अर फेर कदे रात न्ही होगी, अर ना ए उन ताहीं दीवै अर सूरज के चाँदणे की जरूरत होगी, क्यूँके प्रभु परमेसवर उन ताहीं चाँदणा देवैगा, अर वे युगानुयुग राज करेंगे। (aiōn g165) 6 फेर सुर्गदूत नै मेरे तै कह्या, “जो मै कहण लागरया सूं, तू उसपै बिश्वास कर सकै सै, क्यूँके यो पक्का होवैगा, अर प्रभु जो नबियाँ की आत्मायाँ का परमेसवर सै, अपणे सुर्गदूत ताहीं ज्यातै भेज्या, के अपणे दास्सां ताहीं वे बात जिनका तावळा पूरा होणा जरूरी सै दिखावै।” 7 देख, मै तावळा आण आळा सूं, धन्य सै वो, जो इस किताब की भविष्यवाणी की बाततां नै मान्ने सै। 8 मै वोए यूहन्ना सूं, जो ये बात सुणै, अर देखै था, अर जिब मन्ने सुणया, अर देख्या, तो जो सुर्गदूत मन्ने ये बात दिखावै था, मै उसके पायां म्ह प्रणाम करण कै खात्तर मोध्या पड़ग्या। 9 अर उसनै मेरे तै कह्या, “देख, इस ढाळ मतना करै, क्यूँके मै तेरा अर तेरे भाई नबियाँ का अर इस भविष्यवाणी की अर इस किताब की बाततां कै मानण आळा का जोड़ीदार दास सूं, परमेसवर नै ए पूज।” 10 फेर उसनै मेरे तै कह्या, “इस किताब की भविष्यवाणी की बाततां ताहीं बन्द मतना करै, क्यूँके बखत आ लिया सै। 11 जो जुल्म करै सै, वो जुल्म ए करदा रहवै, अर जो बुरा सै, वो बुरा बणया रहवै, अर जो धर्मी सै, वो धर्मी बणया रहवै, अर जो पवित्र सै, वो पवित्र बणया रहवै।” 12 लखा, मै तावळा-ए आण आळा सूं, अर हरेक के काम कै मुताबिक बदला देण कै खात्तर प्रतिफळ मेरे धोरै सै। 13 मै अल्फा अर ओमेगा, पैहला अर आखरी, आदि अर अन्त सूं। 14 धन्य वे सै, जो अपणे लत्ते धो लेवै सै, क्यूँके उन ताहीं जीवन के दरखत कै लेवै आण का हक मिलैगा, अर वे फाटकां तै हो कै नगर म्ह दाखल होवेंगे। 15 पर कुत्ते, अर जादू-टूणा करणीये, जार, हत्यारे, मूर्ति पूजणीया, हरेक झूठ का चाहण आळा, अर झूठ गढ़ण आळा बाहरणै रहवैगा। 16 मुझ यीशु नै अपणे सुर्गदूत ताहीं ज्यातै भेज्या सै, ताके थारे आगै कलीसियाओं कै बारै म्ह इन बाततां की गवाही दिंयु, मै दाऊद का मूल, अर वंश, अर भोर का चमकदा होड़ तारा सूं। 17 अर आत्मा, अर बन्दड़ी दोन्नु कहवै सै, “आ!” अर सुणण आळा भी कहवै, के “आ!” अर जो तिसाया हो, वो आवै अर जो कोए चाहवै वो जीवन का पाणी मुफ्त म्ह ले। 18 मै हरेक ताहीं जो इस किताब की भविष्यवाणी की बात सुणै सै, गवाही दिंयुं सूं, के जै कोए माणस इन बाततां म्ह किमे बधावै, तो परमेसवर उन मुसीबतां ताहीं जो इस किताब म्ह लिक्खी सै, उसपै बढ़ावैगा। 19 अर जै कोए इस भविष्यवाणी की किताब की बाततां म्ह तै किमे लिकाड़ै, तो परमेसवर उस जीवन के दरखत अर पवित्र नगर म्ह तै जिसका जिक्र इस किताब म्ह सै, उसका हिस्सा लिकाड़ देवैगा। 20 जो इन बाततां की गवाही देवै सै, वो न्यू कहवै सै, “हाँ, मै तावळा आण आळा सूं, आमीन। हे प्रभु यीशु आ!” 21 प्रभु यीशु का अनुग्रह पवित्र लोगां कै गैल रहवै। आमीन।



फेर मन्ने पवित्र नगर नये यरुशलेम ताहीं सुर्ग पै तै, परमेसवर के धारे तै उतरदे देख्या, अर वो नगर उस बन्दड़ी की तरियां था, जो अपणे बन्दड़े खात्तर सिंगार करके सिंगरी हो सै। फेर मन्ने सिंहासन म्ह तै किसे ताहीं जोर तै न्यू कहन्दे सुण्या, के, देख, आज तै ए परमेसवर का डेरा माणसां के बिचाळे होवेगा, वो उनके गेल्या वास करेगा, अर वे उसके माणस होंगे, अर परमेसवर खुद उनके गेल्या रहवेगा, अर वो उनका परमेसवर होगा।

प्रकाशित वाक्य 21:2-3

Reader's Guide

हरियाणवी at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

हरियाणवी at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Haryanvi---Haryanvi-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

लूका 8:31
रोमियों 10:7
प्रकाशित वाक्य 9:1
प्रकाशित वाक्य 9:2
प्रकाशित वाक्य 9:11
प्रकाशित वाक्य 11:7
प्रकाशित वाक्य 17:8
प्रकाशित वाक्य 20:1
प्रकाशित वाक्य 20:3

aidios

रोमियों 1:20
यहूदा 1:6

aiōn

मत्ती 12:32
मत्ती 13:22
मत्ती 13:39
मत्ती 13:40
मत्ती 13:49
मत्ती 21:19
मत्ती 24:3
मत्ती 28:20
मरकुस 3:29
मरकुस 4:19
मरकुस 10:30
मरकुस 11:14
लूका 1:33
लूका 1:55
लूका 1:70
लूका 16:8
लूका 18:30
लूका 20:34
लूका 20:35
यूहन्ना 4:14
यूहन्ना 6:51
यूहन्ना 6:58
यूहन्ना 8:35
यूहन्ना 8:51
यूहन्ना 8:52
यूहन्ना 9:32
यूहन्ना 10:28
यूहन्ना 11:26
यूहन्ना 12:34
यूहन्ना 13:8
यूहन्ना 14:16

प्रेरितों के काम 3:21
प्रेरितों के काम 15:18
रोमियों 1:25
रोमियों 9:5
रोमियों 11:36
रोमियों 12:2
रोमियों 16:27
1 कुरिन्थियों 1:20
1 कुरिन्थियों 2:6
1 कुरिन्थियों 2:7
1 कुरिन्थियों 2:8
1 कुरिन्थियों 3:18
1 कुरिन्थियों 8:13
1 कुरिन्थियों 10:11
2 कुरिन्थियों 4:4
2 कुरिन्थियों 9:9
2 कुरिन्थियों 11:31
गलातियों 1:4
गलातियों 1:5
इफिसियों 1:21
इफिसियों 2:2
इफिसियों 2:7
इफिसियों 3:9
इफिसियों 3:11
इफिसियों 3:21
इफिसियों 6:12
फिलिप्पियों 4:20
कुलुस्सियों 1:26
1 तीमुथियुस 1:17
1 तीमुथियुस 6:17
2 तीमुथियुस 4:10
2 तीमुथियुस 4:18
तीतुस 2:12
इब्रानियों 1:2
इब्रानियों 1:8
इब्रानियों 5:6
इब्रानियों 6:5
इब्रानियों 6:20
इब्रानियों 7:17
इब्रानियों 7:21
इब्रानियों 7:24
इब्रानियों 7:28
इब्रानियों 9:26
इब्रानियों 11:3
इब्रानियों 13:8
इब्रानियों 13:21
1 पतरस 1:23

1 पतरस 1:25
1 पतरस 4:11
1 पतरस 5:11
2 पतरस 3:18
1 यूहन्ना 2:17
2 यूहन्ना 1:2
यहूदा 1:13
यहूदा 1:25
प्रकाशित वाक्य 1:6
प्रकाशित वाक्य 1:18
प्रकाशित वाक्य 4:9
प्रकाशित वाक्य 4:10
प्रकाशित वाक्य 5:13
प्रकाशित वाक्य 7:12
प्रकाशित वाक्य 10:6
प्रकाशित वाक्य 11:15
प्रकाशित वाक्य 14:11
प्रकाशित वाक्य 15:7
प्रकाशित वाक्य 19:3
प्रकाशित वाक्य 20:10
प्रकाशित वाक्य 22:5

aiōnios

मत्ती 18:8
मत्ती 19:16
मत्ती 19:29
मत्ती 25:41
मत्ती 25:46
मरकुस 3:29
मरकुस 10:17
मरकुस 10:30
लूका 10:25
लूका 16:9
लूका 18:18
लूका 18:30
यूहन्ना 3:15
यूहन्ना 3:16
यूहन्ना 3:36
यूहन्ना 4:14
यूहन्ना 4:36
यूहन्ना 5:24
यूहन्ना 5:39
यूहन्ना 6:27
यूहन्ना 6:40
यूहन्ना 6:47
यूहन्ना 6:54
यूहन्ना 6:68

यूहन्ना 10:28
यूहन्ना 12:25
यूहन्ना 12:50
यूहन्ना 17:2
यूहन्ना 17:3
प्रेरितों के काम 13:46
प्रेरितों के काम 13:48
रोमियों 2:7
रोमियों 5:21
रोमियों 6:22
रोमियों 6:23
रोमियों 16:25
रोमियों 16:26
2 कुरिन्थियों 4:17
2 कुरिन्थियों 4:18
2 कुरिन्थियों 5:1
गलातियों 6:8
2 थिस्सलुनीकियों 1:9
2 थिस्सलुनीकियों 2:16
1 तीमुथियुस 1:16
1 तीमुथियुस 6:12
1 तीमुथियुस 6:16
2 तीमुथियुस 1:9
2 तीमुथियुस 2:10
तीतुस 1:2
तीतुस 3:7
फिलेमोन 1:15
इब्रानियों 5:9
इब्रानियों 6:2
इब्रानियों 9:12
इब्रानियों 9:14
इब्रानियों 9:15
इब्रानियों 13:20
1 पतरस 5:10
2 पतरस 1:11
1 यूहन्ना 1:2
1 यूहन्ना 2:25
1 यूहन्ना 3:15
1 यूहन्ना 5:11
1 यूहन्ना 5:13
1 यूहन्ना 5:20
यहूदा 1:7
यहूदा 1:21
प्रकाशित वाक्य 14:6

eleēsē

रोमियों 11:32

Geenna

मत्ती 5:22
मत्ती 5:29
मत्ती 5:30
मत्ती 10:28
मत्ती 18:9
मत्ती 23:15
मत्ती 23:33
मरकुस 9:43

मरकुस 9:45
मरकुस 9:47
लूका 12:5
याकूब 3:6

Hadēs

मत्ती 11:23
मत्ती 16:18
लूका 10:15
लूका 16:23
प्रेरितों के काम 2:27
प्रेरितों के काम 2:31
1 कुरिन्थियों 15:55
प्रकाशित वाक्य 1:18
प्रकाशित वाक्य 6:8
प्रकाशित वाक्य 20:13
प्रकाशित वाक्य 20:14

Limnē Pyr

प्रकाशित वाक्य 19:20
प्रकाशित वाक्य 20:10
प्रकाशित वाक्य 20:14
प्रकाशित वाक्य 20:15
प्रकाशित वाक्य 21:8

Sheol

उत्पत्ति 37:35
उत्पत्ति 42:38
उत्पत्ति 44:29
उत्पत्ति 44:31
गिनती 16:30
गिनती 16:33
व्यवस्था विवरण 32:22
1 शमूएल 2:6
2 शमूएल 22:6
1 राजा 2:6
1 राजा 2:9
अय्यूब 7:9
अय्यूब 11:8
अय्यूब 14:13
अय्यूब 17:13
अय्यूब 17:16
अय्यूब 21:13
अय्यूब 24:19
अय्यूब 26:6

भजन संहिता 6:5
भजन संहिता 9:17
भजन संहिता 16:10
भजन संहिता 18:5
भजन संहिता 30:3
भजन संहिता 31:17
भजन संहिता 49:14
भजन संहिता 49:15
भजन संहिता 55:15
भजन संहिता 86:13
भजन संहिता 88:3
भजन संहिता 89:48


भजन संहिता 116:3
भजन संहिता 139:8
भजन संहिता 141:7
नीतिवचन 1:12
नीतिवचन 5:5
नीतिवचन 7:27
नीतिवचन 9:18
नीतिवचन 15:11
नीतिवचन 15:24
नीतिवचन 23:14
नीतिवचन 27:20
नीतिवचन 30:16
सभोपदेशक 9:10
श्रेष्ठगीत 8:6
यशायाह 5:14
यशायाह 7:11
यशायाह 14:9
यशायाह 14:11
यशायाह 14:15
यशायाह 28:15
यशायाह 28:18
यशायाह 38:10
यशायाह 38:18
यशायाह 57:9
यहेजकेल 31:15
यहेजकेल 31:16
यहेजकेल 31:17
यहेजकेल 32:21
यहेजकेल 32:27
होशे 13:14
आमोस 9:2
योना 2:2
हबक्कूक 2:5

Tartaroō

2 पतरस 2:4

Questioned

मत्ती 3:7
2 पतरस 2:17




जिब परमेसवर ने अब्राहम ताहीं किते जाण खात्तर बुलाया था, तो उसने बिश्वास तै ए परमेसवर के हुकम ताहीं मानकै, एक इसी जगहां लिकड़ गया, जो जगहां परमेसवर अब्राहम ताहीं उसकी जायदाद के तौर पै देण आळा था, पर वो या कोनी जाणै था के वो कित्त जावै सै, अर वो फेर भी चला गया। - इब्रानियों 11:8

Israel's Exodus



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt!'" Exodus 13:17



Jesus' Journeys

वर्कें मै माणस का बेटा ज्यातै कोनी आया के अपनी सेवा-पाणी करवाडैं, पर ज्यातै आया के खुद सेवा-पाणी करूँ, अर घणखरयां के हुटकारै के खालर अपनी जान देऊँ। - मत्तुस 10:45



या चिट्ठी पौलुस की ओड़ तै सै, जो यीशु मसीह का दास सै अर परमेसवर के जरिये प्रेरित होण के खातर चुणया गया अर उसका सुसमाचार सुणाण खातर न्यारा करया गया सै। - रोमियों 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we? ▶			Genesis 1:26 - 2:3		Mankind is created in God's image, male and female He created us						
How are we sinful? ▶			Romans 5:12-19		Sin entered the world through Adam and then death through sin						
Where are we? ▶			When are we? ▼								
			Innocence		Fallen				Glory		
Who are we? ▶			Eternity Past	Creation 4004 B.C.	Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth		
			God	Father	John 10:30	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light				Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City
				Son	God's perfect fellowship		John 8:58 Pre-incarnate		John 1:14 Incarnate	Luke 23:43 Paradise	
				Holy Spirit			Psalm 139:7 Everywhere		John 14:17 Living in believers		
			Mankind	Living	Genesis 1:1 No Creation No people		Ephesians 2:1-5 Serving the Savior or Satan on Earth				
				Deceased believing			Luke 16:22 Blessed in Paradise				
				Deceased unbelieving			Luke 16:23, Revelation 20:5,13 Punished in Hades until the final judgment				
			Angels	Holy		Hebrews 1:14 Serving mankind at God's command					
				Imprisoned		2 Peter 2:4, Jude 6 Imprisoned in Tartarus					
				Fugitive		Genesis 1:31 No Fall No unholy Angels	Revelation 20:13 Thalaasa				
First Beast	1 Peter 5:8, Revelation 12:10			Revelation 19:20 Lake of Fire							
False Prophet	Rebelling against Christ Accusing mankind		Revelation 20:2 Abbyss								
Satan		Matthew 25:41 Revelation 20:10 Lake of Fire prepared for the Devil and his Angels									
Why are we? ▶			Romans 11:25-36, Ephesian 2:7		For God has bound all over to disobedience in order to show mercy to all						

Destiny

हरियाणवी at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, "*You did not choose me, but I chose you*," John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



इस करके थम जाओ, सारी जातों के माणसां ताहीं चेल्ला बणाओ; अर उननै पिता, पुत्र अर पवित्र आत्मा के नाम तै बपतिस्मा द्यो, - मत्ती 28:19